

A sunset over a body of water with silhouettes of people on a rocky shore. The sky transitions from deep purple at the top to a vibrant magenta and red near the horizon. The water is dark, and the silhouettes of people and rocks are prominent against the bright sky.

# Diža' güen che ancho Jesucristo

Zoogocho Zapotec New Testament

## Contents

DIŽA' GÜEN DAN' BZOJ SAN MATEO	1
DIŽA' GÜEN DAN' BZOJ SAN MARCOS	59
DIŽA' GÜEN DAN' BZOJ SAN LUCAS	93
DIŽA' GÜEN DAN' BZOJ SAN JUAN	151
DA' GOSON POSTLW CA'	193
CART DAN' BZOJ POSTLW SAN PABLO ĆHE BENE' CA' ŽE' ROMA	247
CART NECHW DAN' BZOJ POSTLW SAN PABLO ĆHE BENE' CA' ŽE'	272
CORINTO	
CART GWCHOPE DAN' BZOJ POSTLW SAN PABLO ĆHE BENE' CA' ŽE'	296
CORINTO	
CART DAN' BZOJ POSTLW SAN PABLO ĆHE BENE' GALACIA CA'	310
CART DAN' BZOJ POSTLW SAN PABLO ĆHE BENE' CA' ŽE' EFESO	319
CART DAN' BZOJ POSTLW SAN PABLO ĆHE BENE' CA' ŽE' FILIPOS	328
CART DAN' BZOJ POSTLW SAN PABLO ĆHE BENE' CA' ŽE' COLOSAS	334
CART NECHW DAN' BZOJ POSTLW SAN PABLO ĆHE BENE' CA' ŽE'	340
TESALÓNICA	
CART GWCHOPE DAN' BZOJ POSTLW SAN PABLO ĆHE BENE' CA' ŽE'	345
TESALÓNICA	
CART NECHW DAN' BZOJ POSTLW SAN PABLO ĆHE TIMOTEO	348
CART GWCHOPE DAN' BZOJ POSTLW SAN PABLO ĆHE TIMOTEO	356
CART DAN' BZOJ POSTLW SAN PABLO ĆHE TITO	361
CART DA' BZOJ POSTLW SAN PABLO ĆHE FILEMÓN	364
CART DAN' NYOJ ĆHE BENE' HEBREO CA'	366
CART DAN' BZOJ SANTIAGO	385
CART NECHW DAN' BZOJ POSTLW SAN PEDRO	392
CART GWCHOPE DAN' BZOJ POSTLW SAN PEDRO	399
CART NECHW DAN' BZOJ POSTLW SAN JUAN	403
CART GWCHOPE DAN' BZOJ POSTLW SAN JUAN	409
CART GWYONE DAN' BZOJ POSTLW SAN JUAN	410
CART DAN' BZOJ SAN JUDAS	411
JESUCRISTON' BZEJN'IDE' SAN JUANŅA' ĆHE DA' CA' ZA' GAC	414



## **Diža' güen che ancho Jesucristo**

**New Testament in Zapotec, Zoogocho (MX:zpq:Zapotec, Zoogocho)**

Language: Zapotec, Zoogocho

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 1987 Wycliffe Bible Translators, Inc.

Copyright © 1987 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

ea9cb0ce-2b76-5346-a798-450804f9fdd0

ISBN: 978-1-5313-0756-1

## DIŽA' GÜEN DAN' BZOJ SAN MATEO

### Ĥozxtao' Jesucriston'

(Lc. 3:23-38)

**1** Nga nyoj la bene' gosac ĥozxtao' Jesucriston' chzolaon len da' ĥozxta'ocho Abraham. Le Jesús'en' goque' xi'in diaža che da' David, na' da' Davin' goque' xi'in diaža che da' Abrahanna'.

<sup>2</sup>Abrahanna' goque' ĥa Isaac, na' Isaaquen' goque' ĥa Jacob, na' Jacoben' goque' ĥa Judá len yezica'chle bene' biše' ca'. <sup>3</sup>Judán' na' Tamar gosaque' ĥaxna' Fares na' Zara. Na' Faresen' goque' ĥa Esrom, na' Esronna' goque' ĥa Aram. <sup>4</sup>Na' Aranna' goque' ĥa Aminadab, na' Aminadaben' goque' ĥa Naasón, na' Naasónna' goque' ĥa Salmón. <sup>5</sup>Salmónna' na' Rahab gosaque' ĥaxna' Booz. Na' Boozen' na' Rut gosaque' ĥaxna' Obed. Na' Obeden' goque' ĥa Isai. <sup>6</sup>Na' Isain' goque' ĥa rey David, na' rey Davin' goque' ĥa Salomón. Na' xna' Salomónna' goque' xo'ol da' Urías cate' za' yeca'a rey Davin' le' par gaque' xo'ole'.

<sup>7</sup>Na' Salomónna' goque' ĥa Roboam, na' Roboanna' goque' ĥa Abías, na' Abíasen' goque' ĥa Asa. <sup>8</sup>Na' Asan' goque' ĥa Josafat, na' Josafaten' goque' ĥa Joram, na' Joranna' goque' ĥa Uzías. <sup>9</sup>Uzíasen' goque' ĥa Jotam, na' Jotanna' goque' ĥa Acáz, na' Acázen' goque' ĥa Ezequías. <sup>10</sup>Na' Ezequíasen' goque' ĥa Manasés, na' Manasésen' goque' ĥa Amón, na' Amónna' goque' ĥa Josías. <sup>11</sup>Josíasen' goque' ĥa Jeconías len yezica'chle biše' ca' gosenita' ca tiemp caten' bene' Babilonia ca' gosezene' bene' Israel ca' na' goseche'ĥoxje' legaque' Babilonian'.

<sup>12</sup>Gwde goc ca', golje Salatiel xi'in Jeconíasen'. Na' Salatielen' goque' ĥa

Zorobabel. <sup>13</sup>Na' Zorobabelen' goque' ĥa Abiud, na' Abiuden' goque' ĥa Eliaquim. Na' Eliaquinna' goque' ĥa Azor. <sup>14</sup>Na' Azoren' goque' ĥa Sadoc, na' Sadoquen' goque' ĥa Aquim. Aquinna' goque' ĥa Eliud. <sup>15</sup>Na' Eliuden' goque' ĥa Eleazar, na' Eleazaren' goque' ĥa Matán. Na' Matánna' goque' ĥa Jacob. <sup>16</sup>Nach Jacoben' goque' ĥa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

<sup>17</sup>Na' gwzolaon tiemp che da' Abraham bžinte tiemp che da' David gosac žta' diaža čhen', na' ca tiemp che da' David bžinte ca tiemp caten' gosezene' bene' Israel ca' goseche'ĥoxje' legaque' Babilonia, lecze gosac yežta' diaža čhen', na' ca tiempen' bžinten ca žan' golje Criston' ben' gwlej Diosen' cont yedenabi'e, gosac yežta' diaža čhen'.

### Can' goc cate' golje Jesucriston'

(Lc. 2:1-7)

<sup>18</sup>Na' quingan' goc cate' golje Jesucriston'. Ba naquen gwšagna' Marían' len José, na' za' ca'a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bchendao' bdao'na' lo' le'e. <sup>19</sup>Na' Joséna' ben' ba naquen si'e Marían' par gaque' xo'ole', goque' to bene' ben da' güen lao Diosen'. Na' bene' xbab cuejy-ichje' Marían' šižize cont nono gacbe'e na' cont bi gwsie le' zto'. <sup>20</sup>Šlac chone' xbab gone' ca' gwtase' na' to angl bene' gwseła' Xancho Diosen' blo'elagüe' le' lo bišgal. Na' gože' le':

—José, le' goljo' lo diaža che da' rey David. Bitw žebo' si'o Marían' par gaque' xo'olo'. Spiritw che Diosen' benen cont no'e bdao'na'. <sup>21</sup>Na' sane' to bi' byo dao' na' gwsio labe' Jesús, le' len' yeque'e xtoła' bene' gualaž che' ca' bene' yesejnilaže'ne'.

<sup>22</sup>Goc yogo' da' ca' cont goc can' gwna Diosen' dan' bzoj to ben' be'e xtižen' cani', gwne':

<sup>23</sup>To no'ol güego' no'ole ne' napši'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

<sup>24</sup>Na' cate' beban Josén' beyož gwne'de' yelen', bene' can' gož angl che Xancho Diosen' le', jaxi'e Marían' liže' par goque' xo'ole'. <sup>25</sup>Perw bi gwzoalene' le' ca xo'ole' san gwzoacze' le' respetw bžinte ža gwxxane' to bi' byo dao', xi'ine' nechw. Na' gwxi' labe' Jesús.

### Magos ca' jasene'e Jesúsen'

**2**Ca tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to chope magos Jerusalén, za'aque' to nación zito' dan' chi' do ga chla' gwbiž. <sup>2</sup>Na' gosenabde' bene' lo ciudan' gose'ene':

—¿Gan' rey che bene' Israel, ben' ba golje? Nežeto' ba golje', le ba ble'eto' beljw chen' cate' blan' lažto' dan' zoa gan' chla' gwbiž. Na' za'to' gonxento'ne'.

<sup>3</sup>Cate' gwneze rey Herodesen' can' gosenen', gocchgüe' tole, na' lecze ca' yogo'lo' bene' lo ciuda Jerusalénna'.

<sup>4</sup>Nach reyna' btobe' yogo'lo' bxož gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwne'abde' legaque' gan' naquen galje Criston' ben' gwlej Diosen' cont yedenabi'e. <sup>5</sup>Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' cani'. Quinga žan:

<sup>6</sup>Ca nac yež Belén gan' že' diaža che da' Judá,

nacczen yež da' zaca'chgua lao yež gwnabia' ca' zjachi' Judean'.

Le to bene' Belén gaque' bene' gwnabia', na' le' güia ne'e nación Israel chian'.

<sup>7</sup>Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyanen' besele'ede' bla' beljon'. <sup>8</sup>Nach gwsele' legaque' Belénna', gože' legaque':

—Le šja'ac na' le šjajdiljw bidao'na' tcho'a. Na' cate' yeže'lebe' le yeda yedyedixjue'ele neda' cont lecze ša'a šjenxena'be'.

<sup>9</sup>Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' bina' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen.

<sup>10</sup>Na' magos ca' besyebede' juisyw cate' besele'ede' beljon' da' yoble. <sup>11</sup>Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marían'. Nach bosozoa xibgaque' gosonxene'be'. Na' gosesaljo caj chegaquen' gosebeje' oro, yal na' to nechw da' chla' zix' da' nzi' mirra na' gosoen' chebe'. <sup>12</sup>Na' šlac ne' nita' magos ca' Belénna', Diosen' gwduxjue'ede' legaque' lo bišgal bich yesyedi'e gan' zoa rey Herodesen'. Da'nan' besyequ'e yeto nez yoble jaya'ac laže'.

### Bosoxnje' ja'aque' Egipto

<sup>13</sup>Na' cate' ba besyeya'ac magos ca', to angl che Xancho Diosen' blo'elagüe' Josén' lo bišgal, na' gože'ne':

—Gwyas, gwche' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yezale, le Herodesen' ba nžie' bia' yeyiljue' bidao'na' cont gote'be'.

<sup>14</sup>Nach ne' ze bxin gwyas Josén', gwche'e bida'ona' len xna'ben' zja'aque' Egipton'. <sup>15</sup>Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan'

bzoj to bene' be' xtiže'na' cani', gwne':  
 “Chixjue'eda' Xi'inan' yeze'e Egipton'.”

**Herodesen' gwsele' soldadw cont  
 gosote' yogo' bi' byo dao'**

<sup>16</sup> Na' rey Herodesen', cate' gocbe'ede' gosoŋe magos ca' le' dan' bich besyedie' gan' zoe'na', leca bže'e. Na' bsaque' con can' gwejni'ide' cate' gwnabde' legaue' batcan' bla' beljon', na' gwsele' soldadw che' ca' par jasete' yogo'loł bi' byo che'eŋ dao' zelao bi' chop ize, bi' ca' gosalje Belénna' na' yezica'chle yež ca' zjanyechj zjambi'i Belénna'. <sup>17</sup> Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

<sup>18</sup> Nente ši'i bene' Ramá, chesebežchgüe' nita'chgüe' yela' güine'. No'ole ca' zjanaque' xi'in diaža che da' Raquel chesyeyaše' chesyegüine'de' che xi'inda'ogaque' ca', na' bitw chesaclaže' no yeyoexenlaže' le-gaque', le ba gosatben'.

<sup>19</sup> Cate' got Herodesen', Josén' ne' zoe' Egipton'. Nach to angl che Xancho Diosen' blo'elagüe' Josén' lo bišgal, na' gože'ne':

<sup>20</sup> —Gwyas, beče' bidaon' len xna'be'na' na' le šjaya'ac Israel. Ba gosat bene' ca' besyeyiljw bidao'na' cont yesote'be'.

<sup>21</sup> Nach gwyas Josén' beče'e bidaon' len xna'ben' jaya'ac lažgaque' Israel.

<sup>22</sup> Perw Josén', cate' bende' Arquelao bezoe' chnabi'e latje che da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo bišgalen' bi cheyała' šjaya'aque' distritw Judean', san šjaya'aque' gan' mbane distritw Galilean'. <sup>23</sup> Da'nana' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' bene' goso'e xtiža' Diosen' cani', gosone': “Yososi'e Jesús'en' bene' Nazaret.”

**Juan ben' bzoa bene' nis  
 gwdixjue'ede' diža' güen che Diosen'**

(Mr. 1:1-8; Lc. 3:1-9, 15-17; Jn. 1:19-28)

**3** Na' gwde zan iz, Juan ben' bzoa bene' nis gwyeje' latje daš gan' mbane distritw Judean'. <sup>2</sup> Na' gwdixjue'ede' bene', gože' legaue':

—Le yetinje xtoła'le ca', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

<sup>3</sup> Che Juanna' bzoj da' Isaiásen' caten' bzoje' Xtiža' Diosen' cani', gwne': Bena' chne' zižje latje dašen', že':

“Le gonšagüe' yichjlažda'olen' cont soale lez gwzenagle che Xanchon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'.”

<sup>4</sup> Na' Juanna', xałane' goquen de yiša' xa camello. Na' da' bchej lšinen' goquen de yid, na' gwdagüe' biše'zo len šina' beser yixe'. <sup>5</sup> Bene' že' ciuda Jerusalénna' na' bene' že' yogo' yež ca' gan' mbane distritw Judean', na' lecze bene' že' yež ca' nychj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. <sup>6</sup> Na' cate' go-sexoadole' bi da' xinj zjanone', Juanna' bzoje' legaue' nis lo yegw Jordánna'.

<sup>7</sup> Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' le-gaque' nis. Nach Juanna' cate' ble'ede' le-gaque' gože'ne':

—¡Le'e nacchgualle bene' zgot na' bene' gwxiye! ¿Chaquele guac yelale lao castigw dan' sela' Diosen' caten' gone' yela' justis che benachen'? <sup>8</sup> Še da' li ba betinjele xtoła'len', cheyała' gonle da' nac güen cont yesacbe'e bene' ba boša' yichjlažda'olen'. <sup>9</sup> Na' bitw gonle xbab gaquele Diosen' bitw gone' le'e castigw che xtoła'len' lagüe dan' nacle xi'in di-aža che da' Abrahanna'. Bitw nacho leca

chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. <sup>10</sup>Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'. <sup>11</sup>Neda' da' li chzoa' le'e nis neče ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda'olen' nabian' le'e. Na' bene' ca' bi yeson can' chazlaže' Diosen', sełe' legaque' lo' yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'. <sup>12</sup>Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sełe' legaque' lo' yi' gabilen' dan' cbi cheyol chemit.

### Cate' gwzoa Jesúsen' nis

(Mr. 1:9-11; Lc. 3:21-22)

<sup>13</sup>Na' gwza' Jesúsen' gan' mbane Galilea na' gwyeje' gan' zoa Juanna' cho'a yegw Jordánna' cont Juanna' bzoe' le' nis. <sup>14</sup>Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedeňabo' gwzoa' le' nis.

<sup>15</sup>Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'loł dan' non Diosen' mandadw gac.

Nach gwčheb Juanna' bzoe'ne' nis. <sup>16</sup>Na' cate' beyož gwzoa' Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'. <sup>17</sup>Na' gosende' gwne' Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže'chgüeda' che'.

### Goclaže' gwxiyen' co'oyelan' Jesúsen' gone' da' mal

(Mr. 1:12-13; Lc. 4:1-13)

**4** Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

<sup>2</sup>Na' bitwbi gwdagw Jesúsen' lao čhoa ža čhoa yel, na' cate' gwde da' čhoa žana' gwdone'. <sup>3</sup>Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

<sup>4</sup>Nach gož Jesúsen' len:

—Nyojcze Xtiža' Diosen' žan: “Gague yela' guagw na'zen' chyažje chio' benach cont gac bancho, san lecze chyažjecho yogo'loł diža' dan' ža Diosen'.”

<sup>5</sup>Nach gwče' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe' sibe, <sup>6</sup>na' gožen le':

—Še len' naco' dogualje Xi'in Diosen', nga boslažo' cuino', le' nyojczen le'e Xtiža' Diosen', žan:

Sela' Diosen' bene' ca' zjanac angl che' yesaclene' le',

na' yesože' le' cont bi čhego' no yej.

<sup>7</sup>Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

<sup>8</sup>Da' yoble gwxiye'na' gozče'en le' to lo' ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen. <sup>9</sup>Nach gožen le':

—Yogo' da' quinga chle'edo' nga gonan' lo' nao' še gwzoa xibo' lagua' nga gonxeno' neda'.

<sup>10</sup>Nach gož Jesúsen' len:

—Beyej ca'ale Satanás. Nyojczen le'e Xtiža' Diosen' žan: “Cheyala' šejnilaže'cho Xancho Diosen' na' toze le' gonxencho.”

<sup>11</sup> Na' becuase Satanásen' cuite'na' beyejen ga yoble nach besežin to čhope angl čhe Diosen' jasaclene' le'.

**Jesúsen' gwzologüe' chyixjue'ede' diža' güen čhe Diosen' distritw Galilea**

(Mr. 1:14-15; Lc. 4:14-15)

<sup>12</sup> Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya. <sup>13</sup> Na' gwze'e yež Nazareten' jasoe' ciuda Capernaum dan' chi' cho'a nesdaon' do gan' zjachi' distritw dan' zjanzi' Zabulón na' Neftalí. <sup>14</sup> Na' dan' jayzoe' ciudan' goc can' gwna da' Isafas ben' be' xtíža' Diosen' cani' caten' bzoje' dan' ža:

<sup>15</sup> Ca nac distritw Galilea gan' že' zan bene' cbi zjanaque' bene' Israel, gan' nita' distritw Zabulón na' distritw Neftalí dan' zjambane yešla'ale nesdaon' na' yegw Jordán,

<sup>16</sup> nčhol yichjlaždao' bene' ca' že' na'. Perw Diosen' gwsele' to bene' gwlo'o to be'ni' xen lo' yichjlažda'ogaquen'.

Gosaque' ca bene' guat len yichjlažda'ogüen' le gosone' da' malen',

perw bena' gwseła' Diosen' ba bocobe' yichjlažda'ogaquen'.

<sup>17</sup> Cana' gwzolao Jesúsen' gwduxjue'ede' gwne':

—Le yetinje xtoła'len', le ba bžin ža cate' Diosen' ben' zoa yaban' nabi'e yichjlaždao' bene' yosozenague' čhe'.

**Jesúsen' gwleje' tap bene' gwxen bel cont gosaque' txen len le'**

(Mr. 1:16-20; Lc. 5:1-11)

<sup>18</sup> Na' zej Jesúsen' cho'a nesda' čhe Galilea cate' ble'ede' čhope bene' gwxen bel, Simón Pedro na' bene' biše' Andrés, na' zjanite' chosozale' yixjw dan' chesezende' belen' lo' nisa'. <sup>19</sup> Nach gože' legaque':

—Le šo'o len neda'. Nacle bene' gwxen bel, na' chbejle bel lo' nis, perw na'a

gona' cont gaxle bene' yesyechoje' lo da' malen'.

<sup>20</sup> Na' la' gosebejyichjte' yixjw čhen' nach ja'aclene' Jesúsen'.

<sup>21</sup> Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjayo'e to lo' barcw len xagaque', chesyeyonšagüe' yixjw čhegaquen'. Na' lecze gox Jesúsen' legaque' šja'aclene' le'. <sup>22</sup> Na' la' gosontie' barcon' lo na' xagaque' Zebedeon' na' ja'aclene' Jesúsen'.

**Jesúsen' bsd blo'ede' bene' zan**

(Lc. 6:17-19)

<sup>23</sup> Na' Jesúsen' gwyeje' yogo' yež ca' zjachi' gan' mbane Galilea, bsd blo'ede' bene' ca' zjaže' to to yodao' čhe chio' bene' Israel. Na' gwduxjue'ede' diža' güen can' nabia' Diosen' yichjlaždao' bene' yosozenag čhe'. Na' Jesúsen' beyone' bene' ca' chese'e bite'teze yižgüe'. <sup>24</sup> Na' doxen nación Siria gwxa diža' yogo' da' güen da' ben Jesúsen'. Nach bene' Siria ca' jasesane' yogo' bene' chesacšene lagüe'na', bene' chese'e zan yižgüe', bene' chesey chesela, bene' zjayo'o zjanyaz da' xigüe' yichjlažda'ogaque' len bene' chesaz šon na' bene' natsi' cuerp čhegaquen'. Na' beyone' legaque'. <sup>25</sup> Na' zan bene' gosao' le', bene' za'ac distritw Galilea na' distritw Decápolis, na' bene' za'ac ciuda Jerusalén, na' bene' za'ac yezica'chle yež da' zjachi' distritw Judea, na' bene' za'ac yešla'a yegw Jordán.

**Diža' dan' bsd blo'e Jesúsen' to lo ya'a**

(Lc. 6:20-23)

**5** Na' Jesúsen' cate' ble'ede' bene' zan zjanžag, na' gwloe' gwchi'e to lo ya'a. Na' bene' ca' zjanaque' le' txen gosebigue' gan' chi'ena'. <sup>2</sup> Nach gwzolao bsd blo'ede' legaque', gwne':

<sup>3</sup>—Mbalaz zoa le'e chache'ele chyažjele gaclen Diosen' le'e, le ba



chzenagle che Diosen' cont chnabi'e yichjlažda'olen'.

<sup>4</sup>Mbalaz soa le'e chacyaše'laže'le, le Diosen' yeyoe'xenlaže' le'e.

<sup>5</sup>Mbalaz zoa le'e chzexjwlaže'le len Diosen' na' len beṇachen', le gon Diosen' cont gac lo na'le doxen yežlion' can' gwne'.

<sup>6</sup>Mbalaz zoa le'e chzelaže'chgual gacle beṇe' güen len Diosen', le ba cheyon Diosen' le'e beṇe' güen lagüen'.

<sup>7</sup>Mbalaz zoa le'e cheyaše'le beṇe' yoble, le lecze ca' Diosen' yeyaše' yeži'ilaže'de' le'e.

<sup>8</sup>Mbalaz zoa le'e ba nacle beṇe' laždao' xilaže', le šjayzoale txen len Diosen'.

<sup>9</sup>Mbalaz zoa le'e chego'ole yela' chxenlaže' che beṇe' chesedile, le Diosen' ne' nacle xi'ine'.

<sup>10</sup>Mbalaz zoa le'e chosoči chososaca' beṇe' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

<sup>11</sup>Na' mbalaz soale še dan' chejni-laže'le neda' chesezi'diža' beṇe' le'e na' chososaca'zi'e le'e na' chosoxie' diža' güenlaže' chele. <sup>12</sup>Le yebechgüe na' le soa mbalaz, le Diosen' gone' cont gac-chgua da' güen chele cate' yežinle gan' zoe'na'. Can' chesonde' le'e, ca'czen' goston da' xozxta'ocho len da' beṇe' ca' goso'e xtiža' Diosen' cani'.

**Naccho ca zede' na' ca be'ni' len  
beṇe' že' yežlio nga**

(Mr. 9:50; Lc. 14:34-35)

<sup>13</sup>Le'e nacle ca zede', le zede' chaclenen cont bi cuiayi' no yid bela', na' le'e chonle cont beṇachen' cbi cheson-teque' da' mal. Perw še zeden' bich bi zxi' naquen, ħnacxe goncho cont yeyaquen zxi' da' yoble? Na' bich bi zacan', lete cho'onchon na' gwlej gwšošj beṇe' len. Na' le'e še cbich gonle can' chazlaže' Diosen', nacle ca zede' dan' bich bi zxi' naquen.

<sup>14</sup>Na' le'e nacle ca be'ni' dan' chaclenle beṇe' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze beṇe' chesele'eden'. <sup>15</sup>Notno gwguala' to yi' na' gwdosen' to caj, san chde'en le'e ze'e cont chsenin' len yogo' beṇe' že' lo' yo'ona'. <sup>16</sup>Na' ca nac le'e, cheyała' soateze soale gonle da' güenna' cont yesele'e beṇe' na' yesonxene' Xacho Dios ben' zoa yaban'.

**Jesúsen' bsed blo'ede' can'  
ža ley dan' bzoj da' Moisés**

<sup>17</sup>Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle beṇe' ca' goso'e xtiža' Diosen' cani' bich yesonen žin. Za'a cont gac can' že yogo'loj Xtiža' Diosen' dan' bosozoj beṇe' ca'. <sup>18</sup>Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e leyna' bi gac yexin, san gac yogo'loj dan' nžia' bia' Diosen' gac. <sup>19</sup>Da'nan' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele beṇe' yoble bi yosozenague' chen, Dios ben' zoa yaba chnabi'e ne' bi nacle beṇe' blao len le'. Na' note'tezle še gonle can' žanna', na' še lecze gwlo'ele beṇe' yoble yesone' ca', Diosen' ben' zoa yaba chnabi'e ne' nacle beṇe' blao len le'. <sup>20</sup>Chnia' le'e, beṇe' fariseo ca' na' beṇe' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clcl ca che beṇe' ca', bitw yežinle yaban' gan' zoa Diosen' chnabi'e.

**Da' malen' choncho še chža'a lježcho**  
(Lc. 12:57-59)

<sup>21</sup>Na' lecze bsed blo'e Jesúsen' le-gaque' gože'ne':

—Ba nezele can' bzejni'i Moisésen' bene' ca' gosenita' cani', gwne': "Nono gotle. Na' še no got ljež benache', justis ca' yesechoglagüe' che' cheyała' gate'."

<sup>22</sup>Na' neda' žia' le'e, note'tezle še chža'a ljež benachle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson' bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

<sup>23</sup>'Cheyała' soacho binlo len ljež benachcho. Na' la'czła' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle, <sup>24</sup>na'ze cheyała' gwcu'a'anle šlož dan' noxe'len' na' šjenle cont yezoale binlo len bene' lježlen'. Yeyoža' guaque šjasanle dan' ba gwlejele cont gonxenle Diosen'.

<sup>25</sup>'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yoseseyjue' le'e ližya. <sup>26</sup>Da' li žia' le'e, bitw yebeje' le'e še biña' chixjwle doxen dan' čala'le.

### Da' malen' choncho še chzoa xtocho

<sup>27</sup>'Ba nezele ley dan' bzoj da' Moisésen' žan: "Bitw gata'lenle no'ole bi nac no'ol chele o bene' byo bi nac bene' chele." <sup>28</sup>Na' neda' žia' le'e, note'tezle še chna'le to no'ole na' chzeláže'lene', ba napple doła'. Le tozeczce ca malen' ba chonle lo' lažda'olen' len dan' chon bene' chzoa xtoe'.

<sup>29</sup>'Na' še yejlaolen' chonen cont gonle da' xinj, cheyała' cuejyichjle da' malen' chonle. Yejni'a cuiayi' yejlaolen' clcl ca cuiayi'le lo yi' gabilen' neche len. <sup>30</sup>Na'

še na'le chonen cont gonle da' xinj, cheyała' cuejyichjle da' malen' chonle. Yejni'a cuiayi' na'le clcl ca cuiayi'le lo yi' gabil neche len.

### Bene' ca' zjanšagna' bitw cheyała' yesyele'e

(Mt. 19:9; Mr. 10:11-12; Lc. 16:18)

<sup>31</sup>'Lecze nezele ley dan' bzoj da' Moisésen' žan: "Note'teze bene' yele'e len no'ol che', cheyała' chas to yiš ga güen' diža' le besyele'ena'." <sup>32</sup>Na' neda' žia' le'e note'teze bene' chele'e len no'ol che', len neztede' no'ole chen' bitw naque' to no'ole chzoa xtoe', chone' cont gaque' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

### Jesúsen' bzejni'ide' cheyała' güe'cho diža' li

<sup>33</sup>'Na' lecze ba nezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyała' gonle con can' ba gwnalen'." <sup>34</sup>Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e. <sup>35</sup>Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalénna' zoan testigw chia' cho'a diža' li", le naquen ciuda che Dios ben' naque' la'zelagüe bene' chnabia'. <sup>36</sup>Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjen' yesyeyaquen da' šiš o yesyeyaquen da' gasj. <sup>37</sup>Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

**Bitw co'olaže'cho bene'  
cheseque'ede' chio'**

(Lc. 6:29-30)

<sup>38</sup>Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'." <sup>39</sup>Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. <sup>40</sup>Še to bene' chagüe' xya na' che'nde' que'e xcamisle, le güe' latje que'e len xadon chelen'. <sup>41</sup>Na' še to bene' blao gone' byen šejlenlene' gua'le yoa' chen' do gašj hor, le šejlene' le guan chop ca'te'le. <sup>42</sup>Na' še bi dan' chñabe bene' le'e, le güen'. Na' le cuej še bi da' chñabe' cuejlene'.

**Cheyała' gaquecho bene' chgue'e chio'**

(Lc. 6:27-28, 32-36)

<sup>43</sup>Na' lecze ba nezele ley chelen' žan: "Cheyała' gaquele bene' migw chele na' gue'ele bene' chgue'ede' le'e." <sup>44</sup>Perw neda' žia' le'e, cheyała' gaquele bene' chgue'ede' le'e, na' cheyała' nabele Diosen' gac güen che bene' chesezi'diže' le'e. Le gon binlo len bene' cheseque'ede' le'e, na' le yol güiž Diosen' cont gac güen che bene' ca' chososacazi'e le'e. <sup>45</sup>Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. <sup>46</sup>Še chaquele šinze bene' chacde' le'e na' bi chaquele bene' yoble ċbixchen' chbezle gon Diosen' da' güen chele? Con can' cheson bene' güečhixjw ca' chonle, bene' ca' žale zjanaque' bene' xi'achgua. <sup>47</sup>Na' še con chguaple tiox bene' biše' lježle ca'ze ċchaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'.

<sup>48</sup>Cheyała' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

**Jesúsen' blo'ede' naquen' cheyała'  
goncho da' chazlaže' Diosen'**

**6** 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. <sup>2</sup>Da'nan' cate' gwnežjwle to bene' da' chyažjde', bitw gwnežjwlen par yeseneze bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen chegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. <sup>3</sup>San le'e, še bi da' gwnežjwle to bene', le gwnežjon šižize. <sup>4</sup>Gonlen ga cbi yesacbe'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

**Bsed blo'e Jesúsen' nac  
cheyała' yol güižcho Dios**

(Lc. 11:2-4)

<sup>5</sup>'Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosoļ güiže'ne' lo' yodao' chegaque', na' do squin chanez. Chesone' ca' cont yesele'e bene' can' chesone'na'. Da' li žia' le'e, ba gosacxenczen' lagüe da' chesone' ca', perw Diosen' bitw gone' ga gac güen chegaque' še ca'. <sup>6</sup>Na' cate' yol güižle Diosen', le yeyo'o lo' yo'o chele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

<sup>7</sup>'Na' cate' yoł güižle Diosen' bi gü'e'le diža' zan can' cheson beņe' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. <sup>8</sup>Bitw gonle can' chesone'na'. Ca nac Xacho Diosen', cate' za' nabelenen' ba nezcze' bi dan' chyažjele. <sup>9</sup>Quinga yoł güižlene': Xato beņe' zoa yaba, chnabto' yogo'loł beņe' yesonexene' le'.

<sup>10</sup>Zelaže'to' nabi'o yichjlaždao' yogo' neto' beņach. Gacšca can' chazlažo' yežlio nga can' chac yabana'.

<sup>11</sup>Ca nac dan' che'ej chagwto' tža tža, beņšcan na'a.

<sup>12</sup>Na' bezi'xenšca cheto', le lencze neto' chezi'xento' che ljež beņachto' bite'teze da' chesonde' neto'.

<sup>13</sup>Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' beņe' zaca' juisyw toli tocaņe. Ca'czen' gacšca.

<sup>14</sup>'Na' še chezi'xenle che ljež beņachlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoła'len'. <sup>15</sup>Perw na' še le'e bi chezi'xenle che ljež beņachle, lecze ca' Xacho Diosen' bitw yezi'xene' chelen'.

### Jesúsen' bzejni'ide' nac goncho gwbas

<sup>16</sup>'Cate' le'e gonle gwbas cont gonxenle Diosen', bitw gon cho'alaolen' ca che beņe' chegiüne'chgüe', can' cheson beņe' gwxiye' ca'. Legaque' chesone' ca' contze chesele'e beņe' le chesone' gwbas na' yesonexene' legaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. <sup>17</sup>San le'e cate' gonle gwbas, le gwpa'a yichjle na' le chib cho'alaole. <sup>18</sup>Le gon ca' cont bi yesacbe'e beņe' chonle gwbas, san gacbe'e toz Xacho Dios ben' zoa len chio' la'czla'

bi chle'echone'. Na' Xacho Diosen' ben' chle'e yogo' da' choncho gone' cont gacxenle.

### Da' ca' zjazaca'chgua yaba gan' zoa Diosen'

(Lc. 12:33-34)

<sup>19</sup>'Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Bał da' zjade yežlio nga chesaljen be dao' chesagwban', na' yebalen chesezen xche'en, na' lecze chaš beņe' gwban na' yeseque'en. <sup>20</sup>San le gaque Diosen' cont gone' da' šagüe' da' güen chele da' bi te chen cate' yežinle yaban' gan' zoe'na', da' bi šo'ba', na' neca sen xche'en, na' neca gac šo' beņe' gwban yeseque'en. <sup>21</sup>Le gan' de dan' chaquelen' na' zoa yichjlažda'olen'.

### Žia yejlaochi cont chle'echo

(Lc. 11:34-36)

<sup>22</sup>'Žia yejlaole cont chle'ele. Še bitw bi chaquen, chle'eczele binlo. <sup>23</sup>Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchoł yichjlažda'ole še bi chzenagle che Diosen'.

### Bitw gac gaquecho Diosen' na' gaquetecho mechw

(Lc. 16:13)

<sup>24</sup>'Notno gac gon žin len chope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' to chža'alaže'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle beņe' gwni'a.

### Diosen' chapši'e xi'ine' ca'

(Lc. 12:22-31)

<sup>25</sup>'Da'nan' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le che xałana'le. Zaca'ch yela' mban chelen' ca' yela' guagw. Lecze

ca' cuerp chelen', zaca'chen ca xałana'le.  
<sup>26</sup>Le gon xbab ca nac be ca' zjažia xil ben'  
 chesaš lo be', bitw chesazba', bitw chese-  
 lapba', neca zoa da'a xoa' chęgacba',  
 perw na' Xacho Diosen' ben' zoa yaba  
 chguagwczęba'. iNacchle zaca' le'e ca be  
 ca' zjažia xilen!' <sup>27</sup>Na' ne tole bi gac yos-  
 ton cuinle gašje metr še con cue' yichjle  
 tonle.

<sup>28</sup>'Na' i bixchen' chbec yichjle  
 xałana'le? Le gon xbab ca nac yęj ca'  
 da' zjaze yixę' chesecha'oczen'. Bibi žin  
 chesonen, neca chesaljen do. <sup>29</sup>Na' žia'  
 le'e, da' rey Salomón gocue' lache' güen  
 juisyw, perw bitw bežinlaže' xałane'na'  
 ca yęła' xdan che yęj ca'. <sup>30</sup>Diosen'  
 none' xdan da' ca' ze yixęn' la'czła'  
 to chop žaze nitan' na' chosozeyen'.  
 Nacchxe gon Diosen' len le'e gwleccze  
 yichję' gone' yogo' da' chyažjele, le'e  
 late' lasze chejle'le che'. <sup>31</sup>Da'nana' bitw  
 cuęc yichjle che bi dan' chyažjele, nale':  
 "iBin' ye'ęj gagwcho na' bin' gacwcho?"  
<sup>32</sup>Beņe' ca' bi chesonxene' Diosen' con  
 chesoe'laže' bi da' gata' yese'ęj yesagüe'  
 na' che xałana'gaque'. Perw Xacho  
 Diosen' ben' zoa yaban' nezcze' bi  
 da' ca' chyažjele. <sup>33</sup>Cheyała' güe'laže'le  
 gwzenagle che Diosen' cont nabi'e  
 yichjlažda'olen' na' cont gacle beņe'  
 güen len le', lenna' naquen da' žialaoch,  
 na' yogo' da' ca' chyažjele, goncze  
 Diosen' len. <sup>34</sup>Bitw cuęc yichjle che bi  
 dan' gac gwęe güižj, le decze da' cuęc  
 yichjcho tža tža. Da'nana' to to ža con  
 cuęc yichjcho che dan' chac ca hora'.

**Bitw zaca'cho nacho  
 zjanap beņe' doła'**

(Lc. 6:37-38, 41-42)

**7**'Bitw gonle xbab zaca'le nale beņe'  
 zjanape' doła'. Še nale che beņe'  
 zjanape' doła', ca'cze Diosen' ne' le'e  
 naple doła'. <sup>2</sup>Can' chosbaga'le beņe'  
 žale zjanape' doła', lecze can' yosbaga'  
 Diosen' le'e ne' naple doła'. Con can'

chonle len beņe', lecze can' gon Diosen'  
 len le'e. <sup>3</sup>iBixchen' chna'le beb dao'  
 dan' yo'o lo' yęjlao beņe' lježle na' bi  
 chacbe'ele naquech beb xen dan' yo'o  
 lo' yęjlaolen'? <sup>4</sup>Na' še le'e yo'o to da'  
 xench lo' yęjlaolen' i nacchęchen' che'le  
 beņe' lježlen': "Beņe' yebeja' beb dao' dan'  
 yo'o lo' yęjlaguon'?" <sup>5</sup>iBeņe' güęxoayag!  
 Zgua'tec le yebej beb xen dan' yo'o lo'  
 yęjlaolen', nach le'ele binlo cont yebejle  
 dan' yo'o lo' yęjlao beņe' lježle.

<sup>6</sup>'Perw bitw güe'tezle xtiža' Diosen'  
 len beņe' ca' cheson yichjlaogüe' cbi  
 chesaclaže' yosozenaguen', le xož  
 yesonde' le'e znia ca cheson bał beco' še  
 bi chazlaže'ba' bi da' chosonežjue'ba'.  
 Na' še güe'tezle xtiža' Diosen' len beņe'  
 ca' cheson yichjlaogüe', xož yosolej  
 yosošošje' diža' dan' güe'lenlene'. Ca'  
 cheson coš len da' cbi chesaclaže'ba'  
 yesagwba'.

**Le nabe Diosen' bi dan'  
 nabelene', le gonczen'**

(Lc. 11:9-13; 6:31)

<sup>7</sup>'Še žan bi da' chyažecho, chnabchon.  
 Še žan to da' chaclaže'cho želecho, chy-  
 iljwchon. Še žan chaclaže'cho saljw beņe'  
 puert che' na' necho cho'a puerta' cont  
 saljue'. Na' ca'cze cheyała' ye'le Diosen'  
 cate' bi da' chyažjele, o bi da' chaclaže'le  
 gone'. <sup>8</sup>Na' note'tezle še bi da' chnabe-  
 lene', gonczen'. Na' še bi dan' che'nele  
 nezele, gwzejni'iczen' le'e. Na' še žan  
 chaclaže'le gac to da' gac, yoł güižle  
 Diosen' can' chon to beņe' chnie' cho'a  
 puert, nach Diosen' gone' cont gacczen.

<sup>9</sup>'Na' le'e xa' bidao', še xi'inle nabebe'  
 le'e yetextil i gwnežjwlebe' to yęj? <sup>10</sup>Na'  
 še nabbe' yid bel gagwbe', i gwnežjwlebe'  
 to be xigüe'? <sup>11</sup>La' nacle beņe' mal,  
 nezele chnežjo xi'inle to da' güen. Nac-  
 chxe güen gon Xacho Diosen' ben' zoa  
 yaban' len beņe' chnab lagüe'na' bi dan'  
 chyažjde'.

<sup>12</sup>'Na' con yogo' da' güen da' cha-claže'le yeson beṇachen' len le'e, lecze ca' cheyała' gonle len legaque', le can' zejen da' nyoj le'e ley dan' bzoj da' Moisésen' na' dan' bosozoj da' beṇe' ca' gosoe xtiža' Diosen' cani'.

**Nez da' yežin yaban'  
zaca'leben ca to nez las**

(Lc. 13:24)

<sup>13-14</sup>'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' beṇe' zan cheseque'en. Perw cheyała' gonle byen šole nez güenna' la'czla' chaquele naquen ca to nez las, to nez zdebe, le nez malen' chežinen gabil gan' saca'zi'le toli tocanē. Na' nez güenna' chežinen yaba ga banle toli tocanē.

**Dan' choncho chlo'en bin'  
yo'o lo' yichjlažda'ocho**

(Lc. 6:43-44)

<sup>15</sup>'Cheyała' gwsacale cont bi šejle'le xtiža' beṇe' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclaže' gonle xbab zjanaque' beṇe' güen. Perw zjanaque' beṇe' laždao' xi'a na' chesaclaže' yosožiaye'e le'e. <sup>16</sup>Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' nēca yag lay chbian yixgüigw. Ca'czen' cheyała' gacbe'ele beṇe' ca' yeseziye'e le'e cate' le'ele dan' chesone'na'. <sup>17</sup>Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian. <sup>18</sup>Bitw nacho to yag frut güen chbian frut da' bi nac güen, na' nēca nacho dan' bi nac güen chbian da' nac güen. <sup>19</sup>Na' yogo'te yag frut da' bibi chbia, chog

xan yaga' len na' gwzeyen'. <sup>20</sup>Na' can' nac dan' cheson to to beṇe', nezecho še zjanaque' beṇe' güen o beṇe' mal.

**Gague yogo' beṇe' yesyežine'  
gan' zoa Diosen' chnabi'e**

(Lc. 13:25-27)

<sup>21</sup>'Beṇe' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Beṇe' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'. <sup>22</sup>Cate' žin ža yosodie' cuent lao Diosen', beṇe' zan yesi'e neda': "Xana', goclen neto' na'a, le ba gwdixjue'to' xtižo'na'. Na' lecze ca' bza' bzetjto' lao bebejto' da' xigüe' ca' zjajo'o zjanyaz yichjlaždao' beṇe'. Na' lecze bza' bzetjto' lao'na' bento' da' zan yela' guac." <sup>23</sup>Perw na' yapa' legaque': "Bitw nombi'a le'e. Le šjaya'ac ca'ale le'e beṇe' güen da' xinj."

**Chope beṇe' na' yo'o da' chon to toe'**

(Mr. 1:22; Lc. 6:47-49)

<sup>24</sup>'Beṇe' chzenag xtiža'na' na' chone' can' žia'na' zaca'lebde' ca to beṇe' sina' beṇe' ben liže' na' gwdixjue' lenen len yej gual. <sup>25</sup>Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej. <sup>26</sup>Na' beṇe' chzenag xtiža'na' perw bitw chone' can' žia'na', zaca'lebde' ca to beṇe' tont beṇe' bzoa ližen lo yox. <sup>27</sup>Na' goc yejw zil juisyw'na' na' betj yegon' gwyechjen liže'na' na' gwyechj be' bdono'. Nach ližen' bebixen gwžiyain'.

<sup>28</sup>Na' cate' beyož be' Jesüsen' diža' ca', beṇe' ca' že' na' besyebande' can' bsed blo'eden'. <sup>29</sup>Le can' bzejni'ide' nacbia' neзде' cayanen' nac xbab che Diosen', gague bzejni'ide' can' chosozejni'i beṇe' ca' chososed chosolo'e ley dan' bzoj da' Moisésen'.

**Jesúsen' beyone' to bene'  
che'ede' yižgüe' dan' nzi' lepra**

(Mr. 1:40-45; Lc. 5:12-16)

**8** Bene' zan zesyenagüe' Jesúsen' cate' beyetje' ya'ana'. <sup>2</sup>Nach to bene' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

<sup>3</sup>Nach Jesúsen' bli' ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca' nac yižgüe' dan' che'ede'. <sup>4</sup>Nach Jesúsen' gože' le':

—Notno yo'o can' ba beyona' le'. Con gwyej jana' bxoza' cont le'ede' bach beyacdo'. Na' bnežjw da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

**Jesúsen' beyone' xmos to soldadw**

(Lc. 7:1-10)

<sup>5</sup>Na' cate' bežin Jesúsen' Capernaum to xan soldadw bene' Roma la' bšagte' le'. Na' gota'yoede' Jesúsen', <sup>6</sup>gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

<sup>7</sup>Nach Jesúsen' gože' xan soldadoa':

—Sa'lena' le' na' yeyona'ne'.

<sup>8</sup>Perw na' xan soldadoa' gože'ne':

—Xana', bitw naca' bene' zaque' par sa'o liža'na'. Ngateze ben mandadw yeyac xmosan' na' yeyacce'. <sup>9</sup>Neda' zoa bene' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe': "Gwyej", na' cheje', na' cate' chapa' yetoe': "Da", na' chide', na' cate' chapa' xmosa': "Da' nga gono", na' chonen'. Nan' nezda' con nao' yeyac xmosan' na' yeyacce'.

<sup>10</sup>Na' Jesúsen' cate' bende' xtiža' xan soldadoa' bebande' na' gože' bene' ca' zjanagüe' le'na':

—Da' liče žia' le'e, ne toze bene' Israel biña' šejnilaže'chgüe' neda' ca' bengabi naque' bene' Israel. <sup>11</sup>Žia' le'e, bene' zan za'ac doxen yežlion' šjasyenite' txen len da' xoxxta'ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'. <sup>12</sup>Na' ca' nac bene' nación Israelen' ben' gwlej Diosen' cont yesenite' len le', choj bene' zan bitw yesejnilaže' neda'. Da'nana' sele' legaque' lo' yi' gabil' gan' nac chol' na' yesebežyaše' na' yesagwxejte laye' dan' yesežaglaochgüe'.

<sup>13</sup>Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactede'.

**Jesúsen' beyone' taobi'in che Pedroa'**

(Mr. 1:29-31; Lc. 4:38-39)

<sup>14</sup>Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la. <sup>15</sup>Jesúsen' bexae' ne'e na' la' bechojtie' da' lan'. Nach la' gwyste no'olen' bsiñi'e da' gose'ej gosagüe'.

**Jesúsen' beyone' bene' zan**

(Mr. 1:32-34; Lc. 4:40-41)

<sup>16</sup>Na' cate' ba gwxin, besežin bene' gan' zoa Jesúsen' zjanči'e bene' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' bene' ca' chesacšene. <sup>17</sup>Bene' ca' cont goc can' ža Xtiža' Diosen' dan' bzoj da' Isaías che' cani', žan: "Le'na' yeque'e yela' chžaglao checho na' yeque'e yogo' yižgüe' chechon'."

**Can' gož Jesúsen' bene' ca'  
gosacłaze' yesa'ogüe' le'**

(Lc. 9:57-62)

<sup>18</sup> Gwde na' ble'e Jesúsen' ba besežin bene' zan zjanyechjde' le', nach bene' mandadw len bene' ca' zjanaque' le' txen cont yeselague' yešła'a nisdawn'. <sup>19</sup> Na' bchoj to bene' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

<sup>20</sup> Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža, neda' naca' ben' gwsela' Diosen' golja benach.

<sup>21</sup> Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Benšca latje zgua'tec šjaycuaša'ne'.

<sup>22</sup> Jesúsen' gože'ne':

—Yo'o len neda'. Bene' ca' zjanac yichjlažda'ogüe' ca' che bene' guat, le-gaque' guacze yosocuaše' yezica'chle bene' guat.

**Jesúsen' bcueze' to  
be' bdono' lo nisdaw'**

(Mr. 4:35-41; Lc. 8:22-25)

<sup>23</sup> Beyož be' Jesúsen' diža' ca', gwyo'e lo' barcon' len bene' ca' zjanaque' le' txen.

<sup>24</sup> Na' šlac zej barcon' lo nisen' gwzolao gwyechj to be' bdono' na' nisdawn' leze chas chatan' na' gwzolao cheyož nis lo' barcon', perw ba chtas Jesúsen'. <sup>25</sup> Nach bosyosbane' le' gosi'ene':

—¡Xanto! ¡Bosla chio! ¡Bach chbiayi'cho!

<sup>26</sup> Nach Jesúsen' gože' legaque':

—¿Bixchen' chžebtecle ca'? ¿Nacx-echen' bi chejle'le chia'?

Na' gwyase' na' gwdile' be' bdonon' len nisdawn', na' la' gosebe'žiten. <sup>27</sup> Na' bene'

ca' zjanaque' Jesúsen' txen besyebande' can' bene'na', nach gose' lježgaque':

—¿Noxe benga? lente be' bdonon' na' len nisdawn' chosozenaguen che da' že'.

**Chope bene' Gadara zjajo'o  
zjanyaze' da' xigüe'**

(Mr. 5:1-20; Lc. 8:26-39)

<sup>28</sup> Na' besežine' yešła'a nisdawn' gan chi' laž bene' Gadara ca'. Na' cate' be-choj Jesúsen' lo' barcoa bosošag chope bene' le', bene' zjajo'o zjanyaz da' xigüe' yichjlažda'ogaque'. Bene' quinga ba nite' capsantw na' gosacchgüe' bene' znia juisyw len bene' chesyežague' na' gague no chac ta tnez. <sup>29</sup> Na' bososye'e gose'e Jesúsen':

—¿Bixchen' chgoša' chlaže' chio' len neto', Jesús? Naco' dogualje Xi'in Dios. ¿Zao' gwsaco' neto' na'a cate' bina' žin ža si'to' castigw?

<sup>30</sup> Na' gala'ze chesaš zan coš chesag-wba'. <sup>31</sup> Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' bene' quinga, gwsela' neto' gan nita' coš ca' na' ben latje šjajo'oto' yichjlažda'oban'.

<sup>32</sup> Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeyetjses coš ca' le'e ya'a gan nita'ban', na' jasełaž'ba lo' nisdawn' ga gosatba' gose'ejba' nis.

<sup>33</sup> Na' bene' ca' chosoyoe' cošen' besele'ede' dan' ba goquen na' bosyoxonje' jasyeyeže' bene' lagüe' yež yogo' can' ba goquen' na' can' ba besyeyac bene' ca' goso'o gosaz da' xigüen' yichjlažda'ogaquen'. <sup>34</sup> Nach yogo' bene' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.



**Jesúsen' beyone' to bene'  
bi chda šla'a ni'a ne'e**

(Mr. 2:1-12; Lc. 5:17-26)

**9** Nach Jesúsen' beyo'e lo' barcon' len bene' ca' zjanaque' le' t xen besyelaque' yešla'a nesdaon' par besyežine' Capernaum gan' ba gwzoacze' sša. <sup>2</sup>Na' besežin xonj bene' zjanlene' to bene' xinj bene' bi chda šla'a ni'a ne'e, zjanxoe' le' to lo cam dao'. Cate' gocbe'e Jesúsen' le gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

<sup>3</sup>Na' ba<sub>1</sub> bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen' gosene': “Benga chnie' diža' bya' che Dios chne' ca', le chon cuine' ca Dios.” <sup>4</sup>Jesúsen' gocbe'ede' ca nac da' chesezalaže', na' gože' legaque':

—¿Bixchen' chzalaže'le ca' lo' yichjlažda'olen'? <sup>5</sup>Še yapa'ne': “Ba bezi'xena' xtolo'na',” bi nezele še napa' yela' gwnabia' cont yezi'xena' xtolen'. San še yapa'ne': “Gwyas na' gwda”, na' nacbia' še napa' yela' guac gac can' gwnian'. <sup>6</sup>Perw neda' naca' bene' gwseła' Dios golja' benach gwlo'eda' le'e na'a zoa' yežlio nga napa' yela' gwnabia' cont yezi'xena' xtola' benachen'.

Nach gože' bene' xinja':

—Beyas, beyoa' xcamon' na' beyej ližo'.

<sup>7</sup>Na' beyas bena', beze'e zjayde' liže'.

<sup>8</sup>Na' bene' ca' besele'ede' can' goquen' besesežchgüe'. Na' gosonxene' Diosen' dan' be'e yela' guac che Jesúsen'.

**Jesúsen' gwleje' Mateo  
cont goque' t xen len le'**

(Mr. 2:13-17; Lc. 5:27-32)

<sup>9</sup>Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwejlene' le'.

<sup>10</sup>Ca' goquen' ba chi' Jesúsen' liž Mateon' ba che'ej chagüe' t xen len zan bene' güečhixjw na' len yeba<sub>1</sub> bene' güen da' xinj na' len bene' ca' zjanaque' t xen len le'. <sup>11</sup>Na' bene' fariseo ca' cate' besele'ede' chi' Jesúsen' t xen len bene' ca', gose'e bene' ca' zjanaque' le' t xen:

—¿Nacxečen' ben' chsed chlo'ede' le'e che'ej chagwlene' t xen bene' güečhixjw na' yeba<sub>1</sub> bene' güen da' xinj?

<sup>12</sup>Na' cate' Jesúsen' bende' xtiza'gaquen' na' gože' legaque':

—Bene' cbi chesacšene bitw cheseyažjde' bene' güen rmed. Bene' chesacšende', legaquen' cheseyažjde' bene' güen rmed. <sup>13</sup>Le šjased bi zeje Xtiza' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' gonxenle neda'.” Gague bene' ba zjanaque' bene' güen len Diosen' zedeneyoeda' cont yesyetingjde' xtolen', san bene' güen da' xinjen'.

**Gosenabde' Jesúsen' bixchen' bene'  
ca' zjanaque' le' t xen bi gosone' gwbas**

(Mr. 2:18-22; Lc. 5:33-39)

<sup>14</sup>Nach bene' ca' chesone' t xen len Juan ben' bzoe' bene' nis gosebigue' lao Jesúsen' na' gose'ene':

—Neto' na' len bene' fariseo ca' chonchguato' gwbas, perw bene' ca' zjanaque' le' t xen bi chesone' gwbas. ¿Bixchen'?

<sup>15</sup>Nach gož Jesúsen' legaque':

—¿Guac yesezoa bene' yela' güine' bene' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesegüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' t xen.

<sup>16</sup>Nono zoa bene' chchine' lache' cobe cont yoda' xe' da' de'exo', le lache'

coben' yeben' cate' čhiben' na' čhezan' lache'exon', na' gan' nchezan' gacchen da' xen. <sup>17</sup> Na' lecze nēca zoa bene' chgue' vino cobe lo' bzod yide'exo', le vino coben' chšon' yide'exon' na' laje vino na' yesebiayi' chopen. San chesegue'e vino coben' lo' yid cobe cont bitw cuiayi' viron' len yiden'.

**Jesúsen' beyone' xi'in Jairo na' beyone' yeto no'ole bene' gwdane' xe'**

(Mr. 5:21-43; Lc. 8:40-56)

<sup>18</sup> Na' ne' choe'te Jesúsen' dižan', bžin to bene' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

<sup>19</sup> Na' gwzoža' Jesúsen' na' gwče'e bene' ca' zjanaque' le' txen ja'aclene' bene' gwnabian'. <sup>20</sup> Na' šlac zja'aque' liž bene' gwnabian' zej to no'ole nagüe' le-gaque', bene' ba goc šižiw iz chzoe' gwbao', na' bene' byen gwbigue' cože' Jesúsen' gwdane' lox xen'. <sup>21</sup> Le bene' xbab lo' yichjlažda'ogüen', gwne': "Con še ba gwdana' xen' nach yeyacda'."

<sup>22</sup> Na' gwyechj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

<sup>23</sup> Cate' bžin Jesúsen' liž bene' gwnabian' na' ble'ede' bene' zan zjaže' chesone' sšag chesebežchgüe' na' ba nita' bene' chosocuež bžejo par yosocuaše'be'.

<sup>24</sup> Na' gože' le-gaque':

—Le yechoj ngale. Bi' no'ole daon' bina' gatbe', san chtasben'.

Na' bene' ca' bosoxiže' gosonle' che'. <sup>25</sup> Na' beyož bešaše' yogo'lol bene' ca', nach gwyo'o Jesúsen', bexue' taca' bi' no'ol guaten', na' beyasbe'. <sup>26</sup> Na' ca' nac yela' guac dan' ben Jesúsen', gwxa diža' chen yogo' yež dan' zjachi' do na'.

**Jesúsen' beyone' čhope bene' lchol**

<sup>27</sup> Cate' beza' Jesúsen' len bene' ca' zjanaque' le' txen, ja'aclen čhope bene' lchol le-gaque' na' gosene' zižje:

—Le' naco' xi'in diaža che da' rey David, beyaše'laže'šca neto'.

<sup>28</sup> Na' cate' Jesúsen' len bene' ca' zjanaque' le' txen besežine' yo'o gan' zjanite' na' besyeyo'e, na' lecze gos'o bene' lchol ca'. Nach Jesúsen' gože' le-gaque':

—ČChejle'le guac gona' cont yele'ele?

Nach gose'ene':

—Chejle'to' Xanto'.

<sup>29</sup> Nach Jesúsen' gwdane' yejlaogaquen', na' gože' le-gaque':

—Yele'ele, le chejnilaže'le neda'.

<sup>30</sup> Nach besyeyac yejlaogaquen' besyele'ede'. Na' Jesúsen' gože' le-gaque' bicze yeso'e diža' can' goc besyeyac yejlaogaquen'.

<sup>31</sup> Na' besyeya'aque' na' gate'tez ja'aque' doxen distritw Galilean' gos'o diža' ca' nac dan' ben Jesúsen' len le-gaque'.

**Jesúsen' beyone' to bene' bi goc nie'**

<sup>32</sup> Na' cate' besyeya'ac bene' ca', la' besežinte bene' yoble zjanči'e to bene' bi goc nie', na' yo'o yaz da' xigüen' yichjlažda'ogüen'. <sup>33</sup> Jesúsen' bebeje' da' xigüen' na' la' benete' bena'. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

<sup>34</sup> Perw na' bene' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' bene'.

**Jesúsen' cheyaše' cheži'ilaže'de' benačen'**

<sup>35</sup> Na' Jesúsen' len bene' ca' zjanaque' le' txen ja'aque' to to yež na' to

to ciuda da' zjachi' do na' bzejni'ide' bene' Israel lo' yodao' chegaque' ca', gwɔdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe' na' bite'teze da' chesac chegaque'. <sup>36</sup>Na' ble'ede' ba be-sežag bene' zan na' beyaše' beži'ilaže'de' legaue', le gocbe'ede' chesacželaže' nac yesone' na' gague no zoa yesaclen le-gaque' len yogu' dan' chesežaglaogüe'. Nite' ca nita' no xila' be nono de gwyoe legauba'. <sup>37</sup>Nach gože' bene' ca' zjanaque' le' txen:

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenague' che Diosen' zjazacalebe' ca to coseš xen da' chyažjen yedoben. <sup>38</sup>Da'n'an' le nabe Xancho Diosen' seła'che' bene' yesaclene' chio' yotobcho coseš chen'.

**Jesúsen' gwleje' bene' šižinw ca' gosaque' txen len le'**

(Mr. 3:13-19; Lc. 6:12-16)

**10** Jesúsen' botobe' bene' šižinw ca' zjanaque' le' txen na' bnežjue' le-gaque' yela' gwnabia' cont besyebeje' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac chegaque'.

<sup>2</sup>Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan, <sup>3</sup>na' Felipe, na' Bartolomé, na' Tomás, na' Mateo ben' goc bene' güechixjw, na' Jacobo xi'in Alfeo, na' Lebeo ben' lecze le' Tadeo, <sup>4</sup>na' Simón ben' ben' txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

**Jesúsen' gwsele' bene' šižinw ca' jasedixjue'ede' xtiža' Diosen'**

(Mr. 6:7-13; Lc. 9:1-6)

<sup>5</sup>Na' Jesúsen' gwsele' bene' šižinw ca' jasedixjue'ede' xtiža' Diosen', gože' legaue':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria. <sup>6</sup>Le šja'ac gan' že' bene' Israel bene' ba zjambiyi' dan' bitw na' yesombi'e Diosen'. <sup>7</sup>Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' bene' yosozenag che'. <sup>8</sup>Le yeyon bene' chesacšene, le yeyon bene' ca' chese'e yižgüe' dan' nzi' lepra, le yosban no bene' ba gosat, na' le yebej da' xigüe' ca' zjayo'o zjanyaz lo' yichjlaždao' bene'. Diosen' bibi bchixjue' le'e da' ba bene' le'e yela' guac chen' cont gonle da' quinga, da'n'an' le gaclen bene' na' bibi gwchixjwlene'.

<sup>9</sup>Bitw gua'le mechw de oro, de plata o de cobre šlac co'ole nez. <sup>10</sup>Na' neca gua'le bzod, o yeto xcamisle, neca gua'le yel, na' neca goxe'le xis da' gwchiše'le. Ca nac le'e chonle xšinan' zaca'le par gon bene' da' ye'ej da' gagwle gan' seła' le'ena'.

<sup>11</sup>'Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. <sup>12</sup>Na' cate' žinle liže'na', le gwguape' tiox, na' le nablaze' soa cueze' binlo len yichjlažda'ogüe'. <sup>13</sup>Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwñablaze'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwñablaze'len'. <sup>14</sup>Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo

bište cont nacbia' bi checa'ale čhegaque'.  
 15 Da' mal xen goson bene' ciuda Sodoma  
 na' bene' ciuda Gomorra cani', perw da' li  
 žia' le'e, cate' žin ža gac juisyw bene' ca'  
 bi bosolebe' le'e ližen' yesa'le'chde' c'el ca  
 bene' Sodomān' na' bene' Gomorran'.

### Gac da' saca'zi'cho

16 'Neda' se'la' le'e šjatixjue'ele  
 xtižan' len bene' ca' chesegue'ede' le'e.  
 Zaca'leble ca xila' dao' ben' čhja'ac gan'  
 že' beco'yo. Da'nān' cheya'la' gacle bene'  
 yo'ochgua xbab na' bene' xen'laže' len  
 legaue'. 17 Le gwsaca' len bene' ca'  
 chesegue'ede' le'e. Nita' bene' yesone'  
 le'e lo na' bene' gwnabia' ca' cont yesot  
 yesyine' le'e lo' yodao' čhegaquen'.  
 18 Nach lecze dan' chejni'laže'le neda'  
 nita' bene' yeseče'exoxje' le'e do lao  
 rey, do lao nochle bene' gwnabia'. Na'  
 can' güe'lenle legaue' xtižan', lecze can'  
 güe'lenle xtižan' len bene' bi zjanaue'  
 bene' Israel. 19 Perw cate' yesezene' le'e  
 na' yeseče'e le'e lao bene' ca', bi cuec  
 yichjle nac yoži'ile xtiža'gaquen' o nacle  
 nale. Lo hor na'teze Diosen' gwzejni'ide'  
 le'e bin' cheya'la' nale. 20 Le gague  
 le'eczen' nele, san Spiritw čhe Xacho  
 Diosen' gonen ga nale bin' cheya'la' nale.

21 'Cana' ba' benačh yesečhje' yesone'  
 bene' biše' golje' lo na' bene' yesote' le-  
 gaue', na' nita' bene' yesone' xi'ingaque'  
 lo na' bene' yesot legacbe', na' nita' bene'  
 yesone' xaxne'e lo na' bene' yesote' le-  
 gaue'. 22 Yogo'ze bene' yesegue'ede' le'e  
 dan' chejni'laže'le neda', perw note'tez  
 le'e gwyo gwčhejlaže'le cont bi cuejy-  
 ichjle dan' chejni'laže'le neda' žinten ga-  
 tle, nach šjayzoale len Diosen'. 23 Še  
 bene' že' to yež yosyolague' le'e, le  
 yeza'teze na' yeyejle ga yoble. Bi'na'  
 yeyož šjatixjue'ele xtižan' yogo' yež gan'  
 že' bene' Israel ca' cate' yida' da' yoble,  
 neda' naca' ben' gwsela' Diosen' golja'  
 benačh.

24 'Ca nac cate' to bene' chsede' len  
 to maestrw, bitw nacho naque' bene'  
 blaoch ca maestroa'. Na' to mos bitw  
 naque' blaoch ca xanen'. 25 Con cheya'la'  
 čhazlaže' ben' chseda' še yežin'laže'  
 gaue' ca maestrw čhe' na' cheya'la' c-  
 hazlaže' mosen' še yežin'laže' gaue' ca  
 xanen'. Neda' naca' Xanle, na' bene'  
 chesegue'ede' neda' chesene' chona' txen  
 len Beelzebú dan' nac xan yogo' da'  
 xigüe', na' naquechxe yesene' čhe le'e na-  
 cle neda' txen.

### Cheya'la' žebcho castigw dan' gon Diosen' čhe bene' güen da' xinj

(Lc. 12:2-9)

26 'Bitw žeble bene' bite'teze da'  
 yesonde' le'e, le bitwbi de da' ngaše' da'  
 nacho cbi gwlo'elaon, neca de da' nono  
 na' neze da' nacho cbi yesenezden'.  
 27 Da' zan dan' chsed chlo'eda' le'e  
 dan' bi chsed chlo'eda' yezica'chle  
 bene'. Na' le'e le gwsed le gwlo'en  
 yogo'lo' bene', na' le gon cont bene'  
 zan yesejni'iden'. 28 Bitw cheya'la'  
 žeble bene' ca' yesot le'e. Legaue'  
 bitw gac bi yesonde' yichjlažda'olen'.  
 Cheya'la' žeble Diosen', le len' nape' yela'  
 gwnabia' cont gwžiaje'e cuerp chelen'  
 len yichjlažda'olen' lo yi' gabilen'.

29 'Nezecho byine dao' ca' bitw bi  
 zjazaca'tecba', perw bitw nacho toba' gat  
 sin cbi güe' Xacho Diosen' latje. 30 Na'  
 ca nac chio', chaquechgüe Diosen' chio'  
 na' neztede' ba' yiša' yichj to tocho žia.  
 31 Da'nān', bitw žeble, le zaca'chle c'el ca  
 zan byin' dao' ca'.

### Cheya'la' güe'cho diža' len bene' ye'cho legaue' nombia'czcho Jesucriston'

(Lc. 12:8-9)

32 'Na' note'teze bene' še cho'e diža' len  
 benačhen' che'ene' chejle'e čhia', lecze  
 ca' neda' gua' diža' len Xa' ben' zoa ya-  
 ban' yapa'ne' bena' naque' neda' txen.  
 33 Na' note'teze bene' še cho'e diža' len

benachen' che'ene' bitw chejle'e chia',  
lecze ca' neda' gua' diža' len Xa' ben'  
zoa yaban' yapa'ne' bena' bi naque' neda'  
txen.

**Yesediļe bene' neche dan' bid Jesúsen'**

(Lc. 12:51-53; 14:26-27)

<sup>34</sup> 'Bitw gonle xbab bene' že' yežlio nga  
yesezoa yesebeze' binlo len lježgaque'  
na'a ba bida'. Bitw yesezoa yesebeze'  
binlo san yesediļe'. <sup>35</sup> Lagüe dan' ba bida'  
yesediļ bene' byo len xe' na' no'olen' len  
xne'e, na' yesediļ xo'oliž no'ole len le'.

<sup>36</sup> Bene' lo' yo'oze yesegue'e lježe'.

<sup>37</sup> 'Note'tez bene' še chaquechde' xe' o  
xne'e clel ca chacde' neda', bitw zaque'  
gone' txen len neda'. Lecze ca' še chaque-  
chde' xi'ine' clel ca neda' bitw zaque'  
gone' txen len neda'. <sup>38</sup> Na' note'teze' še  
bi chzenague' chia' lagüe' dan' chacde'  
yosoči yososaca' bene' le', bitw zaque'  
cont gaque' neda' txen še ca'. <sup>39</sup> Note'teze  
bene' chacde' gone' cont bi chi saque' o  
cont nono yesot le', benan' cuiayi'. Na'  
note'teze bene' chzanlaže' cuine' saca'zi'e  
o gate' ne chia' neda, ba de yeļa' mban  
che' toli tocaņe.

**Bene' ca' yesenita' mbalaz  
cate' yesyežine' yaba**

(Mr. 9:41)

<sup>40</sup> 'Note'teze bene' chosolebe' le'e  
chosolebe' neda', lecze chosolebe' Dios  
ben' gwsele' neda'. <sup>41</sup> Na' note'teze bene'  
yebede' gwlebe' bene' cheso'e xtiža'  
Diosen', mbalaz soe' cate' yežine' yaban'  
lecze ca' mbalaz soa ben' cheso'e xtiža'  
Diosen'. Na' mbalaz gac che bene' ca'  
cheson can' chazlaže' Diosen' caten'  
yesyežine' yaban'. Na' note'teze bene'  
yebede' gwlebe' legaque' da' chesone'  
can' chazlaže' Diosen', lecze mbalaz soe'  
caten' yežine' yaban'. <sup>42</sup> Note'teze bene'  
gwnežjue' la' to xiga'ze nis ye'ej bene'  
chejnilaže' neda', la' gwnežjuen' bene' bi

naque' bene' blao, da' liče gona' cont  
soe' mbalaz caten' yežine' yaban'.

**Juanna' gwsele' chope bene' zjanaque'  
txen len le' gan' zoa Jesúsen'**

(Lc. 7:18-35)

**11** Cate' beyož ben Jesúsen' man-  
dadw can' yeson bene' šižinw ca'  
gwleje' cont gosaque' le' txen, beze'e lat-  
jen'. Na' gwyeye' yež ca' zjachi' do na'  
jased jalo'ede' xtiža' Diosen' len bene' ca'  
že'na'.

<sup>2</sup> Juanna' ben' bzoe' bene' nis, cana'  
ba die' ližya. Na' bende' diža' che yogo'  
dan' chon Criston' ben' gwseļa' Diosen'  
cont yedenabi'e. Nach Juanna' gwsele'  
chope bene' zjanaque' txen len le' gan'  
zoa Jesúsen', <sup>3</sup> jaseže'ne':

—¿Len' naco' ben' chbezto' seļa'  
Diosen', še cheyaļa' cuezchto' yid bene'  
yoble?

<sup>4</sup> Nach Jesúsen' gože' legaque':

—Le šjaya'ac na' le šjajež Juanna'  
doxen da' ca' ba ble'ele na' da' ca'  
ba benele. <sup>5</sup> Ba ble'ele chona' cont  
chesyele'e no bene' lchol, na' chesyeda  
no bene' zjanxinj ni'e. Na' lecze bene'  
gose'e yižgüe' dan' nzi' lepra besyeyacde',  
na' chesyeyene no bene' cuež. Ba ble'ele  
bosbana' no bene' guat, na' ba benele  
choa' diža' güen chia' len bene' yaše' ca'.  
<sup>6</sup> Mbalaz zoa bene' chejle'e chia' na' bi  
chdebde'.

<sup>7</sup> Na' cate' besyeya'ac bene' ca'  
zjanaque' txen len Juanna', nach  
Jesúsen' be'lene' bene' ca' zjandoben'  
xtiža' Juanna', gože' legaque':

—¿Nacxe nac ben' jale'ele latje dašen'?

¿Chaque' quil ca'ale? Bi naque' ca'.  
<sup>8</sup> ¿Nac naque' caten' jale'elne'? ¿Nyaze'  
lache' šagüe'? ¿še bitw? le bene' zjanyaz  
lache' šagüe' nite' yo'o güenchgua ca  
no liž bene' gwnabia'. <sup>9</sup> ¿Noxen' jale'ele?  
¿to ben' choe' xtiža' Diosen'? Da' li  
cho'e xtiža' Dios, perw žia' le'e, zaca'che'  
ca' note'teze bene' choe' xtiža' Diosen'.

<sup>10</sup> Che benga nyojen le'e Xtiža' Diosen', žan:

Neda' Dios seļa' to bene' cuialagüe' laguo' güe'e xtižon' cont cate' šejo' ba zjanita' bene' yosozenague' chio'.

<sup>11</sup> Da' li žia' le'e notoch no benačh na' soa bene' naquech bene' blao ca Juanna' ben' bzo'e' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', la'czļa' naque' bene' la'zelagüe' bene' bibi zaca', ba chejni'ichde' chia' clcl ca Juanna'.

<sup>12</sup> 'Gwzolaon caten' Juanna' gwduxjue'ede' xtiža' Diosen' na' bzo'e' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'. <sup>13</sup> Na' lecz gwzolaon cani'te bžinten cate' bla' Juanna' gwduxjue'ede' xtiža' Diosen', ley dan' bzoj da' Moisés na' dan' bosozoj yezica'chle bene' goso'e' xtiža' Diosen' bzejni'in chio' che yela' gwnabia' che Diosen'. <sup>14</sup> Na' Xtiža' Diosen' dan' nyojen žan yid yeto bene' yedeyene' can' ben Elías ben' be' xtiža' Diosen' cani'. Che Juanna' žan ca', con še šejle'le. <sup>15</sup> Le'e žia nagle da' chene, le gwzenag xtiža'na'.

<sup>16</sup> '¿No gwsacalebda' le'e zoale na'a? Gwsacalebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe'. <sup>17</sup> "Ba bcuežto' bžejo, neca bya'ale, na' ba bilyaše'to', neca gwchežle." <sup>18</sup> Juan ben' bzo'e' bene' nis bide' laole nga, bitw güe'ej gwdag-wšagüe' can' chese'ej chesagw bene' yoble, nach gwnale che': "Yo'o yaz da' xigüen' yichjlažda'ogüe'." <sup>19</sup> Na' neda', Diosen' gwsele' neda' golja' benačh, na' chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw. Na' lecze žale chia' naca' xmigw bene' güechixjw ca' na' xmigw yezica'chle bene' güen da' xinj. Perw nabia' yela' sina' che Diosen' dan'

napto' naquen da' güen, le ba ble'eczele can' chon neto' napton'.

### Yež ca' gan' bitw bosozenague' che Jesúsén'

(Lc. 10:13-15)

<sup>20</sup> Nach Jesúsén' be'e xtiža' bene' ca' že' yež ca' gan' bene' da' zan da' zaca' yesyebande', na' gwdile' legaque' dan' bitw besyetingjde' xtoļa'gaquen'. Nach gwne':

<sup>21</sup> —iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba besyetingjde' xtoļa'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogaquen'. <sup>22</sup> Žia' le'e, saca'zi'chle clcl ca bene' že' Tiro na' Sidón cate' žin ža gac juisyw. <sup>23</sup> Na' le'e nitalé Capernaum chonle xbab šeca Diosen' gone' gacxenchgualé cate' yežinle yaba gan' zoe'na'. Bi gone' ca', san seļe' le'e lo yi' gabil. Šeca' bena' da' zaca' yesyebane bene' ca' gwnita' Sodomán' can' ba bena' laole nga, zesyetingjde' xtoļa'gaquen', na' ne' chi' ciudan' šeca'. <sup>24</sup> Žia' le'e, gale'chle clcl ca bene' Sodomán' cate' žin ža gac juisyw.

### Bene' ca' yesejnilaže' Jesúsén' nite' mbalaz

(Lc. 10:21-22)

<sup>25</sup> Nach Jesúsén' bol' güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxclen chio' ba bzejni'ido' bal bene' diža' güen chio' quinga. Bzejni'ido' bene' ca' gosacbe'e cheseyažjde' no gwsed gwlo'e' legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. <sup>26</sup> Beno' ca' Xa', le' can' gwналаžo'.

<sup>27</sup> Na' gože' bene' ca' že'na':

—Xan' ba bene' lo na' gona' cont chombia' bene' le'. Le' nombia'yane' neda', na' neda' nombia'yana' le'. Na' bene' ca' ba gwleja' ba zjanombi'e Xan'. Na' noch no zjanita' bene' zjanombi'e Xan', ne neda' ca zjanombi'e. <sup>28</sup> Le'e chjaxe'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz. <sup>29</sup> Le gwzenag chia' na' gwzejni'ichda' le'e. Neda' naca' bene' xenlaže' na' bene' šagüe' na' gona' ca soale mbalaz lo' yichjlažda'olen'. <sup>30</sup> Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

**Ža che Dios bene' ca' zjanaque'  
Jesúsen' txen goselechje'  
trigon' da' gosagüe'**

(Mr. 2:23-28; Lc. 6:1-5)

**12** Ca tiempen' gozac to ža che Dios'a cate' Jesúsen' gwdie' len bene' ca' zjanaque' le' txen gan' nyaž trigw. Nach bene' ca' gosedone', na' goselechje' dao che trigon' cont gosagüe' xsenna'. <sup>2</sup> Na' besele'e bene' fariseon' can' gosone', na' gosi'e Jesúsen':

—Gwnašč žbixchen' bene' ca' zjanaque' le' txen chesone' žin da' bi de lsens goncho ža che Dios?

<sup>3</sup> Na' Jesúsen' gože' legaque':

—Žbina' gwlable can' ben da' rey Davin' to ža cate' le' na' bene' lježe' ca' gosedone'? <sup>4</sup> Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw bene' bi nac bxož, na' lecze bnežjue' che bene' zja'ac len le'. <sup>5</sup> Na' žbina' gwlable le'e ley dan' bzoj da' Moisés gan' žan bxož ca' chesoncze' mandadw che yodao' blaon' yogo' ža che Diosen'? Na' bitw nacho zjanape' doła' dan' chesone' žin ža che Diosen'. <sup>6</sup> Žia' le'e, neda' zoa' nga zaca'cha' clel ca yodao' blaon'. <sup>7</sup> Xtiža' Diosen' dan' ny-

ojen žan: “Chaclaža' yeyaše' yeži'ilaže'le bene', gague con gotle beyixe' par gonxenle neda'.” Šaca' chejni'ile bi zejenna' žan ca', bilja nale bene' quinga zjanape' doła', le bibi da' mal chesone'. <sup>8</sup> Žia' le'e, naquen lo' na' nia' bi da' nac güen goncho cate' nac ža che Diosen', neda' naca' ben' gwseła' Diosen' golja' benach.

**Beyac to bene' nxo'on šla'a taque'**

(Mr. 3:1-6; Lc. 6:6-11)

<sup>9</sup> Na' cate' Jesúsen' beze'e latjen', na' gwyo'e to lo' yodao' che chio' bene' Israel. <sup>10</sup> Na' lo' yodaon' zoa to bene' nxo'on šla'a taque', nach bene' fariseo ca' gose'e Jesúsen':

—ŽDe lsens yeyoncho bene' xinj ža che Diosen'?

Gose'ene' ca' cont de da' yosode'ede' yesagüe' xya.

<sup>11</sup> Nach Jesúsen' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de lsens goncho žin, žcbi la' yebejteleba' lo' yechon' lo žana'? <sup>12</sup> Da'na'na' žia' le'e de lsens gaclencho bene' ža che Diosen'. Le zaca'ch to bene' clel ca to xila' dao'.

<sup>13</sup> Nach Jesúsen' gože' ben' nxo'on taque'na':

—Bli naon'.

Na' blien' na' taquen' beyaquen binlo can' nac dan' yešla'a. <sup>14</sup> Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

**To dan' bzoj da' Isaías che Jesúsen'**

<sup>15</sup> Gocbe'e Jesúsen' can' bosoxi'a bene' fariseo ca' na' gwze'e gwyeje' ga yoble. Bene' zan ja'aclene' le', nach beyone' yogo' bene' ca' chesacšene. <sup>16</sup> Na' bene' mandadw nono yesoe'lene' diža' non' beyon legaque'. <sup>17</sup> Bene' ca' cont goc can' ža Xtiža' Diosen' dan' bzoj da' Isaíasen', žan: <sup>18</sup> Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' sela' Spiritw chian' soateze soan len le'.

Na' chixjue'ede' yogo'lo' benē' can' chazlaža' yesone'.

<sup>19</sup> Bitw gacyože' len benē', nēca yosye'e, na' nēca nie' zižjo lo nez cont yesene benē' bin' že'.

<sup>20</sup> Bi gwzoe' ca'ale benē' chesejnilaže' le' late' lasze.

Soe' gaclene' legaque'.

Nach žin' ža gone' cont gac con da' zej to licha lo yežlion'.

<sup>21</sup> Na' benē' že' yogo' naciōnna' yesebeze' gaclene' legaque'.

**Gosene' Jesúsen' bebeje' da' xigüe' len yela' guac che Beelzebú**

(Mr. 3:19-30; Lc. 11:14-23; 12:10)

<sup>22</sup> Na' zoa to benē' lcho' na' nēca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte benē'. <sup>23</sup> Na' yogo' benē' ca' besele'ede' can' goca' besyebanchgüede'. Nach gose'e lježe':

—¿Nac bēnga ben' chbezcho yide' lao diža che da' rey David?

<sup>24</sup> Perw cate' benē' fariseo ca' gosende' diža' quinga gosene':

—Bitwbi yela' guac nap bēnga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' benē'.

<sup>25</sup> Gocbe'e Jesúsen' can' goson benē' fariseo ca' xabēn', nach gože' legaque':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še bene' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še benē' lo' bite'teze yo'o yesechoje' chople na' yesedile' legacze', gague sša yesenite' txen. <sup>26</sup> Lecze ca' še Satanásen' yebejen yeto da' xigüe' yo'o nyaz yichjlaždao' benē', cuiayi'

yela' chnabia' chen, le chdiļen cuinen še ca'. <sup>27</sup> Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen benē' lježle chesybeje' da' xigüe' zjajo'o zjanyaz yichjlaždao' benē'. Na' benē' lježle ca'ze chosolo'e clēlen' chnele. <sup>28</sup> Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' benē' yosozenag che'.

<sup>29</sup> ¿Nac gac šo' benē' gwban liž to benē' gual na' que'e bi da' de che' še bi zgua'tec gwcheje' benē' guala'? Lete gone' ca' nach gac que'e bi da' de che'.

<sup>30</sup> Benē' bi chone' neda' txen, chone' contr neda'. Na' benē' bi chaclene' cont yosozenag benē' yoble chia', zeje diža' chone' par bi yosozenague' chia'.

<sup>31</sup> Da'nān' žia' le'e, yogo' da' xinj da' chon benach, na' yogo' diža' bya' dan' chesene' che Diosen', Diosen' yezi'xene' chen, perw note'teze benē' chne' yela' ya' che Spiritw che Diosen', gwbat yezi'xen Diosen' che'. <sup>32</sup> Na' note'teze benē' še ne' yela' ya' chia' neda' naca' ben' gwsela' Diosen' golja' benach, Diosen' yezi'xene' che', perw note'teze benē' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

**Diža' da' güe'cho chlo'en bin' yo'o lo' yichjlažda'ochon'**

(Lc. 6:43-45)

<sup>33</sup> Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. <sup>34</sup> Na' ca'czen' nac len le'e nacchgualē benē' zgot na' benē' gwxiye'. Bitw gac güele diža' šagüe' dan' nacle benē' laždao' xi'a. Le yogo'te diža' da' chchoj cho'achon', lo' yichjlažda'ochon' nan' za'aquen. <sup>35</sup> To



beṇe' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to beṇe' laždao' xi'a cho'e diža' xi'a, le can' ža lo' yichjlažda'ogüen'.<sup>36</sup> Na' žia' le'e, cate' žin ža gon Diosen' yesežaglaogüe' yogo' beṇe' cheson da' xinj toli tocane, cana' yogo'lo' beṇe' yosodie' cuent che yogo' diža' dan' ba goso'e da' bitwbi zjazacan'.<sup>37</sup> Na' con ca diža' dan' choe'le, Diosen' choglagüen' chele še naple doļa' o še bi naple doļa'.

**Beṇe' bi bosozenag che Diosen' gosenabe' gon Jesúsen' to yela' guac**

(Mr. 8:12; Lc. 11:29-32)

<sup>38</sup>Nach baļ beṇe' ca' chososed chosolo'e dan' bzoj da' Moisés, na' beṇe' fariseo ca' gose'e Jesúsen':

—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

<sup>39</sup>Nach Jesúsen' gože' legaque':

—Le'e zoale na'a nacchgualē beṇe' laždao' xi'a na' ba gwlejjichjle Diosen'. Na' chṇable gona' yeto yela' guac da' le'ele cont nezele še Diosa' gwsele' neda', perw bi gona' can' chṇablēna', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'.<sup>40</sup> Cate' za' šej Jonásen' Nínive, Diosen' bene' cont to beļ xen be yo'o lo' nisdaon' gwdebbā le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel.<sup>41</sup> Na' cate' žin ža gon Diosen' cont yogo' beṇe' cheson da' mal yesežaglagüe' toli tocane, žana' beṇe' Nínive beṇe' ba gosat yedese-cuiše' le'e mbanle na'a lao Diosen', le legaque' besyētinjde' xtoļen' cate' da' Jonásen' gwdixjue'ede' xtiža' Diosen' len legaque'. Na' neda' zoa' nga naccha' beṇe' blao clēl ca da' Jonásen', na' bitw chzenagle chia'.<sup>42</sup> Na' lecze žana' cate' gon Diosen' cont yogo' beṇe' cheson

da' mal yesežaglaogüe' toli tocane, da' no'olen' gwnabia' beṇe' Seba ca' yede-cuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' beṇe' blao clēl ca da' rey Solomónna', na' bitw chzenagle chia'.

**Da' xigüen' cheyo'on da' yoble lo' yichjlaždao' beṇe'**

(Lc. 11:24-26)

<sup>43</sup>Na' še to da' xigüe' da' yo'o nyaz lo' yichjlaždao' beṇe' yechojen, nach lažen nile nale yeyiljon ga soan mbalaz. Na' še bibi latje želen, nach nan:<sup>44</sup> “Da' yoble šjajo'a lo' yichjlaždao' ben' gan' ba gwyo'a.” Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble,<sup>45</sup> nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaguech mal che bēna' clēl ca goc che' cana'. Can' goc che bēna', lecze ca' gac che le'e mbanle na'a dan' nactecle beṇe' laždao' mal.

**Xṇa' Jesúsen' len beṇe' biše' ca' besežine' ga zoe'**

(Mr. 3:31-35; Lc. 8:19-21)

<sup>46</sup>Ne' choe'te Jesúsen' diža' len beṇe' quinga, cate' bžin xṇe'e len biše' ca'. Gosaclaže' yeso'e yesoe'lene' le' diža' na' beṇe' zan nita' lagüe' na'ate.<sup>47</sup> Beṇe' ca' že' na', toe' gože' Jesúsen':

—Xṇa'o len beṇe' bišo' ca' zjanite' chy'o'o na' chesaclaže' yesoe'lene' le' diža'.

<sup>48</sup>Nach Jesúsen' gože' le':

—¿Nezele no nac xṇa'a na' no zjanac biše' lježa'?

<sup>49</sup>Nach bli ne'e blo'e beṇe' ca' zjanaque' le' txen na' gože' bēna':

—Bene' quinga zjanaque' xna'a na' zjanaque' biše' lježa'.<sup>50</sup> Le note'teze bene' chone' da' chnalaže' Xa' Diosen' ben' zoa yaban', bena' nac bene' biša', bene' zana', lecze naque' xna'a.

### Jempl che bene' goz trigon'

(Mr. 4:1-9; Lc. 8:4-8)

**13** Na' lo žana' gwza' Jesúsen' yo'o gan' zoen' jachi'e cho'a nesdaon'.<sup>2</sup> Nach catec bene' zan juisyw besedobe' gan' chi'en' na' benten byen gwyo'e gwchi'e to lo' barcw. Na' yogo' bene' ca' besedoben' gosenite' cho'a nesdaon' ga nac yo biž. <sup>3</sup>Nach da' zan da' bsd blo'e Jesúsen' legaque' len jempl da' bi'e. Na' be'e to jempl, gwne':

—To bene' güen žin jeze' trigw, <sup>4</sup>na' šlac zej chose' trigon' late' bin' che trigw dan' chazen' jasechazen chanez, nach be ca' žia xil be chaš le'e yaba gosagwban'.<sup>5</sup> Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw. <sup>6</sup>Perw na' cate' bla' gwbiža' na' bzeyen len na' gosebizen, le gague zjayo'otec loenna' sitjw. <sup>7</sup>Yelaten' jasechazen ga nac lo yag yeše', na' yag yešen' gosecha'on na' bosoložen len. <sup>8</sup>Perw na' yelaten' jasechazen ga nac yo šagüie' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen ši-choa güeje. <sup>9</sup>Le'e žia nagle da' chene, le gwzenag xtižan'.

### Jesúsen' be'e diža' bixchen' bzejni'ide' bene' jempl

(Mr. 4:10-12; Lc. 8:9-10)

<sup>10</sup>Nach bene' ca' zjanaque' Jesúsen' txen gosebigue' lagüen', na' gose'ene':

—¿Bixchen' chsed chlo'edo' bene' quinga len jempl?

<sup>11</sup>Na' gož Jesúsen' legaque':

—Nono na' neze can' nac yela' gwnabia' che Diosen', na' ba chone' cont le'e chejniłaže'lene' nezelen.

Perw bi chon Diosen' ca' len bene' bi chesacłaže' yesejniłaže'ne'.<sup>12</sup> Note'teze bene' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze bene' bi chosozenague', da' daon' ba zjanezde', yeca'a Diosen' len. <sup>13</sup>Da'n'an' chsed chlo'eda' bene' quinga len jemplen', le chesele'ede' dan' chona' perw bitw chesacbe'ede' bi zejen, na' chesende' xtižan' perw bitw chesejni'iden'. <sup>14</sup>Len bene' quinga ba chac can' bzoj da' Isaiás, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

<sup>15</sup>Nacle bene' güedenag na' bach natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtoła'le cont yeca'an' na' yocoba' yichjlažda'olen'.

<sup>16</sup>Perw le'e nacle neda' txen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen. <sup>17</sup>Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen' cani', gosacłaže'chgüie' yesele'ede' dan' chle'ele na'a, perw bitw goła' yesele'eden'. Na' gosacłaže'chgüie' yesende' dan' chenele na'a, perw bitw goła' yesenden'.

### Jesúsen' bzejni'ide' bi zejen jempl che ben' goz trigon'

(Mr. 4:13-20; Lc. 8:11-15)

<sup>18</sup>Na' le gwzenag, quinga zejen jempl che ben' goz trigon'. <sup>19</sup>Ca dan' byažen zejen xtiža' Dios da' chzejni'i che yela' gwnabia' che'. Na' bin' dan' beselažo' chanezen', zejen bene' ca' chesende'

xtiža' Diosen' perw bi chesejni'iden'. Na' ca cheyoža' chžin gwxiyen' chebejen xtiža' Diosen' lo' yichjlažda'ogaquen'.<sup>20</sup> Na' biñ dan' beselažo' ga nac lo yej na' bi ben loen, zjanaquen ca bene' la' chesyebetede' xtiža' Diosen' cate' chesenden',<sup>21</sup> perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal chegaquen' o cate' chesegue'e bene' legaque' dan' chosozenague' xtiža' Diosen', la' chesebejyichjte' xtižen'.<sup>22</sup> Na' biñ dan' beselažon' ga nac lo yag yeše', zejen ca bene' ca' ba zjanende' xtiža' Diosen', perw šlac zjambane' chesyelał chesyžejde' na' da' chesaclačže' yesen'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'n'an' bi chesejni'laže' le' ca cheyala'.<sup>23</sup> Na' biñ dan' beselažo' lo yo šagüe' zejen ca bene' chesende' xtiža' Diosen' na' chesejni'iden' na' chosozenaguen'. Bałen gosebian to gayoa güeje, na' yebałen gosebian gayon güeje, na' yebałen šichoa güeje.

### Jempl che trigon' na' yiže'

<sup>24</sup> Na' gozoe'len Jesúsen' bene' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo yežlio che'na'.<sup>25</sup> Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yiže' gan' ba naz xan yežlion' trigon', nach beze'e.<sup>26</sup> Na' to ši'ize trigon' len yiže' ca' beselan', na' trigon' gwzolao chbian.<sup>27</sup> Na' bene' güen žin che xan yežlion', cate' gosacbe'ede' nach jaya'aque' gan' zoa xangaque' jasyeyeže'ne': "Bene', ¿gague biñ trigon' goz yežlio chion'? ¿Bixchen' nchixen len yiže'?"<sup>28</sup> Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "¿Che'ndo'

lažo'to' yižen'?"<sup>29</sup> Na' gože' legaque': "Bitw lažo'len. Le xož lažo'le lente trigon'.<sup>30</sup> Jaseyenna'. Guac yesecha'on txen. Na' cate' ba gołe' yotoble cosešen', cana' gona' mandadw zguatec lažo'le yižen' na' gonlen manoj cont yesejen. Nach šjaytoble trigon' co'ošagüe'len."

### Yela' gwnabia' che Diosen' naquen ca biñ che xomdas

(Mr. 4:30-32; Lc. 13:18-19)

<sup>31</sup> Nach gozo'e yeto jempl, gozne':

—Šanch bene' yosozenag che Diosen' cont nabi'e yichjlažda'ogaque'. Da'n'an' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio chen'.<sup>32</sup> Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'ochen ca bichle yiže' cuan na' chaquen ca to yag cha'o, nach byin dao' ca' chjasen ližda'ogacba' lo xozenna'.

### Yela' gwnabia' che Diosen' naquen ca levadura

(Lc. 13:20-21)

<sup>33</sup> Nach gozoe' Jesúsen' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

### Jesúsen' bzejni'ide' bene' len jempl

(Mr. 4:33-34)

<sup>34</sup> Yogo' da' quinga bsed blo'e Jesúsen' bene' ca' besežag gan' zoe'na'. Bsed blo'ede' legaque' be'e jempl, bitwbi bzejni'ide' legaque' sin ca be'e jempl.<sup>35</sup> Bene' ca' cont goc can' bzoj da' bene' be' xtiža' Diosen' cani', žan:

Gwsed gwlo'egacda'ne' len jempl, na' yapegaca'ne' dan' nono na' neze da' ba ngaše' cate' gwmete yežlion'.

**Jesúsen' bzejni'ide' bi zeje  
jempl che trigon' na' yixe'**

<sup>36</sup> Nach beyož bsed blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

<sup>37</sup> Nach Jesúsen' gože' legaque':

—Quinga zejen: Diosen' gwsele' neda' golja' benač na' zaca'lebda' ca ben' goze' bin che trigon'. <sup>38</sup> Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabi'e yichjlažda'ogaque' zaca'lebde' ca bin che trigon'. Na' bene' ca' chosozenague' che Satanás dan' chnab'ia' da' xigüe' ca' zjazaca'lebde' ca xsa yixen'. <sup>39</sup> Satanásen' zaca'leben ca bene' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca bene' ca' yosyotobe' cosešen'. <sup>40</sup> Na' can' šey yixen' yosyotoben', can' gac che bene' ca' chosozenag che Satanásen' cate' žin ža gac juison'. <sup>41</sup> Diosen' gwsele' neda' golja' benač na' cate' žin ža, neda' sela' angl chia' ca' cont yosyotobe' yogo' bene' ca' chesego'oyele' bene' yoble yesone' da' mal na' lecze yosyotobe' yezica'chle bene' cheson da' mal. Na' angl ca' yesyebeje' legaque' cont bich yesenite' txen len bene' ca' chosozenague' che Diosen' cont nabi'e yichjlažda'ogaquen'. <sup>42</sup> Nach yesyesele' legaque' lo' yi' gabil gan' yesey'e toli tocanē. Na' yesebežyaše' yesagwxejte laye' tantw yesežaglaochgüe'. <sup>43</sup> Cana'ch Xa-cho Diosen' gone' cont bene' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesežine' yaban' gan' zoa Diosen'

chnabi'e. Le'e žia nagle da' chene, le gwzenag xtiža'na'.

**Jempl che mechw xen  
dan' ngaše' lo' yo**

<sup>44</sup> 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To bene' bželde' mechw xen da' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lo' bi da' de che' cont gwxi'e yežlion' gan' ngaše' mechua'.

**Jempl che to perla da' zaca'chgua**

<sup>45</sup> 'Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant bene' cha'o perla dan' zjanacchgua xdan. <sup>46</sup> Na' bželde' to perla da' leca zacan'. Na' beyote' yogo'lo' bi da' de che' na' gwxi'e perlan'. Ca'czen' zaca'lebe bene' ca' chesache'e zaca'chguan yosozenague' che Diosen'.

**Jempl che yixjw bel**

<sup>47</sup> 'Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bal' bene' gwxen bel na' bosozale' yixjw bel chegaquen' lo' nisdaon' na' gwxenen zan cuen bel. <sup>48</sup> Nach cate' ba gwža' lo' yixjon', besyebejen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. <sup>49</sup> Ca'czen gac che yogo' bene' cate' žin ža te che yežlion'. Angl ca' yesebeje' bene' mal ca' ladjo bene' ca' zjanaque' bene' güen lao Diosen' <sup>50</sup> na' yosozale' legaque' lo' yi' gabil gan' yesebežyaše' na' yesagwxejte laye' dan' leca yesežaglagüe'.

**Xtiža' Diosen' dan' byoj cani'  
len da' chsed chlo'e Jesúsen'**

<sup>51</sup> Nach Jesúsen' gože' bene' ca' zjanaque' le' txen:

—¿Zyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

<sup>52</sup>Nach gož Jesúsen' legaque':

—Note'tezle še chac chsed chlo'ele Xtiža' Diosen' dan' byoj cani', še ľecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'lol da' zaca' dan' chyažj chchinde', balen zjanaquen da' cobe na' balen zjanquen da' gole.

**Bene' yež Narzaret bi  
gosejle'e che Jesúsen'**

(Mr. 6:1-6; Lc. 4:16-30)

<sup>53</sup>Nach cate' beyož be' Jesúsen' jempl ca', beze'e latjen' len bene' ca' zjanaque' le' txen <sup>54</sup>jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' ľeca besyebande' len xtižen' na' gose' ľježe':

—¿Ga jasede' yela' sina'? na' ¿nacxechen' chac chone' yela' guac ca'? <sup>55</sup>Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'. <sup>56</sup>Na' ľecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

<sup>57</sup>Na' dan' gosone' xbab nac Jesúsen' con to bene' gualaž chegaque', bi gosacľaže' yesejle'e che'. Na' gož Jesúsen' legaque':

—Yogo'ze bene' chonľa'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonľa'ane' le'.

<sup>58</sup>Na' to chopze yela' guac ben Jesúsen' Nazareten' dan' bitw gosejle'e che'.

**Quingan' goc gosote' Juan  
ben' bzoa bene' nis**

(Mr. 6:14-29; Lc. 9:7-9)

**14** Na' ca tiempen' Herodes ben' naque' gobernador che distritw

Galilean', bende' diža' ca nac yogo'lol dan' chon Jesúsen'. <sup>2</sup>Nach gože' xmose' ca':

—Bengan' da' Juanna', ben' bzoa bene' nis. Ba bebane' ladjo bene' guat ca', da'nan' chaque' chone' yela' guac.

<sup>3-4</sup>Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' ľaczľa' Herodías naque' xo'ole bene' biše' Felipe. Na' Juanna' gože' Herodesen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca', da'nan' Herodesen' bene' mandadw gosezene' Juanna' na' bosocheje' ni'a ne'e len gden lo' ľižya gan' gosegüe'ene'.

<sup>5</sup>Herodesen' gocľaže' gote' Juanna', perw bitwbi bende' le', le gwnežde' bene' zan chesejle'e Juanna' cho'e xtiža' Diosen', na' bžebe' bi yeson bene' ca'. <sup>6</sup>Perw na' cate' gosone' ľnin' ža la Herodesen', bi' no'ol che Herodías bya'abe' lao bene' ca' ja'ac ľnin'. Na' ľeca bebe Herodesen' can' bya'a no'ol güegon', <sup>7</sup>na' bzoe' Diosen' testigw che' gwnežjue'be' bite'teze nabebe' le'. <sup>8</sup>Na' gwlo'oyela' xna'ben' ľebe' cont gožbe' Herodesen':

—Ben' neda' to lo platw yichj Juan ben' chzoa bene' nis.

<sup>9</sup>Ne late'ze bi gwyazľaže' rey Herodesen' gone' can' gož no'ol güegon' le', perw bačhle bzoe' Diosen' testigw che' lao bene' ca' jasa'ac ľnin' gwnežjue'be' bite'teze nabebe' le', da'nan' benšaze' mandadw gac can' gwnabebe' le'. <sup>10</sup>Ca' goquen' bene' mandadw jasechogue' yen Juanna' lo' ľižya gan' yo'ena'. <sup>11</sup>Na' bosožie' yichjen' to lo platw cont bosonežjuen' no'ol güegon' na' ľebe' bnežjwben' xna'be'.

<sup>12</sup>Nach bene' ca' zjanaque' txen len da' Juanna' jasyxi'e cuerp chen' na'

jasecuašen'. Gwde na' ja'aque' gan' zoa  
Jesúsen' jaseže'ne' can' ba goquen'.

**Bguagw Jesúsen' gayo' mil bene'**

(Mr. 6:30-44; Lc. 9:10-17; Jn. 6:1-14)

<sup>13</sup> Na' cate' bene Jesúsen' can' goc che  
da' Juanna', beze'e latjen' len bene' ca'  
zjanaque' le' txen na' besyeyo'e to lo'  
barcw par ja'aque' to latje daš na' nono  
nochle ja'aclen legaque'. Perw bene' ca'  
že' yež ca' zjachi' cho'a nisdaon' cate'  
gosende' ba zjada Jesúsen', na' gosa'ac  
lažgaque' ja'aque' yo biž jasešague'  
Jesúsen'. <sup>14</sup> Na' cate' bžin Jesúsen' cho'a  
nisdaon', ble'ede' nita' bene' zan na'  
beyaše' beži'ilaže'de' legaque'. Na' bey-  
one' yogo' bene' ca' chesacšene. <sup>15</sup> Na'  
cate' ba chxoa gwbiž gosebiga' bene' ca'  
zjanaque' le' txen lagüen', na' gose'ene':

—Zoacho to latje ga bibi de, na' ba nac  
bagwže' par gagwcho xgüe. Bze bene'  
quina diža' cont šjaya'aque' yež dao' ca'  
dan' zjachi' gaža'ze šjasediljue' da' yes'e'ej  
yesagüe'.

<sup>16</sup> Nach Jesúsen' gože' legaque':

—Bitw cheyała' šjaya'aque', san le'e  
güe'elne' da' yesagüe'.

<sup>17</sup> Nach gose'ene':

—Chopga bel' ya'a chechon' de na'  
gayo'ga yetextil dao'.

<sup>18</sup> Nach Jesúsen' gože' legaque':

—Le šjaxin' ni.

<sup>19</sup> Nach ben Jesúsen' mandadw gosebe'  
bene' zan ca' lo' yixyen'. Na' gwxi'e yetex-  
til ca' gayo' na' bel' ya'a ca' chope,  
na' gwne'e yabale be'e yeła' choxclen  
che Diosen', na' bzoxjen' be'en bene' ca'  
zjanaque' le' txen cont goseyisen' len to  
to bene' ca'. <sup>20</sup> Na' yogüe' gosagüen' na'  
goseljde'. Na' bososše'e šižinw žome len  
yetextil bixjw len late' güeje bel' dan'  
bega'anna'. <sup>21</sup> Na' bene' ca' gosagw da' ca'  
zjanaque' ca do gayo' mil bene' byo, bi  
cuent no'ol ca' len bidao'.

**Jesúsen' gwze'e lo nisdaon'**

(Mr. 6:45-52; Jn. 6:16-21)

<sup>22</sup> Gwde na' Jesúsen' bene' byen  
besyeyo'o bene' ca' zjanaque' le' txen lo'  
barcon' cont gosebialagüe' besyelaque'  
yešła'ale nisdaon' šlac bega'an le' besele'  
bene' ca' ližgaque'. <sup>23</sup> Na' beyož besele'  
bene' ca' ližgaque', gwloe' to lo' ya'a  
jał güiže' Diosen' toze'. Na' cate' gož,  
toz Jesúsen' zoe' lo' ya'an. <sup>24</sup> Na' ca  
nac barcon' gan' zesyeyo'o bene' ca'  
zjanaque' Jesúsen' txen, ba zejen do  
gachol nisdaon' nžiga'ses nisen' len dan'  
chas chata' nisdaon', le ben' chechjen  
clele. <sup>25</sup> Na' do šbal beyetj Jesúsen'  
ya'ana' na' gwze'e lo nisdaon' na' ba  
zejgale' gan' zja'aquen'. <sup>26</sup> Nach cate'  
besele'ede' le' zeje' lo nisdaon' leca  
besežebe', na' bososye'e gosene':

—Še da' chda chelen' chle'echo!

<sup>27</sup> Na' la' bol' güižte Jesúsen' legaque',  
gože'ne':

—Le gonchach laže'le. Neda'na'. Bitw  
žeble.

<sup>28</sup> Nach Pedroa' gože'ne':

—Xanto', še da' li le'na', ben mandadw  
sa'a lo nisdaon' yida' gan' zon'.

<sup>29</sup> Nach gož Jesúsen' le':

—Da, Pedro.

Na' la' bchojte Pedroa' lo' barcon' gw-  
zolao gwze'e lo nisdaon' zeje' gan' zoa  
Jesúsen'. <sup>30</sup> Perw na' cate' gocbe'ede'  
chechjchgua ben', bžebe' na' gwzolao  
chebe' lo' nisen'. Nach bosye'e, gože'  
Jesúsen':

—Xana', bosla neda'.

<sup>31</sup> Na' la' blite na' Jesúsen' bexue'ne',  
na' gože'ne':

—¿Bixchen' chac chopdo'? Gwyejle'ch  
chia'.

<sup>32</sup> Nach cate' beyo'o Jesúsen' len Pe-  
droa' lo' barcon', la' gwlezte be'na'. <sup>33</sup> Na'  
bene' ca' že' lo' barcon' bosozoa xibe' lao  
Jesúsen' gosonxene'ne', gose'ene':

—Da' licze len' naco' doguale Xi'in Diosen'.

**Jesúsen' beyone' beṇe' chesacšene  
ben' nita' Genesaret**

(Mr. 6:53-56)

<sup>34</sup>Na' goselague' nisdaon' na' bešežine' yežlio gan' nzi' Genesaret. <sup>35</sup>Na' cate' beṇe' Genesareten' besyeyombi'e Jesúsen', goseyise' diža' yogo' yež ca' dan' zjachi' galaže cont gosenezde' ba bžin Jesúsen' lažgaque'. Na' beṇe' ca' že' yež ca' goseče'e yogo' beṇe' chesacšene lao Jesúsen'. <sup>36</sup>Na' goseneyoede' Jesúsen' gwnežjue' latje yesoxe' la'ch late'ze xni'a xen'. Na' yogo' beṇe' gosoxen' besyeyaquede'.

**Diža' mal dan' chchoj cho'achon'  
chonen cont lažda'ochon' bi  
naquen xilaže' len Diosen'**

(Mr. 7:1-23)

**15** Na' baḷ beṇe' fariseo ca' na' beṇe' ca' chososed chosolo'e dan' bzoj da' Moisésen' gosa'aque' Jerusalenna' na' besežine' gan' zoa Jesúsen', na' gose'ene':

<sup>2</sup>—¿Bixchen' beṇe' ca' zjanaque' le' txen bitw zjana'ogüe' da' cheson beṇe' gol ca'? ¿Bixchen' cbi chosyone'e zan ni'a cate' za' yesagi'e'?

<sup>3</sup>Nach Jesúsen' gože' legaque':

—Na' le'e ¿bixchen' chbejyichjle cbi chonle can' ža Diosen' cheyaḷa' goncho san chonxen costumbr chelen'? <sup>4</sup>Diosen' none' mandaw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyaḷa' gate'." <sup>5</sup>Perw le'e žale guaque ye' to beṇe' xaxne'e: "Bibi de goṇa' gaclena' le'e, le yogo' da' de chia' ba bnežjuan' lo na' Dios." <sup>6</sup>Na' žale bich bi cheyaḷa' gwnežjue' xaxne'en še ca'. Na' dan' žale ca', chzoale ca' ale dan' ža Diosen' na' con na'ole costumbr gole che da' xozxta'ole ca'. <sup>7</sup>Le'e nacle beṇe' gwxiye'. Chonle

cayanen' bzoj da' Isafasen' chele, gan' žan:

<sup>8</sup>Beṇe' qui chesonxene' neda' len diža' cho'a, perw bi chesonxene' neda' len lažda'ogaque'.

<sup>9</sup>Bibi zejen dan' chesonxene' neda', le dan' chososed chosolo'eden' naquen da' chnaláže' beṇačže.

<sup>10</sup>Nach Jesúsen' bozol giüiže' beṇe' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i. <sup>11</sup>Bitw nacho dan' che'ej chagw beṇačhen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

<sup>12</sup>Nach gosebiga' beṇe' ca' zjanaque' Jesúsen' txen lagüen' gose'ene':

—¿Bi gocbe'edo' beṇe' fariseo ca' bešeže'e cate' gosende' xtižo'na'?

<sup>13</sup>Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiaye'e yogo'loḷ beṇe' bi chosozenag che'. Gwžiaye'e legaque' can' choncho cate' chlažo'cho yixe' ca' chesela'ac lo yel. <sup>14</sup>Jaseye beṇe' fariseo ca'. Zjanaque' ca' to beṇe' lchol beṇe' che'nde' cue'e nez yeto beṇe' lchol. Nezecho to beṇe' lchol bitw gac cue'e nez yeto beṇe' lchol, le txen šjasebixe' to lo' yechw.

<sup>15</sup>Nach Pedroa' gože' Jesúsen':

—Bzejni'išque neto' bi zejen can' gwnaon'.

<sup>16</sup>Nach gož Jesúsen' legaque':

—¿Lencze le'e bitw chejni'ile da' quinga ba gwnia'? <sup>17</sup>¿Bi nezele yogo' dan' che'ej chagw beṇačhen' cho'on lo' li'e na' chžin hor cheden? <sup>18</sup>Perw yogo' diža' dan' chesoe' beṇačhen' chesechojen lo' yichjlažda'ogüen'. Na' še choe' beṇe' diža' mal, len chonen cont bi nac lažda'ogüen' xilaže' len Diosen'. <sup>19</sup>Le lo' yichjlaždao' beṇačhen' nan' chchoj

yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che lježgaque', na' yesene'e che bene'. <sup>20</sup> Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

**To no'ole bi naque' bene'  
Israel chejnilaže' Jesúsen'**

(Mr. 7:24-30)

<sup>21</sup> Beza' Jesúsen' latjen' len bene' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón. <sup>22</sup> Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'šque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

<sup>23</sup> Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' choł güiže' le' zižje cont gacleno'ne'.

<sup>24</sup> Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le legaque' zjazaca'lebe' ca xila' dao' be zjanacžeje.

<sup>25</sup> Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

<sup>26</sup> Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

<sup>27</sup> Nach gože'ne':

—Leczdo' Xana'. Perw beco' ca' guac yesagwba' bl'a' dao' da' cheselažo' lo yo.

<sup>28</sup> Nach Jesúsen' gože'ne':

—No'ole, leca chejnilažo' neda'. Guacencza' le' can' chaclažon'.

Na' la' beyacte xi'in no'olen'.

**Jesúsen' beyone' bene'  
zan bene' chesacšene**

<sup>29</sup> Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo ya'a jasechi'e lo ya'ana'.

<sup>30</sup> Na' besežin bene' zan lo ya'a gan' zoa Jesúsen' len bene' ca' zjanaque' le' txen. Zjanche'e no bene' nxiinj ni'e, bene' lchol, bene' bi chac nie', bene' bi zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'. <sup>31</sup> Na' leca besyebane bene' ca' cate' besele'ede' can' besyene bene' ca' bi gosac yesene, na' besyeyac bene' bi zjazoa ni'a na'gaque', na' besyeda bene' nxinj ni'e, na' besele'e bene' lchol ca'. Nach gosonxene' Diosen' ben' chonxen chio' bene' Israel.

**Jesúsen' bguagüe' tap mil bene'**

(Mr. 8:1-10)

<sup>32</sup> Gwde na' Jesúsen' goxe' bene' ca' zjanaque' le' txen na' gože' legaque':

—Cheyaše'da' bene' qui, le ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesechołde' chanez.

<sup>33</sup> Nach legaque' gose'ene':

—Gan' zoacho nga naquen to latje daš ga bibi de. ĆGaxe želecho da' yesagw yogo' bene' quinga?

<sup>34</sup> Nach gož Jesúsen' legaque':

—ĆGaca' yetextilen' de chele?

Nach gose'ene':

—Gažga yetextil dao' zjade na' to chopga bel ya'a dao'.

<sup>35</sup> Nach Jesúsen' bene' mandadw yesebe' bene' zan ca' lo yon'. <sup>36</sup> Na' gwxi'e yetextil ca' gaže na' len bel ya'a dao' ca', nach be'e yela' choxcen



che Diosen', nach bzoqxjen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'. <sup>37</sup>Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'. <sup>38</sup>Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'. <sup>39</sup>Nach beyož besela' Jesúsén' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

**Gosenabde' Jesúsén' gone'  
to da' yesele'ede' le'e yaba**

(Mr. 8:11-13; Lc. 12:54-56)

**16** Na' goquen' bal' bene' fariseo ca' na' bene' saduceo ca' gosebigue' gan' zoa Jesúsén', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'. <sup>2</sup>Nach Jesúsén' gože' legaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.” <sup>3</sup>Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chacbe'ele bi zejen da' ca' chon Diosen' tiemp nga zoacho na'a. <sup>4</sup>Le'e zoale na'a nacchgualé bene' laždao' xi'a na' ba gwle-jyichjle Diosen'. Da'nan' chnable gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsén' ca', beze'e len bene' ca' zjanaque' le' txen gan' nita' bene' ca'.

**Dan' chsed chlo'e bene' fariseo  
ca' na' bene' saduceo  
ca' zaca'leben ca' levadura**

(Mr. 8:14-21)

<sup>5</sup>Na' cate' besežine' yešla'a nisdao' Galilean', bene' ca' zjanaque' Jesúsén' txen gosacbe'ede' gosanjaže' yetextil da' yesagüe'. <sup>6</sup>Nach Jesúsén' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

<sup>7</sup>Nach gose' lježgaque':

—Gwne' ca' le gague bi yetextilen' noa'chon'.

<sup>8</sup>Na' Jesúsén' gocbe'ede' xbab dan' gosone', na' gože' legaque':

—¿Bixchen' chaczejlaže'le da' bibi yetextil de? ¿Bi chejle'le napa' yela' guac par gwguagua' le'e? <sup>9</sup>¿Bina' še-jni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebał žome pedas yetextil botoble dan' becho'onen? <sup>10</sup>Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'onen? <sup>11</sup>¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

<sup>12</sup>Nach bene' ca' zjanaque' Jesúsén' txen gosacbe'ede' gague be'e diža' che levadura dan' chosočhine' par chcha'o yetextilen' san be'e dižan' ca' cont bi yosozenague' che dan' chososed chosolo'e bene' fariseo ca' na' bene' saduceo ca'.

**Pedroa' gwne' Jesúsén' naque' bene'  
gwseła' Diosen' cont nabi'e**

(Mr. 8:27-30; Lc. 9:18-21)

<sup>13</sup>Nach Jesúsén' len bene' ca' zjanaque' le' txen besežine' gała'ze to ciuda dan' nzi' Cesarea de Filipino. Nach Jesúsén' gože' bene' ca' gosa'aclene' le':

—Diosen' gwsele' neda' golja' benach. Perw ¿bi chesena bene'? ¿non' naca' neda'? ¿Bi chesene'?

<sup>14</sup> Na' gose'ene':

—Bale' chesene' naco' da' Juan ben' bzoa bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' da' Jeremías o yeto bene' be' xtiža' Diosen' cani'te.

<sup>15</sup> Nach gože' legaque':

—¿Chixe le'e? ¿No žale naca'?

<sup>16</sup> Nach Simón Pedro' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocaṇe.

<sup>17</sup> Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno benach bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. <sup>18</sup> Na' neda' žia', len' lio' Pedro na' zeje dižan' yej. Na' ca to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonexene' neda'. Na' bitwbi gac yeson da' xigüe' ca' yosolej yosošošen bene' ca' yesonexene' neda'. <sup>19</sup> Na' gona' lo nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo nao' yo'o bene' ca' yesonexene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen ye'gaco'ne' cont yežaguen len dan' ža Diosen'.

<sup>20</sup> Nach Jesúsen' gože' legaque' nono yes'e še naque' Cristo ben' gwlej Diosen' cont nabi'e.

### Jesúsen' gwdixjue'ede' gate'

(Mr. 8:31-9:1; Lc. 9:22-27)

<sup>21</sup> Na' žana' Jesúsen' gwzolağüe' bzejni'ide' bene' ca' zjanaque' le' txen cheyała' šeje' Jerusalénna'. Na' gože' le- gaque' bene' gole blao ca' chesenabi'e

nación chechon', na' b̄xoz gwnabia' ca' na' bene' ca' chososed chosolo'ede' dan' bzoj da' Moisés yosoči yososaque' le' na' yesote' le'. Perw yeyon ža yebane' ladjo bene' guat ca'. <sup>22</sup> Nach Pedroa' gwche'e Jesúsen' gan' nac lchojiže na' gwzolağüe' be'lene' le' diža' gwdiḷe' le', gože'ne':

—Xana', Diosen' gaclene' le'. Bitw gac chio' ca dan' žo' nga.

<sup>23</sup> Perw Jesúsen' gwyečhje' gwne'e Pedroa' gože'ne':

—¿Gwcuas ca'ale Satanás! Chgo'oyelo' neda' bi gona' can' nžia' bia' Diosen' gona'. Bi nsa'o xbab che Dios, san nsa'o xbab che benach.

<sup>24</sup> Gwde na' Jesúsen' gože' bene' ca' zjanaque' le' txen:

—Note'teze bene' še chaclaže' gaque' neda' txen, cheyała' cuejyichj cuine' la'czla' žaglagüe' na' con gone' can' nia' neda'. <sup>25</sup> Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli tocaṇe. <sup>26</sup> ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocaṇe? Le bi zoa nacle gon benachen' chixjue' cont gata' yela' mban che' toli tocaṇe. <sup>27</sup> Diosen' gwsele' neda' golja' benach na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to benachen' nite' mbalaz o yesezaca'zi'e neče da' goson to toe'. <sup>28</sup> Na' da' li žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsela' Diosen' golja' benach.

### Jesúsen' goque' ca to be'ni'

(Mr. 9:2-13; Lc. 9:28-36)

**17** Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'.

<sup>2</sup>Na' lao lęaque' bža' ca goc Jesúsen', cho'alagüen' goctiten ca gwbiž, na' xala-nen' beyaquen šiš xila' ca be'ni'. <sup>3</sup>Na' concze besele'ede' da' Moisésen' len da' Elíasen' na' chosošalje' len Jesúsen'. <sup>4</sup>Nach Pedroa' gože' Jesúsen':

—iXanto', leca güenna' zoacho nga! Še chaclažo', gonto' šone ranšw, to čhio', na' to che Moisés, na' yeto che Elías.

<sup>5</sup>Ne' choe'te Pedron' dižan' ca' cate' to bejw da' chactiten gwechjen lęaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže'chgüeda' che'. Le gwzenag che'.

<sup>6</sup>Na' cate' bene' ca' nče'e Jesúsen' gosende' diža' ca' besežebchgüe', con gosaze' coscho'ale lo yon'. <sup>7</sup>Nach gwbiga' Jesúsen' gwxoā ne'e yichjgaquen' na' gože'ne':

—Le yeyas. Bitw žeble.

<sup>8</sup>Na' cate' besyechis lagüen', noch no besele'ede' san toze Jesúsen' zie'.

<sup>9</sup>Na' gwde na' šlac chesyeyetje' lo ya'an Jesúsen' gože' lęaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwsela' Diosen' golja' benač, cana'ch güe'le diža' čhen.

<sup>10</sup>Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoo cani' cheyala' yide' da' yoble cate' za' yedenabia' ben' sela' Diosen'. ¿Bixčhen' chesene' ca'?

<sup>11</sup>Nach Jesúsen' gože' lęaque':

—Da' licze zgua'tec yid da' Elíasen' na' yeyonšagüe' yogo'loł. <sup>12</sup>Perw žia' le'e, Elías ba bide' na' bi gosacbe'e bene' še nac le'. Na' gosonde' le' con ca gosaclaže'. Na' ca'czen' yosoči yososaque' neda' naca' ben' gwsela' Diosen' golja' benač.

<sup>13</sup>Nach bene' ca' zja'aque' len Jesúsen' gosacbe'ede' cho'e diža' che da' Juan ben' bzoe' bene' nis.

### Beyon Jesúsen' to bi' chazbe' šon

(Mr. 9:14-29; Lc. 9:37-43)

<sup>14</sup>Na' cate' besežine' gan' zjanžag bene' zan, to bene' bšague' Jesúsen' na' bzoa xibe' lagüe'na' gože'ne':

<sup>15</sup>—Xana', beyaše'laže'šca xi'ina' nga. Chazbe' šon na' leca chžaglaobe' len len. Na' zan ni'a ba jačazbe' lo yi' na' lecze zan ni'a ba blažo'be' lo nis. <sup>16</sup>Ba bedesana'be' lao bene' ca' zjanaque' le' txen, perw bitw gosaque' yesyeyone'be'.

<sup>17</sup>Nach Jesúsen' gože' bene' ca' že'na':

—iLe'e bene' bi chejnilaže', chonchguale clele! ¿Batca' zelao na'lagua' le'e? Bedesan bidaon' ni.

<sup>18</sup>Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

<sup>19</sup>Na' gwde goc ca', bene' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bixčhen' bi goc neto' yebejto' da' xigüen'?

<sup>20</sup>Jesúsen' gože' lęaque':

—Bitw goc yebejten dan' bitw gwejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'lne', guaque ye'le ya'a nga: “Gwcuas nga, na' jayzoo na'ate”, na' gac can' nalen'. Bitw bi de dan' bi gac gonle con še chejle'le Diosen' gone' gaquen. <sup>21</sup>Na' cont yebejle da' xigüe' ca' dan' zjanac ca dan' bebeja' yichjlaždao' bidao'na', cheyala' gwyo gwchejle gonle gwbas na' zoatezle yoł güižle Diosen'.

**Da' yoble Jesúsen' gwdixjue'ede' gate'**

(Mr. 9:30-32; Lc. 9:43-45)

<sup>22</sup> Na' šlac zjayda Jesúsen' len bene' ca' zjanaque' le' txen do gan' mbane distritw Galilea, Jesúsen' gože' legaque':

—Diosen' gwsele' neda' golja' benač, na' yodie' neda' lo na' bene' chesegue'ede'nda', <sup>23</sup> na' yesote'nda'. Perw na' yeyon' ža yosban Diosen' neda' ladjo bene' guat ca'.

Nach bene' ca' zjanaque' Jesúsen' txen cate' gosende' xtiže'na' gosacyaše'chgüede'.

**Jesúsen' gwdixjue' da'  
chosochixjue' che yodao'**

<sup>24</sup> Na' cate' besyežine' Capernaum, bene' ca' chosochixjue' che gastw che yodao' blao che chio' bene' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheyała' chixjue' che yodaon'?

<sup>25</sup> Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yona'. Nach Jesúsen' la' gožtie' le':

—¿Bi xbab chono', Simón? Ca nac bene' gwnabia' ca' nita' yežlio nga, ¿non' chacdo' chosochixjue'? ¿bene' gualaž che' o še bene' zito'?

<sup>26</sup> Nach Pedroa' gože'ne':

—Chosochixjue' bene' zito'.

Nach Jesúsen' gože' le':

—Bene' zjanaque' biše' lježe' bitwbi cheseyixjue'. Na' chio' naccho xi'in Dios ben' zoa yaba chnabi'e, bitw cheyała' chixjwcho che yodaon'. <sup>27</sup> Perw cont nono yeson xbab chgue'echo yodao' blaon', na' chixjwcho. Gwyej cho'a nisdaon', na' bzała' yixjw chion' na' bel nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

**Gosacyož bene' ca' zjanaque'  
Jesúsen' txen noe' nacch blao**

(Mr. 9:33-37; Lc. 9:46-48)

**18** Nachen' bene' ca' zjanaque' Jesúsen' txen gosebigue' cuite'na', na' gose'ene':

—¿No neto' gachto' blao cate' Diosen' ben' zoa yaban' gone' cont nabi'o'?

<sup>2</sup> Na' Jesúsen' goxe' to bidao' na' bzeche'be' gachol' legaque'. <sup>3</sup> Na' gože'ne':

—Da' li žia' le'e, note'tezle še bi gwša' xbab chelen' cont gwzenagle che Diosen' ca chon to bidao' cate' chzenagbe' che xaxna'be', gwbat nabi'a' Diosen' ben' zoa yaban' yichjlažda'ole. <sup>4</sup> Na' note'teze bene' še yeyaque' ca bidao' nga na' gwzexjwlaže' lao Diosen', nach gague' bene' blao len neda' cate' Diosen' ben' zoa yaba gone' cont solao nabi'a'. <sup>5</sup> Note'teze bene' chone' güen len to bidao' ca bi' nga neche da' chejnilaže' neda', choncze güen len neda'.

**Bitw cheyała' goncho  
cont gon bene' da' xinj**

(Mr. 9:42-48; Lc. 17:1-2)

<sup>6</sup> Note'teze bene' chon cont lažo' to bene' za' gwzolažie' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clal ca da' gone' cont lažo' bene' yoble gone' da' xinjen'. <sup>7</sup> Nyaše'chguaze gac che benačhen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' bene' yesone' da' xinj, perw nyaše'chguaze gac che bene' chon cont lažo' bene' yoble gone' da' xinjen'.

<sup>8</sup> Na' da' li žia' le'e, še ni'a na'len' chonen cont gonle da' xinj, cheyała' cuejyichjle da' malen' chonle. Yejni'a bibi ni'a na'len' soa clal ca gonle da' xinjen' len len. Na' yejni'a šjayzoale len Diosen' toli tocane bi zoa šla'a taca'len' o nchog šla'a ni'alen' clal ca yeyejle lo' yi' gabil' nya'

cuerp chelen'. <sup>9</sup>Na' še yejlaolen' chonen cont gonle da' xinjen', cheyała' cuejyichjle da' malen' chonle. Yejni'a bibi yejlaolen' cuia clal ca gonle da' xinjen' len len. Na' yejni'a šjayzoale len Diosen' toli tocane zoa šla'aze yejlaole clal ca yežinle lo yi' gabił žia chop la'a yejlaolen'.

### Jempl che xila' be gocžeje

(Lc. 15:3-7)

<sup>10</sup>'Bi gonle note'teze bene' chejni-laže' neda' ca bene' bibi zaca'tec, la'czla' bitec zaque' len benach. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'. <sup>11</sup>Na' ca naca' neda', Diosen' gwsele' neda' golja' benach cont gwnežjua' yela' mban toli tocane che bene' ba zjambiyi'.

<sup>12</sup>'ŽBixe chonle xbab? Še nita' to gayoa xila' chele na' yexjw toba' žbi yocua'anle be ca' yetaplalj togalj do lo ya'a na'ze na' šjaydiljwle ben' bexjua'? <sup>13</sup>Na' da' li žia' le'e, cate' yežeceleba' yebechle dan' beželban' clal ca can' chebele che be ca' taplalj togalj ben' bi gosacžeje. <sup>14</sup>Ca'czen' naquen len bene' ca' chesejni-laže' neda' bene' ca' bitec bi zjazaque' len benachen'. Xacho Diosen' ben' zoa yaban' bitw che'nde' cuiayi' ne toe'.

### Cheyała' yezi'xenko che bene' lježcho bene' chesejni-laže' Diosen'

(Lc. 17:3)

<sup>15</sup>'Še to bene' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje'elenlenen', yezoe' binlo len Diosen' da' yoble. <sup>16</sup>Perw še bi gwzenague' diža' dan' šje'elenlenen', güench che'ele yeto o yechope bene' lježle cont yesaque' testigw ba gota'yoele ben' yoša' xbab chen'. <sup>17</sup>Na' še bitwczew gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na'

še neca gwzenagcze' che yogo'le, cbich gonle' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejni-laže' Diosen', ca no bene' güechixjw bene' chesonchgüa da' xinj.

<sup>18</sup>'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen' ye'gaclene' cont yežaguen len dan' ža Diosen'.

<sup>19</sup>'Na' da' yoble žia' le'e, še chople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'. <sup>20</sup>Na' gan' nžag chope šonle chonxenle neda', zoacza' txen len le'e.

<sup>21</sup>Nach Pedroa' gwbigue' gože' Jesúsén:

—Xana', še bene' lježa' chone' da' mal contr neda', žbał ni'a cheyała' yezi'xena' che'? žzelao do gaž ni'a?

<sup>22</sup>Nach Jesúsén' gože'ne':

—Žia' le', gague cheyała' yezi'xen che lježle zelao do gaž ni'a, san yogo'te ni'a cheyała' yezi'xen che lježle.

### Jempl che ben' bi bezi'xene' che dan' čala' bene' lježe'

<sup>23</sup>'Na' yela' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesala' xmose' ca' xmechue'. Na' goclaže' yebeje' cuent len legaque'. <sup>24</sup>Na' cate' gwzola'güe' bezi'e cuent che to toe', da' nechw bžin to xmose' ben' čala' zan mil-lón. <sup>25</sup>Na' mosen' bitwbi xmechue' gota' par yonežjuen'. Da'nana' bene' gwnabian' bene' mandadw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' čale' chen'. <sup>26</sup>Nach mosen' bzoa xibe' lao bene' gwnabian' gota'yoede' le' gože'ne': "Xana', gwdapešca yela' chxenlaže' len neda', na' yeyona' doxen dan' čala' čhion'."

<sup>27</sup>Nach bene' gwnabian' beyaše'de' le' na' bezi'xene' che doxen dan' chale' na' bsane' le'. <sup>28</sup>Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwnizte' yene' gože'ne': "Yeyono' dan' čalo' čhian' netec na'a." <sup>29</sup>Nach mos lježen' la' bzoate' xibe' lagüen', gože'ne': "Gwdapešca yela' chx-enlaže' chia' na' yeyona' doxen dan' čala' čhion'." <sup>30</sup>Perw na' mos nechon' bitw bzenague' che mos lježen'. La' gwyejte' jene' mandadw goseyixjue'ne' ližya na' bi yechoje' še bina' yonežjue' dan' chale' čhen'. <sup>31</sup>Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'lol can' goca'. <sup>32</sup>Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' čhio' doxen dan' čalo' čhian' dan' gota'yoedo' neda' yezi'xena' čhion'." <sup>33</sup>¿Bixchen' bi beyaše'do' mos lježo' ben' chale' čhion' can' beyaše'da' le'?" <sup>34</sup>Na' bža'achgua bene' gwnabian' na' bdie' le' lo na' bene' goseyixjue'ne' ližya ga žaglaogüe', na' bi yechoje' še bina' yeyixjue' doxen dan' chale' čhen'.

<sup>35</sup>Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

**Bi cheyała' yela'acho len no'ol chechon' cont soalencho no'ole yoble**

(Mr. 10:1-12; Lc. 16:18)

**19** Na' Jesúsen' cate' beyož gwne' da' ca' beze'e distritw Galilean' na' gwłague' yegw Jordánna' beyeje' gan' mbane distritw Judean'. <sup>2</sup>Na' bene' zan ja'aclen le', na' beyone' bene' ca' chesacšene.

<sup>3</sup>Na' bał bene' fariseo ja'aque' gan' zoe'na', le gosaclaže' yesebeje'ne' diža' da' yosochine' cont gosozie'ne' xya čol, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' čhen'?

<sup>4</sup>Nach gože' legaque':

—¿Bina' gwłable can' nyoj Xtiža' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. <sup>5</sup>Na' gwna Diosen': "Da'n'an' bene' byon' gwsane' xaxne'e cont soalene' no'ole čhen' na' chope' yesaque' ca toz bene'." <sup>6</sup>Na' ca' bich yesac chope' san toze'. Da'n'an' bi cheyała' yesyele'e, le Diosen' ba bcode' legaque'.

<sup>7</sup>Nach gose'ene':

—Še naquen ca' ¿bixčhen' ben da' Moisésen' mandadw cate' to bene' yele'e len no'ol čhen' cheyała' čhas to yiš da' gwnežjue' no'ol čhen' ga güen' diža' besyele'ena'?

<sup>8</sup>Jesúsen' gože' legaque':

—Da' Moisésen' be'e latje yela'ale len no'ol čhele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw nacho goclaze' yesyele'e. <sup>9</sup>Žia' le'e, note'teze bene' čhele'e len no'ol čhe' na' cheque'e no'ole yoble, len neztede' no'ol čhen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' čhe', lecze tozce ca da' xinj gone' ca nac da' chon bene' chata'lene' no'ol che bene' yoble.

<sup>10</sup>Nach bene' ca' zjanaque' Jesúsen' txen gose'ene':

—Še can' naquen che bene' byo na' no'ole, güench nono gwšagna'.

<sup>11</sup>Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen. <sup>12</sup>Nita' bene' bi žan

yosošagne'e dan' gosalje' bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp chegaque'. Na' lecze ca' nita' bene' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

**Jasesane' bidao' lao Jesúsén'**

(Mr. 10:13-16; Lc. 18:15-17)

<sup>13</sup> Na' ja'ac bene' jasesane' bidao' lao Jesúsén' cont xoa ne'e yichjgacbe' na' nabe' lao Diosen' gaclene' legacbe'. Perw bene' ca' zjanaque' le' txen gosedile' bene' ca' zjanche'ebe'. <sup>14</sup> Nach Jesúsén' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

<sup>15</sup> Na' beyož gwžxoa na' Jesúsén' yichjgacbe' gwnabe' lao Diosen' gaclene'be', nach gwyeje' ga yoble.

**Bene' güego' bene' goc bene' gwni'a**

(Mr. 10:17-31; Lc. 18:18-30)

<sup>16</sup> Na' goquen', to bene' güego' bžine' gan' zoa Jesúsén', na' gože'ne':

—Maestrw, le' naco' bene' güen. ¿Bi da' güen cheyała' gona' cont gata' yela' mban chia' toli tocanē?

<sup>17</sup> Nach Jesúsén' gože'ne':

—¿Bixchen' žo' naca' bene' güen? Toz bene' güen zoa, na' len' naque' Dios. Perw na' še chaclažo' gata' yela' mban chio' toli tocanē, cheyała' gono' can' non Diosen' mandaw goncho.

<sup>18</sup> Nach gože' Jesúsén':

—¿Bica' da' ca'?

Nach Jesúsén' gože' le':

—Nono gotle, bi gata'lenle no'ol bi nac no'ol chele o bene' byo bene' bi nac bene' chele, bi cuanle, bitw güe'le

diža' güenlaže' che bene' lježle. <sup>19</sup> Le gap bala'an xaxna'le, na' le gaque lježle can' chaque cuinle.

<sup>20</sup> Nach bene' güegon' gože' Jesúsén':

—Yogo'loł da' quinga gwzolagua' chonczan' cate' ne' nactia' bidao'. ¿Bixe dan' chyažjzech gona'?

<sup>21</sup> Jesúsén' gože'ne':

—Še chaclažo' gaco' cayanen' chazlaže' Diosen', jayete' yogo' da' de chio', na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen', da' zaca'ch gata' chio'. Na' še ba beyož beno' can' žia' le', nach sao' gaco' neda' txen.

<sup>22</sup> Perw na' bene' güegon' cate' beyož bende' diža' can' gož Jesúsén' le', beza'yaše', le bene' gwni'achgua goque'.

<sup>23</sup> Gwde na' Jesúsén' gože' bene' ca' zjanaque' le' txen:

—Da' li žia' le'e, leca zdebe naquen to bene' gwni'a gwzenague' che Dios ben' zoa yaba cont Diosen' nabi'e yichjlažda'ogüe'. <sup>24</sup> Da' yoble žia' le'e, bedao'ch te to be xen be nzi' camello to lo' nag yeše' clal ca to bene' gwni'a gwzenague' che Dios cont Diosen' nabi'e yichjlažda'ogüe'.

<sup>25</sup> Na' bene' ca' zjanaque' Jesúsén' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

<sup>26</sup> Jesúsén' gwne'e legaque', nach gože'ne':

—Bibi de da' gac yeson benachen' cont šjasyenite' len Diosen', perw bi zoa da' nacho da' bi gac gon Dios.

<sup>27</sup> Nach Pedroa' gože' Jesúsén':

—Neto' ba gwlejiychjto' yogo' da' de cheto' cont nacto' le' txen. ¿Bi da' güen gata' cheto' dan' ba gwlejiychjto' da' ca'?

<sup>28</sup> Jesúsén' gože' legaque':

—Da' li žia' le'e, Diosen' gwsele' neda' golja' benach na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle

cue'le cuita'na' nabia'le šižinw cuen bene' ca' zjanaque' xi'in diaža che da' Israel. <sup>29</sup>Na' note'teze bene' ba gwlejyichje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca yogo' da' ca'. Na' lecze gata' yela' mban che' toli tocañe. <sup>30</sup>Perw zan bene' zjanaque' bene' žialao na'a, gwžin ža cate' yesaque' bene' bzebe. Na' bene' zjanaque' bene' bzebe na'a, gwžin ža cate' yesaque' bene' žialao.

### Jempl che bene' güen žin ca'

**20** Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca da' nga goc. To bene' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' bene' güen žin cont yesone' žin yežlio chen' žana'. <sup>2</sup>Na' gosexenlaže' bene' güen žin ca' to denario chixue' to toe' con ca chac mosen' tža žin. Nach gwsele' legaque' gan' jasene' žinna'. <sup>3</sup>Na' do cheda ga gozeje' gan' chac ya'an, na' ble'ede' nita'ch bene' bibi žin de yesone'. <sup>4</sup>Na' gože' legaque': “Lencze le'e le šja'ac gan' že' yag uvas chian' le šjen žin na' chixjwca' le'e ca cheya'a.” Nach ja'ac bene' ca'. <sup>5</sup>Na' da' yoble gwyeje' do guagwbiž na' do cheda šone. Bezle'ede' nita'ch bene' bibi žin chesone' nach gwsele' legaque' cont yesone' žin gan' že' yag uvas chen'. <sup>6</sup>Na' ca do cheda gayo' šeže'le gozeje' da' yoble ble'eczde' nita'ch bene' bibi žin chesone'. Na' gože' legaque': “¿Bixchen' bi gwyejle žin?” <sup>7</sup>Nach gose'ene': “Notno gwne neto' šjento' xšine'.” Nach goze'e legaque': “Lencze le'e le šja'ac le šjen žin gan' že' yag uvas chian'. Na' chixjwca' le'e ca cheya'a.” Nach ja'ac bene' ca'. <sup>8</sup>Na' cate' bžin hor bosa' xan yag uvasen' bene' güen žin ca', nach gože' mos blaoc chen': “Beyax bene' güen žin

ca' cont chixjo'ne', solao chixjo' bene' ca' besela'ac bzebe, na' yeyožle len bene' ca' besela'ac da' nechw.” <sup>9</sup>Nach mos blaon' zgua'tec gwduxjue' bene' ca' gosezolagüe' gosone' žin cheda gayo' šeže'le tgüeje denario to toe'. <sup>10</sup>Na' cate' gwduxjue' bene' ca' gosezolagüe' gosone' žin šezildao', gosacde' chixjoché' legaque' da' zcha'och dan' gosezolagüe' gosone' žin šezildao'. Perw tozcze can' gwduxjue' yogo'loite'. <sup>11</sup>Na' cate' beyož gosezi' laxjw bene' ca' gosezolao žinna' šezildao', gosadoe' diža' xan žinna'. <sup>12</sup>Gose'ene': “Do ža bžaglaochguato' lo da' zeye' bento' žin chion'. Na' tozcze can' gwduxjo' neto' len bene' ca' besela' bzebe, len to hor güejgan' gosone' žin.” <sup>13</sup>Perw na' xan žinna' gože' toe': “Migw chia', bitwbi da' mal chona' len le'. ¿Gague gwxenlažo' to denario chixjua' to tole? <sup>14</sup>Laxjon' ba gwxi'o, guac yeyejo'. Chaclaža' gwnežjua' bene' ca' to denario güeje con can' bena' le'e la'czla' besela'aque' bzebe. <sup>15</sup>¿Bixchen' chxi'o neda' neče dan' naca' bene' šagüe'? Naquen lo na' gona' con ca chaclaža' len da' de chia'.”

<sup>16</sup>Nach Jesúsen' gože' bene' ca' bosozenag jemplen':

—Can' naquen, nita' bene' zjanaque' bene' bzebe na'a, perw lecze gwžin ža cate' legaque' yesaque' bene' žialao. Na' nita' bene' zjanaque' bene' žialao na'a, perw gwžin ža yesaque' bene' bzebe. Diosen' chaxe' yogo'lol bene' cont yesejle'e che', perw bal' guen' chosozenague' che', na' legacze' chbeje' cont chesaque' xi'ine'.

### Da' yoble chyixjue'e Jesúsen' gate'

(Mr. 10:32-34; Lc. 18:31-34)

<sup>17</sup>Jesúsen' len yezan bene' zja'aque' Jerusalenna'. Na' šlac zjangüe'e nezen' gwlejiže' bene' šižinw ca' gwleje' cont zjanaque' txen len le' na' gože' legaque':



<sup>18</sup>—Na'a ba zejcho Jerusalénna' gan' yesone' neda' lo na' b̄xoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda', neda' naca' ben' gwsela' Dios golja' benach. <sup>19</sup>Na' yesone'nda' lo na' bene' bi zjanaque' bene' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon̄ ža yebana' ladjo bene' guat ca'.

**Xna' Jacobo na' Juanna'  
gw̄nabe' yesebe' xi'ine' ca'  
cuit Jesús'en' gan' nabi'ena'**

(Mr. 10:35-45)

<sup>20</sup>Na' ja'ac xi'in̄ Zebedeo, Jacobo len Juan, na' len xna'gaque' lao Jesús'en'. Na' xna'gaquen' bzoa xibe' lao Jesús'en' gože'ne':

—Chn̄abda' le' to goclen.

<sup>21</sup>Nach Jesús'en' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.

<sup>22</sup>Jesús'en' gože' Jacobo na' Juanna':

—Le'e cabi nezele bi dan' ch̄nable.

¿Gw̄chejlaže'le tele yela' zi' yela' ya' ca dan' tia' neda' na' gac chele can' gac chia'?

Nach bosyoži'e xtižen' gose'ene':

—Gw̄chejlaže'to'.

<sup>23</sup>Nach Jesús'en' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian', perw bi naquen lo na' n̄ia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen che'.

<sup>24</sup>Nach cate' yeši bene' ca' zjanaque' le' txen gosende' can' gosena bene' ca' chope, beseloque' legaque'. <sup>25</sup>Nach

Jesús'en' goxe' yogüe' cont gosebigue' lagüen' na' gože' legaque':

—Nezeczzele bene' gwnabia' che to to nación na' bene' blao ca' chesone' byen chosozenag bene' chegaque'. <sup>26</sup>Perw bi naquen ca' len le'e. San note'tezle chaclaže'le gacle bene' blao, cheyała' gw̄zewjwlaže'le gaclen bene' lježle. <sup>27</sup>Na' še note'tezle chaclaže'le gacle bene' žialao, cheyała' gon cuinle ca xmos bene' lježle. <sup>28</sup>Ca'cze naquen len neda' naca' ben' gwsela' Diosen' golja' benach. Gague za'a cont yesaclen bene' neda' san za'a cont gaclena' bene', na' chzanlaže' cuina' yesote' neda' neche xtoła' benachen'.

**Jesús'en' bene' cont chope  
bene' lchoł besyele'ede'**

(Mr. 10:46-52; Lc. 18:35-43)

<sup>29</sup>Nach cate' besyeya'aque' ciuda Jericó, bene' zan zjasenagüe' Jesús'en' len bene' ca' zjanaque' le' txen. <sup>30</sup>Na' chope bene' lchoł zjachi' chanez gan' zjayda Jesús'en'. Na' cate' gosacbe'ede' Jesús'en' zej gan' zjachi'ena' nach chososya'adie' gose'e le':

—Xanto', len' naco' xi'in̄ diaža che da' rey Davin'. Beyaše'laže'šca neto'.

<sup>31</sup>Nach bene' ca' chesyede gan' zjachi'ena' gosedi'le' legaque' cont yesenite' šize. Perw na' gosene' zižjeh gose'ene':

—¿Xanto', len' naco' xi'in̄ diaža che da' rey Davin', beyaše'laže'šca neto'!

<sup>32</sup>Jesús'en' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

<sup>33</sup>Nach gose'ene':

—Xanto', chaclaže'to' yele'eto'.

<sup>34</sup>Jesús'en' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

**Gosonxene' Jesúsen'  
cate' beyo'e Jerusalén**

(Mr. 11:1-11; Lc. 19:28-40; Jn. 12:12-19)

**21** Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsele' mandadw chope bene' ca' zjanaque' le' txen, <sup>2</sup>gožgaque'ne':

—Le šja'ac yež dan' chi' gala'ze, na' cate' žinlen' na' yeželele to burr be no'ole da'ba' yag na' nche'te to xi'inda'oba'. Le sežgacba' na' le che'gacba' nga. <sup>3</sup>Na' še bi ye' bene' le'e na' ye'ne': “Xanto'na' chyažjde' legačba'.” Na' la' yedyesan-tetze'ba' len le'e.

<sup>4</sup>Goc yogo' da' qui cont goc can' bzoj to ben' bzoj Xtiža' Diosen' cani', gwne':

<sup>5</sup>Gož bene' ca' nita' Jerusalénna':

“Le na'šc, ba za' rey chelen', žie' cože' to burr dao', xi'in beyixe' be choa' yoa'.

Ze'e ca to bene' bi naque' bene' blaó.

<sup>6</sup>Na' ja'ac bene' ca' yež dao' dan' gož Jesúsen' legačue' ca', na' gosone' can' ben Jesúsen' mandadw. <sup>7</sup>Na' besyeche'e bur-roa' len xi'inba' lao Jesúsen' na' gosexoa no xagačue' cože'ban' na' gwžia Jesúsen' be daon' cont gwyeje' Jerusalénna'. <sup>8</sup>Na' bene' zan gosonxene' Jesúsen' goseyixjw no xagačue' lo nez cont blej burron' len na' yebale' gosechogue' zoze' yag na' goseyixjuen' lo neza'. <sup>9</sup>Na' bene' zjažialao na' lecze bene' za'ac cože' bososye'e gosene':

—iLeca bene' zaca' benga nac xi'in diaža che da' rey David! iMbalaz ben' za' nga gwsela' Xancho Diosen' le' cont nabi'e! iLeca bene' zaca' ben' zoa yaban'!

<sup>10</sup>Na' cate' bžin Jesúsen' Jerusalénna' yogo' bene' ca' že' ciudan' besyebande', na' gosene':

—iNo benga bla' nga?

<sup>11</sup>Na' bene' ca' nžag Jesúsen' bosyoži'e xtiža'gačue' gosene':

—Bengan' Jesús bene' za' yež Nazaret gan' mbane distritw Galilea na' cho'e xtiža' Dios.

**Jesúsen' bebeje' bene' ca'  
cheson ya'a yodao' blaon'**

(Mr. 11:15-19; Lc. 19:45-48; Jn. 2:13-22)

<sup>12</sup>Na' Jesúsen' gwyo'e chyo'o yodao' blaon' na' bešaše' yogo' bene' ca' chesote' na' bene' chesa'o na'. Nach bchiže' xmes bene' ca' chosoša' mechw, na' yag ga chesebe' bene' ca' chesote' ngolbex. <sup>13</sup>Na' gože' legačue':

—Nyojcz Xtiža' Diosen' žan: “Yesene' ližan' naquen to latje gan' yesol güiž bene' neda'”, perw le'e chonlen ca to latje ga že' bene' gwban.

<sup>14</sup>Na' bene' lchoł ca' na' len bene' ca' nxiinj ni'e gosebigue' lao Jesúsen' šlac zoe' chyo'o yodaon'. Nach beyone' legačue'. <sup>15</sup>Perw na' bžox gwnabia' ca' na' bene' ca' chososed chosolo'e dan' bzoj da' Moisésen' leca beseže'e cate' besele'ede' yela' guac ca' dan' ben Jesúsen'. Na' lecze beseže'e cate' gosende' can' bososya'a bi' bixjw ca' chyo'o yodao' blaon', gosen-abe': “Leca bene' zaca' benga nac xi'in diaža che da' rey David.” <sup>16</sup>Nach gose'e Jesúsen':

—iZendo' bin' gosena bidao' ca'?

Jesúsen' boži'en gože' legačue':

—Zenda'. iBina' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

<sup>17</sup>Na' bechoje' gan' nita' bene' ca' na' beze'e ciudan'. Na' že'na' jayga'ane' Betania.

**Ben Jesúsen' cont gwbiž yag yixgüigw**

(Mr. 11:12-14, 20-26)

<sup>18</sup>Na' zil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gwdon Jesúsen'. <sup>19</sup>Na' ble'ede' to yag yixgüigw zoan cho'a nezen' na' jane'e še žia yaguen' yixgüigw.

Perw bibi bželde', con xlaguen' na'ze žia.  
Nach gožen':

—Bich bi yixgüigon' cuio'.

Na' la' gwbižte yaguen'. <sup>20</sup>Nach bene'  
ca' zjanaque' le' txen besyebande' cate'  
besele'ede' can' goquen', nach gose'ene':

—¿Nac goquen' la' gwbižte yaguen'?

<sup>21</sup>Na' Jesúsen' gože' legaue':

—Da' li žia' le'e, še chejnilaže'le Diosen'  
na' bitw gaczejlaže'le, guaque gonle can'  
ba benan' cont gwbižte yaguen'. Na' lecze  
ca' guac ye'le ya'a nga: "Gwcuase nga  
na' jaso'a lo' nisdaon'", na' gac can'  
nalen'. <sup>22</sup>Na' še chejnilaže'le Diosen',  
bite'teze dan' nabelene' cate' yol güiž-  
lene', gonczen' le'e.

### Yela' chnabia' che Jesúsen'

(Mr. 11:27-33; Lc. 20:1-8)

<sup>23</sup>Nach Jesúsen' gozeje' yodao' blaon'  
da' yoble. Na' šlac chsed chlo'ede' bene'  
ca' že' na', bxož gwnabia' ca' na' bene'  
gole blao ca' chesenabi'e nación che-  
chon' gosebigue' cuit Jesúsen'. Nach  
gosenabde' le':

—¿Bi yela' gwnabia' napo' chono' da'  
qui? ¿No ben yela' gwnabian' cont chono'  
da' qui?

<sup>24</sup>Nach Jesúsen' boži'e xtiža'gaquen',  
gwne':

—Lecze de to da' nabda' le'e. Še  
yoži'ile xtižan' nach ni'a le'e bi yela' gwn-  
abia' chonlendand'. <sup>25</sup>Le našc neda': ¿non'  
gwseła' da' Juanna' bzoe' bene' nis? ¿Dios  
nan' gwsele'ne', še benachen'?

Nach legacze' gose' lježe':

—Še ye'chone' Dios gwseła' le', na'  
ye'e chio': "¿Bixchen' ca' gweyje'le'le che'?"

<sup>26</sup>Na' bi gac ye'chone' benach gwseła' le',  
le yogo'te bene' že' nga chesejle'e Diosen'  
gwsele' da' Juanna' be'e xtiže'na', na' xož  
bi yesonde' chio'.

<sup>27</sup>Nach gose'e Jesúsen':

—Bi nezeto'.

Nach gože' legaue':

—Lecze neda' bi yapa' le'e bi yela' gwn-  
abian' chonlenda' da' ca'.

### Jempl che chope xi'in bene'

<sup>28</sup>Na' Jesúsen' gože' legaue':

—Le gon xbab bi zeje jempl nga: Gw-  
zoa to bene' gwnita' chope xi'in'e. Na'  
gože' tobe': "Xi'ina', chaclaža' šejo' güen  
žin na'aža gan' že' yag uvas chia' ca'."

<sup>29</sup>Nach xi'inen' gožbe' le': "Bitw ša'a."  
Perw gwdele beyombe' xbab nach gwey-  
jbe'. <sup>30</sup>Nach gozeje' gan' zoa xi'inen'  
yeto, na' ježe'be' can' gože' bi' biše'ben'.  
Na' la' gožte bin' le': "Guaccze, na' ša'a."  
Perw bitw gweyjebe'. <sup>31</sup>Gwnašc neda',  
¿no bi' ca' chope ben can' gwnalaže'  
xabe'?

Nach gose'ene':

—Bi' nechoa'.

Nach Jesúsen' gože' legaue':

—Ca'cze naquen. Na' da' li žia' le'e,  
bene' güechixjw ca' na' no'ole ca'  
chja'aclen note'teze bene' byo yobech  
yosozenague' che Diosen' cont nabi'e  
yichjlažda'ogaue' clel ca' le'e. <sup>32</sup>Ca  
nac Juanna' ben' bzoe' bene' nis, bide'  
laolen' na' gwduxjue'ede' le'e naquen'  
cheyala' gonle cont yebe Diosen' le'e.  
Perw bitw gweyjele'le che'. Na' bene'  
güechixjw ca' na' no'ole zle' ca' gosejle'e  
che'. Na' cate' gocbe'ele bene' ca' ba  
gosejle'e che', bitw betinjle'le xtoła'le ca'  
cont šejle'le che dan' bsele da' Juanna'.

### Jempl che mos mal ca'

(Mr. 12:1-12; Lc. 20:9-19)

<sup>33</sup>'Le gwzenag yeto jempl nga. Gwzoa  
to bene' na' goze' to cue' xen yag uvas lo  
yežlio che' na' gwlo'en le'ej. Na' na'teze  
bene' to ga yesesie' uvasen' cont choj  
xisen'. Na' lecze bene' to da' sibe ca' to  
campanaryw ga yesecua' bene' yosogüia  
yese'ne'e yag ca'.

'Na' bcua'ane' yežlion' lo na' bene'  
yesonši'e yag uvasen' na' gwze'e gweyje'  
zito'. <sup>34</sup>Cate' bžin ža yosyotobe' cosešen',

gwsele' to chope xmore' gan' že' bene' ca' nac lo na'gaque' yag uvasen' cont šjasyexi'e to tlaw cosešen' dan' cheyala' si'e. <sup>35</sup>Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' yej, nach yetoe' gosote'ne'. <sup>36</sup>Nach gossela' xan yag uvasen' mos zanch clcl ca bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

<sup>37</sup>'Nach gwdena' xan yežlion' gwsele' cuinze xi'nen', godce' yesezi'e xtižen'. <sup>38</sup>Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe: "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." <sup>39</sup>Nach gosezene'ne', besyebje'ne' gan' že' yag ca' na' gosote'ne'.

<sup>40</sup>Beyož be' Jesúsen' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

<sup>41</sup>Nach bosyoži'e xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlaw cosešen' cate' žin ža yosyotoben'.

<sup>42</sup>Jesúsen' gože' legaque':

—Ca'czen'. ¿Bina' gwlable ga nyoj Xtiža' Diosen', žan quinga?:

Yej dan' bi gosaclaže' bene' güen yo'o ca' yosochine',

len ba naquen yej squin.

Da' nga ben Xancho Diosen',

na' naquen to da' yežejecho.

<sup>43</sup>Da'nana' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda'ogaque'. <sup>44</sup>Na' ca' nac yeyen', note'teze bene' lažo' lo yeja' na' cue'žošje', na' note'teze bene' chiže' yeja' cate' lažon' na' gwšošen' le'.

<sup>45</sup>Na' b̄xoz gwnabia' ca' na' bene' fariseo ca', cate' gosende' jempl ca' dan' be' Jesúsen', gosacbe'ede' be'e diža' che legaque' dan' bi chesejnlaže' le'. <sup>46</sup>Nach gosaclaže' yesezene' le', perw besežebe' bi yesone bene' ca' nžague' legaque', le yogiie' gosejle'e gwsele' Diosen' Jesúsen' cont cho'e xtiže'na'.

### Jempl che ben' bene' l̄ni cate' b̄šagna' xi'ine'

**22** Na' da' yoble bsd blo'e Jesúsen' bene' ca' len jempl, gozne':

<sup>2</sup>—Yela' gwnabia' che Diosen' zaca'leben ca' da' nga goc. Gwzoa to bene' gwnabia' na' bene' gastw cate' b̄šagna' xi'ine'. <sup>3</sup>Na' cate' bžin hor solao l̄nin' gwsele' xmore' ca' cont jasexi'e bene' ca' ba bol güiže' šja'ac l̄nina', perw notno goclaže' šja'ac l̄ni chen'.

<sup>4</sup>Nach gože' yeto xonj xmore' ca': "Le šjež bene' ca' ba bol güižan' ye'ln'e' ba bsini'a dan' gagwchona'. Ba betua' be dao' be chesane' na' ba bsini'a dan' gagwcho lo l̄nin'. Na' ye'ln'e' yeside' gagwcho dan' ba bsini'an'." <sup>5</sup>Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e yežlio che', na' yetoe' gwyeje' jene' negosyw.

<sup>6</sup>Na' yebale' gosenize' mos ca' gwsele' bene' gwnabian' na' gosonde' legaque' zi' na' gosote' legaque'.

<sup>7</sup>Na' leca bža'a bene' gwnabian'. Na' gwsele' soldadw che' ca' jasete' bene' ca' gosot xmosen' na' bosozeye' lažgaquen'.

<sup>8</sup>Nach bene' gwnabian' gože' xmosen': "Ba bsini'a dan' gagwcho lo l̄nin', perw bene' ca' ba bol güiža' nacbia' bitw zjazaque' yeside'.

<sup>9</sup>Le šja'ac le šjata yogo' nez na' ye'le yogo' bene' yežagle yeside' l̄nin'." <sup>10</sup>Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac l̄nin'.

<sup>11</sup> Perw cate' gwyo'o bene' gwnabian' jane'e bene' ca' že'na' na' ble'ede' to bene' bi nyaze' lache' da' bnežjue' yesaze' lo lnin'. <sup>12</sup> Nach gože' le': "Migw chia', ¿nac goquen' gwyo'o nga bitw nyazo' lache' dan' bena' chazo'?" Nach bena' bitw beželde' bi ye'ene'. <sup>13</sup> Nach bene' gwnabian' bene' mandaw yosochej xmore' ca' ni'a na' bena' cont yesyebene' na' yesebeque'ne' gan' nac chol, ga cuežyaše' na' gan' gagwxetje laye' tantw žaglagüe'. <sup>14</sup> Can' naquen, Diosen' chaxe' yogo' bene' cont yesejle'e che', perw bał guen' chosozenague' che' na' legacze' chbeje' cont yesaque' xi'ine'.

### Ca nac dan' cheyała' gaxjw

(Mr. 12:13-17; Lc. 20:20-26)

<sup>15</sup> Nach bene' fariseo ca' besežague' na' bosoxi'e naclen' yesone' cont yesebeje' Jesús'en' diža' da' yosode'ede' cont yesagüe' xya che'. <sup>16</sup> Na' bene' fariseo ca' gosesele' bał bene' zjanaque' txen len legaque' na' yebał bene' chesone' txen len Herodesen' cont jaseže' Jesús'en':

—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi že' bene', le toz can' chono' len note'teze bene'.

<sup>17</sup> Da'n'an' zedenabeto' le' cont nao' neto' can' chacdo' cheyała' gonto'. ¿Naquen binlo no chixjw da' cheyała' chixjwcho lao ben' nac la'zelagüe bene' gwnabia' ben' chi' Roma, še bi?

<sup>18</sup> Jesús'en' gocbe'ede' yeła' xi'a chegaquen', nach gože' legaque':

—¿Nacle bene' gwxiye'! ¿Bixchen' chaclaže'le yoslažo'le neda' len xtižan'? <sup>19</sup> Le gwlo'e neda' to mechw dan' chyixjwle che gobiernen'.

Nach goso'ene' to mechw dan' nzi' denario. <sup>20</sup> Nach Jesús'en' gože' legaque':

—¿No lao dan' da' le'e mechw nga? na' ¿no la da' nyoj le'en ni?

<sup>21</sup> Nach gose'ene':

—Che César ben' nac la'zelagüe bene' gwnabia' ben' chi' ciuda Roman'.

Nach Jesús'en' gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

<sup>22</sup> Nach cate' gosende' xtiža' Jesús'en' besyebande'. Nach besyeya'aque' gan' zoe'na'.

### Cate' yesyeban bene' guat ca'

(Mr. 12:18-27; Lc. 20:27-40)

<sup>23</sup> Na' lo že' na'teze besežin bał bene' saduceo gan' zoa Jesús'en'. Bene' ca' chesene' bene' guaten' bi yesyebane'. Nach gosenabde' le', gose'ene':

<sup>24</sup> —Maestrw, da' Moisés'en' gwne': "Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyała' yošagnalene' no'ol güezeba' cont yesenita' xi'in diaža che da' bišen'.

<sup>25</sup> Na' len neto' gosanita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagnalene' no'ol güezeba'. <sup>26</sup> Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lole' gosac che' ca'. <sup>27</sup> Na' gwde gosat yogo'lol bene' ca', nach got len no'ola'. <sup>28</sup> Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yoguen' bosyošagnalene' le'.

<sup>29</sup> Na' gož Jesús'en' legaque':

—Clelen' chonle xbab dan' žale ca', le bi nezele can' že' Xtiža' Dios dan' nyojen, neca nombiale yeła' guac chen'.

<sup>30</sup> Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl bene' zjazoa yaba. <sup>31</sup> Na' ca' nac dan' yesyeban bene' guat ca', ¿biña' gwlable da' nga can' nyoj Xtiža' Diosen'? žan: <sup>32</sup> "Neda' naca' Dios ben' chonxen Abraham, ben' chonxen Isaac na' ben' chonxen Jacob". Bene' guat ca' bi chesonxene' Diosen', san bene' zjamban.

<sup>33</sup> Na' bene' ca' zjanžaguen' besye-bande' cate' gosende' diža' dan' bsed blo'ede' legaque'.

**Dan' nac da' blaoch dan' ža  
Diosen' cheyała' goncho**

(Mr. 12:28-34)

<sup>34</sup> Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'. <sup>35</sup> Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwchine' contr le', gože'ne':

<sup>36</sup> —Maestrw, lo ley che Diosen', ¿non' nacch da' žialao da' zjanyojen da' ža Diosen' cheyała' goncho?

<sup>37</sup> Nach gož Jesúsen' le':

—“Cheyała' gaquecho Xancho Diosen' con ca zelao chejni'icho do yichj do laže'cho.” <sup>38</sup> Len'na' naquen da' žialaoch na' da' blaoch lagüe da' ca' ža Diosen' cheyała' goncho. <sup>39</sup> Na' da' gwchopen' ze-jgalañ' ca', žan: “Cheyała' gaque lježcho ca chaque cuincho.” <sup>40</sup> Čhope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj bene' ca' goso'e xtiža' Diosen' cani'.

**Criston' naque' xi'in  
diaža che da' rey David**

(Mr. 12:35-37; Lc. 20:41-44)

<sup>41</sup> Na' šlac ne' zjanžag bene' fariseo ca', <sup>42</sup> Jesúsen' gože' legaque':

—¿Bixe xbab chonle che Criston' ben' gwlej Diosen' cont yedenabi'e? ¿No xi'in diaža che naque'?

Na' gose'ene':

—Xi'in diaža che da' rey Davin'.

<sup>43</sup> Nach Jesúsen' gože' legaque':

—Še ca' naquen, ¿bixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

<sup>44</sup> Xancho Dios gože' Xanan':

“Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.”

<sup>45</sup> ¿Nacxe gac nacho Criston' xi'in diaža che da' rey David? le' cuin Davin' gože' le': “Xana”.

<sup>46</sup> Na' notoch no goc yosyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

**Xtola' bene' fariseo ca' na' bene' ca'  
chososed chosolo'e leyna'**

(Mr. 12:38-40; Lc. 11:37-54; 20:45-47)

**23** Nach Jesúsen' gwzolao be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

<sup>2</sup> —Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'. <sup>3</sup> Na' da'nan' cheyała' gwzenagle chegaque' cate' chosozende' le'e can' ža leyna', na' cheyała' gonle can' chosozejni'ide' le'e. Perw bitw gonle can' cheson' legaque', le' legaque' bitw chesone' dan' chesene' cheyała' gac. <sup>4</sup> Legaque' chosozanche' dan' ža leyna'. Chesonen' ca' to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en' legaque'. <sup>5</sup> Ca' nac bene' ca', yogo' dan' chesonen', chesonen' ga yesele'e bene' can' chesonen' contze yesonxene' legaque'. Chio' bene' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca' nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca' yezica'chle bene'. Na' lecze chesone' lox xagaque' da' tonech clal ca' che bene' yezica'chle. <sup>6</sup> Chesyebede' chesebi'e gan' chesebe' bene' blao cate' chja'aque' gan' chac no lni na' cate' chja'aque' yodao' chegaque'. <sup>7</sup> Chesyebede' chesap bene'

legaque' bala'an cate' chesyěžague' lagüe ya'a. Na' chesyebede' yese' bene' legaque' maestrw.

<sup>8</sup>Perw žia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejni-laže'le neda' nac biše' lježle tole yetole. <sup>9</sup>Na' lecze bitw gonxenle note'teze bene' blao ye'Ine': "Xato". Toze Diosen' ben' zoa yaba naque' Xacho. <sup>10</sup>Na' bitw gie'le latje ye' bene' le'e: "Xana", le toz neda' Cristo naca' Xanle. <sup>11</sup>Še no le'e nacle bene' blaoch, cheyala' gwzexjw yichjle gaclen lježle. <sup>12</sup>Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

<sup>13</sup>ıNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

<sup>14</sup>ıNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' chol giüižle Diosen', šša choe'le diža' cont yesaque' bene' leca chonxenlne'. Gacchle castigw clel ca yezica'chle bene' güen da' xinj.

<sup>15</sup>ıNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! ıNacle bene' gwxiye'! Chejtez chejle chjatiljwle bene' zito' bene' yeson txen len dan' chsed chlo'elen'. Na' cate' chželelene' chzejni'ilne' cont yesaque' bene' xi'ach clel ca le'e.

<sup>16</sup>ıNyaše'chguaze gac che le'e! ıNacle ca bene' lchol bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw

chia' gona' can' ba gwnia'", bitwbi zejen dan' chnen'. Perw še že: "Oro dan' de lo' yodaon' zoan testigw chia' gona' can' ba gwnia'", nach cheyala' gone' can' gwnen'. <sup>17</sup>ıLe'e nacle ca to bene' lchol na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios. <sup>18</sup>Na' lecze žale še to bene' že: "Mes gan' chosozeye' beyixe' ca' chesonxene' Diosen', zoan testigw chia' gona' can' ba gwnia'", bitwbi zejen xtižen'. Perw na' še že: "Dan' xoa lo' mes lo' yodaon' zoan testigw chia' gona' can' ba gwnia'", nachen' cheyala' gone' can' gwnen'. <sup>19</sup>ıLe'e nacle ca bene' lchol na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios. <sup>20</sup>Še bene' že: "Mes dan' zoa lo' yodaon' zoan testigw chia' gona' can' ba gwnia'", lencze dan' xoa lo' mesen' zoan testigw che'. <sup>21</sup>Na' še bene' že: "Yodaon' zoan testigw chia' gona' can' ba gwnia'", lecze zejen Diosen' naque' testigw che', le yodaon' naquen che Dios na' nan' zoe'. <sup>22</sup>Na' še bene' že: "Yaban' zoan testigw chia' gona' can' ba gwnian'", zejen Diosen' naque' testigw che', le nan' zoa Diosen' chnabi'e.

<sup>23</sup>ıNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ıNacle bene' gwxiye'! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyala' gonle da' nac güen lao Diosen', na' cheyala' yeyaše'laže' ljež benachle na' cheyala' gonle can' ba gwlo'o cho'ale gonle. Da' ca' zjanaquen da' zejehen gonle, perw lecze bitw cheyala' cuejyichjle bi gwnežjwle da' ca' chnežjwle Diosen'. <sup>24</sup>ıNacle ca to bene' lchol

beṇe' chesacde' guac yesegü'e nez beṇe' yoble! Zaca'lebele ca to beṇe' chebej yogo' beb dao' riz da' nchixe da' che'eje' perw bitw chache'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyaļa' goncho, na' bi chonle da' ca' zjazaca'chguan.

<sup>25</sup> ;Nyaše'chguaze gac che le'e chsed chlo'ele ley dan' bzoj da' Moisés na' le'e beṇe' fariseo! ;Nacle beṇe' gwxiye! Zaca'leble ca ye'en dan' chchin beṇe' na' chyibe' cožen' perw bi chyibe' lo'en. Chonle cont chesaque beṇe' nacle beṇe' güen, perw leca chzelaže'le bi da' de che beṇe' na' chbechgüele chca'alēn. <sup>26</sup> ;Le'e beṇe' fariseo, nchoļ yichjlažda'olen! Le yetinje xtoļa'le cont da' licze gacle beṇe' güen can' chaclaže'le yeson beṇe' xbab nacle. Nach gacle ca to ye'en dan' nyibe' cožen' na' lo'en.

<sup>27</sup> ;Nyaše'chguaze gac che le'e chsed chlo'ele ley dan' bzoj da' Moisés na' le'e beṇe' fariseo! ;Nacle beṇe' gwxiye! Zaca'leble ca to ba dan' zjanone' xdanchgua lagüen perw lo'en že' žit che beṇe' guat na' chi'chgua da' zban. <sup>28</sup> Chonle cont chesaque beṇe' nacle beṇe' güen, perw len yichjlažda'olen' nacle beṇe' gwxiye' na' beṇe' malchgua.

<sup>29</sup> ;Nyaše'chguaze gac che le'e chsed chlo'ele ley da' bzoj da' Moisés na' le'e beṇe' fariseo! ;Nacle beṇe' gwxiye! Chonšagüe'le cho'a ba che da' beṇe' goso'e xtiža' Diosen' cani', na' chonšagüe'le cho'a ba che yezica'chle beṇe' goson da' güen. <sup>30</sup> Na' žale: "Šaca' chio' ba zoacho ca tiemp che da' xozxta'ocho ca', bitw bencho txen len legaque' cate' gosote' beṇe' ca' goso'e xtiža' Diosen' cani'." <sup>31</sup> Perw na' yogo'loļte dan' chonle chlo'en tozce can' nacle len da' xozxta'ole ca' beṇe' gosot da' beṇe' ca' goso'e xtiža' Diosen' cani'. <sup>32</sup> Le gwzalaošaze le gon bica'ch

da' zgot dan' bitw goļa' yeson da' xozxta'ole ca'.

<sup>33</sup> 'Le'e nacchgualē beṇe' zgot na' beṇe' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilēn'. <sup>34</sup> Na' da' gona', neda' sela' no beṇe' yeso'e xtiža'na' len le'e na' no beṇe' sina' na' nochle beṇe' yososedde' le'e xtižan'. Na' gotle baļe' gwda'gaclēnē to le'e yag cruz, na' yebaļe' chinle do lo' yodao' chelen', na' yebaļe' gwlaglēnē gate'teze yež šja'aque'. <sup>35</sup> Na' dan' gonle ca' gaple doļa' che yela' got che yogo' beṇe' ca' goson da' güen, ben' gosot da' xozxta'ole ca' gwzolaozen len da' Abel ben' naque' beṇe' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'. <sup>36</sup> Na' da' li žia' le'e, le'e mbanle na'a si'le castigw che yela' got che yogo' beṇe' ca' gosot da' xozxta'ole ca'.

### Begüine' Jesúsen' che xtoļa' beṇe' Jerusalén

(Lc. 13:34-35)

<sup>37</sup> 'Le'e beṇe' Jerusalén, chotle beṇe' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca to jed xcaca' ben' nche' xi'in na' chyežba' legacba', perw bitw goclaže'le. <sup>38</sup> Na' na'a ba gwlejyichj Diosen' le'e. <sup>39</sup> Na' žia' le'e, bich le'e le neda' na'a, perw cate'ch žin ža le'e le neda' yeto nach nale: "Mbalaz ben' za nga nseļa' Xancho Diosen' le' nabi'e".

### Gwžin ža yosyočinje' yodao' blaon'

(Mr. 13:1-2; Lc. 21:5-6)

**24** Na' ba cheza' Jesúsen' yodao' blaon' šeje' ga yoble cate' beṇe' ca' zjanaque' le' txen gosebigue' gan' zoe'na' na' gosezolagüe' goso'e diža' catec xdan nac yodaon' na' lecze ca' yo'o



ca' zjanyechjen. <sup>2</sup>Nach Jesúsen' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyočhinje'.

**Dan' gac cate' ba za'  
bagwze yeyož yežlio nga**

(Mr. 13:3-23; Lc. 21:7-24; 17:22-24)

<sup>3</sup>Na' ja'aque' Ya'a Olivos. Na' cate' Jesúsen' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwze yido' na' ba zoa yeyož yežlion'?

<sup>4</sup>Nach Jesúsen' boži'e xtiža'gaquen' gwne':

—Le gwsaca' cont notno siye' le'e.

<sup>5</sup>Le zan bene' yesaš yežlio nga bene' yesaclaže' yosolane' xlatja' nga. Na' yesene': “Nedan' Cristo ben' gwlej Diosen' cont nabi'e.” Na' yeseziye'e bene' zan. <sup>6</sup>Na' yenele chac gwdi'e nile nale, na' yenele guac gwdi'e, perw bi žeble, le can' cheyala' gac. Perw gague lenna' nacho ba bžin ža yeyož yežlion'. <sup>7</sup>Le yesedi' to yež len yeto yež yoble na' to naciön len yeto naciön yoble. Na' cue' yižgüe', na' gata' gwbin na' zan cuen ga xo'chgua lo yežlion'. <sup>8</sup>Perw na' yogo' da' qui gac cate' za' solao gata' yela' zi'.

<sup>9</sup>Nach bene' ca' že' yogo' naciön yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e. <sup>10</sup>Cana' bene' zan bene' ba chesejnilaže' neda' yesebejyichje' bich yesejni-laže' neda'. Na' legacteze' yesechje' yeson lježgaque' lo na' bene' da' chesegue'ede' legaue'. <sup>11</sup>Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan. <sup>12</sup>Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda'

bich yesacde' lježe'. <sup>13</sup>Perw na' note'tezle gwyo gwchejlaže'le cont bi cuejyichje dan' chejnilaže'le neda' žinten gatle, nach šjayzoale len Diosen'. <sup>14</sup>Na' šja'ac bene' doxen lo yežlion' yeseyixjue'ede' diža' güen cont yeseneze benachen' cheyala' yosozenague' che Diosen' nach nabi'e yichjlažda'ogaue'. Na' cate' bene' že' yogo' naciön ba zjanezde' da'na', cana'ch yeyož yežlion'.

<sup>15-16</sup>Da' Daniel ben' gwdixjue'ede' xtiža' Dios cani' bzoje' che da' zbranchgua da' gwxinjen latje gan' chonxencho Diosen'. Na' cate' le'e le'e le ba zoa dan' gan' zoa yodao' blao, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) <sup>17</sup>Na' bene' chda do yichjo' che ližen', bi yeyetje' yotobe' xšinlaze' že' ližen', con yoxonje'. <sup>18</sup>Na' bene' chda yixe' bi yeyej liže' šjayxi'e xalane'. <sup>19</sup>¡Nyaše'chguaze zjanac no'ol ca' zjanoo' xi'in' na' no'ol ca' ne' chosoguaže' bidao' lo ža ca'! <sup>20</sup>Na' le nab lao Dios bi yažjen gwxonje' cate' chac zag o lo ža che Dios. <sup>21</sup>Le yesaquen ža da' leca yesale' bene'. Cate' gwxete yežlion' na' ža na'aža nono na' gale' ca', neca žinlažen' yesale'de' ca' da' yoble. <sup>22</sup>Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'in'e'.

<sup>23</sup>Cana' še no ye' le'e: “Le na'šc, nga zoa Criston' ben' gwlej Diosen' cont nabi'e”, o “Le na'šc, na' zoe”, ne ca'cze bi šejle'le. <sup>24</sup>Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaue'. Na' len bene' ca' ba gwlej Diosen' zjanaque' xi'in'e' yesaclaže' bene' gwxiye' ca' yeseziye'e šaca' gac yeseziye'e legaue'. <sup>25</sup>Ba nezele can' gac, le ba gwdixjue'eda' le'e yogo' can' gac.

<sup>26</sup>Na' še yese'e le'e: "Zoa Criston' latje dašen'", bitw gwzenagle chegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le chegaque'. <sup>27</sup>Can' chac cate' chep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsel'e' neda' golja' beṇaḥ. Yida' zejzenez na' yogo'lo' bene' yesele'ede' neda'. <sup>28</sup>Nga chonen che ben' že': "Gan' de be guat nan' chesežag šod ca'."

**Can' gac caten' yid  
Jesucriston' da' yoble**

(Mr. 13:24-37; Lc. 21:25-33;  
17:26-30, 34-36)

<sup>29</sup>'Na' cate' la' yeyošte saca'zi' beṇaḥen', gwbižen' yeyaquen chol, na' bion' bich gwsenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca chac yežlion' cate' chxo'. <sup>30</sup>Na' cana'ch bene' že' yežlion' yesele'ede' neda' naca' ben' gwsela' Diosen' golja' beṇaḥ za'a ladjo bejon' len yela' guac xen na' yela' bene' zaca' juisyw chia'. Na' bene' že' yogo' nación che yežlion' yesebežyaše', bene' bi gosejnilaže' neda'. <sup>31</sup>Na' caten' yida', to trompeta' cuežen zižje, na' sela' angl chia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

<sup>32</sup>'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' lağa' che'en dao', chacbe'ele baḥ zoa yela' tiemp yejon'. <sup>33</sup>Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gała'. <sup>34</sup>Da' li žia' le'e, biṇa' yenit diaža che le'e nita'le na'a cate' ba goc yogo'lo' da' ca'. <sup>35</sup>Le'e yaba na' yežlion' yesede chen, perw ca nac xtizan', gague da' te cbi gac can' žanna'.

<sup>36</sup>'Perw nono neze bi ža bi horen' gac ca', ne angl ca' nita' yaba, neca neda'

naca' Xi'in Diosen' bi nezdā'. Toz Xa' Dios neze.

<sup>37</sup>'Diosen' gwsel'e' neda' golja' beṇaḥ, na' can' goc tiemp che da' Noé, lecze can' gac caten' neda' yida' da' yoble. <sup>38</sup>Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. <sup>39</sup>Bitw gosacbe'ede' bin' gac. Cate'ch goc yejw sio' juisyw na' bia nisen' yogo'lole' cana'ch gosacbe'ede'. Lecz can' gac, con cate'ch yida' da' yoble cana'chen' yesacbe'e bene' bin' gac. <sup>40</sup>Quingan' gac caten' yida' da' yoble: Chope bene' nite' do yixe', toe' yezi' yeca'a, na' yetoe' yocua'ana'. <sup>41</sup>Na' chope no'ole nite' chesote', toe' yezi' yeca'a na' yetoe' yocua'ana'.

<sup>42</sup>'Da'nān' le soa le cueze, le bi nezele bi ža bi horen' yida' da' yoble, neda' naca' Xanle. <sup>43</sup>Le gon xbab che da' nga, šaca' neze xan yo'on' do bi hor lo yelen' žin bene' gwbanṇa' ližen', na'ze' cont bitw güe'e latje šo' ben' ližen' cuane' xšinlāzen'. <sup>44</sup>Da'nān' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwsela' Diosen' golja' beṇaḥ.

**Mos ben' chon güen,  
na' mos ben' bi chon güen**

(Lc. 12:41-48)

<sup>45</sup>'Note'tezle še zoale lez bate'teze, zaca'leble ca to mos bene' naque' bene' sina' na' bene' chon da' cheyała' gone'. Na' še to bene' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža. <sup>46</sup>Še to bene' mosen' chonteze' can' gož xanen' le', mbalaz soe' cate' yežin xanen'. <sup>47</sup>Da' li žia' le'e, xanen' cue' lo na' mosen' yogo'lo' da' de che'. <sup>48</sup>Perw še mosen' naque' bene' zgot na' gone' xbab ne': "Ba gwže xanan'". <sup>49</sup>Nach solagüe' tile' mos

ca' yezica'chle na' ye'ej gagw̄xate' len no bene' borrašw, <sup>50</sup>nach xane'na' yežine' to ža senyale' le' to hor bi nacbe'ede'. <sup>51</sup>Na' dan' bi chon mosen' ca cheyała' gone', xane'na' chinchgüe' le' ca gatte'. Gac che' can' chac che note'teze bene' gwxiye', chjaya'aque' gabilen' gan' chesebežyaše' na' chesagwxejte laye' dan' leca chesežaglägüe'.

**Jempl che ši no'ole güego'  
ja'aque' to yela' güešagna'**

**25** Nach Jesúsen' goze'e bene' ca' zjanaque' le' txen:

—Cheyała' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjanaque' migw che bene' ca' chosošagnan'. Na' zjanxobe' lintern chegaque' ja'aque' jaseleze' yesyechoj bene' ca' liž no'olen' par šja'aque' liž bene' byon' txen. <sup>2</sup>Na' gayo' no'ol ca' gosaque' bene' chejni'i na' yegayoe' bibi xbab gosone'. <sup>3</sup>Cate' no'ol ca' bibi xbab goson gosa'ac liže', zjanxobe' lintern chegaquen', perw bitw gosoxe' botey gan' yože set dan' yosočhine' cate' yebiž dan' yože lo' lintern chegaquen'. <sup>4</sup>Na' no'ol ca' chesejni'i, zjanxobe' lintern chegaque' lente botey seten' dan' yosočhine' cate' yebiž dan' yože lo' lintern chegaquen'. <sup>5</sup>Na' bene' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'. <sup>6</sup>Na' do chel, to bene' gwne' zižje, gože' legaque': "Ba chesyechoj bene' güešagnan'. Le šo'o šjašagchone'." <sup>7</sup>Na' cate' gože' legaque' ca', yogo' no'ol ca' gosezeche' na' gosechogue' mešw dan' gwyey che lintera' na' bosyogualen' da' yoble. <sup>8</sup>Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey chelen' neto'? le ba chebiž cheton'." <sup>9</sup>Nach no'ol ca' gose'e legaque': "Bitw gac gon̄to' late' chele,

le dan' de cheton' bitw gaquen' par yogo'cho. San le šja'ac le šjaxi' chelen' ga choten'." <sup>10</sup>Nach no'ol ca' bi goson xbab ja'aque' jasexi'e seta'. Na' šlac zja'aque' besyežin bene' ca' chosošagna' liž bene' byon'. Na' no'ol ca' gosaque' bene' chejni'i, goso'e txen len bene' ca' chosošagnan' lo' yo'o gan' chesone' lnin'. Nach mos ca' bososeyjue' puerten'. <sup>11</sup>Na' cate' besyežin no'ol ca' bi goson xbab, gosene' cho'a puerten', gose'e ben' zoa lo' yo'on: "Bene', gwsaljwšca puerta' cont šo'to'." <sup>12</sup>Perw na' gože' legaque': "Da' li žia' le'e, bitw saljua' šo'le le bitw nombi'a le'e."

<sup>13</sup>Nach gož Jesúsen' bene' ca' zjanaque' le' txen:

—Ca'czen' cheyała' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwseła' Diosen' golja' benach.

**Jempl che ben' bocua'anlene'  
xmose' ca' mechon'**

<sup>14</sup>Na' dan' yida' yežlio nga da' yoble yedenabi'a zaca'leben ca da' nga goc. To bene' gwyeje' nación zito'. Na' za' se'e goxe' mos che' ca' na' gwlo'e lo' na'gaque' xmechue' cont gosone' delgens. <sup>15</sup>Toe' bocua'anlene' gayo' mil. Na' yetoe' bocua'anlene' chop mil. Na' yetoe' bocua'anlene' to mil. Bnežjuen' legaque' con ca ble'ede' da' chac yeson to toe'. Beyož bene' ca' na' gwze'e. <sup>16</sup>Na' ben' bocua'anlene' gayo' mil la' gwzolaote chone' delgens len mechon' na' bene' gan lecze gayo' mil. <sup>17</sup>Lecze ca' ben ben' bocua'anlene' chope mil, na' bene' gan yechope mil. <sup>18</sup>Na' ben' bnežjue' to mil gwyeje' jacuaše' xmechw xanen' to lo' yechw da' gwche'ene' lo' yo.

<sup>19</sup>Goc šsa gwza' xan mos ca' cate' bežine', nach bene' mandadw ja'ac xmose' ca' lagüen' cont bosyodie' cuent. <sup>20</sup>Mosen' ben' bocua'anlene' gayo' mil bžine' lagüen' na' gože'ne': "Xana', ni de

da' gayo' mil dan' beño' neda'. Na' ba bena' gan yegayo' mil." <sup>21</sup>Na' xane'na' gože'ne': "Ba beno' da' güen. Naco' mos güen na' ba beno' ca cheyała' gono'. Na' dan' beno' can' cheyała' gonon' len da' daon' bocua'anlena' len', da'nan' gona' lo nao' da' xench. Gwyo'o cont so' mbalaz len neda'." <sup>22</sup>Nach cate' bžin ben' bocua'anlene' čhope mil, bena' gože'ne': "Xana', ni de da' čhope mil dan' bocua'anleno' neda', na' ba bena' gan yečhope mil." <sup>23</sup>Nach gož xanen' le': "Ba beno' da' güen. Naco' mos güen na' ba beno' ca cheyała' gono'. Na' dan' beno' can' cheyała' gonon' len da' daon' bocua'anlena' le', da'nan' gona' lo nao' da' xench. Gwyo'o cont so' mbalaz len neda'." <sup>24</sup>Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nežda' naco' to bene' znia. Chelapo' da' gosaz bene' yoble, na' chotobo' coseš ga goson bene' yoble žin. <sup>25</sup>Da'nan' gwy'a'a jače'ena' to yechw na' bcuaša' xmechon', le' bžeba' še gwnitan'. Na' na'a bezišcan'." <sup>26</sup>Nach xanen' gože' le': "iNaco' mos mal, na' naco' xagüed! Neždo' chelapa' ga gosaz bene' yoble, na' chotoba' coseš ga goson bene' yoble žin. <sup>27</sup>Na' lagüe da' neždo' chona' ca' žbixchen' bi gwlejo' xmechuan' bene' yoble cont yezi'an len yichjen na'a ba bela'a?" <sup>28</sup>Nach gože' xmoše' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil. <sup>29</sup>Can' naquen, note'teže bene' chon güen len dan' chnežjo xanen' le', xanen' gwnežjochcze' che', cont gata' da' zčha'och che'. Perw na' note'teže bene' bi chgone' žin dan' chnežjo xanen' le', yeca'a xanen' da' daon' noxe'na'. <sup>30</sup>Na' ca nac mos xagüed nga, le yebeje' le che'exoxje' gan' nac cho! na' cuežyaše' na' gagwxejte laye' dan' leca žaglagüe'."

### Can' gac cate' Jesúsen' gone' yela' justis čhe yogo' nación

<sup>31</sup>'Diosen' gwsele' neda' golja' beñach, na' cate' yida' da' yoble nsa'a yela' zaca' juisyw čhia' na' nchi'a yogo' angl čhia' ca', cana'ch cui'a nabi'a güen juisyw can' chnabia' Dios ben' zoa yaba. <sup>32</sup>Na' yapa' yogo' bene' čhe yogo' nación ca' yeside' laguan'. Na' cate' ba nita' yogüe' na' la'ane' can' chon to bene' güeye xila' cate' chebeje' partle xila' ca' na' partle šib ca'. <sup>33</sup>Na' bene' ca' zjanac bene' güen lao Diosen' dan' ba gosejnilaže' neda', gwnita' legaque' cuitan' šla'a liča. Perw bene' mal ca', gwnita' legaque' cuitan' šla'a robes. <sup>34</sup>Na' neda' naca' rey yapa' bene' ca' nita' šla'a ličan': "Ba ben Xa' Diosen' cont le'e soale mbalaz. Le da nga cont gona' nabi'a'le txen len neda' can' ba nžia bia' Diosen' cate' gwxcete yežlio. <sup>35</sup>Gona' cont nabi'a'cho txen, le cate' gwdona' le'e beñle dan' gwdagua'. Na' cate' gwbiłda' nis, le'e beñle da' güe'eja'. Na' cate' goca' ca' bene' zito' le'e bleble neda' ližlen'. <sup>36</sup>Na' cate' bi gota' da' c-haza', le'e beñle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." <sup>37</sup>Na' bene' güen ca' yese'e neda': "Xanto', žbaten' ble'eto' le' gwdono' na' bento' da' gwdago'? Na' žbaten' gwbiłdo' na' bento' da' güe'ejo'? <sup>38</sup>Na' žbaten' goco' ca' bene' zito' na' blebto' le'? Na' žbaten' ble'eto' le' bi de da' čhazo' na' bento' da' gwyazo'? <sup>39</sup>Na' žbaten' gocšendo' o goto' ližya na' bedena'to' le'?" <sup>40</sup>Na' neda' naca' rey yape'gaca'ne': "Da' li žia' le'e, bene' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže'le legaque', la'czła' bitec bi zjazaque' len beñachen', lencze nedan' beyaše'laže'le."

<sup>41</sup>'Nach bene' ca' nita' šla'a robesle, bene' mal ca', yape'gaca'ne': "Le cuas ca'ale. Ba žia bia' čhele cuiayi'le yela'

güen da' mal chelen'. Le šja'ac lo yi' gabil' dan' bi cheyol, yi' dan' bxn Diosen' cont saca'zi' Satanás toli' tocane len da' xigüe' ca' cheson xšinen. <sup>42</sup> Le šja'ac lo yi' gabilen', le cate' gwdonā' bitw beñle dan' gagua'. Cate' gwbiłda' bitw beñle da' ye'eja'. <sup>43</sup> Cate' goca' ca' beñe' zito' bitw bleble neda' ližle. Cate' bi gota' da' čhaza' bitw beñle da' čhaza'. Cate' gocšenda' na' cate' gota' ližya, bitw bedena'le neda'." <sup>44</sup> Nach legaque' ľecze yosož'i'e xtižan' yesene': "Xanto', čbaten' bi beyaše'to' le' cate' gwdono' o gwbiłdo', o goco' beñe' zito', o bi gota' da' chazo', o gocšendo', o goto' ližyan?" <sup>45</sup> Na' yeyož yes'e neda' ca' nach yape'gaca'ne': "Lagüe' dan' bi beyaše'laže'le bene' ca' chesejniłaze' neda', ľa'cze bibi zjazaque' len beñachen', da'nān' lencze nedan' bi beyaše'laže'le." <sup>46</sup> Nach beñe' mal ca' yesezaca'zi'e toli' tocane. Perw beñe' ca' chesone' güen lao Diosen' yesezoe' mbalaz toli' tocane.

**Bosoxi'e nac yesone'  
yesezene' Jesúsen'**

(Mr. 14:1-2; Lc. 22:1-2; Jn. 11:45-53)

**26** Cate' beyož be' Jesúsen' diža' ca', gože' beñe' ca' gwleje' cont zjanaque' txen len le':

<sup>2</sup>—Ba nezele yechope žazen' gała' ľni pascw čechon'. Na' cana' gaca' lo na' beñe' ca' chesegue'ede' neda' na' yesote' neda' yosode'e neda' to ľe'e yag cruz, neda' naca' ben' gwsela' Diosen' golja' beñach.

<sup>3</sup>Nach bχoz gwnabia' ca' na' beñe' ca' chososed chosolo'e dan' bzoj da' Moisésen' na' beñe' gole blao ca' chesenabi'e nación Israel čechon' besedobe' chy'o liž bχoz blao ben' le Caifás. <sup>4</sup>Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. <sup>5</sup>Na' gosene':

—Bi senchone' lo ľnin' cont ca yesebec beñe' žaš.

**To no'ole bzoe' set zix' yichj Jesúsen'**

(Mr. 14:3-9; Jn. 12:1-8)

<sup>6</sup>Nach goquen' Jesúsen' len beñe' ca' gwleje' cont zjanaque' txen len ľe' nite' Betania liž Simón ben' güe'e yižgüe' da' nzi' lepra. <sup>7</sup>Na' šlac chi' Jesúsen' cho'a mesen', bžin to no'ole noxe' to de yejese ga chož set da' chl'a zix' da' ľeca chzaca' la'ay. Na' no'olen' bzoačhočhje' seten' yichj Jesúsen'. <sup>8</sup>Na' beñe' ca' zjanaque' txen len Jesúsen' cate' bešele'ede' can' ben no'olen' bešeže'e na' gosene':

—čBixčhen' con benditjde' set zix' nga?

<sup>9</sup>Ša no bete' len, yesonen' mechw xen na' yosonežjuen' gaclenen beñe' yaše'.

<sup>10</sup>Jesúsen' gocbe'ede' bin' gosene' nach gože' legaque':

—čBixčhen' chnele čhe no'olen'? Dan' bene' len neda' nga naquen güen. <sup>11</sup>Le beñe' yaše' ca' bate'teze nita'cze' len le'e, san nedan' bich soa' yesša len le'e. <sup>12</sup>Dan' bguazje'nda' set zixen' bene' dan' cheyała' yesone' len neda' cate' gaša'. <sup>13</sup>Da' ľi žia' le'e, doxen yežlio gate'teze šjasedixjue'e beñe' diža' güen dan' chzejni'in čhia', decze de yesene' can' ben no'ol nga, cont šjasyeze'ede'ne'.

**Judas Iscariote bene' Jesúsen' lo  
na' beñe' chesegue'ede' ľe'**

(Mr. 14:10-11; Lc. 22:3-6)

<sup>14</sup>Gwde da' quinga, Judas Iscariote ben' goque' txen len beñe' šižinw ca' ben' gwlej Jesúsen' cont zjanaque' txen len ľe', gweje' jane'e bχoz gwnabia' ca'. <sup>15</sup>Na' ježe' legaque':

—čGaca'te' gonle neda' cont gwdia' Jesúsen' lo na'le?

Nach bosoxi'a beñe' ca' yosonežjue'ne' šičhoa mechw plata na' bosonežjue'nen'.

<sup>16</sup>Nach cana' Judasen' gwzolagüe' gwdiłjwlaže' nac gone' gwdie' Jesúsen' lo na'gaquen'.

**Jesúsen' blo'ede' legaque' can'  
yesone' šjasyeza'laže' yela' got chen'**

(Mr. 14:12-25; Lc. 22:7-23;

Jn. 13:21-30; I Co. 11:23-26)

<sup>17</sup> Na' bžin ža čala' lni caten' chesagüe' yetextil dan' bibi levadura yo'o, na' ža nechw che lnin' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' che pascon'?

<sup>18</sup> Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'ne': “Maestron' že' ba zoa žin ža gac da' cheyala' gac che', na' ližo' nga che'nde' gagw-lento'ne' xše' lni pascon'.”

<sup>19</sup> Nach bene' ca' gosone' can' gož Jesúsen' legaque', jasesini'e xše' že' lmina'.

<sup>20</sup> Na' cate' beyož gwxa gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'. <sup>21</sup> Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' bene' ca' chesegue'e neda'.

<sup>22</sup> Nach legaque' besyeyaše'laže'de', nach gosezolagüe' tgüeje tgüeje' gosenabde' le' gose'ene':

—Xana', ¿nedan' gona' ca'?

<sup>23</sup> Nach gože' legaque':

—To ben' chagw len neda' txen toz lo' ye'en, le' gwdie' neda' lo na' bene' ca'. <sup>24</sup> Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' benach, perw nyaše'chguaze nac ben' gwdie' neda' lo na' bene' ca'. Yejni'acle ša bi golje'.

<sup>25</sup> Nach Judasen' ben' za' gwdie' Jesúsen' lo na' bene' ca' gože'ne':

—Maestrw, ¿nedan' gwdia' le' lo na' bene' ca'?

Jesúsen' gože'ne':

—Le len'.

<sup>26</sup> Na' šlac chesagüen', Jesúsen' gwxi'e to yetextilen' na' beyož be'e yela' choxcen che Dios, bzoxjen' na' bnežjuen' bene' ca' zjanaque' le' txen, gože' legaque':

—Le gagon' Lenna' cuerp chian'.

<sup>27</sup> Nach bexue' to vas gan' yože nis uvasen', na' beyož be'e yela' choxcen che Dios boznežjuen' legaque', gože'ene':

—Yogo'le, le ye'ej late' güeje dan' yože lo' vas nga. <sup>28</sup> Da' nga xčena' na' chzanlažan' laljen neche xtola' yogo'lol benach. Na' laljen cont solao gac da' cob dan' gwna Diosen' gone' gaclene' benachen'. <sup>29</sup> Chnia' le'e, bich ye'aja' nis uvas na'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ejan' da' yoble.

**Jesúsen' gwne' Pedroa' bi  
chebe' še nombi'e le'**

(Mr. 14:26-31; Lc.

22:31-34; Jn. 13:36-38)

<sup>30</sup> Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. <sup>31</sup> Na' šlac zjangüe'e nezen' Jesúsen' gože' legaque':

—Na'aže' yogo'le cuejyichjle neda' neche dan' gac chian'. Le nyojczen le'e Xtiža' Diosen' žan: “Gota' bene' güeye' xilan' na' xila' ca' yesaslasba'.” <sup>32</sup> Perw na' cate' yosban Diosen' neda' ladjo bene' guat ca', yobch yeya'a Galilea ca' le'e.

<sup>33</sup> Nach Pedroa' gože' Jesúsen':

—La' yogo' bene' quinga yesebejyichje' le', neda' gwbat gona' ca'.

<sup>34</sup> Jesúsen' gože' le':

—Da' li žia' le', bina' cuež jean' na'aže' cate' gac šon ni'a bi chchebo' še nombi'o neda'.

<sup>35</sup> Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' bene' šižinw ca' zjanaque' Jesúsen' txen gosene' ca'.

**Jesúsen' boĭ güiže' Diosen' to  
latje dan' nzi' Getsemaní**

(Mr. 14:32-42; Lc. 22:39-46)

<sup>36</sup>Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

<sup>37</sup>Na' gwche'e Pedroa' len chop xi'in Zebedeo, Jacobon' len Juanna'. Na' Jesúsen' gwzolao gocyaše'chgüede', na' benchgüe' xbab. <sup>38</sup>Nach gože' legaque':

—Lo' yichjlažda'oguan' chacyaše'chgüeda', chacda' con gatzca' catequen' chžaglagua'. Nga le yega'an bi tasle, le na' txen len neda'.

<sup>39</sup>Nach Jesúsen' gwžialagüe' yelate' na' jachaze' lo yon' cosčo'ale nach boĭ güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

<sup>40</sup>Nach beyeje' gan' nita' bene' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca' goc cuejle bišgal len neda'? <sup>41</sup>Bi tasle na' le yoĭ güiž Dios cont bi gon gwxyien' le'e gan'. Nežda' che'nele na'zle len neda' perw bi chzoele.

<sup>42</sup>Na' gosze'e gan' nite' na' da' yoble jal güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

<sup>43</sup>Na' bezyeje' gan' niten' na' da' yoble ble'ede' chesetase' le ba chesežode' yejlagüen' bišgal. <sup>44</sup>Na' gwze'e da' yoble gan' nite'na' jal güiže' Diosen' da' gwyone ni'a, na' goznacze' da' yoble can' ba gwenen'. <sup>45</sup>Na' bezžine' gan' nita' bene' ca' šone nach gože' legaque':

—Na'ach guaque tasle na' yezi'laže'le. Ba gole gwde to bene' neda' lo na' bene' güen da' xinj ca', neda' naca' ben' gwsela'

Diosen' golja' benach. <sup>46</sup>Le chas. Le yeyo'o. Ba za' ben' gon neda' lo na'gaque'.

**Judasen' bdie' Jesúsen' lo  
na' bene' chesegue'ede' le'**

(Mr. 14:43-50; Lc. 22:47-53; Jn. 18:2-11)

<sup>47</sup>Ne' choe'te Jesúsen' dižan' ca' cate' bžin Judas ben' goque' txen len bene' šižinw ca' gwlej Jesúsen' cont zjanaque' le' txen. Na' zan bene' zja'ac len le' zjanože' no yag, no spada, bene' gosesela' bžoz gwnabia' ca' na' bene' gole blao ca' chesenabi'e nación Israel chechon'. <sup>48</sup>Na' Judas ben' bdie' le' lo na' bene' ca', gože' legaque' nac yesenezde' non' yesezene', gwne':

—Ben' gwnopa' xague', le'na' Jesús. Le sene'.

<sup>49</sup>Nach la' gwbiga'te' cuit Jesúsen', gože'ne':

—Patiox, Maestrw.

Na' bnopene'. <sup>50</sup>Jesúsen' gože'ne':

—Migw chia', ¿bixchen' zao' nga?

Nach la' gosebiga'te' bene' ca' gosezene' Jesúsen' na' goseche'ene'.

<sup>51</sup>Na' to ben' nac txen len Jesúsen' gwleje' spada chen' na' gwдынen' mos che bžoz blaon' gwchogte' šla'a naguen'. <sup>52</sup>Nach Jesúsen' gože'ne':

—Bego'o spada chion' lo' liženna', le yogo' bene' chesote' bene' len spada, lecze len chesatlene'. <sup>53</sup>¿Bi neždo' guac nabda' Xan' cont la' sela'te' angl zan juisyw bene' yesaclene' neda'? <sup>54</sup>Perw še gona' ca' žnacxe gac dan' cheyala' gac dan' nyoj Xtiža' Diosen' žan quinga gauen'?

<sup>55</sup>Nach Jesúsen' gože' bene' ca' zjasezen le':

—¿Bixchen' nonle neda' ca' to bene' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsed blo'eda' bene' že'na' na' bi gwzenle neda'. <sup>56</sup>Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogo' bene' ca' zjanaque' Jesúsen' txen bosoxonje' gosebejyichje'ne'.

**Goseche'e Jesúsen' lao bene' ca' chesenabia' nación Israelen'**

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup>Na' bene' ca' gosezen Jesúsen' goseche'ene' lao Caifás ben' nac b̄xoz blao, gan' ba zjanžag bene' ca' chososed chosolo'e dan' bzoj da' Moisésen' na' len bene' gole blao ca' chesenabi'e nación chechon'. <sup>58</sup>Nach Pedroa' na'ogüe' Jesúsen' zito' zito'le b̄zinte' liž b̄xoz blaon', na' gwyo'e chy'ona' gwchi'e len bene' ca' chesape' yodao' blaon', le goclaže' le'ede' naquen' zelao gac che Jesúsen'.

<sup>59</sup>Nach yogo' b̄xoz gwnabia' ca' na' yezica'chle bene' gole blao ca' chesenabi'e nación chechon' cheseyiljwlaže' bi diža' güenlaže' yeso'e che Jesúsen' cont yesote'ne'. <sup>60</sup>Perw goc sša bitw besyeželde' bi diža' güenlaže' yosode'ede' le' cont gosozie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yechope bene' na' bediljen can' gosenen'. <sup>61</sup>Quinga gosene': —Benga gwne': "Neda' guac yochinja' yodao' blao gan' chonxencho Diosen', na' šone žaze yeyonan'."

<sup>62</sup>Nach gwzoža' b̄xoz blaon' gože' Jesúsen':

—¿Bibi de bi nao' ca' nac da' nga chosocuiš bene' quinga le'?

<sup>63</sup>Bitwbi gwna Jesúsen'. Nach gož b̄xoz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli' tocane cue'e da' bałi še led'o' can' žon'.

<sup>64</sup>Jesúsen' gože'ne':

—Le can' žale nan' naca'. Diosen' gwsele' neda' golja' benach. Na' chnia'

le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

<sup>65</sup>Cate' bene b̄xoz blaon' xtiža' Jesúsen', gwšo' gwcheza'te xen', le par le' da' mal juisyon' gwna Jesúsen' cui'e cuit Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'. <sup>66</sup>¿Nac žale che'?

Nach bene' ca' bosyoži'en gose'ene':

—Cheyala' gate' dan' chon cuine' ca' Dios.

<sup>67</sup>Nach bosozie' xene' cho'ala' Jesúsen', na' gosebaže'ne', na' bałe' gosegape' xague'na'. <sup>68</sup>Nach gose'ene':

—Še len' naco' Criston', gwneya'ašč, gwna neto', ¿non' chgapa' le'?

**Pedroa' bi gwchebe' še nombi'e Jesúsen'**

(Mr. 14:66-72; Lc. 22:56-62; Jn. 18:15-18, 25-27)

<sup>69</sup>Na' šlac chac da' quinga, chi' Pedroa' chy'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

<sup>70</sup>Na' lao yogo' bene' ca' že' na', Pedroa' bitw gwchebe' še naque' txen len Jesúsen', na' gože' no'olen':

—Bi nežda' bi dižan' cho'o.

<sup>71</sup>Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žinna' le', na' goze'e bene' ca' že'na':

—Lecze len benga naque' txen len Jesús bene' Nazaretan'.

<sup>72</sup>Da' yoble bitw gwchebe' še naque' txen len Jesúsen', nach gwne':

—Na' zoa Diosen' cue'e da' bałi bitw nombi'a bena' žo' ca'.

<sup>73</sup>Na' goccze šlož, gosebiga' bene' ca' že'na' goseze'e Pedroa':



—Da' licze, naco' txen len legaque', le nacbia' chnio' can' chesene bene' Galilea ca'.

<sup>74</sup> Nach Pedroa' chop šone ni'a gwne':

—Diosen' gone' ga saca'zi'a še chonlaža' dan' žia' bi nombi'a bena'.

Na' la' gwchežte to jea. <sup>75</sup> Nach jayze'e Pedroa' can' goč Jesúsen' le': "Bina' cuež jean' cate' gac šone ni'a bi chchebo' še nombi'o neda'." Nach beze'e leca gwchežyaše'.

### Goseche'e Jesúsen' lao Pilaton'

(Mr. 15:1; Lc. 23:1-2; Jn. 18:28-32)

**27** Na' cate' gwyeni', yogo' b̄xoz gwnabia' ca' na' bene' gole blao ca' chesenabia' nación chechon' besyedobe' na' gosechoglagüen' yesote' Jesúsen'. <sup>2</sup> Nach bosocheje'ne' na' goseche'ene' jasesane'ne' lo' na' gobernador Poncio Pilato.

### Judasen' beyot cuine'

<sup>3</sup> Na' Judasen' ben' bdie' Jesúsen' lo' na' bene' ca', cate' gocbe'ede' ba gosechoglagüen' yesote' Jesúsen', betinjde' dan' bdie' le' lo' na' b̄xoz gwnabia' ca' na' bene' gole blao ca'. Nach gwyeje' laogaquen' par bonežjue' legaque' šichoa mechw platan'. <sup>4</sup> Nach gože' legaque':

—Malen' bena' bdia' lo' na' len' to bene' bi nape' dola'.

Na' gose'ene':

—Bitwbi dola' nap neto' dan' beno' ca'.

<sup>5</sup> Nach Judasen' bozale' mechw ca' lo' yodao' blaon', nach beze'e na' jaylo'o do yene' beyot cuine'.

<sup>6</sup> Beyož beza' Judasen', b̄xoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwdixjwcho cont yega'a yela' mban che to bene'.

<sup>7</sup> Na' bosoxi'e yesezi'e len mechon' to yežlio dan' de che to bene' güen yeso'. Na'

gosezi'en par to capsantw ga yosocuaše' bene' zito'. <sup>8</sup> Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'. <sup>9</sup> Can' goc cont goc can' bzoj da' Jeremías ben' be' xtiža' Diosen' cani', gan' žan: "Besyezi'e šichoa mechw platan', dan' gosena bene' Israel zaca' bena'. <sup>10</sup> Na' gosezi'e yežlio che to bene' güen yeso', can' gwna Xancho Diosen' neda'."

### Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

<sup>11</sup> Na' goseche'e Jesúsen' lao gobernadores' na' šlac zeche' lagüen', gobernadores' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

<sup>12</sup> Na' cate' b̄xoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'.

<sup>13</sup> Nach Pilaton' gože'ne':

—¿Bi chendo' catec da' zan xya nga chesagüe' chio'?

<sup>14</sup> Perw Jesúsen' ne' to xtiže'na' bitw boži'e, na' bebanechgüe' gobernadores'.

### Gosechoglagüen' yesote' Jesúsen'

(Mr. 15:6-20; Lc. 23:13-25;

Jn. 18:38-19:16)

<sup>15</sup> Na' gota' costumbr, gobernadores' gwsane' to bene' de ližya cate' čala' lni pascw checho, con bene' yesenab bene' gualaž chechon'. <sup>16</sup> Na' ližya na' de to bene' chzechgua che' naque' bene' güen da' xinj, na' le' Barrabás. <sup>17</sup> Nach Pilaton' gože' bene' ca' zjanžaguen':

—¿Noe' bene' quinga chaclaže'le gwsana? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

<sup>18</sup> Gocbe'e Pilaton' dan' chesacxi'a b̄xoz gwnabia' ca' Jesúsen', da'nan' bosodie' le' lo' ne'en.

<sup>19</sup>Ca' chi' Pilaton' gan' chone' yeļa' justisen', cate' bžin to rson da' gwseļa' no'ol chen', gože'ne': "Bitw bi gondo' bena', le bibi doļa' nape'. Nže'e gwņeda'ne' yel na' bžaglaochgua' neče dan' chac che bena'."

<sup>20</sup>Na' bχoz gwnabia' ca' na' bene' gole blao ca' chesenabi'e naciōn chechon' gosego'oyeļe' bene' ca' že'na' cont yeseņabe' gwsane' Barrabásen' na' yeseņabe' yesote' Jesúsēn'. <sup>21</sup>Nach gobernadore' gože' legaque' da' yoble:

—¿No bene' quinga chope chaclaže'le gwsana'?

Nach gose'ene':

—Barrabásna'.

<sup>22</sup>Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—¿Bde'e le'e yag cruz!

<sup>23</sup>Nach gož gobernadore' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—¿Bde'e le'e yag cruz!

<sup>24</sup>Gocbe'e Pilaton' bicze bi gac gone'. Ba chyaļa'ch chesone' žaš juisyw. Nach gwseļe' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagā' dan' gotlene', xbagā' le'e naquen še ba betwlene'.

<sup>25</sup>Nach yogo' bene' ca' gose'ene':

—Xbagā' neto' na' xbagā' xi'into' naquen che yeļa' got che benga.

<sup>26</sup>Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsēn', nach bene' le' lo na'gaque' cont yosode'ene' le'e yag cruzēn'.

<sup>27</sup>Nach soldadw che gobernadore' goseče'e Jesúsēn' lo' yo'o che gobernadore' nach bosyotobe' yogo' soldadw ca'. <sup>28</sup>Na' goseyiņe' xaļana' Jesúsēn' na'

bosoguacue'ne' to lache' xna ca dan' chesaz rey ca'. <sup>29</sup>Na' gosone' to corona de xis yeše' bosozoen' yichjen', na' ne'e liča bosogoxe'ne' to xis. Na' bosozoa xibe' lagüen' par gosonle' che', nach gose'ene':

—¿Viva rey che bene' Israel!

<sup>30</sup>Nach bosoži'ene' xene', na' besyeque'e xis dan' noxen' na' bosozeten' yichje'. <sup>31</sup>Na' beyož gosonle' che', besyeque'e lache' xņan' dan' bosoguacue'nen' na' bosyoguacue'ne' xacze'. Nach goseče'ene' cont jasede'ene' le'e yag cruzēn'.

### Bosode'e Jesúsēn' le'e yag cruzēn'

(Mr. 15:21-32; Lc.

23:26-43; Jn. 19:17-27)

<sup>32</sup>Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz che Jesúsēn'.

<sup>33</sup>Na' besežine' to latje gan' nzi' Gólgota, zeje diža' latje che žit yichj bene' guat. <sup>34</sup>Na' bosonežjue' Jesúsēn' vino da' nchixe to da' zļa' par ye'ejen', perw le' con bnixēn', bitw güe'ejen'.

<sup>35</sup>Na' cate' beyož bosode'ene' le'e yag cruzēn', soldadw ca' gosone' rifa cate' besyeļe'e xaļane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiza' Diosen' cani', gwne': "Yesyeļe'e xaļanan' na' yesezi' che che', yesonen' rifa." <sup>36</sup>Nach gosebi'e gosape'ne'. <sup>37</sup>Na' yichj yag cruzēn' gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

<sup>38</sup>Na' lecze cana' bosode'e chope bene' gwban le'e yechope yag cruz. Toe' gwda' cuit Jesúsēn' liča na' yetoe' cuite' robes. <sup>39</sup>Na' bene' ca' gosede gan' da' Jesúsēn' goson yichjlagüe' dan' leca besegue'ede' le', na' gosezi'diže' le', <sup>40</sup>gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzēn'.

<sup>41</sup> Na' len b̄xoz gwnabia' ca' na' len bene' ca' chososed chosolo'e dan' bzoj da' Moisésen' na' len bene' fariseo ca', na' len bene' gole blao ca' chesenabi'e naciòn chechon', yogüe' gosezi'diže'ne' na' gosene':

<sup>42</sup> —¡Yezica'chle bene' bosle' na' bi chac yosla cuine!' Še naque' rey che chio' bene' Israel, yeletj cuine' le'e yag cruzen' na'a na' šejle'cho che'. <sup>43</sup> Le' chejnilaže' Diosen', le gwne': "Dogualje Xi'in Dios neda'." ¡Na' le'echo yosla Diosen' le' na'a še chacde' le'!

<sup>44</sup> Na' bene' gwban ca' zjada' le'e yag cruzen' chop la'a cuiten', lecze gosezi'diže' le'.

### Can' goc cate' got Jesúsen'

(Mr. 15:33-41; Lc.

23:44-49; Jn. 19:28-30)

<sup>45</sup> Na' do guagwbiž doxen yežlion' goc choł bžinte cheda šone. <sup>46</sup> Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža: Dios chia', Dios chia', ¿bixchen' ba gwle-yichjo' neda'?)

<sup>47</sup> Na' bał bene' ca' zjanita' na' gosende' na' gosene':

—Le gwzenag, benga choł güiže' da' Elías ben' be' xtiža' Diosen' cani'.

<sup>48</sup> Nach la' bchojte to bene' gweyjsese' jaxi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'. <sup>49</sup> Na' yebałe' gose'e bena':

—Cuezcho, yešc še güiđe Elíasen' yosle'ne'.

<sup>50</sup> Nach da' yoble Jesúsen' bosye'e zižje na' gote'. <sup>51</sup> Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'eje. Na' gwxo'chgua gosoxjte yej ca'. <sup>52</sup> Na' lecze beseyaljo ba che bene' ba gosat. Na' zan da' bene' ca' gosejnilaže' Diosen' besyebane' ladjo bene' guat ca'. <sup>53</sup> Nach caten' ba bebān Jesúsen' ladjo bene' guat ca', besye-

choje' lo' ba čhegaquen' na' jaya'aque' jaselo'elagüe' ciuda Jerusalén. Na' zan bene' besele'ede' legaque'.

<sup>54</sup> Na' ca nac xan soldadw ca' na' bene' ca' nche'e, bene' nita' chesape' Jesúsen', cate' besele'ede' can' gwxo' na' bichle da' ca' goc, besežebchgüe', na' gosene':

—Da' li le benga goc dogualje Xi'in Dios.

<sup>55</sup> Na' lecze nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesac-lene' le' len bi da' chyažjde'. <sup>56</sup> Na' len no'ol ca' María bene' Magdala, na' lecze María ben' nac xna' Jacobo na' José, na' lecze ca' xna' Jacobo na' Juan, xi'in Zebedeo.

### Bosocuaše' Jesúsen'

(Mr. 15:42-47; Lc.

23:50-56; Jn. 19:38-42)

<sup>57</sup> Na' gwzoa to bene' gwni'a bene' ciuda Arimatea le' José na' ba gwzola' chzenague' che Jesúsen'. Na' cate' ba chxoa gwbiž <sup>58</sup> Josén' gweyje' lao Pilaton' jaynabe' cuerp che Jesúsen'. Na' Pilaton' bene' mandadw bosyonežjue'ne' cuerp čhen'. <sup>59</sup> Nach Josén' bego'o lo ne'e cuerp che Jesúsen' na' blaže'ne' to lache' xen da' nyach. <sup>60</sup> Na' gwlo'e cuerp čhen' to lo' bloj cobe che' da' gwče'ene' le'e yej. Na' blole' to yej xen cho'a blojen' cont bseyjon len. Nach beze'e. <sup>61</sup> Na' María bene' yež Magdalan' na' yeto María yoble jasechi'e cho'a blojen'.

### Bosozoe' bene' chesape'

### gan' jasecuaše' Jesúsen'

<sup>62</sup> Na' beteyo, gwde žan' caten' chososi'ne' par ža che Diosen', besedobe b̄xoz gwnabia' ca' na' bene' fariseo ca' na' ja'aque' gan' zoa Pilaton'. <sup>63</sup> Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne':

“Yeyon ža yebana' ladjo bene' guat ca'.”  
 64 Da'nan' gwseła'sca bene' šjasedape' cho'a blojen' gan' jasecuše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp chen' na' yese'e bene' le bebane' ladjo bene' guat ca'. Le še yesaque bene' ba bebane' ladjo bene' guat ca', gonchen malech clal ca len diža' dan' gwdise' gwne' Diosen' gwsele' le'.

65 Nach Pilaton' gože' bene' ca':

—Goņa' le'e soldadw ca'. Le che'e cont yesape' ga zelao yesezoede'.

66 Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

**Jesúsen' bebane' ladjo bene' guat ca'**

(Mr. 16:1-8; Lc. 24:1-12; Jn. 20:1-10)

**28** Na' cate' beyechj ža che Dios, bal dmigw María bene' Magdala len María ben' yeto ja'aque' jasene'e gan' bosocuaše' Jesúsen'. 2 Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. 3 Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca nac beye'. 4 Na' cate' besele'e bene' gop ca' le', leca gosexize' besežebe' na' gosebixe' gosatte' šlat. 5 Perw na' anglen' gože' no'ol ca':

—Bitw žeble. Neda' nežda' Jesúsen' ben' bosode'e le'e yag cruz nan' chey-iljwle. 6 Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'. 7 Bedao' le šjaya'ac le šjaydixjue'e bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsen' yežine' Galilean' clal ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

8 Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acsese'

zjasyedixjue'ede' bene' ca' zjanaque' Jesúsen' txen can' goca'. 9 Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'. 10 Jesúsen' gože' legaque':

—Bitw žeble. Le šjaydixjue'e bene' lježcho ca', cheyla' šjaya'aque' Galilean' cont yesele'ede' neda'.

**Bene' gop ca' jasyedixjue'ede'  
 bžoz ca' can' ba goca'**

11 Na' šlac zjaya'ac no'ol ca' ciudan', bal soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bžoz gwnabia' ca' doxen can' ba goquen'. 12 Nach besedobe bžoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca nac dan' gose' soldadw ca' legaque'. Na' bosonežjue' soldadw ca' da' zcha'o mechw. 13 Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebje' cuerp chen' lo' blojen' na' besyeyo'en ga yoble. 14 Na' še gobernadoren' yende' diža' quinga, neto' šjašaljento'ne' cont bi že'e le'e na' cont bi gote' le'e.

15 Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

**Jesúsen' gože' legaque' yeso'e  
 tixže'na' yogo' nación**

(Mr. 16:14-18; Lc.

24:36-49; Jn. 20:19-23)

16 Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'. 17 Na' cate'

besele'ede' Jesús'en' gosonxene'ne'. Perw  
 bia'cze to c̄hope' gosac̄ęjlaže' še le'na'.  
<sup>18</sup>Nach gwbiga' Jesús'en' gan' nite'na' na'  
 gože' legaque':

—Ba ben Diosen' lo na' doxen yela'  
 chnabian' dan' de yaban' na' yežlion'.  
<sup>19</sup>Da'nan' le šja'ac le šjased le šjalo'e  
 bene' ca' že' yogo'loł nación cont yese-  
 jnilaže' neda'. Na' le gwzoe' nis cont

yosolo'e le chesejnilaže' Xacho Diosen',  
 na' chesejnilaže' neda' naca' dogualje  
 Xi'ine', na' lencze Spiritw che'na'. <sup>20</sup>Na'  
 gwsed gwlo'elne' cont yesone' yogo'loł  
 dan' ba bena' mandadw gonle. Neda'  
 zoacza' len le'e yogo'ža, na' ca'cze ne' soa'  
 len le'e cate'ch te che yežlion'. Da' na'zen'  
 chzoja' na'a.

## DIŽA' GÜEN DAN' BZOJ SAN MARCOS

**Juan ben' bzoa bene' nis gwdixjue'ede'  
diža' güen che Diosen' latje daš**

(Mt. 3:1-12; Lc. 3:1-9,  
15-17; Jn. 1:19-28)

**1** Qui goc cate' gwxe xtiža' Jesucristo  
ben' nac dogualje Xi'in Dios.

<sup>2</sup>Da' Isafas ben' be' xtiža' Diosen' cani'  
bzoje' da' nga, žan:  
Chsel'a' to bene' cuialagüe' laoguo'n güe'e  
xtižon',

cont ba zjanita' bene' yosozenague' chio'  
cate' šejo'.

<sup>3</sup>Bena' chne' zižje latje dašen' že':

“Le gonšagüe' yichjlažda'olen' cont  
gwzenagle che Xanchon' cate' yide';  
le cuejyichj da' malen' chonle cont  
yichjlažda'olen' gaquen ca to nez da'  
ba gosonšagüe'.”

<sup>4</sup>Ca' goquen', Juan ben' chzoa bene'  
nis bžine' latje dašen' na' gože' bene'  
ca' besežag na' cheyała' yesyetinjide'  
xtola'gaque' na' yesezoe' nis cont nitlao  
xtola'gaque'. <sup>5</sup>Zan bene' za'ac do distritw  
Judea na' ciuda Jerusalén bosozenague'  
che diža' dan' chyixjue'ede'. Na' cate' go-  
sexoadole' bi da' xinj zjanone', Juanna'  
bzoje' legaque' nis lo' yegw Jordán.

<sup>6</sup>Xalana' Juanna' goquen de yiša' xa  
canello na' da' bchej lsine' goquen de  
yid, na' gwdagüe' biše'zo len šina' beser  
yixe'. <sup>7</sup>Na' gwdixjue'ede' bene' xtiža'  
Diosen', gwne':

—Coža' na' za' za' to bene' zaca'che' ca  
neda', na' da' nachgüe' bene' zaca', bi  
zaca' gona' xmandaoe' lechja' no xele'.

<sup>8</sup>Neda' ba bzoa' le'e nis, perw ben' za'  
zan' gone' cont soa Spiritw che Diosen'  
lo' yichjlažda'olen' nabian' xbab chele.

**Jesúsen' gwzoe' nis**

(Mt. 3:13-17; Lc. 3:21-22)

<sup>9</sup>Ca tiempa' Jesúsen' gwze'e lagüe  
yež Nazaret da' chi' ga mbane distritw  
Galilea, na' Juanna' bzoje' le' nis lo' yegw  
Jordán. <sup>10</sup>Na' šlac chechoj Jesúsen' lo'  
nisen', Jesúsen' ble'ede' byalwj yaban'  
gan' zoa Diosen', na' Spiritw che Diosen'  
betjen jasoan len le', na' ca hora' Spiriton'  
naquen ca nac ngolbex. <sup>11</sup>Na' gosende'  
gwne' Dios ben' zoa yaba gwne':

—Len' naco' Xi'ina' bene'  
chacchgüeda', na' chebe  
chezaque'laže'chgüeda' chio'.

**Satanásen' goclažen' co'oyelan'**

**Jesúsen' cont gone' da' mal**

(Mt. 4:1-11; Lc. 4:1-13)

<sup>12</sup>Nach Spiritw che Diosen' benen cont  
la' gweyje Jesúsen' latje daš. <sup>13</sup>Na' gw-  
zoe' latje dašen' choa ža ladjo be znia  
ca'. Na' Satanás dan' chnabia' da' xigüe'  
ca' goclažen' co'oyelan' le' cont gone'  
da' mal. Nach beyoža' jasadlen angl che  
Diosen' le'.

**Jesúsen' gwzolao chyixjue'ede' xtiža'  
Diosen' distritw gan' nzi' Galilea**

(Mt. 4:12-17; Lc. 4:14-15)

<sup>14</sup>Beyož gosegüe'e Juanna' ližya,  
Jesúsen' beze'e beyeje' Galilea gan'  
jatixjue'ede' diža' güen, gwne' Diosen'  
nabi'e yichjlaždao' bene' ca' yosozenag  
che'. <sup>15</sup>Jesúsen' gwne':

—Ba bžin ža cate' Diosen' nabi'e  
yichjlaždao' bene' yosozenagüe' che'. Le  
yetinje xtolal'en' na' le šejle' diža' güen  
che Diosen' da' chyixjue'eda'.

**Jesúsen' goxe' tap bene' gwxen**

**beļ šja'aclene' le' txen**

(Mt. 4:18-22; Lc. 5:1-11)

<sup>16</sup>Jesúsen' chde' do cho'a nisdao'  
che Galilean' cate' ble'ede' chope bene'  
gwxen beļ, Simón na' bene' biše' An-

drés. Na' zjanite' chosozale' yixjw dan' chesezende' belen' lo' nisa'. <sup>17</sup>Na' gož Jesúsen' legaque':

—Le šo'o len neda'. Nacle bene' gwxcn bel' na' chbejle belen' lo' nisen', perw na'a gona' cont gaxle bene' yesyechoje' lo' da' malen'.

<sup>18</sup>Nach la' bosocua'ante yixjw chen' na' jasa'aclene' le'.

<sup>19</sup>Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw chegaquen'.

<sup>20</sup>Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac xagaque' lo' barcon' len bene' ca' chesaclen le', nach ja'aque' len Jesúsen'.

**To bene' gwyo'o gwyaze' da' xigüen'**

(Lc. 4:31-37)

<sup>21</sup>Besežine' yež da' nzi' Capernaum, na' ža che Dios Jesúsen' gwyo'e lo' yodaon' da' zoa na' na' gwzologüe' bsd blo'ede'. <sup>22</sup>Bene' ca' že' na' besyebande' can' bsd blo'ede', le can' bzejni'iden' nacbia' nezdē' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés. <sup>23</sup>Na' lo' yodaon' zoa to bene' yo'o nyaze' da' xigüen', na' bosye'e gwne':

<sup>24</sup>—¿Bixchen' chgoša' chlaže' chio' len neto', Jesús bene' Nazaret? ¿Zedežiyayo'o neto'? Neda' nombi'a le' na' nezdā' naco' bene' laždao' xilaže' juisyw bene' gwsela' Dios.

<sup>25</sup>Nach Jesúsen' gože' da' xigüen':

—iŠšago', bechoj lo' yichjlaždao' benga!

<sup>26</sup>Na' da' xigüen' benen cont gwchole' bena', nach chosya'adiachguan bechojen lo' yichjlažda'ogüen'. <sup>27</sup>Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga? ¡Nacbia' nape' yela' chnabia' na'

yela' guac, le da' xigüe' ca' chesonen da' že'!

<sup>28</sup>Na' ca' nac dan' ben Jesúsen' be-daonēz gos gwlaļje dižan' doxcn lagüe' yež ca' gan' mbane Galilea.

**Jesúsen' beyone' taobi'in  
che Simón Pedro**

(Mt. 8:14-15; Lc. 4:38-39)

<sup>29</sup>Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés. <sup>30</sup>Na' taobi'in che Simónna' die' che'ede' xla; na' gose'e Jesúsen':

—Benga die' che'ede'.

<sup>31</sup>Nach jabiga' Jesúsen' na' bexcue' taquen' gwliše'ne'. Na' la' beyactede', nach bsini'e da' gose'ej gosagüe'.

**Jesúsen' beyone' zan bene' chese'ede'**

(Mt. 8:16-17; Lc. 4:40-41)

<sup>32</sup>Cate' ba gwxa gwbižen' na' ba gwxcn, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'. <sup>33</sup>Na' do yež bene' besedop be-sežague' cho'a yo'o gan' zoa Jesúsen'. <sup>34</sup>Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanezen non' nac le'.

**Jesúsen' chyixjue'ede'  
xtiža' Diosen' Galilea**

(Lc. 4:42-44)

<sup>35</sup>Šbaļ cate' ne' nac choljesúsen' gwyase' na' gwze'e gwyeje' ga nono nla' na' boļ güiže' Diosen'. <sup>36</sup>Simón na' bene' lježe' ca' ja'aque' jasyediljue'ne'. <sup>37</sup>Na' cate' besyeželde'ne' gose'ene':

—Yogo'ze bene' chesyeyiljue' le'.

<sup>38</sup>Perw Jesúsen' gože'ne':

—Le šo'o ga yoble ga nac gaļa'ze cont lecze šjatixjue'eda' xtiža' Diosen' na', le da'nān' ba gwza'a.

<sup>39</sup>Can' goc, Jesúsén' gwde' doxen gan' mbane Galilea gwdixjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

**Jesúsén' beyone' to  
bene' che'ede' lepra**

(Mt. 8:1-4; Lc. 5:12-16)

<sup>40</sup>To bene' che'ede' yižgüe' dan' nzi' lepra jabigue' gan' zoa Jesúsén' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

<sup>41</sup>Na' Jesúsén' beži'ilaže'de' le' na' bexue'ne' gwne':

—Chaclaža'yeyacdo'. Beyaque.

<sup>42</sup>Cate' gwne' ca' la' bega'ate yižgüen' na' beyacde'. <sup>43</sup>Nach Jesúsén' besele'ne' liže', bene' mandadw, gože'ne':

<sup>44</sup>—Notno yo'o can' ba beyona' le', con gwey jana' bxoza' cont le'ede' bačh beyacdo', na' bnežjw da' cheyala' gwnežjo' dan' non Moisésén' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

<sup>45</sup>Perw ben' bi bchejde', yogo'ze bene' gože' can' goca'. Da'nán' Jesúsá' bich goc šeje' con ca nla'ze gate'teze yež, san con gwde' do yiže', na' bia'cze bene' za'ac yogo'ze yež jase'ne'e le'.

**Jesúsén' beyone' to bene'  
bi chda šla'a ni'a ne'e**

(Mt. 9:1-8; Lc. 5:17-26)

**2** Gwde to chop ža, Jesúsén' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'. <sup>2</sup>Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsén' gwdixjue'ede' xtiža' Diosen' len legaque'. <sup>3</sup>Nach besežin xonj bene' cont jasesane' lao Jesúsén' to bene' xinj bene' bi chda šla'a ni'a ne'e; tap bene' zjano'ene'. <sup>4</sup>Perw bi chac yesežine' gan'

zoa Jesúsén' catec chyi. Nach goseque'e tej dan' ncu'a yichj yo'on na' beseletje' le' na'le to lo cam dao'. <sup>5</sup>Na' cate' Jesúsén' gocbe'ede' can' chesejnilaže'nen', gože' bene' güe'na':

—Xi'ina', ba bezi'xena' xtołon'.

<sup>6</sup>Ba' bene' chososed chosolo'e ley dan' bzoj da' Moisésén' zjachi'e na', na' gosone' xbab: <sup>7</sup>“¿Bixchen' chna benga ca'? le chon cuine' ca Dios. Nono zoa bene' gac yezi'xene' xtoła' benach. Toz Diosen' gac yezi'xenen'.” <sup>8</sup>Perw Jesúsén' chacbe'eczedde' can' nac xbab čhegaquen', na' gože' legaque':

—¿Bixchen' chza'laže'le ca'? <sup>9</sup>Še yapa'ne': “Ba bezi'xena' xtoło'na'”, bi nezele še napa' yela' gwnabia' cont yezi'xena' xtole'na', san še yapa'ne': “Gwyas, beyoa' xcamon’”, na' nacbia' še napa' yela' guac gac can' gwnian'. <sup>10</sup>Perw neda' naca' ben' gwseła' Dios golja' benach, gwlo'eda' le'e na'a zoa yežlio nga napa' yela' gwnabia' cont yezi'xena' xtoła' benach.

Nach gože' bene' xinja':

<sup>11</sup>—Chapa' le', beyas, beyoa' xcamon' na' beyej ližo'.

<sup>12</sup>La' beyaste bene' xinja' chesenate bene' ca' nita'na' na' beyoa' xcamen'. Da'nán' yogo' bene' ca' besyebande' na' goso'e yela' choxclen che Diosen', gosene':

—Bina' le'echo yela' guac dan' nac ca'.

**Jesúsén' goxe' Leví cont gweyjlene'ne'**

(Mt. 9:9-13; Lc. 5:27-32)

<sup>13</sup>Da' yoble gwey Jesúsén' cho'a nisdao' na' bene' zan besedobe' gan' zeje' na' bsd blo'ede' legaque' xtiža' Diosen'. <sup>14</sup>Na' Jesúsén' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gweyjlene'ne'.

<sup>15</sup>Na' gwdena' goquen' chi' Jesúsén' liž Levín' na' güe'ej gwdagwlene'ne' txen



len zan bene' güechixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'. <sup>16</sup>Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' be-sele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxechen' ben' chsed chlo'e le'e che'ej chagwlene' txen bene' güechixjw na' yebał bene' güen da' xinj ca'?

<sup>17</sup>Cate' Jesúsen' bende' can' gosene' na' gože' legaue':

—Bene' bi chesacšene bi cheseyažjde' bene' güen rmed. Bene' chesacšende', le-gaquen' cheseyažjde' bene' güen rmed. Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Le-gaquen' zjazacalebe' ca bene' cheseyažje bene' güen rmed.

**Gosenabde' Jesúsen' bixchen' bene' zjanaque' le' txen bi chesone' gwbas**

(Mt. 9:14-17; Lc. 5:33-39)

<sup>18</sup>To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jasenabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

<sup>19</sup>Na' Jesúsen' gože' legaue':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zoalene' legaue'? Še zoa ben' bšagnan', bi gac yesone' gwbas. <sup>20</sup>Perw žin ža cate' bich zoe' len legaue', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

<sup>21</sup>Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache'

golen', na' gan' žon'na' gacchen da' xen. <sup>22</sup>Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

**Bene' ca' zjanaque' Jesúsen' txen chesalj'e dao ža che Dios**

(Mt. 12:1-8; Lc. 6:1-5)

<sup>23</sup>To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalj'e dao che trigon' šlac gosodie' gan' nyaženna'. <sup>24</sup>Nach bene' fariseon' gose'e le':

—Gwñašc ¿bixchen' cheson bene' ca' zjanaque' le' txen žin da' bi cheyala' yesone' ža che Dios?

<sup>25</sup>Na' Jesúsen' gože' legaue':

—¿Bina' gwlable can' ben da' rey David to ža cate' le' na' bene' lježe' ca' gosodone'? <sup>26</sup>Gwyo'o Davin' ga nac liž Dios cate' da' Abiatar goque' bžoz blaó, na' gwdagüe' yetextil da' nac che Dios da' bi chac gagw bene' bi nac bžoz, na' lecze bnežjue' che bene' zja'ac len le'.

<sup>27</sup>Lecze gož Jesúsen' legaue':

—Diosen' gwleje' to ža cate' bi yeson benačen' žin cont gaclenen benačh, gague gwleje' benačen' cont yesonxene' ža chen'. <sup>28</sup>Da'nan' naquen lo' na' nia' bi da' nac güen goncho lente cate' nac ža che Dios, neda' naca' ben' gwseła' Diosen' golja' benačh.

**Jesúsen' beyone' to bene' nxo'on' šla'a taque'**

(Mt. 12:9-14; Lc. 6:6-11)

**3** Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on' šla'a taque'. <sup>2</sup>Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya

che'. <sup>3</sup>Nach Jesúsen' gože' ben' n̄x'o'ón taquen':

—Gwzoža' na' gwzecha nga.

<sup>4</sup>Nach gwñabde' bene' ca' yezica'chle:

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še cheyala' gotchone'?

Perw na' legaue' gosenite' šižize.

<sup>5</sup>Nach Jesúsen' gwñe'e legaue', bže'e can' gosone' xbab, na' ľecze gocyasē'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo.

<sup>6</sup>Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

### Zan bene' nita' cho'a nisdaon'

<sup>7</sup>Nach Jesúsen' gweyje' cho'a nisdaon' len bene' ca' zjanaque' le' txen, na' zan bene' Galilea ja'ac len le'. <sup>8</sup>Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedeseñe'e le' cate' goseñezde' yeľa' guac da' chonen'. <sup>9</sup>Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosoči bene' ca' zjanžaga' le', <sup>10</sup>le' bene' zan ba beyone', na' bene' ca' ne' chese'ede' chosožiga' ľježe' nac gac yesoxe'ne'. <sup>11</sup>Na' bene' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

<sup>12</sup>Perw Jesúsen' gwdile' legaquen na' bene' mandadw bi yesenan no nac le'.

### Jesúsen' gwčhie' bene' šižinw ca' gosaque' txen len le'

(Mt. 10:1-4; Lc. 6:12-16)

<sup>13</sup>Beyoža' Jesúsen' gwloe' to lo ya'a na' goxe' baľ bene' goclaže' šja'aclene' le', nach gosa'aque' ja'aque' gan' zoen'.

<sup>14</sup>Nach gwleje' šižinw bene' yesenita' len le', cont sele' legaue' šjasedixjue'ede' xtižen'. <sup>15</sup>Na' bnežjue' legaue' yeľa' guac cont yesyeyone' bene' güe' na' yeľa' gwnabia' cont yesyebje' da' xigüe' da' yo'o nyaz bene'. <sup>16</sup>Šižinw bene' quin' gosac: Simón ben' ľecze gože'ne' Pedro; <sup>17</sup>Jacobo len bene' biše' Juan bene' ca' zjanac xi'in Zebedeo, na' bsi'e legaue' Boanerges, zeje diža' bene' zjanac ca' yi' gwzio' cate' chašjw chtinen'; <sup>18</sup>nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista, <sup>19</sup>na' Judas Iscariote ben' gwdechle bdie' Jesúsen' lo na' bene' ca' chesegue'ede' le'.

### Gosene' Jesúsen' bebeje' da' xigüe' len yeľa' guac che Beelzebú

(Mt. 12:22-32; Lc. 11:14-23; 12:10)

Beyoža' Jesúsen' len bene' ca' zjanaque' le' txen goso'e lo' yo'o gan' zoe' ca hora', <sup>20</sup>na' da' yoble besežagchgua bene', neca goc yes'e'ej yesagw Jesúsen' len bene' ca' zjanaque' le' txen. <sup>21</sup>Na' cate' goseñeze biše' ľjež Jesúsen', ja'aque' cont yesyech'e'ene', le' gosene' chactonte'.

<sup>22</sup>Nach bene' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

<sup>23</sup>Nach Jesúsen' goxe' bene' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen ľecze da' xigüe'? <sup>24</sup>Še to gobiern choje' ĉhop šon cuenle na' yeyoža' yesedile ľegacze', gobiernna' bi sibi'e. <sup>25</sup>Na' še bene' že' toz yo'o yesechoje' ĉhople na' yesedile ľegacze', gague sša yesenite' txen. <sup>26</sup>Na' še Satanásen' len da' xigüe' ĉhen yesechojen ĉhople na' yesedilen, ľecze bi sibian', san na' yeyož yedon.

<sup>27</sup>Nono gac šo'e lo' yo'o ĉe to bene' gual na' que'e bi da' de ĉe' še cbi zgua'tec gwĉheje' bene' gual na', ľete gone' ca' nach gac que'e bi da' de ĉe'.

<sup>28</sup>'Da' li žia' le'e, yogo' da' xinj da' chon benaĉ na' yogo' diža' bya' da' yesene', Diosen' yezi'xene' ĉhen še yesyetinjde'.

<sup>29</sup>Perw note'teze bene' ne' yela' ya' ĉe Spiritw ĉe Dios, gwbat yezi'xen Diosen' ĉe', san de doľa' ĉe' toľi tocanē.

<sup>30</sup>Gwne' ca' dan' gosene' ĉe' yo'o nyaze' da' xigüe'.

**Xna' Jesúsen' na' bene' biše' gosaxe'ne'**

(Mt. 12:46-50; Lc. 8:19-21)

<sup>31</sup>Na' bžin xna' Jesúsen' len bene' biše', na' gosenite' chy'ole gosaxe' ľe'. <sup>32</sup>Na' bene' ca' zjanita' cuit Jesúsen' gose'ene':

—Xna'o len bene' bišo' ca' zjanite' chy'o na' chesyeyiljue' ľe'.

<sup>33</sup>Nach Jesúsen' gože' ľegaque':

—¿Nezele non' nac xna'a na' no zjanac biše' ľježa'?

<sup>34</sup>Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' ľježa'. <sup>35</sup>Le note'teze bene' chone' da' chna'laže' Dios, bena' nac bene' biša', bene' zana', ľecze naque' xna'a.

**Jempl ĉe bene' goz trigo**

(Mt. 13:1-9; Lc. 8:4-8)

**4** Yeto ža yoble gwzolao Jesúsen' ĉhsed chlo'ede' cho'a nesdaon', na' besežagĉgua bene' zan juisyw gan'

ĉi'ena'. Na' da' besežagĉgua bene' zan, benten byen gwyo'o Jesúsen' to lo' barcw dao' da' ĉhda' lo' nesdaon' cho'a yo bižen' na' gwĉi'e lo'enna', na' yogo' bene' ca' gosenite' cho'a nesdaon' ga nac yo biž. <sup>2</sup>Nach da' zan da' bsed blo'ede' ľegaque' len jeml da' bi'e. Na' bzejni'ide' ľegaque', gwne':

<sup>3</sup>—Le gwzenag da' nga: To bene' güen žin jeze' trigw. <sup>4</sup>Na' šlac zeje' chose' trigon', late' biĉ ĉe trigw dan' chazen' jasechazen chanez nach be ca' žia xil be ĉaš ľe'e yaba gosagwban'. <sup>5</sup>Yelaten' jasechazen ga nac lo' yej, ga bibi yotec zoa, na' da' nga byob blan' ľe bi jasechazen ga nac sitjw. <sup>6</sup>Perw cate' bla' gwbiža' na' bzeyen len na' gwbižen, ľe gague yo'otec loenna' sitjon'. <sup>7</sup>Yelaten' jasechazen ga nac lo' yag yeše', na' yag yešen' gosecha'on na' bosololen' len, na' bibi gosebjan. <sup>8</sup>Perw na' yelaten' jasechazen ga nac yo šagüe'. Da' nga beselan' na' gosecha'on na' ľeca güen gosebjan, baľen gosebjan do šichoa güeje to ton, baľen gayon, na' yebalen do to gayoa.

<sup>9</sup>Na' gože' ľegaque':

—Le'e žia nagle da' chene, ľe gwzenag xtiža'na'.

**Bichen' bzejni'ide' bene' len jeml**

(Mt. 13:10-17; Lc. 8:9-10)

<sup>10</sup>Gwdena' cate' ba besyeya'ac bene' zan ca', bene' ca' zjanita' gaľa'ze len ľe' na' len bene' šizijnw ca' zjanaque' ľe' txen, gosena'bde' ľe' bi zejen jeml dan' bi'en.

<sup>11</sup>Na' gože' ľegaque':

—Nono na' neze can' nac yela' gwnabia' ĉe Diosen', perw ba chone' cont le'e ĉejnilaže'lene' nezelen. Na' bene' bi ĉesaclaže' yesejnilaže' Diosen', choe'lengaca'ne' xtižen' len jeml. <sup>12</sup>Chona' ca' cont yesele'ede' can' chonan' na' bitw yesaĉbe'ede' bi zejen, na' cont yesende' xtižan' na' bi yesejni'iden', na' neca yesyetinjde', neca yezi'xen Diosen' xtolen'.

**Jesúsen' bzejni'ide' bi zejen  
jempl che ben' ben goza'**

(Mt. 13:18-23; Lc. 8:11-15)

<sup>13</sup> Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? <sup>14</sup> Ben' ben goza' naque' ca ben' choe' xtiža' Diosa'. <sup>15</sup> Na' bał bene' zjanaque' ca biñ dan' beselažo' chanez, le chosozenague' cate' chas chlalje xtiža' Diosen', na' ca cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. <sup>16</sup> Yebał bene' zjanaque' ca biñ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen', <sup>17</sup> perw šložga chesezibi'e, na' cate' chesac bi da' mal chegaque' o bichle chesone bene' legaque' neche da' chosozenague' xtiža' Diozen', la' chesebejyichjten'. <sup>18</sup> Na' yebałe' zjanaque' ca biñ dan' besego'onen ga nac lo yag yeše'. Chosozenague' xtiža' Diosen', <sup>19</sup> na' šlac zjambane' chesyelał chesyžejde', na' da' chesac laže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'nan' bi chesejnilaže' le' ca cheyała'. <sup>20</sup> Perw na' nita' bał bene' chosozenague' xtiža' Diosa' na' chesejnilaže' le' do yichj do laže', bene' qui zjazaca'lebde' ca biñ dan' beselažo' lo yo šagüe'. Bałe' zjanaque' ca biñ dan' gosebian šichoa güeje to ton, na' yebałe' ca da' ca' bexoen' gayon, o ca no da' ca' bexoen' to gayoa güeje to ton.

**Jempl che yi' dan' chguala'cho**

(Lc. 8:16-18)

<sup>21</sup> Lecze gože' legaque':

—Cate' chguala'cho to yi' ;gdwosa'chon to caj o gwzoachon xan

cam? Bi choncho ca', san chguala'cho yin' na' chzoachon sibe cont gwsenin'. <sup>22</sup> Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'. <sup>23</sup> Le'e žia nagle da' chene, le gwzenag xtižan'.

<sup>24</sup> Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze cont soachle mbalaz da' chzenagle che'. <sup>25</sup> Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

**Jempl che biñ dan' chlan' na' chcha'on**

<sup>26</sup> Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze biñ lo yo. <sup>27</sup> Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nezde' naquen' chac. <sup>28</sup> Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyała' cuian. <sup>29</sup> Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

**Jempl che biñ che xomdas**

(Mr. 13:31-32; Lc. 13:18-19)

<sup>30</sup> Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaque'. <sup>31</sup> Naquen ca to biñ che xomdas da' chyaž lo yo. Len chnabia' nac da' dao' len biñ ca' chazcho lo yežlion'. <sup>32</sup> Perw cate' bač nyažen, chcha'on na' chaquen da' xench lao yixe' cuan ca', na' da' xenchgua chac xol che xozenna', na' lente byiñ dao' ca' chesyezi'laže'ba' lo xozenna'.

**Jesúsen bgone' žin jempl***(Mt. 13:34-35)*

<sup>33</sup> Can' blo'e Jesúsen' xtiža' Diosen' yogo' n̄i'a, bi'e zan jempl ca che ben' goza' na' che biñ ca', con ga zelao goc gosejni'ide'. <sup>34</sup> Bitwbi bzejni'ide' le-gaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

**Jesúsen' bebeczie' be' bdono' len nisdao'***(Mt. 8:23-27; Lc. 8:22-25)*

<sup>35</sup> Leze lo žana' cate' gw̄xin, Jesúsen' gože' bene' ca' zjanaque' le' txen:

—Le šo'lo laga'cho yešla'a nisdao'.

<sup>36</sup> Nach bosyocua'ane' yezica'chle bene' ca' že' gan' ba bsd blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto chop barcw dao'. <sup>37</sup> Na' gwzolao gwyechjchgua to be' bdonon' na' nisdao' leze chas chatan', na' gwzolao cheyož nis lo' barcon'.

<sup>38</sup> Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—iMaestro! ěBibi de chza'lažon' še ba gwdebe nisdao' chio'?

<sup>39</sup> Nach gwyas Jesúsen' na' gwdiļe' be' bdonon' na' gože' nisdao':

—iŠižize! iŠižize!

Na' bebeži be' bdonon' na' beyataži nisdao'. <sup>40</sup> Nach Jesúsen' gože' bene' ca' zjanaque' le' txen:

—iBixchen' chžebtecle? ěNacxechen' bi chejle'le chia'?

<sup>41</sup> Legaque' besežebchgüe' na' gose' lježe':

—iNoxe benga? lente be' bdonon' na' len nisdao' chosozenaguen che da' že'.

**Bene' Gadara yo'o nyaze' da' xigüe'***(Mt. 8:28-34; Lc. 8:26-39)*

**5** Besežine' šla'a nisdao' gan' mbane Gadara, <sup>2</sup> na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'. <sup>3</sup> Bena' ba zoacze' capsantw na'le na' nono chzoe goxe' le', ne len gden ca' gosezoede' le'. <sup>4</sup> Da' zan n̄i'a bosocheje' n̄i'a ne'e gden, perw bia'cze gwchoguen', con bzoxj btinen', na' nono gwzoe le'. <sup>5</sup> Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. <sup>6</sup> Na' cate' ble'ede' Jesúsen' zito' gwyesese' jazoa xibe' lagüen', <sup>7</sup> na' da' xigüen' benen cont bosya'adie' gože' le':

—iBixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neche Dios chneyoeda' le' bi gwsaco' neda'.

<sup>8</sup> Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

<sup>9</sup> Na' gwñabe Jesúsen' len:

—iBi lio'?

Na' boži'in xtižen':

—Legión lia', le nac zanto'.

<sup>10</sup> Na' goseneyoen Jesús'a' bi yeselen' zito' cate' yesyežašen' yichjlaždao' ben'. <sup>11</sup> Na' gała'ze lo ya'ana' chesaš zan coš chesagwba'. <sup>12</sup> Nach da' xigüen' goseneyoen le':

—Gwseļa' neto' gan' nita' coš ca' na' ben latje šjajo'oto' lo' yichjlažda'oban'.

<sup>13</sup> Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

<sup>14</sup> Nach bene' ca' chosoyoe' cošen' bosyoxonje' jasyeyeže' bene' lagüe yež

len bene' chaš yixe' can' goca'. Na' ja'ac bene' jaseñe'e bixen' goc. <sup>15</sup>Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' ña'a ba chi'e nyaz xałane' na' ba bezoa yichjlažda'ogüen' binlo. Na' besežebe'. <sup>16</sup>Na' bene' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'. <sup>17</sup>Nach gosezolagüe' gosata'yoede' Jesúsen' yeze'e lažgaquen'.

<sup>18</sup>Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'. <sup>19</sup>Perw Jesúsen' bi be'e latje, san gože' le':

—Beyej ližo' na' jayež bene' lo' yo'o chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

<sup>20</sup>Na' beza' ben' na' gwzolagüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' bene' gosene xtižen' besyebande'.

**Bi' no'ol che Jairo, na' no'ol  
ben' gwdane' xa Jesúsen'**

(Mt. 9:18-26; Lc. 8:40-56)

<sup>21</sup>Cate' bežin Jesúsen' cho'a nisaon' zeze'e lo' barcw daon' dan' zeza' šla'a nisaon', bene' zan ja'aque' gan' bežinen', na' Jesúsen' bega'ane' cho'a nisdao' na'ze.

<sup>22</sup>Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen' <sup>23</sup>na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

<sup>24</sup>Nach Jesúsen' gwejlene' le'. Na' bene' zan ja'acch, na' bosochichgüe' le'. <sup>25</sup>Ladjo bene' ca' len to no'ol che'ede', ba goc šižinw iz chzoe' gwba'o'. <sup>26</sup>Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyałalen'. <sup>27</sup>Cate' bende'

cheso'e xtiža' Jesúsen', no'olna' gwdie' ladjo bene' ca' na' bžine' cože'le Jesúsen' na' gwdane' xen'. <sup>28</sup>Le bene' xbab, gwne': "Con še ba gwdana' xen' nach yeyactecza'." <sup>29</sup>Na' da' li cate' gwdane' xen' la' gwlezte gwba'o' dan' zoen', na' no'olen' gocbe'ede' ba bega'a yižgüe' chen'. <sup>30</sup>Na' Jesúsen' la' gocbe'etede' to bene' ba beyacde' len yela' guac chen', nach gwechje' gwne'e bene' ca' nita' cože'le, na' gwnabde' legaque':

—¿Non' gwdan xan'?

<sup>31</sup>Nach bene' ca' zjanaque' Jesúsen' txen gose'ene':

—Ba ble'eczedo' ca chosočhie' le', ¿bixchen' chñabo' non' gwdan xaon'?

<sup>32</sup>Perw Jesúsen' chne'e nile na'le cont le'ede' non' gwdan xen'. <sup>33</sup>Nach no'olen' nežde' can' ba goc che' na' do chaž chžebe' gweyje' jazoa xibe' lagüen' na' gože'ne' yogo' da' li. <sup>34</sup>Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

<sup>35</sup>Ne' choe'te Jesúsen' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

<sup>36</sup>Perw Jesúsen' bi bene' cuent dan' chesena bene' ca', na' gože' xan yodaon':

—Bitw žebo', con gweyje'le' chia'.

<sup>37</sup>Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'. <sup>38</sup>Na' cate' besežine' liž xan yodaon', ble'ede' ba chi' žaš chesosye'e chesebeže'. <sup>39</sup>Nach gwyo'e na' gože' legaque':

—¿Bixchen' mbecle žaš chbežle? Bi no'ol daon' biña' gatbe', san chtasben'.

<sup>40</sup>Perw bosoxiže' gosonle' che'. Nach Jesúsen' bešaše' yogo'lole', na' gwche'e xaxna'be' na' bene' ca' zja'aclen le' na'ze

na' goso'e len le' gan' de bi' no'ol daon'.  
<sup>41</sup>Na' bexue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

<sup>42</sup>Nach bi' no'ol daon' la' beyastebe' na' goc beza'be', le šižinw izegueben'. Na' bene' ca' besele'e leca besyežejde' can' goca'. <sup>43</sup>Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

**Jesúsen' bežine' distritw  
 gan' chi' yež Nazaret**

(Mt. 13:53-58; Lc. 4:16-30)

**6** Na' beza' Jesúsen' na' bežine' laže', na' bene' ca' zjanaque' le' txen ja'aclene' le'. <sup>2</sup>Na' cate' bžin ža che Dios, Jesúsen' gwzolakü'e bsd blo'ede' lo' yodaon'. Na' bene' zan bene' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi' yela' sinan' nežde'? na' ¿nacxečen' chac chone' yela' guac ca'? <sup>3</sup>Benga chonšagüe' yag na' naque' xi'in María. Nombia'chwne' na' bene' biše' Jacobo, José, Judas na' Simón, na' lecze bene' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e che'. <sup>4</sup>Nach Jesúsen' gože' legaque':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

<sup>5</sup>Na' ne to yela' guac ca' goc gone' na', lete gwxo'a taquen' yichj to chop bene' güe' na' beyone' legaque'. <sup>6</sup>Na' bebande' dan' bi gosejle' bene' che'. Na' gwdechle gwda Jesúsen' bsd blo'ede' to to yež dao' ca' nita' ga'la'ze.

**Jesúsen' gwsele' bene' ca' zjanaque'  
 le' txen jasedixjue'ede' xtiža' Diosen'**

(Mt. 10:5-15; Lc. 9:1-6)

<sup>7</sup>Na' goxe' bene' šižinw ca' na' gwsele' chop güeje' to to yež, na' bnežjue'ne'

yela' gwnabia' cont goc besyebeje' da' xigüe' lo' yichjlaždao' bene'. <sup>8</sup>Na' cate' za' yesa'aque' gože' legaque' bibi yesože' chanez, ne bzod, ne yetextil, ne mechw, con yesože' to xis da' yosočiše'. <sup>9</sup>Na' yosoleje' yel perw bi yesoe' yeto xcamise'. <sup>10</sup>Na' lecze gože' legaque':

—Cate' žinle to liž bene', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'. <sup>11</sup>Na' še zoa ga bi yosolebe' le'e neca yosozenague' chele, cate' yeza'le na' le cuibe ni'alen' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw bene' ca' bi yosolebe' le'e yesacche' castigw clel ca' bene' Sodom na' bene' Gomorra.

<sup>12</sup>Nach gosa'aque', na' goseyixjue'ede' cheya'la' yesyetinje xto'la' benachen'.

<sup>13</sup>Leze besyebeje' da' xigüe' da' yo'o nyaz bene', na' zan bene' güe' goseyebene' set na' besyeyacde'.

**Gosote' Juan ben' bzoe' bene' nis**

(Mt. 14:1-12; Lc. 9:7-9)

<sup>14</sup>Na' ca' nac rey Herodes, gwnežde' can' chesone', le yogo'ze bene' gosende' can' ben Jesúsen'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'n nan' chaque chone' yela' guac.

<sup>15</sup>Yeba'le bene' gosene':

—Naque' ben' be' xtiža' Diosen' cani', ben' le Elías.

Na' yeba'le gosene':

—Naque' con to bene' choe' xtiža' Dios ca' bene' ca' gosoe' xtiža' Diosen' cani'te.

<sup>16</sup>Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' na'a ba bebane' ladjo bene' guaten'.

<sup>17-18</sup>Le Herodesen' beque'e Herodías na' gwzoalene' le' goque' xo'ole' la'czla'

Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen no'ol che bene' bišon'.

Da'nan' Herodesen' gwchogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

<sup>19</sup> Can' goc Herodíasna' bgue'ede' Juanna' na' goclaže' gote'ne', perw bi goc. <sup>20</sup> Le Herodesen' gwneзде' Juanna' naque' to bene' chon da' zej to licha na' to bene' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwejni'iteque Herodesen' dan' bšalj Juanna', con bebede' bzenague' che'.

<sup>21</sup> Perw Herodíasen' beyiljwlaže' nac bene' cate' ben Herodesen' lni goła' ža le', bšini'e xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'. <sup>22</sup> Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan chio' na' gonan'.

<sup>23</sup> Na' lecze gože'be':

—Diosen' naque' testigw chia' gona' le' con da' nabdo'nda', la' gašjo yež ca' gan' mbanda' chnabi'a.

<sup>24</sup> Na' bechojbe' na' gožbe' xna'ben':

—¿Bi nabda'ne'?

Na' le' gože'be':

—Gwnab yichj Juan ben' chzoe' bene' nis.

<sup>25</sup> Na' la' beyo'otebe' gan' chi' reyna' na' gožbe'ne':

—Che'nda' netecna'a gono' neda' to lo' platw yichj Juan ben' chzoa bene' nis.

<sup>26</sup> Na' ne late'ze bi gwyazlaže' reyna' gone' can' gož no'ol güegon' le', perw bačhle gwne' lao bene' ca' jasa'ac lnin' Diosen' naque' testigw che' gwnežjue'be' bite'teze nabebe' le', da'nan' bi bžone' gac

dan' gwñabebe' le'. <sup>27</sup> Nach la' gwseła'te reyna' to soldadw na' gože'ne' šjaxi'e yichj Juanna'. <sup>28</sup> Na' gwey soldadon' lo' yo'o ližyan' na' jačhogue' yen Juanna', na' bžie' yichje' to lo' platw jasanen' bnežjue' bi' no'ola', na' bi' nga bnežjwben' xna'be'.

<sup>29</sup> Cate' gosezeze bene' ca' zjanaque' txe' len Juanna', jasexi'e cuerp chen' cont bosocuaše'ne'.

**Jesúsen' bguagüe' gayo' mil bene'**

(Mt. 14:13-21; Lc. 9:10-17; Jn. 6:1-14)

<sup>30</sup> Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'. <sup>31</sup> Na' Jesúsen' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac bene', neca chac latje yesagüe'. <sup>32</sup> Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'. <sup>33</sup> Perw zan bene' besele'ede' gosa'aque' na' besyeyombi'e Jesúsen', na' zan yež bene' ca' bosoxonjsese' na' byobch besežine' ca' Jesúsen'. <sup>34</sup> Na' cate' Jesúsen' bchoje' lo' barcon' ble'ede' ba besežag bene' zan na' beyaše' beži'ilaže'de' legaque', le nite' ca nita' no xila' be nono de gwyoeba'. Nach gwzolaogüe' bsed blo'ede' legaque'. <sup>35</sup> Cate' ba zoa xin, bene' ca' zjanaque' le' txe' gose'ene':

—Ba zoa xin, na' latj gan' zoacho nga naquen latj daš. <sup>36</sup> Na' besela' bene' quinga cont šja'aque' ga že' bene' do ranšw na' do yež dao' ca' dan' nyečhj mbi'i šjasexi'e da' yesagüe', le bibi de yesagüe'.

<sup>37</sup> Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che' chop gayoa ža žin cont šjaxi'to' da' güe'to' legaque' yesagüe'.



38 Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenezde' na' gose'ene':

—De gayo' yetextil na' yechop beł ya'a.

39 Nach gože' bene' ca' yesebi'e to xonj güeje' lo yixyen'. 40 Na' gosebe' to gayoa güeje' na' yebale' šiyon güeje'. 41 Nach Jesúsen' gwxi'e yetextil ca' gayo' na' beł ya'an chope, na' gwn'e'e le'e yaba bi'e yeł'a choxcen che Dios na' bzoxje' yetextilen' bi'en bene' ca' zjanaque' le' txen cont goseyisen' len bene' ca'. Leze gwdis'e beł ya'a ca' chop lao yogo'lol bene' ca'. 42 Na' yogüe' gosagüen' na' goseljde'. 43 Beyoža' bososše'e yešizınw žome yetextil bixjw na' len late' güeje beł da' bega'an. 44 Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

### Jesúsen' gwze'e lo nis

(Mt. 14:22-27; Jn. 6:16-21)

45 Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisdan' na' yesežine' Betsaida, šlac le' za' chesele' bene' ca' žena' ližgaque'.

46 Na' cate' beyož bzede' bene' ca' diža', gweje' lo ya'an boł güiže' Dios. 47 Na' ca' nac barcon', cate' goc choł ba zejen gachol nisdan', na' toze Jesúsen' ne' zie' ga' nac yo biž. 48 Na' ble'ede' bi chac yosyose'en binlo, le' ben' chechjen clele na' bi choen' latje sa' barcon'. Na' šbal' beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' 49 cate' besele'ede' le' chze'e lo nisen'. Na' gosacde' še da' chda chelen'. Na' bososye'e. 50 Le yogüe' besele'ede'ne' na' besežebe'. Perw le' la' boł güižte' legaque', gože'ne':

—Le gonchach laže'le; nedan', bitw žeble.

51 Nach gwyo'e lo' barcw gan' zjaya'ac bene' ca', nach gwche'ži ben'. Na' le-gaque' leca besyebande' na' besyežejde', 52 le bi gosejni'ide' dan' bene' yeł'a guac len yetextil ca', na' biņa' yesejnilaže' le'.

### Jesúsen' beyone' bene' güe' ca' že' Genesaret

(Mt. 14:34-36)

53 Na' goselague' nisdan' na' besežine' yežlio gan' nzi' Genesaret, na' bosocheje' barcon' cho'a nisdan'. 54 Na' cate' beyož besyechoje' lo' barcon' bene' ca' la' besyeyombia'te' Jesúsen'. 55 Na' ja'acsese' doxen gan' mbane Genesaret, na' do lo cam dao' zjanxoe' bene' güe' ca' jas-esane'ne' gan' zjanezde' zoa Jesúsen'. 56 Na' gate'teze gwey Jesúsen', do yixe', do yež, con goseyixjue' bene' güe' ca' do chanez na' goseneyoede' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

### Dan' chchoj lo' laždao' benačhen' chonon cont laždagüen' bi naquen xilaže' len Diosen'

(Mt. 15:1-20)

**7** Nach bene' fariseo ca' na' len bene' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsen'. 2 Na' besele'ede' bal' bene' ca' zjanaque' Jesúsen' txen con gosagüe' neca bosyone'e zan ni'a can' chesacde' cheyal'a yesone', na' da'nan' gosezi'diže' legaque'. 3 (Le bene' fariseo ca' na' yogo' bene' Israel gualaž cheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biņa' yosyone'e zan ni'a. 4 Na' cate' yesyežine' lagüe ya'a, bi yesagüe' še biņa' yosyone'e, na' da' zanch costumbr da' zjana'ogüe', ca' no yeseyibe' xiga' ga chese'eje' nis, no yeso' xguague, no yeso' ya' na' no xcame'.) 5 Nach bene' fariseo

ca' na' bene' ca' bososed bosolo'ede' dan' bzoj da' Moisésen' gosenabde' le':

—¿Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin cbi chosyone'e zan ni'a.

<sup>6</sup> Jesúsén' gože' legaque':

—Chonle cayanen' bzoj da' Isaíasen' che le'e nacle bene' gwxiye' gan' bzoje', žan':

Bene' qui chesonxene' neda' len diža' cho'a,  
perw bi chesonxene' neda' len lažda'ogaque'.

<sup>7</sup> Bibi zejen dan' chesonxene' neda', le dan' chososed chosolo'eden' naquen da' chnaláže' benačze.

<sup>8</sup> Bi chonle ca chnaláže' Dios, san na'ole can' ža benačhen' cheyała' gonle, chyible no yeso' xguague, no xiga' ga che'ejle nis, na' da' zanch da' chonle.

<sup>9</sup> Qui gožch Jesúsén' legaque':

—Chbejyichjle da' non Diosen' mandadw gonle cont na'ole costumbr che benač. <sup>10</sup> Da' Moisésen' gwne': "Le gap bala'an xaxna'le", na' "Note'teze' še chžia chnité' xaxne'e, cheyała' gate'." <sup>11</sup> Perw le'e žale to bene' guac ye'e xaxne'e: "Bibi de gona' gaclena' le'e, le yogo' da' de chia' naquen Corbán" (zeje diža', ba bnežjuen' lo na' Dios). <sup>12</sup> Na' žale cate' to bene' že' ba naquen lo na' Diosen' nach bich cheyała' gaclen xaxne'e. <sup>13</sup> Dan' žale ca' chzoale ca'ale dan' ža Diosen' na' con chonxenle costumbr gole che da' xoxxta'ole ca'. Na' da' zanch dan' nac ca' chonle.

<sup>14</sup> Da' yoble gox Jesúsén' bene' ca', na' gože' legaque':

—Yogo'le le gwzenag chia', na' le šejni'i. <sup>15</sup> Bite'teze da' ye'ej gagw benačhen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen

xilaže' len Diosen'. <sup>16</sup> Le'e žia nagle da' chene, le gwzenag xtiža'na'.

<sup>17</sup> Cate' bsan Jesúsén' bich bšaljlene' bene' ca' na' beyo'e lo' yo'o, nach bene' ca' zjanaque' le' txen gosenabde' le' bi zejen dan' gože' legaque'. <sup>18</sup> Na' Jesúsén' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw benačhen' chonen cont lažda'ogüe' bi naquen xilaže' len Diosen'? <sup>19</sup> Le da' che'ej chagw benačhen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'. <sup>20</sup> Na' lecze gwne':

—Xbab da' yo'o lo' yichjlaždao' benačhen', lenna' chonen cont lažda'ogaque' bi zjanaquen xilaže' len Diosen'. <sup>21</sup> Le lo' yichjlaždao' benačhen' chchoj xbab mal ca da' žan yesone' da' quinga: yesatalene' no'ole bi nac xo'olgaque' o bene' byo bi nac bene' čhegaque', gwzoa xtogaque', yesote' bene', <sup>22</sup> yesone' gwban, yesezelaže' gata' čhegaque' da' de che bene' yoble, yesone' da' mal, yeseziye'e bene', yesone' bichle da' nac da' yela' zto', yesacxi'ede' bene', yeseñey'e che bene', yesaque' bene' ya'laže', yesone' xbab da' bi zaca'. <sup>23</sup> Yogo' da' mal qui chesechojen lo' laždao' benač na' chonen cont bi nac lažda'ogaque' xilaže' len Diosen'.

### To no'ol zito' gwejniláže' Jesúsén'

(Mt. 15:21-28)

<sup>24</sup> Na' beza' Jesúsén' na' gwejeje' distritw gan' mbane ciuda Tiro na' ciuda Sidón. Na' gwyo'e to lo' yo'o na' gocláže' nono neze, perw bi goc gone' cont bi gosenezde'. <sup>25</sup> Cate' la' gwnezete xna' to bi' no'ole bi' yo'o nyazbe' da' xigüen', na' gwejeje' na' bzoa xibe' xni'a Jesúsén'. <sup>26</sup> No'olen' goque' bene' zito', no'ole Sirofenicia. Gwejeje' gwñabde'

Jesúsen' yebeje' da' xigüe' yo'o nyaz bi' no'ol chen'. <sup>27</sup> Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

<sup>28</sup> Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo yo.

<sup>29</sup> Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

<sup>30</sup> Cate' bežin ližen' ble'ede' de bi' no'ol daon' to lo cam, na' ba bechoj da' xigüen' yo'o nyazbe'.

### **Jesúsen' beyone' to bene' cuež, bene' lecze bi goc nie'**

<sup>31</sup> Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. <sup>32</sup> Na' jasesane' to bene' byo bene' cuež na' bi goc nie', na' gosenabe' xoa na' Jesúsen' yichje'.

<sup>33</sup> Nach Jesúsen' gwche'ene' late' lchojiže' ga nono bene' nita', na' bde' xbene' lo' nague' na' bži'en xene' na' gwdane' ložen'.

<sup>34</sup> Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

<sup>35</sup> Nach nag bena' besyeyaljon na' goc bende', na' lecze beyac ložen' na' goc gwnie' binlo. <sup>36</sup> Na' Jesúsen' gože' bene' ca' nono yese'e ca', perw la'czla' gože' le-gaque' ca', nachle goso'e diža' can' goca'.

<sup>37</sup> Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

**Jesúsen' cho'e da' chagw tap mil bene'**

(Mt. 15:32-39)

**8** Ca tiempa' besežagchgua bene' zan na' bibi de yesagüe'. Nach Jesúsen'

goxe' bene' ca' gwleje' cont zjanaque' txen len le' na' gože' legaque':

<sup>2</sup>—Cheyaše'da' bene' qui, le ba goc šone ža zjanite' nga len neda' na' bibi de yesagüe'. <sup>3</sup>Še yesela'ne' ližgaque' na' bina' yesagüe', chanez yesego'one' yesechold'e, le ba'e za'aque' zito'.

<sup>4</sup>Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

<sup>5</sup>Na' Jesúsen' gwnabde' legaque':

—¿Gaca' yetextilen' de chele?

Na' legaque' gose'ene':

—Gažen.

<sup>6</sup>Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxcen che Dios, nach bzojxen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'. <sup>7</sup>Leze zjano'e to chop bel ya'a, na' Jesúsen' be'e yela' choxcen che Diosen' che bel ya'a ca' na' leze goseyisen' che yogo'lol bene'. <sup>8</sup>Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an. <sup>9</sup>Bene' ca' gosagon' zjanaque' ca' do tap mil bene'. Cate' ba besyedagüe', Jesúsen' gože' legaque': —“Nayežagcho”, <sup>10</sup>na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

### **Bene' fariseo ca' gosaclaže' gon Jesúsen' to yela' guac da' yesele'ede' le'e yaba**

(Mt. 16:1-4; Lc. 12:54-56)

<sup>11</sup>Na' bene' fariseo ca' gosezolagüe' chesediłdiže' len Jesúsen'. Na' da' gosaclaže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'. <sup>12</sup>Jesúsen' bebanchgüede' na' gwne':

—Ba ble'ele chona' yeł'a guac. ¿Bixchen' chñable to yeł'a guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

<sup>13</sup> Nach bcua'ane' legaque' na' beyo'e lo' barcon' beze'e beyeje' yešła'a nisaon'.

### Levadura che bene' fariseo ca'

(Mt. 16:5-12)

<sup>14</sup> Bene' ca' zjanaque' Jesúsen' txen gosanlaže' yeso'e da' yesagüe', na' totec yetextil zjano'e lo' barcon'. <sup>15</sup> Na' Jesúsen' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

<sup>16</sup> Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

<sup>17</sup> Jesúsen' gocbe'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Bina' šejni'ile, neca chacbe'ele? ¿Nac चाह lažda'olen' bi chejle'le? <sup>18</sup> ¿Bi chle'ele len yejlaole, neca chenele len nagle? ¿Bi chjayze'ele?

<sup>19</sup> Gwdisa' gayo' yetextil na' goquen che gayo' mil bene', na' ¿bi chjayze'ele yebałe žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

<sup>20</sup> —¿Chixe caten' gwdisa' gaže yetextilen' lao tap mil bene'? ¿Yebałe žome gwža'te dan' botoblen'?

Na' gosene':

—Gaže žomen'.

<sup>21</sup> Nach gože' legaque':

—¿Bina' šejni'iczele na'a cho'a diža' che dan' chososed chosolo'e bene' fariseo ca'?

### Jesúsen' beyone' to bene' lchoł bene' Betsaida

<sup>22</sup> Gwdechle besežine' Betsaida na' jasesane' to bene' lchoł lao Jesúsen', na' gosata'yoede' le' yeyone' le'. <sup>23</sup> Na' bexue' taca' bene' lchoł'a na' gwleje'ne' yež. Nach gwdebe' xene' yejlagüen' na' gwxo'a taquen' yichje' na' gwñabde'ne' še chle'ede' late'. <sup>24</sup> Bene' lchoł'a gwne'e na' gwne':

—Chle'eda' bene', na' chle'eda'ne' ca' yag, perw chesa'aque'.

<sup>25</sup> Nach Jesúsen' bexo'a taque' yejlagüen' da' yoble, na' gwña'yane' ben' na' beyaque', bele'etede' yogo' binlo.

<sup>26</sup> Nach Jesúsen' besele' le' liže', gože'ne':

—Bi yeyo'o lagüe yežen', neca no yo'o da' nga.

### Pedron' gwne' Jesúsen' naque' Cristo ben' gwlej Diosen' cont nabi'e

(Mt. 16:13-20; Lc. 9:18-21)

<sup>27</sup> Gwdena' gwyej Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwñabde' bene' ca' zja'aclen le':

—¿Bi chesena bene'? ¿Non' naca' neda'?

<sup>28</sup> Legaque' gose'ene':

—Bałe' chesene' naco' Juan ben' bzoa bene' nis, yebałe' chesene' naco' Elías, na' yebałe' chesene' naco' yeto bene' be' xtiža' Dios cani'.

<sup>29</sup> Na' gwñabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

<sup>30</sup> Nach Jesúsen' gože' legaque' nono yese'e ca'.

**Jesúsen' gwdixjue'ede' gate'**

(Mt. 16:21-28; Lc. 9:22-27)

<sup>31</sup> Na' gwzola'o Jesúsen' bzejni'ide' le-gaque' can' gac chen', gože'ne':

—Da' zan da' saca'zi'a neda' naca' ben' gwsela' Diosen' golja' beṇačh. Na' bene' blao' chesenabia' naci'ón che-chon' na' bxož gwnabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

<sup>32</sup> Da' nga gwnen' zaca'laon. Na' Pedron' gwche'e Jesúsen' ga nac lchojže' na' gwzola'güe' chdile' le' dan' gwne' ca'.

<sup>33</sup> Perw Jesúsen' gwyečhje' na' gwne'e bene' ca' zjanaque' le' txen, na' gwdile' Pedron', gože'ne':

—¡Gwcuase ca'ale Satanás! Bi nsa'o xbab che Diosen' san nsa'o xbab che beṇačh.

<sup>34</sup> Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gague' neda' txen, cheya'la' chojyichj cuine', la'czla' saca'zi'e, na' gone' can' nia' neda'.

<sup>35</sup> Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne' chia' neda' o neče xtiža' Diosen', ba de yela' mban che' toli' tocane. <sup>36</sup> ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli' tocane? <sup>37</sup> Le bi zoa nacle gon beṇačhen' chixjue' cont gata' yela' mban che' toli' tocane. <sup>38</sup> Bene' ca' že' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lečeze ca' neda' yeto'eda' che' par nia' naque' neda' txen, neda' naca' ben' gwsela' Dios golja' beṇačh. Yeto'eda' che' cate' yida' da' yoble nsa'a yela' zaca'

juisyw che Xa' Diosen' na' nchia' bene' ca' zjanac angl che'.

**9** Leče gož Jesúsen' legaque':  
—Da' li žia' le'e, balle nita'le nga na'a bina' gatle cate' žin ža le'ele Diosen' gwlo'e yela' guac xen chen' can' chnabi'en'.

**Bša' Jesúsen' ca goque'**

(Mt. 17:1-13; Lc. 9:28-36)

<sup>2</sup> Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'. <sup>3</sup> Xa'lane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xalanen'. <sup>4</sup> Na' conče besele'ede' da' Elías na' da' Moisés chosošalje' len Jesúsen'. <sup>5</sup> Nach Pedron' gože' Jesúsen':

—Maestro, jleca güenna' zoacho nga! Gonto' šone ranšw, to chio', to che Moisés, na' yeto' che Elías.

<sup>6</sup> Le bene' ca' zja'aclen Jesúsen' be-sežebchgüe', na' Pedroa' bi chacbe'ede' bin' že'. <sup>7</sup> Nach gwche' to bejw gan' niten' gwyečhjen legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

<sup>8</sup> Na' cate' gosen'e'e cue'ej cuiten' notno besele'ede', san toze Jesúsen' zie'.

<sup>9</sup> Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwsela' Dios golja' beṇačh, cana' güe'le diža' chen.

<sup>10</sup> Da'n'an' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'.

<sup>11</sup> Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoo

cani' cheyala' yide' da' yoble cate' za' yedenabia' ben' seła' Diosen'. ¿Bixchen' chesene' ca'?

<sup>12</sup> Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loł da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwseła' Dios golja' benačh? Žan saca'zi'a na' bene' zan bi yesejnilaže' neda'. <sup>13</sup> Na' žia' le'e, Elías ba bide' na' gosonde' le' con ca gosaclaže', can' nyoj le'e Xtiža' Diosen' žan can' cheyala' gac che'.

**Jesúsen' beyone' to  
bi' yo'o nyazbe' da' xigüe'**

(Mt. 17:14-21; Lc. 9:37-43)

<sup>14</sup> Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyechjde' legaque', na' len bene' ca' chososed chosolo'ede' dan' bzoj da' Moisés chesediłdiže' len legaque'. <sup>15</sup> Na' cate' bene' ca' besele'ede' Jesúsen', yogüe' besyežejde' na' ja'acses'e bosoguape' le' tiox. <sup>16</sup> Nach gwnabde' legaque':

—¿Bin' chdiłdiža'le len bene' ca'?

<sup>17</sup> Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'. <sup>18</sup> Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwnaba' lao bene' qui zjanaque' le' txen yesyebje' da' xigüe' yo'o nyazbe', perw bitw gosaque'.

<sup>19</sup> Na' Jesúsen' gože' bene' ca' že'na':

—¿Le'e bene' bi chejnilaže'? ¿Šna chyažjen soalena' le'e cont šejnilaže'le? ¿Batca' zelao na'lagua' le'e? Le yedesambe' nga.

<sup>20</sup> Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbičbe' lo yo, chbič chtolbe' na'

chbia bžina' cho'abe'. <sup>21</sup> Nach Jesúsen' gwnabde' xaben':

—¿Bał iz ba goc chacbe' ca'?

Na' xaben' gwne':

—Cate' nacbe' bida'ote gwzolao chacbe' ca'. <sup>22</sup> Na' zan ni'a da' xigüen' chzalan' lebe' lo yi' na' lo nis cont goten lebe'. Da'nan' še guac yeyono'be', beyaše'sque neto' na' beyombe'.

<sup>23</sup> Jesúsen' gože'ne':

—Cheyala' šejnilažo' neda', le yogo' da' chzelaže' bene' chesejnilaže' neda' chaquen.

<sup>24</sup> Nach xaben' gwne' zižje:

—¿Chejnilaža' le', goclen neda' šejnilaže'cha'!

<sup>25</sup> Na' cate' Jesúsen' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'lo yichjlažda'oben'.

<sup>26</sup> Na' da' xigüen' benen ga bosya'abe' na' benen ga gwyazbe' ca' yeto šon, nach bechojen. Na' bin' bega'anbe' ca' bi' guat, na' zan bene' gosene' gotben'. <sup>27</sup> Perw Jesúsen' be'xue' taca'ben' cont beyasbe', nach gwzechabe'.

<sup>28</sup> Nach cate' Jesúsen' gwyo'e to lo' yo'o, bene' ca' zjanaque' le' txen gosebeje' le' ca' to lchojiže' na' gosenabde' le':

—¿Bixchen' bi' goc neto' yebejto' da' xigüen'?

<sup>29</sup> Na' gože'ne':

—Cont yechoj da' xigüen' nac ca' cheyala' gonle gwbas na' soatezle yol güižle Dios.

**Da' yoble Jesúsen' gwne' gate'**

(Mt. 17:22-23; Lc. 9:43-45)

<sup>30</sup> Cate' besyeya'aque' na', besyedie' distritw Galilea. Na' Jesúsen' goclaže' nono yeseneze, <sup>31</sup> le' chzejni'ide' bene' ca' zjanaque' le' txen, che'e legaque':

—Nedan' naca' ben' gwsela' Dios golja' beṇaḥ, yosodie' neda' lo na' beṇe' yesote'nda', perw yeyon' ʒa yebana' ladjo beṇe' guat ca'.

<sup>32</sup>Perw bi gosejni'ide' bin' gože' le-gaque', na' besežebe' yesenabde'ne'.

**Gosedilḍiže' gosene'  
noen' nac beṇe' blaoch**

(Mt. 18:1-5; Lc. 9:46-48)

<sup>33</sup>Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gwnabde' legaque':

—¿Bixchen' chdilḍiža'le chanez?

<sup>34</sup>Perw con gosenite' šižize, le chanezan' gosedilḍiže' gosene' noen' nac beṇe' blaoch. <sup>35</sup>Nach Jesúsen' gwchi'e na' goxe' beṇe' šižinw ca' zjanaque' le' txen, na' gože' legaque':

—Še no le'e chaclaže'le gacle beṇe' žialao, cheyała' gonle' xbab bibi zaca'teclē, na' cheyała' gon cuinle' ca xmos yogo' beṇe' lježle.

<sup>36</sup>Nach beṇue' to bidao' na' bzeche'be' gachol' legaque', na' gwlene'be' na' gože' legaque':

<sup>37</sup>—Note'teze beṇe' chone' güen len to bidao' ca bi' nga neče' da' chejni-laže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

**Bene' bi chon chio' contr,  
txencza' chone' chio'**

(Mt. 10:42; Lc. 9:49-50)

<sup>38</sup>Nach Juanna' gože'ne':

—Maestro, bežagto' to beṇe' cho'e lao' na' chebeje' da' xigüe' da' yo'o nyaz bene', na' bžonto' gone' ca', le bi chone' chio' txen.

<sup>39</sup>Na' Jesúsen' gwne':

—Bi gwžonle' gone' ca', le gague' zoa to beṇe' gone' yela' guac cho'e lan', yeyoža' ne' yela' ya' chia'. <sup>40</sup>Le beṇe' bi chone' chio' contr, txencza' chone' chio'. <sup>41</sup>Chnia' le'e to da' zejen, note'teze beṇe'

gone' le'e la' to xiga'ze nis da' ye'ejle neče' chejni-laže' neda' na' neče' nezde' le'e nacle' txen len neda', Diosen' gone' cont soacze' mbalaz da' ba goclēne' le'e.

**Bitw co'yela'cho beṇe' gone' da' xinj**

(Mt. 18:6-9; Lc. 17:1-2)

<sup>42</sup>Note'teze beṇe' chon cont lažo' to beṇe' za' gwzolaḡüe' chejni-laže' neda' gone' da' xinj, yejni'acle' yosočeje' yene' to yiše' xen na' yosozale'ne' lo' nisdaon' clēl ca da' gone' cont lažo' beṇe' yoble gone' da' xinjen'. <sup>43</sup>Na' še yena'len' chonen cont gonle' da' xinj, cheyała' cuejyichjle' da' malen' chonle'. Yejni'a bibi na'le' zoa clēl ca gonle' da' xinjen' len len. Na' yejni'a šjayzoale' len Diosen' toli' tocane' bi zoa šla'a taca'le' clēl ca yeyejle' lo' yi' gabil' dan' bi' cheyol' chēnit nya' cuerp' chēlen'. <sup>44</sup>Na' gabilen' neca' chesat' bzogan', neca' cheyol' yin'. <sup>45</sup>Na' še ni'alēn' chonen ga gonle' da' xinj, lecze' cheyała' cuejyichjle' da' malen' chonle'. Yejni'a bibi ni'alēn' zoa clēl ca gonle' da' xinjen' len len. Na' yejni'a šjayzoale' len Diosen' toli' tocane' bi zoa šla'a ni'alēn', clēl ca yeyejle' lo' yi' gabil' dan' bi' cheyol' chēnit nya' cuerp' chēlen'. <sup>46</sup>Na' gabilen' bzoga' ca' bi chesatba', neca' cheyol' yin'. <sup>47</sup>Na' še yejlaolen' chonen cont gonle' da' xinj, cheyała' cuejyichle' da' malen' chonlen'. Yejni'a bibi yejlaolen' žia' clēl ca gonle' da' xinjen' len len. Na' yejni'a šjayzoale' len Diosen' toli' tocane' zoa šla'a'ze' yejlaole' clēl ca yežinle' lo' yi' gabilen' žia' chop' la'a yejlaolen'. <sup>48</sup>Ca' nac gabilen', bi chesat' bzogan', neca' cheyol' yin'.

<sup>49</sup>Le' dan' chy' chzaca'le' yežlio' nga chzejni'in' le'e cont bi yeyejle' lo' yi' gabil'. Na' da' chy' chzaca'le' zaca'leben' ca zede' da' cheyała' chixē' yezj' yogo' ni'a cate' chjasesane' yezj' lao' Diosen'. <sup>50</sup>Na' zeden' naquen' güen, perw še bich' bi zxi' naquen, žnacxe' goncho' cont yeyaquen' zxi' da' yoble? Na' le'e cheyała' gwyo' gwčhejlaže'le' dan' chy' chzaca'le' na'

cheyala' soale binlo tole yetole, na' še soale ca', zaca'leble ca to yela' guagw da' yo'o zede'.

**Jesúsen' bzejni'ide' bi cheyala'  
yela'acho len no'ol checho**

(Mt. 19:1-12; Lc. 16:18)

**10** Jesúsen' beze'e Capernaum na' gwyejche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'. <sup>2</sup>Nach bał bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya chol, na' gosenabde'ne' še guac to bene' yele'e len no'ol che'. <sup>3</sup>Na' Jesúsen' boži'e xtižen', gwne':

—Ca nac dan' bzoj da' Moisésen', ¿nac bene' mandadw gonle?

<sup>4</sup>Legaque' gosene':

—Moisésen' gwne' cate' to bene' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

<sup>5</sup>Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'.

<sup>6</sup>Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: “Bene' legaque', to bene' byo na' to no'ole.” <sup>7</sup>“Da'n'an' bene' byon' gwsane' xaxna'e cont soalene' no'ol chen', <sup>8</sup>na' chope' yesaque' ca toz bene'.” Na' ca' bich yesac chope' san toze'. <sup>9</sup>Da'n'an' bi cheyala' yesyele'e, le Diosen' ba bcode' legaque'.

<sup>10</sup>Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'. <sup>11</sup>Na' Jesúsen' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca naquen šaca' gata'lene' no'ol che bene' yoble. <sup>12</sup>Na' še no'olen' chsane'

bene' chen' na' cheque'e bene' yoble, lecze toz can' nac da' xinj da' chonen'.

**Jesúsen' gwñabde' Diosen' gac  
güen che bidao' ca' besežag**

(Mt. 19:13-15; Lc. 18:15-17)

<sup>13</sup>Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedile' bene' ca' zjanche'ebe'. <sup>14</sup>Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogaque'. <sup>15</sup>Da' li žia' le'e, note'teze bene' cheyala' yosozenague' che Diosen' ca cheson bidao' cate' chosozenagbe' che xaxna'be', le bene' bi yosozenague' ca', gwbat nabia' Diosen' yichjlažda'ogaque'.

<sup>16</sup>Nach gwłene' to to bidao' ca' na' gwñabde' Diosen' gac güen chebe', gwxoaxa taquen' yichjbe'.

**To bene' güego' bšaljlene' Jesúsen'**

(Mt. 19:16-30; Lc. 18:18-30)

<sup>17</sup>Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwñabde'ne':

—Maestro, le' naco' bene' güen. ¿Bi cheyala' gona' cont gata' yela' mban chia' toli tocané'?

<sup>18</sup>Jesúsen' gože'ne':

—¿Bixchen' žo' naca' bene' güen? Toze bene' güen zoa, na' len' Dios. <sup>19</sup>Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježle; bi siye'le bene'; le gap bala'an' xaxna'le.”

<sup>20</sup>Na' boži'e xtižen':



—Maestro, yogo' da' quinga chzenaga', gwzolagua' chonczan' cate' ne' nactia' bidao'.

<sup>21</sup> Jesús'en' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

<sup>22</sup> Na' cate' bene ben' dan' gwna Jesús'en', godde' leca zdebe naquen gone' can' gože'ne', na' beza'yaše', le bene' gwni'achgua goque'.

<sup>23</sup> Nach Jesús'en' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

<sup>24</sup> Na' bene' ca' zjanaque' le' txen besyebande' can' gwnen', perw Jesús'en' gože'e legaque':

—Xi'ina', bene' chesacde' zaca'chgua yela' gwni'a chegaquen', leca zdebe naquen yosozenague' che Diosen' cont nabi'e yichjlažda'ogäquen'. <sup>25</sup> Bedao'ch te to be xen be nzi' camello to lo' nag yeše' clal ca to bene' gwni'a gwzenague' che Dios cont Diosen' nabi'e yichjlažda'ogüe'.

<sup>26</sup> Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

<sup>27</sup> Jesús'en' gwne'e legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' nacho da' bi gac gon Dios.

<sup>28</sup> Nach Pedron' gože'ne':

—Neto' ba gwlejšyichjto' yogo' da' de cheto' cont nacto' le' txen.

<sup>29</sup> Jesús'en' boži'e xtižen':

—Da' li žia' le', note'teze bene' ba gwlejšyichje' liže', bene' biše', zane', xe', xne'e, no'ol che', xi'ine', o yežlio che' ne chia' neda' na' neche chzenague' xtižan', <sup>30</sup> yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli tocañe. <sup>31</sup> Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

**Da' yoble Jesús'en' gwne' yesote'ne'**

(Mt. 20:17-19; Lc. 18:31-34)

<sup>32</sup> Zjangüe'e nez zja'aque' bso dan' zoa gala'ze Jerusalénna' na' Jesús'en' žialagüe' lao bene' ca' zjanaque' le' txen. Legaque' chesyebande' na' do cheseže-bze' zjana'ogüe' le'. Nach da' yoble Jesús'en' goxe' bene' šižinw ca' ca'ale ga nac lchojiže' na' gože' legaque' can' gac chen'. <sup>33</sup> Gože'ne':

—Na'a ba zejcho Jerusalén gan' yesone' neda' lo na' bxoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwsela' Dios golja' benach. <sup>34</sup> Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo bene' guat ca'.

**Jacobo na' Juan gosenabe' to goclen lao Jesús'en'**

(Mt. 20:20-28)

<sup>35</sup> Nach Jacobo len Juan, bene' ca' zjanac xi'in Zebedeo, gosebigue' cuit Jesús'en' na' gose'ene':

—Maestro, chaclaže'to' gono' to goclen da' nabto'.

<sup>36</sup> Na' gwñabe Jesús'en' legaque':

—¿Bi che'nele gona'?

<sup>37</sup> Na' gose'ene':

—Ben cont cue'to' šla'a güeje cuito'na' cate' solao nabi'o.

<sup>38</sup> Nach Jesúsen' gože'ne':

—Le'e cabi nezele bi dan' chñable. ¿Gwchejlaže'le tele yela' zi' yela' ya' ca dan' tia' neda' na' gac chele can' gac chia'?

<sup>39</sup> Legaque' gose'ene':

—Gwchejlaže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'.

<sup>40</sup> Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen che'.

<sup>41</sup> Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'. <sup>42</sup> Perw Jesúsen' goxe' yogüe' cont gosebigue' laogüen' na' gože' legaque':

—Nezeczele bene' zjambeje' cont chesenabi'e to to nación na' bene' blao ca' chesone' byen chosozenag bene' chegaque'. <sup>43</sup> Perw bi naquen ca' len le'e. San note'tezle chaclaže'le gacle bene' blao, cheyala' gwzexjwlaže'le gaclenle bene' lježle. <sup>44</sup> Na' note'tezle chaclaže'le gacle bene' žialao, cheyala' gon cuinle ca xmos yogo' bene' lježle. <sup>45</sup> Le lencze neda', gwseła' Diosen' neda' golja' benach, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neche xtoła' benachen'.

### Jesúsen' beyone' to bene' lchoł ben' gože' Bartimeo

(Mt. 20:29-34; Lc. 18:35-43)

<sup>46</sup> Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchoł chanez chñabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo. <sup>47</sup> Na'

bene' lchoła' cate' gocbe'ede' gwde Jesús bene' Nazaret gan' chi'ena', gwzologüe' gwne' zižje gwne':

—¡Jesús, xi'in diaža che da' rey David, beyaše'laže'sca neda'!

<sup>48</sup> Bene' zan gosedi'e le' cont bich yosye'e, perw bosya'adiache' gwne':

—¡Xi'in diaža che da' rey David, beyaše'laže'sca neda'!

<sup>49</sup> Nach Jesúsen' gwleze' na' gwne':

—Le gaxe'.

Nach gosaxe' bene' lchoła' na' gose'ene':

—Benchachlažo', gwzoža', le chaxe' le'.

<sup>50</sup> Nach gwcho'one' lache' da' nřoa cože' na' bxite' jabigue' lao Jesúsen'.

<sup>51</sup> Nach Jesúsen' gwnabde' le':

—¿Bi chaclažo' gonda' le'?

Bene' lchoła' boži'e xtižen':

—Maestro, che'nda' yele'eda'.

<sup>52</sup> Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlagon'.

Na' la' bele'ete bene' lchoła', na' gwda'ogüe' Jesúsen'.

### Jesúsen' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

**11** Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' txen mandadw, <sup>2</sup> gožgaque'ne':

—Le šja'ac yež dan' chi' gała'ze, na' cate' žinlen' na' yeželele to burr dao' da'ba' yag be nono na' cuia. Le sežba' na' le che'ba' nga. <sup>3</sup> Na' še no chñab bichen' chonle ca', le ye'e: “Xanto' chyažjde'ba'”, na' la' gwzantecze'ba'.

<sup>4</sup> Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

<sup>5</sup> Na' bał bene' ca' nita' na' gose'ene':

—¿Bixen' chonle? ¿Bixchen' chsežle burron'?

<sup>6</sup>Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseche'eba'. <sup>7</sup>Nach goseche'e burron' lao Jesúsen' na' gosoexo xagaque' cože'ban' na' gwžia Jesúsen' leba'. <sup>8</sup>Na' bene' zan gosonxene' Jesúsen' goseyixjw no xagaque' lo nez cont blej burron' len na' yeba'e' gosechogue' zoze' yag na' goseyixjuen' lo neza'.

<sup>9</sup>Bene' zjažialao na' lecze bene' za'ac cože' gosezolağüe' bososye'e, gosene':

—¡Leca zaca'chgua benga! ¡Mbalaz ben' za' nga nse'la' Xancho Diosen' le' cont nabi'e! <sup>10</sup>¡Mbalaz ye'la' gwnabia' che' da' nse'e, le' nabi'e ca da' xozxta' ocho David! ¡Leca zaca'chgua Dios ben' zoa yaban'!

<sup>11</sup>Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lo' da' de na', beyeje' Betania len bene' šižinw ca' ba gwleje' cont zjanaque' le' txen, le ba zoa ga'.

### Jesúsen' gwne' gacxi'a yag yixgüigw da' bibi žia

(Mt. 21:18-19)

<sup>12</sup>Beyečj ža cate' besyeya'aque' Betania, Jesúsen' gwdone'. <sup>13</sup>Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'. <sup>14</sup>Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' txen gosende' can' gwnen'.

### Jesúsen' bešaše' bene' ca' cheson ya'a chyo'o yodaon'

(Mt. 21:12-17; Lc. 19:45-48; Jn. 2:13-22)

<sup>15</sup>Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzolağüe' bešaše' bene' ca' chesote' na' bene' chesa'o na'. Na' bchix'e' xmes bene' ca' chosoša' mechw na' yag ga'

chesebe' bene' ca' chesote' ngolbex. <sup>16</sup>Na' bi be'e latje yesexoa xnez bene' zjanao' yoa' chyo'o yodaon'. <sup>17</sup>Na' bsd blo'ede' bene' ca' že' na', gože'ne':

—Nyojczy Xtiža' Diosen' žan: “Yesene' ližan' naquen latje gan' šja'ac bene' yogo' nación yoso' güiže'nda'”, perw le'e ba ben'len ca to latje ga že' bene' gwban.

<sup>18</sup>Na' bžoz gwnabia' ca' na' bene' ca' chososed chosolo'e dan' bžoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' bene' besyežejde' can' bsd blo'eden'. <sup>19</sup>Perw na' cate' gol, Jesúsen' beze'e ciudan'.

### Gwbiž yag yixgüigon'

(Mt. 21:20-22)

<sup>20</sup>Beyečj ža šezil, gosodie' na' be-sele'ede' yag yixgüigon' ba gwbižen' lente loen. <sup>21</sup>Nach Pedron' jayze'ede' na' gože' Jesúsen':

—Maestro, gwna' yag yixgüigw dan' gwnao' gacxi'an, ba gwbižen.

<sup>22</sup>Jesúsen' boži'e xtižen':

—Le šejnilaže' Dios. <sup>23</sup>Da' li žia' le'e, note'teze bene' ye'e ya'a nga: “Gwcuase nga na' jayzoa lo' nisdao'”, še bi chacže-jlaže' lo' yichjlažda'ogüe', san chejnilaže' Diosen', guacczen. <sup>24</sup>Da'nana' žia' le'e, yogo'te da' nable cate' cho' güižle Dios, le šejle' guaqueczen, na' le gacczen. <sup>25</sup>Na' cate' cho' güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xtola'le. <sup>26</sup>Perw še le'e bi yezi'xenle che bene', Xacho Dios bene' zoa yaba bi yezi'xene' che xtola'le.

### Ye'la' gwnabia' che Jesúsen'

(Mt. 21:23-27; Lc. 20:1-8)

<sup>27</sup>Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bžoz gwnabia' ca' na' bene' ca' chososed chosolo'e dan' bžoj da'

Moisés na' len bene' gole blao' ca' chesen-  
abi'e naciōnna'. <sup>28</sup> Na' gosenabde' le':

—¿Bi yela' gwnabia' napo' chono' da'  
qui? ¿No ben yela' gwnabian' cont  
chonon'?

<sup>29</sup> Jesús'en' boži'e xtižen', gwne':

—Leze de to da' nabda' le'e na' še  
yoži'ile xtižan', nach nia' le'e bi yela'  
gwnabia' chonlendan'. <sup>30</sup> ¿No gwsela'  
da' Juanna' bzo'e bene' nis? ¿Dios nan'  
gwsele'ne' še benachen'? Le yoži'i xtižan'.

<sup>31</sup> Nach legacze' gose' lježe':

—Še ye'chone' Dios gwsele' le', na'  
ye'e chio: “¿Bixchen' ca gweyje'le che'?”

<sup>32</sup> Bi gac ye'chone' benačh gwsela' le'.

Gosene' ca' da' besežebe', le yogote  
bene' že' na' gosejle'e Diosen' gwsele' da'  
Juanna' be'e xtiže'na'.

<sup>33</sup> Nach gose'e Jesús'en':

—Bi nezeto'.

Nach Jesús'en' gože' legaque':

—Lecze neda' bi yapa' le'e bi yela' gwn-  
abian' chonlenda' da' ca'.

### Jempl che bene' güen žin ben' gosaque' bene' mal

(Mt. 21:33-46; Lc. 20:9-19)

**12** Nach Jesús'en' gwzologüe'  
choe'lene' legaque' diža' chzoe'  
jempl, na' gože' legaque':

—Gwzoa to bene' gože' to cue' xen yag  
uvas na' gwlo'en le'ej. Na' bene' to ga  
yesešie' uvasen' cont choj xisen', na' bene'  
yeto da' sibe ca to campanario ga yese-  
cua' bene' yosogüia yese'ne'e yag ca'.

'Nach bcua'ane' yežlion' lo na' bene'  
yesonši'e yag uvasen', na' gwze'e gweyje'  
zito'. <sup>2</sup> Na' cate' bžin ža yosyotobe'  
cosešen', gwsele' to xmose' lao bene'  
ca' nac lo na'gaque' yag uvasen' cont  
yosonežjue'ne' to tlaw coseš dan'  
yeseze'ien. <sup>3</sup> Perw na' bene' ca gosezene'  
mosen' gosot goseyine'ne', na' to ga'alze'  
bosyose'ene' bibi goso'ene'. <sup>4</sup> Nach xan  
yežlion' da' yoble gwsele' yeto xmose';  
perw benga bosožie'ne' yej, gosone' güe'

yichje' na' gosonde' le' zgot. <sup>5</sup> Nach xan  
yežlion' gwsela'che' yetoe', na' benga  
gosottecze'ne'. Gwdena' gwsela'che'  
bene' zan, na' bale' gosot goseyine' le'  
na' yebale' gosottecze'ne'.

<sup>6</sup> 'Ne' zoa yeto bene' bina' sele', bena'  
xi'ine' bene' chacchgüede', na' bzebte  
gwsele' le', le bene' xbab: “Yesezi'e  
xtižen'.” <sup>7</sup> Perw bene' ca' gose' lježe':  
“Bengan' yega'anlene' yežlio nga  
cate' gat xen'. Le da gotchone' cont  
yega'anlenchon.” <sup>8</sup> Na' gosezene'ne',  
gosote'ne', na' besyebeje' cuerp chen'  
gan' že' yag ca', bosozalen' ga yoble.

<sup>9</sup> Nach Jesús'en' gwnabe':

—¿Bi chaquele? ¿Nacxe gon xan  
yežlion' len bene' ca' bocua'anlene' yag  
uvas chen'? Šeje' šjetoe' legaque', na' yo-  
die' yežlion' lo na' bene' yoble.

<sup>10</sup> '¿Bina' gwlable ga nyoj Xtiža'  
Diosen'? žan quinga:

Yej dan' bi gosaclačže' bene' güen yo'o ca'  
yosochine',  
len ba naquen yej squin.

<sup>11</sup> Da' nga ben Xancho Dios, na' naquen  
to da' yežejecho.

<sup>12</sup> Nach gosaclačže' yesezene' Jesús'en',  
le gosacbe'ede' be'e jemplna' neče  
dan' bi chesejnilaže' le'. Perw besežebe'  
še bi yesone bene' ca' nžaguen'  
legaque', da'nan' bosocua'ane'ne' na'  
besyeya'aque'.

### Ca nac che dan' cheyala' gaxjw

(Mt. 22:15-22; Lc. 20:20-26)

<sup>13</sup> Gwdena' gosesele' bal bene' fariseo  
na' bal bene' ca' goseda' Herodes cont  
yesebeje' Jesús'en' diža' da' yosode'ede'  
cont yesagüe' xya che'. <sup>14</sup> Bene' ca'  
ja'aque' na' gose'ene':

—Maestro, nezeto' zoatezo' cho'o diža'  
li na' bi chono' cuent bi ža bene', le  
toze can' chono' len note'teze bene'. Na'  
nezeto' diža' li cho'o chsed chlo'edo'  
bene' can' chazlačže' Diosen' goncho.  
Da'nan' zedenabeto' le' žnaquen binlo

no chixjo da' cheyała' chixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi chixjwton'?

<sup>15</sup> Jesús'en' gocbe'ede' gague do lažen' chese'ene' ca', san chesaclaže' yesonlede' le' len xtiža'gaquen', nach gože'ne':

—¿Bixchen' chaclaže'le yoslažo'le neda' len xtižan'? Le gon neda' to mechw cont ña'an.

<sup>16</sup> Na' goso'enen', na' cate' ble'eden' na' Jesús'en' gwnabde' legaque':

—¿No lao dan' da' le'e mechw nga? na' ¿no la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

<sup>17</sup> Nach Jesús'en' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

### **Gosenabde' le' bi zejen dan' yesyeban bene' guat ca'**

(Mt. 22:23-33; Lc. 20:27-40)

<sup>18</sup> Nach besežin bał bene' saduceos gan' zoa Jesús'en'. Bene' ca' chesene' bene' guaten' bich yesyebane'. Nach gosenabde' le', gose'ene':

<sup>19</sup> —Maestro, da' Moisés'en' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyała' yošagna'lene' no'ol güezeba' cont yesenita' xi'in diaža che da' bišen'.

<sup>20</sup> Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>21</sup> Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. <sup>22</sup> Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'loł bene' ca', ca beyožen got len no'ola'. <sup>23</sup> Gož neto', cate' yesyebane' ladjo bene' guat ca' ¿nox bene' ca' soa-

lene' no'ola' ca' xo'ole'? le yogo' bene' gaža' bosošagna'lene' le'.

<sup>24</sup> Nach Jesús'en' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'.

<sup>25</sup> Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca' angl bene' zjazoa yaba. <sup>26</sup> Na' ca' nac dan' yesyeban bene' guat ca', ¿bina' gwlable gan' bzoj da' Moisés, can' gož Diosen' le' caten' bol güiže'ne' to lo yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.” <sup>27</sup> Bene' guat ca' bi chesonxene' Diosen', san bene' zjamban. Na' ca' nac le'e, leca clelen' chonle xbab.

### **Da' nac da' žialao da' cheyała' goncho**

(Mt. 22:34-40)

<sup>28</sup> Leze bžin to bene' bsd blo'ede' ley dan' bzoj da' Moisés, bene' bende' caten' chesežeše' len Jesús'en', na' nezde' boži'icze Jesús'en' xtiža'gaquen' binlo. Na' bena' gwnabde'ne':

—¿Non' nacch da' žialao da' zjanyojen da' ža Diosen' cheyała' goncho?

<sup>29</sup> Jesús'en' boži'e xtižen' gože'ne':

—Da' nga nacch da' žialao lao yogo'lołen, žan: “Le gwzenag bene' Israel gualaž chia', toze Xancho Dios naque' bene' zaca' gonxench. <sup>30</sup> Da'nana' cheyała' gaquecho Xancho Diosen' con ca' zelao chejni'icho, do yichj do laže'cho, do fuerz valor checho.” Lenna' naquen da' žialao lagüe da' ca' ža Diosen' cheyała' goncho. <sup>31</sup> Na' da' gwchopen' zejgałan' ca', gan' žan: “Cheyała' gague lježcho ca' chaque cuincho.” Bich bi de da' že' cheyała' goncho da' zaca'ch ca' da' qui.

<sup>32</sup> Nach ben' chsed chlo'e dan' bzoj da' Moisés'en' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxenchone', na' noch no zoa bene' zaca'ch ca le'. <sup>33</sup> Na' še gaguecho Dios, con ca zelao chejni'icho, do yichj do laže'cho, do fuerz valor checho, na' gague lježcho ca chaque cuincho, lenna' zaca'chen ca yogo' da' choncho chotcho no beyixe' na' chzeychoba' chonxencho Diosen'.

<sup>34</sup> Nach cate' gocbe'e Jesúsen' boži'icze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'oguoñ'.

Na' ne yetoe' bich beseyaxjde' bichle yesenabde' Jesúsen'.

**Criston' naque' xi'in  
diaža che da' rey David**

(Mt. 22:41-46; Lc. 20:41-44)

<sup>35</sup> Jesúsen' bsd blo'ede' chyo'o yodaon', gwne':

—¿Nacxečen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David? <sup>36</sup> Cuin Daviden' gwne' can' blo'e Spiritw che Diosen' le':

Xancho Dios gože' Xanan':

“Gwche'edo' cuita' nga nabi'acho txen, na' gona' cont yogo' no chesegue'e le' yosozexjw yichje' yosozenague' chio'.”

<sup>37</sup> ¿Nacxe gac nacho Criston' naque' xi'in diaža che da' David? le' cuin Davin' gože' le': “Xana”.

Na' zjanyanchgua bene' ca' chosozenag xtižen', na' besyebede' xtižen'.

**Jesúsen' bcuiše' bene' ca' chososed  
chosolo'e ley dan' bzoj Moisés**

(Mt. 23:1-36; Lc. 11:37-54; 20:45-47)

<sup>38</sup> Jesúsen' caten' chsed chlo'ede' le-gaque' gwne':

—Le gwsaca' cont bi gonle can' cheson bene' ca' chososed chosolo'e dan'

bzoj da' Moisés, le chesyebede' chesaše' zjanyaze' lache' ton, na' chesyebede' chesap bene' legaque' bala'an cate' chesyēzague' lagüe ya'a. <sup>39</sup> Chesyebede' chesebi'e gan' chesebe' bene' blao cate' chja'aque' yodao' na' cate' chac Ini. <sup>40</sup> Legaque' cheseque'e yo'o che no'ol güezeb ca', na' cate' chosol güiže' Dios, šša cheso'e diža' cont yesaque bene' leca chesonxene' Diosen'. Bene' can' yesacche' castigw clcl ca yezica'chle bene' güen da' xinj.

**To no'ol güezebe be'e  
Diosen' xmechue'**

(Lc. 21:1-4)

<sup>41</sup> Na' šlac zoa Jesúsen' chyo'o yodaon', gwchi'e gala'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwñi'a ca' chesegüe'e da' zcha'o mechw. <sup>42</sup> Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec. <sup>43</sup> Nach Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clcl ca yogo' bene' ca' chesego'o mechw lo' cajan', <sup>44</sup> le yogo' legaque' chesegüe'e da' checho'onen lo yela' gwñi'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

**Jesúsen' gwne' gwžin ža  
yosyočinje' yodao' blaon'**

(Mt. 24:1-2; Lc. 21:5-6)

**13** Cate' cheza' Jesúsen' yodao' blaon' to bene' ca' zjanaque' le' txen gože'ne':

—¿Maestro, gwña'šc catec xdan zjanac yej qui na' yo'o qui!

<sup>2</sup> Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca

yega'an zjancua' cože' lježen. Yogon' yosyočinje'.

### Can' gac cate' ba zoa yeyož yežlion'

(Mt. 24:3-28; Lc. 21:7-24; 17:22-24)

<sup>3</sup>Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, le-gaque' gose'ene' šižize:

<sup>4</sup>—Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

<sup>5</sup>Jesúsen' boži'e xtižen', gwne':

—Le gwsaca' cont nono siye' le'e. <sup>6</sup>Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

<sup>7</sup>'Na' cate' yenele chac gwdi'e nile nale, o yenele guac gwdi'e, bi žeble, le can' cheyala' gac. Perw gague lenna' nacho ba bžin ža yeyož yežlion'. <sup>8</sup>Le yesedi' to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi.

<sup>9</sup>'Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chagaquen', na' dan' chejnilaže'le neda' nita' bene' yeseche'exoxje' le'e no lao rey no lao nochle bene' gwnabia', na' can' güe'lenle le-gaque' xtižan'. <sup>10</sup>Le za' te che yežlion', xtiža' Diosen' cheyala' gas laljen doxen yežlion'. <sup>11</sup>Na' cate' yesezene' le'e na' yeseche'e le'e lao bene' gwnabia' ca', bi cuec yichjle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teže, le gague le'eczen' nele, san Spiritw che Diosen' gonen ga nale bin' cheyala' nale. <sup>12</sup>Cana' bal' benach yesechje' yesone'

bene' biše' golje' lo na' bene' yesot le-gaque', na' nita' bene' yesone' xi'ingaque' lo na' bene' yesot le-gacbe', na' nita' bene' yesone' xaxne'e lo na' bene' yesot le-gaque'. <sup>13</sup>Yogo'ze bene' yeseque'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žin žate gagle, nach šjazyoale len Diosen'.

<sup>14</sup>'Da' Daniel ben' gwdixjue'ede' xtiza' Dios bzoje' che da' zbranchua da' gwxi-jen latje gan' chonxenko Diosen'. Na' cate' le'e le'ele ba zoa dan' gan' bi cheyala' soan, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) <sup>15</sup>Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'. <sup>16</sup>Na' bene' chda yixe' bi yeyej liže' šjayxi' xalane'. <sup>17</sup>¡Nyaše'chguae zjanac no'ol ca' zjanoo' xi'in, na' no'ol ca' ne' chosoguaže' bidao' lo ža ca'! <sup>18</sup>Le nab lao Dios bi yažjen gwxonje' caten' chac zag, <sup>19</sup>le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble. <sup>20</sup>Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

<sup>21</sup>'Cana' še no ye' le'e: “Le našc, nga zoa Cristo ben' gwlej Diosen' cont nabi'e”, o “Le našc, na' zoe”, bi šejle'le. <sup>22</sup>Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e le-gaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e le-gaque'. <sup>23</sup>Perw ca' nac le'e, le gwzenag, le ba gwdixjue'eda' le'e yogo' can' gac.

**Can' gac cate' ben' gwsela' Diosen'  
golje' benačh yide' da' yoble**

(Mt. 24:29-35, 42-44; Lc. 21:25-36)

<sup>24</sup>Perw ca nac ža ca' cate' yeyož ga<sup>le</sup>'le can' gwnia', gwbižen' yeyaquen cho<sup>l</sup> na' bion' bich gwsenin'. <sup>25</sup>Na' beljw ca' yeselažon' le'e yaban', na' yogo' da' chle'echo le'e yaban' yesaquen ca chac yežlion' cate' chxo'. <sup>26</sup>Nach bene' že' yežlion' yesele'ede' neda' naca' ben' gwsela' Diosen' golja' benačh za'a ladjo bejon' len yela' guac xen na' yela' bene' zaca' juisyw chian'. <sup>27</sup>Nach sela' angl chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

<sup>28</sup>Le gwzenag che jempl nga che yag yixgüigon: Cate' ba chzolao chebešjw yaguen' na' chelan' laga' che'en dao', nezele ba za' lagüe ba. <sup>29</sup>Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'. <sup>30</sup>Da' li žia' le'e, bina' yenit diaža che le'e nita'le na'a cate' yeyož gac yogo'lo<sup>l</sup> da' ca'. <sup>31</sup>Le'e yaban' na' yežlion' yesede chen, perw ca nac xtižan', gague da' te cbi gac can' žanna'.

<sup>32</sup>Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toze Xa' Dios neze.

<sup>33</sup>Da'nana', le soa le cueze, le güia le na', na' le soateze yo<sup>l</sup> güižle Dios, le nono neze batcan' žin ža. <sup>34</sup>Naquen ca nac che to bene' šeje' zito', na' cate' za' se'e chon liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'. <sup>35</sup>Le soa le cueze ca bene' chesape' liže'na', le bi zjanezde' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'. <sup>36</sup>Le kož yele'e zejzenez na' yedole'de' legaque' chesetase'. <sup>37</sup>Da' nga

žia' le'e leze žiczan' par yogo'lo<sup>l</sup> bene'. Le soa le cuez batcan' žin ža.

**Bosoxi'e yesezene' Jesúsen'**

(Mt. 26:1-5; Lc. 22:1-2; Jn. 11:45-53)

**14** Yečhop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' b<sup>x</sup>oz gwnabia' ca' na' bene' ca' chosed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'. <sup>2</sup>Perw gosene':

—Bi senchone' lo l<sup>n</sup>in' cont ca yesebec bene' žaš.

**To no'ole bzoe' set zix yichj Jesúsen'**

(Mt. 26:6-13; Jn. 12:1-8)

<sup>3</sup>Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chl'a zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzoxje' gan' yož seta' na' bzoačohčje' seta' yichj Jesúsen'. <sup>4</sup>Na' ba<sup>l</sup> bene' ca' zjanita' na' beseže'e, na' gose' lježe':

—¿Bixčhen' benditjde' set zix nga? <sup>5</sup>Ša no bete' len güesonen ca no laxjw mos da' gone' gan tgiüz, na' gwnežjuen' gacle-nen bene' yaše'.

Na' beseloque' no'ola'.

<sup>6</sup>Perw Jesúsen' gwne':

—Jayen'. ¿Bixčhen' chnele che no'olen'? Dan' bene' len neda' nga naquen güen. <sup>7</sup>Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yesša len le'e. <sup>8</sup>No'ole nga bene' da' zelao gwzaque'de'. Ba bguazje' neda' set zix can' cheyla' yesone' len neda' cate' gaša'. <sup>9</sup>Da' li žia' le'e, doxen yežlio gate'teze šjasedixjue' bene' diža'



güen dan' chzejni'in chia', decze de šjasyeze'ede' can' ben no'ol nga.

**Judas gwchoglaže' gwdie' Jesúsen' lo na' bene' ca' chesegue'e le'**

(Mt. 26:14-16; Lc. 22:3-6)

<sup>10</sup>Nach Judas Iscariote, ben' goque' t xen len bene' ca' šižinw ben' gwlej Jesúsen' cont zjanaque' le' t xen, gweje' jañe'e bꝛoz gwnabia' ca' cont yosoxi'e nac gone' gwdie' Jesúsen' lo na'gaque'.

<sup>11</sup>Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzologüe' gwdiljwlaže' nac gone' gwdie' Jesúsen' lo na'gaque'.

**Xše' dan' gosagüe' len Xanchon'**

(Mt. 26:17-29; Lc. 22:7-23;

Jn. 13:21-30; 1 Co. 11:23-26)

<sup>12</sup>Na' bžin ža čala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjayza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsen' t xen gosenabde' le':

—¿Ga che'ndo' šjasini'ato' cont gagw-cho xše' che pascon'?

<sup>13</sup>Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šejlene', <sup>14</sup>na' gan' yežinen', le ye' xan yo'on: "Maestrone' že': Gonščo' to yo'o gan' gagwto' xše' ža lni nga len bene' ca' zjanaque' neda' t xen." <sup>15</sup>Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

<sup>16</sup>Na' gosa'ac bene' ca' čhope, na' besežine' ciudan', na' yogo' can' gož

Jesúsen' legaque' goc, na' bososini'e xše' že' lnin'.

<sup>17</sup>Cate' beyož gwxoax gwbiž, bžin Jesúsen' len bene' šižinw ca' gwleje' cont zjanaque' le' t xen. <sup>18</sup>Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' t xen, gwdele neda' lo' na' bene' ca' chesegue'e neda'.

<sup>19</sup>Nach legaque' besyeyaše'laže'de' na' gosezologüe' tgüeje tgüeje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

<sup>20</sup>Na' Jesúsen' gože'ne':

—Ladjo le'e bene' šižinw, to bene' chagw len neda' t xen toze lo' ye'en gon ca'. <sup>21</sup>Na' gac chia' can' nyoj le'e Xtiža' Diosen', neda' naca' ben' gwseļa' Diosen' golja' benach. Perw įnyaše'chguaze nac ben' gwdie' neda' lo na' bene' ca'! Yejni'acle ša bi goljen'.

<sup>22</sup>Na' šlac chesagüe', Jesúsen' gwxi'e to yetextilen', na' beyož be'e yeļa' choxc-len che Dios, bzojxen', na' bnežjuen' legaque', gwne':

—Le gagon'. Lenna' cuerp chia'.

<sup>23</sup>Nach bexue' to vas gan' yože nis uvasen' na' beyož be'e yeļa' choxc-len che Dios, be'en legaque', na' yogüe' gose'eje' late' güej dan' yože lo' vassen'. <sup>24</sup>Na' gože' legaque':

—Da' ngan' xčhena' na' chzanlažan' laljen neche yogo'lol benach. Na' laljen cont solao gac da' coben' da' gwna Diosen' gone' gaclene' benach. <sup>25</sup>Da' li žia' le'e, bich ye'eja' xis uvas na'a. Cate'ch žin ža ba zoacho t xen gan' chnabia' Diosen', canan' ye'ejan' da' yoble.

**Jesúsen' gwne' Pedroa' bi  
chebe' naque' le' txen**

(Mt. 26:30-35; Lc.  
22:31-34; Jn. 13:36-38)

<sup>26</sup> Beyož gosole' gosonxene' Diosen' nach gosa'aque' ja'aque' Ya'a Olivos. <sup>27</sup> Nach Jesúsen' gože'ne':

—Na'aže' yogo'le cuejyichje neda' neče dan' gac chian'. Le nyojczen le'e Xtiža' Diosen', žan: "Gota' bene' güeyoe xilan' na' xila' ca' yesaslasba'." <sup>28</sup> Perw cate' yosban Diosen' neda' ladjo bene' guat ca', yobch yeya'a Galilea ca' le'e.

<sup>29</sup> Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

<sup>30</sup> Perw Jesúsen' gože'ne':

—Da' li žia le', bina' cuež jean' chop ni'a na'aže' cate' gac šon ni'a bi chchebo' še nombi'o neda'.

<sup>31</sup> Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

**Jesúsen' boļ güiže' Xe' Dios Getsemaní**

(Mt. 26:36-46; Lc. 22:39-46)

<sup>32</sup> Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le' cue'edo' šlac neda' šjel güiža' Dios.

<sup>33</sup> Na' gwche'e Pedro, Jacobo na' Juan, na' gwzolaon da' juisyw da' godce' lo' yichjlažda'ogüen' na' benchgüe' xbab.

<sup>34</sup> Na' gože' legaque':

—Lo' yichjlažda'ogua' nga chacyaše'chgüeda', chacda' gatzca' catequen' chžaglagua'. Nga le' yega'an na' le' soa le' na' txen len neda'.

<sup>35</sup> Nach Jesúsen' gwžialagüe' yelate' na' jachaze' coscho'ale lo' yon' gwñabde' Dios še guac ten ca'ale bi gac can' ba zoa gac che'. <sup>36</sup> Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chnaba' gac da' žia' neda', san gac da' nao' le'.

<sup>37</sup> Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón čhtason'? čNe šlož da'oze ca' goc cuejo' bišgal len neda'? <sup>38</sup> Bi tasle, san le' yoļ güiž Dios cont bi gon gwxiyen' le'e gan. Da' li lo' yichjlažda'olen' chna'laže'le gonle da' nac binlo, perw cuerp chelen' bi chzoeczen.

<sup>39</sup> Nach gwyeje' da' yoble na' boļ güiže' Dios na' da' yoble gože'ne' dan' ba gožcze'ne' tñ'a. <sup>40</sup> Nach bezyeje' gan' niten', na' da' yoble ble'ede' chesetase', le' yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. <sup>41</sup> Na' da' gwyone' ni'a gwyeje' na' bežžine' gan' nita' bene' ca' šone na' gože' legaque':

—čNe' chtasle? čNe' chezi'laže'le? Ba goc. Ba gole' gon to bene' neda' lo' na' bene' güen da' xinj ca', neda' naca' ben' gwsela' Diosen' golja' benach. <sup>42</sup> Le' chas, le' yeyo'o. Ba za' ben' gon neda' lo' na'gaque'.

**Gosezene' Jesúsen' cont yeseče'ene'  
lao bene' gwnabia' ca'**

(Mt. 26:47-56; Lc. 22:47-53; Jn. 18:2-11)

<sup>43</sup> Jesúsen' ne' choe'te' dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' gosesela' bžox gwnabia' ca' na' bene' gole' blao ca' chesenabia' nación Israel cheton'. (Judasen' goque' to bene' šižinw ca' gwlej Jesúsen' cont zjanaque' le' txen.) <sup>44</sup> Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le'na'; le' sene' na' le' che'e.

<sup>45</sup> Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnopene'. <sup>46</sup>Nach gosezene' Jesúsen' cont yeseche'ene'.

<sup>47</sup>Perw to ben' zecha cuit Jesúsen' gwlej spada chen' na' gwдынen' mos che b̄xoz blaon' gw̄chogte' šla'a naguen'.

<sup>48</sup>Nach Jesúsen' gože' bene' ca':

—¿Nonle neda' ca to bene' gwban za'acle zedexi'le neda' len spada na' len yag? <sup>49</sup>Yogo' žaze gwzoa' len le'e b̄sed blo'eda' bene' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

<sup>50</sup>Nach yogo' bene' ca' zjanaque' Jesúsen' txen bosoxonje' gosebejyichje'ne'.

### Bi' güego' bin' boxonj

<sup>51</sup>Na' to bi' güego' na'obe' Jesúsen', na' n̄xoa cože'be' toze sábara. Na' bene' ca' ba gosezene' Jesúsen' lecze gosenize'be'.

<sup>52</sup>Perw gwlejšyichje'be' sábaran' na' boxonje' ga'alýidbe'.

### Goseche'e Jesúsen' lao bene' ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup>Nach goseche'e Jesúsen' lao b̄xoz blaon', na' besežag yogo' bene' ca' zjanac b̄xoz gwnabia', na' bene' gole blao ca' chesenabi'e nación cheton' na' bene' ca' bososed bosolo'ede' dan' bzoj da' Moisés. <sup>54</sup>Na' Pedron' na'ogüe' Jesúsen' zito' zito'le b̄žintie' liž b̄xoz blaon' na' gwyo'e chyo'ona' gwchi'e txen len bene' ca' chesape' yodao' blaon' boše'e cuine' cho'a yí'.

<sup>55</sup>Na' ca' nac b̄xoz blaon' na' yogo' bene' ca' chesenabia' nación cheton', besyeyiljwlaže' bi da' yesagüe' xya che Jesúsen' cont yesote'ne', perw bi besyeželden'. <sup>56</sup>Na' zan bene' gosone' diža' güenlaže' che Jesúsen', perw bi gosene' toz ca' yesene'. <sup>57</sup>Bale' gosežože'e na' bososbague'ne' xya chol, gosene'.

<sup>58</sup>—Neto' beneto' gwne': "Neda' yochinja' yodao' nga da' ben benach, na' šone žaze yeyona' yeto yodao' da' bi gon benach."

<sup>59</sup>Perw ne' ca' ca' gosene' toz ca' yesene'.

<sup>60</sup>Nach b̄xoz blaon' gwžože'e ladjo yogo'lole' na' gw̄nabde' Jesúsen':

—¿Bi choži'o xtižen'? ¿Bi dan' chosožie' le' xya?

<sup>61</sup>Perw Jesúsen' bitw bi gwne', bitw boži'e xtižen'. Na' b̄xoz blaon' da' yoble gw̄nabde' le', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonxenko?

<sup>62</sup>Jesúsen' gože'ne':

—Le can' naca'. Na' le'ele neda' cate' ba chi'a šla'a licha che Dios ben' nac la'zelagüe bene' gwnabia', neda' naca' ben' gwsele' golja' benach. Na' le'ele yetja' ladjo bejw dan' ze le'e yaban'.

<sup>63</sup>Nach b̄xoz blaon' gw̄cheza' xałane' cont nacbia' bi beque'e can' gwna Jesúsen', na' gwne':

—Noch no chyažje bene' co' da' balj.

<sup>64</sup>Le'e ba benele chne' che Dios dan' že' ca', chon cuine' ca' Dios. ¿Nacxe ža le'e?

Na' yogüe' gosene' nape' doła' na' cheyała' gate'.

<sup>65</sup>Nach bale' gosezologüe' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' che gose'ene':

—¿Gwnašč non' chot le'!

Na' bene' ca' chesape' yodao' blaon' gosot goseyine' le'.

### Pedron' bi gw̄chebe' še nombi'e Jesúsen'

(Mt. 26:69-75; Lc. 22:56-62; Jn. 18:15-18, 25-29)

<sup>66</sup>Pedron' chi'e chyo'o che'e'ele, cate' bžin to no'ole güen žin che b̄xoz blaon'.

<sup>67</sup>Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

<sup>68</sup>Perw Pedron' bi gwchebe', gwne':

—Bi nombi'ane', nēca nēzda' bin' žo'.

Na' beyej Pedron' jayzie' cho'a puert na'le. Nach gwchež to jea. <sup>69</sup>Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' txen.

<sup>70</sup>Perw le' da' yoble bi gwchebe' še naque' txen len Jesúsēn'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nacbīa' chnio' can' chesene bene' Galilea ca'.

<sup>71</sup>Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

<sup>72</sup>Na' cate la' gwchežte jean' da' gwchope. Nach jayze'e Pedron' can' gož Jesúsēn' le': "Bīna' cuež jean' chop ni'a cate' gac šon ni'a bi chebo' še nombi'o neda'." Na' cate' jayze'ede' can' gož Jesúsēn' le', na' gwcheže'.

### Goseče'e Jesúsēn' lao Pilato

(Mt. 27:1-2, 11-14; Lc.

23:1-5; Jn. 18:28-38)

**15** Ca gwyeni', b̄xoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesúsēn' na' goseče'ene' jasesane'ne' lo na' Pilato ben' nac gobernador. <sup>2</sup>Pilaton' gwnabde'ne', gože'ne':

—¿Len' naco' rey che bene' Israel?

Jesúsēn' boži'e xtižen', gwne':

—Can' gwnao'na', can' naquen.

<sup>3</sup>Na' b̄xoz gwnabia' ca' da' zan da' bosocuiše'ne'. <sup>4</sup>Nach Pilaton' da' yoble gwnabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

<sup>5</sup>Perw Jesúsēn' bitw bi gwne'. Na' Pilaton' bebande' che'.

### Gosechogbi'en gat Jesúsēn'

(Mt. 27:15-31; Lc. 23:13-25;

Jn. 18:38-19:16)

<sup>6</sup>Na' gota' costumbr, Pilaton' gwsane' to bene' de ližya caten' čala' lni pascw che neto' bene' Israel, con to bene' yeseñab bene' gualaž cheton'. <sup>7</sup>To bene' lie' Barrabás na' len yexonj bene' gosot bene' cate' besyedabague' gobiernna' zjajo'e lo' ližya len nochle bene' güen da' mal. <sup>8</sup>Nach besežag bene' na' gosenabde' Pilaton' gwsane' to bene' con can' nac costumbr čegaquen'. <sup>9</sup>Na' Pilaton' boži'e xtiža'gaquen' gwne':

—¿Čaclaže'le gwsana' rey che le'e nacle bene' Israel?

<sup>10</sup>Gwne' ca' le gocbe'ede' dan' chesacxi'a b̄xoz gwnabi'a ca' Jesúsēn', da'nan' bosodie' le' lo ne'e. <sup>11</sup>Perw b̄xoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. <sup>12</sup>Nach Pilaton' gwnabde' legaque':

—¿Bixe gona' len ben' žale nac rey che le'e nacle bene' Israel?

<sup>13</sup>Legaque' bososya'adie' bosyoži'e xtižen':

—¡Bde'e le'e yag cruz!

<sup>14</sup>Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—¡Bde'e le'e yag cruz!

<sup>15</sup>Nach Pilaton', cont bega'ane' güen len bene' ca', bsane' Barrabásēn' can' gosenabe'. Na' bene' mandadw gosot goseyin soldadw che' ca' Jesúsēn', nach bene' le' lo na'gaque' cont yosode'ene' le'e yag cruz.

<sup>16</sup>Nach soldadw ca' goseče'ene' yeto latje dan' zoa chy'o' che liž bene' gwnabian', na' bosotobe' yogo' soldadw ca', zjanac zane'. <sup>17</sup>Gosechize' Jesúsēn' to

lache' moradw, na' gosone' to corona de xis yeše' bosozoen' yichjen'. <sup>18</sup> Na' gosezlagüe' chesonle' che', chesosye'e:

—¡Viva, rey che bene' Israel!

<sup>19</sup> Na' bosozete' yichjen' xis, bosozí'ene' xene', na' bosozoa xibe' gosone' ca bene' chesonxen le'. <sup>20</sup> Beyož gosonle' che', besyeyine' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

### Bosode'ene' le'e yag cruz

(Mt. 27:32-44; Lc.

23:26-43; Jn. 19:17-27)

<sup>21</sup> Na' šlac zjanče'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yixe', na' bosogüe'ene' yag cruz che Jesúsen'.

<sup>22</sup> Goseche'e Jesúsen' latje ga nzi' Gól-gota, zeje dižan' Latje che Žit Yichj Bene' Guat. <sup>23</sup> Na' goso'ene' vino da' nchixe to nechw da' nzi' mirra, perw Jesúsen' bi goclaže' ye'ejen'. <sup>24</sup> Nach bosode'ene' le'e yag cruzen'. Na' soldadw ca' gosone' rifa cate' besyele'e xalana' Jesúsen' cont bla' bi besyechel' to toe'.

<sup>25</sup> Cheda ga šezille caten' bosode'ene' le'e yag cruz. <sup>26</sup> Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: "Rey che Bene' Israel." <sup>27</sup> Txen len Jesúsen' lecze bosode'e le'e yag cruz yečhope bene' gwban, toe' šla'a licha, na' yetoe' šla'a robes. <sup>28</sup> Na' da' gosone' ca', goc ca' nyoj Xtiža' Diosen', žan: "Gosone'ne' ca' bene' güen da' xinj."

<sup>29</sup> Na' bene' gosede gala'ze gosezi'diže'ne', con chosota yichje' gosene':

—Le' gwnao' yochinjjo' yodaon' na' šone žaze yeyontion'. <sup>30</sup> Bosla cuino' na' beyetj le'e yag cruza'.

<sup>31</sup> Lecze ca' bxož gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'. <sup>32</sup> Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

### Can' goc caten' got Jesúsen'

(Mt. 27:45-56; Lc.

23:44-49; Jn. 19:28-30)

<sup>33</sup> Cate' bžin guagwbiz, doxen yežlion' goc chol, bžinte cheda šone. <sup>34</sup> Na' ca' hora' Jesúsen' gwne' ziže gwne':

—Eloi, Eloi žlama sabactani? —zeje diža': Dios chia', Dios chia', žbixchen' ba gwlejiychjo' neda'?

<sup>35</sup> Na' bal bene' ca' zjanita' na' gosende' na' gosene':

—Le gwzenag, chol güiže' da' Elías, ben' be' xtiža' Dios cani'.

<sup>36</sup> Nach to bene' ca' gwyejsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsen' cont xopen', na' gwne':

—Cuezcho, yešque güid Elíasen' yeletje' le'.

<sup>37</sup> Nach Jesúsen' bosye'e ziže, na' gote'. <sup>38</sup> Na' lache' da' ze lo' yodao' blaon' bcheza' gacholen, gwza'te yichjen bžinte che'eje. <sup>39</sup> Na' xan soldadw ca' zie' lao Jesúsen', na' cate' bende' can' bosye'en na' ble'ede' can' gotten', gwne':

—Da' li le' bengan' goc dogualje Xi'in Dios.

<sup>40</sup> Lecze bal no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José. <sup>41</sup> No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

**Bosocuaše' Jesúsen'**

(Mt. 27:57-61; Lc.  
23:50-56; Jn. 19:38-42)

<sup>42</sup>Žana' goquen žan' bososiŋi'e par ža che Dios cate' bi de lsens yesone' žin. Na' cate' ba chxoa gwbiž, <sup>43</sup>to beŋe' le' José, beŋe' ciuda Arimatea, beyaxjde' gweje' lao Pilaton' na' jaynabe' cuerp che Jesúsen'. José goque' to beŋe' zaque' lao beŋe' ca' gosenabi'e nación Israel cheton', na' ba zoe' chbeze' batcan' so-lao nabia' ben' sela' Diosen'. <sup>44</sup>Pilaton' bebande' dan' ba gote', na' goxe' xan soldadw ca' cont gwnabde' le' še da' li ba gote'. <sup>45</sup>Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'. <sup>46</sup>Nach Josén' gwzi'e to lache' xen, beletje' cuerp che Jesúsen' na' bolažen' len. Na' la' jaseło'ote' le' to lo' bloj da' nche'ene' le'e yej xen, na' blóle' to yej cho'a blojen' cont bseyjon len. <sup>47</sup>Na' María no'ole Magdalan' len María xna' Josén' besele'ede' gan' bosocuaše'nen'.

**Beban Jesúsen' ladjo beŋe' guat ca'**

(Mt. 28:1-10; Lc. 24:1-12; Jn. 20:1-10)

**16** Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che Jesúsen'. <sup>2</sup>Na' šzilda' ža dmigw besežine' cho'a ban', cate' za' chla' gwbiž. <sup>3</sup>Na' za' yesežine' gose' lježe':

—¿Noxe ca'a yej xen dan' da' cho'a blojen'?

<sup>4</sup>Perw cate' besežine' na' gosene'e, besele'ede' yej xen dan' da' cho'a blojen' ba bga'an. <sup>5</sup>Nach goso'e lo' blojen', na' besele'ede' chi' to beŋe' xcuide' šla'a liča, nyaze' to lache' ton' da' šiš. Na' besežebe'. <sup>6</sup>Na' bena' gože'ne':

—Bitw žeble. Cheyiljwle Jesús beŋe' Nazaret ben' bosode'e le'e yag cruz. Perw ba bebane'; notoch no nla' nga.

Le na' gan' gosexo'ne'. <sup>7</sup>Le šjaya'ac na' le ye' beŋe' ca' gosaque' le' txen, na' len Pedron', gwyobech Jesúsen' yežine' Galilea clcl ca' legaque'. Na' Galilean' na' yesele'ede'ne' can' gwnacze'.

<sup>8</sup>Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

**Jesúsen' blo'elagüe'  
María no'ole Magdala**

(Jn. 20:11-18)

<sup>9</sup>Beyož beban Jesúsen' ladjo beŋe' guat ca' šzilda' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. <sup>10</sup>Na' María nga jatixjue'ede' beŋe' ca' ba gosenita' len le'. Zjanita'yaše' na' chesežebe' cate' bžine'. <sup>11</sup>Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

**Jesúsen' blo'elagüe' len chop  
beŋe' ca' gosaque' le' txen**

(Lc. 24:13-35)

<sup>12</sup>Beyož goc ca', chop beŋe' ca' gosaque' Jesúsen' txen zjangüe'e nez yixe' cate' Jesúsen' blo'elagüe' legaque', na' nža'le besele'ede'ne'. <sup>13</sup>Lecze legaque' ja'aque' jasedixjue'ede' beŋe' yezica'chle, perw neca gosejle'e chegaque'.

**Da' bgon Jesúsen' yeson  
beŋe' ca' chsejnilaže'ne'**

(Mt. 28:16-20; Lc.

24:36-49; Jn. 20:19-23)

<sup>14</sup>Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chesejnilaže' le' do yichj do laže' na' zjanaque' laždao' chach, le bi gosejle'e che beŋe' ca' besele'ede'ne' ba

bebane' ladjo bene' guat ca'. <sup>15</sup>Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lo' bene'. <sup>16</sup>Bene' ca' yesejnilaže' neda' na' yesezoe' nis, gata' yela' mban chegaque' toli tocañe. Perw bene' bi chesejnilaže' neda', yesebiaye'e. <sup>17</sup>Na' bene' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz bene'; yeseñie' diža' cobe da' bi zjansede'; <sup>18</sup>na' še yesoxe' no bel znia, o še yese'je' da' nac venen, bibi yesacde'; na' lecze yesexoa taque' yichj bene' chese'e na' yesyeyacde'.

### Begüe Jesúsen' yaba

(Lc. 24:50-53)

<sup>19</sup>Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a licha. <sup>20</sup>Na' bene' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesúsen' goclene' legaque' gosone' yela' guac cont gosejle' bene' le nac da' li dižan' goso'en. Da' na'zen' chzoja'.

## DIŽA' GÜEN DAN' BZOJ SAN LUCAS

### Da' nga bzoj Lucasen' par Teófilo

**1**<sup>1-4</sup> Teófilo, naco' bene' zaca' na' chzoja' le' diža' quinga cont nezdó' da' li ca nac da' ba bosozejni'ide' le' che da' ca' ba gosac. Bene' zan bach bosozoje' che Jesúsén', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsén'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwnaby-oža' can' goquen' na' gwyazlaža' gwzobjan' tcho'a cont nezdó', Teófilo.

### To angl gwdixjue'ede' galje Juan

<sup>5</sup> Ca tiemp caten' gwnabia' rey Herodes distritw gana' nzi' Judea, na' gwzóa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón. <sup>6</sup> Na' Zacarías len Elisabeten' zja'accze' to licha len Diosen' na' gosonyane' yogo'loł da' non Xancho Diosen' mandadw da'na' nyoj le'e ley che'na'. <sup>7</sup> Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

<sup>8</sup> Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonxene' Dios. <sup>9</sup> Na' bxož ca' yogo' ni'a chesone' rifa cont chata'bia' noe' choj gwzeje' yal lo' yodao' blao chegaque' gan' chesonxene' Xancho Diosen'. Na' bchoj Zacaríasen' caten' gosone' rifa' bzeye' yala' lo' yodao'na'. <sup>10</sup> Na' šlac bzeye' yala' gosenita' yogo'loł bene' zan ca' chyo'ole bosol güiže' Diosen'. <sup>11</sup> Na' to angl bene' gwsela' Xancho

Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. <sup>12</sup> Na' cate' ble'e Zacaríasen' anglen', benit bechol lo' yichjlažda'ogüe' na' bžebchgüe'. <sup>13</sup> Perw anglen' gože' le':

—Bitw žebo' Zacarías. Diosa' ba bzenague' che dan' gwnabdo'ne', na' no'ol chio' Elisabeten' sane' to xi'ino', na' gwsio'obe' Juan. <sup>14</sup> Na' so' mbalaz na' yebedo' na' lecze bene' zan yesyebede' še ba goljbe'. <sup>15</sup> Gacbe' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'. <sup>16</sup> Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'. <sup>17</sup> Na' cuialaobe' lao Xancho', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xancho' cate' yide'.

<sup>18</sup> Nach Zacaríasen' gože' anglen':

—¿Nac gac nezdá da' nga? Neda' naca' bene' gole na' lecz ca' no'ol chian' ba naque' bene' gole.

<sup>19</sup> Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui. <sup>20</sup> Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

<sup>21</sup> Na' bene' ca' že' chyo'ole chesebeze' Zacaríasen' besyebande' da' gwžede' lo' yodao' blaona'. <sup>22</sup> Na' cate' bechoj Zacaríasen', bene' señw len ne'e da' bi goc nie'. Nach gosacbe'e bene' ca' ble'ebande' lo' yodao'na'.



<sup>23</sup> Na' cate' beyož bdelaze' dan' bene' žin lo' yodao'na', beyej liže'. <sup>24</sup> Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'. <sup>25</sup> Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beŋača' xbab bibi zaca'.

### To angl gwduxjue'ede' galje Jesucriston'

<sup>26</sup> Goc xop bio' noa' Elisabeten' bidaon', Diosen' besele' anglen' ben' le Gabriel, gweje' to yež da'na' nzi' Nazaret gan' mbane distritw Galilea. <sup>27</sup> Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bach naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. <sup>28</sup> Na' bžin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'loł no'ole yezica'chle.

<sup>29</sup> Cate' ble'e Marían' anglen', be-banchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. <sup>30</sup> Na' anglen' gože'ne':

—Bitw žebo' María, Diosen' nži'ide' le'. <sup>31</sup> Na'a gua' xi'ino' to bi' byo dao', na' sano'be', na' go'o labe' Jesús. <sup>32</sup> Na' Jesúsén' gaque' to bene' blao na' beŋačen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xoxxta'ogüe' rey David. <sup>33</sup> Na' le' nabi'e nación Israelen' toli tocane, na' gwbat te yela' gwnabia' chen'.

<sup>34</sup> Nach gož Marían' angla':

—¿Nacxe gac sana' bdaon'? Bitw nžaga' bene' byo.

<sup>35</sup> Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nan' bidaon' za' galje gacbe' laž-dao' xilaže' na' yososi'ebe' Xi'in Dios. <sup>36</sup> Na' bene' xna'o Elisabeten' lecze bach gwchendao' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž. <sup>37</sup> Bibi de da' nacho da' cbi gac gon Dios.

<sup>38</sup> Nach gož Marían' anglen':

—Ni zoa' naca' xmos Xana' Diosen'. Gacšca čhia' con can' ba gwnao'.

Nach beza' anglen' gan' zoa Marían'.

### Marían' jaŋe'e Elisabeten'

<sup>39</sup> Gwde na' la' gwejte Marían' to yež da' žia to lo ya'a gan' mbane distritw Judean', <sup>40</sup> na' bžine' liž Zacaríasen'. Na' gwyo'e bguape' Elisabeten' tiox. <sup>41</sup> Na' cate' Elisabeten' bende' choł güiž Marían' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten' <sup>42</sup> na' gwne' zižje da' bebecgüede', gože' Marían':

—Zo' mbalazch ca yogo'loł no'ole yezica'chle. Na' lecze bidaon' no'ona' soabe' mbalaz. <sup>43</sup> Chebanda' le' naco' xna' Xana' zedena'o neda'. <sup>44</sup> Con cate' benda' chguapo' neda' tiox, bidao' čhian' lecze bebebe', bxite' bžiabe' lo' lian'. <sup>45</sup> Zo' mbalaz da' gwejli'o gac can' gwna xtiža' Diosen' dan' gož anglen' le'.

<sup>46</sup> Nach Marían' gwne':

Chonxena' Xancho Diosen' do yichj do laža'.

<sup>47</sup> Na' do yichj do laža' chebecgüeda' Dios ben' bebeje' neda' lo da' malen'.

<sup>48</sup> Ba beyaše'de' neda' naca' xmosé' la'czla' bibi zaca'.

Na' na'a bene' yesenita' toli tocane yesene' neda' zoa' mbalaz.

<sup>49</sup> Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

<sup>50</sup>Na' noteteze bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža čhegaque' ca'.

<sup>51</sup>Bač blo'e Diosen' benačen' yela' guac če'.

Na' ba bolague' bene' ya'laže' ca'.

<sup>52</sup>Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque' bene' blao.

<sup>53</sup>Na' bene' chesedon, Diosen' ba bnežjue' legaque' da' zan da' güen.

Na' bene' gwni'a ca', ba bose'e legaque', bibi bonežjue' legaque'.

<sup>54</sup>Nach ba goclene' chio' bene' Israel nacho ca xmos'e.

Ba blo'ede' bitw ganlaže' chio', san ba cheyaše' cheži'ilaže'de' chio'.

<sup>55</sup>Ba bene' can' gože' da' Abraham len yezica'chle da' xozxta'ocho.

Na' soacze' yeyaše' yeži'ilaže'de' xi'in diaža če da' Abrahamna' toli tocaṇe.

<sup>56</sup>Na' cate' ba goc šone bio' zoa Marían' len Elisabeten', nach Marían' beyej liže'.

### Golje Juan bene' bzo'e bene' nis

<sup>57</sup>Na' cate' bžin ža san Elisabeten', gwzane' bi' byo dao'. <sup>58</sup>Na' cate' goseneze bene' gualiž čhegaquen' na' diaža čhegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'. <sup>59</sup>Na' goc xono' ža goljbe' na' jasezoe'be' señw dan' že' circuncisión can' gosone' len yogo' bi' byo dao' bi' gosaljbe' lo diaža če da' Abraham. Na' gosaclaže' si' labe' Zacarías can' le xaben', <sup>60</sup>perw xna'be' gwne'.

—Bi gac. Cheyala' si'be' Juan.

<sup>61</sup>Na' legaque' gose'ene':

—Notno diaža čhele nita' bene' zjale ca', neca xozxta'ole.

<sup>62</sup>Na' gosone' señw gosenabde' xaben' nac che'nde' si' labe'. <sup>63</sup>Nach bene' señw gwñabe' to yagla' dao' da' bzoje': "Si' labe' Juan." Na' yogüe' besyebande'. <sup>64</sup>Beyož bzoje' da'na', la' gocte benie', nach la' gwzolaote be'e diža' benxene' Diosen'. <sup>65</sup>Na' besyebane bene' gualiž čhegaquen'. Na' xtiža'gaquen' gos gwłaljen doxen yež ca' zjachi' lo ya'ana' gan' mbane distritw Judean'. <sup>66</sup>Na' yogo'lo' bene' gosende' dižan' gosone' xbab lo' yichjlažda'ogüe' če da' ca', na' gosone':

—¿Bixe gon bdao'na'?

Gosone' ca' le gosenezde' zoacze Xancho Diosen' len lebe'.

### Diža' da' be' Zacarías

<sup>67</sup>Nach gwnabia' Spiritw če Diosen' yichjlaždao' Zacaríasen', nach be'e xtiža' Diosen', gwne':

<sup>68</sup>Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación če' na' ba chsele' bene' yebej chio' lo da' malen'.

<sup>69</sup>Na' bena' bač za' cont yebej chio' lo da' malen', naque' bene' gwnabia' gual,

na' naque' xi'in diaža če da' rey David ben' goc xmos Diosen'.

<sup>70</sup>Chac can' gwna Diosen' len cho'a da' bene' ca' gwsele' cani', bene' gosac lo ne'e goso'e xtižen'.

<sup>71</sup>Ba za' ben' gwne' yosle' chio' lo na' yogo' bene' chesegue'e chio'.

<sup>72</sup>Chac can' gože' da' xozxta'ocho ca' yeyaše' yeži'ilaže'de' legaque'.

Bi chanlaže', san chone' yogo' da' ba gwne' gone' gaclene' chio'.

<sup>73</sup>Diosen' chone' can' gwlo'e da' bałi lao da' xozxta'ocho da' Abraham gože'ne' gaccze can' gwnen'.

<sup>74-75</sup>Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebocho, na' šejcho liča gonxenchone' šlac de yeļa' mban checho.

<sup>76</sup> Nach Zacaríasen' gože' bdao' čhen':

Bdao' chia', beṇač yesene' chio' naco' beṇe' choe' xtiža' Dios, Dios ben' naque' la'zelagüe beṇe' blao.

Yesene' ca' da' cuialaguo' lao Xanchon' na' go'o xtižen' cont nita' beṇe' yosozenague' che' cate' yide'.

<sup>77</sup> Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xtoļa'chon'.

<sup>78</sup> Diosen' cheyaše' cheži'ilaze'de' chio', le len' gwlo'e be'ni' che' lo' laždao' chio' beṇač.

<sup>79</sup> Cue'e be'ni' che' lo' yichjlaždao' chio' naccho ca beṇe' chaš ga nac čol, chio' chžebcho gatcho.

Na' gwzejni'ide' chio' beṇač naquen' soa cuezcho yežlio nga.

Can' be' Zacaríasen' xtiža' Diosen'.

<sup>80</sup> Na' Juanna' zej chcha'obe' zejte chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzomagüe' gwduxjue'ede' xtiža' Diosen' len beṇe' Israel ca'.

### Caten' golje Jesúsen'

(Mt. 1:18-25)

**2** Na' lecz šlac gwnabia' rey César Augusto, bene' mandaw gwyas to censo cont nezde' ba| beṇe' že' to to yež da' zjachi' doxen yežlio gan' chnabi'e. <sup>2</sup> Na' lecz cana' Cirenio naque' gobernador gan' nzi' Siria. Na' naquen da' nechw bchele' ba| beṇe' že' to to yež. <sup>3</sup> Na' yogo'lo| beṇe' jaya'aque' lažgaque' jasyede cuent cuine' cont bosochele' le'. <sup>4</sup> Na' José naque' diaža che da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. <sup>5</sup> Beyeje'

jayde cuine' cuent na' zenche'e no'ol che' Marían' perw bina' yeseca'a lježe'. Na' Marían' ba no'e bdao'. <sup>6</sup> Na' šlac nite' Belén bžin ža sane'. <sup>7</sup> Na' gwxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par legaque'.

### Angl ca' bosozende' beṇe' güeyoe xila' ba golje Jesúsen'

<sup>8</sup> Na' že'na' yixe' che yež Belén na'ate že' beṇe' güeyoe xila' chesape' xila' čhen'. <sup>9</sup> Na' to angl beṇe' gwsela' Xancho Diosen' bžine' gan' nita' beṇe' güeyoe xila' ca', na' be'ni' che Xancho Diosa' gwyechjen bsenin' gan' nite'na'. Na' besežebchgüe'. <sup>10</sup> Na' gož angla' legaque':

—Bitw žeble. Na'a chixjue'eda' le'e to diža' güen da' yesebechgüe yogo'lo| beṇe'. <sup>11</sup> Na'aža lo yež che rey David ba golje bena' gac yebeje' beṇačhen' lo da' mal. Naque' Cristo, na' zeje diža' naque' ben' gwsela' Dios cont nabi'e, na' lecze naque' Xancho. <sup>12</sup> Cont yeželele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

<sup>13</sup> Beyož gwna angla' ca' la' besežinte beṇe' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

<sup>14</sup> ¡Chonxencho Diosa' ben' zoa yaba, na' lo yežlio yesezoa yesebez beṇačhen' binlo, con bena' cheson can' chazlaže' Diosen'.

<sup>15</sup> Na' cate' besyeya'ac angl ca' zjaya'aque' yaba, na' beṇe' güeyoe xila' ca' gose' lježe':

—Yeyejcho Belén šjajna'cho dan' ba goc can' nac dan' gwsela' Xanchon' angl quinga bedesedxjue'ede' chio'.

<sup>16</sup> Na' beseya'aces beṇe' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'. <sup>17</sup> Beyož besele'ede' can' ba go-

quen, na' gosoe' diža' che bdao'na' len bene' ca' yezica'chle ca nac dan' gož anglen' legaque'. <sup>18</sup>Na' yogo'loł bene' ca' gosende' diža' dan' gosoe' bene' güeyoe xila' ca' besyebande'. <sup>19</sup>Na' ľecze Marían' gwlo'o yichje' yogo'loł diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. <sup>20</sup>Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'loł da' ba gosende' na' besele'ede' dan' gož anglen' legaque'.

**Diaža che Jesúsen' jasesane'be'  
lo' yodao' blaona'**

<sup>21</sup>Cate' goc xono' ža golje bdao'na' jasezoe'be' seńw da'na' nzi' circunciśón, na' bososi'e labe' Jesús, can' ben anglen' mandadw cate' za' gua' Marían' ľebe'.

<sup>22</sup>Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. <sup>23</sup>Gosone' can' nyoj ley che' dan' ža: “Yogo' bi' byo dao' bi' nechw cheyała' gacbe' lo' na' Dios.” <sup>24</sup>Nach gosonxene' Diosen', gosone' can' ža ley che Xancho Dios dan' žan: “Cheyała' gotle chop ngolbex o chope plomxtil.”

<sup>25</sup>Na' Jerusalénna' gwzoo to bene' le' Simeón. Benan' gwyejcz'e bene' da' güen lao Diosen' na' benxene' ľe', na' gwleze' batcan' yid Cristo ben' seła' Xancho Diosen' cont yebeje' bene' Israel ca' lo da' mal. Na' Spiritw che Diosen' gwyo'on lo' yichjlaždao' Simeón, <sup>26</sup>na' bzejni'in ľe' bi gate' še bina' le'ede' Criston'. <sup>27</sup>Na' Spiriton' benen cont gwyeje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len ľebe' can' non ley chegaquen' mandadw. <sup>28</sup>Nach Simeónna' gwłene'be' nach benxene' Diosen', gože'ne':

<sup>29</sup>Xana' Dios, bač goc can' gwnaon'.

Ben latje yeyeda' binlo' gana' zo'na', neda' naca' xmoso'.

<sup>30</sup>Ba ble'eda' bena' zedyelej neto' lo da' mal.

<sup>31</sup>Naque' bene' gwnalažo' gwseło' neche yogo'loł benačh.

<sup>32</sup>Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' ľa'zelagüe bene' zaca' len neto' bene' Israel.

<sup>33</sup>Nach xaben' len xna'ben' besyebande' ca diža' chebe' dan' be' Simeónna'.

<sup>34</sup>Na' Simeónna' gwñabde' Diosen' cont gac güen chegaque'. Na' gože' Marían':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benačhen' can' chaclaže' Diosen' goncho, perw zane' bi yesejle'e che'. <sup>35</sup>Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo' catequen' žaglaguo' len da' gac che'.

<sup>36</sup>Na' ľecze yodao' blaona' gwzoo to no'ole le Ana, na' cho'e xtiža' Diosen'. Naque' xi'in' da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzooalene' bene' che' na' gote', na' bga'ane' güezebe. Na' Anan' ba naque' to bene' gole, <sup>37</sup>taplalj tap izde'. Bicze chechoje' yodao' blaona'. Ľeca chonxene' Xancho Diosen' do ža do yel, gwzoatie' tgüeje bene' gwbas na' con gwzoachgüe' boł güiže' Diosen'. <sup>38</sup>Na' goquen' gwbiga' Anan' gan' zoa Josén' len Marían' lo' yodao'na' na' be'e yela' choxcen che Diosen' bač gwsele' Jesúsen'. Na' be'e diža' che Jesúsen' len yogo' bene' ca' že' Jerusalén ben' chesebeze' batca' seła' Diosen' ben' yebeje' legaque' lo da' malen'.

### Jaya'aque' Nazaret

<sup>39</sup>Nach Josén' len Marían' cate' beyož gosone' yogo'loł dan' non ley che Xancho Diosen' mandaw yesone', jaya'ac lažgaque' Nazaret gan' mbane distritw Galilea. <sup>40</sup>Na' Jesúsén' zej chcha'ogüe' na' zej chchachlaže'. Na' ca zej chcha'ogüe' na' zej chejni'ichde', na' Diosen' nži'ilaže'de'ne'.

### Can' ben Jesúsén' čašil yodao' blaona'

<sup>41-42</sup>Na' xaxne'e ca' yogüüz chja'aque' lni da' čala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsén' cate' goseče' xaxne'en le' ja'aque' lnin' Jerusalén. <sup>43</sup>Na' cate' gwde lñina' besyeya'aque', perw Jesúsén' bega'ane' ciuda Jerusalén. Na' xne'ena' len Joséna' bi gosacbe'ede'. <sup>44</sup>Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzoloao chesyeyiljue'ne' ladjo diaža čhegaque' na' no bene' xmigüe', <sup>45</sup>perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

<sup>46</sup>Na' beyon žach besyeželde' Jesúsén' čašil yodao' blaona', či'e gachol bene' ca' chososed chosolo'ede' dan' bzoj da' Moisés. Jesúsén' chzenague' xtiža'gaquen' na' zanen chnabde' legaue'. <sup>47</sup>Na' yogo'loł bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés. <sup>48</sup>Na' cate' besele'e xaxne'en le', besyebande', na' xne'en gože' le':

—Xi'indagua', žbixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

<sup>49</sup>Jesúsén' gože' legaue':

—žBičen' beyiljwle neda'? žBi nezele liž Xa' ngan' cheyala' soa'?

<sup>50</sup>Perw xaxne'e bitw gosejni'ide' bi zehen dan' gože' legaue'.

<sup>51</sup>Na' beyeje' yež Nazaret len xaxne'e bzenague' čhegaue'. Na' gwlec yichj xne'ena' yogo'loł dan' goca'. <sup>52</sup>Na' ca' chac zej chejni'iche Jesúsén' na' zej gwcha'oche', na' Diosen' len benača' zej chesazlaže'che' le'.

### Juan gwduxjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

**3**Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisanius gobernador che distritw Abilinia. <sup>2</sup>Nach lecze izna' Anás na' Caifás gosacche' bxož blao che bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'. <sup>3</sup>Na' Juanna' gwyeje' yogo'loł yež dan' nita' galaže yegw Jordán, jatixjue'ede' yogo'loł bene' cheyala' yesyetingje' xtoła'gaue' na' yesezoe' nis cont nitlao xtoła'gaquen'. <sup>4</sup>Juanna' bene' dan' bzoj da' Isafás ben' be' xtiža' Diosen' cani'te, gana' žan:

Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xančon' cate' yide', le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

<sup>5</sup>Gwžin ža cate' yogo' ya'a yegw ca' yesyeyaquen laše', na' no nez da' nacchgua bxoca' yesyeyaquen licha, na' no nez da' nžaš nche'ene yesyeyaquen ba'a.

<sup>6</sup>Na' yogo'loł bene' yesacbe'ede' can' cha-claže' Diosen' yebeje' benāchen' lo da' mal."

<sup>7</sup>Na' bene' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchguale bene' zgot na' bene' gwxiye'. ĆChaquale guac yelale lao castigw dan' seła' Diosen' caten' gone' yela' justis che benāchen'? <sup>8</sup>Še da' li ba betinjle xtoła'le, cheyała' gonle da' nac güen cont yesacbe'e bene' ba boša' yichjlažda'olen'. Na' bitw gonle xbab gaquale Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. <sup>9</sup>Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

<sup>10</sup>Nach bene' ca' chosozenag xtiže'na' gosenabde' Juanna', gose'ene':

—ĆBica' da' cheyała' gonto'?

<sup>11</sup>Na' gože' legaque':

—Ben' nape' chope camis cheyała' gwnežjue' ton che bene' bi de che'. Na' lecze ca' che ben' de da' gagüe', cheyała' gwnežjue' che ben' bi de gagüe'.

<sup>12</sup>Na' cate' to chope bene' güechixjw ca' jasebigue' cont gwzoa Juanna' le-gaque' nis, na' gose'ene':

—Maestrw, Ćbica' da' cheyała' gonto'?

<sup>13</sup>Na' gože' legaque':

—Bitw gwchixjwchle ca da' cheyała' yeseyixjue'.

<sup>14</sup>Na' to chope bene' ca' zjanac sol-dadw lecze gosenabde' le', gose'ene':

—ĆChix neto'? ĆBica'ch da' cheyała' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont

ca'ale xmechwgaque'. Le gon banez len laxjwle.

<sup>15</sup>Na' bene' ca' gosezoe' lez yid Cristo ben' naquen seła' Diosen' yedenabi'e, na' gosacde' še Juanna' naque' Cristo. <sup>16</sup>Na' Juanna' gocbe'ede' xbab chegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene zaca' bitw zaca' gona' xmandadoe' lechja' no xele'. <sup>17</sup>Benan' gone' len benāchen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chese-jnilaže' Diosen', yotobe' legaque' cont šjasyenite' txen len le', na' bene' bi chese-jnilaže' le', sele' legaque' lo yi' gabilen' dan' cbi cheyol chenit.

<sup>18</sup>Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en. <sup>19</sup>Nach Juanna' gwdile' gobernador Herodes ca nac da' mal da' bene' beque'e Herodías ca xo'ole, le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'loł da' mal dan' ba ben Herodes. <sup>20</sup>Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

### Can' goc caten' gwzoa Jesúsen' nis

(Mt. 3:13-17; Mr. 1:9-11)

<sup>21</sup>Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo hora' Jesúsen' boł güiže' Diosen' na' la' byaljwte yaba gan' zoa Diosen'. <sup>22</sup>Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

### Diaža che Jesúsen'

(Mt. 1:1-17)

<sup>23</sup>Na' ca do šichoa ize Jesúsen' cate' gwzoloao bene' yogo'loł da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí, <sup>24</sup>na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. <sup>25</sup>Na' Joséna' naque' xi'in Matatías, na' Matatíasen' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai, <sup>26</sup>na' Nagain' naque' xi'in Maat, na' Maata' naque' xi'in Matatías, na' Matatíasen' naque' xi'in Semei, na' Semein' naque' xi'in José, na' Josén' naque' xi'in Judá. <sup>27</sup>Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, <sup>28</sup>na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er. <sup>29</sup>Na' Era' naque' xi'in Josué, na' Josuén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. <sup>30</sup>Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. <sup>31</sup>Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. <sup>32</sup>Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque'

xi'in Salmón, na' Salmónna' naque' xi'in Naasón. <sup>33</sup>Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, <sup>34</sup>na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. <sup>35</sup>Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, <sup>36</sup>na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. <sup>37</sup>Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán, <sup>38</sup>na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

### Satanásen' goclažen' co'oyelan' Jesúsen' cont gone' da' mal

(Mt. 4:1-11; Mr. 1:12-13)

**4** Na' Spiritw che Diosen' gwnabian' yichjlaždao' Jesúsen'. Na' Jesúsen' beze'e cho'a yegw Jordán, na' Spiritua' benen cont gwyeje' latje daš. <sup>2</sup>Choa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. <sup>3</sup>Nach gož Satanásen' le':

—Še le' naco' Xi'in Dios, gož yej nga yeyaquen yetextil.

<sup>4</sup>Na' gož Jesúsen' len:

—Nyojczy Xtiža' Diosa' žan: “Gague yela' guagw na'zen' chyažje chio' benach cont gac bancho, san leczy chyažjecho yogo'loł diža' dan' ža Diosen'.”

<sup>5</sup>Na' gw<sup>che</sup>' Satanásen' le' to lo ya'a sibe na' bedao'nez blo'en le' yogo'lo! nación da' zjachi' yežlio. <sup>6-7</sup>Nach gožen le':

—Doxen ye<sup>la</sup>' gwnabia' da' de yežlio nga naquen lo na' cont gwnežjuan' con no che'nda'. Še le' gwzoa xibo' gonxeno' neda', nach go<sup>na</sup>' le' ye<sup>la</sup>' gwnabia' <sup>che</sup> nación ca' zjachi' yežlio nga na' len ye<sup>la</sup>' zaca' ye<sup>la</sup>' xdan <sup>che</sup> nación ca'.

<sup>8</sup>Nach Jesúsen' gože' Satanásen':

—Becuas ca'ale Satanás. Nyojczę Xtiža' Diosen' žan: “Cheya<sup>la</sup>' šejnilaže'cho Xancho Diosen' na' toz le' gonxencho.”

<sup>9</sup>Nach Satanásen' goz<sup>che</sup>'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', <sup>10</sup>le nyojczę Xtiža' Diosen', žan:

Sela' Diosen' bene' ca' zjanac angl <sup>che</sup>' yesaclene' le' na' yesape' le',

<sup>11</sup>yesoxe' le' cont bi <sup>che</sup>go' no yej.

<sup>12</sup>Nach Jesúsen' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

<sup>13</sup>Beyož gota'bia' bi gwzoe Satanásen' co'oyelan' Jesúsen' gone' da' mal, nach becuasen šlož len le'.

**Jesúsen' gwzologüe' chyixjue'ede' diža' güen <sup>che</sup> Diosen' distritw Galilea**

(Mt. 4:12-17; Mr. 1:14-15)

<sup>14</sup>Nach Jesúsen' beyeje' distritw Galilea, na' ye<sup>la</sup>' guac <sup>che</sup> Spiritw <sup>che</sup> Diosen' gwzoan len le'. Na' yogo'lo! bene' že' yež ca' zjachi' doxen Galilea gosenezde' <sup>che</sup> Jesúsen'. <sup>15</sup>Na' Jesúsen' bsd blo'ede' legaque' lo' yodao' <sup>che</sup>gaquen', na' yogo'lo! bene' ca' gosoxene' le'.

**Bežin Jesúsen' Nazaret**

(Mt. 13:53-58; Mr. 6:1-6)

<sup>16</sup>Na' bežin Jesúsen' yež Nazaret gan' gwcha'ogüe', na' gwyo'e yodao' ža <sup>che</sup> Dios can' ba yolagüe' chone', na' gwzechede' cont gwlabē'. <sup>17</sup>Na' ben' yo'o lo ne'e yodao'na' benežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan: <sup>18</sup>Zoa Spiritw <sup>che</sup> Diosa' len neda', na' Diosen' gwleje' neda' zedeya' diža' güen len bene' yaše'.

Na' gwsele' neda' zedeyena' cont yesyey-aclaže' bene' ca' chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lcho! Na' bene' chyi chzaca', zedeyena' cont noch no yosoči yososaque' legaque'.

<sup>19</sup>Na' zedetixjue'eda' ba bžin ža gaclen Diosen' benachen'.

<sup>20</sup>Jesúsen' botobe' yišen' na' bonežjue' ben' yo'o lo ne'e yodaon' na' gwchi'e. Na' yogo' bene' ca' nita' yodaon' la' gosena'tie' le'. <sup>21</sup>Nach gwzolao be'e diža' gwne':

—Ža na'aža ba chac can' ža Xtiža' Diosen' dan' ba benele nga.

<sup>22</sup>Na' yogo' bene' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen <sup>che</sup>' na' gose' lježe':

—¿Gague bengā xi'in Josén'?

<sup>23</sup>Nach gož Jesúsen' legaque':

—Ye'ljale neda' can' ža diža' dan' de: “Bene' güen rmed le', beyon cuino'.” Na' lecze ye'ljale neda': “Dan' chesene' beno' yež Capernaum da' bebane bene', lecz can' cheya<sup>la</sup>' gono' lažcho nga.”

<sup>24</sup>Nach goze'e legaque':

—Da' li chnia' le'e, bene' gualaž <sup>che</sup> note'teze bene' choe' xtiža' Diosen' bitw chesezi'e <sup>che</sup>'. <sup>25</sup>Ca tiemp <sup>che</sup> da' Elías



ben' be' xtiža' Diosen' cani', bibi yejw goc šon iz yo gašje na' goc gwbin juisyw che-gaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca' tiempa',<sup>26</sup> perw Diosen' bi gwsele' Elíasen' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe.<sup>27</sup> Na' lecz ca' tiemp che da' Eliseo ben' be' xtiža' Diosen' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

<sup>28</sup> Na' yogo' bene' ca' že' yodao'na' cate' gosende' dan' gwna Jesúsén' beseža'achgüe'.<sup>29</sup> Na' la' besyezoža'te' na' besyebeje' Jesúsén' yežen', na' goseče'ene' to lo ya'a da' zoa gała'ze, gosacłaže' yososłažoe'ne' lo ya'a na'ate,<sup>30</sup> perw bibi goc yesonde' le'. Con beza' Jesúsén' bedie' gachoł gaque'.

**Jesúsén' bebeje' da' xigüe'  
dan' yo'o yichjlaždao' bene'**

(Mr. 1:21-28)

<sup>31</sup> Na' jasoe' yež Capernaum gan' mbane Galilean', na' že che Dios bsd blo'ede' bene' ca' že' lo' yodao'na'.<sup>32</sup> Na' bene' ca' besyebande' ca' nac dan' bsd blo'eden', le' bzejni'ide' cacze to bene' nezde' cayanen' nac xbab che Diosen'.

<sup>33</sup> Lo' yodao'na' gwzoa to bene' yo'o nyaze' da' xigüen'. Na' bosye'e gwne':

<sup>34</sup> —¿Bixčen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw ben' gwseła' Diosen'.

<sup>35</sup> Nach Jesúsén' gwdile' da' xigüen' na' gožen':

—iŠšago! Bechoj yichjlaždao' benga.

Na' bchix da' xigüen' bena' gachoł bene' ca' že'na' nach bechojen. Perw bitw

benen le' zi'.<sup>36</sup> Na' leca besyebane yogo' bene' ca', nach gose' lježe':

—¿Bixen' chac? ¿Bixe da' coben' chlo'e benga? Nacbia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz bene'.

<sup>37</sup> Na' ca' nac dan' ben Jesúsén' gos gwłalje dižan' doxen lagüe yež ca' zjachi' do na'.

**Jesúsén' beyone'  
taobi'in che Simónna'**

(Mt. 8:14-15; Mr. 1:29-31)

<sup>38</sup> Na' cate' beze'e yodao'na', na' gwyeje' liž Simón. Na' taobi'in che Simónna' chacšende', yo'e da' la. Na' bosol güiže' Jesúsén' cont yeyone' le'.

<sup>39</sup> Na' Jesúsén' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsini'e da' gose'ej gosagüe'.

**Jesúsén' beyone' bene' zan**

(Mt. 8:16-17; Mr. 1:32-34)

<sup>40</sup> Na' cate' ba chxoa gwbižen' goseče'e con yogo' bene' chese'e yižgüe' jasesane' legaque' lao Jesúsna'. Na' Jesúsén' gwxo'a ne'e yichj to toe' na' beyone' legaque'.<sup>41</sup> Na' lecz ca' bebej Jesúsén' da' xigüe' da' yo'o yichjlaždao' bene' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsén' gwdile' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

**Jesúsna' gwde' doxen  
Galilean' bsd blo'ede'**

(Mr. 1:35-39)

<sup>42</sup> Na' beteyo cate' gwye'ni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosacłaže' yosozague' Jesúsén' cont bi yeze'e.<sup>43</sup> Na' Jesúsén' gože' legaque':

—Lecz ca' bene' ca' nita' yež yoble cheyała' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

<sup>44</sup>Ca' goquen', Jesúsen' gwde' to to yež che distritw Galilea na' bsd blo'ede' bene' ca' lo' yoda' chegaquen'.

### Gosezene' be zan bel ya'a

(Mt. 4:18-22; Mr. 1:16-20)

**5**Na' šlac zecha Jesúsen' cho'a nisdao' da'na' nzi' Genesaret, besežag bene' zan na' bosochite' Jesúsen' da' gosaclačže' yosozenague' xtiža' Diosen' dan' bi'e cho'a nesdaon'. <sup>2</sup>Na' Jesúsen' ble'ede' chope barcw dao' cho'a nesdaon'. Na' bene' gwxcen bel ca' ba besyežaše' lo' barcon' ba chesyeyibe' yixjw bel chegaquen'. <sup>3</sup>Na' Jesúsen' gwyo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' bene' ca' že'na'. <sup>4</sup>Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

<sup>5</sup>Nach Simónna' gože' Jesúsen':

—Maestrw, ba bento' žin do yel na' ne to nono bdoła'. Perw le' ba gwnao' yezolaoto', na' gwzala'to' yixjw ca' da' yoble.

<sup>6</sup>Na' beyož bosozala' yixjw chegaquen' zjanyicoco'ten belen', yeleze ca' yesyecheza'ten. <sup>7</sup>Na' bene' ca' zjanita' lo' barcw che Simónna' gosone' señw gosaxe' bene' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel zan lo'enña'. <sup>8</sup>Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to bene' mal, bibi zaca' par so' nra len neda'.

<sup>9</sup>Gwne' ca' le le' txen len bene' lježe' ca' že' lo' barcon' besyebanchgüede' da' gosezene' bel zanna'. <sup>10</sup>Lecz ca' besyebane xi'in ben' le Zebedeo, zjanac čop biše'tie', Jacobo len Juan. Bene' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' bene' gwxcen bel, na' chebejto' belen' lo' nisen'; perw na'a gona' cont gaxle bene' yesyechoje' lo' da' malen'.

<sup>11</sup>Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

### Jesúsen' beyone' to bene' che'ede' yižgüe' dan' nzi' lepra

(Mt. 8:1-4; Mr. 1:40-45)

<sup>12</sup>Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' boł güiže'ne' gože'ne':

—Xana', še chaclažo', guac yeca'lo yižgüe' dan' che'eda' nga.

<sup>13</sup>Nach Jesúsen' bli ne'e na' gwxo'en' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. <sup>14</sup>Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej jana' bxoza' cont le'ede' bach beyacdo'. Na' bnežjo' da' cheyała' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

<sup>15</sup>Na' tža tža gos gwlaļe diža' ca' nac yela' guac dan' ben Jesúsen'. Na' bese-dob bene' zan cont bosozenague' xtiža' Jesúsen' na' cont beyone' legaque' len bite'teze yižgüe' da' chese'ede'. <sup>16</sup>Nach Jesúsen' bchoje' to ši'i güeje jał güiže' Diosen' to latje daš.

**Jesúsen' beyone' to bene'  
bi chda šla'a ni'a ne'e**

(Mt. 9:1-8; Mr. 2:1-12)

<sup>17</sup>Nach to ža zoa Jesúsen' to yo'o gan' chsed chlo'ede' bene'. Na' gala'ze zjanita' zan bene' Israel bene' zjanzi' fariseo. Na' ľecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loj yež ca' gan' mbane distritw Galilea len distritw Judea, na' ľecze baľe' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoan len Jesúsa' na' beyone' bene' güe' ca'. <sup>18</sup>Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosacľaže' yesedie' šjas-esane' le' lao Jesúsa'. <sup>19</sup>Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na' beseľetje'ne' len xcame'na' gachol bene' ca' že' lo' yo'ona' cont bžine' lao Jesúsen'. <sup>20</sup>Cate' gocbe'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtolon'.

<sup>21</sup>Na' bene' ca' chososed chosolo'e dan' bzoj Moisésa' na' bene' fariseo ca' gosene':

—¿Non' chaque benga naque' chne' ca'? Chon cuine' ca' Dios. Le nono zoa bene' gac yezi'xene' xtoľa' benachen'. Toz Diosen' gac yezi'xenen'.

<sup>22</sup>Jesúsen' gocbe'ede' ca' nac da' chesezalaže' na' gože' ľegaque':

—¿Bičhena' chzalaže'le ca' lo' yichjlažda'ole? <sup>23</sup>Še yapa'ne: “Ba bezi'xena' xtoľona'”, bi nezele še napa' yela' gwnabia' cont yezi'xena' xtoľe'na'. San še yapa'ne: “Gwyas na' gwda”, na' nacbia' še napa' yela' guac gac can' gwnian'. <sup>24</sup>Na'ach gona' cont gacbe'ele napa' yela' gwnabia' cont yezi'xena'

xtoľa' benach, neda' naca' bona' gwseľa' Diosen' golja' benach.

Nach gože' bene' xinja':

—Chapa' le' beyas, beyoa' xcamon', na' beyej ližo'.

<sup>25</sup>Nach ľa' beyaste bene' xinja', cheseňa'te bene' ca' nita'na'. Nach beyoa' xcamen' na' beze'e zjayda liže' chonxene' Diosen'. <sup>26</sup>Na' yogo'loj bene' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' ľježe':

—Da' yebanecho da' ca' ba ble'echo na'aža.

**Jesúsen' gwleje' Leví  
cont goque' le' txen**

(Mt. 9:9-13; Mr. 2:13-17)

<sup>27</sup>Gwdena' beza' Jesúsen' na' ble'ede' to bene' güe'chixjw bene' le' Leví, chi'e latje gan' chčhixjue'. Na' Jesúsen' gože' le':

—Da len neda'.

<sup>28</sup>Nach gwzoža' Levín' gwlejyichje' yogo' xšinłaze' na' gwyejlene' Jesúsen'.

<sup>29</sup>Nach Levína' bene' to ľni' xen ližen' par Jesúsen', na' ja'ac bene' zan bene' güe'chixjw ca' na' bene' yezica'chle na' gosebe'lene' le' cho'a mesen' gosagüe'.

<sup>30</sup>Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e ľegaque':

—¿Nacxečhen' che'ej chagwle txen len bene' güe'chixjw na' yebaľe bene' güen da' xinj ca'?

<sup>31</sup>Jesúsen' gože' ľegaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, ľegaquen' cheseyažjde' bene' güen rmed. <sup>32</sup>Gague bene' ba zjanaque' bene' güen len Diosen' zedeneyoeda' cont yesyetingjde' xtolen', san bene' güen da' xinj. ľegaque' zjanaque' ca' bene' cheseyažjde' bene' güen rmed.

**Gosenabde' Jesúsen' bixchen'  
cbi gwleje' tgüeje ža gwbas**

(Mt. 9:14-17; Mr. 2:18-22)

<sup>33</sup> Nach bał bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosoł güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

<sup>34</sup> Nach gož Jesúsen' legaue':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' legaue'? Bi gac. <sup>35</sup> Perw žin ža cate' bich soe' len legaue', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

<sup>36</sup> Na' Jesúsen' be'e jempl nga bzejni'ide' legaue':

—Notno zoa bene' cheza' xe' da' cobe na' yode'en de'exo'. Še gone' ca' gwži-aye'e xe' da' coben' na' xe' de'exon' bitw gac leben len lache' coben'. <sup>37</sup> Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lałje vino na' yesebiayi' chopen. <sup>38</sup> Cheyala' yesegue'e vino coben' lo' yid cobe cont bibi gaquen. <sup>39</sup> Na' ca nac bene' bač yolagüe' che'eje' vino golen', bitw ye'nde' ye'eje' vino coben', san že: "Vino golen' nacchen güen."

**Bene' ca' zjanaque' Jesúsen'  
txen goselechje' trigon'  
gosagüen' ža che Dios**

(Mt. 12:1-8; Mr. 2:23-28)

**6** Na' to ža nac ža che Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. <sup>2</sup> Na' besele'e bał bene' fariseon' can' gosone' na' gose'e legaue':

—¿Bichen' chonle da' bi de lsens goncho ža che Dios?

<sup>3</sup> Na' Jesúsen' gože' legaue':

—¿Bina' gwlable can' ben da' rey David to ža cate' le' na' bene' lježe' ca' gosedone'? <sup>4</sup> Gwo'o Davin' liž Dios na' jaxi'e yetextil da' nac che Dios da' bi chac gagw bene' bi nac bxož, na' gwdagüen', na' lecze bnežjue' che bene' zja'ac len le'.

<sup>5</sup> Na' lecz ca' gwna Jesúsen':

—Naquen lo na' nia' bi da' nac güen goncho cate' nac ža che Dios, neda' naca' ben' gwsela' Diosen' golja' benačh.

**Beyac to bene' nxo'on šla'a taue'**

(Mt. 12:9-14; Mr. 3:1-6)

<sup>6</sup> Na' yeto ža che Dios gozeje' lo' yodaon' na' bsed blo'ede' bene' ca' že'na'. Na' ladjo bene' ca' zjaže'na' yo'o to bene' nxo'on taue' liča. <sup>7</sup> Na' bene' ca' chososed chosolo'e dan' bzoj da' Moisés na' bene' fariseo ca' chosogüia chesene'e Jesúsen' še yeyone' bena' ža che Dios cont de da' yosode'ede' yesagüe' xya che'. <sup>8</sup> Na' gocbe'e Jesúsen' can' chesone' xbaben', na' gože' ben' nxo'on taue':

—Gwzoža' na' gwzeča nga gachol.

Nach bena' bžine' gwzeche' lagüen'.

<sup>9</sup> Na' Jesúsen' gože' bene' ca' že'na':

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še gwžiayi'chone'?

<sup>10</sup> Jesúsen' gwne'e yogo'te ben' že'na', nach gože' ben' nxo'on taue':

—Bli naon'.

Nach blien' na' taquen' beyaquen binlo. <sup>11</sup> Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesúsen'.

**Jesúsen' gwleje' šižinw postlw**

(Mt. 10:1-4; Mr. 3:13-19)

<sup>12</sup> Na' to ža gwey Jesúsen' to lo ya'a jel güiže' Diosen'. Na' do yel be'lene' Diosen' diža'. <sup>13</sup> Na' cate' gweyeni', goxe' bene' ca' zjanaque' le' txen, nach gwleje' šižinw'

na' bsi'e legaque' postlw. <sup>14</sup>Beñe' qui gwleje': Simón ben' bsi'e Pedro, na' beñe' biše' Andrés, na' Jacobo, na' Juan, na' Felipe, na' Bartolomé, <sup>15</sup>na' Mateo, na' Tomás, na' Jacobo xi'in Alfeo, na' Simón ben nac cananista, <sup>16</sup>na' Judas beñe' biše' Jacobo, nach Judas Iscariote ben' bdi'e Jesús'en' lo na' beñe' chesegue'ede' le'.

### Jesús'en' bzejni'ide' beñe' zan

(Mt. 4:23-25)

<sup>17</sup>Na' beyetje' lo ya'an len legaque' na' gwzeche' ga nac to laše' len beñe' ca' zjanaque' le' txen. Na' lecze nita' beñe' zan beñe' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len beñe' ca' nita' chosozenague' xtiža' Jesús'en' zjančiže bał beñe' chese'e yižgüe'. Na' Jesús'en' beyone' legaque'. <sup>18</sup>Na' beñe' ca' zjajo'o zjanyaz da' xigüen' yichjlažda'ogaque', Jesús'en' be-bejen'. <sup>19</sup>Na' yogo' beñe' goseyiljue' nac le yesone' cont yeselapa' na'gaquen' le', le gosenezde' nape' yela' guac cont yega'a yižgüe' čhegaquen' še yesechele'ne'.

### Non' zoa mbalaz na' non' cbi zoa mbalaz

(Mt. 5:1-12)

<sup>20</sup>Na' Jesús'en' gwliš lagüe' gwne'e beñe' ca' zjanaque' le' txen na' gože' legaque':

—Mbalaz zoa le'e beñe' yaše', le'e chzenagle čhe Diosen' cont chnabi'e yichjlažda'olen'.

<sup>21</sup>'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

<sup>22</sup>'Neda' naca' ben' gwseła' Diosen' golja' beñe'ch. Na' mbalaz soale še dan' chejnilaže'le neda' chesegue'e beñe' le'e, na' chesyebeje' le'e lo' yodao' čhegaque',

na' cheseneye'e čhele, na' chesene' nac le beñe' mal. <sup>23</sup>Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen čhele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' beñe' ca' goso'e xtiža' Diosen' cani'.

<sup>24</sup>'Na' nyaše'chguaze nac le'e beñe' gwñi'a. Chac güen čhele na'a, perw gague toli tocanen' gac čhele ca'.

<sup>25</sup>'Nyaše'chguaze nac le'e dechgua da' chagwle na'a. Gwžin ža cate' bich bi gata' čhele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

<sup>26</sup>'Nyaše'chguaze nac le'e chesonxen yogo'lol beñe' le'e. Ca'czen' goson da' xozxta'ogaque', gosonxene' beñe' ca' goseziye'e gosene' cheso'e xtiža' Diosen' cani'.

### Cheyała' gaquecho beñe' chesegue'ede' chio'

(Mt. 5:38-48; 7:12)

<sup>27</sup>'Le'e chzenagle čhia', cheyała' gaquele beñe' chesegue'ede' le'e. Cheyała' gonle da' güen len beñe' ca' chesegue'ede' le'e. <sup>28</sup>Le nab cont beñe' chesegue'ede' le'e nite' mbalaz. Le soa le nabe Diosen' gaclene' beñe' chososaca'zi' le'e. <sup>29</sup>Še to beñe' čhaze' šla'a xaga'le, le güe' dan' yešla'a. Še to beñe' que'e xadon čhele, le güe' latje lečhje' len xcamisle. <sup>30</sup>Note'teze beñe' bi dan' nabde' le'e, le gwnežjon. Še to beñe' que'e bite'teze da' de čhele, bitw yeñablen. <sup>31</sup>Con yogo' da' güen da' chaclaže'le yeson beñe'ch'en' len le'e, lecze ca' cheyała' gonle len legaque'.

<sup>32</sup>'Še chaquele šinze beñe' chacde' le'e na' bi chaquele beñe' yoble, čbixchen' chaquele chebe Diosen' can' chonle? Ca'cze cheson beñe' güen da' mal ca'. <sup>33</sup>Lecze še chonle da' güen len beñe' ca' cheson da' güen len le'e na' bi chonle güen len beñe' yoble, čbixchen' chaquele

chebe Diosen' can' chonle? Ca'cze cheson bene' güen da' mal ca'.<sup>34</sup> Še chbejle bi da' chbejle len bene' chaquele yesyeyonen' le'e, ¿bixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaque', na' nite' lez yosyonežjuen'.<sup>35</sup> Perw na' le'e, le soa le gaque bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gwnia' le'e, gwlo'ele nacle xi'in Dios ben' nac la'zelagüe bene' blao, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxcen che' na' len yezica'chle bene' güen da' mal ca'.<sup>36</sup> Na' ca Xacho Diosen' ben' zoa yaba cheyaše' cheži'ilaže'de' yogo' benačhen', ca'cze cheyała' yeyaše' yeži'ilaže'le ljež benačhen'.

**Bitw zaca'cho nacho  
bene' zjanape' doła'**

(Mt. 7:1-5)

<sup>37</sup> Bitw gonle xbab zaca'le nale bene' zjanape' doła'. Še nale che bene' zjanape' doła', ca'cze Diosen' ne' le'e nape doła'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele.<sup>38</sup> Le soa le gwnežjo bi da' gwnežjwle bene' na' Diosen' güeyoncze' chele. Bał bene' leca nala' chosochixe' bi dan' chesote', chosochiše' lao yagarm chegaquen' na' chesebiben' na' chosozoaya'aten'. Ca'czen' cheyała' gonle gwnežjwle bi dan' cheseyažje bene' na' lecz ca' gon Diosen' len le'e.

<sup>39</sup> Nach Jesúsen' be'lene' bene' že'na' to jempl, gwne':

—¿Guaque to bene' lchol cue'e nez yeto bene' lchol? Bi gac. Le nezecho chopte' šjasebixe' to lo' yechw.<sup>40</sup> Ca nac cate' to bene' chsede' len to maestrw, bi nacho naque' bene' blaoch ca mae-

stroa'. Na' la'czla' še ben' chseda' gwda' yichje' yogo'loł dan' blo'e maestron' le', bitw naque' bene' sina'ch ca maestroa'.

<sup>41</sup> ¿Bixchen' chna'le beb dao' dan' yo'o lo' yejlao bene' lježle, na' bi chacbe'ele naquech beb xen dan' yo'o lo' yejlaolen?<sup>42</sup> Na' še le'e yo'o to da' xen lo' yejlaolen' ¿nacxechen' che'le bene' lježlen: "Ben yebeja' beb dao' dan' yo'o lo' yejlaguon'?" jBene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

**Dan' choncho chlo'en bin'  
yo'o lo' yichjlažda'ochon'**

(Mt. 7:17-20; 12:34-35)

<sup>43</sup> Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen.<sup>44</sup> Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas.<sup>45</sup> To bene' laždao' ži'ilaže' chone' da' güen, le ca' ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

**Chope bene' na' yo'o da' chon to toe'**

(Mt. 7:24-27)

<sup>46</sup> ¿Bichen' che'le neda': "Xana'", na' bi chonle can' nona' mandadw?<sup>47</sup> Na' a nia' nac zaca'lebe bene' nao' neda' na' chzenague' xtiža' na' chone' can' nona' mandadw.<sup>48</sup> Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan.<sup>49</sup> Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo yo na'ze na' bibi lenen gwleque'. Na' cate' betjchgua yegw

gwyechjen liže'na', na' bebixen gwzi-  
ayi'te yo'on.

**Jesúsen' beyone' xmos to xan soldadw**

(Mt. 8:5-13)

**7** Na' cate' beyož be' Jesúsen' diža' len  
bene' ca', beyeje' yež Capernaum.  
2Na' zoa to xan soldadw bene' bitw  
naque' bene' Israel. Na' zoa to xmose'  
chacšenchgüede', na' yelez ba de' par  
gate'. Na' xan soldadon' chacchgüede'  
le'. 3Na' cate' xan soldadon' bende' diža'  
che Jesúsen', gwsele' bał bene' gole blao  
che bene' Israel cont jasenabde' Jesúsen'  
šeje' liže' yeyone' xmose'. 4Nach cate'  
besežine' gan' zoa Jesúsen', gosenabde'  
le' gaclene' xan soldadon'. Na' gose'e  
Jesúsen':

—Xan soldadon' naque' to bene' zaque'  
gacleno', 5le' chacde' chio' bene' Is-  
rael, na' le' bene' yodao' cheto' nga len  
xmechue'.

6Nach gwyej Jesúsen' len legaque',  
perw za' yesežine' liže'na' cate' gwseła'  
xan soldadon' bał bene' migw che' lao  
Jesúsen' na' gose'ene':

—Xan soldadon' že' bitw gwša'a yichjo'  
yido' liže'na', le' nezdde' bitw zaque'  
cont šo' liže'na'. 7Da'nan' bitw beyaxjde'  
yide' nabde' le' gacleno'ne'. Con che'nde'  
gonščo' mandadw yeyaque' xmose'na'.  
8Xan soldadon' že' zoa bene' chnabia'  
le' perw lecze nita' soldadw che' na'  
chnabi'e legaque'. Na' cate' che'e toe':  
“Gwyej”, na' cheje', na' cate' che'e yetoe':  
“Da”, na' chide', na' cate' che'e xmosen':  
“Da' nga gono'”, na' chonen'. Na' nezdde'  
con nao' yeyac xmose'na' na' yeyacde'.

9Na' Jesúsen' cate' bende' diža' dan'  
gose' bene' migw che' xan soldadon' le',  
bebande' na' beyechje' gože' bene' zan ca'  
zjanao' le':

—Žia' le'e ne toze bene' Israel bina'  
šejnilaže' neda' ca' chejnilaže' benga bi  
naque' bene' Israel.

10Nach jaya'ac bene' ca' gwseła' xan  
soldadon'. Cate' besyežine' liže'na' ba  
beyaque' xmosen'.

**Jesúsen' bosbane' xi'in  
to no'ole güezebe**

11Jesúsen' gwyeje' to yež dan' nzi'  
Naín len bene' ca' zjanaque' le' txen  
na' zan bene' yoble. 12Ba' zja'aque'  
galaže' par yesežine' cho'a puert che  
yežna' cate' besele'ede' chesechoj xonj  
bene' cho'a puerten' zjanlene' to bene'  
guat. Na' ben' goten' naque' bene' tliša',  
na' xne'en naque' no'ole güezebe. Na'  
bene' zan bene' lo yeža' zja'aclene' xna'  
bene' guaten'. 13Na' cate' ble'e Xanchon'  
no'olen', beyaše'de' le' na' gože'ne':

—Bitw cuežo'.

14Nach gwyeje' jaxoa ne'en lo yagla'  
gan' xoa bene' guata'. Nach bene' ca'  
zjanlen le' gosebeze'. Na' gože' bene'  
guata':

—Bene' güego', neda' žia', beyas.

15Nach bene' guaten' gwchi'e na' gw-  
zologüe' benie'. Na' Jesúsen' beyone' le'  
lo na' xne'e. 16Na' yogo'lol bene' ca' be-  
sežebe' dan' beban bene' guata' nach  
gosexene' Diosen' gosene':

—Ba bla' to bene' blao ga zoacho,  
bene' choe' xtiža' Diosen', na' Diosen'  
ba gwsele'ne' cont gaclene' chio' naccho  
nación che'.

17Ca' nac dan' ben Jesúsen' gos gwłalj  
diža' chen' doxen Judea na' yogo'lol yež  
ca' dan' zjanita' galaže'.

**Juanna' gwsele' chope ben' gosaque'  
le' txen gan' zoa Jesúsen'**

(Mt. 11:2-19)

18Nach bene' ca' zjanaque' txen len  
Juanna' jaseye'lene' le' diža' yogo'lol  
ca' nac dan' chon Jesúsen'. Nach gox  
Juanna' chope bene' ca' 19nach gože'  
legaque':

—Le šja'ac gan' zoa Jesúsen' na' ye'Ine': "¿Len' naco' ben' chbezto' se'la' Diosen' o še cheya'la' cuezchto' yid bene' yoble?"

<sup>20</sup> Nach bene' ca' chope cate' besežine' gan' zoa Jesúsen' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' se'la' Diosen' o še cuezchto' yid bene' yoble.

<sup>21</sup> Šlacte ne' nita' chope bene' ca', Jesúsen' beyone' bene' zan bene' ca' chesačsene na' bene' chese'ede' yižgüe' gual. Lecze bebeje' da' xigüe' da' zjayo'o zjanyaz yichjlaždao' bene' zan. Na' bene' cont besyele'e zan bene' lchoł. <sup>22</sup> Nach Jesúsen' boži'e xtiža' bene' ca' gwsela' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no bene' lchoł, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bos-bana' no bene' guat, na' ba benele choa' diža' güen len bene' yaše' ca'. <sup>23</sup> Mbalaz zoa bene' chejle'e chia' na' bi chdebde'.

<sup>24</sup> Na' cate' besyeya'ac bene' ca' gwsela' Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Šayichj šayen chaque'? Bi naque' ca'.

<sup>25</sup> ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'. <sup>26</sup> ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios. <sup>27</sup> Che benga nyojen le'e Xtiža' Diosen' žan:

Neda' Dios se'la' to bene' cuialagüe' laguo' güe'e xtižon'

cont cate' yido' ba nita' bene' yesonxene' le'.

<sup>28</sup> Chnia' le'e, notech no benach na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', la'czla' bi naque' bene' blao, gwžin ža cate' šejni'ichde' chia' clet ca Juanna'.

<sup>29</sup> Ba bzoa Juanna' bene' zan nis na' len bał bene' güechixjw. Na' yogo' bene' ca' gosacbe'ede' Diosen' zejczje' to liča dan' gwsele' Juanna' jatixjue'ede' le-gaque' yesyetinjde' xtola'gaque'. <sup>30</sup> Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetingde' xtola'gaquen' can' goclaže' Diosen'. Bi gosaclaže' gwzoa Juanna' legaque' nis. <sup>31</sup> Nach Jesúsen' gože' legaque':

—¿No gwsacalebda' le'e zoale na'a? ¿No chon can' chonlen'? <sup>32</sup> Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': "Ba bcuežto' bžejo, neca bya'ale, na' ba bilyaše'to', neca gwchežle." <sup>33</sup> Juan ben' chzoa bene' nis bide' laole nga, bitw güe'ej gwdag-wšagüe' can' chese'ej chesagw bene' yoble, na' neca güe'eje' vino, nach gwnale che': "Yo'o nyaz da' xigüen' yichjlažda'ogüe'." <sup>34</sup> Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwsela' Diosen' golja' benach. Na' lecze žale naca' migw che bene' güechixjw ca' na' migw che nochle bene' güen da' xinj. <sup>35</sup> Perw na' bene' chosozenag che Diosen' zjanape' to yela' sina' na' chesone' cont nacbia' Diosa' naque' la'zelagüe' bene' sina'.



**Jesúsen' gwyje' liž  
Simón bene' fariseo**

<sup>36</sup>To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. <sup>37</sup>Na' to no'ole lo ciudan', no'ole zle', gwneзде' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. <sup>38</sup>Na' jabigue' galaže xni'a Jesúsen' na' gwcheže' na' nis xchež chen' bžonen ni'a Jesúsen' gwbišen. Na' bxie' ni'ena' len yiša' yichje' na' bnopen' na' gwdeben' set zixen'. <sup>39</sup>Na' ben' goxe' Jesúsen' ližen', cate' ble'ede' can' chon no'ola' na' godce': "Šaca' benga naque' to bene' choe' xtiža' Dios, guacbe'ede' no'olen' chgan ni'ena' naque' no'ole zle'". <sup>40</sup>Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

<sup>41</sup>Jesúsen' gože'ne':

—Gwzoa to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario.

<sup>42</sup>Na' chopte bene' ca' ne toe' ca de chegaque' cont yeseyixjue' xyan'. Na' ben' gwlej mechon' gwlejiyichje' dan' chesale' chen'. Gwnašc neda', žnoe' bene' ca' chope' gosacchde' che'?

<sup>43</sup>Nach Simónna' gože'ne':

—Šeca ben' goc xya chen' da' xench na' gwlejiyichjen'.

Jesúsen' gože'ne':

—Da' li can' ba gwnao'na' naquen.

<sup>44</sup>Nach Jesúsen' gwyechje' gwne'e no'ola' na' gože' Simónna':

—ŽChle'edo' no'ole nga? Neda' ba gwyo'a ližo' nga na' bi beno' nis chib ni'a,

perw no'ole nga ba gwdbibe' ni'an' len nis xchež chen' bxien' len yiša' yichje'. <sup>45</sup>Bi bnopo' neda', perw na' no'ole nga cate' bla'atia' gwzologüe' chnope' ni'a nga. <sup>46</sup>Bi gwdebo' set yichja', perw no'ole nga ba gwdebe' set zix ni'a nga. <sup>47</sup>Na' žia' le', xtole'na' gosaquen da' zan, perw ba bezi'xena' che'. Da'nana' chacchgüede' neda'. Bene' bi žinlaže' xtole'na' ca xtole' no'ole nga, cate' yezi'xena' che' bitw gactecde' neda'.

<sup>48</sup>Nach gože' no'olen':

—Ba bezi'xena' xtole'na'.

<sup>49</sup>Nach bene' ca' chesagw len Jesúsen' txen lo mesen' gwzolao chese' lježe':

—ŽNox benga chacde' le'na' chezi'xene' xtole'na' benachen'?

<sup>50</sup>Nach gož Jesúsen' no'ola':

—Dan' chejnilažo' neda' da'nana' ba de yela' mban chio' toli tocane. Beyej to šagüe' to güen.

**No'ol ca' gosaclene' Jesúsen'**

**8**Na' gwdechle gwyje' Jesúsua' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen bene' šižinw ca' le', bene' ca' zjanzi' postlw. <sup>2</sup>Nach to xonj no'ole lecze zja'aclene' Jesúsen' bene' ca' ba beyone'. Ba'le' ba bebeje' da' xigüe' da' zjajo'o zjanyaz lo' yichjlažda'ogaque' na' yebale' ba beyone'ne' cate' gosacšende'. Na' toe' lie' María bene' Magdala, be-bej Jesúsen' gaže da' xigüe' gwyo'o gwyaz yichjlažda'ogüe'na'. <sup>3</sup>Nach lecze len ben' le Juana, xo'ole ben' le Chuza, na' Chuzan', gwyo'o lo' ne'e liž rey Herodes na' yežlio che' ca'. Na' lecze len ben' le Susana gwyejlene' Jesúsen', na' yezan bene' yezica'chle. Na' no'ol ca' bosochine' bite'teze da' gota' chegaque' cont bosonežjue' dan' byažje Jesúsen' len bene' ca' zjanaque' le' txen.

**Jempl che bene' goz trigon'***(Mt. 13:1-9; Mr. 4:1-9)*

<sup>4</sup>Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

<sup>5</sup>—To bene' güen žin jeze' trigw na' šlac zeje' chose' trigon' late' bin jasechazen do cho'a nezen', na' bosolej bosošošj bene' len, na' be žia xil be chaš le'e yaba gosagwban'. <sup>6</sup>Yelaten' jasechazen ga nac lo yej, na' cate' beselan' na' gosebizen, le gague bi gopa' den'. <sup>7</sup>Yelaten' jasechazen ga nac lo yag yeše', na' gosecha'on txen, na' bosolo'le' yag yeše' ca' len. <sup>8</sup>Perw na' yelaten' jasechazen ga nac yo šagüe' na' beselan', na' ba'len gosebían to gayoa güeje.

Na' beyož be'e diža' quinga gwne' zižje gože' legaque':

—Le'e žia nagle da' chene, le gwzenag xtiža'na'.

**Jesúsen' gwne' bixchen' bi'e jempl cate' bzejni'ide' bene'***(Mt. 13:10-17; Mr. 4:10-12)*

<sup>9</sup>Nach bene' ca' zjanaque' Jesúsen' txen gosenabde' le' bi zejen jempl da' ba bi'e. <sup>10</sup>Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw bene' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden'.

**Jesúsen' bzejni'ide' bi zejen jempl che bene' goz trigon'***(Mt. 13:18-23; Mr. 4:13-20)*

<sup>11</sup>Na' ca nac jempl nga zejen quinga: Ca dan' byažen zejen xtiža' Dios. <sup>12</sup>Na' bin dan' besego'onen chanezen', ze-

jen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban čhegaque' toli' to-cane. <sup>13</sup>Na' bin dan' besego'on ga nac lo yej zjanaquen ca bene' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal čhegaque' la' chesebejyichjte' xtižen'. <sup>14</sup>Na' bin dan' besego'onen ga nac lo yag yeše', zejen ca bene' ca' ba gosende' xtiža' Diosen', perw šlac zjambane' chesyela' chesyžejde' na' chese'nde' yeseni'e, na' chesede' cheson-teze' con da' žazen čhegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejnilaže' le' ca cheyala'. <sup>15</sup>Na' da' ca' besego'onen lo' yo šagüen', zejen ca bene' cate' chesende' xtiža' Diosen' chesezi'en chesonen' čhegaque', na' chesejnilaže' le' do yichj do laže', na' chesechejde' bite'tez dan' chac čhegaque' cont chesone' can' che'ne Diosa'.

**Jempl che yi' dan' chguala'cho***(Mr. 4:21-25)*

<sup>16</sup>Na' Jesúsen' gwne':

—Notno gwguala' to yi' na' gw-dosen' to yeso', na' neca gwcuaše' yin' xan xcame'. San chde'en le'e ze'e cont gwswenin' len yogo'lol' bene' yeso'o lo' yo'o. <sup>17</sup>Le yogo'lol' da' ngaše' chia' neda', lenna' gwlo'elaon, na' yogo'lol' da' nono na' neze chia', žin ža yesenezden' na' yesejni'iden'.

<sup>18</sup>Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba nezde', yeca'na' Diosen' len.

**Xna' Jesúsen' len bene' biše'  
ca' besežine' gan' zoe'**

(Mt. 12:46-50; Mr. 3:31-35)

<sup>19</sup> Na' xna' Jesúsen' len bene' biše' ca' besežine' gan' zoa Jesúsen', gosaclačže' yeso'e, perw catec bene' zan že' gague goc latje yesežine' lagüe' na'ate. <sup>20</sup> Na' to ben' ze na' gože' Jesúsen':

—Xna'o len bene' bišo' ca' zjanite' chyo'o na' chesacláže' yedesene'e le'e.

<sup>21</sup> Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho'alao xtižen', bene' can' zjanaque' xna'a na' biša'.

**Jesúsen' bcueze' be' bdono' lo nisdao'**

(Mt. 8:23-27; Mr. 4:35-41)

<sup>22</sup> Na' goc to ža Jesúsen' gwyo'e to lo barcw len bene' ca' zjanaque' le' t xen. Na' gože' legaque':

—Laga'cho yešļa'ale nisdao'n.

Nach bosose'e barcon'. <sup>23</sup> Šlac zejen lo nisen' gwtas Jesúsen'. Nach gwzolao gwyechj to be' bdono' lo nisdao'n, na' gwzolao cheyož nis lo' barcon'. Na' besex-ožde' yesebiaye'e. <sup>24</sup> Nach bosyosbane' Jesúsen' gose'e le':

—¡Maestrw! ¡Maestrw! Bach chbiayi'cho.

Nach gwyase' na' gwdile' be' bdono' len nisdao'n, na' la' gosebe'žiten. <sup>25</sup> Na' gože' legaque':

—¿Nacxečen' bi chejle'le chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdao'n chosozenaguen che da' že'.

**To bene' Gadara yo'o nyaze' da' xigüe'**

(Mt. 8:28-34; Mr. 5:1-20)

<sup>26</sup> Na' besežine' laž bene' Gadara ca', to yež da' chi' šla'a distritw Galilean', laga'cho nisdao'. <sup>27</sup> Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo'o nyaz da'

xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. <sup>28-29</sup> Na' bene' gualaż che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzojx btine' gdenna' zan ni'a. Na' gosonen cont gwyeye' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zižje gwne':

—¿Bixčen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'. <sup>30</sup> Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'. <sup>31</sup> Nach da' xigüe' ca' gosata'yoen Jesús'a bi yeselen' lo yi' gabil'. <sup>32</sup> Na' to ya'a da' zoa gaļa'ze chesaš zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje. <sup>33</sup> Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjses coš ca' le'e ya'a gan' nita'ba' na' jaseლაžba' lo' nisdao' ga gosatba' gose'ejba' nis.

<sup>34</sup> Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yix'e, gose'e legaque' can' ba goquen. <sup>35</sup> Nach ja'ac bene' jasene'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gaļa'ze cuit Jesúsen' nyaz xałane', na' ba bezoa yichjlažda'ogüe' binlo. Na' besežebe'. <sup>36</sup> Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da'

xigüen' na' can' ba beyaque'.<sup>37</sup> Nach yogo'lo' beñe' ca' že' gan' mbane yež Gadaran' jasetayoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e.<sup>38</sup> Na' bena' beyaque cate' Jesúsen' bebeje' da' xigüe' ca' goso'o gosazen yichlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne'.

<sup>39</sup>—Beyej ližo' na' jayež beñe' lo' yo'o čho' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

**Jesúsen' beyone' xi'in Jairo na' beyone' yeto no'ole beñe' gwdane' xe'**

(Mt. 9:18-26; Mr. 5:21-43)

<sup>40</sup> Na' cate' Jesúsen' be'lague' nisdaon', beñe' zan ba nita' chesebeze' le'. Chesye-bechgüede' da' bežine' na'.<sup>41</sup> Na' bžin to beñe' le' Jairo, ben' nac to beñe' gwnabia' čhe yodao' čhe yežna'. Na' bzoa xibe' lao Jesúsen' gota'yoede' le' šejlene' le' liže',<sup>42</sup> le ba zoa gat bi' no'ol čhe'. Nacbe' bi' tliša', na' šižinw izguebe'. Na' šlac zej Jesúsen' len le', beñe' zan gosebiadi'e le' na' bosochichgüe' le'.

<sup>43</sup> Na' len to no'ole ba goc šižinw iz chzoe' gwba'o' na' ba benditje doxen xmechue' len beñe' güen rmed ca'. Na' notno goc gon le' rmed.<sup>44</sup> Na' gwbiga' no'olen' cože' Jesúsen' na' gwdane' lox xen', nach la' gwlezte gwba'o' dan' zoen'.

<sup>45</sup> Na' gwna Jesúsen':

—¿Non' gwdan neda'?

Na' ne toe' ca' gosečebe' še ba gosegane' le'. Nach Pedron' len beñe' ca' zja'aclen Jesúsen' gose'e le':

—Maestrw, beñe' zan beñe' za'ac nga chosochie' le' na' chosožigue' le' nile na'le. ¿Bixchen' čnabo' no gwdan xaon'?

<sup>46</sup> Nach Jesúsen' gože' legaque':

—To beñe' ba gwdane' neda'. Čacbe'eda' ba beyacde' len yela' guac chia'na'.

<sup>47</sup> Nach no'olen' cate' gocbe'ede' cbi bgaše' dan' benen', nach gwbigue' lao Jesúsen' do čaž čžebe' na' bzoa xibe' lagüe'na', be'e diža' lao yogo' beñe' ca' že'na' bixchen' gwdane' le' na' can' goc la' beyacdede'.<sup>48</sup> Nach gož Jesúsa' no'ola':

—Xi'ina', ba beyacdo' dan' čejnilažo' neda'. Beyej binlo.

<sup>49</sup> Ne' choe'te Jesúsa' dižan' ca' cate' bžin to beñe' gwza' liž Jairo ježe' le':

—Ba got bi' no'ol dao' čhion'. Bich gondo' Maestro'a' zed.

<sup>50</sup> Perw cate' bene' Jesúsen', na' gože' Jairo:

—Bitw žebo', con gwyejnilaže' neda' na' yeyaquebe'.

<sup>51</sup> Na' cate' besežine' liž Jairona', Jesúsen' bi be'e latje yeso'o zan beñe' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o.<sup>52</sup> Na' ba čičhua' žaš na' yogo' beñe' ca' že'na' chesebežchgüe'. Na' Jesúsen' gože' legaque':

—Bitw cuežle. Biña' gatbe', san čhtasbe'.

<sup>53</sup> Na' bosoxiže' gosonle' čhe' da' zjañezde' ba gotbe'.<sup>54</sup> Perw Jesúsen' bežue' taca' bi' no'ol guaten' na' bol güiže'be' gože'be':

—No'ol dao', beyas.

<sup>55</sup> Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'.<sup>56</sup> Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

**Jesúsa' gwsele' beñe' šižinw ca' jasedixjue'ede' xtizen'**

(Mt. 10:5-15; Mr. 6:7-13)

**9** Jesúsen' botobe' beñe' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebaje' da' xigüe' lo'

yichjlaždao' bene', na' lece ca' besyeyone' bene' ca' chesacsene. <sup>2</sup>Na' lece bene' mandaw šjasedixjue'ede' Diosa' nabi'e yichjlaždao' bene' yosozenag che'. Na' bene' mandaw yesyeyone' no bene' güe'. <sup>3</sup>Na' gože' legaue':

—Bibi goxe'le tnez. Bitw goxe'le xis da' gwchiše'le, neca gua'le bzod, ne yet, ne mechw, na' bitw gua'le yeto xcamisle. <sup>4</sup>Cate' žinle to liž bene', na'ze yega'anle šlac zoale lagüe yeža'; cate'ch yeza'le yeža', cana'ch yeza'le latja'. <sup>5</sup>Na' še zoa ga bi yosolebe' le'e, cate' yeza'le na', le cuibe ni'alen' yo bište cont nacbia' malen' chesone' bi chosozenague' xtiža' Diosen'.

<sup>6</sup>Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che Jesús'en na' besyeyone' no bene' güe'.

### Ba gosote' Juan ben' bzoa bene' nis

(Mt. 14:1-12; Mr. 6:14-29)

<sup>7</sup>Na' gobernador Herodes goque' tole bende' yogo'loł da' güen da' chon Jesús'en. Gocžejlaže', le bał bene' gose'e le' ba beban da' Juan ladjo bene' guat ca'. <sup>8</sup>Na' yebałe' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebałe' chesene' yeto bene' be' xtiža' Diosen' cani'te ba bebane' ladjo bene' guat ca'. <sup>9</sup>Na' Herodesen' gwne':

—Neda' bena' mandaw gosechogue' yen Juanna', perw žnoxen' chon da' güen ca dan' chesoe' bene' diža'?

Na' gwdiljwlaže' nacle gone' cont le'ede' Jesús'en'.

### Bguagw Jesús'en' gayo' mil bene'

(Mt. 14:13-21; Mr. 6:30-44; Jn. 6:1-14)

<sup>10</sup>Na' cate' besyežin postlw ca' gan' zoa Jesús'en' nach gose'e le' can' ba gosonen'. Na' gwchi'e legacze' na' ja'aque' to latje gan' mbane yež Betsaida. <sup>11</sup>Cate' gosacbe'e bene' ca' nita' gan' zoa Jesús'en' ba gosa'aque' len bene' ca' zjanaque' le' txen, nach zja'aque' zjana'ogüe' legaue'.

Jesús'en' blebe' legaue' na' bsd blo'ede' legaue' Diosen' nabi'e yichjlaždao' bene' yosozenag che', na' beyone' bene' ca' chesacsene.

<sup>12</sup>Cate' gwzolao gwxo' gwbizen', nach bene' šižinw ca' zjanaque' Jesús'en' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nyechj mbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

<sup>13</sup>Perw na' gož Jesús'en' legaue':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga bel ya'a de checho, lete še si'chon cont gaquen yesagw yogo'loł bene' quinga.

<sup>14</sup>Gosene' ca' le že' ca gayo' mil bene' byo, bi cuent no'ol ca' len bidao'. Nach Jesús'en' gože' bene' ca' zjanaque' le' txen:

—Le gon mandaw yesebe' šiyon güej bene' ca'.

<sup>15</sup>Nach gosone' mandaw gosebe' yogo' bene' ca', <sup>16</sup>na' Jesús'en' gwxi'e gayo' yetextilen' na' chope bel ya'ana', na' gwne'e yabale, be'e yela' choxcen che Diosen' na' bzoxjen' na' be'en bene' šižinw ca' cont goso'e che to to bene' ca'. <sup>17</sup>Na' gosagüen' ca' goseljde'. Nach bososše'e šižinw žome len yetextil bixjw na' len late' güeje bel da' bega'an.

### Pedron' gwne' Jesús'en' naque' bene' gwseła' Dios

(Mt. 16:13-19; Mr. 8:27-29)

<sup>18</sup>Na' gozac yeto, bene' ca' zjanaque' Jesús'en' txen zjanite' len le' lchojiže, na' Jesús'en' chol güiže' Diosen'. Nach gože' legaue':

—¿Bi chesena bene'? ¿Non' naca' neda'?

<sup>19</sup>Na' gose'e le':

—Bałe' chesene' naco' da' Juan ben' bzoe' bene' nis. Na' yebałe' chesene' naco'

Elías ben' be' xtiža' Diosen' cani'. Na' yebałe' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

<sup>20</sup>Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

### Jesúsen' gwdixjue'ede' gate'

(Mt. 16:20-28; Mr. 8:30-9:1)

<sup>21</sup>Nach Jesúsen' gože' legaque' nono yese'e naque' ben' gwlej Diosen' cont yedenabi'e. <sup>22</sup>Na' gože' legaque':

—Da' zan da' saca'zi'a, neda' naca' ben' gwsela' Dios golja' benach. Na' bene' gole blao ca' chesenabia' nación chechon' na' b̄xoz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

<sup>23</sup>Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyala' cuejyichj cuine' yogo' ža, la'czla' saca'zi'e, na' gone' can' nia' neda'. <sup>24</sup>Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocane. <sup>25</sup>¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocane?

<sup>26</sup>Na' note'tez bene' še cheto'ede' par ye'e lježe' chejnilaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' benach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'. <sup>27</sup>Da' li žia' le'e, balle nita'le nga na'a bina' gatle cate' žin

ža le'ele gwlo'e Diosen' yela' gwnabia' chen'.

### Jesúsen' goque' ca to be'ni'

(Mt. 17:1-8; Mr. 9:2-8)

<sup>28</sup>Nag goc to xman gwna Jesúsen' ca', gweje' to lo ya'a jel güiže' Diosen' na' gwche'e Pedro len Juan len Jacobo. <sup>29</sup>Na' šlac chol güiže' Diosen' goc cho'alagüen' ca da' bža'. Na' xałanen' beyaquen šiš xila' na' goctiten. <sup>30</sup>Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bososałlene' le'. <sup>31</sup>Goso'e diža' gosene' ba zoa gat Jesúsa' Jerusalén. Na' be'ni' che Diosen' gwechjen bsenin' legaque'. <sup>32</sup>Na' Pedron' len bene' ca' yechope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choelene' da' Moísesen' len da' Elíasen' diža'. <sup>33</sup>Na' cate' ba cheza' da' Moísesen' len da' Elíasen', Pedroa' gože' Jesúsen':

—¡Maestrw, leca güenna' zoacho nga! Gonto' šone ranšw, to chio', to che Moisés, na' yeto che Elías.

Con gwne' ca' sin ca bene' xbab. <sup>34</sup>Ne' cho'e Pedron' diža' cate' to bejw gwechjen legaque' na' besežebe' lagüe dan' goc ca'. <sup>35</sup>Na' lo' bejon' gosende' gwne' Diosen', gwne':

—Benga Xi'ina' ben chacda'. Le gwzenag che'.

<sup>36</sup>Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

### Beyon Jesúsen' to bi' gwyo'o gwyaz da' xigüe'

(Mt. 17:14-21; Mr. 9:14-29)

<sup>37</sup>Na' beteyo cate' ba besyeyetje' ya'ana' bene' zan jasešague' legaque' gan' nite'na'. <sup>38</sup>Na' toe' gwne' zižje, gože' Jesúsen':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'. <sup>39</sup> Chniz da' xigüen' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cane chsanen lebe'. <sup>40</sup> Ba gota'yoeda' bene' ca' zjanaque' le' txen cont yesye-beje' da' xigüen' yo'o nyazbe', perw bitw gosezaque'de'.

<sup>41</sup> Nach Jesúsen' gože' bene' ca' že' na':

—Le'e bene' bi chejnilaže', chonchguale clele! ¿Šna chyažjen soalena' le'e cont šejnilaže'le? ¿Batca' zelao na'lagua' le'e?

Nach gože' xa bidao'na':

—Ben' bidao' chion' nile.

<sup>42</sup> Na' šlac zjasane'be' lao Jesúsen', da' xigüen' benen cont gwyazbe' šon, na' bchix btojen lebe' lo yo. Na' Jesúsen' gwdi'le' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. <sup>43</sup> Na' yogo' ben' že'na' besyebande' cate' besele'ede' yela' guac che Diosen'.

**Da' yoble Jesúsen' gwdixjue'ede' gate'**

(Mt. 17:22-23; Mr. 9:30-32)

Na' besyebande' che yogo'lo' dan' chon Jesúsen', na' šlac nite' ca', Jesúsen' gože' bene' ca' zjanaque' le' txen:

<sup>44</sup> —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwse'la' Diosen' golja' benach.

<sup>45</sup> Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

**Gosacyože' noe' nacch blao**

(Mt. 18:1-5; Mr. 9:33-37)

<sup>46</sup> Na' bene' ca' zjanaque' Jesúsen' txen gosacyože' noe' nacch blao. <sup>47</sup> Jesúsen' gocbe'ede' xbab dan' chesonen', na'

bexue' to bidao' na' bzeche'be' cuite'na' <sup>48</sup> na' gože' legaque':

—Note'teze bene' chone' güen len to bidao' ca bi' nga neche' da' chejni-laže' neda', choncze' güen len neda'. Na' note'teze chon güen len neda' choncze' güen len Dios ben' gwse'la' neda'. Na' note'tez le'e cate' chonle xbab che cuinle bibi zaca'teclé, canan' ba nacle bene' blao.

**Bene' bi chon contr chio' txenczen' chone' len chio'**

(Mr. 9:38-40)

<sup>49</sup> Nach Juanna' gože'ne':

—Maestrw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca', le bi chone' chio' txen.

<sup>50</sup> Nach Jesúsen' gože'ne':

—Bitw gwžonle gone' ca', le še to bene' bi chone' contr chio', txenczen' chone' len chio'.

**Jesúsen' gwdi'le' Jacobo len Juan**

<sup>51</sup> Na' lagüe' ba zoa bagwze yezi' yeca'la Diosen' le', bechoglaže' šeje' Jerusalén.

<sup>52</sup> Na' gwse'le' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesúsen' len bene' ca' zjanaque' le' txen. <sup>53</sup> Perw bene' Samaria ca' bi bosolebe' Jesúsen' len bene' ca' nžague', le gosacbe'ede' zja'aque' Jerusalén. <sup>54</sup> Na' chope bene' ca' zjanaque' Jesúsen' txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsen':

—Maestrw, ¿che'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?

<sup>55</sup> Nach Jesúsen' gwyechje' gwdi'le' le-gaque' gwne':

—Le'e bitw nezele non' chnabia' yichjlažda'ole. <sup>56</sup> Neda' bitw za'a cont gwziaya'a benach, san za'a cont

gwnežjua'ne' yeļa' mban toli tocane, neda' naca' ben' gwsela' Diosen' golja' benach.

Nach ja'aque' yež yoble.

**Can' gož Jesúsen' bene' ca' gosaclaže' yesaque' le' txen**

(Mt. 8:19-22)

<sup>57</sup> Šlac zja'aque' na', to bene' gože' le':

—Sa'lena' le' gate'teže šejo'.

<sup>58</sup> Nach gož Jesúsen' le':

—Nita' xišna' beza' na' lecz chesyēžin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' benach.

<sup>59</sup> Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Benšca latje zgua'tec šjaycuaša'ne'.

<sup>60</sup> Na' gož Jesúsen' le':

—Bene' ca' zjanac yichjlažda'ogüe' ca che bene' guat, legaque' guaccze yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

<sup>61</sup> Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

<sup>62</sup> Jesúsen' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chne'e coscože'le šlac chgua'ane' goñ.

**Jesúsen' gwsele' gayonši bene' šjasedixjue'ede' xtiže'**

**10** Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac chope güeje' to to yež ga za' šej le'. <sup>2</sup>Na' cate' za' yesa'aque' gože' legaque':

—Chyažje bene' zan yeseyixjue'ede' xtiža' Diosen', perw to chopga bene' nita'

yeseyixjue'eden'. Na' bene' yosozenag che Diosen' zjazaca'lebe' ca to coseš xen da' chyažje yedobe. Da'nana' le nabe Xancho Diosen' sela'che' bene' yesaclene' chio' yotobcho coseš chen'. <sup>3</sup>Le šja'ac, le neda' chsela' le'e šjatixjue'ele xtižen' len bene' ca' chesegue'ede' le'e. Zaca'lebe' ca xila' dao' ben' chja'ac gan' že' beco'yo.

<sup>4</sup>Bitw gua'le bzod, ne mechw, ne yel, na' bi šele gua'le bene' tiox bene' yežagle chanez. <sup>5</sup>Note'tez liž šo'le zgua'tec nale: "Chnablaže'šca' soa cuezle binlo len xbab dan' yo'o lo' yichjlažda'ole, le'e nita'le nga."

<sup>6</sup>Na' še zoa to bene' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwñablaže'len'.

<sup>7</sup>Na' lo' yo'o na'teže yega'anle. Bitw tale to to yo'o. Le ye'ej le gagw bite'teže da' chesone' ye'ej gagwle. Ca to bene' güen žin cheya'la' si' laxjue', lecz ca' le'e zaca'le yesone' da' ye'ej gagwle.

<sup>8</sup>Na' cate' žinle to yež ga chesonxene' le'e, le ye'ej le gagwteže da' yesone' le'e. <sup>9</sup>Le yeyon bene' güe' bene' nita' yež gan' žinle, na' le' ye'e: "Ba bžin ža gwzenagle che Diosen' cont nabi'e yichjlažda'ole."

<sup>10</sup>Perw na' cate' žinle to yež ga bi yosolebe' le'e, le šja'ac la cay na' le ye'e: <sup>11</sup>"Bište che laže nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'."

<sup>12</sup>Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesale'chde' clcl ca bene' Sodomana'.

**Bene' ca' bi chosozenag xtiža' Jesúsen'**

(Mt. 11:20-24)

<sup>13</sup>Nach gozna Jesúsen':

—iNyaše'chguaze gac che le'e bene' Corazín! iNyaše'chguaze gac che le'e



beṇe' Betsaida! Beṇe' ca' nita' Tiro na' Sidón ba' besyetinjde' xtoḷa'gaque' šaca' blo'egacda'ne' yela' guac chia' ca da' ba blo'eda' le'e. Na' bosošē'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beṇe' ba boša' yichjlažda'ogüen'. <sup>14</sup>Saca'zi'chle clev ca beṇe' že' Tiro na' Sidón cate' žin ža gac juisyw. <sup>15</sup>Le'e nita'le yež Capernaum chonle xbab šeca Diosen' gončhgüe' le'e yela' bala'an. Bi gone' le'e yela' bala'an san gone' le'e castigw toḷi tocaṇe dan' bi chejle'le chia'.

<sup>16</sup>Nach Jesúsen' goze'e beṇe' gayonši ca':

—Bene' gwzenag xtiža'len' lece gwzenague' xtiža'na', na' beṇe' goncze yichjlagüe' bi gwzenague' xtiža'len', lece bi gwzenague' chia' neda'. Na' beṇe' goncze yichjlagüe' bi gwzenague' xtiža'na', lece bi gwzenague' xtiža' Diosen' ben' gwsela' neda'.

### Besyěžin beṇe' gayonši ca'

<sup>17</sup>Beṇe' gayonši ca' cate' beyož jasedixjue'ede' xtiža' Jesúsen', besyežine' gan' zoen' na' besyebchgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' beṇe' choe'to' lao'.

<sup>18</sup>Na' gože' legaue':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. <sup>19</sup>Ba beṇa' le'e yela' guac cont gwlej gwšošjle no bel znia na' no bejxoni' na' cont soele Satanásen' bi gonnen le'e gan. Na' bibi de da' gonnen le'e zi'. <sup>20</sup>Perw bi yebele neche da' xigüen' chosozenaguen chele, san le yebe da' ba bzoj Diosen' lale le'e libr gan' nyoj la yogo'loḷ xi'ine' ca'.

### Bebechgüe Jesúsen'

(Mt. 11:25-27; 13:16-17)

<sup>21</sup>Za' beyožte gwna Jesúsen' ca' nach ben Spiritw che Diosen' cont bebechgüede' na' boḷ güiže' Diosen', gwne':

—Xa', le' chnabi'o beṇe' ca' že' yaba na' yežlion'. Na' choṇa' yela' choxclen chio' ba bzejni'ido' baḷ beṇe'. Ba bzejni'ido' beṇe' ca' gosacbe'ede' cheseyažjde' no gwsed gwlo'e legaue'. Na' bitw bzejni'ido' beṇe' ca' cheson xbab zjanaque' beṇe' sina' na' beṇe' zjanejni'i. Beno' ca' Xa', le can' gwyazlažo'.

<sup>22</sup>Nach gože' beṇe' ca' že'na':

—Xan' ba bene' lo na' chona' cont chombia' beṇe' le'. Le' nombia'yane' neda', na' neda' nombia'yana' le'. Na' beṇe' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

<sup>23</sup>Na' gwyechj Jesúsen' gwne'e beṇe' ca' zjanaque' le' t xen na' gože' legaue':

—Mbachgua zoale chle'ele neda' na' chle'etele da' ca' chona'. <sup>24</sup>Na' chnia' le'e zan beṇe' ca' goso'e xtiža' Diosen' cani' len beṇe' zan rey gosaclaže' yesele'ede' dan' chle'ele na'a, perw bitw goḷa' yesele'eden', na' gosaclaže' yesende' dan' chenelen', perw bitw goḷa' yesenden'.

### Jempl che to beṇe' güen, beṇe' Samaria

<sup>25</sup>Na' gwžoža' to beṇe' nsedchgüe' ley dan' bzoj da' Moisés, goclaže' cueje' Jesúsen' diža' da' gwchine' contr le' na' gože'ne':

—Maestrw, žbi da' cheyaḷa' gona' cont gata' yela' mban chia' toḷi tocaṇe'?

<sup>26</sup>Na' gož Jesúsen' le':

—ŽBi nyoj le'e leyna'? ŽNac žan?

<sup>27</sup>Na' ben' chejni'ichgüe' leyna' boži'e xtiža' Jesúsen', gože' le':

—Ley che Diosa' žan: “Cheyaḷa' gaquecho Xancho Diosen' con ca zelao chejni'icho, do yichj do laže'cho, do

fuers valor checho, na' gaque lježcho ca chaque cuincho.”

<sup>28</sup> Nach gož Jesúsen' le':

—Da' licze can' ba gwnao'na'. Can' cheyała' gono' cont bano' toli tocane.

<sup>29</sup> Na' bena' goclaže' gwlo'ede' choncze' can' ža leyna', na' gože' Jesúsen':

—¿Non' nac bene' lježa' ben' cheyała' gacda'?

<sup>30</sup> Na' Jesúsen' gože' le':

—To bene' beza' Jerusalén par yežine' yež Jericó, jasyxen bene' gwban le'. Na' goseyine' xalane' na' gosot goseyine' le'. Nach besyeya'aque' bosocua'ane' le' cacze to bene' guat. <sup>31</sup> Na' to bxož che bene' Israel ca' gwdie' lo neza', na' cate' ble'ede' bena' dena', nach gwcuae' to šla'ale neza' na' con gwdeze'. <sup>32</sup> Lecz ca' ben to diaža che da' bene' Leví ca'. (Xi'in diaža che da' Leví yo'o lo na'gaque' chesone' mandaw lo' yodao' blao.) Bena' zeje' tnez na' cate' ble'ede' ben' dena', na' gwcuae' to šla'ale neza' na' con gwdeze'. <sup>33</sup> Nach to bene' Samaria ngüe'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše'laže'. <sup>34</sup> Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le' cože' xpurrue' na' beche'e le' ga zoa to mesón ga gwne'e le'. <sup>35</sup> Na' beteyo cate' beza' bene' Samaria, gwleje' mechw da' zaca' ca' chop ža žin na' bnežjuen' xan mesónna' ca' laxjue', na' gože' le': “Gwna' benga na' še žan bichle da' gono' gastw na' chixjuan' cate' zeza'a.”

<sup>36</sup> Beyož be' Jesúsen' diža' can' goc che ben' jasyxen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone' gocde'ne' ca' bene' lježe'?

<sup>37</sup> Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyxen gwban ca'.

Nach gož Jesúsen' le':

—Lecze ca' cheyała' gono' le', yeyaše' yeži'ilaže'do' yogo'loł bene'.

### Jesúsa' jane'e Marta na' María

<sup>38</sup> Na' gosego'oche' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'. <sup>39</sup> Na' zoa to bile' le María. Na' Marian' gwchi'e cuít Jesúsen' bzenague' xtiže'na'. <sup>40</sup> Perw na' Martan' belalchgüede' bsini'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandaw gaclene' neda'.

<sup>41</sup> Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan. <sup>42</sup> María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyała' gonle.

### Jesúsen' blo'ede' can' yosoł güiže' Diosen'

(Mt. 6:9-15; 7:7-11)

**11** Na' gwzoa Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyała' yol güižto' Diosen', can' bzejni'i da' Juanna' bene' ca' gosaque' txen len le'.

<sup>2</sup> Na' Jesúsen' gože' legaque':

—Cate' yol güižle Diosen', quinga nale: Xato' bene' zoa yaba, chnabto' yogo'loł bene' yesonxene' le'. Zelaže'to' nabi'o yichjlaždao' yogo' neto' benačh.

Gacšca can' chazlažo' yežlio nga can' chac yabana'.

<sup>3</sup> Ca' nac dan' che'ej chagwto' tža tža, benšca cheto' na'a.

<sup>4</sup> Na' beži'xenšca cheto', le lencze neto' cheži'xento' che ljež benačhto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal, san bcuase bcue'ejšca neto' len da' mala'.

<sup>5</sup>Nach gož Jesúsen' legaque':

—Le gon xbab še šejle liž bene' migw chele do chel na' ye'lnē: “Migw chia', beňšca neda' šone yetextil. <sup>6</sup>Ba bla' to bene' migw chia' bene' za' zito', na' bibi de chia' da' gua'ane' gagüe'.” <sup>7</sup>Na' chixe še migw chelen' yo'e lo' yo'ote yoži'e xtiža'len': “Bitw gondo' neda' zed, le ba nyeyjw cho'a yo'o na' ba deto' chtasto' len bi' cheto' ca'. Bi gac chasa' gona' dan' chyažjdo'.” <sup>8</sup>Chnia' le'e, la'czla' naque' migw chele, bitw ye'nde' chase' gone' dan' chyažjele, perw še gata'yoelne' šša na' chasšaze' gone' bite'tez da' chyažjele. <sup>9</sup>Na' chnia' le'e, še žan bi da' chyažjecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' cho'a yo'o che', na' necho cho'a yo'on cont saljue'. Na' ca'cze cheya'la' ye'le Diosen' cate' bi da' chyažjele o bi da' chaclaže'le gone'. <sup>10</sup>Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczen'. Na' note'tezle še žan chaclaže'le gac to da' gac, yoj güižle Diosen' can' chon to bene' chnie' cho'a yo'o, nach Diosen' gone' cont gacczen.

<sup>11</sup>'Na' le'e nacle xa' bidao', še xi'inle nabebe' le'e yetextil, ¿gwnežjwlebe' to yej? Na' še nabebe' le'e yid be' gagwbe' ¿gwnežjwlebe' to be xigüe'? <sup>12</sup>Na' še nabebe' le'e to žit gagwbe' ¿gwnežjwlebe' to bexjoni'? Cabi gonle ca'. <sup>13</sup>La' nacle bene' mal, nezceze gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' bene' chnab len.

**Gosene' Jesúsen' bebeje' da' xigüe' len yela' guac che Beelzebú**

(Mt. 12:22-30; Mr. 3:19-27)

<sup>14</sup>Gwzoa to bene' gwyo'o gwyaz da' xigüe' yichjlažda'ogüe' na' benen cont bi

goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc bene'. Na' bene' ca' že'na' besyebanchgüede'. <sup>15</sup>Perw bale' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

<sup>16</sup>Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yenezde' še da' licze Diosa' gwsele' le'. <sup>17</sup>Perw Jesúsen' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernna' bi sibi'e. Na' še bene' to lo' yo'o yesechoje' chople na' yesedile' legacze', gague šša yesenite' txen. <sup>18</sup>Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' bene'. <sup>19</sup>Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesybeje' da' xigüe' zjajo'o zjanyaz yichjlaždao' bene'. Bene' lježle ca' yese'e le'e clelen' žale. <sup>20</sup>Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

<sup>21</sup>'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'. <sup>22</sup>Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

<sup>23</sup>'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

**Da' xigüe'na' yeyo'on da' yoble  
lo' yichjlaždao' bene'**

(Mt. 12:43-45)

<sup>24</sup>Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: "Da' yoblecze šjayo'a lo' yichjlaždao' ben' gan' ba gwyo'a." <sup>25</sup>Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo, <sup>26</sup>nach šjaytoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clel ca dan' ba goc che' da' nechw.

**Mbalaz nita' bene' ca'  
chosozenag xtiža' Diosen'**

<sup>27</sup>Šlac be' Jesúsen' diža' quinga, gwzoa to no'ole gachoł bene' ca' že' gan' bsed blo'ede', na' no'ola' gwne' zižje, gože'ne':  
—Mbalaz zoa no'ola' gwxañ le' na' bguaže' le'.

<sup>28</sup>Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

**Bene' bi chosozenag che Diosen'  
chesenabe' gon Jesúsen' to yela' guac**

(Mt. 12:38-42; Mr. 8:12)

<sup>29</sup>Na' bene' zan gosebigue' gosechjde' Jesúsen', nach Jesúsen' gwne':

—Le'e zoale na'a nacchgualē bene' laždao' xi'a. Chnable gona' yeto yela' guac da' le'ele cont nezele še Diosa' gwsele' neda', perw bi gona' ca dan' chnablena', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. <sup>30</sup>Na' ca dan' goc che Jonásen' blo'en bene' Nínive ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' benač. <sup>31</sup>Cate' žin

ža gon Diosen' castigw che yogo'loł bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw chzenagle chia'. <sup>32</sup>Na' cate' žin ža gon Diosen' castigw che yogo'loł bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le legaque' besyetinjde' xtołagaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle chia'.

**Dan' bsed blo'e Jesúsen'  
naquen ca to yi'**

(Mt. 5:15; 6:22-23)

<sup>33</sup>Notno gwguala' to yi' na' gwdosen' caj, na' nēca gwcuāšen' ga yoble ga nono le'e len, san chde'en le'e ze'e cont gwseñin' len yogo'loł bene' yeso'o lo' yo'ona'. <sup>34</sup>Žia yejlaochō cont le'echo. Con še bibi chaquen chle'eczecho binlo. Perw še nchołcho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, choł nac yichjlažda'ochon'. <sup>35</sup>Da'nan' le gon cont gacle bene' laždao' güen, na' šo' be'ni' che Diosen' yichjlažda'ole. <sup>36</sup>Še nyeni' yichjlažda'olen' na' bibi da' mal yo'on, gwseñi'czen xnezle can' chseni' to yi' ga nac choł.

**Jesúsen' gože' bene' fariseo ca'  
zjanape' doła' na' len bene'  
ca' chososed chosolo'e ley**

(Mt. 23:1-36; Mr.

12:38-40; Lc. 20:45-47)

<sup>37</sup>Cate' beyož be' Jesúsen' diža' quinga, to bene' fariseo gwche'e le' liže'

cont yesagüe'. Na' gwyo'o Jesúsen' liž bene' fariseon' na' gwchi'e cho'a mesen'.<sup>38</sup> Na' bene' fariseon' bebande' ble'ede' bitw bona' Jesúsen' cate' za' gagüe' can' cheson legaque' chesacde' chebe Diosen' legaque' dan' chesone' ca'.<sup>39</sup> Na' Xancho Jesúsen' gože' le':

—Le'e bene' fariseo nacle ca xiga' ye'en da' chchin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw.<sup>40</sup> Bicze bi chejni'ile. Chi' yichjle gacle xilaže' len cuerp chelen'. Lecz ca' cheyala' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'.<sup>41</sup> Le yeyaše' bene' na' le gwnežjo bi da' cheseyažjde'. Še gonle ca', nacbja' nacle bene' laždao' xilaže'.

<sup>42</sup> 'iNyaše'chguaze gac che le'e bene' fariseo! La'czla' chnežjwle Diosen' to part lao ši part che yix'e'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

<sup>43</sup> 'iNyaše'chguaze gac che le'e bene' fariseo! Chzelaže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

<sup>44</sup> 'iNyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nacbja' gan' xoa ba che bene' guaten', le ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanacbja'. Chosozenag bene' chele na' bi chesacbe'ede' nacle bene' laždao' zban.

<sup>45</sup> To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

<sup>46</sup> Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, įnyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

<sup>47-48</sup> 'iNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani! Chacle toze len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

<sup>49</sup> 'Da'n'an' Diosen' lao ye'la' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle ba'e' na' gwchi gwsacale yebale'.<sup>50</sup> Na' da' li ba chonle can' gwne' na'. Da'n'an' si'le castigw che ye'la' got che yogo' bene' ca' gosoe' xtižen' gwzolaon caten' gwxete yežlion' chžinten ža na'aža.<sup>51</sup> Zan bene' gosot bene' yoble legaque' gwzolaozen len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chy'o'o yodao' gan' chesote' beyix'e' cont chesonxene' Diosen'. Na' le'e mbanle na'a si'le castigw che ye'la' got che yogo' bene' ca'.

<sup>52</sup> 'iNyaše'chguaze nac le'e chsed chlo'ele ley che Diosen'! Bitw chzejni'ile bene' leyna' to licha can' naquen, neca chzenagle chen. Na' bene' chesaclaže' yosozenaguen', neca choe'le latje yosozenaguen'.

<sup>53</sup> Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža' <sup>54</sup> le gosaclaže' choj dižan' cho'e da' yosode'ede' yesagüe' xya che'.

### Yela' güexoayag che bene' fariseo

**12** Na' goc zan mil bene' besežague' gan' zoa Jesúsen', catec bene' zan besežag bosolej bosošoštje ni'a lježe'. Na' Jesúsen' zgua'tec gwzologüie' be'e diža' len bene' ca' zjanaque' le' txen, gože' legaue':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. <sup>2</sup>Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. <sup>3</sup>Da'nan' bite'teze da' gw-nale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

### Non' cheyała' žebcho

(Mt. 10:28-31)

<sup>4</sup>Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. <sup>5</sup>San zoa ben' cheyała' žeble, cheyała' žeble Diosen', le cate' bach beque'e yela' mban chele, lecze nape' yela' chnabia' cont yesele' le'e gabil'. Da' yoble chnia' le'e, cheyała' žeble Diosen'.

<sup>6</sup>Nezecho byin dao' ca' bibi zjazaca'tecba', perw na' Diosen' ne toba' bi chanlaže'. <sup>7</sup>Na' ca' nac chio', da' leca chaque Diosen' chio' neztede' bal yiša' yichj to tocho žia. Da'nan' bitw žeble, le zaca'ch le'e clal ca' yogo' byin dao' ca'.

### Cheyała' ye'cho bene' nombia'czcho Jesucriston'

(Mt. 10:32-33; 12:32; 10:19-20)

<sup>8</sup>Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' benach.

<sup>9</sup>Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque' neda' txen.

<sup>10</sup>Na' note'teze bene' še ne' yela' ya' chia' neda' naca' ben' gwsela' Diosen' golja' benach, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

<sup>11</sup>Na' cate' yeseche'exoxje' le'e lao bene' gwnabia' che yodaon' o' lao justis o' še lao nochle bene' gwnabia', bi cuec yichjle nac yoži'ile xtiža'gaquen' o' še nacle nale. <sup>12</sup>Lo hor na'teze gwzejni'i Spiritw che Diosen' le'e bin' cheyała' nalen'.

### Bitw cheyała' cuec yichjcho tlaoze bi da' de checho

<sup>13</sup>To bene' bchoje' ladjo bene' zan juisyw ben' zjanžag na', na' gože' Jesúsen':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyała' si'a.

<sup>14</sup>Na' Jesúsen' gože' le':

—Bitw naca' neda' juez chele. Bi cheyała' gua' neda' laze da' de chele.

<sup>15</sup>Nach gože' yogo'lo' bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o' la' bibi de checho bi da' chyažj chchinecho, gague da' can' nac yela' mban checho.

<sup>16</sup>Na' be'lene' legaue' to jempl, gwne':

—To bene' gwni'a gocchgua coseš che', <sup>17</sup>na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'šagua' coseš chian'.” <sup>18</sup>Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'. <sup>19</sup>Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na'

gona' legr." <sup>20</sup> Perw Diosen' gože' bena': "Chono' xbab da' bibi zaca'. Na'aže' bžin hor gato', na' ĩnola lo na' gac yogo' da' de chio'?" <sup>21</sup> Can' gac che not'ez beņe' še con chbec yichje' tloaze da' de che' šlac mbane' na' bi chone' da' chazlaže' Dios.

### Diosen' chapšie xi'ine' ca'

(Mt. 6:25-34)

<sup>22</sup> Na' gož Jesúsen' beņe' ca' zjanaque' le' t xen:

—Da'nan' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xałana'le. <sup>23</sup> Zaca'ch yela' mban chelen' ca yela' guagw. Lecze ca' cuerp chelen', zaca'chen ca xałana'le. <sup>24</sup> Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncua' no goš chegacba' ga že' da' yesagwba', perw na' Diosen' chguagwcze'ba'. ĩNacchle zaca' le'e ca be ca' zjažia xil! <sup>25</sup> Na' ne tole bi gac yoston cuinle gašje metr še con cue' yichje tonle. <sup>26</sup> Nezele bitw gac yoston cuinle, na' neca naquen da' zaca'. Da'nan' bi gacžejlaže'le che bica'chle da' chyažjele.

<sup>27</sup> Le gon xbab ca nac yej ca' da' zjaze yixe'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xałane'na' ca yela' xdan che yej ca'. <sup>28</sup> Diosen' none' xdan da' ca' ze yixen' la'czla' to chop žaze nitan' na' chosozeyen'. ĩNacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che! <sup>29</sup> Da'nan' bitw güe'laže'le cont gata' da' ye'ej da' gagwle. Bitw gacžejlaže'le chen. <sup>30</sup> Beņe' ca' bi chesonxene' Diosen' con chesoe'laže' che bi da' gata' yes'e'ej yesagüe' na' che xałana'gaque'. Perw Xacho Diosen' nezcede' bi da' ca' chyažjele. <sup>31</sup> Cheyala' güe'laže'le gwzenagle che Diosen' cont nabi'e yichjlažda'olen', na'

yogo' da' ca' chyažjele, goncze Diosen' len.

### Da' zaca'ch gata' checho yežincho yaba

(Mt. 6:19-21)

<sup>32</sup> Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e. <sup>33</sup> Le yeyote' da' de chele cont gata' da' gwnežjwle beņe' ca' cheseyaže. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac šo' beņe' gwban que'en, na' neca gac šo' be dao' gwžiyi' len. <sup>34</sup> Gan' de dan' chaquele nan' zoa yichjlažda'olen'.

### Cheyala' soa cuezcho batcan' yide Criston' yeto

<sup>35-36</sup> Le soa le cueze batcan' yida' yeto. Le soa can' nita' beņe' chesape' liž xan-gaquen' šlac zeje' to yela' güešagna'. Zjanyaz xałana'gaque' na' čala' yi'. Nach cate' yežine' na' nie' cho'a yo'on, na' la' yesesaljwte' cont yeyo'e. <sup>37</sup> Mba gac che beņe' ca' chesebeze' batcan' yežin xan-gaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yes'e'ej yesagüe'. <sup>38</sup> Mba gac chegaque' še chesebeze' batcan' yežine' la'czla' yežine' do čel o do šbal. <sup>39</sup> Le gon xbab che da' nga. Šaca' neze xan yo'on baten' žin beņe' gwban liže'na', le gwna'ze' cont bi güe'e latje šo' bena' liže'na' cuane' xšinlazen'. <sup>40</sup> Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' beņach.

### Mos ben' chon güen, na' mos ben' bi chon güen

(Mt. 24:45-51)

<sup>41</sup> Pedroa' gože' Jesúsen':

—Xanto', ¿cho'o jempl nga par neto'ze o še par yogo'loḷ beṇaḥ?

<sup>42</sup>Nach gož Xanchon' Pedroa':

—Naquen par note'tez beṇe' še chone' can' chon mos blao ben' chejni'i, ben' chon can' cheyaḷa' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. <sup>43</sup>Še to beṇe' mos chontez'e can' ben' xanen' mandadw gone', mba soe' cate' yežin xanen'. <sup>44</sup>Da' li chnia' le'e, xanen' cue'e lo na' mosen' yogo'loḷ da' de che'. <sup>45</sup>Perw na' še mosen' gone' xbab na' ne': "Ba gwže xanan'", na' solagüe' got chine' mosa' yezica'chle na' ye'ej gagwxate' na' sožde', <sup>46</sup>nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyaḷa' gone', xane'na' got chinchgüe' le' na' gone' cont si'e castigw txen len yezica'chle beṇe' bi cheson can' cheyaḷa' yesone'.

<sup>47</sup>'Na' mos ben' nac beṇe' güede-nag, la'czla' ba nežde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nan' xanen' got chinchgüe'ne'. <sup>48</sup>Na' beṇe' bi nežde' bin' non xanen' mandadw gone' na' da'nan' chone' da' zaca' chine' le', na' xanen' bi chinteque' le' zi'. Note'teze beṇe' zjanye'chgua xbab, chesego'o beṇe' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

**Yesediḷ beṇe' neḥe da' bid Jesúsen'**

(Mt. 10:34-36)

<sup>49</sup>Nach gwna Jesúsen':

—Dan' zedeyena' yežlio nga naquen ca to yi' da' cuec beṇe'. Na' yebeda' šaca' ba chi' yi'na'. <sup>50</sup>Za'a cont saca'zi'a na' gata'. Na' chžaglagua' šlac chbeza' žin ža yeyož gaquen. <sup>51</sup>¿Chonle xbab beṇe' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque'

na'a ba bida', san yesedile' na' yosošaše'. <sup>52</sup>Quinga solao gac na'a, še žan nita' gayo' beṇe' to lo' yo'o, yesediḷ legacze', chope' contr šone' na' šone' contr chope'. <sup>53</sup>Yesediḷ beṇe' byo len xi'ine' na' xi'ine' len le'. Na' yesediḷ no'olen' len xi'ine' no'ole, na' xi'ine' no'olen' len le'. Na' yesediḷ no'olen' len xo'oliže' na' xo'oliže' len le'.

**Bitw gosacbe'ede' bi zeje da' ca' chon Diosen'**

(Mt. 16:1-4; Mr. 8:11-13)

<sup>54</sup>Nach lecze gož Jesúsen' beṇe' ca' nita' na':

—Cate' chle'ele chi' bejw gan' chxoa gwbiža' na' žale: "Gac yejw", na' chac ca'. <sup>55</sup>Na' cate' cheḥj be' da' za' ži'le na' žale: "Guac zeye", na' chac zeye'. <sup>56</sup>Beṇe' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chacbe'ele bi zejen da' ca' chon Diosen' tiemp nga zoacho na'a?

**Cheyaḷa' goncho cont yezoacho binlo len beṇe' che'e chio' lao justis**

(Mt. 5:25-26)

<sup>57</sup>¿Bixchen' bi chonle xbab cont nezele can' cheyaḷa' gonle? <sup>58</sup>Cate' to beṇe' gonle xya che' na' che'e le'e lao justis, šlac ngo'ole nezen' le' yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' beṇe' ca' yoseyju'e le'e ližya. <sup>59</sup>Chnia' le'e bitw yebeje' le'e še bina' chixjwle doxen da' čala'le.

**Cuiayi'cho še bitw yetinjecho xtoḷa'chon'**

**13** Na' len beṇe' ca' že'na' gwnita' bal beṇe' gosoe'lene' Jesúsen' diža', gose'ene' Pilaton' gwsele' soldadw che' ca' jasetue' to xonj beṇe' Galilea ca' na' bchixde' xchengaquen' len che beyixe'



ca' ba gosote' cont yesonxene' Diosen'.  
<sup>2</sup>Nach boži'i Jesúsen' xtiža'gaquen' gože' legaque':

—¿Chonle xbaba' gosac chegaque' ca' lagüe dan' gosonche' da' malech clel ca bene' Galilea ca' yezica'chle? <sup>3</sup>Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. <sup>4</sup>Nezele che bene' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clel ca' bene' ca' zjaže' Jerusalén? <sup>5</sup>Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

### Jempl che yag yixgüigw da' bibi chbia

<sup>6</sup>Na' be'lene' legaque' jempl nga, bzejni'ide'ne' cheyała' yesyetinjde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'. <sup>7</sup>Na' gože' ben' chape' yag che' ca': “Ba chac šon iz cheden'a yag nga še chbian yixgüigw, perw bitw bi chbian. Gwchoguen, lažjw con zoan nlanen, na' neca bi chbiazen.”

<sup>8</sup>Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb. <sup>9</sup>Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

### Jesúsen' beyone' to no'ole ža che Dios

<sup>10</sup>Na' to ža che Dios bsd blo'e Jesúsen' bene' že' to lo' yodao'. <sup>11</sup>Na' zoa to no'ole bene' ba goc šino'šone iz yo'no nyaz da' xigüen' yichjlažda'ogüe'na'. Na' ben da' xigüen' cont bdoobe cuerp che'na', na' gague gocch se' to liča. <sup>12</sup>Na' cate' ble'e Jesúsen' le', goxe'ne' na' gože'ne':

—No'ole, na' yeyacdo' yizgüe' chio' nga.

<sup>13</sup>Na' gwxo'a ne'e cuerp che no'ola', na' la' bezete' to liča. Na' no'ola' benxene' Diosen'. <sup>14</sup>Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yizgüe' chelen' perw bitw yidle ža che Dios cont yeyacle.

<sup>15</sup>Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'n chele o burr chele ga zjada'ba' ch-jasan'ba' güe'ej nis? <sup>16</sup>No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdoobe cuerp chen' šino'šone iz. Da'nan' nacczen liča ba beyona'ne' ža che Dios.

<sup>17</sup>Cate' gwne' ca', bene' ca' chesegue'e le' gosacde' zto', perw yogo'lo' bene' ca' yezica'chle nita'na' besyebanchgüede' len yogo' dan' ben Jesúsen', le leca güen zjanac dan' benen'.

### Yela' gwnabia' che Diosen' naquen ca' biñ che xomdas

(Mt. 13:31-32; Mr. 4:30-32)

<sup>18</sup>Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'. <sup>19</sup>Da'nan' yela' gwnabia' che Diosen' naquen ca' biñ che xomdas. To bene' gozen' na' cate' blan' gwcha'on goquen yag cha'o na' be ca' zja-zoa xil goson ližgacba' lo' zoze' yaga'.

### Yela' gwnabia' che Diosen' naquen ca' levadura

(Mt. 13:33)

<sup>20</sup>Nach da' yoble gozne':

—Na'a nia' le'e yelate' nac nac yela' gwnabia' che Diosen'. <sup>21</sup>Naquen ca' levadura dan' gwlec no'olen' len to rob yezj cont gwcha'o doxenen.

**Cheyała' chiljwlaže'cho nac goncho  
cont soacho binlo len Diosen'**

(Mt. 7:13-14, 21-23)

<sup>22</sup> Na' gwda Jesúsen' bsd blo'ede' bene' ca' že' ciuda ca' na' yež ca' gan' bedie' cont bežine' Jerusalénna'. <sup>23</sup> Na' to bene' gože' Jesúsen':

—Xanto', ¿con to chopze bene' šjasyenite' len Diosen'?

Nach Jesúsen' gože' legaque':

<sup>24</sup> —Chnia' le'e, bene' zan chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen' <sup>25</sup> cont bi gone' len le'e ca ben to xan yo'o cate' bžin hor gwseyjuen'. Gwžože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'e. Na' gose'ene': “Gwsaljwšca cont šo'to.” Na' gože' legaque': “Bitw nombi'a le'e, neca nezda' ga za'acle.” <sup>26</sup> Can' gac che balle. Nach solaole ye'ln'e: “Güe'ej gwdagwto' len le' na' bsd blo'edo' neto' la cay lažto'.”

<sup>27</sup> Perw na' da' yoble ye'e le'e: “Bitw nezda' ga bene' le'e. Le šjaya'ac yogo' le'e bene' güen da' mal.” Can' ye'e le'e.

<sup>28</sup> Na' le'ele Abraham na' Isaac na' Jacob na' yogo'lol bene' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'l'ena'. Nach cuežyaše'le na' gagwxejte layle dan' leca žaglaole cate' gacbe'ele bich gac šo'le. <sup>29</sup> Bene' zan bene' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. <sup>30</sup> Nita' bene' zjanaque' bene' bzebe na'a perw gwžin ža cate' yesaque' bene' žialao. Na' nita' bene' zjanaque' bene' žialao na'a, perw gwžin ža cate' yesaque' bene' bzebe.

**Begüine' Jesúsen' neče xtoła'  
bene' Jerusalén ca'**

(Mt. 23:37-39)

<sup>31</sup> Lo ža na'teže bał bene' fariseo ca' be-sežine' gan' zoa Jesúsen' gose'ene':

—Cheyała' yoxonjo' nga gan' chnabia' rey Herodes, le chaclaže' gote' le'.

<sup>32</sup> Jesúsen' gože' legaque':

—Herodesen' naque' ca to beza' yela' gwxiye' čen'. Le šja'ac na' ye'ln'e yeto čhope žazen' soa' yebejcha' da' xigüe' ca' zjayo'o zjanyaz yichjlaždao' bene' na' yeyoncha' bene' chesacšene. Ba zoa yeyož gona' dan' cheyała' gonan'. <sup>33</sup> Perw ca nac dan' chona' na'a gonchczan' gwxe güižj. Gague ngan' chesote' bene' ca' chesoe' xtiža' Diosen', san Jerusalén chesote' bene' ca'.

<sup>34</sup> 'Le'e bene' Jerusalén, chotle bene' ca' chesoe' xtiža' Diosen' na' ca nac nochle bene' ca' chsela' Diosen' len le'e, chchellene' yej. Zan ni'a goclaža' yotoba' le'e ca to jed xcaca' be nče' xi'in' na' chyežba' legacba', perw bitw goclaže'le. <sup>35</sup> Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: “Mbalaz ben' za' nga nsel'a' Xancho Diosen' le' cont nabi'e”, cana'ch le'ele neda' da' yoble.

**Jesúsen' beyone' to bene' de yi**

**14** Na' to ža che Dios Jesúsen' gwyeje' jatagüe' liž to bene' fariseo ben' nac bene' blaó. Na' yezica'chle bene' fariseo ca' chosogüia chesen'e'e bixen' goncze' cont gata' da' yosode'ede' yesagüe' xya che'. <sup>2</sup> Na' lagüe'na' zecha to bene' chacšene, de cuerp čen' yi. <sup>3</sup> Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés:

—¿De lsens len ley čechon' yeyoncho to bene' güe' ža che Dios o še bitw bi lsens de?

<sup>4</sup>Perw notno boži'i xtiže'na'. Nach Jesúsen' be<sub>xue</sub>' na' bena' na' beyone' le', na' gože'ne':

—Guac yeyejo'.

<sup>5</sup>Nach gož Jesúsen' be<sub>ne</sub>' ca' že' liž be<sub>ne</sub>' fariseon':

—Le'e še zoa to burr o to go<sub>n</sub>' chele na' lažo'ba' to lo' yechw sitjw, ꞥcabi la' yebejteleba' la'saze nac ža che Dios?

<sup>6</sup>Na' nono goc yoži'i xtiža' Jesúsen'.

### **Be<sub>ne</sub>' ca' gosaxe' gan' chac güešagna'**

<sup>7</sup>Na' ble'e Jesúsen' can' cheson be<sub>ne</sub>' ca' gosaxe' liž be<sub>ne</sub>' fariseon', gose-beje' gan' zjachi' be<sub>ne</sub>' blao ca' cont gosebi'ena'. Na' Jesúsen' be'e to jempl, gože' legaque':

<sup>8</sup>—Cate' to bene' gaxe' le'e gan' chac güešagna', bitw cue'le gan' cheyała' cue' be<sub>ne</sub>' blao ca', le še cue'le na', guacte yid be<sub>ne</sub>' nacch be<sub>ne</sub>' blao <sup>9</sup>na' xan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len be<sub>ne</sub>' ca' bitec bi zjazaca'. <sup>10</sup>Na' cate' gan' gaxe' le'e cue'le len be<sub>ne</sub>' bitec bi zjazaca', na' cate' yid xan yo'ona' na' ye'e to tole: “Be<sub>ne</sub>' migw chia', da cui'o len be<sub>ne</sub>' blao ca'.” Nach gacxenle lao be<sub>ne</sub>' ca' zjachi' len le'e cho'a mesen'. <sup>11</sup>Le note'teze be<sub>ne</sub>' chonxen cuine', Diosen' gone' cont si'e zto' lagüen'. Na' note'teze be<sub>ne</sub>' chzexjwlaže' lagüen', Diosen' gone' cont gacxene'.

<sup>12</sup>Na' lecze gož Jesúsen' ben' goxe' le' ližen':

—Cate' gono' to l<sub>ni</sub> na' gaxo' be<sub>ne</sub>' yesagüe' len le', bitw gaxo' be<sub>ne</sub>' biše' lježo', bene' migw chio' o bene' zjanaque' be<sub>ne</sub>' gwni'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. <sup>13</sup>Cate' gono' to l<sub>ni</sub> gox be<sub>ne</sub>' yaše' na' be<sub>ne</sub>' nchog no ni'a na'gaque', be<sub>ne</sub>' nxinj ni'e, na' be<sub>ne</sub>' lchoł. <sup>14</sup>Še gaxo' legaque', Diosen' gone'

so' mbalaz, le be<sub>ne</sub>' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo be<sub>ne</sub>' guat ca' txen len yezica'chle ben' ja'ac to liča cate' gosebane'.

### **Jempl che to be<sub>ne</sub>' ben l<sub>ni</sub> xen**

<sup>15</sup>Na' to be<sub>ne</sub>' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo l<sub>ni</sub> da gac caten' ba chnabia' ben' seła' Diosen'.

<sup>16</sup>Nach Jesúsen' gwne':

—To be<sub>ne</sub>' bene' to l<sub>ni</sub> xen, na' goxe' be<sub>ne</sub>' zan šja'ac ližen' cont yesagüe'.

<sup>17</sup>Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jane'e to toe', gože' legaque': “Le šo'o, ba bsini'e dan' gagwchon'.” <sup>18</sup>Na' yogolole' gose'e ben' bi zjazoe' latje šja'aque' gan' chone' l<sub>nin</sub>. Be<sub>ne</sub>' nechon' gwne': “Za' gwxia' to yežlio, na' cheyała' šjana'an. Na' yešco' xanon' bitw gac yida'.” <sup>19</sup>Na' yetoe' gwne': “Za' gwxia' gayo' cue' go<sub>n</sub>' na' na'a šjengaca'ba' prueba. Yešco' xanon' si'xene' chia', bitw gac yida'.” <sup>20</sup>Na' yetoe' gože'ne': “Za' bšagna'. Da'nan' bitw gac yida'.” <sup>21</sup>Na' mosen' beyeje' na' jayeže' xanen' can' gose' be<sub>ne</sub>' ca' le'. Nach xan yo'ona' ben' chon l<sub>nin</sub> bže'e. Nach gože' xmosen': “Gwyej jata to to cay na' to to nez lo ciudan', na' gwtobo' be<sub>ne</sub>' yaše' na' be<sub>ne</sub>' nchog ni'a na'gaque' na' be<sub>ne</sub>' nxinj ni'e, na' be<sub>ne</sub>' lchoł cont yeside' yesagüe'.” <sup>22</sup>Gwde bene' ca' nach gože' le': “Xana', ba jatoba' be<sub>ne</sub>' ca' ba gwnaon', na' ne' dechcze latje par be<sub>ne</sub>' yoble.” <sup>23</sup>Nach xane'na' gože' le': “Bchoj lo' ciudan' na' gono' byen yesid ben' nita' chanez. Na' šjaxi'o be<sub>ne</sub>' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'. <sup>24</sup>Na' ca' nac be<sub>ne</sub>' ca' goxa' da' nechw, bich gua' latje yesagw' legaque' dan' ba bsini'ana'.”

**Dan' cheyała' goncho cont  
gaccho txen len Jesucriston'**

<sup>25</sup> Na' bene' zan juisyw zjana'ogüe' Jesúsén', na' gwyeçhje' gože' legaque':

<sup>26</sup> —Note'teze bene' še chaclaže' šejn-laže' neda' na' gwzenague' chia', še bi gacchde' neda' clél ca xaxne'e, no'ol che', xi'ine', biše', zane', na' lente cuine', bi gac gone' neda' txen. <sup>27</sup> Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen. <sup>28</sup> Še tole che'nele gonle to campanaryw, zgua'tec cue'le na' gonle xbab gwsacale ca do gaca' da' chyažjele cont gonlen, še gaque xmechwle cont yeyož campanaryon'. <sup>29</sup> Še bi gwchix gwtóle xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožén, na' yogo' bene' yesele'ede' lenenna' yesezi'diže' le'e, <sup>30</sup> yesene': "Benga gwzolao chone' to campanaryw perw bitw beyož xšinen'." <sup>31</sup> Na' še to rey chone' xbab tiłe' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. <sup>32</sup> Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo. <sup>33</sup> Ca' naquen len le'e, note'tezle še bi cuejyichjle yogo'lol bi da' de chele, bitw gac gonle neda' txen.

**Cate' zeden' bich naquen zxi'**

(Mt. 5:13; Mr. 9:50)

<sup>34</sup> 'Zeden' naquen güen, perw na' še bich naquen zxi', çnaxce goncho cont yeyaquen zxi' da' yoble? <sup>35</sup> Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

**Jempl che xila' ben' gocžeje**

(Mt. 18:10-14)

**15** Na' bene' güeçhixjw ca' na' yebale bene' güen da' xinj, yogüe' gosebigue' gan' zoa Jesúsén' cont gosende' xtiže'na'. <sup>2</sup> Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

<sup>3</sup> Nach Jesúsén' be'e to jempl, gože' legaque':

<sup>4</sup> —Še nita' to gayoa xila' chele na' gacžeje toba', çbi yocua'anle be ca' taplalj togalj gan' že'ba' latje daša' na' šjaydijlwle ben' ba gocžejena' cont yeželba?

<sup>5</sup> Na' cate' yeželban' yebechgüele na' yexoalba' ya'axichjle yeyoa'lba'. <sup>6</sup> Na' cate' yežin ližle, gwtoble bene' migw chele na' bene' gualiž chele na' ye'lné: "Le yebe len neda'. Ba bežel xila' chia' ben' gocžeje." <sup>7</sup> Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clél ca yesyebede' che taplalj togalj bene' zjanaque' bene' güen bene' bitw de xtoła'gaque' da' yesyetinjde'.

**Jempl che mechw dan' gwnit**

<sup>8</sup> Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen. <sup>9</sup> Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': "Le yebe len neda', le ba beželda' mechw chia' dan' gwnit." <sup>10</sup> Chnia' le'e lecze chesyebe chesyenzaque' angl che Diosen' bene' zoa yaba cate' to bene' chon da' xinj chetinjde' xtole'na'.

**Jempl che ben' benditje  
xi'inen' xmechue'**

<sup>11</sup> Na' lecze gože' legaque':

—Gwzoa to bene' na' gwnita' chop xi'ine' bene' byo. <sup>12</sup>Na' bžin ža bene' xcuiden' gože' xen': "Xa, ben neda' dan' cheyała' sia' da' de chio'." Nach xen' bnežjue' dan' cheyała' si'en. <sup>13</sup>Goc to chop ža nach bene' xcuiden' btobe' yogo'loł bi da' de che' na' gwze'e gweyje' nación zito' na' zlez da' bi zaca' jene'. Na' benditjde' xmechue'na' zejlene' da' malen'. <sup>14</sup>Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'. <sup>15</sup>Da'n'an' gweyje' gan' zoa to bene' naciónna' gwñabe' žin, na' bena' gwsele' le' yixe' ga že' be zan xcoše' na' jayoe'ba'. <sup>16</sup>Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'. <sup>17</sup>Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon. <sup>18</sup>Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', <sup>19</sup>na' bich zaca' gone' neda' cuent ca xi'ine', con še gone' latje gaca' ca to xnose'." <sup>20</sup>Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnopene'. <sup>21</sup>Nach gož xi'ine'na' le': "Xa, ba bena' da' mal lao Diosen' na' laguo' le'. Bich zaca' gono' neda' cuent ca xi'ino'." <sup>22</sup>Na' xe'na' gože' xnose' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdelen ni'abe'. <sup>23</sup>Na' le šjaxi' go'n dao' ben' chane' na' le gotba' cont gagwchoba', le goncho lni. <sup>24</sup>Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejšyichjbe' chio', perw na'a ba bela'be'." Na' gosezo-laogüe' chesone' lni. <sup>25</sup>Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gweyje yixen', ba zoa yežine' liž xen' cate' bende'

chosocueže' na' chosoye'e. <sup>26</sup>Na' goxe' to mosen' na' gwñabde' le' bixchen' chesone' lni. <sup>27</sup>Na' mosen' gože'ne': "Bi' bišo'na' ba bela' na' xaon' ba betue' go'n daon' ben' chane'chgua da' bela'be' to šagüe' to güen." <sup>28</sup>Nach xi'ine' nechua' bže'e na' bi goclaže' yeyo'e liž xen'. Na' bchoj xen' na' gota'yoede' le' yeyo'e yo'o. <sup>29</sup>Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' bina' gaca' bene' güedenag. Na' ne to šib dao' caña' gonō' neda' cont gota'ba' gona' lni len bene' migw chia' ca'. <sup>30</sup>Na' na'a ba bela' xi'ino' nga benditjbe' yogo'loł da' bnežjo'be' gwdalembe' no'ole zle', na' beto' par lebe' go'n dao' ben' chane'." <sup>31</sup>Na' xe'na' gože'ne': "Xi'indagua', le' zoatezo' len neda', na' yogo'loł da' de naquen chio'. <sup>32</sup>Perw cheyała' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejšyichjbe' chio', perw ba bela'be'."

### Jempl che to mos blao ben' benditjde' da' de che xane'

**16** Nach gož Jesúsen' bene' ca' zjanaque' le' txen:

—Gwzoa to bene' gwñi'a na' gwzoa to mos blao che' ben' gwyo'o lo ne'e yogo'loł da' de che'. Na' bene' gwñi'ana' bende' rson xnose' blaon' ba benditjde' bi da' de che'. <sup>2</sup>Na' xanen' goxe' le' na' gože'ne': "Ba benda' diža can' chonon'. Cheyała' yodio' cuent yogo'loł da' ba benditjedo' chia'. Bich gac gono' xšinan' na'a." <sup>3</sup>Nach mosen' bene' xaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. <sup>4</sup>Nezda' bi gona' cont nita' bene' yesene'e neda' cate' bich chona' žin che xanan'." <sup>5</sup>Nach goxe' yogo'loł bene' ca' chesala' xmechw xane'na' tgüej tgüejje' na' gože' bene' nechw: "¿Gaca' čalo' che xana'?" <sup>6</sup>Na' bena' gože'ne':

“Chala' che tap mil litrw set.” Nach gož mos blaona' le': “Bedao'nez gwche'edo' na' bzoj lo cuenten' bzoan chalo' che chop mil litrwze seten.”<sup>7</sup> Gwde na' gože' bene' gwchopen': “¿Gacan' chalo' che xanan?” Nach bena' gože'ne': “Chala' che to mil rob trigw.” Nach mosen' gože' bena': “Gwche'edo' na' bzoj lo cuent chio'na' bzoan chalo' che xono' gayoa robze trigon.”<sup>8</sup> Na' xan mos gwxiyen' gocbe'ede' xmosen' leca nye'e xbab da' beyilwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosočhine' dan' de chegaque'.

<sup>9</sup>Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežinle yaba gan' soale toli tocanē.

<sup>10</sup>Še to bene' chone' can' cheyała' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyała' gone' len da' bibi zaca'tec, lecz bitw gone' can' cheyała' gone' len da' zaca'chgua. <sup>11</sup>Še le'e bi chonle can' cheyała' gonle len dan' de chele yežlio nga da' te chen', bitw gon Diosen' le'e da' zaca'ch da' bi te che. <sup>12</sup>Dan' de chele yežlio nga, che Diosen' gague chelen'. Na' še bitw chonle can' cheyała' gonle len da' nac che', bitw gone' le'e da' zaca'ch da' bi te chen'.

<sup>13</sup>Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaze'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwni'a.

<sup>14</sup>Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwni'a. <sup>15</sup>Na' gož Jesúsen' legaque':

—Le'e chonle cont benachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bal da' chesaque benachen' zjanaquen da' žialao xen.

### Ley che Diosen' na' bene' ca' chnabia' Diosen' yichjlažda'ogaque'

<sup>16</sup>Na' gozna' Jesúsen':

—Gwzolaon cani'te bžinten cate' bla Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

<sup>17</sup>'La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te chen'.

### Bi cheyała' yela'acho len no'ol chechon' cont soalencho no'ole yoble

(Mt. 19:1-12; Mr. 10:1-12)

<sup>18</sup>Note'teze bene' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

### Bene' gwni'a na' Lázaro

<sup>19</sup>Nach gozna' Jesúsen':

—Gwzoa to bene' gwni'a na' xdanchgua goc xalane'na', na' leca gwdagwšagüe' yogo' ža. <sup>20</sup>Na' to bene' yaše' le' Lázaro, yogo' ža jasedixjue' le'

cho'a puert zaguan che bene' gwñi'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'. <sup>21</sup> Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwñi'an'. Na' beco' ca' ja'acba' jasele'eba' yežo' dan' gwžia cuerp che'na'. <sup>22</sup> Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xozxta'ochó Abraham. Na' lecze got bene' gwñi'ana' na' bosocuaše'ne' <sup>23</sup> na' beyeje' lo yi' gabil. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'. <sup>24</sup> Nach bene' gwñi'an' gwñe' zižje gwne': "Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwłapa' xbene'na', le leca chžaglagua' lo yi' nga." <sup>25</sup> Perw na' Abrahanna' gože' le': "Xi'ina', bosalaže' cate' gwmano' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. <sup>26</sup> Bi gac gona' can' chaclažon', le Diosen' bačh nze' to bdiñj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga." <sup>27</sup> Nach bene' gwñi'ana' gože' Abrahanna': "Bene' gol dao', chata'yoeda' le' gwseła'šca Lázaron' liž xan'. <sup>28</sup> Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesožaglagüe'." <sup>29</sup> Na' Abrahanna' gože' le': "Decze dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani'. Cheyała' yosozenague' che da' ca' zjanyojen." <sup>30</sup> Na' gože' Abrahanna': "Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtoła'gaquen'." <sup>31</sup> Nach gož Abrahanna' le': "Še bitw chosozenague' che dan' bzoj da'

Moisésen' na' dan' bosozoj yezica'chle bene' ca' goso'e xtiža' Diosen', la'czła' še yeban to bene' ladjo bene' guat ca', bi yesejle'cze' che Diosen'."

**Bitw cheyała' goncho  
cont gon bene' da' xinj**

(Mt. 18:6-7, 21-22; Mr. 9:42)

**17** Na' gož Jesúsén' bene' ca' zjanaque' le' t xen:

—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj. <sup>2</sup> Yejni'a šaca' yosocheje' yene' to yiše na' šjasezale' le' lo' nisdao' clel ca soe' gone' cont to bene' za' gwzologüe' chejni-laže' neda' lažoe' gone' da' xinj. <sup>3</sup> Da'n'an' le gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le tile' na' še gwše'e xbab na' ne' bich gone' ca', le yezi'xen che'. <sup>4</sup> La'czła' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' banan', bezi'xen chia'", na' cheyała' yezi'xene' che'.

**Gosaclaže' yesejle'che' che Diosen'**

<sup>5</sup> Na' gose' postlw ca' Xancho Jesúsén':

—Gaclenšco' neto' cont šejle'chto' che Diosen'.

<sup>6</sup> Nach gož Xanchon' legaque':

—Xsa yag xomdas naquen da' dao' riz, na' la'czła' dan' chejni-laže'le Diosen' naquen ca to xsa xomdas lagüe dan' bi chejni-laže'teclne', še šejni-laže'lne', guaque ye'le yag nga: "Gwcuase nga na' jayzoa lo' nisdan'", na' guaccze can' nalna'.

**Dan' cheyała' yeson mos ca'**

<sup>7</sup> Le'e še mos chelen' chgua'ane' go'n, o še chyoe' xila', cate' chele'e güeyeban' bitw che'lne': "Beyo'o ngale, gwche'edo' gaguo' xše'." <sup>8</sup> San che'lne': "Bsinia' da' ye'ej gagua' na' gonon'. Te yedaguan'

nach gago.”<sup>9</sup> Na' bitw cho'elne' yeł'a' choxclen cate' ba bene' dan' gožlene'.<sup>10</sup> Na' łecz ca' le'e, cate' ba benle' yogo'łol' dan' ža Diosen' gonle, cheyala' nale: “Bitw zaca'to' no gon yeł'a' choxclen cheto' ca dan' ba bento', le bento' con da' cheyala'cze gonton'.”

### Jesúsen' beyone' ši bene' chese'ede' yižgüe' da' nzi' lepra

<sup>11</sup> Na' zej Jesúsen' Jerusalénna' len bene' ca' zjanaque' le' txen na' gwdie' gan' ndil' distritw Samaria len distritw Galilean'.<sup>12</sup> Na' besežine' to cho'a yež dao' na' besechoj ši bene' chese'e yižgüe' da' nzi' lepra jasešague' Jesúsen'. Na' gosezie' zito'<sup>13</sup> na' gosene' zižje gosene':

—Maestrw Jesús, beyaše'laže' neto'.

<sup>14</sup> Na' Jesúsen' cate' ble'ede' legaque' na' gože'ne':

—Le šjaya'ac lao bxož ca' cont yesene'e le'e še ba beyacle.

Na' goquen' lo neza' besyeyacde'.

<sup>15</sup> Nach toe' cate' gocbe'ede' bach beyaque', na' bebi'e na' gwnie' zižje benxene' Diosen',<sup>16</sup> na' bzoa xibe' lao Jesúsen' bi'e le' yeł'a' choxclen. Ben' ben ca' naque' to bene' Samaria.<sup>17</sup> Nach gwna Jesúsen':

—Beyona' ši bene'. ¿Ganxe bene' ca' yega?<sup>18</sup> ¿Tož bene' zito' nga bebi'e chonxene' Diosen'?

<sup>19</sup> Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnlažo' neda'.

### Yeł'a' chnabia' che Diosen'

(Mt. 24:23-28, 36-41)

<sup>20</sup> Na' bene' fariseo ca' gosena'bd'e' le' batxen' yid ben' seła' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca nac yeł'a' gwnabia' che Diosen', bi naquen da' le'echo.<sup>21</sup> Nono cheyala' güe' diža' ne': “Gwna' nga chnabi'e”, o

“Gwna' na' chnabi'e.” Le ba zoe' len le'e na'a chnabi'e.

<sup>22</sup> Nach gože' bene' ca' zjanaque' le' txen:

—Gwžin ža cate' nale: “Šaca' na'a ba chnabia' ben' gwseła' Diosen'”, perw bitw gac can' nabraže'len'.<sup>23</sup> Yesenita' bene' yesi'e le'e: “Gwna'šc nga zoa ben' gwseła' Diosen'”, o “Gwna'šc na' zoa ben' gwseła' Diosen'.” Perw bitw ga'ole ben' yesi'e le'e ca'.<sup>24</sup> Can' chac cate' chep yesi, chsenin' doxen le'e yaban' zejzenez, łecz can' gac cate' žin ža yida' da' yoble, neda' naca' ben' gwseła' Diosen' golja' benačh. Yida' zejzenez na' yogo'łol' bene' yesele'ede' neda'.<sup>25</sup> Zguatec de da' zan da' cheyala' saca'zi'a na' bene' ca' že' na'a bitw yesejle'e chia'.<sup>26</sup> Łecz ca' goc ca' tiemp che da' Noé, łecze ca' gac cate' ba zoa žin ža yida' da' yoble, neda' naca' ben' gwseła' Diosen' golja' benačh.<sup>27</sup> Bene' gwnita' ca' tiemp che da' Noén' gosaše' gose'ej gosagüe' gosolaže' bosošagne'e na' bosošague' na' no xi'in' che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' bene' ca' bi gosoo' lo' barcon'.<sup>28</sup> Łecz ca' goc ca' tiemp che da' Lot, bene' Sodoman' gose'ej gosagüe' gosote' bi da' de chegaque', na' gosezi'e bi da' beseyažjde', na' gosaz gosa'ane', na' goson liže'.<sup>29</sup> Perw na' žan' beza' Loten' Sodoman', Diosen' bene' cont byinj yi' na' azufre yaba na' gosebiayi' yogo'łole'.<sup>30</sup> Can' gac cate' yida' da' yoble, neda' naca' ben' gwseła' Diosen' golja' benačh, na' yogo'łol' bene' yesele'ede' neda'.

<sup>31</sup> Na' ža caten' yida' še chda to bene' do yichjo'o che liže', na' xšinłaze' žen' lo' yo'o che', bi yeyetje' cont yotoben', con yoxonje'. Na' łecz ca' bene' chda do yiže', bitw gacde' yeyej liže'.<sup>32</sup> Le šjayza'laže' can' goc che no'ol che Loten'.<sup>33</sup> Note'tez bene' chacde' gone' cont cbi saca'zie' o cont nono yesot le', bena' cuiayi'. Na' note'tez bene' chzanlaže'



cuine' saca'zie' o gate' ne chia' neda', ba de yela' mban che' toli tocane.

<sup>34</sup>Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an. <sup>35</sup>Na' chop no'ole nite' txen chesote', toe' yeca'a Diosen' na' yetoe' yega'an. <sup>36</sup>Na' chope bene' nite' do yixe', toe' yeca'a Diosen' na' lecze yega'an yetoe'.

<sup>37</sup>Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': "Gan' de be guat nan' chesežag šod ca'."

### Jempl che to no'ol güezeb len to juez mal

**18** Na' be'len Jesúsen' legaque' to jempl bsd blo'ede' legaque' cheyala' nita'teze' yesonchachlaže' yosoł güiže' Diosen'. <sup>2</sup>Na' gože' legaque':

—Gwche' to ciuda ga gwzoa to juez na' juezen' bi gwdape' Diosen' bala'an na' neca gwche'yichje' še chesazlaže' benachen' can' chonen'. <sup>3</sup>Na' ciudan' gwzoa to no'ol güezeb, na' goxje cheje' lao juezen' na' che'e le': "Ben yela' justis chia' len bene' chgue'ede' neda'." <sup>4</sup>Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an na' neca chi'yichja' še chesazlaže' benachen' can' chonan'. <sup>5</sup>Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

<sup>6</sup>Nach gož Xanchon' legaque':

—Le gon' xbab che dan' gwna juezen' ben' bi zej to licha. <sup>7</sup>Nachxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosoł güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'? <sup>8</sup>Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca'

ben' gwsela' Diosen' golja' benach, ¿ne' nita'ch bene' chesejnilaže' neda'?

### Jempl che to bene' fariseo len to bene' güechixjw

<sup>9</sup>Gwnita' bał bene' gosacde' zjanaque' bene' güen lao Diosen' neche' da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuišen bene' ca', gwne':

<sup>10</sup>—Chope bene' ja'ac yodao' blao jasel güiže' Diosen', toe' bene' fariseo na' yetoe' bene' güechixjw. <sup>11</sup>Bene' fariseon' gwzeze' bol güiže' Diosen' na' con chonxen cuine', gwne': "Dios, neda' chona' yela' choxcen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chatalena' no'ol bi nac no'ol chia', na' neca naca' bene' mal can' nac bene' güechixjw ni. <sup>12</sup>Chope ni'a to xman chona' gwbas, na' yogo'loł da' chona' gan, chbecan' ši cuen na' chnežjua' to cuen che yodao'." <sup>13</sup>Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': "Dios, beyaše'laže' neda' naca' bene' güen da' xinj." Da'na'z da' gwna bene' güechixjon'. <sup>14</sup>Na' chnia' le'e, Diosen' bezi'xene' che bene' güechixjon' na' beyej liže' bibi xtole' gota'. Perw bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzexjwlaže' lagüen', Diosen' gone' cont gacxene'.

### Jasesane' bidao' lao Jesúsen'

(Mt. 19:13-15; Mr. 10:13-16)

<sup>15</sup>Na' jasesane' bidao' lao Jesúsen' cont xoa ne'e yichjgacbe'. Na' cate' bene' ca' zjanaque' le' txen besele'ede' can' chesonen', gosedi'e' legaque'. <sup>16</sup>Perw na' Jesúsen' goxe' bene' ca' cont yeside' len

bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogüe'. <sup>17</sup> Na' da' li žia' le'e, note'teze bene' bi yosozenague' che Diosen' ca cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

**To bene' gwñi'a be'lene' Jesúsen' diža'**  
(Mt. 19:16-30; Mr. 10:17-31)

<sup>18</sup> To bene' gwnabia' gože' Jesúsen':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocane?

<sup>19</sup> Nach Jesúsen' gože'ne':

—¿Bixchen' žo' naca' bene' güen? Toz bene' güen zoa, na' len' Dios. <sup>20</sup> Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

<sup>21</sup> Na' gož ben' le':

—Yogo'loł da' quinga gwzolagua' chonczan' cate' ne' nactia' bidao'.

<sup>22</sup> Nach cate' bene' Jesúsen' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejni-lažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

<sup>23</sup> Perw na' bena' cate' beyož bende' diža' dan' gož Jesúsen' le', gocyaye'chgüede', le bene' gwñi'achgua goque'. <sup>24</sup> Na' Jesúsen' gwñe'e bene' gwñi'ana' na' gože'ne':

—Leca zdebe naquen to bene' gwñi'a gwzenague' che Diosen' cont Diosen' nabi'e yichjlažda'ogüe'. <sup>25</sup> Bedao'ch te to be xen be nzi' camello to lo'

nag yeše' clal ca to bene' gwñi'a gwzenague' che Diosen' cont Diosen' nabi'e yichjlažda'ogüe'.

<sup>26</sup> Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

<sup>27</sup> Na' Jesúsen' gože' legaque':

—Da' bi gac gon benachen', bitw nacho bi gac gon Diosen' len.

<sup>28</sup> Nach Pedroa' gože' le':

—Neto' ba gwlejyichjto' yogo' da' de cheto' cont nacto' le' txen.

<sup>29</sup> Na' gož Jesúsen' legaque':

—Da' li žia' le'e, note'teze bene' ba gwlejyichje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe', <sup>30</sup> yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocane.

**Da' yoble gosyixjue'e  
Jesúsen' ba zoa gate'**

(Mt. 20:17-19; Mr. 10:32-34)

<sup>31</sup> Na' gwlejiže' Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'loł dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwsela' Diosen' golja' benach. <sup>32</sup> Gaca' lo na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. <sup>33</sup> Yesot yeseyine' neda' na' yesote' neda', perw yeyon' ža yebana' ladjo bene' guat ca'.

<sup>34</sup> Perw bene' ca' zjanaque' Jesúsen' txen bi gosejni'ide' dan' gože' legaque', le zjanchoł yichjlažda'ogüen', da'nana' bi gosejni'iden'.

**To bene' lchoł bene' Jericó bele'ede'**

(Mt. 20:29-34; Mr. 10:46-52)

<sup>35</sup> Nach cate' ba zoa yežin Jesúsen' Jericó, to bene' lchoł chi'e chanezen'

ch<sub>n</sub>abe' yosonežjo bene' le' con gaca' da' chesezande'. <sup>36</sup>Na' bende' chesede bene' zan gan' chi'ena', na' gwnabe' bin' chac. <sup>37</sup>Na' gose'ene':

—Jesús bene' Nazaret chdie' laguo' nga.

<sup>38</sup>Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

<sup>39</sup>Nach bene' ca' zjažialao lao Jesúsen' gosedi'le' bene' lcholen', gose'e le' cheyala' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

<sup>40</sup>Jesúsen' gwleze', nach bene' mandadw šjasexi'e bene' lcholen' lagüe'na'. Na' cate' gwbiga' bene' lcholen' lao Jesúsen', nach gože'ne':

<sup>41</sup>—¿Bi chaclažo' gonda' le'?

Na' bene' lcholen' gože'ne':

—Xana', benšca cont yele'eda'.

<sup>42</sup>Jesúsen' gože'ne':

—Bele'e. Dan' chejnilažo' neda' bach beyac yejlagon'.

<sup>43</sup>Na' la' bele'ete bene' lchola' na' gwda'ogüe' Jesúsen' benxene' Diosen'. Na' lecze ca' yogo' bene' ca' besele'ede' can' goquen' gosonxene' Diosen'.

### Jesúsen' na' Zaqueo

**19** Nach Jesúsen' gwyo'e yež Jericó na' gwdeze' yešla'a ciudan'. <sup>2</sup>Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a. <sup>3</sup>Gwdiljwlaže' naclen' gone' le'ede' Jesúsen', perw bitw goc, le' gwnita' bene' zan len Jesúsen' na' Zaqueon' goque' to bene' bchecw dao'. <sup>4</sup>Da'nan' gwza'sese' gwdie' lao bene' ca' cont gwype' to lo yag da' zoa gala'ze gan' te Jesúsen'. <sup>5</sup>Perw na' cate' bžin Jesúsen' xan yaguen', gwne'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

<sup>6</sup>Nach Zaqueon' beyetjsese' chebede'. Nach beche'e Jesúsen' liže'na' na' benxene' le'. <sup>7</sup>Perw na' bene' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž bene' güen da' xinj.

<sup>8</sup>Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zcha'och ca' dan' cheyala' yeseyixjue', yonežjwgaca'ne' tap ca'te'le.

<sup>9</sup>Na' Jesúsen' gože'ne':

—Na'aža ba ben Diosen' yela' mban chio' toli tocane len che bene' lo' yo'ochio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xoxxta'ocho Abraham. <sup>10</sup>Ca' nac neda', gwsela' Diosen' neda' golja' benach cont zedyediljua' note'tez bene' ba mbiayi', na' gwnežjua' legaque' yela' mban toli tocane.

### Jempl che ši bene' bnežjw xangaque' legaque' mechw xen

<sup>11</sup>Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le' ba nite' gala'ze Jerusalenna' na' gosacde' la' solaote nabi'e nación Israelen'. <sup>12</sup>Nach gwne':

—To bene' blao gwyeje' to yež zito' jene' dan' cheyala' gone' cont jaxi' lo ne'e nabi'e yež che', le' gosebeje'ne' nabi'e yež chen' cate' yežine'. <sup>13</sup>Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa”. <sup>14</sup>Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to' nabi'a' benga neto'.”

<sup>15</sup>Perw la'czla' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xnose' bene' ši ca' lagüe'na', bene' ca' bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'. <sup>16</sup>Bene' nechw bžine' lagüen' na' gože'ne': "Xana', xmecho' dan' bocua'anleno' neda' benen gan ši ca'te'le ca dan' bocua'anon'." <sup>17</sup>Nach xanen' gože'ne': "Ba beno' da' güen. Naco' mos güen. Beno' can' cheyala' gono' len da' daon' bocua'anlena' le', da'nan' gona' cont nabi'o ši ciuda." <sup>18</sup>Na' bene' gwchopen' bžine' lao xanen' na' gože'ne': "Xana', xmecho' dan' bocua'anleno' neda' benen gan gayo' ca'te'le ca dan' bocua'anon'." <sup>19</sup>Nach gože' le': "Le' nabi'o gayo' ciuda." <sup>20</sup>Nach bžin yetoe' lao xane'na' na' gože'ne': "Xana', nga de xmecho' dan' bocua'anleno' neda'. Ba blažechachan' bay nga. <sup>21</sup>Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble." <sup>22</sup>Nach gož xanen' le': "Dan' ba gwnao' ca' chlo'en napo' doła'. Naco' mos mal. Chacdo' naca' to bene' znia, na' nezdo' chona' gan da' bi bena' žin na' chelapa' dan' gosaz bene' yoble. <sup>23</sup>Na' še nezdo' chona' ca', žbichen' bi gwlejo' xmechuan' bene' yoble cont yezian' len yichjen na'a ba bela'a?" <sup>24</sup>Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'." <sup>25</sup>Nach gose'e le': "Xanto', ba noxe'cze' ši ca'te' ca dan' bocua'anleno'ne'." <sup>26</sup>Nach gož bene' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'. <sup>27</sup>Na' ca nac bene' ca' chesegue'ede' neda', bene' ca'

bi chesaclaže' nabia'gaca'ne', le šjaxi'e na' gotlene' lagua' nga."

**Gosonxene' Jesúsen'  
cate' beyo'e Jerusalén**

(Mt. 21:1-11; Mr. 11:1-11; Jn. 12:12-19)

<sup>28</sup>Na' cate' beyož be' Jesúsen' jempl nga nach gwze'e zeje' ciuda Jerusalén. <sup>29</sup>Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen, <sup>30</sup>gože' legaque':

—Le šja'ac yež dan' chi' gała'ze, na' cate' žinlen' na' yeželele to burr dao' da'ba' yag, be nono na' cuia. Le sežba' na' le che'ba' nga. <sup>31</sup>Še no nab bixchen' chsežleba', na' ye'ln'e': "Xanto' chyažjde'ba'."

<sup>32</sup>Nach bene' ca' gwsela' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'. <sup>33</sup>Nach šlac cheseseže'ba', xamba' ca' gose'e legaque': —¿Bixchen' chsežle burr daon'?

<sup>34</sup>Nach bene' ca' gwsela' Jesúsen' gose'e legaque':

—Xanton' chyažjde'ba'.

<sup>35</sup>Nach goseče'eba' lao Jesúsen' na' gosexoa xagaque' cože'ban' nach bosožie' Jesúsen'. <sup>36</sup>Na' šlac zeje' ngüe'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len.

<sup>37</sup>Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yogo'lol' yela' guac da' ba besele'ede' da' ben Jesúsen'. <sup>38</sup>Nach gosene':

—¡Mbalaz rey chechon' ben' ba za' nga gwsela' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

<sup>39</sup>Na' len beṇe' zan ca' zja'aclene' Jesúsen' zja'ac baḷ beṇe' fariseo. Nach to chope' gose'e Jesúsen':

—Maestrw, ben mandadw len beṇe' ca' za'ac len le' t xen cont yesenite' šize.

<sup>40</sup>Nach boži'i Jesúsen' xtiža'gaquen', gwne':

—Chnia' le'e, šaca' beṇe' quinga nite' šize, yej quinga yesosya'an yesonxenen neda'.

<sup>41</sup>Cate' bžine' gala'ze Jerusalénna', gwne'e ciudan', na' bene' xbab che beṇe' lo' ciudan' na' gwchežyaše', <sup>42</sup>na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'. <sup>43</sup>Gwžin ža cate' beṇe' ca' chesegue'ede' le'e yesone' to yež de yej da' šechjen ciudan' cont nono gac yox-onj. <sup>44</sup>Na' yesote' le'e len xi'inle ca'. Na' yosyochinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

**Jesúsen' bebeje' beṇe' ca' cheson ya'a yodao' blaon'**

(Mt. 21:12-17; Mr. 11:15-19; Jn. 2:13-22)

<sup>45</sup>Jesúsen' gwo'e chyo'o yodao' blaona' na' gwzolağüe' bešaše' beṇe' ca' chesote' na' beṇe' chesa'o na'. <sup>46</sup>Na' gože' legaque':

—Nyojczy Xtiža' Diosen' žan: “Ližan' naquen to latje gan' yesoḷ güiž beṇe' neda'”, perw le'e ba benlen ca to latje ga že' beṇe' gwban.

<sup>47</sup>Na' bsed blo'ede' beṇe' ca' že' yodao' blaona' yogo' ža. Na' bžox gwnabia' ca' na' beṇe' ca' chososed chosolo'e dan' bžoj da' Moisésen' na' nochle beṇe' blao che beṇe' Israel ca', goseyljwlaže' nacle yesone' yesote'ne'. <sup>48</sup>Perw bi besyeželde' nacle yesone' le' neche yogo' beṇe' besye-bechğüede' xtiže'na'.

**Yela' gwnabia' che Jesúsen'**

(Mt. 21:23-27; Mr. 11:27-33)

**20** To ža šlac chsed chlo'e Jesúsen' beṇe' ca' chyo'o yodao' blaona' na' chyixjue'ede' diža' güen che Diosen', be-sežin bžox gwnabia' ca' na' len beṇe' gol ca' chesenabi'e naciónna' na' beṇe' ca' chososed chosolo'e dan' bžoj da' Moisés. <sup>2</sup>Na' gose'e le':

—Gwnašč neto' bi yela' gwnabia' napo' chono' da' qui, na' no ben yela' gwnabian' cont chonon'.

<sup>3</sup>Na' boži'e xtiža'gaquen', gwne':

—Lecze de to da' nabda' le'e. Le našc neda' <sup>4</sup>žnon' gwseḷa' da' Juanna' bžoe' beṇe' nis? ¿Dios nan' gwsele'ne', še benačen'?

<sup>5</sup>Na' legacze' gose' lježe':

—¿Bi nacho? Še ye'chone' Dios gwseḷa' le', na' ye'e chio': “¿Bixčen' ca gwey-jle'le che?” <sup>6</sup>Na' bi gac ye'chone' benač gwseḷa' le', le yogo'te beṇe' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

<sup>7</sup>Na' gose'e Jesúsen':

—Bi nezet'o non' gwseḷa' da' Juan.

<sup>8</sup>Nach Jesúsen' gože' legaque':

—Lecz ca' neda' bi yapa' le'e bi yela' gwnabian' chonlenda' da' ca'.

**Jempl che mos mal ca'**

(Mt. 21:33-44; Mr. 12:1-11)

<sup>9</sup>Na' be'e jempl nga bžejni'ide' beṇe' ca' chosozenag che', gwne':

—To beṇe' goze' to cue' xen yag uvas na' bocua'anen' lo na' beṇe' ca' yesonen' žin na' gwze'e gwyeje' zito' na' jasoe' šša. <sup>10</sup>Cate' bžin ža yosyotobe' cosešen', nach gwseḷa' to xmose' lao beṇe' ca' nac lo na'gaque' yag uvasen' cont yosyonežjue'ne' to tlawc coseš dan' yesyezi'en. Na' beṇe' ca' nac lo na'gaque' yag uvasen' goseyine' mosen' na' to ga'alze bosyose'ene' bibi

goso'ene'. <sup>11</sup> Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. <sup>12</sup> Na' xan yežlion' gwseła'che' mos gwyone, na' lecze gosotlate'ne' gosone'ne' güe', na' besyebeje'ne' gan' že' yag uvas ca'.

<sup>13</sup> Na' xan yežlion' gwne': "¿Nacxe gona?" Nach beyone' xbab gwne': "Sel'a' xi'ina' ben' chacchgüeda, le šeca güesezi'e xtiža' le'." <sup>14</sup> Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Le da gotchone' cont yega'anlenchon." <sup>15</sup> Nach besyebeje' le' gan' že' yag ca' na' gosote'ne'.

Nach Jesúsen' gwnabde' bene' ca' zjanžaguen':

—¿Nacxe gon xan yežlion' len bene' ca' boca'anlene' yežlio chen? <sup>16</sup> Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesúsen' gosene':

—¡Catec da' mal juisyw dan' goc!

<sup>17</sup> Na' Jesúsen' gwna'chgüe' legaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosacłaže' güen yo'o ca' yosočhine',

len ba naquen yej squin.

<sup>18</sup> Na' ca' nac yejna', note'tez bene' lažo' lo yeja' na' cue'žošje', na' note'tez bene' chiže' yeja' cate' lažon' na' gwšošjen le'.

### Ca nac dan' cheyała' gaxjw

(Mt. 21:45-46; 22:15-22; Mr. 12:12-17)

<sup>19</sup> Na' bene' ca' chososed chosolo'e dan' bzoj da' Moisés na' bxož gwnabia' ca' la' besyeyiljwlaže'te nacle yesone' yesezene' Jesúsen', le gosacbe'ede' Jesúsen' be'e jemplna' neče dan' bi chesejnilaže' le'. Perw bibi gosone', le besežebe' bi yeson bene' ca' že'na'

bene' chesejle'e che Jesúsen'. <sup>20</sup> Da'nan' gosesele' bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'. <sup>21</sup> Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to liča. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. <sup>22</sup> Na' da'nan' zedenabeto' le' čnaquen binlo no čixjx da' cheyała' čixjwcho che ben' nac la'zelagüe bene' gwnabia' ben' chi' Roma, še bi?

<sup>23</sup> Na' gocbe'e Jesúsen' gague do lažen' chese'ene' ca', san chesacłaže' yesagüe' xya che xtižen'. Na' gože' legaque':

—¿Bixčhen' chaclaže'le yoslažo'le neda' len xtižan'? <sup>24</sup> Le gwlo'e neda' to mechw. ¿No lao dan' da' le'e mechw nga? na' čno la' dan' nyoj le'en ni?

Nach gose'ene':

—Čhe César ben' nac la'zelagüe bene' gwnabia' ben' chi' ciuda Roma.

<sup>25</sup> Nach gože' legaque':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

<sup>26</sup> Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

### Cate' yesyeban bene' guat ca'

(Mt. 22:23-33; Mr. 12:18-27)

<sup>27</sup> Na' lecze besežin bał bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

<sup>28</sup> —Maestrw, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyała' yošagna'lene' no'ol

güezeba' cont yesenita' xi'in diaža che da' bišen'. <sup>29</sup>Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. <sup>30</sup>Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'. <sup>31</sup>Na' bene' gwyona' lecze bošagna'lene' no'olen', na' lecž ca' goc len le'. Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. <sup>32</sup>Gwde gosat yogo'lo' bene' ca', nach got len no'ola'. <sup>33</sup>Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole?', le yogo' bene' gaža' bosošagna'lene' le'.

<sup>34</sup>Na' Jesúsen' boži'e xtiža'gaquen', gože' legaue':

—Bene' ca' nita' lo yežlio nga chosošagne'e na' lecze chosošague' na' no xi'ingaque'. <sup>35</sup>Perw na' bene' ca' chaque Diosen' zjazaque' cont yosbane' legaue' ladjo bene' guat ca' cont šjasyenite' len le' toli tocanē, caten' yesyežine' gan' zoa Diosen' bich yosošagne'e nēca yosonežjo xi'ine' no'ol yosošagne'e. <sup>36</sup>Bich yesate', le yesaque' ca' angl ben' že' yaba, na' yesaque' xi'in Dios lagüe dan' ba bosban Diosen' legaue' ladjo bene' guat ca'. <sup>37</sup>Na' lecze da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' bol güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. <sup>38</sup>Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

<sup>39</sup>Na' bal bene' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

<sup>40</sup>Na' bich besyeyaxjde' bi yesenabde' le'.

### **Criston' naque' xi'in diaža che da' rey David**

(Mt. 22:41-46; Mr. 12:35-37)

<sup>41</sup>Jesúsen' gože' legaue':

—¿Nacxechen' chesena bene' Criston' ben' yedenabi'e naque' xi'in diaža che da' rey David? <sup>42</sup>Cuin Daviden' bzoje' Xtiža' Diosen' le'e libr da' nzi' Salmos, gwne': Xancho Dios gože' Xanan':

“Gwche'edo' cuita' nga nabi'a'cho txen, <sup>43</sup>na' gona' cont yogo' no chesegue'e le' yosozexjw yichje' yosozengue' chio'.”

<sup>44</sup>¿Nacxe gac nacho Criston' naque' xi'in diaža che da' rey David? le cuin Davin' gože' le': “Xana”.

### **Xto'la' bene' ca' chososed chosolo'e dan' bzoj da' Moisésen'**

(Mt. 23:1-36; Mr.

12:38-40; Lc. 11:37-54)

<sup>45</sup>Bene' zan zjanžag chosozenague' cate' gože' bene' ca' zjanaque' le' txen:

<sup>46</sup>—Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Legaue' chesyebede' chesaše' zjanyaze' lache' ton. Na' chesyebede' chesonxen bene' legaue' cate' chesyēžague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni. <sup>47</sup>Na' chesyequ'e yo' che no'ole güezeb ca'. Na' cate' chosol güiže' Dios, šša cheso'e diža' cont yesaque' bene' leca chesonxene' Diosen'. Bene' can' chesacche' castigw clēl ca' yezica'chle bene' güen da' xinj.

### **To no'ole güezebe bnežjue' Diosen' xmechue'na'**

(Mr. 12:41-44)

**21** Šlac zoa Jesúsen' chyo'o yodao', gwne'e na' ble'ede' bene' gwni'a' ca' gosego'o xmechwgaquen' lo' cajan' gan' chesegüe'e mechw che yodaon'.

<sup>2</sup>Na' lęceze ble'ede' to no'ol güezebe bene' yaše' gwlo'e chop centav dao' che'na'.

<sup>3</sup>Nach Jesúsen' gwne':

—Da' li žia' le'e, no'ol güezebe yaše' nga ba gwlo'och'e mechw da' zaca'ch clel ca yogo' bene' ca' yezica'chle. <sup>4</sup>Le yogo' legaque' chesegüe'e da' checho'onen lo yela' gwni'a chegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chacbande'.

**Gwžin ža yosyočinje' yodao' blaona'**

(Mt. 24:1-2; Mr. 13:1-2)

<sup>5</sup>Na' bal' bene' ca' chesejnilaže' che dan' chsed chlo'e Jesúsen' gosoe' diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

<sup>6</sup>—Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočinje'.

**Dan' gac cate' ba za' bagwze yeyož yežlion'**

(Mt. 24:3-28; Mr. 13:3-23)

<sup>7</sup>Na' gosenabde' Jesúsen' gose'ene':

—Maestrw, ždo bat gac dan' žo' nga? na' žnac gac nezeto' cate' ba zoa gac yogo' da' ca'?

<sup>8</sup>Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'. <sup>9</sup>Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyała' gac. Perw gague lenna' nacho na'tec na'a yeyož yežlion'.

<sup>10</sup>Nach gože' legaque':

—Na' yesedile to yež len yeto yež yoble na' to nación len yeto nación

yoble, <sup>11</sup>na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesezebchgua benachen' neche dan' chac.

<sup>12</sup>Perw za' gac yogo' da' quinga cate' yesezene' le'e na' yosochi yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yesече'xo'xje' le'e do lao rey na' do lao nochle bene' gwnabia' dan' chejnilaže'le neda'. <sup>13</sup>Na' cate' gac da' quinga güe'le xtiža'na'. <sup>14</sup>Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen', <sup>15</sup>le neda' gona' le'e xbab len yela' sina' chian' cont yoži'ile xtiža'gaque' sin cbi bi gac yesene'. <sup>16</sup>Na' balle xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'e le'e. Na' yesote' balle. <sup>17</sup>Na' yogo'ze bene' yesegue'ede' le'e dan' chejnilaže'le neda'. <sup>18</sup>Perw chape Diosen' le'e na' bitw güe'e latje cuiayi'le, <sup>19</sup>na' gone' yela' mban chele toli' tocane še soale gwyo gwchejle yogo'lol dan' yesonde' le'e.

<sup>20</sup>Na' cate' le'ele ba besela'ac soldadw zan cue'ej cuit Jerusalenna' ben' yesedillen le'e, canan' nezele ba zoa cuiayi' ciudadan'. <sup>21</sup>Cana' bene' yesenita' Jerusalén cheyała' yosoxnje'. Na' bene' že' yezica'chle yež ga mbane Judea cheyała' šja'aque' do ya'adao'. Na' bene' yesenita' yix'e, bi cheyała' yesone' xbab yesyeyo'e lo' ciuda. <sup>22</sup>Cana' gwnežjo Diosen' castigw che xtola' bene' ca' že' Judean', cont gac can' nyojen le'e Xtiža' Diosen'. <sup>23</sup>¡Nyaše' zjanac no'ol ca' zjanoa' xi'in na' no'ol ca' ne' chosoguaže' bidao' lo ža ca! Leca yesesaca'zi' bene' ca' že' doxen Judean', le Diosen' ža'achgüe' legaque'. <sup>24</sup>Soldadw ca' yesote' bale' lo gwdile na' yebale' yesече'xo'xje' nación



ca' dan' zjachi' doxen yežlion'. Na' beñe' ca' bi zjanaque' beñe' Israel yosyočhinje' yo'o ca' dan' že' Jerusalénna' na' yosolej yosošožen'. Perw ba bžia' Diosen' bia' žin ža cate' beñe' ca' bi zjanaque' beñe' Israel bich yesenabi'e nación Israel.

### Yid Jesucriston' da' yoble

(Mt. 24:29-35, 42-44; Mr. 13:24-37)

<sup>25</sup>'Ca nac gwbiž, bio' na' beljw ca', gac da' yebanecho len legaquen. Na' beñe' že' yežlion' yesaque' tole na' yesaczejláže' catec sšag gon nisdaon' chas chata' gaquen. <sup>26</sup>Na' beñe' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'. <sup>27</sup>Na' cana'ch beñe' že' yežlion' yesele'ede' neda' naca' ben' gwseła' Dios golja' beñe'ch, za'a to lo' bejw len yela' guac xen na' yela' beñe' zaca' juisyw chia'. <sup>28</sup>Na' cate' solao gac da' quinga, le gonchach laže'le na' le yebe. Ba zoa žin ža yida' da' yoble yebeja' le'e lo' da' malen'.

<sup>29</sup>Na' Jesúsen' be'lene' legaque' to jempl, na' gože' legaque':

—Le našc can' chon yag yixgüigw na' bite'teze yag yoble, <sup>30</sup>cate' chle'e'le ba chebian laga' che'eñ dao' nach nezele bach zoa yela' tiemp ba. <sup>31</sup>Ca'czen' cate' le'e'le ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

<sup>32</sup>'Da' li žia' le'e, biñ'a' yenit diaža' che le'e nita'le na'a cate' yeyož gac yogo'lol da' ca'. <sup>33</sup>Le'e yaba na' yežlion' yesede chen, perw ca' nac xtižan', gague da' te cbi gac can' žanna'.

<sup>34</sup>'Na' le gon xbab cont bi gacle beñe' lia na' beñe' borrašw na' cont bi soale yela' yežejele. Beñe' ca' yesac beñe' lia na' borrašw na' beñe' ca' yesyela' yesyežejde' bi yesebeze' batcan' gac yogo' da' quinga. <sup>35</sup>Na' toz can' gac che beñe' že' doxen yežlion', yesac yogo' da'

quina' cate' nono chon xbab. <sup>36</sup>Perw yogo' ža le soa le cuez batcan' gac da' quinga na' le yo' güiž Diosen' cont bibi gac chele na' gac yedyesoale len neda' naca' ben' gwseła' Diosen' golja' beñe'ch.

<sup>37</sup>Yogo' ža gwzao Jesúsen' bsed blo'ede' beñe' yodao' blao, na' yogo' že' beyeje' lo' ya'a da' nzi' Ya'a Olivos. <sup>38</sup>Na' yogo' zil besežin beñe' zan bosozenague' che' šlac bsed blo'ede' legaque' chy'o' yodao' blao.

### Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Na' ba zoa gała' lni pascw caten' chesagüe' yetextil da' bibi levadura yo'on. <sup>2</sup>Na' bxož gwnabia' ca' na' beñe' ca' chososed chosolo'e ley dan' bzoj da' Moisésen' beseyiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle beñe' legaque'.

<sup>3</sup>Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len beñe' šižinw ca' zjanaque' Jesúsen' txen, <sup>4</sup>na' gwyeye' jane'e bxož gwnabia' ca' na' beñe' gwnabia' che beñe' ca' chesape' yodao'na' cont bosoxi'e nacle gone' gwdie' Jesúsen' lo' na'gaque'. <sup>5</sup>Na' leca besyebede' na' gose'e le' yosonežjue'ne' mechw. <sup>6</sup>Na' Judasen' gwxenlaže' len legaque', na' gwzola'güe' gwdiłjwlaže' nacle gone' gwdie' Jesúsen' lo' na'gaquen' cate' bi že' beñe' zan.

### Jesúsen' blo'ede' legaque' can' cheyała' yesone' šjasyeža'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

<sup>7</sup>Na' bžin ža gała' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont

šjasyeza'laže' can' bosla Diosen' da' xoxzta'ogaquen' lo na' bene' Egipto ca'. <sup>8</sup>Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasini'a dan' gagwcho lo l̄nin'.

<sup>9</sup>Na' gose'ene':

—¿Ga che'ndo' šjasini'ato'?

<sup>10</sup>Nach gože' legaque':

—Le šja'ac na' cate' ba gwo'ole ciudan' na' yežagle to bene' byo no'e to che'e nis. Na' šejlenl̄ne' na' gan' yežinen' <sup>11</sup>le ye' xan yo'on': “Maestron' že': Gonščo' to yo'o ga gagua' xše' že' l̄ni nga len bene' ca' zjanaque' neda' txen.” <sup>12</sup>Nach gwlo'ede' le'e to cuart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

<sup>13</sup>Na' gosa'aque' na' yogo' can' gož Jesúsen' legaque' goc. Nach bososini'e xše' že' l̄nina'.

<sup>14</sup>Na' cate' bač gwchi'e cho'a mesen' len postlw che' ca', <sup>15</sup>na' gože' legaque':

—Leca gwzelaža' gagua' yela' guagw che l̄ni nga len le'e na'a za' saca'zi'a na' gata'. <sup>16</sup>Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

<sup>17</sup>Na' gwxi'e vas gan' yože nis uvasen', na' beyož be'e yela' choxc̄len che Dios, nach gwne':

—Le sin', na' le ye'ej yogo'le late' güeje dan' yože lo' vas nga. <sup>18</sup>Chnia' le'e na'a zelao che'ja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

<sup>19</sup>Nach gwxi'e yetextilen' na' be'e yela' choxc̄len che Diosen' na' bzojxen' na' bnežjuen' legaque'. Na' gože' legaque':

—Da' nga cuerp chia' chzanlaža' neche le'e. Quinga gonle cont šjayze'ele bi zejen len le'e dan' yesote' neda'.

<sup>20</sup>Na' lecze beꝑue' vassen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na'

solao gone' can' gwne', le yesote' neda' na' gwlałj xchenan' neche le'e.

<sup>21</sup>'Na' da' li ben' gwdie' neda' lo na' bene' ca' chesegue'e neda' nga chagwlene' neda' txen. <sup>22</sup>Na' gac chia' can' nzia bia' gac, neda' naca' bena' gwseła' Diosen' golja' benač, perw nyaše'chguaze nac ben' gwdie' neda' lo na' bene' ca'.

<sup>23</sup>Nach gosezolagüe' gosenabe lježgaque' noen' gon da' malen' nac ca'.

### Gosacyože' noe' nacch blao

<sup>24</sup>Na' lecze gosezolagüe' gosacyože' noe' nacch blao. <sup>25</sup>Na' Jesúsen' gože' legaque':

—Nita' bene' gwnabia' che to to nación ca' na' chesone' byen chosozenag bene' chegaque', na' bene' gwnabia' ca' chesacłaze' yesoe' bene' diža' chegaque' zjanaque' bene' güenchgua. <sup>26</sup>Perw le'e gague can' cheyała' gonle. Še no le'e nacchle bene' blao, cheyała' gwzexjwlaže'le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyała' soale gaclen lježle. <sup>27</sup>Le gon xbab noe' nacch bene' blao, še bena' chi' cho'a mesen' o še xmosen' ben' chon mandadw che'. Nacbia'cze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

<sup>28</sup>'Le'e bina' cuejyichjle neda' la'czla' bene' zan ba chesegue'ede' neda'. <sup>29</sup>Na' ca' nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'. <sup>30</sup>Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabi'a'le šižinw cuen bene' ca' zjanaque' xi'in diaža che da' Israel.

### Jesúsen' gwne' Pedroa' bi chebe' še nombi'e le'

(Mt. 26:31-35; Mr. 14:27-31; Jn. 13:36-38)

<sup>31</sup>Nach Jesúsen' gwne':

—Simón, ben xbab čho', Satanásen' dan' chnabia' da' xigüe' ca' ba gwñaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca dan' chon bene' caten' chdie' trigon' lo' rner. <sup>32</sup>Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betinjdo' xtoło'na', gono' chach laže' bene' lježo' quinga.

<sup>33</sup>Nach Pedroa' gože'ne':

—Ba bečoglaža' sa'arena' le', gague ližya na'ze, san gatlencza' le'.

<sup>34</sup>Na' Jesúsen' gože'ne':

—Pedro, žia' le', bina' cuež jean' na'aže' cate' gac šon ni'a bi chchebo' še nombi'o neda'.

### Gwne' ba zoa yosoči yososaca' bene' legaque'

<sup>35</sup>Na' gože' bene' ca' zjanaque' le' txen:

—¿Byažjele bi da' byažjele cate' gwseła' le'e jatixjue'ele xtiža'na'? Gwseła' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

<sup>36</sup>Na' gože' legaque':

—Perw na'a še napple mechw, cheyala' gualen, na' lecze ca' gual'e bzod. Na' še bitw bi spada chele de, le gote' xadon chelen' cont si'le to spada. <sup>37</sup>Chnia' le'e gonle ca', le gac chia' can' nyojczen le'e Xtiža' Diosen' žan: “Gosone'ne' ca' bene' güen da' xinj.” Na' cheyala' gac yogo'lol dan' nyojen.

<sup>38</sup>Nach gose'ene':

—Xanto', gwñašc nga noa'to' chope spada.

Na' gože' legaque':

—Güesaqueczen.

### Jesúsen' choł güiže' Diosen' latje gan' nzi' Getsemani

(Mt. 26:36-46; Mr. 14:32-42)

<sup>39</sup>Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'. <sup>40</sup>Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

<sup>41</sup>Na' gwle'e len legaque' zito' ca gan' zelao žin to yej da' gwzala'cho, na' bzoa xibe' na' bol güiže' Dios, <sup>42</sup>gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

<sup>43</sup>Na' to angl bene' za' yaba blo'elagüe' le' na' be'e le' fuerz valor. <sup>44</sup>Na' šlac chžaglaochgüe' len yichjlažda'ogüe'na' gwzolao chžaglaoch' choł güiže' Diosen' beyačlojje' yes. Na' nis yes che'na' beyaquen ca tlab'a güeje chen dan' zjanaquen chelson, besyeyinjten lo yo. <sup>45</sup>Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'. <sup>46</sup>Na' gože' legaque':

—¿Bixchen' chtasle? Le chas, le yol güiž Dios cont bi gon gwxiyen' le'e gan.

### Gosezene' Jesúsen'

(Mt. 26:47-56; Mr. 14:43-50; Jn. 18:2-11)

<sup>47</sup>Ne' choe'te Jesúsen' diža' cate' bešežin bene' zan gala'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnop'e xague', perw gague do lažen' bene' ca'. <sup>48</sup>Na' Jesúsen' gože' le':

—Judas, čchnopo' neda' cont gw-dio'nda' lo na' bene' quinga? neda' naca' bena' gwseła' Diosen' golja' benach.

<sup>49</sup> Na' cate' bene' ca' zjanaque' Jesúsén' txen besele'ede' can' gac che'na' nach gose'ene':

—Xanto', ¿gwyinto' bene' quinga spada cheton'?

<sup>50</sup> Na' toe' gwдынen' mos che bxož blaon', gwchogtechgüe' nague' licha.

<sup>51</sup> Perw Jesúsén' gože'ne':

—Bich gonle ca'.

Nach gwđane' nag mosen' na' beyone' le'. <sup>52</sup> Jesúsén' gože' bxož gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag? <sup>53</sup> Yogo' žaze gwzoo' len le'e chy'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholen'.

**Pedroa' bi gwčhebe'  
še nombi'e Jesúsén'**

(Mt. 26:57-58, 69-75; Mr. 14:53-54,  
66-72; Jn. 18:12-18, 25-27)

<sup>54</sup> Nach gosoxe' Jesúsén' na' goseche'ene' liž ben' naque' bxož blao che nación Israelen'. Nach Pedroa' na'ogüe' Jesúsén' zito' zito'le. <sup>55</sup> Na' bosoxene' yi' chy'o che bxož blaona' na' gosebi'e cho'a yi'na'. Na' gwche' Pedroa' len legaque'. <sup>56</sup> Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benga naque' txen len Jesúsén'.

<sup>57</sup> Perw Pedroa' bitw gwčhebe' še nombi'e Jesúsén'. Gože'ne':

—No'ole, bitw nombi'ane'.

<sup>58</sup> Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaque'.

<sup>59</sup> Gwde to hor yetoe' gwne':

—Da' licze nac benga txen len Jesúsén', le naque' bene' Galilea.

<sup>60</sup> Na' Pedroa' gože'ne':

—Bene', bi nezda' bi dižan' cho'o.

Na' ne' choe'te Pedroa' dižan' ca', gwchež to jea. <sup>61</sup> Na' Xancho Jesúsén' gwyečhe' gwne'e Pedroa' na' jayze'e Pedroa' diža' dan' gož Xancho' le' caten' gwne': “Bina' cuež jean' na'aže' cate' gac šone ni'a bi chebo' še nombi'o neda'.”

<sup>62</sup> Na' Pedroa' beze'e leca gwchežyaše'.

**Gosezi'diže' Jesúsén'**

(Mt. 26:67-68; Mr. 14:65)

<sup>63</sup> Na' bene' ca' goseche'e Jesúsén' gosezi'diže' le', na' gosot goseyine' le'.

<sup>64</sup> Na' bosocheje' to lache' lao Jesúsén' na' goseyine' le' na' gose'ene':

—Gwneya'ašč non' chyin le'.

<sup>65</sup> Na' zanch diža' da' gosene' gosezi'diže' Jesúsén'.

**Goseche'e Jesúsén' lao bene' ca'  
chesenabia' nación Israelen'**

(Mt. 26:59-66; Mr.  
14:55-64; Jn. 18:19-24)

<sup>66</sup> Na' cate' gwyeni', bene' gole blao ca' chesenabia' nación Israelen' na' bxož gwnabia' ca' na' bene' ca' chososed chosolo'e ley dan' bzoj da' Moisés be-sežague' na' gosone' mandadw gwyej Jesúsén' laogaque' gan' chesenabi'ena', nach gose'ene':

<sup>67</sup> —Gwnašč neto' še le' naco' ben' gwlej Diosen' cont nabi'o nación chechon'.

Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación chechon', bitw šejle'le chia'. <sup>68</sup> Na' šaca' bi nabda' le'e, neca yoži'ile xtižan', neca gwsanlenda. <sup>69</sup> Neda' naca' ben' gwseļa' Diosen' golja' beňach. Na' na'a cui'a cuit

Diosen' nabi'a txen len le', Dios ben' chn-  
abia' doxen.

<sup>70</sup>Nach yogüe' yose'ene':

—¿Len' naco' dogualje Xi'in Diosen'?

Na' gože' legaue':

—Le can' žale nan' naca'.

<sup>71</sup>Na' gosene':

—iNoch no chyažje no gagw xya che'  
Chio' ba benecho na'a chne' che Diosen'  
dan' že' ca'.

### Bosocuiše' Jesúsen' lao Pilaton'

(Mt. 27:1-2, 11-14; Mr.  
15:1-5; Jn. 18:28-38)

**23** Na' yogo'loł bene' ca' gosezože'e  
na' goseche'ene' lao Pilaton'  
ben' nac gobernador. <sup>2</sup>Na' gwzola  
bosocuiše' Jesúsen' gosene':

—Ba gwchoglaoto' che benga cheyała'  
gate' dan' chde' chgo'oyele' nación Israe-  
len' cont yesejle'e che' na' lecze chžone'  
chixjwto' da' cheyała' chixjwto' lao rey  
César. Na' lecze že' len' naque' Criston'  
ben' gwlej Diosen' cont nabi'e nación  
cheton'.

<sup>3</sup>Nach Pilaton' gwñabde'ne' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

<sup>4</sup>Nach Pilaton' gože' bħoz ca' len  
yogo'loł bene' ca' zjanžag lagüe'na':

—Bibi nla'lagüe' še bi doła' nap benga.

<sup>5</sup>Perw na' goseneche', gosene':

—Chde' chgo'oyele' yogo' bene' že' dis-  
tritw Judea nga yesejle'e dan' chsed  
chlo'ede'. Gwzolaogüe' bsed blo'ede' dis-  
tritw Galilean' perw lencze nga bach  
chsed chlo'ede' na'a.

### Pilaton' gwsele' Jesúsen' lao Herodes

<sup>6</sup>Cate' bene Pilaton' can gosene',  
nach gwñabe' še Jesúsen' naque' bene'  
Galilea. <sup>7</sup>Na' cate' gocbe'ede' Jesúsen'  
ze'e Galilean' gan' chnabia' gobernador  
Herodes, na' gwsele'ne' lao Herodes, le  
ca hora' zoa Herodes Jerusalenna'. <sup>8</sup>Cate'

Herodes ble'ede' le' bebede', le ba goc  
sša che'nde' le'ede' le'. Ba bende' xtiža'  
Jesúsen' na' zoe' lez le'ede' gone' to  
da' zaca' yebande'. <sup>9</sup>Nach da' zan da'  
gwñabde' Jesúsen', perw ne to xtižen'  
ca boži'i Jesúsen'. <sup>10</sup>Bħoz gwñabia' ca'  
na' bene' ca' chososed chosolo'e ley  
dan' bzoj da' Moisés gosezeche' gała'ze  
na' bosocuiše'ne' len zan diža'. <sup>11</sup>Na'  
Herodes len zan soldadw che' ca' gosezo-  
laogüe' gosezi'diže'ne' na' gosonle' che'.  
Nach cate' beyož bosoguacue'ne' to  
lache' xdan juisyw, gosesel'e'ne' da' yoble  
lao Pilaton'. <sup>12</sup>Na' žana' Pilaton' len  
Herodes gwzola gosaque' migw, la'czla'  
cate' za' gac ca' besegue'e lježe'.

### Gosechoglagüen' gat Jesúsen'

(Mt. 27:15-26; Mr. 15:6-15;  
Jn. 18:39-19:16)

<sup>13</sup>Nach Pilaton' botobe' bħoz gwñabia'  
ca' na' bene' ca' chesenabia' nación Israe-  
len' len yezan bene' yež, gan' chesone'  
yela' justisen'. <sup>14</sup>Nach gože' legaue':

—Le'e bedesanle benga lagua' nga,  
na' gwñale chde' chgo'oyele' bene' Israe-  
len' yesone' contr gobiernna'. Neda' bach  
gwñabyožda'ne' lao le'e ca' xyan' dan'  
chagwle che', ne to da' xinj ca' chželda' še  
bi dan' none'. <sup>15</sup>Na' lecz ca' Herodes bitw  
bi xtole' bželde', na' besele' le' laoto' nga.  
Na' nacbia' bibi ben benga da' cheyała'  
gate'. <sup>16</sup>Na' na'a con gona' mandadw  
yeseyine' le' na' gwsana'ne'.

<sup>17</sup>Gwne' ca', le yogüiz chsane' to bene'  
pres lo lni pascw chegaue'. <sup>18</sup>Na' yogo'  
bene' ca' že' bososye'e toz ca' gosene':

—Chojtega benga gate' na' gwsano'  
Barrabásen'.

<sup>19</sup>Na' Barrabásen' goseyixjue'ne' ližya  
da' bħie' gwdiļe lo' ciudadan' na' goque' to  
bene' güet bene'. <sup>20</sup>Na' da' yoble Pilaton'  
gwñabde' legaue' še gwsane' Jesúsen',  
<sup>21</sup>perw bososye'e zižjech gosene':

—iBde'e le'e yag cruz! iBde'e le'e yag  
cruz!

<sup>22</sup> Da' gwyon ni'a gož Pilaton' legaue':  
—¿Bixe da' xinj nonen? Ne to da'  
xinj bi chželda' še bi none' da' zaca'  
gate'. Na' gona' mandadw yeseyine' le' na'  
gwsana'ne'.

<sup>23</sup> Perw gosone' byen bososye'e  
yelate' zižzech gosenabe' gwde'ene'  
le'e yag cruz. Nach Pilaton' bzenague'  
chegaquen' <sup>24</sup> na' gwchoglagüe' che'  
gac can' gosenabde' le'. <sup>25</sup> Nach bsane'  
Barrabás ben' zjanyixjue' ližyan', ben'  
gosenabe' gwsane', la'czla' Barrabásna'  
goque' ben' bxie' gwdile' na' bene'  
güet bene'. Na' Pilaton' bodie' Jesús'en'  
lo na'gaque' cont yesone' len le' ca'  
chesaclaže'.

### Bosode'e Jesús'en' le'e yag cruz

(Mt. 27:32-44; Mr.

15:21-32; Jn. 19:17-27)

<sup>26</sup> Na' šlac zjanche'ene' gan' yesote'ne'  
besyežague' to bene' yež Cirene le'  
Simón, za' zeze'e yixe'. Na' bosogüe'ene'  
yag cruz che Jesús'en' na' gweyje'  
gwda'ogüe' Jesús'en'.

<sup>27</sup> Na' bene' zan zjana'ogüe' le' na'  
zjalen zan no'ole. Na' no'ol ca' gwzolao  
bososye'e gosebeže' che'. <sup>28</sup> Na' Jesús'en'  
gweychje' na' gože' legaue':

—No'ole Jerusalén, bitw cuežle chia'.  
Yejni'a le cuež chele na' che xi'inle.  
<sup>29</sup> Da' li gwžin ža cate' yesene': "Mbalaz  
nita' no'ole güiž no'ole cono gwxa'  
na' nono bguaže'." <sup>30</sup> Cana' yesenablaže'  
yesebixe ya'a ca' cont chenen legaue'.  
Yesenablaže' che' bdiñj goten legaue'.  
<sup>31</sup> Še yesot bene' neda' len bibi xtoła' de,  
ñacchxe yesonde' le'e nacle bene' güen  
da' xinj!

<sup>32</sup> Na' lecze goseche'e chop bene' güen  
da' xinj cont bosode'e legaue' le'e yag  
cruz can' gosone' len Jesús'en'. <sup>33</sup> Na' cate'  
besežine' latje gan' nzi' Latje che Žit Yichj  
Bene' Guat, bosode'e Jesús'en' le'e yag  
cruzen'. Na' lecze bosode'e bene' mal ca'  
chop le'e yag cruzen' len le', toe' gwda'

cuit Jesús'en' liča, na' yetoe' gwda'  
cuiten' robes. <sup>34</sup> Na' Jesús'en' gwne':

—Xa', bezi'xen che bene' quinga  
chesegue'ede' neda'. Gague zjanezde'  
bin' chesone'.

Na' gosone' rifa cate' besyele'e xałane'  
cont gota'bia' noe' yechelen. <sup>35</sup> Na' bene'  
zan besyežejde' le'. Na' bene' gwnabia'  
chegaque' ca' gosonle' che', gosone':

—Yezica'chle bene' bosle'. Še da'  
li naque' Criston' ben' gwlej Diosen'  
yedenabi'e, ¿bixchen' bi chosla cuine'?

<sup>36</sup> Nach soldadw ca' lecze ca' gosonle'  
che'. Gosebigue' gała'ze gan' zoa yag  
cruzen' na' bosonežjue'ne' vino zichj.

<sup>37</sup> Nach gosone':

—Še len' naco' rey che bene' Israel,  
bosla cuino'.

<sup>38</sup> Na' yichj yag cruz che'na' gwzoa to  
dan' nyojen, žan: "Bengan' rey che bene'  
Israel." Na' byojen diža' griego, diža'  
latín na' diža' hebreo.

<sup>39</sup> Na' to bene' mal ben' da' le'e yag cruz  
cuit Jesús'en' lecze gwzi'diže'ne', gože'ne':

—Še le' naco' ben' gwlej Diosen' cont  
yedenabi'o nación chechon', bosla cuino'  
na' lecze bosla neto'.

<sup>40</sup> Na' ben' yeto gwdiłe' bene' lježen'  
gože'ne':

—¿Bi chžebo' Diosen'? Chio' ba da'cho  
le'e yag cruz cont gatcho can' da' le',  
<sup>41</sup> na' dan' gat chio' naquen liča cont  
si'cho castigw che xtoła'chon'. Perw  
benga, bitw bi doła' nape'.

<sup>42</sup> Nach gože' Jesús'en':

—Jesús, šjayza'laže'go' neda' cate' žin  
ža nabi'o.

<sup>43</sup> Na' gož Jesús'en' le':

—Da' li chnia' le', na'aža soaczo' len  
neda' gan' zoa Diosen'.

### Can' goc caten' got Jesús'en'

(Mt. 27:45-56; Mr.

15:33-41; Jn. 19:28-30)

<sup>44</sup> Na' cate' bžin guagwbiž goc chol'  
doxen lo yežlion' bžinte do cheda šone'.

<sup>45</sup> Bitw bseni' gwbižen'. Na' ca nac lache' dan' ze lo' yodao' blaona', bcheza' gacholen'. <sup>46</sup> Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

<sup>47</sup> Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwyej to licha.

<sup>48</sup> Na' bene' zan bene' besežag besele'ede' can' goc na' yogo'lole' besyeya'aque' chesebaže' lcho'e gosacde' da' juisyw ba goc. <sup>49</sup> Na' yogo' bene' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

### Bosocuaše' Jesúsen'

(Mt. 27:57-61; Mr.

15:42-47; Jn. 19:38-42)

<sup>50</sup> Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to licha. <sup>51</sup> Ba zoe' chbeze' batcan' solao nabia' ben' seļa' Diosen'. Bitw bene' txen len bene' ca' gosechoglagüen' yesote' Jesúsen'. <sup>52</sup> Bena' gwyeye' lao Pilaton' jaynabe' cuerp che Jesúsen'. <sup>53</sup> Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen' to ba cobe ga nono na' yosocuaše'. <sup>54</sup> Na' yogo' da' ca' goc ža cate' chososiñ'e che ža che Dios. Na' ba bžin hor cate' cheyaļa' yosocueze' bite'teze žin o mandadw da' chesone'.

<sup>55</sup> Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'. <sup>56</sup> Nach gosa'aque' na' gosone' to da' chļa' zix da' yeseyebe'

cuerp che Jesúsen'. Na' ža che Diosen' gosenita'cze can' ža ley chegaquen', bibi žin gosone'.

### Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

**24** Baļ dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chļa' zix, na' yebaļ no'ole ja'aclene' legaque'. <sup>2</sup> Na' cate' besežine' na' besele'ede' ba bga'a yejen' dan' bosode'e cho'a blojen'. <sup>3</sup> Na' gosoe, na' bitw besyeželde' cuerp che Xancho Jesúsen'. <sup>4</sup> Šlac zjanite' chesyebande' che da' quinga, besele'ede' chope bene' zjazeera cuitgaquen' zjanyaze' lache' da' chactitchgua. <sup>5</sup> Na' no'ol ca' besežebe' na' bosocheque' yichjgaquen' gosene'e lo yole. Nach bene' ca' gose'e no'ol ca':

—¿Bixchen' cheyljwle to bene' mban nga ladjo bene' guat? <sup>6</sup> Notoch no nļa' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'. <sup>7</sup> Gwne' le' naque' ben' gwseļa' Diosen' golje benach. Na' gwne' cheyaļa' gaque' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

<sup>8</sup> Na' no'ol ca' jasyeze'ede' xtiže'na'. <sup>9</sup> Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaque'. <sup>10</sup> Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' María xna' Jacobo, na' len yebaļe no'ole. <sup>11</sup> Na' postlw ca' bitw gosejle'e che no'ol ca', gosacde' chesenazen'.

<sup>12</sup> Perw na' Pedroa' la' gwžoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

**Blo'elao Jesúsen' chop bene' ca'  
šlac zja'aque' Emaús**

(Mr. 16:12-13)

<sup>13</sup> Na' ľecze Źa dmigwna' chop bene' ca' gosaque' Jesúsen' txen ja'aque' yeŹ dan' nzi' Emaús, do Źnej mil metr zito' par Jerusalénna'. <sup>14</sup> Na' ľegacze' bosoaľje' che yogo' da' ca' ba goquen'. <sup>15</sup> Ne' chesone' xbab na' ne' cheso'e'te' diŹa' chen cate' Jesúsen' gwbigue' len ľegaque' na' gwza'lene' ľegaque' txen, <sup>16</sup> perw bitw gosacbe'ede' noxen' zejlen ľegaque'. <sup>17</sup> Nach goŹe' ľegaque':

—ĹBi diŹan' choe'le šlac ngo'ole nezen'? ĹBixchen' chacyaše'le?

<sup>18</sup> Na' toe' le' Cleofas boŹi'e xtiŹen' goŹe'ne':

—ĹNacxe chaquen' gwza'o Jerusalén na' biĹa' gacbe'edo' da' ca' ba goc ľo' ciudan'? ĹTozo' le' zo' Jerusalén na' biĹa' gacbe'edo'!

<sup>19</sup> Na' Jesúsen' goŹe' ľegaque':

—ĹBi goquen' Źale ca'?

Nach gose'ene':

—Dan' goc che Jesús bene' Nazaret. Goque' to bene' gwseľa' Dios cont be'e xtiŹen', na' Diosen' len benachen' besyebede' yeľa' guac chen' dan' blo'e na' diŹa' dan' be'e. <sup>20</sup> Perw na' bĹoz gwnabia' checho ca' len bene' ca' chesenabia' nación chechon' gosone' ľe' ľo na' bene' ca' gosechoglagüe' che' cheyaľa' gate', na' bosode'e ľe' ľe'e yag cruz. <sup>21</sup> Ba goc šone Źa na'a goc da' quinga. Na' neto' gwzoato' lez Diosen' gwseľe' ľe' cont yebeje' nación checho ľo da' malen'. <sup>22</sup> Na' no'ol ca' zjanac txen len neto', baľe' gosoe' diŹa' da' chebaneto', ja'aque' cho'a ban' be'e <sup>23</sup> na' bitw besyeŹelde' cuerp che'na'. Cate' besyela'aque' gosene' besele'eda'ogüede' anĹ bene' gose'e ľegaque' ba bebane' ladjo bene' guat ca'. <sup>24</sup> Na' ľecze to chop bene' byo bene' ca' zjanaque' txen len neto' ja'aque' cho'a

ban' na' besele'ede' cayanen' gosena no'ol ca' naquen, perw bi besele'ede' Jesúsen'.

<sup>25</sup> Na' goŹ Jesúsen' ľegaque':

—Nyaše'chguaze le'e bi chejni'ile na' bi chejľe'le yogo' dan' bosozoj bene' ca' gwseľa' Diosen' gosoe' xtiŹen' cani'. <sup>26</sup> ĹChaquale bi cheyaľa' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoŹa' la'laon naque' bene' zaca' juisyw.

<sup>27</sup> Na' be'e diŹa' len ľegaque' bsd blo'ede' ľegaque' yogo' dan' nyoj che'na' ľe'e XtiŹa' Diosen', gwzolaoteque' len dan' bzoj da' Moisés na' len dan' bosozoj yezica'chle bene' gwseľa' Diosen' gosoe' xtiŹen' cani'.

<sup>28</sup> Na' beseŹine' gaľa'ze yeŹen' gan' zja'aquen', na' Jesúsen' bene' ca' chon bene' šejch yelate' zito'ch. <sup>29</sup> Perw bene' ca' gosone' byen yega'ane' len ľegaque', gose'ene':

—Yega'anĹczo' len neto', ľe ba chaľ na' ba nac bagwŹe' par šejo'.

Na' gwyo'e cont yega'anlene' ľegaque'.

<sup>30</sup> Na' šlac zjachi'e cho'a mesen' txen, Jesúsen' gwxi'e yetextilen' na' be'e yeľa' choxcľen che Diosen' na' bzojxen' bneŹjuen' ľegaque'. <sup>31</sup> Cana'ch gosacbe'ede' ľe'na'. Na' šlac ne' nite' ca' con benite'. <sup>32</sup> Nach gose' ľjeŹgaque':

—Ĺeca bebe laŹda'ochon' cate' be'lene' chio' diŹa' chanez na' bsd blo'ede' chio' can' nyojen che' ľe'e XtiŹa' Diosen'.

<sup>33</sup> Na' ľa' besyeya'actie' jaya'aque' Jerusalénna' na' besyeŹine' gan' zjandop zjanŹag postľw ca' Źnej len bene' ca' yezica'chle. <sup>34</sup> Na' bene' Źnej ca' gose'e bene' ca' za' besyeŹin:

—Da' ľicze ba beban Xanchon'. Ba blo'elagüe' Simónna'.

<sup>35</sup> Nach bene' ca' chop gose'e ľegaque' dan' goc šlac zjangüe'e nezen', na' gose'e ľegaque' besyeyombi'e ľe' cate' bzojxe' yetextilen' cont yesagüen'.



**Jesúsen' blo'elagüe' bene'  
ca' zjanaque' le' txen**

(Mt. 28:16-20; Mr.  
16:14-18; Jn. 20:19-23)

<sup>36</sup>Ne' cheso'e'te' dižan' ca', cate'cze gwzecha Jesúsen' gachoł. Nach gože' legaque':

—Le soa binlo len xbab dan' yo'o lo' yichjlažda'olen'.

<sup>37</sup>Perw leca besežebe' na' besyebande', gosacde' še chesele'ede' bxin che da' bene' guata'. <sup>38</sup>Nach Jesúsen' gože' legaque':

—¿Bičhen' chacle tole? na' ¿bičhen' chonle xbab ca' lo' yichjlažda'olen'? <sup>39</sup>Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' bene' guat, bi nac žit bela' chia' ca dan' chle'ele nga.

<sup>40</sup>Beyož gwne' ca', blo'ede' legaque' ni'a ne'e ca'. <sup>41</sup>Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

<sup>42</sup>Nach bosonežjue'ne' late' yid bel gagüe' na' late' chixe beser da' yože šina'ba'. <sup>43</sup>Gwxi'en na' gwdagüen' laogaquen'. <sup>44</sup>Nach gože' legaque':

—Ba gwnia' le'e cate' ne' zolena' le'e cheyala' gac yogo'loł da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca'

goso'e xtiža' Diosen' cani', na' lecze ca' da' nyoj le'e Salmos ca'.

<sup>45</sup>Nach ben Jesúsen' cont gosejni'ide' da' ca' zjanyoj che' le'e Xtiža' Diosen'. <sup>46</sup>Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo bene' guat yeyon ža, neda' naca' Cristo ben' gwlej Diosen' yedenabia'. <sup>47</sup>Na' le'e cheyala' güe'le xtiža'na' len bene' že' yogo' nación. Solaotecl güe'len Jerusalén. Güe'le xtižan' nale cheyala' yesyetinje benachen' xtola'gaquen' cont Diosen' yezi'xene' chegaque'. <sup>48</sup>Le'e cheyala' güe'le diža' che da' quinga ba ble'ele dan' ba goc chia'. <sup>49</sup>Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo' ciuda nga na'a cuezle gon Xa' Diosen' le'e yela' guac da' za' yaba.

**Beyep Jesúsen' yaba**

(Mr. 16:19-20)

<sup>50</sup>Na' Jesúsen' gwche'e legaque' ja'aque' gan' chi' yež dan' nzi' Betania na' gwliš ne'e gwñabde' Diosen' gone' cont nite' mbalaz. <sup>51</sup>Na' ca' beyoža' beyepe' yaban'. <sup>52</sup>Na' bene' ca' gosaque' le' txen besyega'ane' yešlož dao' gosonxene' Jesúsen' nach jaya'aque' Jerusalénna', chesyebchgüede'. <sup>53</sup>Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.

## DIŽA' GÜEN DAN' BZOJ SAN JUAN

### Jesucristo ben' nzi' Xtiža' Dios golje' goque' beṇaḥ

**1** Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. <sup>2</sup> Cate' gwxe yežlion' ba zoacze len Diosen'. <sup>3</sup> Len' bene' yogo' beṇaḥ, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios. <sup>4</sup> Le' nse'e yela' mban. Na' ben' ba zjanape' yela' mban toli to-cane da' none', legaquen' ba yo'o be'ni' lo' yichjlažda'ogaquen'. <sup>5</sup> Ben' nzi' Xtiža' Dios bide' nse'e be'ni' che yichjlaždao' beṇaḥen', na' la'czla' beṇe' zan bi gosejni-laže'ne' na' bi gwyo'o be'ni' chen' lo' yichjlažda'ogaque', bi gosezaquede' yosocue'eje' be'ni' che'na'.

<sup>6</sup> Gwzoa to beṇe' le Juan, na' Diosen' gwsele'ne'. <sup>7</sup> Juanna' ben' bzoe' beṇe' nis bedeye'e diža' che ben' nsa' be'nin', cont yogo' beṇaḥ guac yesejni-laže'ne'. <sup>8</sup> Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' che yichjlaždao' beṇaḥen'. <sup>9</sup> Ba bžin ža be'ni' da' nac da' dogualje ba blan' yežlio nga, na' blan' cont gwseṇin' lo' yichjlaždao' note'teze beṇe'.

<sup>10</sup> Ben' nzi' Xtiža' Dios zoe' yežlion' cate' gwxeten. Na' la'czla' len' bene' yežlion' ben' že' yežlion' bi gosacbe'ede' non' naque'. <sup>11</sup> Golje' ladjo neto' beṇe' gualaž che', perw zan neto' beṇe' gualaž che' bi gwyejle'to' chen'. <sup>12</sup> San balteze chio' gwyejle'cho che', chio' gwyejni-laže'chone', bene' cont naccho xi'in' Dios. <sup>13</sup> Na' gague lagüe goljcho nita' xaxna'cho zjanaque' beṇe' bela' chen ba naccho xi'in' Dios. Na' gague lagüe to beṇe' byo gwzoalene' to no'ole ba naccho xi'in' Dios, na' gague lagüe beṇe' byon' go-

claže' soa xi'ine' ba naccho xi'in' Dios, san da' chejni-laže'chone', da'nan' non Diosen' chio' xi'ine'.

<sup>14</sup> Jesucristo ben' nzi' Xtiža' Diosen' golje' goque' beṇaḥ na' gwzoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in' Dios. Leca nži'ilaže'de' chio' beṇaḥ na' be-dezejni'ide' chio' diža' li che Diosen'. <sup>15</sup> Juanna' ben' bzoe' beṇe' nis be'e diža' che', gwne':

—Che bengan' bi'a diža' cate' gwnia': “Beṇe' za' za' zaca'che' ca neda', le ba zoacze le' cate' biṇa' soa neda'.”

<sup>16</sup> Jesucriston' nži'ilaže'chgüede' yogo' chio' chejni-laže'chone' na' zoacze' chacclenchgüe' chio'. <sup>17</sup> Da' Moisésen' bzejni'ide' da' xoxxta' neto' beṇe' Israel ley che Diosen' na' chlo'en yogo'cho napcho doła', na' Jesucriston' bedelo'ede' nži'ilaže' Diosen' chio' beṇaḥ na' bedezejni'ide' chio' diža' li che Diosen'. <sup>18</sup> Nono na' soa beṇe' ba ble'ede' Diosen'. Toz ben' nac dogualje Xi'in' Dios beṇe' tliša' ba bzejni'ide' chio' beṇaḥ can' nac yichjlaždao' Diosen', le chacchgüe Diosen' le'.

### Juan ben' bzoe' beṇe' nis be'e xtiža' Jesúsen'

(Mt. 3:11-12; Mr. 1:7-8; Lc. 3:15-17)

<sup>19</sup> Beṇe' chesenabi'e nación Israel cheton' beṇe' že' Jerusalén gososele' to chope bžox na' yebaḷe beṇe' gosalje lo' diaža che da' Leví cont gosenabde' Juanna' non' naque'. <sup>20</sup> Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho sela' Diosen' yedenabi'e nación chechon'.

<sup>21</sup> Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

<sup>22</sup>Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' che cuino'?

<sup>23</sup>Nach Juanna' gože' legaque':

—Neda' naca' ben' chne žiže to latje daš, žia': "Le gwža' yichjlažda'olen' cont gwzenagle che Xanchon' cate' yide'", can' gwna da' Isaías ben' be' xtiža' Diosen' cani'.

<sup>24</sup>Bene' ca' ja'ac lao Juanna', bene' fariseo ca' gosesele' legaque'. <sup>25</sup>Nach gose'ene':

—¿Bixchen' chzo' bene' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen'?

<sup>26</sup>Nach Juanna' gože' legaque':

—Neda' chzoa' bene' nis, na' gachol le'e ba zoa to bene' bina' gombia'le. <sup>27</sup>Len' za' gwlo'elagüe' na' zaca'che' ca neda', na' da' nacchgüe' bene' zaca' bitw zaca' gona xmandadoe' lechja' no xe'le'.

<sup>28</sup>Yogo' da' quinga goquen gan' nzi' Betábara dan' chi' yešla'a yegw Jordán gan' chzoa' Juanna' bene' nis.

### Jesúsen' yeque'e xtoła' benačhen'

<sup>29</sup>Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtoła' benačhen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'. <sup>30</sup>Che len' bi'a diža', gw-nia': "Ben' za' za' zaca'che' ca neda', na' le' ba zoacze' cate' bina' soa' neda'."

<sup>31</sup>Neda' bi gocbe'eda' non' naque' perw Diosen' bzejni'ide' neda', na' da'nan' zede-zoa' bene' nis cont yogo' chio' bene' Israel gacbe'echo non' naque'.

<sup>32</sup>Juanna' lecze gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'anen

len le'. <sup>33</sup>Neda' bi gocbe'eda' še Jesús nan' naque' ben' gwseła' Diosen', nach Dios ben' gwsele' neda' chzoa' bene' nis gože'nda': "Le'edo' yetj Spiritw chia' na' yega'anen len bene' ba mbeja'. Len' naque' bene' gon cont soa Spiritw chian' lo' yichjlaždao' bene' na' nabian' legaque'." <sup>34</sup>Ba ble'eda' goc can' gwne' na' cho'a diža' le' began' Xi'in Dios.

### Bene' nechw ca' gwlej Jesúsen' cont gosaque' le' txen

<sup>35</sup>Beteyo Juan ben' bzoa bene' nis zeche' da' yoble len yechope bene' zjanaque' txen len le'. <sup>36</sup>Na' cate' ble'ede' gwde Jesúsen', nach gože' bene' ca':

—Le na' ben' gwseła' Diosen' ben' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'.

<sup>37</sup>Na' cate' bene' ca' chope, ben' zjanaque' txen len Juanna', gosende' can' gwnen' nach ja'aclene' Jesúsen'. <sup>38</sup>Nach beyechj Jesúsen' na' gwne'e legaque' zjana'ogüe'ne', na' gože' legaque':

—¿Bi chaclaže'le?

Na' gose'ene':

—Maestrw, ¿gan' zo'?

<sup>39</sup>Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le' ba nac bagwže', ca do cheda tap.

<sup>40</sup>Na ca nac bene' ca' chope' bosozenag xtiža' Juanna' na' gosa'ogüe' Jesúsen', toe' Andrés, bene' biše' Simón Pedro. <sup>41</sup>Na' Andrésen' za' gone' bichle da' za' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

<sup>42</sup>Nach Andrésen' gwche'e bene' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'in Jonás. Perw yososi' bene' le' Cefas. (Na' Cefas zeje diža' Pedro.)

**Jesúsen' gwleje' Felipe na' Natanael  
cont bsed blo'ede' legaque'**

<sup>43</sup> Betyo Jesúsen' gwchoglagüen' yeyeje' Galilean' na' jañe'e Filipen' na' gože'ne':

—Yo'o len neda'.

<sup>44</sup> Filipen' goque' bene' Betsaida gan' nac laž Andréšen' len Pedron'. <sup>45</sup> Nach Filipen' jañe'e Natanaelen' na' gože'ne':

—Bač ble'eto' ben' bzoj da' Moiséšen' xtižen' le'e da' ca' gan' bzoje' ley chechon', na' lecze xtiže'na' bosozoj bene' ca' goso'e xtiža' Diosen' cani'. Len' Jesús bene' Nazaret, ben' nac xi'in José.

<sup>46</sup> Nach Natanaelen' gože'ne':

—¿Bat benecho yesene' Nazaret na' choj bene' zaca'?

Nach gož Filipen' le':

—Yo'o cont le'edo'.

<sup>47</sup> Na' Jesúsen' ble'ede' bač zej Natanaelen' gan' zoe'na' nach gwne':

—Na' za' to bene' Israel gualaž chechon' bene' naque' bene' güen. Ne late'ze bi naque' bene' gwxiye'.

<sup>48</sup> Natanaelen' bende' xtiža' Jesúsen' na' gože'ne':

—¿Nac chac nombi'o neda'?

Na' Jesúsen' gože'ne':

—Ble'eda' le' šlac zecho' xan yag yixgüigw cate' za' ne Filipen' le'.

<sup>49</sup> Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' seła' Diosen' yedenabi'o nación Israel chechon'.

<sup>50</sup> Na' Jesúsen' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'. <sup>51</sup> Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa'

nga, le neda' naca' ben' gwseła' Dios golja' benačh.

**Gota' to yela' güešagna'  
yež da' nzi' Caná**

**2** Beyon' ža gota' to yela' güešagna' yež da' nzi' Caná gan' mbane distritw Galilea. Na' xña' Jesúsen' gwyeye' liž ben' gan' gota' yela' güešagna'na'. <sup>2</sup> Na' lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'. <sup>3</sup> Na' bebiž vino dan' chese'ej bene' ca' že'na', na' xña' Jesúsen' gože' le':

—Bich bi vino čegaque' de.

<sup>4</sup> Na' gož Jesúsen' le':

—¿Bixčhen' žo' ca'? le bina' žin hor gwlo'a non' naca'.

<sup>5</sup> Na' xñe'ena' gože' bene' ca' cheson mandadon':

—Le gon bite'tez da' ne'.

<sup>6</sup> Na' nita' xop yeso' de yej ga chož nis da' chosochin bene' Israel gualaž četo' ca' par chesa' cheseyib cuine' can' ža ley četon'. Na' to to yej ca' chožen do xono' che'e o do ši che'e nis. <sup>7</sup> Nach Jesúsen' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten. <sup>8</sup> Nach gože' legaque':

—Le gaše' laten' na'a na' le šjanežjon ben' yo'o lo ne'e lñin'.

Na' gosone' can' gwnen'. <sup>9</sup> Na' ben' yo'o lo ne'e lñin' con bnixen' bi neзде' gan' zan', con bene' ca' cheson mandadw na'ze gosenezde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan', <sup>10</sup> na' gože'ne':

—Yogo'ze bene' chon lñi chdie' vino güen da' chzaca' la'ay cate' chzolao lñin', na' cate' ba zjane'je' da' zil nach cho'e legaque' da' corrient. San le' bzago' vino šagüen' chdion' na'a ba cheyož lñin'.

<sup>11</sup> Da' nga ben' Jesúsen' yež Caná distritw Galilea goquen yela' guac nechw da' bene' cont blo'e naque' bene'

zaca'chgua, nach bene' ca' gwleje' cont gosaque' le' txen gosejnilaže'ne'.

<sup>12</sup>Gwde na' Jesúsen' gwyeye' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' čhop šone ža.

**Jesúsen' bebeje' bene' cheson  
ya'a chyo'o yodao' blao**

(Mt. 21:12-13; Mr.  
11:15-18; Lc. 19:45-46)

<sup>13</sup>Na' ba zoa gala' lni che neto' bene' Israel da' nzi' pascw, nach Jesúsen' gwyeye' Jerusalén len bene' ca' zjanaque' le' txen. <sup>14</sup>Cate' bžine' chyo'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'e mechw. <sup>15</sup>Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chyo'o yodaon', len xila' ca', len go'n ca', na' besłase' xmechw bene' chosoša' mechon' na' gwlo'oni'ane'e xmesgaquen'. <sup>16</sup>Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

<sup>17</sup>Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chi'chgua yichja' che ližon' chonten ga saca'zi'chgua."

<sup>18</sup>Na' ben' chesenabia' nación Israel četon' gose'ene':

—¿Bi yela' guac gonon' da' le'eto' cont šejle'to' zaco' bebejo' bene' ca'?

<sup>19</sup>Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

<sup>20</sup>Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonan' šone žaze?

<sup>21</sup>Perw Jesúsen' bsaca'lebde' cuerp čen' yodao' cate' gwne' ca', na' legaque' gosone' xbab che yodao' na'zen' gwne' ca'. <sup>22</sup>Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gose-

jle'e Xtiža' Diosen' dan' nyoj che' na' lecze gosejle'e xtiža' Jesúsen'.

**Jesúsen' nezde' bin' yo'o lo'  
yichjlaždao' benačhen'**

<sup>23</sup>Šlac gwzoa Jesúsen' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwseła' Dios. <sup>24</sup>Perw Jesúsen' bi ben cuine' lo na'gaque', le nombi'e yichjlaždao' benačhen'. <sup>25</sup>Bi byažjde' no ye' le' xbab da' yo'o lo' yichjlaždao' bene' ca'. Le nezcedede' bin' yo'o lo' yichjlaždao' to to chio' benačh.

**Jesúsen' len Nicodemo**

**3** Na' gwzoa to bene' fariseo bene' le' Nicodemo. Goque' to bene' gwnabia' che nación Israel četon'. <sup>2</sup>Gwyeye' lao Jesúsen' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

<sup>3</sup>Na' gož Jesúsen' le':

—Da' li čhnia' le', še non' bi galje yeto bi gac šjayzoe' gan' zoa Diosen' čhna'bi'e.

<sup>4</sup>Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

<sup>5</sup>Na' Jesúsen' gozne':

—Čhnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' čhna'bi'e. <sup>6</sup>Bene' zjanaque' bela' čen chesenita' xi'ingaque' lecze bi' bela' čen. Na' Spiritw che Diosen' čhnežjon yela' mban toli' tocane che bene' chesejnilaže' Diosen'. Da'nan' žacho chesalje' yeto. <sup>7</sup>Bi yebando' dan' gwnia' chonen byen yogo' bene' galje' yeto. <sup>8</sup>Cate' chechj be' chechjen gate'teze, na' chendo' chołyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen'

cont chesalje' da' yoble. Bi chle'echo da' chon Spiriton' perw nacbia' ba bocoben yichjlažda'ogaque'.

<sup>9</sup>Nach Nicodemon' gože'ne':

—¿Nacxe gac can' žo' nga?

<sup>10</sup>Na' gož Jesúsen' le':

—Le' chsed chlo'edo' beñe' Israel gualaž chechon' xtiža' Diosen', ¿bi chejni'ido' da' quinga? <sup>11</sup>Da' li neto' chyixjue'eto' da' nezeto' na' choe'to' diža' che da' ba ble'eto' na' bi chejle'le. <sup>12</sup>Ba bia' diža' che dan' chac yežlio nga na' bi chejle'le. ¿Nac gac šejle'le še nia' le'e da' chac yaban'?

<sup>13</sup>Toze neda' naca' ben' gwsela' Diosen' golja' beñach' za'a yaba na' noch no zoa no ba beyep yaba cont nezde' che Diosen'. <sup>14</sup>Na' can' goc latje daš cani' cate' gwlis da' Moisésen' bel de bronze bde'eba' to le'e yag, can' cheyala' gac yeselise' neda' to le'e yag, neda' gwsela' Diosen' golja' beñach. <sup>15</sup>Na' gac chia' ca' cont note'teze beñe' yesejnilaže' neda' bi cuiaye'e san gata' yela' mban che' toli tocane.

### Chaque Diosen' beñachen'

<sup>16</sup>Leca chaque Diosen' chio' beñach, na' gwsela' Xi'ine' beñe' tliša' cont note'tez beñe' chejnilaže'ne' bi cuiaye'e, san gata' yela' mban che' toli tocane. <sup>17</sup>Na' Diosen' gwsele' Xi'inen' yežlio nga gague cont gwnežjue' castigw che xtola' beñachen', san cont gwnežjue' yela' mban chegaque' toli tocane.

<sup>18</sup>Note'tez beñe' chesejnilaže' Xi'in Diosen' beñe' tlišan', bi yesezi'e castigw che xtola'gaquen', perw beñe' bi chesejnilaže'ne' ba nchoglaon chegaque' yesezaca'zi'e toli tocane da' bi chesejnilaže' Xi'in Dios beñe' tlišan'. <sup>19</sup>Na' can' naquen, beñe' bi chesejnilaže' Xi'in Diosen' ba nchoglaon chegaque' yesezaca'zi'e toli tocane. Nchoglaon yesezaca'zi'e, le ba bid Xi'in Diosen' nse'e be'ni' che yichjlaždao' beñachen'

perw na' chesyebchde' dan' nac choj clel ca be'ni' chen', dan' chesone' da' malen'. <sup>20</sup>Yogo' beñe' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal. <sup>21</sup>San note'tez beñe' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li chen'.

### Juan ben' bzoa beñe' nis be'che' diža' che Jesúsen'

<sup>22</sup>Gwde na' Jesúsen' len beñe' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosonite' na' bosozoe' beñe' nis. <sup>23</sup>Na' Juanna' lecze bzo'e beñe' nis yež gan' nzi' Enón da' chi' gała'ze Salim, le na' dechgua nis. Na' ja'ac beñe' gan' gwzoen' cont bzo'e legaque' nis. <sup>24</sup>Caten' bina' yeseyixjue' Juanna' ližyan' goc ca'. <sup>25</sup>Nach gwche' to žaš len beñe' ca' zjanaque' txen len Juanna' na' yeto chope beñe' Israel gualaž cheto' che dan' chesezoa beñe' nis. <sup>26</sup>Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bač chzoe' beñe' nis na' yogo'ze beñe' chja'aque' gan' zoe'na'.

<sup>27</sup>Nach Juanna' gože' legaque':

—Nono gaxcene' še bi gon Diosen' cont yesonxen beñe' le'. <sup>28</sup>Nezczele can' ba gwnian', bi naca' Cristo ben' chbezcho sela' Diosen' yedenabi'e chio', san naca' ben' gwsela' Diosen' cont bia' xtižen' žialaole. <sup>29</sup>Cate' chac to yela' güešagna', toz beñe' byo ben' chšagnan' chzi'e no'olen'. Perw še zoa beñe' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgiüeda' beñe' zan chosozenague' che Criston'. <sup>30</sup>Len'

cheyala' šejch yesonxen bene' le' na' neda' cheyala' šejch yesanlaže' neda'.

### Bene' za' gan' zoa Diosen'

<sup>31</sup>Ca nac Cristo ben' za' gan' zoa Diosen', le' naque' bene' zaca'ch ca yogo'loł bene'. Yezica'chle benach zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'loł bene'. <sup>32</sup>Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. <sup>33</sup>Na' note'tez bene' chosozenag xtiža' ben' za' gan' zoa Diosen', nacia' bena' nezde' Diosen' cho'e diža' li. <sup>34</sup>Na' bena' gwseja' Diosen', bena' za' gan' zoe'na', len' cho'e xtiža' Diosen', le Spiritw che Diosen' zoan len le', na' cate' Diosen' chone' Spiritw chen' bi chyisen' late' güeje. <sup>35</sup>Diosen' chacde' Xi'ine' Criston' na' ba bene' lo ne'e yogo'loł da' de yežlion'. <sup>36</sup>Na' bene' ca' chesejnilaže' Xi'in Diosen' de yela' mban chegaque' toli tocanē, san bene' cheson güedenag len Xi'in Diosen', bi gata' yela' mban chegaque', le Diosen' gone' cont yesezaca'zi'e toli tocanē.

### Jesúsen' be'e diža' len to no'ole Samaria

**4**<sup>1-3</sup>Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txe' gosonen'. Nach cate' Jesúsen' gwnezde' bene' fariseo ca' gosacbe'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txe'.

<sup>4</sup>Na' benen byen zjaya'aque' nez da' chde Samaritan'. <sup>5</sup>Ca' goquen' besežine' to yež da' nzi' Sicar lo distritw Samar-

ian'. Yežen' chega'anen gała'ze gan' de yežlio dan' bnežjw da' Jacob da' xi'ine' José. <sup>6-8</sup>Na' žia to bej da' nacchgua sitjw da' nzi' Bej che da' Jacob. Ca do guagwbiž Jesúsen' ba chjxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txe' na' zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Ben late' nis ye'aja'.

<sup>9</sup>Na' no'ole Samaritan' boži'en gože'ne':

—¿Nacxe'chen' le' naco' bene' Israel chnabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi chesene lježe' len bene' Samaria ca'.) <sup>10</sup>Nach Jesúsen' gože'ne':

—Neda' ba goša' le': “Ben late' nis ye'aja'”, na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwñabdon' neda' na' ba bena' le' nis da' chon yela' mban toli tocanē šaca'.

<sup>11</sup>Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' chon yela' mbanña' žo' ca'? <sup>12</sup>¿Chacdo' zaca'cho' ca da' xozxta'ochó Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

<sup>13</sup>Gož Jesúsen' le':

—Note'tez bene' ye'ej nis che bej nga bia'cze bilde' da' yoble. <sup>14</sup>Na' note'tez bene' ye'ej nisen' gwnežjua'ne' neda', gwbatech bilden' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocanē.

<sup>15</sup>Na' no'olen' gože'ne':

—Bene', ben neda' nisen' žo' ca' cont bich bil'dan' na' bich yida' dexian' nga.

<sup>16</sup>Jesúsen' gože'ne':

—Beyej jeł güiž bene' chio' na' le da nga.

<sup>17</sup>Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa, <sup>18</sup>le gayo' bene' chio' ba gwnita' na' bene' zoaleno' na' a gague naque' bene' chio'. Da' li can' ba gwnaon'.

<sup>19</sup>Na' gož no'olen' le':

—Bene', chacbe'eda' naco' to bene' chac chyixjue'ede' bi da' ža Diosen'. <sup>20</sup>Da' xoxzta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalénna' cheyala' gonxenchone'.

<sup>21</sup>Jesúsen' boži'en gože'ne':

—No'ole, gweyjele' chia', gwžin ža cate' bi gonen byen gonxle Diosen' lo ya'a nga ne Jerusalénna'. <sup>22</sup>Le'e nacle bene' Samaria bi nombia'ya'ne'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'. <sup>23</sup>Chžin ža na' na'a ba gole', cate' bene' yesonxene' Xacho Diosen' can' cheyala'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'. <sup>24</sup>Diosen' bi naque' bene' bela' chen, naque' spiritw. Da'n'an' bene' yesonxen le', lo' yichjlažda'ogaque' cheyala' yesonxene' bene' nac dogualje Dios.

<sup>25</sup>Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

<sup>26</sup>Nach Jesúsen' gože' no'olen':

—Neda' choe'lena' le' diža' naca' ben' žo' ca'.

<sup>27</sup>Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'. <sup>28</sup>Nach no'olen' bocua'an' che'e nis chen'

na' beyeje' lo yežen' jayeže' bene' gualaž che' ca':

<sup>29</sup>—Le šo'o le na' to bene' ba gože' neda' yogo'te da' ba bena'. Žše bengan' Cristo ben' chbezcho yedenabi'e?

<sup>30</sup>Na' besežaše' yežen' ja'aque' gan' chi' Jesúsen'. <sup>31</sup>Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

<sup>32</sup>Na' Jesúsen' gože' legaque':

—Bi nezele de to yela' guagw chia'.

<sup>33</sup>Na' gose' lježe':

—ŽGague ba bedesesan bene' da' gwdagüe'?

<sup>34</sup>Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwsela' neda' cont gac yogo' da' chnalaže'. <sup>35</sup>Le'e žale: “Ne' dech yetap bio' cont yedobe cosešen'.” Na' neda' chnia', le na' na' le'ele to coseš da' chyažje yedob na'a. <sup>36</sup>De da' goncho na'a cont bene' yosozenague' che Diosen' na' gata' yela' mban chegaque' toli tocane. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz. <sup>37</sup>Diža' nga naquen da' li, žan: “Bene' yoble chaz na' bene' yoble chelap.” <sup>38</sup>Bach chsela' le'e šjaylaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

<sup>39</sup>Na' ca nac bene' yež Sicar ga mbane Samaria, zane' gosejnilaže' Jesúsen' da' gosende' gwna no'olen': “Ba gože' neda' yogo' da' ba bena'.” <sup>40</sup>Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'ane' chope ža. <sup>41</sup>Na' bene' zanch gosejnilaže' Jesúsen' cate' gosende' diža' da' be' cuine'. <sup>42</sup>Nach gose'e no'olen':

—Bach chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan'



Cristo ben' gwlej Diosen' cont yebeje' benačen' lo da' malen'.

**Jesúsen' beyone' xi'in  
to bene' gwnabia'**

<sup>43</sup> Na' cate' goc chop ža, Jesúsen' len bene' ca' zjanaque' le' txen gosa'aque' jaya'aque' Galilea. <sup>44</sup> Le cuin Jesúsen' ba gwne' note'teze bene' cho'e xtiža' Diosen', bi chesonla'ancze bene' gualaž čhen' le'. <sup>45</sup> Na' cate' besežine' Galilean' bene' gualaž čhegaquen' bosolebe' Jesúsen' dan' ba besele'ede' yogo' da' güen da' bene' Jerusalénna' lo lñin', le lencze le-gaque' ja'aque' lñina'.

<sup>46</sup> Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoo to bene' gwnabia' bene' chon žin čhe rey, na' chacšenchgüe xi'ine'. <sup>47</sup> Xa bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwneyoede' le' šeje' šjayene' xi'inen', le ba zoa gatbe'. <sup>48</sup> Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le chia'.

<sup>49</sup> Nach ben' chon žin čhe reyen' gota'yoede' le' gwne':

—Bene', yo'ošca šlac biña' gat bi' čhian'.

<sup>50</sup> Na' Jesúsen' gože'ne':

—Beyej ližo', bi gat bi' čhion'.

Nach gwyejle' bena' dan' gož Jesúsen' le' na' beze'e. <sup>51</sup> Ba zoa yežine' cate' jasešag xmoše' ca' le' na' gose'ene':

—Ba beyac bi' čhion'.

<sup>52</sup> Na' gwñabde' legaque' bi hor gwzoo lao beša'alaze'be', na' gose'e le':

—Neje cheda to gwde guagwbiz be-chojbe' da' lan'.

<sup>53</sup> Na' xaben' gocbe'ede' ca hor na'czen' gož Jesúsen' le' bi gat bi' čhen'. Nach gwyejnilaže' Jesúsen', le' len yogo' bene' že' ližen'.

<sup>54</sup> Da' nga goc yela' guac gwchop da' ben Jesúsen' šlac beze'e Judean' na' bežine' Galilea.

**Jesúsen' beyone' to bene'  
nat late' cuerp čhe'**

**5** Na' gwde to tiemp bžin ža goc yeto lñi čhe neto' bene' Israel Jerusalénna', na' Jesúsen' gwyeje'.

<sup>2</sup> Jerusalénna' galaže cho'a puert čhe ze'e da' nychj ciudan' dan' nzi' Puert čhe Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. <sup>3</sup> Na' bene' zan bene' güe' zjadie' chalšil ca', no bene' lchol, no bene' nxinj ni'e, no bene' natsi' late' güeje cuerp čhegaquen'. Zjadie' chesebeze' batcan' ta nisen'. <sup>4</sup> Le tgüeje betj to angl na' bte' nisen', na' bene' nechw bene' cho'e lo' nisen' cheyož čhta anglen' len, cheyacde' bite'tez yižgüe' che'ede'. <sup>5</sup> Na' cate' bžin Jesúsen' na' de to bene' ba goc šino'šonechoa iz chacšende'. <sup>6</sup> Na' Jesúsen' ble'ede' ben' na' gocbe'ede' ba chac šša de' ca', na' gože'ne':

—ČChaclažo' yeyaco'?

<sup>7</sup> Na' bene' güen' gože' Jesúsen':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' četje' lo' nisen'.

<sup>8</sup> Nach gož Jesúsen' le':

—Gwyas na' botobe xta'on na' gwda.

<sup>9</sup> Na' la' beyacte bena' na' botob xte'en na' gwzolao chde'. Perw na' goquen to ža čhe Dios cate' bi de lšens gon neto' bene' Israel žin. <sup>10</sup> Nach bene' gwnabia' čhe neto' bene' Israel goše'e bena' beyaquen':

—Ža čhe Dios na'a. Bi de lšens yeyoa' xta'ona'.

<sup>11</sup> Na' gož ben' legaque':

—Bena' beyon neda' gože'nda: "Botobe xtaon' na' gwda."

<sup>12</sup> Nach gose'ene':

—ČNon' gož le': "Botobe xtaon' na' gwda"?

<sup>13</sup> Na' ben' beyaquen' bi gwneзде' non' beyon le', le Jesúsen' benite' ladjo bene' zan ca'. <sup>14</sup> Gwdechle Jesúsen' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyala' cuejyichjo' da' malen' bich gonon', cont bi gac chio' to da' malech.

<sup>15</sup> Nach beza' bena' jatixjue'ede' bene' gwnabia' che nación Israel cheton' gože' legaque' Jesúsna' ben' beyon le'. <sup>16</sup> Da'nan' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de lsens gon neto' bene' Israel žin. <sup>17</sup> Na' Jesúsen' gože' legaque':

—Xan' zoacze' chelalde' bate'teze na' lecze ca' neda'.

<sup>18</sup> Da'nan' goseyiljwlaže'che' nacle yesone' yesote' Jesúsen', perw gague neče bi chone' can' ža ley gan' chgualan' che ža che Dios na'zen', san lecze da' gwne' Diosen' naque' Xe', le zejen toz ca' zaque' len Diosen'.

### Yela' chnabia' da' nape Xi'in Diosen'

<sup>19</sup> Na' gož Jesúsen' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. <sup>20</sup> Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca' da' quinga da' gona' cont yebanele. <sup>21</sup> Ca' Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnežjua' yela' mban che note'tez bene' chbeja' cont gata' yela' mban chegaque'. <sup>22</sup> Na' Xan' bi chchoglagüe' che ne to bene' še nape' doła', san ba gwlo'e lo' na' choglagua' che yogo' benač še non' nap doła'. <sup>23</sup> Xan' chaclaže' yogo' bene' yesonxene' neda' lecze can' chesonxene' le'. Na' bene' bi

chonxen neda', ne Xa' Diosen' bi chonxene', le le'na' gwsele' neda'.

<sup>24</sup> Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban chegaque' toli tocañe. Na' bi yesezaca'zi'e toli tocañe da' bi chesejnilaže'ne'. Bich zjanaque' ca' bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neče ba chesejnilaže'ne'. <sup>25</sup> Chnia' le'e to da' zejen, gwžin ža cate' bene' zjanac ca' bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban chegaque' toli tocañe, na' bač chzolao chac ca' na'a. <sup>26</sup> Xa' Diosen' zoacze' toli tocañe na' chone' cont zjamban benachen', na' lecze ba bene' cont neda' naca' Xi'ine' zoa' toli tocañe na' chona' cont zjamban bene'. <sup>27</sup> Na' lecze ba bene' neda' yela' chnabia' cont nia' non' nap doła', le ba gwsele' neda' golja' benač. <sup>28</sup> Bi yebanele dan' chnia' nga, le gwžin ža cate' yogo'lo' bene' guat že' lo' ba yesende' cate' yol' güiža'ne'. <sup>29</sup> Na' bene' ca' goson da' güen šlac gosebane' yesyechoje' na' yesebane' toli tocañe. Na' bene' ca' goson da' mal šlac gosebane' yesyechoje' na' yesezaca'zi'e toli tocañe.

### Jesúsen' bzejni'ide' nape' yela' chnabia'

<sup>30</sup> Bibi gac gona' to gualaza'. Chzenaga' bin' ža Xan' cont nia' che benachen' noe' nap doła'. Na' dan' nia' gac che to to bene' naquen da' cheyala' gac, le bi chi'yichja' gac dan' chnalaza'; san chi'yichja' gac can' chnalaze' Xan' ben' gwseła' neda'. <sup>31</sup> Šaca' toz neda' chgua'a da' bali non' naca', bi naquen to da' šejle'le. <sup>32</sup> Perw zoa' Xan' cho'e diža' li non' naca', na' nezda' diža' da' cho'e chia' naquen da' šejle'le.

<sup>33</sup> Baçh gwseła'le bene' lao Juanna' cont jaseñabde' le' nac nac chia', na' Juanna' be'e diža' li non' naca'. <sup>34</sup> Perw neda' bi chyažjda' diža' da' güe' ne to beñach chia'. San chnia' da' quinga cont le'e šejle'le chia' na' gata' yela' mban chele toli tocañe. <sup>35</sup> Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsd blo'eden'. <sup>36</sup> Na' de to da' choe' xtiža' da' zaca'ch ca diža' da' choe' Juanna' chia': chona' yogolo' da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'. <sup>37</sup> Nach Xan' ben' gwseła' neda' lecze cho'e xtižan', la'czla' bina' yenele can' chnen' na' bina' le'ele can' naquen'. <sup>38</sup> Xtižen' bina' šon' lo' yichjlažda'olen', le bi chejnilaže'le neda' naca' ben' gwselen'. <sup>39</sup> Chsedyane'le gan' nyoj Xtiža' Diosen', le chaquele gaple yela' mban toli tocañe neche chsedlen. Na' da' ca' chsedlen' zjanyojen chesoen' xtiža'. <sup>40</sup> Perw bi chaclaže'le šejnilaže'le neda' cont gata' yela' mban chele toli tocañe.

<sup>41</sup> Na' neda' bi chyažjda' yesena beñachen' naca' bene' zaca'. <sup>42</sup> Nombi'a le'e na' nezda' bi chaquele Diosen'. <sup>43</sup> Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab chegacze', nachle chejle'le chegaque'. <sup>44</sup> ¿Nacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen. <sup>45</sup> Bi gonle xbab neda' gwcuiša' le'e lao Xan'. Da' Moisésen' hcuiše' le'e lagüen', le chsedchguale dan' bzojen' chaquele cont soale binlo len Diosen', perw bi chejle'le xtižen'. <sup>46</sup> Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'. <sup>47</sup> Na' da' bi chejle'le dan' bzoj da' Moisésen', ¿nacxe gonle šejle'le bi dan' žia' le'e?

### Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

**6** Gozde goc ca' Jesúsen' gwyeje' yešla'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. <sup>2</sup> Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'. <sup>3</sup> Na' gwloe Jesúsen' to lo ya'a len bene' ca' zjanaque' le' txen na' gosebi'e. <sup>4</sup> Na' da' yoble ba zoa gala' lni che neto' bene' Israel da' nzi' pascw. <sup>5</sup> Na' cate' gwña' Jesúsen' ble'ede' bene' zan ba zjanao' le' na' gože' Felipen':

—¿Gaxe si'cho da' yesagw yogo' bene' quinga?

<sup>6</sup> Gwne' ca' yešque bi na Felipen', le Jesúsen' nezecede' naquen' gone'. <sup>7</sup> Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

<sup>8</sup> Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

<sup>9</sup> —Nga zoa to bi' byo dao' na' de gayo' yetextil de cebada chebe' na' yeçhope bel ya'a. Perw ¿bi de gon da' quinga? le bene' zanna' že' nga.

<sup>10</sup> Nach Jesúsen' gože' bene' ca' zjanaque' le' txen:

—Le ye' yogo'lole' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'. <sup>11</sup> Nach gwxi' Jesúsen' yetextil ca', na' beyož be'e yela' choxcen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lecz ca' bene' len bel ya'a ca'. Na' goso'e to toe' con ca'te'te' gosaclaže' gosagüe'. <sup>12</sup> Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

<sup>13</sup>Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šižinw žome. <sup>14</sup>Cate' bene' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho sela' Diosen' yežlio nga.

<sup>15</sup>Na' cate' Jesúsen' gocbe'ede' ba zoa yeseche'exoxje' le' cont yesone' le' rey chegaque', nach gozze'e gozeje' ya'adaon' toze'.

### Jesúsen' gwze'e lo nisaon'

(Mt. 14:22-27; Mr. 6:45-52)

<sup>16</sup>Cate' ba gwxin, bene' ca' zjanaque' Jesúsen' txen jaya'aque' cho'a nisaon'.

<sup>17</sup>Na' besyeyo'e to lo' barcw zjaya'aque' ciuda Capernaum. Ba goł na' Jesúsen' bina' yežine'. <sup>18</sup>Na' chas chata' chac nisaon' le' chechjchgua be'. <sup>19</sup>Ba goc sša zjaya'aque' len barcon' lo nisaon' cate' besele'ede' ba zjayda Jesúsen' cheze'e lo nisen' gała'ze gan' zej barcon'. Na' besežebe'. <sup>20</sup>Na' gože' legaque':

—Nedan', bi žeble.

<sup>21</sup>Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisaon' gan' zjaya'aquen'.

### Bene' zan chesyeyiljue' Jesúsen'

<sup>22</sup>Na' beteyo bene' zan bene' ca' besyega'an yešla'a cho'a nisaon' gosacbe'ede' nono Jesúsen' nla' na' gosacbe'ede' bibi barcw yoble gota'ch san toga dan' besyeyo'o bene' ca' zjanaque' Jesúsen' txen, na' zjanезде' Jesúsen' bi beyo'e len legaque' lo' barcon'. <sup>23</sup>Nach besežin barcw da' za'ac ciuda Tiberias gała'ze gan' gosagüe' yetextilen' caten' beyož be' Xancho Jesúsen' yela' choxcen che Diosen'. <sup>24</sup>Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

### Yela' guagw da' chnežjon bene' yela' mban toli tocane

<sup>25</sup>Na' cate' bene' zan ca' besyeželde' Jesúsen' yešla'ale nisaon' nach gose'e le':

—Maestrw, žbatca' bla'o nga?

<sup>26</sup>Na' Jesúsen' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen, gague neche chejle'le chia' lagüe ba ble'ele yela' guac ca' ba benan'. <sup>27</sup>Bi cheyala' cuecyichjle gata' da' ye'ej gagwle da' chbiayi', san cuecyichjle gata' da' gon yela' mban chele toli tocane. Diosen' gwsele' neda' golja' benačh na' neda' gona' to da' ye'ej gagwle cont gata' yela' mban chele toli tocane. Na' Xa' Diosen' ba blo'e naca' ben' ba gwsele'.

<sup>28</sup>Na' gose'ene':

—ŽBi cheyala' gonto', cont yebe Diosen' neto'?

<sup>29</sup>Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwsele'.

<sup>30</sup>Na' gose'e Jesúsen':

—ŽBi yela' guac gono' še ca' cont le'eto' na' šejnilaže'to' le'? ŽBi gono'? <sup>31</sup>Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' chegaquen', žan: “Yela' guagw da' za' yaban' be'e legaque' gosagüe'.”

<sup>32-33</sup>Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xozxta'ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe'na', san de to yela' guagw da' ba gwsele' Diosen' na'a da' za' yaban' na' betjen yežlion', na' chnežjon yela' mban che note'teze bene' chesagw len.

<sup>34</sup>Nach bene' ca' gose'e le':

—Bene', bešca neto' yela' guagon' žo' ca' gagwton' yogo' ža.

<sup>35</sup>Nach Jesúsen' gože' legaque':

—Neda' naca' yela' guagw da' chnežjon bene' yela' mban toli tocane. Note'teze bene' yosozenag chia' na' yesejnilaže' neda', guata' da' chyažje yichjlažda'ogaque' toli tocane. <sup>36</sup>Na' ba gwnicza' le'e, la'czla' ba ble'ele neda' bi chejnilaže'le neda'. <sup>37</sup>Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. <sup>38</sup>Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwsele' neda'. <sup>39</sup>Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'. <sup>40</sup>Xan' chaclaže' yogo'lo! bene' yesejni'ide' non' naca' na' yesejnilaže' neda' cont gwnežjue' legaque' yela' mban toli tocane, na' neda' yosbana' legaque' ladjo bene' guaten' še ba gosate' cate' žin ža te che yežlion'.

<sup>41</sup>Na' zan bene' Israel gualaž cheto' legacze' besežeše' che dan' gwna Jesús'en: "Neda' naca' yela' guagw da' za' yaba."

<sup>42</sup>Gosene':

—¿Gague bengan' Jesús xi'in José? Nombia'cho xaxna' benga. ¿Bi dižan' cho'e že' ze'e yaba betje' yežlio?

<sup>43</sup>Nach Jesús'en gože' legaque':

—Bich žešele chia'. <sup>44</sup>Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. <sup>45</sup>Le'e gan' bosozoj bene' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

<sup>46</sup>Bi nacho zoa bene' ba ble'ede' Xan'. Toza' neda' ba ble'eda'ne', le za'a gan'

zoen'. <sup>47</sup>Chnia' le'e to da' zejen, bene' chesejnilaže' neda', de yela' mban chegaque' toli tocane. <sup>48</sup>Neda' naca' yela' guagw da' chnežjon yela' mban toli tocane che benachen'. <sup>49</sup>Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. <sup>50</sup>Neda' cho'a diža' che to yela' guagw da' za' yaban' na' bene' chagw len bi gate'. <sup>51</sup>Neda' naca' yela' guagw dan' za' yaban' dan' nsa' yela' mban toli tocane. Bene' šejnilaže' neda', bane' toli tocane. Na' yela' guagw da' chnežjua' cont gata' yela' mban che benachen' naquen cuerp chia'.

<sup>52</sup>Nach bene' Israel gualaž cheto' ca' legacze' besežeše', gosene' che':

—¿Nacxe gone' gone' cuerp chen' gagwchon?

<sup>53</sup>Jesús'en gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp chian' na' še bi che'ejele xchenan', bi de yela' mban chele toli tocane. <sup>54</sup>Bene' chesagw cuerp chian' na' chese'eje' xchenan' de yela' mban chegaque' toli tocane, na' še ba gosate', cate' te che yežlion' yosbana' legaque' ladjo bene' guat ca'. <sup>55</sup>Le cuerp chian' naquen dogualje yela' guagw, na' xchenan' naquen dogualje da' ye'ejele. <sup>56</sup>Bene' ca' chesagw cuerp chia' na' chese'eje' xchenan' de yela' mban chegaque' toli tocane, na' zjanaque' txen len neda' na' neda' naca' txen len legaque'. <sup>57</sup>Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp chian', yesenite' toli tocane dan' zjanaque' txen len neda'. <sup>58</sup>Cuorp chian' naquen yela' guagw da' za' yaba. Na' len bi naquen ca' da' gosagw da' xozxta'ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocane.

<sup>59</sup> Jesúsen' bsed blo'ede' da' ca' lo' yo-dao' che bene' Israel gualaż cheto' ca' da' zoa Capernaum.

**Xtiža' Jesúsen' chnežjon yela' mban toli tocane che bene' chosozenag chen**

<sup>60</sup> Na' zan bene' ca' zjanao' Jesúsen', cate' gosende' da'na' chzejni'ide' le-gaque', gosene':

—Zdebechua naquen goncho dan' chzejni'iden'. ¿Noxen' gac gon can' žen'?

<sup>61</sup> Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'?

<sup>62</sup> ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwsela' Diosen' golja' benach. <sup>63</sup> Spiritw chian' chnežjon benachen' yela' mban, na' cuerp chian' bi gac gonen ca'. Diža' dan' bach bia' len le'e zjazacan' len yichjlažda'olen' cont banle toli tocane še šejle'le chen. <sup>64</sup> Perw ne' nita' balle bi chejle'le.

Jesúsen' gwne' ca' le gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo' na' bene' ca' chesegue'ede' le'. <sup>65</sup> Na' gozna' Jesúsen':

—Chac can' ba gwnian', nono gac še-jnilaže' neda' še bi gaclen Xa' Diosen' le' cont šejnilaže'nda'.

<sup>66</sup> Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. <sup>67</sup> Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle'?

<sup>68</sup> Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen. <sup>69</sup> Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocane.

<sup>70</sup> Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

<sup>71</sup> Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo' na' bene' ca' chesegue'e le', na' Judasen' naque' to bene' šižinw ca'.

**Bene' biše' Jesúsen' bi gosejnilaže' le'**

**7** Gwde na' Jesúsen' gwdacze' bsed blo'ede' ben' že' distritw Galilean'. Bich goclaže' šejche' Judean', le bene' gwnabia' che nación Israel cheton' že' na' cheseyiljue' nacle yesone' yesote'ne'. <sup>2</sup> Na' ba zoa gała' lni che neto' bene' Israel da' nzi' lni che Ranšw Yix. <sup>3</sup> Na' bene' biše' Jesúsen' gose'ene':

—Bitw yega'ano' nga. San gwyej Judean' cont bene' ca' chosozenag chio' yesele'ede' yela' guac dan' chonon'.

<sup>4</sup> Note'teze bene' še chaclaže' yesache'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lo' bene' can' chonon'.

<sup>5</sup> Bene' biše' Jesúsen' gose'ene' ca', le ne' legaque' bi gosejnilaže'ne'. <sup>6</sup> Nach gož Jesúsen' legaque':

—Bina' žin ža ša'a, san le'e guac šja'acle bate'teze. <sup>7</sup> Bene' ca' bi zjanombi'e Diosen' bi gac yesegue'ede' le'e, san chesegue'ede' neda', le chzejni'ida'ne' chesone' da' xinj. <sup>8</sup> Le šja'ac lnin'. Neda' bi sa'a na'a, le bina' žin ža chia'.

<sup>9</sup> Beyož gože' legaque' ca' bega'ane' Galilean' yeto' chop ža.

**Jesúsen' gwyeje'  
Jerusalén gan' yo'o lnin'**

<sup>10</sup> Nach gwde gosa'ac bene' biše' ca' zja'aque' lnin' gwza' Jesúsen' len bene' ca' zjanaque' le' txen zja'aque' lnin', perw bi ja'aque' can' nla'ze san bagaše'ze. <sup>11</sup> Na' bene' gwnabia' che nación Israel cheton'

že' Jerusalénna' besyeyiljue' le' lo l<sub>n</sub>in', chesene':

—¿Gañxe bena'?

<sup>12</sup> Na' bene' ca' zjandop zjanžag lo l<sub>n</sub>in' šižize goso'e diža' che Jesúsen', na' gague toze ca gosene'. Bałe' gosene': "Naque' bene' güen", na' bałe' gosene': "Bi naque', chonlede' bene'."

<sup>13</sup> Na' goso'e diža' šižize che Jesúsen', le yogo'ze bene' chesežebe' bi yesone bene' gwnabia' ca' legaque' še yesacbe'ede' cheso'e diža' güen che Jesúsen'.

<sup>14</sup> Na' do gašje zej l<sub>n</sub>in' cate' gwyej Jesúsen' gan' zoa yodao' blao che neto' bene' Israel na' gwzolao chsed chlo'ede'.

<sup>15</sup> Na' besyebane bene' gwnabia' ca', gosene':

—¿Nacxečen' da' zan neze benga? le gague bi nsenden'.

<sup>16</sup> Na' Jesúsen' gože' legaque':

—Dan' chsed chlo'edan' bi naquen xbab checza', san naquen xbab che bene' gwsela' neda'. <sup>17</sup> Note'tez bene' chesacłaze' yesone' can' chazłaze' Dios ben' gwsela' nedan', guacbe'ede' še dan' chsed chlo'edan' zan' che Dios o še naquen da' chaljłaze'za'. <sup>18</sup> Cate' to bene' chsed chlo'ede' xbab checze', cheyiljue' nacle gone' cont gacxene'. San cate' to bene' chaclaže' gacxen bene' gwsela' le', nezecho xtizen' naquen da' li na' bi chziye'e.

<sup>19</sup> 'Da' Moisésen' bene' le'e ley dan' nsendlen' perw ne tole bi chonle can' žanna'. ¿Bixchen' cheyiljwle nacle gonle gotlenda'?

<sup>20</sup> Bene' ca' že'na' gose'ene':

—Yo'o da' xigüen', nan' chol chmenošo'. ¿No chaclaže' got le'?

<sup>21</sup> Jesúsen' gože' legaque':

—Toz yeła' guac da' bena' ža che Dios cate' bi de lsens gon chio' bene' Israel žin, na' yogo'le chebanele. <sup>22</sup> Da' Moisésen' bene' mandadw soacho señw

dan' že' circuncisión (la'czł'a bi gwzolao señon' len le' san len da' xozxta'ocho ca' bene' gwnita' cani'te), na' da'nana' chzoale bi' byo dao' ca' señwna' ža che Dios. <sup>23</sup> Can' naquen, la'czł'a' še naquen ža che Dios, chzoale no bi' byo dao' señw cate' chaquebe' xono' ža cont chonle can' ža ley dan' nzoj Moisésen', na' ¿bixchen' chža'ale beda' dan' ba beyona' to bene' güe' ža che Diosen'? <sup>24</sup> Bi cheyał'a yosbaga'le bene' che da' chle'ele chone', le bi nezele še chazłaze' Diosen' can' chone', san le nabyane' cont nezele bi ža Diosen', nachen' gacbe'ele non' cheyał'a yosbaga'le.

**Jesúsen' gwne' ze'e gan' zoa Diosen'**

<sup>25</sup> Nach to chope bene' Jerusalén ca' gosene':

—¿Gague benga ben' chesyeyiljue' cont yesote'ne'? <sup>26</sup> Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' checho xbab le naque' Cristo ben' chbezcho yedenabia'? <sup>27</sup> Perw nezecho ga bene' benga, na' cate' yid Criston' nono yeseneze ga bene' le'.

<sup>28</sup> Jesúsen' chsed chlo'ede' chalšil che yodao' blao cate' gosene' ca'. Nach gwne' zižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsela' neda', na' le'e bi nombia'ln'e'. <sup>29</sup> Neda' nombi'ane', le za'a gan' zoen' na' le' gwsela' neda'.

<sup>30</sup> Na' da' gwne' ca' bał bene' gosacłaze'chgüe' yesezene' le', perw nono gwzen le' da' bina' žin ža gague' lo na'gauen'. <sup>31</sup> Na' bene' zan gosejle'e Jesúsen' naque' bene' gwsela' Dios, na' gosene':

—Cate' yid Criston' ¿gonche' yeł'a guac da' zaca'ch ca da' chon benga?

**Bene' chesape' yodao' blaon'  
ja'aque' cont šjasekene' Jesúsen'**

<sup>32</sup> Bene' fariseo ca' gosende' diža' cheso'e bene' ca' che Jesúsen'. Da'nan' bosoxi'e len bene' ca' zjanac b'xoz gwn-  
abia' che nación Israel cheton' na' gosesel'e bene' chesape' yodao' blaon' cont šjasekene' Jesúsen'. <sup>33</sup> Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwseła' neda'. <sup>34</sup> Na' yeyiljwle neda' na' bi yeželele neda', le gan' soan' bi gac yidle.

<sup>35</sup> Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yež-elechone'? ¿Yeyeje' gan' zjanaslas bene' gualaž checho ladjo bene' griego ca' na' gwsed gwlo'ede' legaque'? <sup>36</sup> ¿Bi ze-jen dan' gwnen': “Yeyiljwle neda' na' bi yeželele neda' na' gan' soan' bi gac yidle”?

**Jesúsen' be'e diža' che  
Spiritw che Diosen'**

<sup>37</sup> Ža cate' zelao chesone' lnin' naquen ža xench, na' Jesúsen' zeche' chsed chlo'ede' na' gwne' zižje, gwne':

—Note'tezle še lo' yichjlažda'olen' nacle ca bene' chbilláže', cheyała' šejniláže'le neda' na' goṇa' le'e yela' mban toli tocane, na' lenna' gaquen lo' yichjlažda'olen' ca to nis da' gwbat cheyo'ožen cont bich gacle ca to bene' chbilláže'. <sup>38</sup> Le'e chejniláže'le neda', gac chele can' ža Xtiža' Diosen' da' nyožen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

<sup>39</sup> Na' dan' gwna Jesúsen' ca' be'e diža' che Spiritw che Diosen' da' yedes-oan lo' yichjlaždao' note'tezcho chejni-laže'chone'. Na' caten' gwne' ca' Spiriton' bina' yedesoan lo' yichjlaždao' bene', le bina' gac yogo' da' cheyała' gac

cont gacbia' Jesúsen' naque' bene' zaca' juisyw.

**Gosaque' chople neche Jesúsen'**

<sup>40</sup> Bene' ca' chosozenag xtiža' Jesúsen' bałe' gosene':

—Da' li benga naque' ben' choe' xtiža' Diosen' ben' naquen yide'.

<sup>41</sup> Na' yebałe' gosene':

—Benga Criston' ben' naquen yedenabia'.

Perw yebałe' gosene':

—¿Bixe nacho bene' Galilea ba gwlej Diosen' cont yedenabi'e chio'? <sup>42</sup> Xtiža' Diosen' da' nyožen žan Criston' ben' yedenabi'e choje' lo diaža che da' rey David na' gaque' bene' Belén gan' nac laž da' David.

<sup>43</sup> Can' goc bene' ca' gosaque' chople neche Jesúsen'. <sup>44</sup> Na' bałe' gosaclaže' yesezene'ne', perw nono gwzen le'.

**Bene' gwnabia' che nación  
Israelen' bi gosejle' che Jesúsen'**

<sup>45</sup> Na' bene' chesape' yodao' blaon' jaya'aque' gan' nita' b'xoz gwnabia' ca' len bene' fariseo ca', le bene' can' gosesel'e legaque' cont yesezene' Jesúsen'. Na' bene' ca' gose'e legaque':

—¿Bixchen' bi nche'elne'?

<sup>46</sup> Na' bene' chesape' yodao' blaon' gose'ene':

—Bina' yeneto' bene' cho'e diža' güen ca dan' choe' bena'.

<sup>47</sup> Nach bene' fariseon' gose'e legaque':

—¿Lente le'e ba gwxiye'e? <sup>48</sup> Ne toz neto' nacto' bene' fariseo bina' šejle'to' xtižen' na' neca bene' gwnabia' chechon', ne toze' bina' šejle'e xtižen'. <sup>49</sup> Perw bene' quinga že' nga bi zjanombi'e ley dan' bzoj da' Moisésen' na' ba zjambiaye'e, da'nan' chesejle'e xtižen'.

<sup>50</sup> Na' Nicodemo ben' gwyey lao Ješusen' šeže'le naque' txen len bene' gwnabia' ca'. Na' Nicodemon' gože' legaque':



<sup>51</sup>—Ley chechon' bi choen' latje choglaochō che to bene' ba ben da' mal še bīnā' güe'e diža' naquen' goc na' še bīnā' nezecho bi dan' bene'.

<sup>52</sup>Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtīža' Diosen' da' nyojen na' nezdō' ne to bene' choe' xtīža' Diosen' ca' nā' choje' Galilean'.

<sup>53</sup>Nach besyeya'ac to toe' jaya'ac ližgaque'.

### No'olen' besyedole'de' len xtoe'

**8** Na' Jesúsēn' gwyeje' ya'a da' nzi' Ya'a Olivos. <sup>2</sup>Na' beteyo cate' gwyeni' gwyeje' yodao' blaon' da' yoble na' yogo' bene' ca' že' na' gosebīgue' lagüēn' na' gwchī'e na' gwzōlagüē' chsd chlo'ede' legaue'. <sup>3</sup>Nach bene' chososed chosolo'e ley dan' bzoj da' Moisésēn' na' bene' fariseo ca' jasesane' to no'ole bene' besyedole'de' len xtoe'. Na' bosozechē' le' gachōl bene' ca' chosozēnag che Jesúsēn'. <sup>4</sup>Na' gose'e Jesúsēn':

—Maestrw, no'ole nga ba bedole'to' delene' xtoe'. <sup>5</sup>Na' ley chechon' da' bzoj Moisésēn' žan cheyała' gotcho no'ol ca' cheson ca' gwchēlchone' yej. Na' ¿bi žo' le'? ¿bix cheyała' gonechone'?

<sup>6</sup>Gose'e Jesúsēn' ca' da' gosacīaže' yesebeje' le' diža' da' yosochīne' yesagüē' xya che'. Na' Jesúsēn' con bcheque' bzoje' lo yon' len xbene'. <sup>7</sup>Na' bene' ca' gosone' byen gosenābchde' le' bi že'. Nach Jesúsēn' bebešagüē' na' gože' legaue':

—Guaque con note'tezle bi de xtōla'le solaole gwchellene' yejen'.

<sup>8</sup>Nach bcheque' da' yoble bzojche' lo yon'. <sup>9</sup>Na' bene' ca' zjanche' no'olen' cate' gosende' can' gož Jesúsēn' legaue', zjanēzde' lecze ba zjanoncze' da' xīnj, nach tgüēje tgüēje' besyechoje' gwzōlaotequen' len bene' golech na' bžin-

ten len bene' xcuide'ch, nach bega'an yetoze no'olen' len Jesúsēn' gan' že' bene' ca' chsd chlo'ede'. <sup>10</sup>Nach Jesúsēn' bebešagüē' da' yoble na' ble'ede' noch no bene' ca' zjanla' na' gože' no'olen':

—No'ole, ¿ganxe bene' ca' chosocuiš le'? ¿Ne toe' bi ben le' castigw?

<sup>11</sup>Na' no'olen' gože'ne':

—Ne toe', bene'.

Na' Jesúsēn' gože'ne':

—Ne neda' bi gona' le' castigw. Beyej na' bich gono' da' malen'.

### Jesúsēn' nse'e be'ni' che yichjlaždao' benačh

<sup>12</sup>Jesúsēn' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' benačhen'. Bene' zjanaque' neda' txen bich zjanaque' ca' bene' yichjlaždao' lchōl bene' cheson da' xīnj, san lo' yichjlažda'ogaue' naquen ca to da' yo'o be'ni'. Da'nān' ba de yēla' mban chegaue' toli tocane.

<sup>13</sup>Nach bene' fariseo ca' gose'e Jesúsēn':

—Cho'o diža' che cuino' naco' bene' zaca', na' da'nān' bi naquen to da' yesejle' bene'.

<sup>14</sup>Na' gož Jesúsēn' legaue':

—La'czla' cho'a diža' che cuina', xtīžan' naquen da' li. Neda' nezdā' gan' gwza'a na' gan' yeya'a, perw le'e bi nezele gan' za'a na' gan' yeya'a. <sup>15</sup>Le'e chosbaga'le neda' con can' chon benačhen' xbab, san neda' nono chosbaga' bi da' yosbaga'. <sup>16</sup>Perw na' šaca' bi da' yosbaga' bene', gonan' ca cheyała', le bibi de da' chona' to gualaza', san chona' dan' ža Xan' ben' gwseła' neda'. <sup>17</sup>Ley chechon' dan' chsedlen' žan cheyała' šejle'cho cate' chedił diža' da' chesoe' chope testigw. <sup>18</sup>Na' nac chopto' choe'to' xtīža': neda' cho'a diža' che cuina' na' Xan' ben' gwseła' neda' lecze cho'e diža' chia'.

<sup>19</sup>Na' gose'ene':

—¿Gaxe zoa x̄aon'?

Na' gwna Jesúsen':

—Ne neda' ne X̄an' bi nombia'le. Šaca' nombia'le neda' lecze nombia'le X̄an'.

<sup>20</sup> Diža' ca' b̄sed blo'e Jesúsen' cate' ze' gała'ze gan' chesegü'e mechw lo' yodao' blao che neto' bene' Israel. Na' nono gwzen le', le b̄na' žin ža gaque' lo na' bene' chesegue'ede' le'.

### Jesúsen' gože' legaque' bi gac šjaya'aque' gan' yeyejen'

<sup>21</sup> Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le b̄na' yetinjele x̄toła'len' cate' žin ža gatle.

<sup>22</sup> Na' da' gwne' ca' bene' gwnabia' che nación Israel cheton' gosene':

—¿Yeyot cuinen' že' gan' yeyejen' bi gac šejcho?

<sup>23</sup> Nach Jesúsen' gože' legaque':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'. <sup>24</sup> Da'nan' gwnia' b̄na' yetinjele x̄toła'len' cate' žin ža gatle. Le še bi šejle'le neda' naca' doxen can' gwnian', gatle b̄na' yetinjele x̄toła'len'.

<sup>25</sup> Nach gose'e Jesúsen':

—¿Nox naco' le'?

Na' gož Jesúsen' legaque':

—Zan n̄i'a ba gwnia' le'e non' naca'.

<sup>26</sup> Ne' dech da' zan da' n̄ia' cont gwzejni'ida' le'e nable doła'. Perw bene' gwseła' neda' nezde' yogo'loł na' cho'e diža' li, na' neda' choelena' benachen' diža' da' ba benda' gwne'.

<sup>27</sup> Bene' gwnabia' ca' bi gosejni'ide' choelene' legaque' diža' che X̄e' Diosen'.

<sup>28</sup> Nach Jesúsen' gože' legaque':

—Cate' ba gwde gwłisle neda' to le'e yag, neda' naca' bene' gwseła' Diosen' golja' benach, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni'i X̄an' neda', lenna' žia'. <sup>29</sup> X̄an' ben'

gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

<sup>30</sup> Na' šlac Jesúsen' choelene' bene' ca' dižan' nach bene' zan gosezolao chesejni-laže' le'.

### Bene' ca' chnabia' da' malen' yichjlažda'ogaquen'

<sup>31</sup> Nach Jesúsen' gože' bene' gualaž cheto' ca' bach gosezolagüe' chesejnilaže'ne':

—Še soacze gonle can' ba gwnian', gwlo'en da' li nacle txen len neda'. <sup>32</sup> Na' še soacze gonle can' ba gwnian', nachen' šejni'ile diža' li chian' na' gaclenen le'e cont yechojle lo na' da' chnabia' le'e.

<sup>33</sup> Bał bene' ca' gose'e Jesúsen':

—Neto' nacto' diaža che da' Abrahanna' na' nono na' soa bene' nabia' neto'. ¿Bixchen' žo' yechojto' lo na' da' chnabia' neto'?

<sup>34</sup> Na' gož Jesúsen' legaque':

—Chnia' le'e to da' zejen, yogo' bene' cheson da' xinj zjanaque' lo na' da' mal da' chnabian' legaque'. <sup>35</sup> Bene' zoa liž x̄an xšine' bi naque' xi'in ben' gan' chone' žinna', san šlož güejze zoe' txen len legaque' len bi da' chesone'. San bene' golje' txen len le', bate'teze zoe' len legaque'. <sup>36</sup> Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xanle. <sup>37</sup> Nezda' nacle diaža che da' Abrahanna', perw bia'cze cheyljwlaže'le nac gonle cont gotle neda'. Na' chonle ca' da' bi chzenagle xtižan'. <sup>38</sup> Neda' cho'a diža' che da' ca' ba ble'eda' cate' zoa' cuit X̄an', na' le'e lecze chonle da' ba benele gwna xalen'.

<sup>39</sup> Nach bene' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna'

šaca'. <sup>40</sup> L̄a'czl̄a' ba bzejni'ida' le'e diža' li da' benda' gwna Diosen', bia'cze chey-iljwlaže'le nac gonle gotle neda'. Da' Abrahanna' bi bene' can' chonlen'. <sup>41</sup> Toz can' chonle len xalen'.

Nach bene' ca' gose'e le':

—Toz Diosen' naque' X̄ato' na' bi chzenagto' che nochle bene'.

<sup>42</sup> Jesúsēn' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. <sup>43</sup> ¿Bixchen' bi chejni'ile dan' chnia' le'e? Nežda' bi chejni'ile dan' bi chaclaže'le gwzenagle chia'. <sup>44</sup> Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. <sup>45</sup> Na' neda', da' cho'a diža' li, bi chejle'le chia'. <sup>46</sup> Bibi da' mal nona' na' da'nān' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? <sup>47</sup> Bene' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

### Ba zoacze Criston' cate' golje da' Abraham

<sup>48</sup> Nach bene' gwnabia' che nación Is-rael cheton' gose'e Jesúsēn':

—Can' ba gwnacztō' nacbia'cze naco' txen len bene' Samaria ca' na' yo'o to da' xigüe' lo' yichjlažda'oguoñ' chonen ga choļ chñenošo'.

<sup>49</sup> Jesúsēn' gože' legaque':

—Bi yo'o da' xigüēn' lo' yichjlažda'ogua', san chonxena' X̄an' na' le'e chñele chia'. <sup>50</sup> Bi chyljua' no gonxen neda', perw zoa X̄an' chaclaže'

benachen' yesonxene' neda' na' X̄an' choglagüēn' chele naple doļa' da' chñele chia'. <sup>51</sup> Chnia' le'e to da' zejen, note'teze bene' yosozenague' xtižan', guata'cze yela' mban che' toļi tocañe.

<sup>52</sup> Nach da' yoble bene' gwnabia' ca' gose'e le':

—Nach beyož gwñezeto' yo'o to da' xigüe' lo' yichjlažda'oguoñ' chonen ga choļ chñenošo'. Ba got da' xozxta'ocho Abrahanna', na' len bene' ca' goso'e xtiža' Diosen' cani' lecze ba gosate', na' chñenošo' žo' bene' chosozenag xtižon' gata' yela' mban che' toļi tocañe. <sup>53</sup> ¿Chacdo' zaca'cho' ca da' xozxta'ocho Abrahanna' len bene' ca' gosoe' xtiža' Dios bene' ba gosat' ¿Noxen' chacdo' naco'?

<sup>54</sup> Gož Jesúsēn' legaque':

—Šaca' chonxen cuina' bibi zejen, perw X̄an' ben' žale naque' Dios ben' chejnilaže'le chonxene' neda'. <sup>55</sup> Le'e bi nombia'lnē', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'. <sup>56</sup> Da' Abrahanna' ben' žale nac xozxta'ole bebecgüēde' gwñezde' le'ede' ba za'a len benachen' na' zoe' mbalaz ba ble'eden'.

<sup>57</sup> Na' gose' bene' blao che nación Is-rael cheton' le':

—Bina' gacdo' šiyon iz. Chñenošo' žo' ba ble'edo' Abrahanna'.

<sup>58</sup> Jesúsēn' gože' legaque':

—Chnia' le'e to da' zejen, ba zoacza' neda' cate' bina' galje Abrahanna'.

<sup>59</sup> Nach gosenize' yej da' yosochele' le', perw Jesúsēn' bcuaše' na' beze'e yodaon'. Neca gosacbe'ede' cate' bedie' ladjogaque'.

### Jesúsēn' bene' cont ble'e to bene' golje' nchole'

**9** Txen zej Jesúsēn' len bene' ca' zjanaque' le' txen cate' besele'ede'

to bene' byo golje' nchole'. <sup>2</sup>Na' gose'e Jesús'en:

—Maestrw, ¿non' nap doła' golje benga nchole', še le' o še xaxne'en?

<sup>3</sup>Na' Jesús'en gože' legaque':

—Benga golje' nchole' gague da' nape' doła' na' gague da' zjanap xaxne'en doła', san golje' ca' cont le'ele can' chon Diosen'. <sup>4</sup>Cheyalá' goncho xšin Dios ben' gwselá' neda' šlac ne' de latje. Gwžin ža bich galá' gonchon. <sup>5</sup>Šlac ne' zoa' yežlion' chgua'a be'ni' lo' yichjlaždao' benachen'.

<sup>6</sup>Beyož gwne' ca' gwcho'on xene' lo yon' na' bene' late' gona' len xene' na' gwdebe' gonan' yejlao bene' lchole'n.

<sup>7</sup>Nach gože' ben':

—Gwyej jaydib yejlaguon' cho'a yel da' nzi' Yel Siloé.

(Na' Siloé zeje diža' Nselá'.) Na' gwyeye' na' beyib yejlagüen' na' cate' beze'e zjayde' ba chle'ede'. <sup>8</sup>Na' bene' gualiž che' na' nochle bene' ba besele'e le' yogo' ža cate' ne' nchole'n gosene':

—¿Gague bengan' ba ble'echo chbe' chnabe' carida?

<sup>9</sup>Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

<sup>10</sup>Na' gose'ene':

—¿Nac goquen' gwzolao chle'edo'?

<sup>11</sup>Na' gože' legaque':

—To bene' le Jesús bene' late' gona' na' gwdeben' yejlaguan' na' gože'nda': "Gwyej cho'a yel da' nzi' Yel Siloé na' jaydiben'." Na' gwya'a na' beyiban' na' gwzolao chle'eda'.

<sup>12</sup>Nach gose' bene' ca' le':

—¿Gaxxe bena'?

Na' gože' legaque':

—Bi nezda'.

### Bene' fariseo ca' gosenabyože' nac goquen' ba chle'ede'

<sup>13</sup>Nach goseche'e ben' goc lchole'n gan' že' bene' fariseo ca'. <sup>14</sup>Nac to ža che Dios caten' Jesús'en bene' gonan' dan' gwdebe' yejlao bena' cont ble'ede' na' bi de lsens gon neto' bene' Israel žin ža che Diosen'. <sup>15</sup>Na' bene' fariseo ca' lecze gosenabde' le' nac goquen' ba chle'ede'. Na' gože' legaque':

—Gwdebe' gona' yejlaguan' na' jaydiban' na' na'a ba chle'eda'.

<sup>16</sup>Nach bal bene' fariseo ca' gosene':

—Nezecho bi zoa Diosen' len bena' beyone' bene' lchole'n, le chone' da' bi cheyalá' gone' ža che Diosen'.

Na' yebale' gosene':

—¿Nac gon to bene' güen da' xinj gone' yela' guac ca dan' ben benga?

Na' legacze' besechoje' chop cuen.

<sup>17</sup>Na' da' yoble gose'e ben' golje' nchole':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiza' Dios.

<sup>18</sup>Na' bene' gwnabia' che nación Israel cheton' bi gosejle'e golje ben' nchole' na' na'a bach chle'ede'. Nach gosaxe' xaxne'ena'. <sup>19</sup>Na' gosenabde' legaque', gose'ene':

—¿Xi'inle benga ben' žale golje' nchole'? ¿Nacxe goquen' chle'ede' na'a?

<sup>20</sup>Xaxne'ena' gose'e legaque':

—Nezeto' bengan' xi'into', na' nezeto' golje' nchole'. <sup>21</sup>Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejeczede' iz, le nabe cuine' cont güe'e diža' naquen' goc.

<sup>22</sup>Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosechoglagüen' bi yosolebe' lo' yodaon' note'teze bene' güe'e diža' chejle'e Jesús'en naque' Cristo ben' chesebeze'

yedenabi'e. <sup>23</sup> Da'nan' xaxne'en gosene':  
 "Ba zejeczede', le nabe cuine'."

<sup>24</sup> Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen can' gwnao' bache. Nezetō' ben' gwnao' beyon le' naque' bene' güen da' xinj.

<sup>25</sup> Na' ben' beyac vejlagüen' gwne':

—Bi nezdā' še naque' bene' güen da' xinj o še bi naque'. Da' nezdā', goca' bene' lchol na' na'a ba chle'eda'.

<sup>26</sup> Na' da' yoble gose'e le':

—¿Bi bende' le? ¿Nac benen' chle'edo'?

<sup>27</sup> Na' gože' legaue':

—Ba gwnicza' le'e na' bi chzenagle. ¿Bixchen' chaclaže'le yenian' da' yoble? ¿Len le'e chaclaže'le gwzenagle che'?

<sup>28</sup> Nach gosezi'diže' le', gosene':

—Le' naco' txen len le', san neto' nacto' txen len da' Moisés. <sup>29</sup> Nezetō' Diosen' be'lene' Moisésen' diža', perw benga bi nezeto' ga ze'e.

<sup>30</sup> Na' ben' golje' nchole' gože' legaue':

—iDa' zaca' yebanecho, bi nezele ga za' benga, na' bene' cont chle'eda'!

<sup>31</sup> Nezecho Diosen' bi chzenague' che bene' cheson da' xinj, san chzenague' che note'tez bene' chejnilaže' le', bene' cheson can' chnalāžen'. <sup>32</sup> Na' gwzolaoten cate' gwxe yežlion' bina' yenecho zoa bene' chac chone' cont chle'e bene' golje' nchole'. <sup>33</sup> Šaca' bengan' bi ze'e gan' zoa Diosen' bibi gac gone'.

<sup>34</sup> Bene' fariseo ca' beselocchgüe' na' gose'e le':

—Len' goltio' naco' bene' mal juisyw, ¿chacdo' zaco' gwseddo' neto'?

Na' besybeje' le' lo' yodaon'.

### **Bene' ca' zjanchol' yichjlažda'ogaue'**

<sup>35</sup> Jesúsen' bende' diža' che ben' beyac vejlagüen' can' goc che' ba besybeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwsejen'?

<sup>36</sup> Na' gož ben' le':

—Bene', gwna neda' non', cont šejnilaža'ne'.

<sup>37</sup> Jesúsen' gože'ne':

—Nedan' ben' ba ble'eczedo' na' nedan' choe'lena' le' diža'.

<sup>38</sup> Nach bena' bzoa xibe' benxene' Jesúsen', gwne':

—Xana', chejnilaža' le'.

<sup>39</sup> Nach Jesúsen' gwne':

—Za'a yežlio nga cont gata'bia' non' nap doła' na' non' bi nap doła'. Zedeyena' cont bene' ca' bi chesejni'i bich yesaque' ca' chesacde' chesejni'ide' yesaque' ca' bene' lchol len yichjlažda'ogaquen'.

<sup>40</sup> Nach bał bene' fariseo ca' nita' gała'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca' bene' lchol'?

<sup>41</sup> Nach Jesúsen' gože' legaue':

—Šaca' nacle ca' bene' lchol, bibi xtoła'le de, san žale chejni'ile, na' da'nan' naple doła'.

### **Jempl che bene' güeye' xila' ca'**

**10** Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban.

<sup>2</sup> Ben' chsaljue' na' cho'e cho'a puerten', len' güeyoe' xilan'. <sup>3</sup> Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le' zjanombia'ba' ši'en cate' chaxe'ba' cho'e lagacba' cont chbeje'ba'. <sup>4</sup> Na' cate' ba gwleje' yogo'ba' lo' le'ejen', chbialogüe' laogacban', na' xila' che' ca' chesa'oba' le' da' zjanombia'ba' ši'en. <sup>5</sup> Bi chesa'oba' bene' yoble, san chosyoxonjba' dan' bi zjanombia'ba' ši'en.

<sup>6</sup> Jesúsen' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

**Jesúsen' zaca'lebde' ca to  
bene' chyoe' xila' chen' binlo**

<sup>7</sup>Nach Jesúsen' bsd blo'echde' le-  
gaque' yeto, gwne':

—Chnia' le'e to da' zejen, neda'n naca'  
ca cho'a puert gan' cheso'o xila' ca' lo'  
le'ej chegacban'. <sup>8</sup>Yogo' nochle bene'  
ba goside' cate' za' yida' neda', bene'  
bosozejni'ide' diža' güenlaže', guac na-  
cho zjanaque' bene' gwban. Perw bene'  
chesejnilaže' neda' bi chosozenague'  
xtiža' bene' ca'. <sup>9</sup>Neda' naca' ca cho'a  
puert che le'ej che xila' ca'. Na' note'tez  
bene' yesejnilaže' neda', gata' yela' mban  
chegaque' toli tocane na' soacza' gaclena'  
legaque' bite'tez da' cheseyažjde'.

<sup>10</sup>'Bene' ca' žia' bene' gwban  
chesaclaže' yesone' cont bene' ca' žia'  
zjanaque' xila' chia' yesebejychje'  
xtižan' na' yosozenague' che legaque'.  
Na' še yosozenague' che legaque',  
yesebiaye'e. Na' neda' za'a chnežjua'  
yela' mban toli tocane che bene'  
chesejnilaže' neda' cont nite' güenchgua.

<sup>11</sup>Neda' binlo chgiia chna'a bene'  
chesejnilaže'nda' ca chon to bene' güeye'  
xila' bene' chyoe' xila' chen' binlo. Na'  
da' nži'ida' legaque', da'nan' chzane  
cuina' gata' neche legaque'. <sup>12</sup>Nita'  
bene' chesezi' laxjue' cont chosoyoe'  
xila' che bene'. Na' bene' chesezi' laxjue'  
chesebejychje' xila' ca' cate' chesele'ede'  
za' beco'yo, le xila' ca' bi zjanacba' be  
chegaque'. Cheso'e latje chniz beco'yon'  
xila' ca' na' chesošlasba' legacba'.  
<sup>13</sup>Na' bene' bi zjanaque' xan xila' ca'  
chosoxnje' da' bi zjanži'ide' xilan',  
le bi zjanac xilan' be chegaque', san  
chosoyoeba' dan' chesezi' laxjuen'.

<sup>14</sup>'Neda' binlo chgiia chna'a bene' ca'  
chesejnilaže'nda', chona' ca chon to bene'  
chyoe' xila' chen' binlo. Na' nombi'a  
bene' ca' chesejnilaže' neda' na' legaque'  
zjanombi'e neda'. <sup>15</sup>Nombi'a legaque' ca  
Xan' nombi'e neda' na' neda' nombi'a

Xan'. Na' da' nži'ida' legaque' chzane  
cuina' gata' neche legaque'. <sup>16</sup>Nita' bene'  
yoble bene' bi zjanaque' bene' Israel  
bene' yesejnilaže' neda'. Na' cheyala' šja-  
toba' legaque' cont yosozenague' chia',  
nach yesaque' toze len yezica'chle bene'  
ba chesejnilaže' neda' na' toz neda'  
gwgüia na'a yogo'lole'.

<sup>17</sup>'Chzane' cuina' yesot bene' neda', na'  
techle yebana' da' yoble. Na' Xan' chac-  
chde' neda' le chazlaže' da' chona' ca'.  
<sup>18</sup>Nono checa'a yela' mban chian' san  
chzanlaže' cuina' gata'. Guac zane cuina'  
yesote'nda' na' lecz guac yeyas yebana'  
ladjo bene' guaten', can' non Xan' man-  
dadw gona'.

<sup>19</sup>Na' da' yoble bene' nación Israel  
cheton' besechoje' chople neche xtiža'  
Jesúsen'. <sup>20</sup>Zane' gosene':

—Yo'o da' xigüen' yichjlažda'ogüe',  
nan' choł chmenoše'. ¿Bixchen' chzenagle  
xtižen'?

<sup>21</sup>Na' yeba'le gosene':

—Bene' yo'o da' xigüen'  
yichjlažda'ogüen' bi gac gwšalje' ca'.  
¿Guac gon da' xigüe' cont le'e bene'  
lchol'?

**Bene' gwnabia' che nación  
Israel besegue'ede' Jesúsen'**

<sup>22</sup>Na' cate' bžin ža gwyo'o lni dan'  
chesone' chjasyeze'ede' žan' beyož  
besyeyone' yodao' blao che Diosen',  
ba bžin tiemp zag Jerusalénna'. <sup>23</sup>Na'  
Jesúsen' chde' chašil che yodao' blaon'  
gan' nzi' Chašil che Salomón. <sup>24</sup>Na'  
bene' gwnabia' che nación Israel cheton'  
gosechje' Jesúsen' na' gose'ene':

—¿Bixchen' chono' cont chacžejlaže'to'  
še naco' Cristo ben' chbezto' se'la' Diosen'  
cont yedenabi'e nación chechon'? Še len'  
Criston', gwnatega neto' zaca'lao.

<sup>25</sup>Na' gož Jesúsen' legaque':

—Ba gwnia' le'e na' bi chejle'le. Da'  
ca' ba bena' len yela' guac che Xan'  
chlo'en naca' bene' gwsele'. <sup>26</sup>Perw bi

chejle'le chia' da' bi nacle txen len bene' chesejnilaže' neda', can' ba gwnicza' le'e. <sup>27</sup> Nombi'a bene' chesejnilaže' neda', na' žia' legaque' xila' chia'. Legaque' chosozenague' chia' na' chesone' con can' chzejni'ida'ne'. <sup>28</sup> Na' chnežjua' legaque' yela' mban toli tocañe na' gwbat yesebi-aye'e na' nono gac yesyeca'a legaque' lo na'. <sup>29</sup> Xan' ba gwleje' bene' ca' chesejnilaže' neda' cont chgüia' chña'a legaque'. Na' nono gac yesyeca'a legaque' lo na' Xan', le nape' la'zelagüe yela' chnabia' xen. <sup>30</sup> Neda' na' Xan' toz bene' nacto'.

<sup>31</sup> Beyož gwne' ca' bene' gwnabia' ca' gosenize' yej cont yosochehlenen'. <sup>32</sup> Na' gož Jesúsen' legaque':

—Da' zan da' güen ba ble'ele bena' len yela' guac che Xan'. ¿Che nonña' chacleže'le gwchelle neda' yej?

<sup>33</sup> Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chneya'o che Diosen'. Con benachze le' na' chon cuino' ca Dios.

<sup>34</sup> Na' gož Jesúsen' legaque':

—Nezeczzele can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.” <sup>35</sup> Na' Xtiža' Diosen' da' nyojen gague da' te chen', na' lenña' žan Diosen' gwne' che bene' ca' bosozenag xtižen' cani' gosaque' ca le'. <sup>36</sup> Diosen' gwleje' neda' cont gaclena' benachen' že' yežlio nga na' čnacxechen' ža le'e chneya'a che Diosen' da' žia' naca' Xi'ine'? <sup>37</sup> Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'. <sup>38</sup> Perw še chacbe'ele chona' da' zaca' len yela' guac che Diosen', cheyala' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

<sup>39</sup> Nach da' yoble gosaclaže' yesezene' Jesúsen' perw bitw bdole'.

<sup>40</sup> Jesúsen' beyeje' jayzoe' yešla'a yegw Jordanna' latje gan' gwzoe da' Juanna' šlac ne' chzoe' bene' nis. <sup>41</sup> Na' bene' zan ja'ac gan' gwzoe' cont bosozenague' xtižen' na' gosenen':

—Da' Juanna' ne to yela' guac bi bene', perw yogo'lo' dan' gwne' che benganaquen da' li.

<sup>42</sup> Na' bene' zan gosejnilaže' Jesúsen' latje na'.

### Can' goc cate' got Lázaro

**11** <sup>1-2</sup> Na' gwzoe to bene' gocšene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'. <sup>3</sup> Na' bene' zan Lázaron' gesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

<sup>4</sup> Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

<sup>5</sup> La'czla' Jesúsen' chacde' Martan' len bene' bilen' na' len Lázaron', <sup>6</sup> cate' gwneзде' chacšene Lázaron', bega'anche' yechope ža gan' zoen'. <sup>7</sup> Nach gože' bene' ca' zjanaque' le' txen:

—Le šo'o šejcho distritw Judean' da' yoble.

<sup>8</sup> Na' gose'ene':

—Maestrw, bi ža na'zen' bene' gwnabia' che nación chechon' gosaclaže' yesote' le' yosochele' le' yej. ¿Da' yoble šejo' na'?

<sup>9</sup> Jesúsen' gože' legaque':

—Lagüe žan' nsa' šižinw hor, na' bene' chda lagüe ža bi chchegüe', le nseni' gw-

bižen' lo yežlion'. <sup>10</sup> Na' bene' chda ba goł chcheğüe', le nac choł.

<sup>11</sup> Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

<sup>12</sup> Na' gose'ene':

—Xanto', še ba chtase' güeyacczede'.

<sup>13</sup> Jesúsen' gwne' ca' dan' gwneзде' ba got Lázaron', na' bene' ca' zjanaque' Jesúsen' txen gosacde' še chtaszen'.

<sup>14</sup> Nach Jesúsen' bochixgaten' bi zejenna' gwne' ca':

—Ba got Lázaron'. <sup>15</sup> Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

<sup>16</sup> Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

### Jesúsen' že' chac chosbane' bene' guat

<sup>17</sup> Na' ja'aque' Betanian' len Jesúsen', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. <sup>18</sup> Betanian' chin' gała'ze Jerusalenna' ca do gašjw hor. <sup>19</sup> Na' bene' zan bene' gualaž chegaque' že' Jerusalenna' besežine' gan' zoa Martan' len Marían' cont yeso'e legaque' yela' chxenlaže' da' got bene' zangaquen'.

<sup>20</sup> Nach Martan', cate' gwneзде' Jesúsen' ba bžine' cho'a yežen', na' gwze'e jašague'ne'. Na' Marían' bega'ane' yo'ona'. <sup>21</sup> Nach Martan' gože' Jesúsen':

—Xana', šaca' zo' nga caten' gocšene bene' zanan' bilja gote' šaca'. <sup>22</sup> Na' nezda' la'czla' ba gote', bite'tez da' nabdo' Diosen' gone', gonczen'.

<sup>23</sup> Nach gož Jesúsen' le':

—Güeban bene' zanon'.

<sup>24</sup> Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

<sup>25</sup> Na' gož Jesúsen' le':

—Neda' chac chosbana' bene' guat ca' le' nsa'a yela' mban toli' tocane. Da'nan' bene' ca' yesejnilaže' neda', la'czla' yesate', guata' yela' mban chegaque' toli' tocane. <sup>26</sup> Na' note'tez bene' nite' chesejnilaže' neda', gwbat yesebi-aye'e. ¿Chejli'o da' nga chnia' le'?

<sup>27</sup> Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

### Jesúsen' gwcheže' gan' bosocuaše' Lázaron'

<sup>28</sup> Beyož gwna Martan' ca' beyeje' jayeže' María bilen' šizize:

—Ba bla' Maestron' cho'a yežen' na' chnie' le'.

<sup>29</sup> Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'. <sup>30</sup> Biņa' žin Jesúsen' lagüe yežen' ca horen', ne' nga'ane' cho'a yežen' gan' jašag Martan' le'. <sup>31</sup> Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanen', cate' besele'ede' gwza' Marían' nach gosa'aclene' le', gosacde' zeje' cho'a blojen' gan' ngaše' zjačeže'.

<sup>32</sup> Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan', bilja gote' šaca'.

<sup>33</sup> Na' cate' ble'e Jesúsen' chbež Marían' na' lecze chesebež bene' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'. <sup>34</sup> Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

<sup>35</sup> Na' gwchež Jesúsen'. <sup>36</sup> Na' bene' Jerusalén ca' gosene':

—Le na' catequen' chacde' le'.

<sup>37</sup> Na' bałe' gosene':



—Bengan' bene' ga ble'e bene' lchoľen', na' šaca' gwzoe' nga caten' gocšene Lázaron', benľje' cont bi gote'.

**Jesúsen' bosbane' Lázaron'  
ladjo bene' guaten'**

<sup>38</sup> Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'enna'. <sup>39</sup> Na' Jesúsen' gože' bene' ca':

—Le ca'a yejen'.

Na' Martan' bene' zan da' Lázaron' gože'ne':

—Xana', ba chľa' ben' zigw, le bach goc tap ža gote'.

<sup>40</sup> Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' bene' zaca' juisyw.

<sup>41</sup> Nach bene' ca' goseque'e yejen'. Na' Jesúsen' gwne'e yabale na' gwne':

—Xa', choxcleno' ba bzenago' chia'.

<sup>42</sup> Nežda' yogo' ni'a chzenago' chia', perw žia' ca' cont bene' ca' že' nga yesejle'e len' gwseľo' neda'.

<sup>43</sup> Beyož boľ güiže' Diosen', gwne' zižje, gwne':

—Lázaro, bechoj.

<sup>44</sup> Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

**Bosoxi'e yesezene' Jesúsen'**

(Mt. 26:1-5; Mr. 14:1-2; Lc. 22:1-2)

<sup>45</sup> Na' zan bene' Jerusalén ca' bene' ja'aclene' Marian' besele'ede' yela' guac da' ben Jesúsen' na' gosejnilaže'ne'.

<sup>46</sup> Perw baľ bene' Jerusalén ca' ja'aque' lao bene' fariseo ca' na' jaseže' legaque' Jesúsen' bosbane' Lázaron'. <sup>47</sup> Nach bxož gwnabia' ca' che neto' bene' Israel len bene' fariseo ca' bosyotobe' yogo'loľ

bene' ca' chesenabia' nación četon'. Na' bosoxi'e gosene':

—¿Nac goncho? le yela' guac zan chon benga. <sup>48</sup> Na' še nacho jayenna', yogo'ze bene' yesejnilaže'ne', na' yesid bene' nación Roma na' yeseque'e yoda' blao čechon' na' yosožiaye'e nación čechon'.

<sup>49</sup> Na' to bene' gwnabia' zoa ca horen' le' Caifás. Le' naque' bxož blao lo izen'. Na' gože' legaque':

—Le'e gague bi nezele. <sup>50</sup> Na' bi chacbe'ele napan chio' cuent toz ben' gat, clel ca cuiayi' yogo'cho lente nación čecho nga.

<sup>51</sup> Gague con ca gwnalaže'ze Caifásen' gwne' ca', san da' naque' bxož blao iznan', Diosen' bene' ga gwne' ca' cont gwdixjue'ede' gat Jesúsen' neche nación četon'. <sup>52</sup> Na' ca nac dan' gaten', gague gate' neche nación četo' na'zen' san gate' cont yogo' bene' ba gwlej Diosen' yesaque' xi'ine' gate'teze nación, yesaque' txen yesejnilaže'ne'. <sup>53</sup> Ca' goquen', žana' bene' gwnabia' ca' gosezolagüe' bosoxi'e nacle yesone' yesote' Jesúsen'.

<sup>54</sup> Na' da'nan' Jesúsen' bich gwdacze' con can' nľa'ze gan' že' bene' gwnabia' che nación četon'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi gaľa'ze latje dašen', na' besyega'ane' na'.

<sup>55</sup> Na' ba zoa gaľa' ľni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gaľa'le ľnin' cont yeson cuine' xilaže' can' ža ley četon'. <sup>56</sup> Na' besyeyiljue' Jesúsen' do gan' zoa yoda' blaon' na' cate' bi besyeželde'ne' na' gose' lježe':

—¿Bi chaquele? ¿Güide' ľni nga, še bi yide'?

<sup>57</sup> Gosene' ca' le bxož gwnabia' četo' ca' na' bene' fariseo ca' ba gosečoguen' še note'tez bene' nežde' gan' zoa

Jesúsen' cheyała' gwzende' legaque' cont yesezene' le'.

**Marían' chgüe'e set zix ñi'a Jesúsen'**

(Mt. 26:6-13; Mr. 14:3-9)

**12** Na' yexop ža za' gala' lni pascon', Jesúsen' gwche'e bene' ca' zjanaque' le' txen yež Betanian' gan' zoa Lázaron' ben' bosbane' ladjo bene' guaten'. <sup>2</sup>Na' bal bene' Betanian' bososini'e to xše' da' gwdagw Jesúsen' cont gosonxene'ne'. Na' Martan' bdie' yela' guagw na' Lázaron' gwche'lene' bene' ca' cho'a mesen' txen len Jesúsen'. <sup>3</sup>Na' Marían', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigüe' gala'ze xni'a Jesúsen' na' gwlo'e set zixen' ni'ena' na' beyoža' bosbižen' len yiša' yichje'. Na' doxen yo'ona' gwla'chgwan ze set zixen'. <sup>4</sup>Na' Judas Iscariote xi'in to bene' le' Simón, le' naque' to bene' šižinw ca' zjanaque' Jesúsen' txen, na' len' ba naquen gwdie' Jesúsen' lo na' bene' ca' chesegue'ede' le'. Na' Judasen' gwne:

<sup>5</sup>—¿Bixchen' bi bete' seten' na' gone' mechon' cont gaclenen bene' yaše'? le' zacan' ca no laxjw mos da' gone' gan tgiiz.

<sup>6</sup>Judasen' gwne' ca' gague da' beyaše'de' bene' yašen' san da' goque' bene' gwban. Len' bešue' mechw da' bosochin yogüe' na' gwlejlane' mechon'. <sup>7</sup>Nach Jesúsen' gože'ne':

—Bibi ye'lné', le' ba bene' da' non gone' len neda' che ža cate' gaša'. <sup>8</sup>Bene' yaše' ca' nita'cze' len le'e bate'teze, san neda' bich soacza' yesša len le'e.

**Bxoz gwnabia' ca' bosoxi'e  
yesote' Lázaron'**

<sup>9</sup>Na' bene' zan bene' Israel gualaž cheton' gosenezde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron'

ben' bosbane' ladjo bene' guaten'. <sup>10</sup>Na' bxoz gwnabia' che nación Israel cheton' bosoxi'e lecze yesote' Lázaron', <sup>11</sup>le' bene' zan bene' Israel ba chesyecuase' len legaque' na' ba chesejnlaže' Jesúsen' dan' gosenezde' bosbane' Lázaron'.

**Jesúsen' beyo'e ciuda  
Jerusalénna' da' yoble**

(Mt. 21:1-11; Mr. 11:1-11; Lc. 19:28-40)

<sup>12</sup>Na' beteyo Jesúsen' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gala' lnin', na' zane' cate' gosenezde' žin Jesúsen' Jerusalénna', <sup>13</sup>besežaše' jaseleze' le' zjanoxe' no zin. Na' chesegüe'e lban' che', chesene':

—¡Leca bene' zaca' benga! Mbalaz ben' za' nga nšela' Xancho Diosen' le' cont nabi'e. ¡Mbalaz bene' naque' Rey che nación Israel chechon'!

<sup>14</sup>Na' bžel to burr dao' be gwžia Jesúsen', na' goc can' nyoj Xtiža' Diosen' žan:

<sup>15</sup>Le'e chonxenle Diosen' ciuda Jerusalénna', bi žeble;

le' na', ba za' Rey chelen' žie' to burr dao'.

<sup>16</sup>Na' bene' ca' zjanaque' Jesúsen' txen gague cate' gosejni'ide' chac con can' bosozoj ben' goso'e xtiža' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le' Jesúsen' naque' bene' zaca' juisyw, cana'ch jasyeza'laže' diža' ca' da' zjanyoj che Jesúsen' na' gosejni'iden'.

<sup>17</sup>Bene' ca' besele'e cate' Jesúsen' bol giüiže' Lázaron' na' bosbane' le' cont bechoje' lo' ban' gosoe'lene' bene' ca' že' lo' ciudan' diža' can' goquen'. <sup>18</sup>Na' da'nán' bene' zan jaseleze' Jesúsen' da' ba gosende' diža' che yela' guac dan' bene' bosbane' Lázaron'. <sup>19</sup>Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

**To chope bene' griego gosenabe'  
yesoe'lene' Jesús'en' diža'**

<sup>20</sup> Na' zjalen to chope bene' griego bene' ca' ja'aque' gosonxene' Diosen' lo Inin'. <sup>21</sup> Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesús'en' diža'.

<sup>22</sup> Na' Felipen' gwyeje' jane'e Andrés'en' nach choptie' jaseže' Jesús'en' ca'. <sup>23</sup> Nach Jesús'en' gože' legaque':

—Na'a ba bžin hor gac yogo'lol da' cheyała' gac cont la'lagüe naca' bene' zaca' juisyw. <sup>24</sup> Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' gonen.

<sup>25</sup> Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocanē.

<sup>26</sup> Na' note'tez bene' chesaclaže' yesone' xšinan', cheyała' yesejnilaže' neda' na' yosozenague' chia'. Na' gan' soa' neda' ľecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

**Jesús'en' gwdixjue'ede' yesot bene' ľe'**

<sup>27</sup> 'Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo da' ca' ba zoa gac chia' na'a? Bitw gona' ca', ľe za'a cont gac chia' yogo' da' ca'.

<sup>28</sup> Nach boľ güiž'e' Diosen', gwne':

—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len ľe' cont chesacbe'e bene' naca' bene' zaca' juisyw na' za' goncha' ca' yeto.

<sup>29</sup> Na' zan bene' ca' že' na' gosende' dan' gwna Diosen' na' gosene' gwzion' gwne'. Na' yebaľe' gosene':

—To angl gwne' ľe'.

<sup>30</sup> Na' Jesús'en' gwne':

—Diosen' gwne' neda' zižje gague cont nezda' neda' chzenague' chia' san cont neze ľe'e. <sup>31</sup> Ba bžin ža Diosen' chogbi'en' che bene' ca' bi chesejľe'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen. <sup>32</sup> Na' cate' yeselise' neda' to ľe'e yag, cana'ch gona' cont zan bene' že' doxen lo yežlion' yesejnilaže' neda'.

<sup>33</sup> Gwne' ca' cont gosenezde' yesot bene' ľe' yosode'ene' to ľe'e yag cruz. <sup>34</sup> Na' bene' ca' že'na' clele gosejni'ide' dan' gwnen' na' gose'e ľe':

—Ba beneto' can' ža Xtiža' Diosen' da' nyojen, na' nezeto' žan Cristo ben' sela' Diosen' yedenabi'e nación chechon' soe' toli tocanē. Na' ľe' ¿bixchen' žo' naco' bene' gwseľa' Dios goljo' benač na' žo' yesote' ľe' to ľe'e yag cruz še ca'? ¿Nox naco' šaca'?

<sup>35</sup> Nach Jesús'en' gože' legaque':

—Yešlož da'ozen' soa' len ľe'e, neda' nsa' be'ni' che yichjlažda'olen'. Ľe gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenľe da' mal dan' chnabia' ľe'e. Ben' chda gan' nac choľ bi chacbe'ede' gan' zeje'. Can' naquen len ľe'e. <sup>36</sup> Ľe šejnilaže' neda' šlac ne' zoa' len ľe'e, cont šo' be'ni' chian' lo' yichjlažda'olen'.

Gwde gwna Jesús'en' ca' beze'e na' bcuaše'de' legaque'.

**Zan bene' Israel bi  
gosejnilaže' Jesús'en'**

<sup>37</sup> Na' ľa'czľa' bene' Israel gualaž cheto' ca' besele'ede' ben Jesús'en' da' zan yela' guac, zane' bi gosejnilaže'ne'. <sup>38</sup> Goc can' bzoj da' Isaías'en' ben' be' xtiža' Diosen' cani', gwne':

Ḫanto', nono chejle' diža' dan' chyxijue'eton',  
na' nono chesacbe'e blo'o yela' guac chion'.

<sup>39</sup> Bi goc yesejle'e, le goc chegaque' can' ža yeto dan' bzoj da' Isai'asen', žan:

<sup>40</sup> Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjaņezde' bi zejen,

na' bi chesacbe'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesacbe'ede' bi zejen dan' chlo'eda' legaque',

ba besyetinjde' na' ba beca'a xtola'gaquen' šaca'.

<sup>41</sup> Da' Isai'asen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

<sup>42</sup> Na' la'czla' zanch bene' Israel gualaz cheto' ca' bi gosejni'laže' Jesúsen', bia'cze bene' zan na' len no bene' gwnabia' cheto' gosejni'laže'ne', perw bi goso'e diža' chesejni'laže'ne' le besežebe' bich yosoleb bene' fariseo ca' legaque' lo' yodaon'. <sup>43</sup> Gosaclaže'che' yesenite' binlo len beņachen' clal ca yesenite' binlo len Diosen'.

### Xtiža' Jesúsen' naquen da' žialao

<sup>44</sup> Nach Jesúsen' gwne' žižje gože' bene' ca' že'na':

—Bene' chesejni'laže' neda' gague neda'zen' chesejni'laže' san lente Ḫan' ben' gwsela' neda'. <sup>45</sup> Na' bene' chne'e neda' chle'ede' bene' gwsela' neda'. <sup>46</sup> Neda' za'a yežlio nga chgua'a be'ni' lo' yichjlaždao' bene' ca' chesejni'laže' neda', cont bi yesenite' yesonche' da' malen'.

<sup>47</sup> Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xto'len, le bi za'a yežlion' cont gwnežjua' castigw che xto'la' beņachen', san za'a cont gwnežjua' yela' mban toli tocanē che

bene' yesejni'laže' neda'. <sup>48</sup> Perw de da' choglaon che bene' ca' bi chesejni'laže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' dola' cate' žin ža te che yežlion'. <sup>49</sup> Gague bia' diža' to gualaza', san Ḫa' ben' gwsela' nedan' none' mandadw bin' cheyala' nia' na' bin' cheyala' gwsed gwlo'eda'. <sup>50</sup> Na' nezda' dan' none' mandadw nia' nsan' yela' mban toli tocanē che bene' yosozenag chen. Na' da' li, con can' ža Ḫan', can' choe'lēna' le'e diža'.

### Gwdib Jesúsen' ni'a bene' ca' zjanaque' le' txen

**13** Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' bene' ba chejni'laže' le' lo yežlio nga. Da'nān' za' ga'la' lni pascon' bzejni'ide' bene' ca' zjanaque' le' txen, le chacyane'czede' legaque'.

<sup>2</sup> Bač gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo' na' bene' ca' chesegue'ede' le'. Na' ba zjanite' chesagüe' xše'. <sup>3</sup> Na' Jesúsen' nezde' Ḫen' ba bene' cont nape' la'zelagüe yela' chnabia', na' nezde' gan' zoa Diosen' gwze'e na' gan' zoe' nan' yeyeje'. <sup>4</sup> Da'nān' gwzože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bchej lšinen'. <sup>5</sup> Nach gwxi'e nis na' gwde'en to lo' ša' na' gwzolağüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nchej lšinen'.

<sup>6</sup> Na' cate' ba zoa chibe' ni'a Simón Pedro, Pedron' gože'ne':

—Ḫana', žle' chibo' ni'an'?

<sup>7</sup> Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

<sup>8</sup> Na' gož Pedron' le':

—Gwbat gua'a latje chibo' ni'an'.

Jesúsen' gože'ne':

—Še bi chiban', bich gaco' txen len neda'.

<sup>9</sup>Na' Pedron' gože'ne':

—Xana', gaxa' ni'a na'zen' chibo' še ca', san doxena'.

<sup>10</sup>Nach gož Jesúsen' le':

—Beñe' noša' nazje', ni'e na'zen' chyaž-jen chibe', le doxen nacp chen' naquen xilaže'. Can' nac le'e, nac lažda'olen' xilaže', la'czla' gague yogo'le.

<sup>11</sup>Jesúsen' gwnežde' non' gwde' le' lo na' beñe' chesegue'ede' le'. Da'nan' gwne': "Gague yogo'le nac lažda'olen' xilaže'."

<sup>12</sup>Na' cate' beyož gwde' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e? <sup>13</sup>Le'e nsi'le neda' Maestrw na' Xanle', na' güenczen' žale, le can' naca'. <sup>14</sup>Na' neda' la'czla' naca' Xanle' na' Maestrw chele', ba gwde' ni'al'en' ca to mos, na' can' cheya'la' gaclen lježle ca to mos. <sup>15</sup>Ba gwde' ni'al'en' cont blo'eda' le'e cheya'la' gonle can' ba benan'. <sup>16</sup>Chnia' le'e to da' zejen, note'teze mos bi naque' beñe' blaoch ca xane', na' to beñe' zej mandadw bi zaca'che' ca beñe' gwse'la' le'. <sup>17</sup>Še chejni'ile da' quinga na' gonle can' gwnian', nach soale mbalaz.

<sup>18</sup>'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: "Beñe' gwde' len neda' txen ba blej bšošje' neda'." <sup>19</sup>Chnia' le'e da' quinga cate' za' gac ca' cont cate' ba goc ca' soachachle šejle'le le naca' ben' gwse'la' Diosen' can' ba gwnia' le'e. <sup>20</sup>Chnia' le'e to da' zejen, beñe' ca' chosolebe' note'tez beñe' chse'la', neda'czen' chosolebe' še ca', na' beñe' chosolebe' neda' lecze chosolebe' Dios beñe' gwse'le' neda'.

**Jesúsen' gwne' toe' gwde' le' lo na' beñe' ca' chesegue'ede' le'**

(Mt. 26:20-25; Mr.

14:17-21; Lc. 22:21-23)

<sup>21</sup>Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwde'lenda' lo na' beñe' chesegue'e neda'.

<sup>22</sup>Na' beñe' ca' zjanaque' le' txen con chesena' cho'alo lježe' chesone' xbab che noen' gwne' ca'. <sup>23</sup>Na' toe' chi'e cuiten' dan' chaquechüe' Jesúsen' le'. <sup>24</sup>Nach Pedron' beñe' señw len bena' cont gwne'abde' Jesúsen' no chen' gwne' ca'. <sup>25</sup>Nach gwbigue' bago gože' Jesúsen':

—¿Non' gon ca'?

<sup>26</sup>Na' gož Jesúsen' le':

—Bena' gwne'žjua' late' yetextilen' cate' ba blo'o'jan' lo' nis yela' guagon', le' na' gon ca'.

Nach blo'o'je' late' yetextilen' lo' nis yela' guagon' na' bnežjuen' Judas Iscariote beñe' nac xi'in' to beñe' le' Simón. <sup>27</sup>Na' beyož bnežjue' Judasen' yetextilen' la' gwyo'o' gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

<sup>28</sup>Na' ne to ben' zjachi' cho'a mesen' bi gosejni'ide' bixchen' gože' le' ca'. <sup>29</sup>Bale' gosacde' da' noxe' Judasen' bols mechon' Jesúsen' gože' le' šjaxi'e da' cheseyožde' lo lnin' o šjanežjue' mechw da' chyažje no beñe' yaše'. <sup>30</sup>Nach cate' beyož gwde' Judasen' pedas yetextil dan' bnežjw Jesúsen' le', la' bchojte'. Na' ba nac ba go' gual.

**To da' cobe da' non  
Jesúsen' mandadw goncho**

<sup>31</sup>Gwde' bchoj Judasen', Jesúsen' gwne':

—Diosen' gwsele' neda' golja' benach na' na'a ba nla'laon naca' bene' zaca' juisyw, na' neda' lecze ba chlo'a Diosen' naque' bene' zaca' juisyw. <sup>32</sup>Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a. <sup>33</sup>Xi'inda'ogua', yeşlozga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa'lenle neda' gan' yeya'an. <sup>34</sup>Na' to da' cobe chzia' bia' gonle, gaque ljezle tole yetole. Can' chacda' le'e, lecz can' cheyala' gaque ljezle tole yetole. <sup>35</sup>Na' yeseneze yogo'lol bene' nacle neda' txen še soaczle gaque ljezle tole yetole.

**Jesúsen' gwne' Pedron'  
bi chebe' nombi'ene'**

(Mt. 26:31-35; Mr.  
14:27-31; Lc. 22:31-34)

<sup>36</sup>Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

<sup>37</sup>Na' Pedron' gože' le':

—Xana', ¿bixchen' bi gac sa'lena' le' na'a? Gwzanlaže' cuina' gata' še chonen byen cont gaclena' le'.

<sup>38</sup>Na' gož Jesúsen' le':

—¿Chacdo' gwzanlaže' cuino' gato' cont gacleno' neda'? Da' li' chnia' le', cate' cuež jean' ba goc šon' ni'a bi chchebo' nombi'o neda'.

**Bene' chesejnilaže' Jesúsen'  
lecze zjanombi'e Xe' Diosen'**

**14** 'Bich gaczejlaže'le. Le šejnilaže' Diosen' na' lecze le šejnilaže' neda'. <sup>2</sup>Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjayenšagua' yo'o che tole. <sup>3</sup>Na' cate' yeyož šjayenšagua' yo'o chele ca', cana'ch yida' da' yoble yechi'a le'e cont yedyezoale gan' šjayzoa' neda'.

<sup>4</sup>Nezele gan' yeya'an' na' ba nezele nac gonle cont yežinle na'.

<sup>5</sup>Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

<sup>6</sup>Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' bene' yela' mban toli tocaņe. Ne toze bene' bi yežine' gan' zoa Xan' še bi šejnilaže' neda'. <sup>7</sup>Še nombia'yaņe'le neda', lente Xan' ba nombia'le še ca'. Na' bach nombia'ln'e' na'a na' ba ble'elne'.

<sup>8</sup>Na' gož Felipen' le':

—Ben cont le'eto' Xaon', lezen' chna-beto' le'.

<sup>9</sup>Jesúsen' gože'ne':

—Felipe, sša xen ba gwzoa' nga len le'e na' ¿bina' gombi'o neda'? Note'tez bene' ba ble'e neda' lencze Xan' ba ble'ede'. ¿Bixchen' chnabo' gona' cont le'ele Xan'?

<sup>10</sup>¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. <sup>11</sup>Le šejle' chia' zoa' len Xan' na' le' zoe' len neda'. Na' še bi chejle'le xtizan', le šejle' chia' dan' ba ble'ele chona' yela' guac. <sup>12</sup>Na' chnia' to da' zejen, bene' ca' chesejnilaže' neda', da' ca' chonan' lecze legaquen yesone'. Na' da' zaca'ch ca' da' ca' yesone', le yeya'a gan' zoa Xan'. <sup>13</sup>Na' bite'teze da' nabele Xan' lagüe da' chejnilaže'le neda' naca' Xi'ine', gonan', cont gwlo'a nac Xan' bene' zaca' juisyw. <sup>14</sup>Bite'tez da' nable gona' lagüe da' chejnilaže'le neda', neda' gonan'.

**Jesúsen' gwne' sele'  
Spiritw che Diosen'**

<sup>15</sup>Še chaquele neda', gonle can' nona' mandadw. <sup>16</sup>Na' nabda' Xan' cont sele' Spiritw chen' soan len le'e toli tocaņe na' gaclenen le'e. Na' Spiritw che Diosen'

gwzejni'in le'e da' nac da' li. <sup>17</sup> Na' bene' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoa lo' yichjlažda'olen' nabian' le'e. <sup>18</sup> Bi yocua'ana' le'e ca bi' güezebe. Güidcza' yeto gan' zoale nga. <sup>19</sup> Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocaņe, da'nana' soale toli tocaņe. <sup>20</sup> Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e. <sup>21</sup> Bene' zjanezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

<sup>22</sup> Na' Judas (perw gague Judas Iscariote) gože'ne':

—Xanto', žbixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

<sup>23</sup> Na' Jesús'en' gože'ne':

—Bene' chesacde' neda' chosozenague' xtižan', na' Xan' lecze gacde' legaque' na' neda' len xan' yedesoa' len legaque'. <sup>24</sup> Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwseļa' neda'.

<sup>25</sup> 'Da' quinga ba gwnia' le'e šlac ne' zoa' len le'e. <sup>26</sup> Na' Xan' sele' Spiritw chen' soan lo' yichjlaždao' le'e chejni-laže'le neda' cont gaclenen le'e. Na' Spiriton' gwzejni'in le'e yogo' da' cheyaļa' nezele na' gonon' cont šjajza'laže'le yogo' dan' ba gwnia' le'e.

<sup>27</sup> Na' hcua'ana' le'e na' chona' cont soa' cuezle binlo len xbab chelen'. Chacļa' soa' cuezle binlo len xbab chelen' can' zoa' neda'. Nono' beņach' gac

gone' cont soa' cuezle binlo len xbab chelen' can' chac chona' neda'. Bi gaczejlaže'le, neca žeble. <sup>28</sup> Ba benele gwnia' yeya'a gan' zoa' Xan' na' yida' da' yoble gan' zoale nga. Na' ša chaquelenda' ca cheyaļa', nach' chebele dan' yeya'a gan' zoa' Xan', le Xan' zaca'che' ca neda'. <sup>29</sup> Na' ba gwnia' le'e na'a bibi na' gac, cont soachachle šejnilaže'le neda' caten' gac ca'.

<sup>30</sup> 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tillenen neda', perw bi gonon' neda' gan'. <sup>31</sup> Chona' con can' non' Xan' mandadw cont neze beņachen' chacda' Xan'. Le šo'o' na'a, ba gole šejcho.

### Jesús'en' zaca'lebe' ca to yag da' chbia uvas

**15** 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'. <sup>2</sup> Na' le'e chejnilaže'le neda' zaca'lebe' ca zoze' yaguen'. Na' to to zoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. <sup>3</sup> Na' le'e ba nacle ca to xozen' da' ba mpe'e, le bač chzenagle xtižan' dan' ba be'lena' le'e. <sup>4</sup> Le soachach len neda' cont soachacha' len le'e. Can' nac zoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soachachle len neda'.

<sup>5</sup> 'Neda' zaca'leba' ca to yag da' chbia uvas na' le'e zaca'lebe' ca xozen'. Note'tezle še soachachle len neda' lecze soachacha' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle. <sup>6</sup> Bene' bi zoachache' len neda', gac che' can' chac len zoze' yag da' bibi chbia, le chesechoguen' na' chesebižen' na' chžin ža chosotoben' chesadoen' yi' cont chesejen.

<sup>7</sup>Na' le'e še zoachachle len neda' na' zoachachle chzenagle xtižan', bite'tez da' chaclaže'le nabele Diosen', gonczen'.  
<sup>8</sup>Chacxen Xan' cate' zoale chonchguale dan' chazlažen', na' še chonle ca', yesacbe'e bene' da' li chejnilaže'le neda' na' chzenagle chia'.  
<sup>9</sup>Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e.  
<sup>10</sup>Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

<sup>11</sup>'Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw.  
<sup>12</sup>Na' da' nga nona' mandadw gonle, gague lježle tole yetole can' chacda' neda' le'e.  
<sup>13</sup>Nono zoa bene' chaquech lježe' ca bene' chzanlaže' cuine' gate' neche bene' migw che'. Na' can' chona' neda'.  
<sup>14</sup>Na' le'e nacle migw chia' še chonle con can' nona' mandadw.  
<sup>15</sup>Na' bich žia' nacle bene' güen žin chia', le to bene' güen žin bi nezde' yogo' da' chon xanen', san žia' nacle migw chia'.  
 Le yogo'lo' da' ba benda' gwna Xan' ba bzejni'idan' le'e.  
<sup>16</sup>Gague le'e gwlejle neda' naca' Xanle. Neda' gwleja' le'e cont chejnilaže'le neda'. Na' chsela' le'e cont šjenle can' chazlaže' Xan', na' gague da' te che da' ca' gonlen'. Na' yogo'lo' da' nabele Xan' gone' lagüe da' chejnilaže'le neda', gonczen'.  
<sup>17</sup>Da' nga da' chona' mandadw gonle, gague lježle tole yetole.

**Bene' bi chesejnilaže' Diosen'  
 chesegue'ede' bene'  
 chosozenag che Jesúsen'**

<sup>18</sup>Še bene' bi chesejnilaže' Diosen' chesegue'ede' le'e, le gon xbab ba chesegue'eczede' neda' cate' za' yesegue'ede' le'e.  
<sup>19</sup>Ša nacle txen len bene' ca' bi chesejnilaže' Diosen', nachen' yesacde' le'e can' chesaque' bene' lježen' šaca'. Perw ba gwleja' le'e cont chzenagle chia'. Da'nan'

chesegue'ede' le'e da' bi nacle legaque' txen.  
<sup>20</sup>Le šjasa'laže' dan' gwnia' le'e: "Note'teze mos bi naque' blaoch ca xanen'." Bosochi bososaca' bene' neda', na' lecz ca' yesonde' le'e. Na' balze bene' bosozenague' xtižan', lecze balze yosozenague' xtiža'len'.  
<sup>21</sup>Na' da' bi zjanombi'e Diosen' ben' gwseła' neda', da'nan' yesonde' le'e yogo' da' ca', le chesegue'ede' le'e da' chzenagle chia'.

<sup>22</sup>'Ša neda' bi bedezejni'ida' legaque', bi zjanape' doła' da' chesegue'ede' neda' šaca'. Perw na'a bibi de da' yosode'ede' yesene' bi zjanape' doła'.  
<sup>23</sup>Bene' chgue'ede' neda' lente Xan' chgue'ede'.  
<sup>24</sup>Ba bena' yela' guac da' nono nochle na' gon, na' šaca' bi besele'eden' bi zjanape' doła' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'.  
<sup>25</sup>Na' chac can' nyoj Xtiža' Diosen' dan' chososede' gan' žan: "Besegue'ede' neda' la'czla' bibi da' mal bena'."

<sup>26</sup>'Ba gwnia' le'e sela' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'.  
<sup>27</sup>Na' lecz ca' le'e cheyala' güe'le xtižan', le ba gwzoale len neda' šlac ba gwduxue'eda' xtiža' Xa' Diosen'.

**16**'Ba gwnia' le'e yogo' da' ca' cont bi gacžejlaže'le.  
<sup>2</sup>Le yesyebeje' le'e lo' yodao' chegaque' ca', na' gwžin ža cate' note'tez bene' yesote' le'e yesacde' chebe Diosen' dan' chesonen'.  
<sup>3</sup>Yesonde' le'e yogo' da' ca' le bi zjanombi'e Xan' neca neda'.  
<sup>4</sup>Žia le'e da' quinga cont cate' žin ža gac can' gwnian' nach šjaze'ele.

**Da' chon Spiritw che Diosen'**

'Bi gwnia' le'e yogo' da' ca' gac chele cate' za' gwzolao bzejni'ida' le'e xtiža' Diosen', le ne' zoacza' chaclena' le'e.  
<sup>5</sup>San na'a yeya'a gan' zoa Xan' ben' gwseła' neda', na' ne tole bi chnabele neda' gan' yeya'a.  
<sup>6</sup>Na' ba chacyaše'le dan' ba gwnia' yeya'a.  
<sup>7</sup>Perw da' li napen le'e cuent



yeya'a, le še bi yeya'a, Spiritw che Xa' Diosen' dan' gaclenen le'e bi yedesoan lo' yichjlažda'olen'. Na' yeya'a nach sełan' len le'e. <sup>8</sup>Na' cate' yid Spiriton' gwzejni'in beṇachen' zjanape' doła', na' gwzejni'in non' nac beṇe' güen len Diosen', na' gwzejni'in gata' castigw tołi tocaṇe che beṇe' bi chosozenague' chia'. <sup>9</sup>Spiriton' gwzejni'in legaque' zjanape' doła' da' bi chesejnilaže' neda'. <sup>10</sup>Na' gwzejni'in legaque' non' nac beṇe' güen len Diosen', le yeya'a gan' zoa Xa' Diosen' na' le'e bich le'ele neda'. <sup>11</sup>Na' gwzejni'in legaque' gata' castigw che xtoła'gaquen' tołi tocaṇe, le Satanás dan' chnabia' da' xigüe' ca' na' dan' chnabia'te beṇe' ca' bi chesejnilaže' Diosen' ba nchoglaon chen gwnežjw Diosen' castigw chen tołi tocaṇe.

<sup>12</sup>'Ne' dech da' zan da' nia' le'e, perw naquen zdebe šejni'ilen na'a. <sup>13</sup>San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyała' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. <sup>14</sup>Spiriton' gonen cont gwlo'elaon naca' beṇe' zaca' juisyw, le gwzejni'in le'e xtiža'. <sup>15</sup>Xan' ba bene' cont nezdá' yogo' da' neze le', na' da'nan' gwnia' Spiriton' chixjue'en le'e xtižan'.

### Jesúsen' gwne' šložze yesacyaše'de' na' techle yesyebede'

<sup>16</sup>'Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

<sup>17</sup>Na' bałe beṇe' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xen'? <sup>18</sup>¿Bi zejen dan' že' yešlož? Bi chejni'icho bin' že'.

<sup>19</sup>Jesúsen' gocbe'ede' chesaclaže' yesenabde'ne' bi zejen, na' gože' legaque':

—¿Ba chṇabe lježe bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"? <sup>20</sup>Da' li chnia' le'e ba zoa cuežle na' yegüine'le šlac beṇe' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. <sup>21</sup>Cate' chzan no'olen' chžaglagüe' šlac chaque' bes che yela' sanna'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto beṇach yežlio nga. <sup>22</sup>Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

<sup>23</sup>'Na' cate' ba bžin ža šjayzoa' da' yoble gan' zoa Xan', cana'ch bich yažjele bi ṇable gwzejni'ida' le'e. Da' li chnia' le'e, da' chejnilaže'le neda' bite'tez da' ṇabele Xan', gonczen' le'e. <sup>24</sup>Ža na'aža bibi na' ṇabele Xan' ye'ln'e chṇablen da' chejnilaže'le neda'. Na' na'a le ṇabe Xan' bi da' ṇabelene' ye'ln'e' ca', na' gone' can' ṇabelenen' cont soale mbalaz juisyw.

### Criston' ba bene' cont yenit yela' chnabia' che gwxiyen'

<sup>25</sup>'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'. <sup>26</sup>Na' cate' ba bžin žana', cana'ch ṇabele Xan' bi da' ṇabelene' ye'ln'e' chṇablen da' chejnilaže'le neda'. Na' bi yažjen ṇabda' Xan' gac-lene' le'e. <sup>27</sup>Le cuincze Xan' chacde' le'e dan' chaquele neda' na' chejle'le gwsele' neda'. <sup>28</sup>Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

<sup>29</sup>Nach gose'ene':

—Bač cho'o diža' da' chejni'ito' na' bi cho'o jemplw. <sup>30</sup>Ba chacbe'eto' nombi'o yogo' xbab che beṇachen'. Ba nežledo' bi

chesaclaže' bene' yesenezde' cate' bina' yesenaben'. Da'nan' bač chejle'to' zao' gan' zoa Diosen'.

<sup>31</sup> Na' gož Jesúsen' legaque':

—¿Ba chejle'le na'a? <sup>32</sup> Ba bžin ža na' na'a ba gole' gaslasle. To tole ca'a xnez che chele na' gwcua'anle toza'. Perw bi zoa' toza', le zoa Xan' len neda'. <sup>33</sup> Ba gw-nia' le'e ca' cont soa cuezle binlo len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

### Jesúsen' gwñabde' Diosen' gaclene' bene' ca' zjanaque' le' txen

**17** Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacbia' nedan' Xi'ino' naca' bene' zaca' juisyw cont neda' gona' ga gacbia' le' naco' bene' zaca' juisyw. <sup>2</sup> Ba beno' neda' yela' chnabia' lao yogo' benač cont chnežjua' yela' mban toli tocanē che yogo' bene' ca' ba gwlejo' chesejnilaže' neda'. <sup>3</sup> Na' bene' ca' zjanape' yela' mban toli tocanē zjanombi'e le', le tozon' zaco' gonx-ento', na' lecze zjanombi'e neda' Jesu-cristw bene' gwseło'.

<sup>4</sup> Lo yežlion' ba bena' cont nacbia' naco' bene' zaca' juisyw, le ba beyož bena' yogo'loł da' gwlo'o lo na' gona'. <sup>5</sup> Na' na'a Xa', ben cont la'laon naca' bene' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

<sup>6</sup> Ba gwlejo' bał benač chesejnilaže' neda', na' bač blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'. <sup>7</sup> Na' ba zjanезде' yogo'loł da' chona' na' yogo' diža' da' choa' zjanaquen chio' le'. <sup>8</sup> Le ba be'lena' legaque' diža' dan' ba bzejni'ido'

neda' na' ba bosozenague' chen, na' ba chesacbe'ede' da' li gwza'a gan' zon', na' chesejle'e le len' gwseło' neda'.

<sup>9</sup> Chnaba' gacleno' legaque'. Bi chnaba' gacleno' yogo' benač, san gacleno' bene' ca' gwlejo' chesejnilaže'nda' le ba zjanaque' lo nao'. <sup>10</sup> Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecz zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

<sup>11</sup> Na' na'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' chnaba' gwčhino' yela' chnabia' chio' cont gwcuas gwcuižo' da' malen' len legaque' cont nita'cze' yesaque' toze len lježgaque', ca chio' naccho toze. <sup>12</sup> Šlac ba gwzoa len legaque', neda' ba bchina' yela' chnabia' chion' cont bcuas bcuiža' da' malen' len legaque'. Da'nan' ne toe' bi gwžiayi', con toz ben' ba naquen cuiaye'e cont gac doxen can' ža Xtižo' dan' nyojen.

<sup>13</sup> Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca mbal-azen' zoa' neda'. <sup>14</sup> Neda' ba be'lena' legaque' xtižon', na' bene' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'. <sup>15</sup> Na' ca' nac bene' ca' chesejnilaže' neda', bi chnaba' yeca'o' legaque' lo' yežlio nga, san chnaba' gacleno'ne' cont Satanás dan' chnabia' da' xigüe' ca' bi siye'en' legaque'. <sup>16</sup> Legaque' bi zjanaque' txen len bene' bi chesejnilaže' le', ca' neda' bi naca' txen len bene' bi chesejnilaže' le'. <sup>17</sup> Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li. <sup>18</sup> Len' gwseło' neda' yežlion' cont ba

bia' xtižon', na' lecze ca' chselā' legaque' yeso'e xtižan'. <sup>19</sup> Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

<sup>20</sup> Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga. <sup>21</sup> Xa', ben cont yogo'lole' yesaque' toze len lježgaque' na' yesaque' txen ten chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwselo' neda'.

<sup>22</sup> Na' yela' bala'an dan' nono' neda' ba bnežjuan' legaque' cont zjanaque' toze len bene' lježe' ca' chio' naccho toze.

<sup>23</sup> Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwselo' neda' na' yesacbe'ede' chacdo' bene' ca' can' chacdo' neda'.

<sup>24</sup> Xa', chacdo' neda' cate' bina' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw.

<sup>25</sup> Xa', naco' la'zelagiue' bene' chon da' zej to licha. Na' ca' nac' bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanezde' len' gwselo' neda'. <sup>26</sup> Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

## Judasen' bdie' Jesúsen' lo na' soldadw ca'

(Mt. 26:47-56; Mr.

14:43-50; Lc. 22:47-53)

**18** Beyož gwna Jesúsen' da' ca', gwzala'ene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'. <sup>2</sup> Na' Judasen' ben' ba naquen gone' Jesúsen' lo na' bene' ca' cheseque'ede' le' lecze nombi'e latjen', le zan ni'a Jesúsen' len bene' ca' zjanaque' le' txen ba besedobe' na'. <sup>3</sup> Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bžoz gwnabia' ca' na' bene' fariseo ca' cont yesezene' Jesúsen'. Zjanxobe' no lintern na' zjanoxe' no yi' yech na' zjana'le' spada. <sup>4</sup> Jesúsen' ba nezde' yogo'lole' da' za' gac che', na' bchoje' jašague' legaque' na' gwne':

—¿Non' cheyiljwle?

<sup>5</sup> Na' gose'ene':

—Cheyiljwto' Jesús bene' Nazaret.

Na' gož Jesúsen' legaque':

—Nedan'.

Na' Judasen' ben' ba naquen gone' Jesúsen' lo na'gaquen' zelene' legaque'.

<sup>6</sup> Cate' Jesúsen' gože' legaque': "Nedan", la' besyebiga'te' cosxanle na' jasechaze' lo yon'. <sup>7</sup> Na' da' yoble Jesúsen' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús bene' Nazaret.

<sup>8</sup> Na' Jesúsen' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

<sup>9</sup> Gwne' ca' cont goc can' ba gwdixjue'ede' caten' gwne': "Ne to bene' ca' ba gwlej Diosen' chesejnilaže' neda' bi yesebiaye'e." <sup>10</sup> Na' Simón Pedron' no'e to spada na' goljen' gwdinen' mos che bžoz blaon' gwchogtechgüe' nague'

liča. Na' mosen' le' Malco. <sup>11</sup>Na' Jesúsen' gože' Pedron':

—Bego'o spada chion' lo' ližen'.  
¿Chacdo' bi cheyala' gac da' ba nžia bia'  
Xa' Diosen' gac chia'?

**Goseche'e Jesúsen' lao ben' le' Anás**

(Mt. 26:57-58; Mr. 14:53-54; Lc. 22:54)

<sup>12</sup>Nach soldadw ca' len xangaque' na' len bene' chesape' yodao' blao che nación Israel cheton' gosezene' Jesúsen' na' bosocheje'ne'. <sup>13</sup>Na' goseche'ene' da' nechw lao Anás ben' naque' xta'obi'in che Caifás. Na' Caifásen' goque' bꝛoz blao che nación Israel cheton' lo' izen'. <sup>14</sup>Na' Caifásna' ben' gože' bene' gwnabia' cheton' napen legaque' cuent toz ben' gat cled ca cuiayi' yogüie'.

**Pedron' bi gwchebe'  
naque' Jesúsen' txen**

(Mt. 26:69-70; Mr.

14:66-68; Lc. 22:55-57)

<sup>15</sup>Simón Pedron' len yeto bene' naque' Jesúsen' txen gosa'ogüe'ne'. Na' nombia' ben' nac bꝛoz blao ben' yeto. Da'nan' goc gwyo'e len Jesúsen' chyo'o che bꝛoz blaon'. <sup>16</sup>Na' Pedron' bega'ane' do cho'a puerten'. Nach ben' yeto, da' nombia' bꝛoz blaon' le', gwyeje' na' be'lene' diža' bi' no'olen' chap cho'a puerten' cont gwlo'obe' Pedron'. <sup>17</sup>Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

<sup>18</sup>Bene' güen žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyže'ede'. Na' Pedron' ze' len legaque' cho'a yin' cheže'ede'.

**Goseñabde' Jesúsen'  
che dan' chsed chlo'eden'**

(Mt. 26:59-66; Mr.

14:55-64; Lc. 22:66-71)

<sup>19</sup>Na' ben' nac bꝛoz blaon' gwñabde' Jesúsen' che bene' ca' chosozenag che dan' chsed chlo'eden' na' che da' ca' chzejni'iden'. <sup>20</sup>Na' Jesúsen' gože'ne':

—Ba bi'a diža' doxen latje lagüe. Zan ni'a bsed blo'eda' lo' yodao' checho ca' na' chyo'o yodao' blaon' gan' chesežag yogo' bene' gualaž chechon'. Bibi diža' gwñia' bagaše'ze. <sup>21</sup>¿Bixchen' chñabdo' neda'? Gwñabe bene' ca' gosende' dan' bsed blo'edan'. Legaque' zjanezde' bi dižan' bia'.

<sup>22</sup>Beyož gwna Jesúsen' ca', to ben' chape yodao' blaon' zie' na', na' gwdape' xaguen', gože'ne':

—¿Ca' choži'o xtiža' ben' nac bꝛoz blaon'?

<sup>23</sup>Jesúsen' gwne':

—Še bi da' mal ba gwñia', be' diža' che bi da' malen' ba gwñia', na' še gwñia' güen, ¿bixchen' chgapo' neda'?

<sup>24</sup>Nach Anásen' bdie' Jesúsen' ncheje' lao Caifásen' ben' nac bꝛoz blaon'.

**Da' yoble Pedron' bi gwchebe'  
še naque' txen len Jesúsen'**

(Mt. 26:71-75; Mr.

14:69-72; Lc. 22:58-62)

<sup>25</sup>Na' Pedron' zie' cho'a yin' cont cheže'ede' na' bene' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gwchebe', gwne':

—Bi lena' neda'.

<sup>26</sup>To xmos bꝛoz blaon' naque' biše' ljež ben' gwchog Pedron' naguen', na' le' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?

<sup>27</sup>Na' Pedron' da' yoble bi gwchebe', na' la' gwchežte to jea.

### Goseĉhe'e Jesúsen' lao Pilaton'

Mr. 27:1-2, 11-14; Mr. 15:1-5; Lc. 23:1-5)

<sup>28</sup> Na' do cheni'las bene' gwnabia' ca' gosebeje' Jesúsen' gan' zoa Caifásen' na' goseĉhe'ene' gan' zoa gobernador Pilato ben' chon yela' justis. Na' legaue' bi goso'e len Jesúsen' yo'o gan' zoa Pilaton', le can' nac costumbr cheton' bi chac yesagüe' xše' Iní pascon' še yeso'e gan' že' bene' bi zjanac bene' Israel. <sup>29</sup> Da'nan' Pilaton' bchoje' na' gože' legaue':

—¿Bi ben benga? ¿Bi xya chagwle che'?

<sup>30</sup> Na' bene' gwnabia' ca' gosene':

—Šaca' benga bi naque' bene' güen da' xinj bi bdetone' lo naon'.

<sup>31</sup> Na' gož Pilaton' legaue':

—Le yeche'e, na' le gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de lsens gotto' bene'.

<sup>32</sup> Da' gosone' ca' goc can' gwna Jesúsen' caten' bzejni'ide' nac yesone' yesote'ne'. <sup>33</sup> Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

<sup>34</sup> Jesúsen' gože'ne':

—¿Con da' goljlažon' chnabo', še bene' yoble gose'e le' ca'?

<sup>35</sup> Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' bxož gwnabia' chele ca' bosodie' le' lo na' nga. ¿Bi da' xinj benon'?

<sup>36</sup> Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedi'e' cont bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

<sup>37</sup> Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benachen' diža' li na' yogo' bene' chesone' txen len diža' li chosozenague' chia'.

<sup>38</sup> Nach gož Pilaton' le':

—¿Bi dan' diža' li?

### Goseĉhoglagüen' yesote' Jesúsen'

(Mt. 27:15-31; Mr.

15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaue':

—Bibi nla'lagüe še bi da' xinj non benga. <sup>39</sup> Perw na' de costumbr chele gwsana' to bene' de ližya lo Iní pascon'. ¿Chaclaže'le gwsana' benga naque' Rey che le'e bene' Israel?

<sup>40</sup> Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

**19** Nach Pilaton' bene' mandadw goseyine' Jesúsen'. <sup>2</sup> Na' soldadw ca' gosone' to corona de xis yeše' na' bosozoen' yichj Jesúsen' na' bosoguacue'ne' to lache' moradw ca' da' chosoĉhin no rey. <sup>3</sup> Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

<sup>4</sup> Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

<sup>5</sup> Na' bechoj Jesúsen' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaue':

—Le na', nga ze ben'.

<sup>6</sup> Na' bxož gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan nī'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' legaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

<sup>7</sup>Na' bene' gwnabia' ca' che nación Israel cheton' gose'e le':

—¿Da' ley cheto' da' žan cheyala' gate' da' že' naque' Xi'in Dios, le con to benačzen' naque'.

<sup>8</sup>Ba chžeb Pilaton' can' ba chaquen', na' cate' bende' xtiža'gaquen' bžebche'.

<sup>9</sup>Na' beyo'e yo'o gan' zoe' da' yoble, nche'e Jesúsen', na' gože' Jesúsen':

—¿Ga bene' le'?

Na' Jesúsen' bi boži'e xtižen'.

<sup>10</sup>Nach Pilaton' gože'ne':

—¿Bi choži'o xtižan'? ¿Bi nezd'o napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

<sup>11</sup>Jesúsen' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' doła' ca le'.

<sup>12</sup>Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez bene' že' naque' rey chone' contr rey César.

<sup>13</sup>Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Jej, na' diža' hebreo nzin' Gabata. <sup>14</sup>Do guagwbiz ža cate' za' solao Ini pascon' Pilaton' gože' bene' gwnabia' cheto' ca':

—Le na', nga zoa rey chelen'.

<sup>15</sup>Nach da' yoble gosezologüe' bososye'e gosene':

—¡Cheyala' gate'! ¡Bde'e le'e yag cruz!

Nach Pilaton' gože' legaque':

—¿Rey chele nga gona' mandadw yosode'e le'e yag cruz?

Nach bkoz gwnabia' ca' gose'ene':

—Gague rey cheto' benga. Toze César naque' rey cheto'.

<sup>16</sup>Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudad'.

### Bosode'e Jesúsen' le'e yag cruz

(Mt. 27:32-44; Mr.

15:21-32; Lc. 23:26-43)

<sup>17</sup>Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota. <sup>18</sup>Na' soldadw che gubernadoren' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwyo'e gachoł bene' ca' chope'. <sup>19</sup>Na' gobernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: "Jesús bene' Nazaret, Rey che bene' Israel". <sup>20</sup>Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesúsen' le'e yag cruzen' naquen gala'ze ciuda Jerusalénna'. <sup>21</sup>Nach bkoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzajo' "Rey che bene' Israel", san bzoj: "Le' gwne' naque' rey che bene' Israel."

<sup>22</sup>Na' Pilaton' gwne':

—Da' bena' mandadw bosozoje', ba nyojenna'.

<sup>23</sup>Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de. <sup>24</sup>Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: "Besyele'e xalan' legacze', na' gosone' rifa lache' dan' chazan'."

<sup>25</sup> Na' do gala'ze yag cruz che Jesúsen' zecha Marian' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. <sup>26</sup> Na' cate' Jesúsen' ble'ede' zecha xne'en gala'ze len to bene' naque' le' txen, bene' chaque-chgüe Jesúsen' le', nach gože'ne':

—Bena' gaque' ca xi'ino'.

<sup>27</sup> Nach gože' bena':

—Bži'ilaže' xna' nga ca xnao'.

Na' žana' gwque'ene' bene'ne' ca bene' lo' yo'o.

### Can' goc caten' got Jesúsen'

(Mt. 27:45-66; Mr.

15:33-41; Lc. 23:44-49)

<sup>28</sup> Gwde na' Jesúsen' ba nezde' bach goc yogo' da' cheyała' gac. Nach cont goc can' ža yelate' Xtiža' Diosen' da' nyojen gwne':

—Chbiłda' nis.

<sup>29</sup> Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwłisen' blapen' cho'a Jesúsen'. <sup>30</sup> Na' beyož gwxxop Jesúsen' vi-non' na' gwne':

—Bach goc yogo'lol da' cheyała' gac.

Nach bcheque' yichjen' gote'.

### To soldadw godoe' lanza cuit le'e Jesúsen'

<sup>31</sup> Na' yeteyo gaquen ža che Dios na' ža lni xen, da'n'nan' bene' gwnabia' che nación cheton' jaseñabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e le'gaque' le'e yag cruz ca', le bi gosaclaže' yeseda'ch bene'

ca' le'e yag cruzen' ža che Dios. <sup>32</sup> Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a. <sup>33</sup> Na' cate' be-sežine' gan' da' Jesúsen', beše'ede' ba gote' na' bich goseyišjue' ni'e ca'.

<sup>34</sup> Perw to soldadon' godoe' lanza cuit le'e Jesúsen', na' la' bchojten chen len nis.

<sup>35</sup> Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le. <sup>36</sup> Na' goc da' ca' len Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'." <sup>37</sup> Na' yeto da' žan: "Yesene'e ben' ba bosožie' güe'."

### Bosocuaše' Jesúsen'

(Mt. 27:57-61; Mr.

15:42-47; Lc. 23:50-56)

<sup>38</sup> Beyož goc yogo' da' ca', José bene' nac bene' ciuda Arimatea janabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gwyeje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' bagaše'ze da' chžebe' bene' gwnabia' cheto' ca'. <sup>39</sup> Na' len Josén' lecze gwyej Nicodemo ben' ba gwyej gan' zoa Jesúsen' šeže'le. Na' Nicodemon' no'e to da' chl'a zix da' none' len yal dan' že' mirra, na' len to bište dan' že' aloes, ca do šona roben'. <sup>40</sup> Nach bosyochele' cuerp che Jesúsen' to lache' xen na' len dan' chl'a zixen', ca' chon neto' bene' Israel cate' chcuashe'to' bene' guat. <sup>41</sup> Na' gala'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' goseche'ene' to bloj cont yosochinen' ca to ba, na' nono bene' guat na' šo' lo'enna'. <sup>42</sup> Ža caten' got Jesúsen' naquen ža caten' chososiñi'e che ža che Diosen'. Na' da' chesacbyende' yosocuaše'ne', da'n'nan' jase'lo'e Jesúsen' lo' bloj coba', le naquen gala'ze.

**Jesúsen' bebane' ladjo bene' guaten'***(Mt. 28:1-10; Mr. 16:1-8; Lc. 24:1-12)*

**20** Na' bal dmi<sup>g</sup>w María bene' Magdalan' gweje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'. <sup>2</sup>Nach beza'sese' beyeje' gan' zoa Simón Pedron' len yeto bene' naque' Jesúsen' txen, na' gože' lega<sup>q</sup>ue':

—Ba besyebeje' Xanchon' lo' blojen' na' bi nezeto' ga besyeyo'ene'.

<sup>3</sup>Nach Pedron' na' ben' yeto gosa'aque' ja'aque' cho'a blojen'. <sup>4</sup>Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'en<sup>n</sup>a' ca le'. <sup>5</sup>Na' bcheque' gwne'e lo'en<sup>n</sup>a' na' ble'ede' lache' ca' zjachin' lo' yo perw bi gwyo'e. <sup>6</sup>La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'. <sup>7</sup>Na' bay dan' bosoguzje' yichjen' bi chin' gan' chi' lache' ca', san ndoben chin' šla'ale. <sup>8</sup>Nach lencze ben' yeto gwyo'e, le bina' šo'e la'czla' byobech bžine' cho'en<sup>n</sup>a', na' ble'ede' can' naquen na' gweyje'le'e. <sup>9</sup>Le bina' yesejni'ide' Xtiža' Diosen' da' nyojen žan cheyala' yebane' ladjo bene' guaten'. <sup>10</sup>Na' besyeya'aque' jaya'aque' yo'o gan' nite'na'.

**María bene' Magdalan' ble'ede' mbancze Jesúsen'***(Mr. 16:9-11)*

<sup>11</sup>Na' Marían' bega'ane' na' gwzeche' gała'ze cho'a blojen' chbeže'. Na' ne' chbežte' ca' bcheque' gwne'e lo' blojen'. <sup>12</sup>Na' ble'ede' chope angl' bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'. <sup>13</sup>Nach gose'e no'olen':

—¿Bixchen' chbežo' no'ole?

Na' boži'en gože' lega<sup>q</sup>ue':

—Ba besyeyo'e Xanan' na' bi nezda' gale jasesane'ne'.

<sup>14</sup>Beyož gwna' Marían' ca' gweychje' ble'ede' zecha Jesúsen' çožen', perw bi gocbe'ede' še naque' le'. <sup>15</sup>Na' gož Jesúsen' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach boļ güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

<sup>16</sup>Jesúsen' gože'ne':

—¡María!

Na' Marían' gweychje' da' yoble na' gože'ne':

—¡Raboni! —naquen to diža' hebreo na' zejen Maestrw.

<sup>17</sup>Jesúsen' gože'ne':

—Bi goxo' neda', le bina' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lecze naque' Xale. Naque' Dios ben' chonxena' na' lecze naque' Dios ben' chonxenle.

<sup>18</sup>Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le' ba ble'ede' Xanchon'.

**Bene' ca' zjanaque' Jesúsen' txen besele'ede' mbancze'***(Mt. 28:16-20; Mr.**16:14-18; Lc. 24:36-49)*

<sup>19</sup>Na' cate' ba goc choļ že' dmi<sup>g</sup>on', bene' ca' zjanaque' Jesúsen' txen zjandop zjanžague' lo' yo'o na' zjanseyjw<sup>t</sup>ie' puert ca' da' besežebe' bene' gwnabia' che nación Israel cheton'. Nach Jesúsen' ble'e na' gwze' gachol' lega<sup>q</sup>ue'. Na' gože' lega<sup>q</sup>ue':

—Le soa binlo len xbab da' yo'o lo' yichjlažda'ole.

<sup>20</sup>Beyož gwne' ca' na' blo'ede' lega<sup>q</sup>ue' taque' ca' na' cuit le'ena'. Na' besyebede'



cate' besele'ede' le naque' Xanchon'.

<sup>21</sup> Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwseła' Xan' neda' yežlio nga bia' xtižan', lecze ca' neda' chseła' le'e güe'le xtižan'.

<sup>22</sup> Beyož gwne' ca' blobe' legaque' na' gože' legaque':

—Le si' Spiritw che Diosen'. <sup>23</sup> Bene' ca' yesyetinge xtoła'gaquen', naple yela' chn- abia' ye'ne' ba gwnitlaon, na' naple yela' chnabia' cont ye'le bene' bi yesyetinge xtoła'gaquen' bitw nitlaon.

### Tomás ble'ede' mban Jesúsen'

<sup>24</sup> Na' Tomás ben' bososi'e Tomás Cuaš lene' len bene' šižinw ca' ba goseda- lene' Jesúsen', na' bi gwzoe' cate' Jesúsen' bedyelo'elagüe' legaque' že' dmigon'.

<sup>25</sup> Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xben- nan' gan' gwdebe clav ca' na' gwzebe na'an cuit le'en.

<sup>26</sup> Gozde' to xman zjanite' lo' yo'on da' yoble na' zoa Tomásen' len legaque'. Na' da' yoble nyeyjw puert ca', cate' bezla' Jesúsen' na' gozzeche' gachol' legaque'. Na' gwne':

—Le soa binlo len xbab da' yo'o lo' yichjlažda'olen'.

<sup>27</sup> Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

<sup>28</sup> Nach Tomásen' gože'ne':

—iXana' na' Dios chia'!

<sup>29</sup> Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle' le' la'czla' bina' yesele'ede' neda'.

### Da' quinga zjanyojen cont šejle'cho Jesúsen' naque' bene' gwseła' Dios

<sup>30</sup> Da' zan yela' guac ben Jesúsen' da' besele'e bene' ca' zjanaque' le' txen da' bi nyojen nga. <sup>31</sup> Perw zjanyoj da' quinga cont šejle'le' Jesúsen' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli tocane' chele da' chejnilaže'lene'.

### Jesúsen' blo'elagüe' gaže bene' ca' zjanaque' le' txen

**21** Gwdechle yeto ža yoble Jesúsen' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc: <sup>2</sup> Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yechope bene' ca' zjanaque' Jesúsen' txen. <sup>3</sup> Na' Simón Pedron' gože' legaque':

—Ša'a gwxen bel' da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdaon' na' goso'e to lo' barcw. Na' nocze no bel' beseželde' že'na'. <sup>4</sup> Na' do ba zoa šeni' besele'ede' zecha Jesúsen' cho'a nisdaon', perw bi gosacbe'ede' še Jesús nan'. <sup>5</sup> Nach Jesúsen' gože' legaque':

—Bene' migw chia' ħnono bel' chdole'le'?

Na' gose'ene':

—Nono chdole'to'.

<sup>6</sup> Nach gože' legaque':

—Le gwzala' yixjw bel' chelen' cuit barcon' lichale na' senlba'.

Nach bosozala' yixjw bel' chegaquen', na' tantw be zan besedoła', bi gosezoede' yosyocuen' lo' barcon'. <sup>7</sup> Nach ben' chaquehgüe' Jesúsen' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xala-

nen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsen'.<sup>8</sup> Na' yezica'chle bene' ca' zja'aclene' barcw daon' zjanxobe' yixjw gan' že' bel' ya'a ca'. Bi naquen zito' cho'a nesdaon', ca do yeto gayoa metrže.<sup>9</sup> Na' cate' besyežine' cho'a nesdaon' besele'ede' chi' yi' ya'alj na' xoa bel' ya'a lagienna' na' len yetextil.<sup>10</sup> Na' Jesúsen' gože' legaque':

—Le yeyoxe' ngale to chope bel' ya'a ca' za' gw Xenle.

<sup>11</sup> Na' Simón Pedron' gweje' jaxi'e yixjw belen' gan' chi' barcon' na' bexoben' ga nac yo biž. Žen' to gayoa ši'ineyon bel' xen, perw bi bcheza' yixjon' la'czla' be zan gwže' lo'enna'.

<sup>12</sup> Na' Jesúsen' gože' legaque':

—Le da gagwle xsil.

Na' ne toe' bi besyeyaxjde' ye'ene': “¿No le'?” , le ba gosacbe'ede' naque' Xanchon'.<sup>13</sup> Jesúsen' gwbigue' na' gwxi'e yetextilen' na' bnežjue' che to toe' na' lecz ca' bene' len bel' ya'an.

<sup>14</sup> Da'na' goc da' gwyon ni'a blo'elao Jesúsen' bene' ca' zjanaque' le' txen gwde bebane' ladjo bene' guaten'.

### Jesúsen' be'lene' Simón Pedron' diža'

<sup>15</sup> Na' cate' besyedagi'e, Jesúsen' gože' Simón Pedron':

—Simón xi'in Jonás, ¿chaquechdo' neda' clcl can' chesaque bene' quinga neda'?

Pedron' boži'en gože'ne':

—Xana', nezdo' chacda' le'.

Jesúsen' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

<sup>16</sup> Na' da' gwchop ni'a gože' le':

—Simón xi'in Jonás, ¿chacdo' neda'?

Na' da' yoble gwna Pedron':

—Xana', le' nezdo' chacda' le'.

Jesúsen' gože'ne':

—Bgiia gwna' bene' ca' chesejnilaže' neda', bene' ca' zjanac ca xila' chia'.

<sup>17</sup> Da' gwyon ni'a gož Jesúsen' le':

—Simón xi'in Jonás, ¿chacdo' neda'?

Na' Pedron' gocyaše'de' dan' gož Jesúsen' le' ca' da' gwyon ni'a, na' gože' le':

—Xana', le' neze nle'edo' yogo'lol. Nezdo' chacda' le'.

Jesúsen' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'.<sup>18</sup> Da' li' chnia' le', cate' goco' bene' güego', cuino' gwyaz xalanon' na' gwejejo' con ga žan chio'. Perw cate' gaco' bene' gole, gwli' naon' na' bene' yoble chize' xalano' na' yech'e le' ga bi chaclažo'.

<sup>19</sup> Gože'ne' ca' cont gwnezde' can' gacxen Diozen' len da' gac che' cate' žin ža gate'. Na' gwde gwna Jesúsen' can' gac che Pedron' nach gože'ne':

—Con gwejnilaže' neda' na' bzenag chia'.

### Can' gwna Jesúsen' che ben' chacchgüede'

<sup>20-22</sup> Na' yeto bene' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana', ¿nac gac che benga?

Jesúsen' gože'ne':

—Še chaclaža' ne' zoacze' cate' yida' yeto ¿bin' chacžejlažo'? Con gwzoateze gwejnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagi'e xše' žen' cate' za' gac Jesúsen' lo' na' bene' ca' chesegue'ede' le'. Na' cana' bena' gwñabde'ne': “Xana', ¿noxen' gwdie' le' lo' na' bene' ca'?”

<sup>23</sup> Na' dan' gož Jesúsen' Pedron': “Še chaclaža' ne' zoacze' cate' yida' yeto ¿bin' chacžejlažo'?”, da'nan' gwditj diža' len bene' ca' chesejnilaže' Criston' gosene' bi gat bena'. Perw Jesúsen' gague gože'ne'

bi gate', san gože'ne': "Še chaclaža' ne' zoacz benga cate' yida' yeto, ¿bin' chacžejlažo'?"

<sup>24</sup>Nedan' nezda' can' goc yogo' da' quinga na' da'nan' ba bia' diža' čhegaquen na' ba bzojan'. Na' lecze le'e nezczele choa' diža' li.

<sup>25</sup>Na' da' zanch da' ben Jesúsen' da' bi zjanyojen, le ša zjanyoj yogon' tgüje tgüjejen, libr zan juisyw yesaquen še ca'.

Da' na'ze chzoja' na'a.

## DA' GOSON POSTLW CA'

### Jesúsen' gwne' sele' Spiritw che Diosen'

**1** Teófilo, ca nac dan' bzoja' da' nechw, bzoja' yogo'lo' da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede' <sup>2</sup>žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. <sup>3</sup>Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenezde' mbanczen'. Na' gwdalene' legaque' choa ža na' bzejni'ide' legaque' can' chnabia' Diosen'.

<sup>4</sup>Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e.

<sup>5</sup>Da' zaque' ben Juan da' bzoe' bene' nis, perw yeto chope ža da' zaca'ch gac chele dan' yedeso' Spiritw che Diosen' lo' yichjlažda'olen' nabi'an le'e.

### Jesúsen' beyepe' yaban'

<sup>6</sup>Na' ža na'teže šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo' na' bene' zito' ca'?

<sup>7</sup>Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. <sup>8</sup>Perw na' cate' yedeso' Spiritw che'na' len le'e, gaclenen le'e len yela' guac chenna' cont gü'e'le xtižan' ciuda Jerusalén ni, na' doxen ga mbane distritw Judean', na' distritw Samarian', na' doxen yežlion'.

<sup>9</sup>Beyož gwna Jesúsen' ca', chesena'te bene' ca' chesejnilaže' le', beyepe' yaba to lo' bejw na' bich besele'ede' le'. <sup>10</sup>Na' ne' chesena'te bene' ca' le'e yaban' gan' besele'ede' beyepe', cate'cze gosache'ede' ba zjazeera chope angl len legaque' bene' zjanyaz lache' šiš. <sup>11</sup>Na' bene' ca' chope gose'e' legaque':

—Bene' Galilea, žbixchen' chna'le le'e yaban'? Can' ble'e'le beyep Jesúsen' yaban' caten' bechoje' ladjwlen', can' le'eczele yide' da' yoble.

### Gosebeje' Matías cont goque' postlw laz Judasen'

<sup>12</sup>Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža che Dios can' ža ley che bene' Israel ca'. <sup>13</sup>Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' cuart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. <sup>14</sup>Na' gosenita'teže postlw ca' šnej choso' güiže' Diosen' txen len bene' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

<sup>15</sup>Na' ca' hora' Pedroa' zech'e' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

<sup>16</sup>—Bene' migw, Spiritw che Diosen' benen cont rey David bzoje' na' be'e diža' che Judasen' ben' gwche' bene' ca' gosezen Jesúsen' gan' jasešague' le'. Na' benen byen goc can' nyoj Xtiža' Diosen'. <sup>17</sup>Judasen' goque' txen len neto' na' bene' txen len neto' yogo'lo' dan' gwyo'o lo' na'to' bento'. <sup>18</sup>Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen'

lo na' bene' ca'. Perw na' blažoe' cosyichj gan' goladite' na' gošj li'ena', doxen xjaloen' bchoj. <sup>19</sup>Yogo' bene' že' Jerusalénna' gosenезде' can' goc chen' na' da'nan' bososi'e yežlion' Acéldama na' xtiža'gaque'na' zejen Yežlio Chen. <sup>20</sup>Goc can' nyoj to salmo žan:

Liže'na' gaquen to yo'o daš, nono soa na'. Na' lecze nyojen žan:

Na' te bene' yoble yolane' žin dan' bene'.

<sup>21</sup>'Na' nga nita' bene' ba gosone' txen len chio' šlac gwдалen Xancho Jesúsen' chio'. <sup>22</sup>Ba gosone' txen gwzolaoten cate' da' Juan bzo'e le' nis bžinten caten' beyepe' yaban', na' cheyała' cuejcho toe' gone' txen len neto' postlw güe'to' diža' can' beban Xancho Jesúsen' ladjo bene' guat ca'.

<sup>23</sup>Na' gosebeje' chope bene', toe' José ben' le Barsabás, na' lecz le' Justo, na' ben' yeto Matías. <sup>24-25</sup>Nach bosol güiže' Diosen' gose'ene':

—Xanto', le' nombi'o yichjlaždao' yogo'lol bene'. Lao bene' ca' chope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca' nac Judasen', gwlejyichje' dan' ngo'o lo ne'e gone' na' ba zjajde' gan' naquen yeyeje' yela' güen da' mal che'na'.

<sup>26</sup>Nach gosone' rifa cont gosenезде' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

**Can' goc cate' bla' Spiritw che Diosen'**

**2** Na' bžin ža lni dan' že' Pente-costés, na' postlw ca' na' yogo'lol bene' ca' ba gosejnilaže' Jesúcrison' zjandop zjanžague' toze latje. <sup>2</sup>Na' zezenez goc to ššag le'e yaban' ca' ššag che to be' bdonon' gual na' nenxeje lo' yo'o gan' zjachi'ena'. <sup>3</sup>Na' besele'ede' galaže yichj to toe' gosezoa tğueje yi' bel da' čala'nin. <sup>4</sup>Ca' goc jašo'o Spiritw

che Diosen' lo' yichjlaždao' to toe', na' Spiriton' benen cont gosezolaği'e goso'e gwde gwdele diža' da' gosejni'i bene' zito' ca'.

<sup>5</sup>Na' ca' tiempen' bene' zan bene' Israel že' Jerusalénna' bene' chesonxene' Diosen', za'aque' doxen yežlion'. <sup>6</sup>Na' cate' gosende' chac ššaguen' gan' že' postlw ca', zan bene' Israel ca' bešežague', na' leca besyebande', le to to postlw ca' bosozejni'ide' legaue' len diža' da' chesejni'i to toe'. <sup>7</sup>Bi gosejni'ide' bin' chac na' besyebande' gosene':

—¿Gague bene' distritw Galilea bene' quinga? <sup>8</sup>¿Nacxečen' to tocho chenecho cheso'e diža' can' cheso'e bene' gualaž checho diža'? <sup>9</sup>Balcho naccho bene' nación Partia, na' balcho bene' nación Media, na' balcho bene' nación Elam, na' balcho bene' distritw Mesopotamia. Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia, <sup>10</sup>yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, balcho goljcho naccho bene' Israel na' yebałcho ben cuincho txen len bene' Israel. <sup>11</sup>Na' balcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho cheso'e bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

<sup>12</sup>Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

<sup>13</sup>Na' yebałe' goseneye'e gosene':

—¡Bene' quinga chesezožde'!

**Diža' dan' be' Pedroa' len  
bene' Israel ca' besežag**

<sup>14</sup> Na' Pedroa' gwzeche' lao ben' zjan-dop zjanžague' txen len postlw ca' yešnej na' be'e diža' zižje gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. <sup>15</sup> Bene' lježa' quinga bitw chesezožde' can' chaquele, le ne' nac tempran. <sup>16</sup> Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

<sup>17</sup> Cate' ba zoa žin ža cont yeyož yežlion', neda' Dios gona' cont Spiritw chian' yedesoan len bene' že' doxen yežlion'.

Na' gona' cont xi'inle ca' yeso'e xtiža'na', na' bene' byo xcuide' ca' yesele'edagüede' bi da' gona',

na' güe'lena' bene' byo gol ca' diža' lo bišgal chegaquen'.

<sup>18</sup> Na' yogo' bene' ca' chesejnilaže' neda', bene' byo na' no'ole,

yedesoa Spiritw chian' len legaque' cont yeso'e xtižan'.

<sup>19</sup> Gona' cont yesele'e benachen' da' zaca' yesyebande' le'e yaban' na' lagüe yežlion',

na' gona' yela' guac chia'na' len chen, len yi' na' len žen da' nac ca' bejw.

<sup>20</sup> Bich gwseni' gwbižen', na' bio'na' yeyaquen xna ca' chen

cate' za' žin ža yida' da' yoble gwnežjua' castigw che yogo' bene' cbi chesejni-laže'nda', neda' naca' Xanle.

Žana' gaquen to ža žialao xen.

<sup>21</sup> Nach note'tez bene' yesenabe' gaclena' legaque',

neda' naca' Xanle yebeja' legaque' lo da' malen'.

Can' gwna Diosen'.

<sup>22</sup> Na' le'e bene' Israel gualaž chia', le gwzenag chia'. Jesúsen' ben' nac bene' yež Nazaret, Diosen' blo'ede' naque'

bene' zaque'. Diosen' bene' cont Jesúsen' bene' yela' guac na' bichle da' zaca' yebanecho can' nezezelen'. <sup>23</sup> Lo yela' neze che Diosen' bin' za' gac, bi'e latje gwzenle Jesúsen' na' bdelene' lo na' bene' mal ca' gosote'ne' bosode'ene' le'e yag cruzen'. <sup>24</sup> Perw na' Diosen' bečhis bosbane'ne' ladjo bene' guat ca', le bi gwzoe yela' gotten' nabian' le'. <sup>25</sup> Quinga bzoj da' rey David xtiža' Jesúsen' cani'te, žan:

Nezda' Xana' Diosen' zoe' len neda' do ža do yel,

na' zoe' chaclene' neda' cont bi chžeba'.

<sup>26</sup> Da'na'na' zoa' mbalaz na' choa' diža' leca chebeda'.

Na' lecze chebeda' nezda' yečhis yosbane' neda' ladjo bene' guat ca' cate' ba gota'.

<sup>27</sup> Dios chia', nezda' bi yocua'ano' neda' gan' že' bene' guat ca',

neca go'o latje gožo' cuerp chia'na', neda' naca' xi'ino' na' nac lažda'oguan' xilaže'.

<sup>28</sup> Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque':

<sup>29</sup> —Bene' Israel, nezecho da' xozxta'ocho rey David gote' na' bosocuaše' le'. Na' nombia'cho ba gan' bosocuaše' le'. <sup>30</sup> Na' da' rey Davin' be'e diža' can' bzejni'i Diosen' le' na' gwnezde' gwlo'o Diosen' da' bali gague

da' te bi gac can' gwne'. Gwnezde' gon Diosen' cont Criston' galje' lo diaža' che' na' nabi'e nación Israelen' can' gwnabia' le'na'. <sup>31</sup> Diosen' bene' cont da' rey Davin' gwnezde' can' gaquen' na' da'nana' be'e diža' che Criston' ben' ba gwseja' Diosen' cont nabi'e. Gwne' Criston' yebane' na' bi yega'ane' gan' že' bene' guat ca' na' neca gožo' cuerp che'na'.

<sup>32</sup> Na' Diosen' bečhis bosbane' Jesúsen' ladjo bene' guat ca', na' yogo' neto' choe'to' diža' nezeto' beyas bebane'.

<sup>33</sup>Na' Diosen' len yela' guac che'na' bene' cont beyep Jesúsen' gan' zoe'na' na' chnabi'e txen len le'. Na' Diosen' bnežjue'ne' Spiritw che'na' can' gwne'. Na' Jesúsen' ba bene' yela' guac nga da' ba benele na' da' ba ble'ele. <sup>34</sup>Gague da' rey Davin' beyep yaban', san da' David bzoje' che Jesúsen' gwne':

Xancho Diosen' gože' Xanan':

“Gwche'edo' cuita' nga nabia'cho txen, <sup>35</sup>na' gona' cont yogo' no chesegue'e le' yosozexjw yichje' yosozenague' chio'.”

<sup>36</sup>‘Da'nan' yogo' chio' bene' Israel cheyala' nezecho Jesúsen' ben' betwle bda'ln'e le'e yag cruz, Diosen' gwleje'ne' cont naque' Xancho' na' naque' Cristo, zeje diža' naque' ben' gwsela' Diosen' nabi'e nación chechon'.

<sup>37</sup>Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose' Pedroa' na' len yezica'chle postlw ca':

—Bene' gualaž, ¿bin' cheyala' gonto'?

<sup>38</sup>Nach Pedroa' gože' legaque':

—To tole cheyala' yetinjele xtoła'le ca' na' soale nis dan' ba chejnilaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'. <sup>39</sup>Xancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez bene' zito', le chnežjuen' yogo' bene' chbeje' cont yesaque' lo' ne'e.

<sup>40</sup>Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

<sup>41</sup>Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon mil bene' gosejnilaže' Jesúsen' na' gosaque' txen len yezica'chle bene' chesejnilaže' le'. <sup>42</sup>Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže'

Jesúsen' na' gose'ej gosagüe' txen na' gosenite' bosol giüiže' Diosen' txen.

### Can' goson bene' ca' gosejnilaže' Criston' da' nechw

<sup>43</sup>Na' yogo'ze bene' besyebande' can' goson postlw ca' da' zan da' güen da' zaca' yebanecho len yela' guac che Diosen'. <sup>44</sup>Na' bene' ba chesejnilaže' Jesúsen' gosaque' toze na' gosone' toze yogo'loj da' zjade chegaque'. <sup>45</sup>Na' gosote' yežlio na' bichle da' zjadede' na' mechw dan' besele'ede' chen goseyisen' lao yogo'lole' con da' beseyaže to toe'. <sup>46</sup>Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz. <sup>47</sup>Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' tža tža Xancho Diosen' bene' cont gosanch bene' ca' gosejnilaže' Jesucriston'.

### Beyac to bene' nxinj ni'e

**3** Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol giüiže' Diosen' yogo' ža. <sup>2</sup>Na' gwzoa to bene' nxinj ni'e ca' goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwñabe' mechw lao bene' ca' chja'ac yodao'na'. <sup>3</sup>Nach cate' bžin Pedroa' len Juan yodao'na' na' ben' nxinj ni'ena' bol giüiže' legaque' yosonežjue'ne' mechw. <sup>4</sup>Nach Pedroa' len Juanna' gosebeze' na' gosenachgüe' le' na' Pedroa' gože'ne':

—Gwña' neto'.

<sup>5</sup>Na' bena' bene' xbab yosonežjue'ne' mechw. <sup>6</sup>Perw Pedroa' gože'ne':

—Bibi mechw chia' de da' gona' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

<sup>7</sup>Na' Pedroa' be<sub>x</sub>oe' ne'e li<sub>ch</sub>a na' bsože'ene', na' gocte gwzeche' na' ni'ena' la' besyeyacten da' gual na' lecz ca' bechj ni'e ca'. <sup>8</sup>Na' cate' gocbe'ede' ba besyeyac ni'en', bxite' ye<sub>l</sub>a' chbe che'. Na' gwyo'e chašil che yodao'na' len legaque' chxite' na' cho'e ye<sub>l</sub>a' choxclen che Diosen'. <sup>9</sup>Na' bene' ca' že' chašilen' besele'ede' can' chde' chxite' cho'e ye<sub>l</sub>a' choxclen che Diosen'. <sup>10</sup>Na' besyeyombi'e le' naque' ben' chbe' ch<sub>n</sub>ab mechw yog'o' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

### Pedroa' be'e xtiža' Diosen' chašil yodaon'

<sup>11</sup>Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yog'o' bene' že' yodaon' besežagsese' chašila' cont jasene'e ben' beyaquen', le besyebanchgüede'. <sup>12</sup>Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, žbixchen' chebanele? žChaquele len ye<sub>l</sub>a' guac cheton' bento' cont beyac benga? žŠe' chaquele beyaque' dan' chonchguato' can' chazlaže' Diosen'? Bi naquen ca'. <sup>13</sup>Dios ben' gosonxen da' xoxxta'ocho Abraham, Isaac na' Jacob, blo'e nac Xi'ine' Jesús'en' bene' zaca' juisyw. Perw le'e bdele Jesús'en' lo' na' justis ca' cont gosote'ne' na' bžonle cate' Pilaton' goclaže' gwsane'ne'. <sup>14</sup>Can' benle len Jesús'en' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gw<sub>n</sub>able bosan Pilaton' to bene' güetw bene' na' bi gw<sub>n</sub>able yosane' Jesús'en'. <sup>15</sup>Na' ca' nac Jesús'en' ben' b<sub>x</sub>e ye<sub>l</sub>a' mban toli tocane, le'na' betwle, perw na' Diosen' bechis bosbane' le' ladjo bene' guat ca'. Neto' ble'eto'ne' na' choe'to'

diža' ba bebane' ladjo bene' guat ca'. <sup>16</sup>Na' chle'ele benga cbi goc se'e na' nombia'ln'e', na' na'a ba beyac ni'ena' len ye<sub>l</sub>a' guac che Jesús'en' ben' chejni-laže'to'. Le da' chejni-laže'to' Jesús'en', da'n'an' besyeyacšagüe' ni'a benga na' ba chle'ele can' beyaquen'.

<sup>17</sup>'Bene' migw, nezda' le'e na' bene' gole blao chele ca' betwle Jesús'en' lagüe bi gwyejni'ile Diosen' gwsele'ne'. <sup>18</sup>Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' cani', bosozoje' che Criston' ben' gwlej Diosen' cont nabi'e. Bosozoje' che' gosene' yosoči yososaca' bene' le'. <sup>19</sup>Da'n'an' le yeyonšca xbab chele na' le yetinje xto<sub>l</sub>a'len' cont Xancho Diosen' gw<sub>n</sub>itlagüen' na' gone' ga soale mbalaz. <sup>20</sup>Nach Xancho Diosen' sele' Jesús'en' yežlio nga yetni'a, ben' gwleje' cani'te cont naque' Cristo checho. <sup>21</sup>Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'. <sup>22</sup>Da' Moisés'en' be'lene' da' xoxxta'ocho diža', gože' legaque': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'. <sup>23</sup>Na' Diosen' gone' yesebiayi' yog'o' bene' ca' cbi yosozenague' che bena' selen', na' bich yesenite' txen len bene' ca' chesonxene' le'." Can' gož Moisés'en' da' xoxxta'ocho ca'.

<sup>24</sup>'Lecz ca' yog'o'lo<sub>l</sub> bene' goso'e xtiža' Diosen' cani', gwzolaozen len da' Samuel na' yog'o' bene' ca' gosedeč, goso'e diža' che da' ca' ba chac tiemp na'a. <sup>25</sup>Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica'chle xoxxta'ole ca', lecz naquen che le'e. Gože' da' Abrahanna': "To bene' galje lo diaža chio' gone' cont bene' že' doxen yežlion' nite' mbalaz." <sup>26</sup>Da'n'an' cate' Diosen' bosbane' Xi'ine'



Criston' ladjo bene' guat ca', zgua'tec gwsele'ne' lao chio' bene' Israel da' go-claže' gaclene' chio' cont to tocho yetin-jecho xtoła'chon'.

**Pedroa' na' Juanna'  
nite' lao bene' gwnabia' ca'**

**4** Ne' chesoe'lente Pedroa' na' Juanna' bene' ca' diža' cate' besežin bał bχoz che bene' Israel ca', na' bene' gwnabia' che ben' chesape' yodao' blao chegaque'na' na' bene' saduceo ca' bene' cbi chesejle'e še yesyeban bene' guat ca'.<sup>2</sup> Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsen'.<sup>3</sup> Na' bene' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi goła' yesone' yela' justis chegaquen' ca' cheyala' že'na', san bosocuezen' beteyoch.<sup>4</sup> Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

<sup>5</sup> Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bzoj da' Moisés, besedop besežague' ciuda Jerusalénna'<sup>6</sup> len Anás ben' naquech bχoz blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech bχoz blaon'.<sup>7</sup> Na' gosone' mandaw jasexi'e Pedroa' na' Juanna' na' cate' ba zjazie' laogaquen' gosenabde' legaque':

—¿No ben lsens chele cont beyonle bene' nxiñjen? o ¿no yela' guac che bchinle beyonlene'?

<sup>8</sup> Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole bene' blao che nación Israel chechon',

<sup>9</sup> chñable nac bento' da' güen beyonto' bena' nxiñj ni'ena'.<sup>10</sup> Le'e na' yogo' bene' gualaž cheyala' nezele Jesucriston' ben' naque' bene' Nazaret bene' yela' guac che' cont beyacšagüe' bengla. Le'e betwle Jesucriston' bda'ln'e' to le'e yag cruz, perw Diosen' bečhis bosbane'ne' ladjo bene' guat ca'.<sup>11</sup> Bi gweyjl'e' che Jesucriston', da'nan' zaca'leble ca' bene' cheson yo'o bene' bi chesazlaže' yej güen da' ba naquen yej squin che yo'ona'.<sup>12</sup> Toze Jesucriston' guac goñe' chio' yela' mban toli tocañe, na' noch no zoa doxen lo yežlion' bene' gac goñe' yela' mban toli tocañe che chio' benačh.

<sup>13</sup> Besyebane bene' gwnabian' can' boži'i Pedroa' na' Juanna' xtiža'gaquen' sin cbi besežebe', le nacbia' zjanaque' bene' yixe' na' bi zjansedteque'. Nach gosacbe'ede' legaquen' ba gosedalene' Jesúsen'.<sup>14</sup> Na' dan' zecha ben' beyaque ni'ena' txen len Pedroa' na' Juanna', bi besyežele bene' gwnabian' bi yesene' chegaque'.<sup>15</sup> Nach bene' gwnabian' besyebeje' postlw ca' chy'ole šlac bosoxi'e legacze' nacle yesone'.<sup>16</sup> Na' bene' gwnabian' gose' lježgaque':

—¿Bi goncho len bene' quinga? Yogo' bene' že' ciuda Jerusalén ni zjanezde' gosone' to yela' guac xen na' bi gac ye'cho bene' bi gosone' yela' guaquen'.<sup>17</sup> Letechoze goncho cont cbi gaslas diža' dan' cheso'ena'. Da'nan' cheyala' ye'cho legaque' gata' castigw chegaque' še yesoe'che' xtiža' Jesúsen'.

<sup>18</sup> Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesúsen' na' noch no yososed yosolo'ede'.<sup>19</sup> Nach Pedroa' na' Juanna' bosyoži'e xtižen' gose'e legaque':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'?<sup>20</sup> Bi gac cuezto' bich güe'to' diža' che da' ba ble'eto' na' ba beneto'.

21–22 Na' da' zan da' gose' bene' gwn-  
 abia' ca' legaque' cont yosošebe'ne'. Perw  
 na' bi beseželde' nacle yesone' legaque'  
 castigw, le bene' zan chesonxene' Diosen'  
 dan' beyac bena' len yela' guac che  
 Diosen'. Ba gwddie' čhoa iz na' ca goljte'  
 bi goc se'e. Nach bososane' Pedroa' na'  
 Juanna'.

**Goseñabde' Diosen' gaclene' yeso'e  
 xtiže'na' sin cbi yesežebe'**

23 Na' Pedroa' len Juanna' cate'  
 bososan bene' gwnabian' legaque'  
 jaya'aque' gan' nita' yezica'chle bene'  
 chesejnilaže' Criston' na' gosoe'lene'  
 legaque' diža' yogo'loł can' gose' bꝛoz  
 gwnabia' ca' na' bene' gole blao ca'  
 legaque'. 24 Na' cate' gosende' dan' gose'  
 Pedroa' len Juanna' legaque', toze can'  
 gosone' xbab na' bosol' güiže' Diosen',  
 gosene':

—Xanto' Dios, len' beno' yaban' na'  
 yežlion' na' nisaon'. Len' beno' benach  
 na' be ca' chesaš na' bica'chle da' zjade,  
 na' len' chnabi'o doxen. 25 Na' le' beno'  
 cont da' rey David bzoje' diža' quinga  
 dan' gož Spiritw chion' le', žan:

Bene' ca' cbi zjanaque' bene' Israel  
 chesase' contr le', Xanto' Dios,  
 perw bicze gac can' chesone' xbaden'.

26 Bene' gwnabia' che nación ca' na' che  
 yež ca'

txen zjanaque' chesone' contr le' Xanto'  
 Dios,

na' contr Xi'ino' Criston' ben' gwseło' cont  
 nabi'e.

27 Na' Xanto' Dios, naquen da' li rey  
 Herodes na' Poncio Pilato na' bene' cbi  
 zjanaque' bene' Israel gosaque' txen len  
 bene' Israel ca' lo ciuda nga. Na' yo-  
 güe' gosone' txen cont gosote' Xi'ino'  
 Jesúsén' ben' nac bene' laždao' xi-  
 laže' juisyw, ben' gwlejo' cont nabi'e.

28 Gosone' can' gwchogbi'o gac dan'  
 bžio' bia' cani'te. 29 Na' na'a Xanto',  
 gwna can' cheson bene' gwnabia' ca', le

chesaclaže' yosošebe' neto' bene' güen  
 žin čhio'. Na' goclen neto' cont bi  
 žebto' güe'to' xtižo'na'. 30 Na' cate' güe'to'  
 xtižo'na' blo'ešca yela' guac che Xi'ino'  
 Jesúsén' bene' laždao' xilaže' juisyon'  
 cont gac yela' guac, na' yesyeyac no bene'  
 chesacšene na' gac bichle da' yesyebane  
 bene'.

31 Na' cate' beyož bosol' güiže' Diosen',  
 Diosen' bene' gwxo' gan' zjandop  
 zjanžague'na' na' Spiritw čhe'na'  
 gwzoachguan len legaque', nach gosoe'  
 xtiža' Diosen' sin cbi besežebe'.

**Gosone' dan' zjade čhegaque' toze**

32 Na' yogo' bene' ca' gosejnilaže'  
 Criston' toz ca gosac yichjlažda'ogaque'.  
 Na' yogo' bi da' zjade čhegaque' goson-  
 en' toze, na' nono gwna: “Chia' da'  
 nga”, o “Chia' da' na”, le naquen che  
 yogo'loł gaque'. 33 Na' postlw ca' len yela'  
 guac xen che Diosen' bosozejni'ide' bene'  
 Jesúsén' bebane' ladjo bene' guat ca'.  
 Na' Diosen' goclenchgüe' legaque' len  
 bi dan' gosone'. 34 Na' bibi goc falt bi  
 da' beseyažje bene' gosejnilaže' Criston',  
 le bene' zjanape' no yežlio o no yo'o  
 gosoten'. Na' mechw dan' besele'ede'  
 che to ton 35 bosonežjuen' postlw ca',  
 na' postlw ca' goseyisen' len bene' be-  
 seyažjden'. 36 Can' ben to bene' Chipre  
 bene' le José. Naque' xi'in' diaža che da'  
 Levin' na' postlw ca' bososi'ene' Bern-  
 abé, zeje diža' ben' cheyonxenlaže' bene'.  
 37 Joséna' bete' to yežlio che' na' mechw  
 dan' ble'ede' čhen bnežjuen' postlw ca'.

**Da' mal dan' goson Ananías na' Safira**

**5** Na' zoa to bene' le Ananías na'  
 no'ol čhe'na' Safira, na' gosote' to  
 yežlio čhegaquen'. 2 Perw na' legacze'  
 bosoxi'e yosonežjue' late'ze mechw dan'  
 besele'ede' čhen na' yes'e postlw ca'  
 doxenenna'. Nach gwyej Ananíasen' na'  
 bnežjue' postlw ca' mechon'. 3 Nach Pe-  
 droa' gože'ne':

—Ananías, ¿bixchen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Chi'o neto' choño' doxen mechon' dan' ble'edo' che yežlion', len ba gwlo'ošagüe'le laten' par cuinle. <sup>4</sup>Chio' yežlion' cate' biña' goton', na' chio' mechon' dan' ble'edo' cate' beton' na' zaco' cont beno' da' chaclažo' len len. ¿Bixchen' benle' da' malen' nac ca'? Gague contr neton' ba benle' benlaže'le, san contr Diosen'.

<sup>5</sup>Nach Ananíasen' cate' bende' xtiža' Pedroa' to gwbiẋze' na' gote'. Na' yogo' bene' ca' gosende' diža' can' goquen' be-sežebechgüe'. <sup>6</sup>Na' besežin to chope bene' xcuide' gan' gwbiẋ da' Ananíasen' na' bosyochele' cuerp chen' to lache' na' besyeyo'ene' ga bosocuaše'ne'.

<sup>7</sup>Na' gwde do šon hor gote' cate' bžin no'ol che'na' na' gwo'e lo' yo'on sin cbi nezde' bin' ba goc che bene' chen'. <sup>8</sup>Na' Pedroa' gože'ne':

—¿To ca'te' ble'ele che yežlion'?

Na' Safiran' gože'ne':

—To ca'te'ten'.

<sup>9</sup>Nach Pedroa' gože' no'olen':

—¿Bixchen' goco' toze len bene' chion' chaquele gonle Diosen' prueba še lede' can' že' bi cheyała' xoayagcho? Cho'a puert nga zjazecha bene' ba bosocuaše' bene' chio'na' na' na'a yeso'e le'.

<sup>10</sup>Na' la' gwbiẋte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach gosone' jasecuaše'ne' cuit da' bene' che'na'. <sup>11</sup>Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

### Gosone' da' zan yeła' guac

<sup>12</sup>Na' postlw ca' gosone' da' zan yeła' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chese-

dop chesežague' txen chašil che yodao' blaona' gan' nzi' Chašil che da' Salomón. <sup>13</sup>Na' yezica'chle bene' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'. <sup>14</sup>Perw na' zane' gosejni-laže' Xanchon' na' gosaque' txen, zan bene' byo na' no'ole. <sup>15</sup>Na' cate' no bene' gosacšende' goseyixjue' legaque' tnez do lo cam do lo yagla', gose-beze' te Pedroa' cont yesечеle' bžin che' na' yesyeyacde' še bi yižgüen' chese'ede'. <sup>16</sup>Na' bene' ca' že' yež da' zjachi' gała'ze ciuda Jerusalénna' ja'aque' zjanche'e bene' chesacšene' na' bene' zjajo'o zjanyaz da' xigüe'. Na' yogo'lole' besyeyacde'.

### Bene' saduceo ca' goseyixjue'

#### Pedroa' len Juanna' ližya

<sup>17</sup>Nach ben' nacch bẋoz blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'. <sup>18</sup>Na' gosezene'ne' na' goseyixjue' legaque' ližya. <sup>19</sup>Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

<sup>20</sup>—Le šja'ac yodao' blaona' na' le güe' diža' len ben' chesežagna' naquen' yesone' cont gata' yeła' mban chegaque' toli tocaņe.

<sup>21</sup>Nach dan' gosende' can' gož anglen' legaque', ja'aque' yodao' blaona' cate' gwye'ni' na' bososed bosolo'ede' ben' zjanžag na'.

Na' ben' nac bẋoz blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. <sup>22</sup>Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'. <sup>23</sup>Gose'e bene' ca':

—Nyeyjwchach ližyan' na' lecze na' nita' soldadw ca' cho'a puerta' chesapen'

perw cate' gwsaljwto' puerten' gague no postlw ca' že' lo' ližyan'.

<sup>24</sup>Na' ben' nacch b̄xoz blao na' bene' gwnabia' che ben' chesap yodaon' na' b̄xoz gole blao ca' cate' gosende' rsonna' besyebande', gosene':

—¿Nac gac da' nga na'a?

<sup>25</sup>Na' šlac chesacžejlaže', bžin to bene' gože' legaue':

—Bene' ca' gwdixjwle ližyan' zjaze' chašil che yodao' blaona' chososed chosolo'ede' bene'.

<sup>26</sup>Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaue' da' besežebe' bene' chosozenag xtiža' postlw ca' še yosožie' legaue' yej. <sup>27</sup>Na' cate' besežin postlw ca' lao bene' gwnabia' ben' nita' chosoxi'a, nach ben' nacch b̄xoz blao gože' legaue':

<sup>28</sup>—Ba bento' mandadw bi güe'le diža' che Jesúsen' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

<sup>29</sup>Nach Pedroa' na' postlw ca' gose'e legaue':

—Nacchen da' žialao xen gwzenagto' che Diosen' cnel ca' che benach. <sup>30</sup>Le'e betwle Jesúsen' bda'ln'e to le'e yag cruz, perw Dios ben' chonxencho na' ben' gosonxen da' xozxta'och'o ca' bečhis bosbane'ne' ladjo bene' guat ca'. <sup>31</sup>Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocane che bene' chesejnilaže'ne'. Na' le'na' chazlaže' gaclene' yogo' chio' bene' Israel yetinjecho xtoła'chon' nach yezi'xene' chechon'. <sup>32</sup>Neto' nezeto' can' ben Diosen' len Jesúsen' na' choe'to' diža' chen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw chen' zoan lo' yichjlaždao' bene' chosozenag che'.

<sup>33</sup>Na' beseža'achgua bene' gwnabia' ca' cate' gosende' can' gož Pedroa' le-gaque' na' gosaclaže' yesote' postlw ca'.

<sup>34</sup>Perw gwzoa to bene' fariseo len le-gaque' bene' le Gamaliel. Chsed chlo'ede' bene' ley dan' bzoj da' Moisésen' na' gosapchgua bene' le' bala'an. Na' Gamalielen' gwzeche' na' bene' mandadw yesechoj postlw ca' chy'ole šlac güe'lene' bene' ca' že'na' diža'. <sup>35</sup>Na' gože' bene' ca' že'na':

—Bene' gualaž, cheyała' goncho xbab nac goncho len bene' quinga cont goncho da' nac güen. <sup>36</sup>Le yosa'laže' can' goc cate' bchoj ben' le Teudas gwne' naque' bene' zaque'. Na' do tap gayoa bene' bosozenag che' na' gosaque' le' txen. Perw na' bžin že' gosot bene' le' na' besyeyaslas ben' gosaque' le' txen, gague bi gocch yesone'. <sup>37</sup>Na' gwdechle ca' tiempen' bosochel'e bał bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' lecze bžin že' gosote'ne' na' bene' ca' gosaque' le' txen lecze besyeyaslas'e'. <sup>38</sup>Na' da'nan' žia' le'e can' chacda' cheyała' goncho, jaseye bene' quinga, bibi gonecho legaue'. Le še chososed chosolo'ede' xbab chegacze', yeniten. <sup>39</sup>Na' še dan' chososed chosolo'ede' naquen che Dios, bibi gac goncho cont cbi gaslasen. Cheyała' gwsaca'cho cont bi tillencho Diosen'.

<sup>40</sup>Na' gosazlaže' bene' gwnabia' ca' can' gož Gamalielen' legaue'. Nach gosaxe' postlw ca' na' goseyine' legaue' na' gosone' mandadw bich yososed yosolo'ede' che Jesúsen' bate'tezechle. Nach bososane' legaue'. <sup>41</sup>Na' ca' nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' bene' le-gaque' neche dan' chososed chosolo'ede' che Jesúsen'. <sup>42</sup>Na' yogo' že' bososed bosolo'ech postlw ca' che Jesucriston'

do liž beṇe' na' cate' chja'aque' yodao' blaona'.

**Beṇe' ca' chesejnilaže' Criston'  
gosebeje' gaže beṇe' goson žin bixjw**

**6** Na' ca tiempen' zej chanch beṇe' ca' chesejnilaže' Jesucriston' na' beṇe' ca' cheso'e diža' griego gwzolao chesežeše', chesene' no'ol güezeb ca' nchiže legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'. <sup>2</sup>Nach postlw ca' šižinw bosyotobe' yezica'chle beṇe' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwswd gwlo'eto' beṇe' xtiža' Diosen' cont chisto' dan' yese'ej yesagw beṇe'. <sup>3</sup>Da'nan' beṇe' migw, le cuej gaže beṇe' lježle, beṇe' zoachgua Spiritw che Diosen' len legaque', beṇe' zjanac beṇe' sina' na' beṇe' cheson da' güen, na' le gon lo na'gaque' yeseyise' dan' yese'ej yesagw beṇe' ca'. <sup>4</sup>Na' neto' soateze soato' yoł güižto' Diosen' na' gwswd gwlo'eto' beṇe' xtižen'.

<sup>5</sup>Na' gosazlaže' yogo' beṇe' ca' na' gosone' can' gose' postlw ca' legaque', na' gosebeje' to beṇe' le Esteban beṇe' chejnilaže'chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás beṇe' ciuda Antioquía ben' bene' txen len beṇe' Israel. <sup>6</sup>Na' bosozoe' legaque' lao postlw ca' na' postlw ca' bosol güiže' Diosen' chegaque' na' gosexoa na'gaquen' yichj beṇe' ca' cont gosezi' lo ne'e žin dan' yesonen'.

<sup>7</sup>Na' beṇe' zanch gosende' xtiža' Xancho Jesucriston', na' zan beṇe' Jerusalenna' gosejnilaže'ne' na' lecze zan bχoz ca' bosozenague' na' gosejle'e xtiže'na'.

**Gosezene' Esteban**

<sup>8</sup>Na' Estebanna' gwzoachgua yela' guac che Diosen' len le' na' Diosen' goclenchgüe' le'. Da'nan' bene' yela' guac na' bichle da' zaca' yesyebane beṇe' lao beṇe' ca' že' na'. <sup>9</sup>Na' zoa to yodao' dan' chesene' Yodao' che Beṇe' ca' Bich Zjanaque' Esclavos. Beṇe' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bał beṇe' ca' gwzolao gosacyože' len Estebanna', <sup>10</sup>perw na' bi besyeželde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'. <sup>11</sup>Nach gosego'oyele' to chop beṇe' cont goso'e diža' güenlaže' che', gosene' Estebanna' gwneye'e che da' Moisésen' ben' bzoj ley che beṇe' Israel ca'. Na' lecze gosene' Estebanna' gwne' diža' ya' che Diosen'. <sup>12</sup>Na' beṇe' ca' gosacyože' che Estebanna' bosota bosone' beṇe' lo ciuda na' beṇe' gole blao che beṇe' Israel ca' na' beṇe' ca' chososed chosolo'ede' ley dan' bzoj da' Moisésen' cont gosaque' toze. Na' ja'acese' gan' zoa Estebanna' na' gosezene'ne' na' goseche'ene' gan' že' beṇe' ca' chesenabia' nación Israelen'. <sup>13</sup>Na' goseyiljue' beṇe' goso'e diža' güenlaže' beṇe' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj da' Moisés. <sup>14</sup>Ba beneto' že' Jesús ben' naque' beṇe' yež Nazaret yochinje' yodao' blaona' na' yoše'e costumbr checho dan' ben da' Moisés mandaw na'ocho.

<sup>15</sup>Na' yogo' beṇe' ca' zjachi' gan' chesone' yela' justisen' gosene'e cho'aloa Estebanna' na' besele'ede' chactiten ca' cho'aloa angl.

**Choe' Estebanna' diža'**

**7** Nach ben' nacch bχoz blaona' gože' Estebanna':

—¿Naquen can' chesena bene' quinga?

<sup>2</sup>Na' Estebanna' gože' legaque':

—Le'e bene' gole na' noteteze bene' gualaž, le gwzenag chia' len to chop da' nia' le'e. Diosen' ben' nac la'zelagüe bene' zaca' blo'elagüe' da' xozxta'ocho Abraham cate' gwzoe' distritw Mesopotamia cate' za' šjasoe' ciuda Harán. <sup>3</sup>Na' Diosen' gože'ne': "Bchoj lažo' na' gwlejšyichj bene' biše' lježo' na' gwyej jaso latje gan' gwlo'eda' le'." <sup>4</sup>Beyož gož Diosen' Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga. <sup>5</sup>Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'. <sup>6</sup>Nach Diosen' gwne' šjasenite' laž bene' zito' tap gayoa iz ga yesaque' esclavos na' yesežaglaochgüe'. <sup>7</sup>Nach Diosen' lecze gože'ne': "Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga." <sup>8</sup>Nach Diosen' gože' Abrahanna' gone' güen len xi'in diaža che'na'. Na' bene' mandadw soa Abrahanna' to señw dan' že' circuncisión, le' na' len bene' byo ca' zjanaque' diaža che', cont gacbia' le chesejle'e che dan' gwna Diosen'. Da'na'na' cate' golje xi'ine' Isaaquen' bzo'e'be' señw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

<sup>9</sup>Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gozezi' bene' nación Egipto le'. Perw Diosen' gwzoe' len Josén'. <sup>10</sup>Na' goclene'ne' len yogo'lo' da' bžaglagüe'. Na' Diosen' bene' cont da' faraón ben' chnabia' Egipton' bebede'

Josén' na' gocbe'ede' naque' bene' sina'. Na' da'nana' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

<sup>11</sup>Na' goc gwbin doxen Egipton' na' lecze can' goc gan' nzi' distritw Canaán na' da' xozxta'ocho ca' bi beseželde' da' yesagüe' na' besežaglaochgüe'. <sup>12</sup>Perw na' bžin ža da' Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw. <sup>13</sup>Na' bechop nia' ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac diaža che Josén'. <sup>14</sup>Na' Josén' bene' mandadw šjasexi'e xagaque' Jacoben' na' yogo'lo' biše' lježe' ca', zjanaque' ca do gayonšino' bene'. <sup>15</sup>Can' goc gwyej Jacoben' jasoe' Egipton' na' Egiptona' gote', na' lecz na' gosat xi'ine' ca' bene' ca' gosac xozxta'ocho. <sup>16</sup>Na' gwdechle besyeyo'e žit benat chegaquen' na' jasecuše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' canite' che xi'in da' Hamor gwdixjuen' mechw.

<sup>17</sup>Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'. <sup>18</sup>Na' ca' chac beža' rey che Egipton' na' rey coben' bi gwnežde' can' goclen Josén' nación chen'. <sup>19</sup>Na' rey nga gwdiljwlaže' bi da' mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na' cont yesatbe'. <sup>20</sup>Na' ca' tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'. <sup>21</sup>Perw na' bžin ža jasecho'onšaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca' xi'ine'. <sup>22</sup>Ca' goquen' bsd da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

<sup>23</sup>Na' choa ize da' Moisésen' cate' gwnan šjane'e bene' Israel gualaž che'

ca'. <sup>24</sup>Na' jale'ede' to bene' Egipto chchi chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'. <sup>25</sup>Bene' xbab gocde' yesacbe'e bene' gualaž che' chaclen Diosen' le' cont yosle' legaque' lo na' bene' Egipto ca', perw bi gosacbe'ede'. <sup>26</sup>Na' beteyo gosedił chopze bene' Israel. Na' bžin da' Moisésen' gocde' gone' cont yesenite' binlo, na' gože' legaque': "¿Bixchen' chdillen lježle le'e nacle bene' gualažze?" <sup>27</sup>Nach ben' nap doła'na' bžigue' da' Moisésen' ca'ale gože'ne': "¿No gwna le' gaco' bene' gwnabia' cont gono' yela' justis cheto'na'? <sup>28</sup>¿Lez chaclažo' goto' neda' can' beto' bene' Egipton' neje?" <sup>29</sup>Na' cate' bene da' Moisésen' can' gož bena' le' nach bxonje' jasoe' nación gan' nzi Madián la'czla' naque' bene' zito' len bene' ca'. Na' bšagne'e na' gwnita' chope xi'ine'.

<sup>30</sup>Na' goc choa iz zoe' na', cate' to angl bene' gwseła' Dios blo'elagüe' le' latje dašen' gała'ze Ya'a Sinaí, yo'o anglen' to lo' yi' bel' chdoljen to lo' yag xis yeše'. <sup>31</sup>Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' chol' güiž Xancho Diosen' le', che'ene': <sup>32</sup>"Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwxiže' catec bžebe', gague cheyaxjde' ne'e. <sup>33</sup>Na' gož Xanchon' le': "Gwłechj xelo'na' cont gapo' neda' bala'an, le' latje gan' zechao'na' naquen' chia'. <sup>34</sup>Neda' ba ble'eda' yela' yaše' yela' zi' da' chde nación chia' Israelen' bene' že' Egipton' na' ba benda' ca chesonyashe'. Da'na'na' gaclena' legaque'. Beda' na'a cont seła' le' Egipton'."

<sup>35</sup>Diosen' gože'ne' ca' la'czla' bene' Israel ca' cbi gosezi'e che', gose'e Moisésen': "¿No gwna le' gaco' bene' gwnabia' cont gono' yela' justis cheto'?" Diosen' gwsele' da' Moisésen' cont

gwnabi'e da' xozxta'ocho ca' na' cont bebeje' legaque' lo na' bene' Egipto ca', na' angl che Diosen' ben' ble'e da' Moisésen' lo' yi' bel' gwzoe' goclene'ne'. <sup>36</sup>Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' Xnan' na' šlac gosenite' latje dašen' choa iz. <sup>37</sup>Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che benan' gwzenagle." <sup>38</sup>Da' Moisésen' gwzoe' len da' xozxta'ocho ca' latje dašen', na' lo Ya'a Sinaí to angl bene' gwseła' Diosen' gože' le' diža' da' zjansa' yela' mban, na' bzoje' dižan' par chio'.

<sup>39</sup>Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'. <sup>40</sup>Na' šlac zej da' Moisésen' lo Ya'a Sinaí, gose'e bene' biše' Aarónna': "Ben da' le'echo da' šejnilaže'cho na' da' cuialao laochto tnez. Le ca' nac Moisésen' ben' bebej chio' Egipton', nono neze bin' ba goc che'." <sup>41</sup>Nach gosone' to me' go'n dao' de oro na' gosote' no beyixe' gosonxene' me' daon', na' gosone' lni che bena' gosone' len ni'a na'gague'. <sup>42</sup>Da'nan' Diosen' gwlejšyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' gosoe' xtiža' Diosen' cani', žan:

Le'e bene' Israel, gague nedan' benxenle caten' betwle beyixe' latje dašen' lao choa iz.

<sup>43</sup>Benle no da' benxenle, na' bia'le yodao' da' chacte chedobe gan' benxenle dan' nzi Moloc, na' bia'le beljon' benxenle dan' nzi Renfán.

Na' dan' ba gwlejšyichje' neda', da'nan' cueja' le'e gan' zoalen' na' seła' le'e nación zito' do gan' nzi Babilonia.

<sup>44</sup> 'Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley čhegaque'na'. Na' gosonen' con can' gož Diosen' da' Moisésen' na' con can' blo'ede' le'. <sup>45</sup> Nach cate' da' Josué gwče'e legaque' gan' ben Diosen' cont goseque'e yežlio čhe beņe' zito' ca', lecze gosoe'yodao' da' chacte chedobe. Na' ne' bosochine' yodaon' bžinten tiemp čhe da' rey David. <sup>46</sup> Na' Diosen' bebede' da' rey Davin', na' da' Davin' goclaže' gone' to yodao' čhe Diosen', Dios ben' lecze benxen da' Jacoben' cani'te. <sup>47</sup> Perw na' da' xi'ine' Salomón benen'. <sup>48</sup> Na' Diosen' ben' chnabia' doxen, bi nacho zoe' lo' yo'o da' chon benachen', san chac can' gwna Diosen' dan' bzoj to beņe' be' xtiže'na' cani', žan:

<sup>49</sup> Neda' zoa' yaba chnabia', na' guac gona' con bi chazlaža' lo yežlion'.

Na' čchaquele gonle to liža'na'?  
Neda' bi chyažjda' yo'o ga yezi'laža'.

<sup>50</sup> Neda' bena' yogo'te da' zjade.

<sup>51</sup> 'Dan' bi chzenagle, dan' bi chejle'le lo' lažda'olen' nacchgual beņe' güedenag can' gosac da' xozxta'ocho ca'. Bicze chzenagle čhe Spiritw čhe Diosen'. <sup>52</sup> Da' xozxta'ocho ca' lecze bosochi bososaque' beņe' ca' gosoe' xtiža' Diosen' cani', na' gosote' legaque' caten' gosoe' diža' can' seļa' Diosen' Xi'ine' ben' nac beņe' güen juisyw. Na' cate' bide', le'e bdelne' lo' na' beņe' ca' gosote'ne' na' le'e napple doļa' dan' gosote'nen'. <sup>53</sup> La'czla' nombia'le ley dan' bosonežjw angl' ca' da' Moisésen', bi chzenagle čhen.

### Gosote' Estebanna'

<sup>54</sup> Na' cate' Esteban' gože' legaque' ca', beselocchgüe' gosagwxejte laye'. <sup>55</sup> Perw na' Esteban' gwzoachgua Spiritw čhe Diosen' len le', bcos lagüen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesúsén'

cuit Diosen' chnabi'e txen len le'. <sup>56</sup> Nach Estebanna' gwne':

—Le našč nla'xeje yaban' na' nla' Jesúsén' ben' golje' beņač zeche' cuit Diosen' chnabi'e txen len le'.

<sup>57</sup> Nach beņe' ca' zjanžaguen' leca beseloque' na' bososya'adie' na' bososejyw naggaque'na' na' to ši'ize ja'acsese' gan' ze Estebanna'. <sup>58</sup> Nach gosebeje' Estebanna' cho'a yež na' bosožie'ne' yej. Na' beņe' ca' bosožie' le' yejen' bosonežjue' xagaque' da' zjandobe' to beņe' xcuide' beņe' le Saulo cont gapen'. <sup>59</sup> Na' šlac chosožie' Estebanna' yej, Esteban' bol güiže' Diosen', gwne':

—Xana' Jesús, bezi' neda' yaban'.

<sup>60</sup> Nach bzoa xibe' lo' yon' na' gwne' zižje, gwne':

—Xana' bi gono' cuent xtoļa' beņe' quinga dan' chesote' neda'.

Na' beyož gwne' ca', gote'.

### Saulo bchi bsaque' beņe' chesonxen Jesucriston'

**8**<sup>1-2</sup> Na' ca' nac Saulon', gwyazlaže' dan' gosote' da' Estebanna'.

Na' beņe' ca' chesejnilaže' Jesucriston' ciuda Jerusalénna' jasecuashe' da' Estebanna', na' gosebežchgüe' čhe'. Na' gwde gosote' da' Estebanna' gosezolağüe' bosochi bososaque' beņe' ca' chesedop chesežag chesonxene' Jesucriston' Jerusalénna', na' yogo' beņe' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. <sup>3</sup> Na' Saulon' gwzolağüe' cheje' liž to to beņe' ca' chesonxen Jesucriston' chjağobe' no beņe' byo na' no no'ole cont chče'e legaque' ližya.

### Beņe' ciuda Samaria gosende' diža' güen čhe Jesucriston'

<sup>4</sup> Na' beņe' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. <sup>5</sup> Na'



ben' le Felipe bžine' ciuda Samarian' na' be'e diža' che Jesucriston'. <sup>6</sup>Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'. <sup>7</sup>Bebeje' da' xigüe' ca' zjajo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque'na' beyone' legaque', lecze beyone' no bene' nxinj ni'e. <sup>8</sup>Na' besyebechgüe bene' ca' že' ciudan'.

<sup>9</sup>Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e le-gaque' gože'ne' naque' bene' zaque'. <sup>10</sup>Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

<sup>11</sup>Zan iz bosozenague' che', le gwziye'e legaque' len yela' guaža' che'na'. <sup>12</sup>Perw cate' Felipen' gwduxjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole. <sup>13</sup>Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

<sup>14</sup>Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. <sup>15-16</sup>Na' cate' besežine'na' bosol' güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca' hora' biņa' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesús'en'. <sup>17</sup>Nach gosexoa na' postlw

ca' yichjgaque' cont gwzoa Spiriton' lo' yichjlažda'ogaquen'.

<sup>18</sup>Na' ble'e Simón can' cheson postlw ca' chesexoa ne'e yichj bene' cont chzoa Spiriton' len legaque', na' bšabde' le-gaque' mechw. <sup>19</sup>Gože' legaque':

—Le gon cont neda' gac xoa na'a yichj note'teze bene' na' soa Spiriton' len le-gaque' can' chon le'e.

<sup>20</sup>Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. <sup>21</sup>Bi zaco' gono' da' nga chonto', le yichjlažda'oguo' naquen mal lao Diosen'. <sup>22</sup>Da' cheyla' gono', betinje da' malen' chono' na' gwñab goclen lao Diosen' cont yezi'xene' chio' ca' nac xbabem' yo'o lo' yichjlažda'oguo'n'. <sup>23</sup>Nacbia' da' mal dan' yo'o lo' yichjlažda'oguo'n' chnabi'an le' na' ngo'on le' nez malen'.

<sup>24</sup>Nach Simónna' boži'e xtižen' gože' le':

—Le ñab goclen lao Xancho'n cont ne to da' mal dan' bačh gwnao' nga bi' gac chia'.

<sup>25</sup>Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

### Felipe na' bene' Etiopía

<sup>26</sup>Nach Xancho Diosen' gwsele' to angl bene' gože' Felipe:

—Gwey gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

<sup>27</sup>Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwweje' Jerusalénna' jexene' Diosen'. Le' naque'

to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo ne'e mechw che'. Na' no'ole gwnabian' le' Candace. <sup>28</sup> Na' ben' yo'o lo' carreten' chlabe' libr dan' bzoj da' Isaiásen' ben' be' xtiža' Diosen' cani'. <sup>29</sup> Nach Spiritw che Diosen' gožen Felipen':

—Jayxen carreten' na' gwyejlene' txen.

<sup>30</sup> Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaiásen'. Nach gože'ne':

—¿Chejni'ido' dan' chlabo'na'?

<sup>31</sup> Na' bene' Etiopían' boži'e xtižen' gože' Felipen':

—¿Naxce gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

<sup>32</sup> Na' gan' chlabe'na' nyojen žan:

Ca to xila' be nxob bene' cont gote'ba', na' ca to xila' dao' be bi chosya'a cate' chšibe'ba', can' bene', bibi gwne' caten' gosezi' gosebague'ne'.

<sup>33</sup> Na' gosone' le' ca to bene' bibi zaca'. Na' bi gosone' yela' justis che' ca cheyala' gaquen.

Na' nono diaža che' nita', le goseque'e yela' mban che' lo yežlio nga.

<sup>34</sup> Nach bene' Etiopían' gože' Felipen':

—Benšca goclen gwna neda' no chen' ža ben' bzoj Xtiža' Diosen' ca', ¿che cuinen' že' ca' o še che bene' yoble?

<sup>35</sup> Nach Felipen' gwzola'güe' bzejni'ide' bi zejen dan' chlab bene' Etiopían', gože' le' diža' güen che Jesús'en'. <sup>36</sup> Na' ca' chac, besežine' ga žia nis, nach bena' gože' Felipen':

—Nga žia nis, ¿cbi gac soa' nisen' na'a'?

<sup>37</sup> Nach Felipen' gože'ne':

—Še chejnilažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'in Diosen'.

<sup>38</sup> Nach bene' mandadw bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzoe'ne' nis. <sup>39</sup> Na' cate' besyechoje' lo' nisen', Spiritw che Diosen' la' beche'eten Felipen' ga yoble, na' bich ble'e bene' Etiopían' le'. Na' mbalaz beza' ben' beyo'e lo' carreten'. <sup>40</sup> Nach Felipen' bžine' yež dan' nzi' Azoto na' gwzola'güe' gwduxje'ede' diža' güen che Jesucriston' to to yež da' zjachi' gała'ze ga gwdie' bžinte' Cesarean'.

### Diosen' bocobe' yichjlaždao' Saulon'

(Hch. 22:6-16; 26:12-18)

**9** Na' Saulon' con chdacze' cho'e diža' can' chaclaže' gote' bene' chesejni-laže' Xancho Jesucriston' na' chdacze' cheyiljwlaže' nacle gone' gote' legaque'. Na' da'nana' Saulon' gwyeje' lao bxoz blao che bene' Israelen', <sup>2</sup> na' gwnabde'ne' gwzoje' to yiš da' goxe' yosolab bene' že' to to yodao' nita' ciuda Damasco cont yesenezde' nape' yela' gwnabia' sene' bene' ca' ba chesejnilaže' Jesucriston' na' gwcheje' legaque' cont che'e legaque' ciuda Jerusalénna' la'czla' bene' byo o la' no'ole. <sup>3</sup> Cate' beyož bnežjue'ne' yišen' gwlo'e nez, na' ba zoa žine' ciuda Damasc'on' cate' zejzenez to be'ni' da' za' yaban' gwyechjen le'. <sup>4</sup> Na' gwbiže' lo' yon'. Na' bende' che' to bene' le':

—Saulo, ¿bixchen' chchi chsaco' neda'?

<sup>5</sup> Na' Saulon' boži'e xtižen' gože' le':

—¿No le' bene'?

Nach bena' gože'ne':

—Nedan' Jesús ben' chchi chsaco'. Na' dan' chgue'edo' neda', chone zi' cuino' can' chac che to go'n be chlibe lo ya dan' zoa lo carroš cheba'.

<sup>6</sup> Na' do chaž chžebze' gože' le':

—Xana' Jesús, ¿bin' chaclažo' gona'?

Nach Xanchon' gože'ne':

—Beyas na' gweyɛj ciuda Damascon' na' zoa to beɲe' ye'e le' da' cheyaɻa' gono'.

<sup>7</sup>Na' beɲe' ca' zja'aclen Saulon' benit beɲoɻ ɠosac lo' yichjlaʒda'ogaque'na' catec beseʒebe' dan' goquen', le gosende' ši'i beɲe' perw nono besele'ede'. <sup>8</sup>Nach beyas Saulon', perw cate' beɲa' lagüen' con bich ble'ede'. Nach beɲe' ca' nʒague'na' gosoxe' ne'e goseche'ene' Damascon'. <sup>9</sup>Na' šone ʒa gwzoe' sin cbi ble'ede' na' bi güe'ej gwdagüe'.

<sup>10</sup>Na' zoa to beɲe' chejnilaʒe' Xancho Jesucriston' Damascon' beɲe' le Ananías, na' Ananíasen' ble'edagüede' Xancho'. Na' Xancho' goʒe'ne':

—Ananías.

Na' boʒi'e xtiʒen' gwne':

—Nga zoa', Xana'.

<sup>11</sup>Nach Xancho' goʒe'ne':

—Gwzoʒa' na' gweyɛj liʒ Judas dan' zoa cay dan' chesene' Nez Licha, na' nabo' to beɲe' le Saulo, to beɲe' ciuda Tarso. Ba choɻ güiʒe' neda'. <sup>12</sup>Na' ba bena' cont ble'edagüede' le' gwoyo' gan' zoe'na' na' gwɻoa nao' yejlagüe'na' cont ye'e'ede'.

<sup>13</sup>Nach Ananíasen' boʒi'e xtiʒen' goʒe' le':

—Xana', ba benda' beɲe' zan cheso'e xtiʒa' bena', ca nac da' mal juisyw ba bene' Jerusalén len beɲe' ca' ba gwlejo' cont zjanaque' lo' nao'. <sup>14</sup>Na' chesene' ze'e nga noxe' yiš che bɻoz gwnabia' ca' cont sene' yogo'loɻ neto' chejnilaʒe'to' le'.

<sup>15</sup>Nach Xancho Jesucriston' goʒe' Ananíasen':

—Gweyɛj, le ba gwleja' Saulon' cont šjazejni'ide' xtiʒa' len beɲe' cbi zjanac beɲe' Israel na' len rey chegaque' ca', na' lente le'e nacle beɲe' Israel. <sup>16</sup>Na' gwlo'eda'ne' ca nac da' yaše' da' zi' da' gac che' dan' gwzenague' chia'.

<sup>17</sup>Nach Ananíasen' gweyeje' gan' zoa Saulon' na' gwoyo'e lo' yo'ona' na' gwɻoa ne'e yejlaɻ Saulon', goʒe'ne':

—Beɲe' migw Saulo, Xancho Jesúsén' ben' blo'elagüe' le' tnez gan' za'ona' ba

gwsele' neda' zedena'a le' cont ye'e'edo' na' soa Spiritw che Diosen' len le'.

<sup>18</sup>Nach la' besyeyinjte da' ca' ʒe' lo yejlagüe'n', zjanaquen ca yid bdi'ej, na' la' bele'etede'. Nach gwzoʒe'e cont gweyeje' gan' gwzoe' nisen'. <sup>19</sup>Ca beyoʒa' gwdagüe' na' beyaclaʒe'. Na' bega'ane' Damascon' yeto ɲop ʒa len beɲe' ca' chesejnilaʒe' Xancho'.

### Saulon' be'e xtiʒa' Diosen' Damascon'

<sup>20</sup>Na' la' gwzolaote gweyeje' to to yoda' be'e diʒa' che Jesúsén', gwne' len' naque' Xi'in Diosen'. <sup>21</sup>Na' yogo' beɲe' ca' chesende' xtiʒe' dan' cho'ena' besyebande' na' chese' ljeʒe':

—¿Gague bengan' chda choɻit choɻane' beɲe' ca' chesejnilaʒe' Jesúsén' ciuda Jerusalénna'? na' ¿gague da' na'czen' bide' nga na'a cont gwcheje' beɲe' ca' na' šjasane' legaque' lao bɻoz gwnabia' ca'?

<sup>22</sup>Na' Saulon' tʒa tʒa Diosen' goclene'ne' cont be'e diʒa' che Jesúsén' tcho'a, gwne' Jesúsén' naque' ben' gwseɻa' Diosen' cont nabi'e. Na' beɲe' Israel ca' ʒe' Damascon' bi beseʒelde' bin' yesene', le gosacbe'ede' dan' che'e legaque' naquen da' li.

### Saulon' bi goque' lo' na' beɲe' ca' chesegue'ede' le'

<sup>23</sup>Na' cate' ba goc sša choe'len Saulon' beɲe' Damasco ca' xtiʒa' Jesucriston' nach bosoxi'a beɲe' Israel ca' yesote'ne'.

<sup>24</sup>Na' gosenite' chesape' to to cho'a puert che ze'ena' dan' nyechj ciudan' cont yesezene' Saulon' yesote'ne' bate'teze choje', perw na' Saulon' gocbe'ede' ba zjachi'na'ogüe'ne'. <sup>25</sup>Na' beɲe' ca' chesejnilaʒe' Jesucriston' besyeletje'ne' le'e ze'e dan' nyechj ciudan' šeʒe'le besyegüe'ene' to lo' ʒome cont goc bechoje' lo' ciudan'.

### Gwey Jerusalénna'

<sup>26</sup>Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'. <sup>27</sup>Nach Bernabé gwče'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesúsén' šlac ngü'e nez zeje' Damascon' na' can' goc Xanchon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesúsén' Damascon' sin cbi bžebe'. <sup>28</sup>Nach postlw ca' gosejle'e can' goc che Saulon', na' gwzolao gwdalen Saulon' bene' ca' chesejnilaže' Jesucriston' Jerusalénna'. <sup>29</sup>Na' sin cbi bi chaž chžebe' gwzologüe' chzejni'ide' bene' Israel ca' diža' che Xancho Jesúsén', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'. <sup>30</sup>Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

<sup>31</sup>Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samarian' gosenite' binlo, noch no bosochi bososaca' legaque', na' gosenita'chache' gosejnilaže' Xancho Jesúsén' na' bosozenague' che' do yichj do laže'gaque'. Na' Spiritw che Diosen' benen cont gosacchach laže'gaque' na' benen cont gwyane'.

### Beyac ben' le Eneas

<sup>32</sup>Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gweyje' jane'e bene' ca' že' yež dan' nzi' Lida. <sup>33</sup>Na' yež Lidan' jati'e to bene'

le' Eneas. Ba chac xono' iz de' che'ede', natzi' late' cuerp che'na'. <sup>34</sup>Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. <sup>35</sup>Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr chegaque' cont gosejnilaže' Xancho Jesucriston'.

### Dorcas bebane' ladjo bene' guat ca'

<sup>36</sup>Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'. <sup>37</sup>Perw na' gocšene Dorcasen' na' gottechgüe', na' bosoguazje'ne' na' gosexo'e'ne' to lo' cuart da' zoa yichj yo'o cha'te. <sup>38</sup>Na' gala'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesel'e chope bene' jasata'yoede' Pedroa' gose'ene':

—Benšca goclen yo'o len neto' netec na'a.

<sup>39</sup>Na' Pedroa' la' gwza'te' gweyje' len bene' ca'. Na' cate' besežine' Jopen', goseche'ene' lo' yo'o gan' xoa bene' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis. <sup>40</sup>Nach Pedroa' bešaše' yogo'lol bene' ca' chy'ole na' bzoa xibe' bol güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' bexa'te yejlao da' Dorcasen' gwne'e Pedroa' na' la' bebe'te'. <sup>41</sup>Nach Pedroa' bexue' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo' na' Diosen' na' blo'ede' legaque' ba beban Dorcasen'. <sup>42</sup>Na' yogo'lol bene' Jopen' gosende'

can' goquen', na' beñe' zanch gosejni-laže' Xancho Jesucriston'. <sup>43</sup>Na' Pedroa' bega'ane' Jopen' zan ža, gwzoe' liž to beñe' le Simón, beñe' chonšagüe' yid.

### Pedroa' na' Cornelio

**10** Na' ciuda Cesareana' zoa to beñe' le Cornelio, naque' xan to gayoa soldadw, na' bosozoa la soldadw che' ca' Beñe' Italia. <sup>2</sup>La'czla' Cornelion' cbi naque' beñe' Israel, benxene' Diosen', na' lecze ca' goson beñe' lo' yo'o che', chesezoe' chesape' Diosen' bala'an. Na' Cornelion' chaclenteze' beñe' Israel beñe' chyažj chchine', na' zoateze' chol güiže' Diosen'. <sup>3</sup>Na' goc che', to ža do cheda šone ble'edagüede' to angl beñe' gwseła' Diosen' gwyo'e gan' zoe'na', na' anglen' gože'ne':

—Cornelio.

<sup>4</sup>Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' chol güižo'ne' na' chnežjo' dan' cheseyažje beñe' yaše', na' Diosen' chaclaže' gaclene' le'. <sup>5</sup>Da' nga gono' na'a, gwseła' beñe' šjasexi'e to beñe' zoa ciuda Jopen' beñe' le Simón na' lecze le' Pedro. <sup>6</sup>Zoe' liž to beñe' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyala' gono'.

<sup>7</sup>Cate' beza' anglen' Cornelion' goxe' chope mos che' na' to soldadw beñe' chaclen le', na' soldadoa' lecze chonxene' Diosen'. <sup>8</sup>Na' Cornelion' bzejni'ide' legaque' yogo'lolte can' goquen' nach gwsele' legaque' Jopen'. Na' gosegüe'e nez zja'aque'.

<sup>9</sup>Na' beteyo gała'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiž cont jel güiže' Diosen'. <sup>10-11</sup>Na' šlac choe'lene' Diosen' diža' gw-donchgüe', con goclaže' gagüe' cate. Na'

šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'. <sup>12</sup>Na' lo'enna' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba. <sup>13</sup>Nach bende' gož Diosen' le':

—Gwyas Pedro na' betw be ca' gwdagw.

<sup>14</sup>Nach Pedroa' gože'ne':

—Bi gagua' legacba' Xana'. Ne tni'a biña' gagua' be zban zjanac ca', le cbi de lsens len ley cheto'na' gagwto' ben' zjanac ca'.

<sup>15</sup>Nach Diosen' gože' le' da' gwchope:

—Ben' bač gwnia' gago' bi nao' be zban zjanacba'.

<sup>16</sup>Da' gwyon ni'a gož Diosen' le' ca' nach la' begüete lachen' le'e yaban'.

<sup>17</sup>Šlac chacžejlaže' Pedroa' bi zejen dan' ble'edagüeden', besežin beñe' ca' gwseła' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'. <sup>18</sup>Nach zižje gosenabe' še le na' zoa to beñe' lecze le Simón Pedro. <sup>19</sup>Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone beñe' cheseyiljue' le'.

<sup>20</sup>Gwzoža' na' beyetj cont šejleno' legaque', na' bi gacžejlažo' la'czla' bi zjanaque' beñe' Israel, le neda' gwseła' legaque'.

<sup>21</sup>Nach Pedroa' beyetje' jašague' beñe' ca' gwseła' Cornelion', nach gože' legaque':

—Nga zoa', nedan' Simón Pedro. ¿Bichen' cheyiljwle neda'?

<sup>22</sup>Nach gose' beñe' ca' le':

—To xan soldadw beñe' le Cornelio gwsele' neto'. Le' zejcz'e chone' da' güen na' chonxene' Diosen' na' yogo'lol beñe' Israel ca' cheso'e xtiže' ca beñe' šagüe' naque'. To angl che Diosen' gože' le'

yedenabe' šejo' liže'na' cont gwzenague' chio' še bin' yo'one'.

<sup>23</sup>Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gwejlene' legaque' na' gwche'e to čhope bene' Jopen' bene' chesejnilaže' Jesucriston'.

<sup>24</sup>Na' beteyo cate' besežine' ciuda Cesarean', Cornelion' bach nto'be' biše' lježe' len xmiğüe' ba zjažie' liže'na' chesebeze' le'. <sup>25</sup>Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'. <sup>26</sup>Na' Pedroa' bsože'e le', gože'ne':

—Bezoža'. Lecze benach neda'.

<sup>27</sup>Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo' yo'ona'. <sup>28</sup>Nach gože' legaque':

—Nezeczele ley che neto' bene' Israel žan bi cheyała' šo'to' liž bene' bi zjanaque' bene' Israel, na' žan bi cheyała' gonto' txen len le'e bi nacle bene' Israel. Perw bach bzejni'i Diosen' neda' ne to bene' cbi cheyała' gona' xbab che' naque' bene' zban par šo'a liže'na'. <sup>29</sup>Da'nan' cate' bene' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' nezda' čbixchen' gwnio' neda'?

<sup>30</sup>Nach Cornelion' gože'ne':

—Na'a chac tap ža do cheda šone' zoa' sin cbibi nagua', na' choł giüiža' Diosen' liža' nga, cate'cze ble'eda' to bene' byo lagua'na' nyaze' to lache' da' chgo'oten be'ni'. <sup>31</sup>Nach gože' neda': "Cornelio, ca' nac da' gwñabdo' Diosen', bach bzenague' chen, na' nezde' chnežjo' da' chyažj da' chchine' bene' yaše'. <sup>32</sup>Na' na'a gwseła' to čhope bene' šjasexi'e to bene' zoa' ciuda Jopen' bene' le' Simón Pedro. Zoe' liž to bene' lecze le' Simón, to bene' chonšagüe' yid. Liž ben' chonšagüe' yiden' zoan gała'ze cho'a nisdao'. Na' cate' la' Pedroa' ližo' nga nach güelene' le' diža'." <sup>33</sup>Nach la' gwseła'tia' bene'

ca' bedesexi'e le', na' choxclenteco' bach bido'. Na' nezce Diosen' yogo'to' nita'to' nga gwzenagto' yogo'lołte dan' ba ben Diosen' mandadw nao'.

### Pedroa' be'e diža' liž Cornelion'

<sup>34</sup>Nach Pedroa' gwzolağüe' be'e dižan' gwne':

—Da' li bach nezda' nono nła' bene' nacho nzoa Diosen' le' to šła'aze.

<sup>35</sup>Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' legaque'. <sup>36</sup>Diosen' gwđixjue'ede' neto' bene' Israel guac soato' binlo len le' še šejnilaže'to' Xi'ine' Jesucriston' bene' naque' Xan yogo'loł bene'. <sup>37</sup>Nezele dan' ba goc doxen distritw Judean' dan' gwzolağ distritw Galilean' gwde gwđixjue'e da' Juanna' xtiža' Diosen' na' bzoe' bene' nis. <sup>38</sup>Nezele Diosen' gwleje' Jesús'en' ben' naque' bene' yež Nazaret cont chaclene' chio' benach, na' be'ene' Spiritw che'na' na' yela' chnabia'. Na' gwda Jesús'en' bene' da' güen na' beyone' yogo'loł bene' ca' chsaca'zi' Satanás dan' chnabia' da' xigüe' ca', le Diosen' zoe' len le'. <sup>39</sup>Neto' nezeto' na' choe'to' diža' che yogo' da' güen da' ben Jesús'en' na' dan' bsd blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz. <sup>40</sup>Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesús'en' blo'elagüe' neto'. <sup>41</sup>Gague yogo'loł bene' besele'ede' Jesús'en' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwđagwłento'ne' txen gwde bebane' ladjo bene' guat ca'. <sup>42</sup>Jesús'en' bene' mandadw chixjue'eto' benachen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat. <sup>43</sup>Na' da' ca'

bosozoj yogo' bene' goso'e xtiža' Diosen' canite zjanyojen chesenan note'tez bene' yesejnilaže' Jesucriston', Diosen' yezi'xene' xtoļa'gaque'na'.

**Spiritw che Diosen' gwyo'on  
lo' yichjlaždao' baļ bene' bi  
zjanaque' bene' Israel**

<sup>44</sup> Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'. <sup>45</sup> Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' bene' ca' cbi zjanaque' bene' Israel. <sup>46</sup> Gosacbe'ede' gwyo'o Spiritw che Diosen' lo' yichjlaždao' bene' ca' že' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'. <sup>47</sup> Nach Pedroa' gože' bene' Israel ca' nžaguen':

—Bibi de da' gwžon yesezoa bene' quinga nisen', le nacia' ba zoa Spiritw che Diosen' len legaque' can' zoan len chio'.

<sup>48</sup> Nach Pedroa' bene' mandaw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

**Pedroa' gože' bene'  
Jerusalén ca' can' goquen'**

**11** Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'. <sup>2</sup> Nach Pedroa' beze'e gweyjeche' ciuda Jerusalenna' gan' nita' bene' Israel ben' chesejnilaže' Jesucriston' na' legaque' gosenelagüe' che', <sup>3</sup> gose'ene':

—žBixchen' ba gwejejo' gan' že' bene' cbi zjanaque' bene' Israel na' jatagwleno' legaque'? Malen' ba beno'.

<sup>4</sup> Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

<sup>5</sup> —Šlac zoa' ciuda Jopen' chol güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa'na'. <sup>6</sup> Na' gwna'yana' na' ble'eda' lo'enña' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo yo, na' be žia xil be chaš le'e yaba, na' baļ be ca' zjanacba' be znia. <sup>7</sup> Na' benda' gož Diosen' neda': “Gwyas Pedro, na' betw be ca' gwdagw.”

<sup>8</sup> Nach boži'an gwnia': “Xana', bi gagua' legacba'. Ne tni'aze bina' gagua' be zban zjanac ca', le bi de lsens len ley cheto'na' gagwto' ben' zjanac ca'.”

<sup>9</sup> Na' da' gwchop ni'a Diosen' gwne': “Be bačh gwnia' gago' bi nao' zjanacba' be zban.” <sup>10</sup> Šon ni'a gože' neda' ca' nach begüe lachen' le'e yaban'.

<sup>11</sup> Za' beyož ble'edagüeda' da'na' cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'. <sup>12</sup> Na' Spiritw che Diosen' bzejni'in neda' cheyaļa' ša'alena' legaque' sin cbi gacžejlaža', na' gwchi'a bene' lježcho quinga xop, gweyjt'o Cesarean' bžinto' liž ben' le Cornelio na' gwyo'oto' ližen'. <sup>13</sup> Nach Cornelion' be'lene' neto' diža' can' blo'elao to angl le' liže'na' na' anglen' gože'ne': “Gwsela' bene' šja'ac ciuda Jopen' šjasexi'e to bene' le Simón Pedro. <sup>14</sup> Bena' ye'e le' len bene' lo' yo'o chio' nac gonle cont gata' yela' mban chele toļi tocaņe.”

<sup>15</sup> Nach cate' gwzologua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'. <sup>16</sup> Nach jaysa'laža' xtiža' Xancho Jesucriston' can' gwne': “Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e.” <sup>17</sup> Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže'

Ḫancho Jesucriston' can' ba bene' len chio' chejnilaže'chone', na' ħnox naca' neda' gwžona' gon Diosen' dan' chaclaže' gone'?

<sup>18</sup> Na' ca beyož bosozenague' xtiža' Pedroa' bich bi gosene' che Pedroa' dan' gwyeje' liž Cornelion', san goso'e yela' choxclen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetinjde' xtola'gaque'na' cont gwnežjue' yela' mban chegaque' toli tocan.

### **Bene' ca' chesonxen Jesucriston' ciuda Antioquía gan' mbane Siria**

<sup>19</sup> Na' gwde gosot bene' Israel ca' Estebanna', gosezologüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosaslase'. Baļe' ja'aque' do distritw Fenicia, na' yež ca' zjachi' to lo yežlio da' žia lo' nisaon' gan' nzi' Chipre na' do ciuda Antioquía ga mbane distritw Siria. Na' gan' zja'aquen' bososed bosolo'ede' con bene' zjanac bene' Israel xtiža' Jesúsēn', bi bososed bosolo'eden' bene' cbi zjanaque' bene' Israel. <sup>20</sup> Perw na' to chope bene' Chipre na' bene' ciuda Cirene lecze bosoxonje' ja'aque' ciuda Antioquían', na' gosezologüe' goseyixjue'ede' diža' güen che Ḫancho Jesucriston' len bene' ca' cbi zjanaque' bene' Israel. <sup>21</sup> Na' Ḫancho' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Ḫancho'.

<sup>22</sup> Na' cate' bene' ca' chesejnilaže' Jesucriston' ciuda Jerusalēnna' gosende' can' ba chac ciuda Antioquían', nach bosose'e Bernabén' cont gwyeje' Antioquían'. <sup>23</sup> Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebechgüede'. Nach gwneyoede' legaque' nita'chache'

yosozenague' che Ḫancho' do yichj do laže'. <sup>24</sup> Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

<sup>25</sup> Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'. <sup>26</sup> Na' gosenite' Antioquían' tgiiz gosone' txe len bene' Antioquía ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquía na'tequen' gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

<sup>27</sup> Šlac nita' Bernabén' na' Saulon' lo ciuda Antioquían', besežin baļ bene' Jerusalén ben' chosozende' bene' bi dan' ba gož Diosen' legaque'. <sup>28</sup> Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'. <sup>29</sup> Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseseļen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'. <sup>30</sup> Na' gosone' can' bosoxi'ena' nach goseseļe' Saulon' len Bernabén' distritw Judean' jasenežjue' mechon' bene' ca' chosogüia chesene'e bene' chesejnilaže' Jesucriston' ciuda Jerusalēnna'.

### **Gosote' Jacobon' na' goseyixjue' Pedroa' ližya**

**12** Na' ca tiempa' rey Herodes bchi bsaque' baļ bene' ca' chesonxene' Jesucriston'. <sup>2</sup> Nach bene' man-



dadw gosote' Jacobo bene' biše' Juanna' len spada. <sup>3</sup>Na' gocbe'e rey Herodesen' chesyebē bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüē' yetextil dan' bibi levadura nchixen. <sup>4</sup>Nach Herodesen' gwduxjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lnin' cont gone' yela' justis che' lao bene' že' lo ciudan'. <sup>5</sup>Soldadw ca' gosapchgüē' Pedroa' šlac de' ližyan', perw na' ca' nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

### Diosen' bebeje' Pedroa' ližyan'

<sup>6</sup>Na' to že' ca' gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'. <sup>7</sup>Cate'cze zejenez to angl bene' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'. <sup>8</sup>Nach gož anglen' le':

—Bego'o xpanto' na' boleh xelon'.

Nach ben Pedroa' ca'. Nach gož anglen' le':

—Bechele xadon chio' na' beyo'o len neda'.

<sup>9</sup>Nach bechoj Pedroa' zena'ogüē'ne' perw bi gocbe'ede' še da' li anglen' chon ca' len le', con godde' še chle'edagüede'. <sup>10</sup>Beyož besyēdie' chop cuen gan' nita' soldadw ca' chesape' ližyan', besyēžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'.

<sup>11</sup>Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque bene' Israel gualaž chia' ca' yesonde' neda'.

<sup>12</sup>Na' ne' chonte Pedroa' xbaden' ca', gwze'e gwyeje' liž María xna' Juan ben lecze le Marcos. Na' liž Marian' zjandop zjanžag bene' zan chosoļ güiže' Diosen'.

<sup>13</sup>Nach bsiže' cho'a puert zaguanna' na' la' bchojte to bi' no'ole le Rode jana'be' non'. <sup>14</sup>Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyejesbe' gan' že' bene' ca' jayežbe' legaque' ba bla' Pedroa'. <sup>15</sup>Nach gose'ebe':

—¿Gague chactonto'na'?

Perw lebe' nezczebe' le'na'. Nach legaque' gose'ebe' naquen bxin che'.

<sup>16</sup>Perw Pedroa' ne' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'.

<sup>17</sup>Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle bene' lježgaque' can' ba goquen'. Nach beze'e zjayde' ga yoble.

<sup>18</sup>Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

<sup>19</sup>Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

### Got rey Herodesen'

<sup>20</sup>Ca horan' Herodesen' chža'achgüē' bene' ciuda Tiro na' bene' ciuda Sidón

ca'. Perw na' bene' ca' beseyažjde' yesezi'e da' yese'ej yesagüe' gan' chn-  
 abia' rey Herodesen'. Da'na'na' bosocode'  
 ljež bene' Tiro na' bene' Sidón ca' cont  
 jasenežjue' mechw che ben' nac lo ne'e  
 gan' mbane Herodes, ben' le' Blasto.  
 Gosone' ca' cont Blaston' gwne' che-  
 gague' lao reyen', le gosaclaže' gwzenag  
 reyen' chegague' cate' šja'aque' lagüe'na'  
 šjasenabe' yesenite' binlo len le'. <sup>21</sup> Nach  
 rey Herodesen' bžie' bia' to ža gwtobe' le-  
 gague' cont güe'e diža' laogaque'na'. Na'  
 cate' bžin žan', reyen' gwyaz xalane' dan'  
 nac xdan dan' chaze' cate' chone' yela'  
 justis, nach gwchi'e xišne'e gan' chn-  
 abie' na' be'e diža' lao bene' ca' že' žana'.

<sup>22</sup> Nach bene' ca' bososye'e, gosene':

—Diosen' choe' diža', gague' benachen'.

<sup>23</sup> Na' lo hora' gwsela' Xancho Diosen'  
 to angl ben' ben' cont gocšene reyen'  
 gwže'e bzoga' lo' le'e na' gote'. Goc che'  
 ca' dan' be'e latje gosonxen bene' le'  
 gualaz da' yesonxene' Diosen'.

<sup>24</sup> Perw ca' nac xtiža' Xancho Jesu-  
 criston' gos gwlaļjchguan.

<sup>25</sup> Na' Bernabén' len Saulon' beyož  
 gosone' yogo' da' cheyaļa' yesone'  
 ciuda Jerusalénna', nach besyeya'aque'  
 jaya'aque' ciuda Antioquían'. Na'  
 goseche'e to bene' le' Juan na' lecze lie'  
 Marcos.

**Bernabén' na' Saulon' ja'aque'  
 jasedixjue'ede' xtiža'  
 Jesucriston' yež zito'**

**13** Na' len bene' ca' chesedop  
 chesežag chesonxene'  
 Jesucriston' ciuda Antioquían' zjančixe  
 bene' cheseyixjue'ede' bene' yoble bi da'  
 che' Diosen' legaque', na' zjalen bene'  
 chososed chosolo'ede' xtiža' Diosen'.  
 Na' legaque' zjalie' Bernabé, na' Simón  
 ben' zjansi'e bene' gasj, na' Lucio bene'  
 ciuda Cirene, na' Saulo, na' Manaén. Na'  
 Manaénna' bgole' txen len rey Herodes  
 ben' gwnabia' distritw Galilea. <sup>2</sup> Na' to

ža bene' ca' chesejnilaže' Jesucriston'  
 gosone' gwbas zjandop zjanžague'  
 chesonxene'ne' cate'cze gož Spiritw che  
 Diosen' legaque':

—Le cuej Bernabén' len Saulon'  
 cont yesone' xšina' con gate'teze sela'  
 legaque'. <sup>3</sup> Nach bene' ca' bosol güižche'  
 Diosen' sin cbi zjane'ej zjanagüe', nach  
 gosexoā na'gague' yichj Saulon' len yichj  
 Bernabén', gosone' ca' cont gosegüe'e  
 xšin Diosen' lo' na'gague'. Gwdena'  
 bosose'e legaque'.

**Postlw ca' goso'e xtiža'  
 Jesucriston' Chipre**

<sup>4</sup> Nach Spiritw che Diosen' gwselan'  
 Bernabén' len Saulon' yež gan' nzi' Se-  
 leucia. Na' Seleuciana' goso'e lo' bar-  
 con' cont besežine' Chipre. Na' Chipren'  
 naquen to yežlio dao' dan' chi' lo' nis-  
 daon'. <sup>5</sup> Besežine' yež dan' nzi' Salam-  
 ina gan' mbane Chipren' na' gosezo-  
 lagüe' goseyixjue'ede' xtiža' Diosen' lo'  
 yodao' che bene' Israel ca'. Na' zjanche'e  
 Juan ben' lecze le Marcos cont chac-  
 lene' legaque'. <sup>6</sup> Na' ca' gosaše' gosodie'  
 doxen Chipren' besežine' yež gan' nzi'  
 Pafos. Na' Pafosna' besežague' to bene'  
 guaža' le Barjesús. Naque' bene' Israel  
 na' chxoayague' že' chzende' bi dan' che'  
 Diosen' le'. <sup>7</sup> Barjesúsen' naque' xmigw  
 gobernador ben' le Sergio Paulo. Sergio  
 Paulon' naque' to bene' chejni'ichgüe'.  
 Na' le' goxe' Bernabén' na' Saulon', le  
 goclaže' yosozende' le' xtiža' Diosen'.  
<sup>8</sup> Na' Barjesúsen' lecze bososi'ene' Eli-  
 mas, diža' griego zejen bene' guaža'.  
 Le' goclaže' bi šejle' Sergio Paulo xtiža'  
 Diosen' dan' choe' Bernabén' na' Saulon'.  
<sup>9</sup> Na' Spiritw che Diosen' zoachguan len  
 Saulon' ben' lecze le Pablo, nach bcos  
 lagüen' gwna'chgüe' Elimasen'. <sup>10</sup> Nach  
 gože'ne':

—Naco' xi'in Satanás dan' chnabia'  
 da' xigüe' ca', yela' güexoayag chio'  
 na' yela' bene' mal chio'. Bi chazlažo'

bite'teze da' güen. ¿Bichen' cbi chbezo' chžono' yosozenag bene' diža' li che Xanto' Diosen'? <sup>11</sup> Da'nán' Xanto' Diosen' gone' castigw chio' na' cholo' to tiemp, bi gac le'edo' gwbiža'.

Nach la' gwcholtie', gwde ca to bejw lo yejlagüe'na', nach gwzologüe' chgan chtobe' cheyljue' no goxe' ne'e cont cue' nez. <sup>12</sup> Gobernadores' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

**Pablon' na' Bernabén'  
ja'aque' Antioquian'  
gan' mbane distritw Pisidia**

<sup>13</sup> Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lecze chese'e Marcos gwlejyichje' legaque' beyeje' Jerusalenna'. <sup>14</sup> Na' Pablon' len Bernabén' gosa'aque' yež Perge na' besežine' ciuda Antioquian' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e. <sup>15</sup> Na' ca beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže'le güe'le neyoele bene' quinga, guac nalen na'a.

<sup>16</sup> Nach Pablon' gwzechede' bene' señw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel na' nochle chonxenle Diosen'. <sup>17</sup> Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene'

zito'. Nach Diosen' bebeje' legaque' Egipton' len yela' guac chen'. <sup>18</sup> Na' Diosen' gw dape' yela' chxenlaže' choa iz len da' xozxta'ocho ca' šlac gosaše' latje dašen'. <sup>19</sup> Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio chegaquen'. <sup>20</sup> Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogaše iz bžinte tiemp che da' Samuel ben' be'e xtiža' Diosen' cani'. <sup>21</sup> Nach tiemp che da' Samuelen' da' xozxta'ocho ca' gosenabde' Diosen' gone' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diža che da' ben' le Benjamín ben' gwzoa cani'te. <sup>22</sup> Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': “Chbeda' David xi'in Isai nga, le chaclaže' chone' can' chazlažan' na' chzenague' bite'tez da' chapa'ne'.”

<sup>23</sup> Nach na'a Diosen' ba gwsele' yeto bene' golje' lo diaža che da' rey Davin', ben' le Jesús. Ba gwsele' le' cont gone' chio' bene' Israel yela' mban toli tocanē can' gwne' cani'. <sup>24</sup> Na' cate' bina' solao Jesúsēn' gwsed gwlo'ede' bene', da' Juanna' gw dixe'ede' len yogo' bene' Israel gualaž chechon' cheyala' yesyetingde' xtoła'gaque' na' yesezoe' nis. <sup>25</sup> Na' cate' beyož ben Juanna' dan' yo'o lo ne'e gone', nach gože' bene' ca' chosozenag che': “¿Chonle xbab naca' neda' ben' chbezle seła' Diosen'? Bi naca' bena'. Za' yid bena', na' da' nacchgie' bene' zaca', bi zaca' gona' mandadw che' lechja' no xele'.”

<sup>26</sup> Bene' migw, chio' naccho xi'in diaža che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiža' Diosen' dan' žan gone' chio' yela' mban toli tocanē naquen par chio'. <sup>27</sup> Bene' ciuda

Jerusalén ca' len bene' gwnabia' che-  
gaque' ca' bi gosejli'e gwseła' Diosen'  
Jesúsen', na' bi gosejni'ide' da' ca' zjanyoj  
che' le'e libr dan' bosozoj bene' ca' goso'e  
xtiža' Diosen' cani' la'czła' chosolaben'  
lo' yodaon' yogo' ža che Dios. Na' dan'  
bi gosejni'ide', da'nan' gosechoglagüen'  
yesote' Jesúsen', nach goc can' nyoj che'.  
<sup>28</sup> Na' la'czła' gosenezde' bibi da' mal  
non Jesúsen' cont yesote' le', gosenabde'  
Pilaton' gone' mandadw yesot soldadw  
che' ca' le'. <sup>29</sup> Na' goc che Jesúsen'  
yogo' dan' nyoj che' le'e Xtiža' Dios  
dan' bosozoj bene' ca' gosenita' cani'.  
Na' beyož gote'na' nach besežin bene'  
besyeletje' cuerp che'na' le'e yag cruzen'  
na' bosocuaše'ne'. <sup>30</sup> Na' gwdena' Diosen'  
bechis bosbane' le' ladjo bene' guata'.  
<sup>31</sup> Na' bene' ca' zjanaque' Jesúsen' txen  
cate' gwze'e distritw Galilea cont gwyeje'  
ciuda Jerusalén, legaque' besele'ede'  
Jesúsen' yezan ža gwde bebane' ladjo  
bene' guata', na' legaque' cheso'e diža'  
chen' len yezica'chle bene' Israel.

<sup>32</sup> Na' lencze neto' chyixjue'eto' le'e  
diža' güen cont nezele ba chac da' güen  
dan' gož Diosen' da' xozxta'ocho ca' cani'.  
<sup>33</sup> Ba benen' len chio' naccho xi'in diaža  
che da' bene' ca', dan' bosbane' Jesúsen'  
ladjo bene' guaten'. Na' goc can' nyo-  
jen che' le'e libr dan' nzi' Salmos, na'  
salmo gwchopen' žan: "Le' naco' xi'ina';  
na'aža ba blo'a zoaczo'." <sup>34</sup> Na' Diosen'  
lecze bene' cont nyojen ga yoble che' dan'  
bosbane' le' ladjo bene' guaten' na' gwbat  
gožo' cuerp chen', žan: "Gona' güen len  
le' dołoł can' goša' rey Davin'." <sup>35</sup> Na' nyoj  
yeto salmo žan: "Bi go'o latje gožo' cuerp  
chian' neda' naca' ben' chacchgüedo' na'  
ben' chon xšinon'." <sup>36</sup> Nezecho da' rey  
Davin' gwnabi'e bene' Israel ca' gwnita'  
ca' tiemp chen' can' gwnalaže' Diosen'  
na' beyožen' gote' na' bgaše' len yez-  
ica'chle da' xozxta'ocho ca' na' lecze gožo'  
cuerp chen'. <sup>37</sup> Perw na' Diosen' bos-  
bane' Jesúsen' ben' nyoj Xtižen' žan ca',

na' bi gožo' cuerp chen'. <sup>38</sup> Na' cheyała'  
nezele bene' migw, Jesúsen' ben' choa'  
diža' che', chezi'xene' xtola' note'tez bene'  
chejniłaže'ne'. <sup>39</sup> Bi beyaccho bene' güen  
len Diosen' da' bi benyane'cho can' ža ley  
dan' bzoj da' Moisésen', perw note'tezcho  
chejniłaže'cho Jesúsen', len' ba cheyone'  
chio' bene' güen. <sup>40</sup> Le gwsaca' cont bi  
gac chele can' bosozoj bene' ca' goso'e  
xtiža' Diosen' cani', žan:

<sup>41</sup> Cheyała' gonle xbab, le'e chnelaole  
chia', na' cheyała' yebanele, le gwžin  
ža cuiayi'le.

Neda' Dios gona' to da' yebanele šlac  
mbanle,  
to da' bi šejle'le la'czła' še no chixjue'e le'e  
can' gaca'.

<sup>42</sup> Beyož bzejni'i Pablon' bene' ca'  
že'na' nach besyechoje' lo' yodaon'. Nach  
bene' ca' ba goson cuine' bene' Is-  
rael gosata'yoede' Pablon' len Bernabén'  
yeside' ža che Dios xmanña' yeto cont  
yosozejni'ide' legaque' yelate' che da'  
ca' ba bosozejni'ide'. <sup>43</sup> Nach bene' zan  
bene' Israel len zan bene' ca' ba go-  
son cuingaque' bene' Israel zja'aclene'  
Pablon' len Bernabén'. Nach Pablon' na'  
Bernabén' goseneyoede' legaque' cont  
nita'che' yesejniłaže'che' Diosen' ben'  
chaclen legaque'.

<sup>44</sup> Na' cate' bežag xmanña' ža che  
Dios yogo'lołcze bene' lo' ciudan' be-  
sežag cont bosozenague' xtiža' Diosen'.  
<sup>45</sup> Na' gwnita' bene' Israel bene' bi gose-  
jle' che Jesúsen', na' cate' besele'ede' ba  
nac bene' zan chosozenague' che Pablon'  
na' gosacxi'ede' le' na' gosenelagüe' che'  
na' gosezi'diže' le'. <sup>46</sup> Perw na' Pablon' len  
Bernabén' bi besežebe' san gose'e bene'  
ca' že'na':

—Ba bento' can' gwnalaže' Diosen' na'  
zgua'tec bzejni'ito' le'e nacle bene' Israel  
gualaž cheto'. Na' na'a dan' bi chaclaže'le  
gwzenagle, chonle cont bi gon Diosen'  
le'e yela' mban toli tocanē. Da'nan' na'a  
gwzejni'ito' bene' ca' bi zjanac bene' Is-

rael. <sup>47</sup>Gonto' ca' neche Xanto' Diosen' bačh bene' mandadw gonton', le nyojen žan:

Bačh nzoa' le'e cont co'ole be'ni' čhian' lo' yichjlaždao' bene' ca' bi zjanac bene' Israel,  
cont bene' ca' že' doxen yežlion' yesacbe'ede' guac nitlao xtoła'gaque'.

<sup>48</sup>Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' bene' ca' ba gwlej Diosen' cont gata' yela' mban čhegaque' toli tocañe, legaque' gosejle'e xtiža' Diosen' dan' be' Pablon' len Bernabén'. <sup>49</sup>Can' goc bene' ca' že' doxen distritwna' gosende' xtiža' Xancho Jesucriston'. <sup>50</sup>Perw bał bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo ciudan', na' bosoš'e'e xbab čhegaquen' cont gwzoloa gosone' contr Pablon' len Bernabén' na' bich goso'e latje yesenite' doxen distriton'. <sup>51</sup>Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianna'. Gosone' ca' cont bosolo'ede' bene' ca' chesyebej legaque' malen' chesone' chosolague' legaque'. Nach jaya'aque' yež Iconio. <sup>52</sup>Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw che Diosen' gwzoachguan len legaque'.

### **Pablon' len Bernabén' besežine' yež Iconio**

**14** Na' goquen' Pablon' len Bernabén' besežine' yež Iconion' na' ja'aque' yodao' che bene' Israel. Na' cate' goso'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e che'. <sup>2</sup>Perw na' gwnita' bene' Israel ca' bene' bi gosejle'e che Jesucriston', na' legaque' gosene-lagüe' che bene' ca' chesejnilaže' Je-

sucriston' na' gosone' cont bene' ca' bi zjanac bene' Israel gosezolağüe' be-segue'ede' Pablon' len Bernabén'. <sup>3</sup>Perw na' Pablon' len Bernabén' besyega'ane' šša Iconion' cheso'e xtiža' Xancho Jesucriston' sin cbi besežebe'. Na' Xančhon' blo'e le diža' lin' cheso'e chesene' Diosen' čhadde' beñachen', le be'e legaque' yela' guac cont gosone' da' zaca' yebanecho cont gosaclene' bene'. <sup>4</sup>Na' bene' ca' že' lo yežen' gosaque' čhople, bałe' gosede'e bene' Israel ca' ben' bi gosejnilaže' Jesucriston' na' yebałe' gosede'e Pablon' len Bernabén'. <sup>5</sup>Nach bene' Israel ca' gosone' yela' güexi'a len bene' ca' cbi zjanac bene' Israel na' len justis čhegaque' cont yesone' contr Pablon' len Bernabén' na' yosochele' legaque' yej. <sup>6</sup>Perw cate' gwñeze Pablon' len Bernabén' dan' chesaclaže' yesone' len legaque', bosyoxonje' jaya'aque' yež Lистра na' yež Derbe na' yezica'chle yež ca' zjachi' distritw dan' nzi' Licaonia. <sup>7</sup>Na' lecz goseyixjue'ede' xtiža' Xancho Jesucriston' len bene' ca' že' na'.

### **Bosožie' Pablon' yej šlac zoe' Listran'**

<sup>8</sup>Na' yež Listran' besežague' to bene' golje' nxinj ni'e ca', cate' gocte' bidao' bi goc se'e. <sup>9</sup>Con čhi'teze' chzenague' choe' Pablon' dižan'. Nach Pablon' gwñe'e le' na' gocbe'ede' bena' chejle'e Diosen' nape' yela' guac cont yeyone' ni'en'. <sup>10</sup>Nach Pablon' boł güiže'ne' gože' le' ziže:

—Gwzoža'.

Na' la' gwzoža'te' na' gwzoloa chde'. <sup>11</sup>Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca' beñach.

<sup>12</sup>Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le' Pablon' choe'che' dižan'.

<sup>13</sup> Na' yodao' gan' chesonxene' xangaque' Júpiteren' zoan cho'a yež. Na' b̄xoz che Júpiteren' jaxi'e go'n̄ be ba zjanone' xdan zjanžie' legačba' corona yej. Nach b̄xoza' gwčhe'e bene' zan cho'a yežen' gan' zoa puert che ze'e dan' nyečj yežen' na' goclaže' yesote' go'n̄en' yesonxene' postlw ca'. <sup>14</sup> Na' Pablon' len Bernabén' cate' gosacbe'ede' can' yeson bene' ca', gosečeza' xagaque' dan' bi gosaclaže' yesonxen bene' ca' legaque'. Nach gosodie' gachol̄ bene' ca' gose'e legaque' zižje:

<sup>15</sup> —Bene', ¿bixchen' chonle ca'? Lecz beṇač neto'. Za'to' cont chyixjue'eto' le'e cheyał̄a' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli to-cane. Le' bene' yaban', yežlion', nisdaon', beṇač, be ca' chesaš na' bite'tezechle da' chle'echo le'e yaban', lo yežlion' na' lo' nis. <sup>16</sup> Cani' Diosen' bi bžone' gon beṇačen' bite'tez da' mal da' žan yesone'. <sup>17</sup> Perw zoacze' chone' da' güen len yogo' beṇač cont yesenezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

<sup>18</sup> Na' la'czł̄a' Pablon' len Bernabén' gosene' yogo' da' ca', cane gosezoede' bosožone' yesot bene' Listra ca' go'ṇna' yesonxene' legaque'.

<sup>19</sup> Nach besežin bał bene' Israel bene' nita' yež Iconio na' ciuda Antioquía dan' chi' distritw Pisidian', na' bene' ca' gosego'oyele' bene' Listra ca' cont gosaque'ne' txen bosocbele' Pablon' yej. Na' cate' gosone' xbab bač gote' nach gosoxobe' le' cho'a yeža' na' bosy-ocua'ane' le' na'. <sup>20</sup> Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

<sup>21</sup> Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. <sup>22</sup> Na' to to yež gan' ja'aque' gosone' chač laže' bene' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. <sup>23</sup> Na' to to yež ga besyedie' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol̄ güiže' Diosen' gosenabe' gaclen Xancho Jesucriston' bene' ca' ba chesejnilaže' le'.

#### **Pablon' len Bernabén' jaya'aque' Antioquía gan' mbane distritw Siria**

<sup>24</sup> Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. <sup>25</sup> Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia. <sup>26</sup> Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le' bene' Antioquíanan' gesele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' bene' xtiže'na'. Na' na'a besyežine' ba beyož gosone' dan' gosego'o bene' ca' lo na'gaque' yesone'. <sup>27</sup> Na' bosyotobe' bene' ca' chesonxene' Jesucriston' na' gose'ene' yogo'lol̄ can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzola' chesejnilaže' Jesucriston'. <sup>28</sup> Na' besyega'ane' Antioquían' sša len bene' ca' chesonxene' Jesucriston'.

**Gosone' yela' güexi'a len bene'  
ca' že' ciuda Jerusalénna'**

**15** Na' šlac Pablon' len Bernabén' ne' nite' ciuda Antioquían' besežin to čhope bene' za'ac distritw Judean' na' gosezologüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyała' yesezoe' seńw dan' že' circunciśion can' že' ley dan' bzoj da' Moisésen' cont gata' yela' mban čhegaque' toli tocane. <sup>2</sup>Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosečhoglagüen' šja'ac to čhope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i bene' ca' za'ac distritw Judean'.

<sup>3</sup>Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'aquen' gosodie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebeghüede' gosende' dižan'.

<sup>4</sup>Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'. <sup>5</sup>Nach nita' to čhope bene' Fariseo bene' ba chesonxene' Xancho

Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyała' soe' seńw dan' nzi' circunciśion na' cheyała' gone' can' že' ley dan' bzoj da' Moisésen'.

<sup>6</sup>Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'. <sup>7</sup>Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'. <sup>8</sup>Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw čhen' gwyo'on lo' yichjlaždao' bene' ca' can' ba gwyo'on lo' yichjlažda'ocho'. <sup>9</sup>Toz ca' chon Diosen' len chio' na' len legaque', note'tezcho ba beya' beyibe' lažda'ocho' dan' chejle'cho che Jesúsriston'. <sup>10</sup>Ba chonle contr Diosen' dan' chaquele gwčhile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ocho ca' bi goc yesone' yogo' can' že' diža' gol čheto' ca'. <sup>11</sup>Bi cheyała' goncho ca', le nezecho note'tez naccho, Xancho Jesúsren' čone' yela' mban čhecho toli tocane dan' chacde' chio', gague neče dan' choncho can' že' ley che Moisés.

<sup>12</sup>Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel. <sup>13</sup>Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a. <sup>14</sup>Simón Pedro nga ba bzejni'ide' chio' can' ben Diosen' da' nechw len bene'

bi zjanac bene' Israel cont blo'e chacde' legaque', ba gwleje' bale' cont zjanaque' lo ne'e. <sup>15</sup> Na' dan' goc ca' chotiġen da' ca' bosozoj bene' goso'e xtiža' Diosen' cani', le nyojen žan:

<sup>16</sup> Tena' yida' da' yoble na' gona' cont nabia' xi'in diaža che da' rey David, la'czla' na'a nono xi'in diaža che chnabia',

na' gona' cont soa toe' da' yoble nabi'e.

<sup>17</sup> Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'.

Note'tez bene' naci3n guac yosol giuize' neda'.

<sup>18</sup> Can' gwna Xancho Diosen' cani'te, bene' cont goseneze bene' can' gaquen'.

<sup>19</sup> Na' laguie nyoj Xtižen' žan ca', chacda' neda' bi cheyaġa' gonecho zed bene' ca' bi zjanac bene' Israel bene' ba chesebejyichje' costumbr gole chegaque' na' chesonxene' Diosen'. <sup>20</sup> Con gwzoycho ye'gacchone' bi yesone' txen len bi dan' cheson bene' dan' chesene' naquen che ġ gua'a lsaca' dan' chesonxene', neca yesata'lene' no no'ol cbi nac no'ol chegaque' o bene' byo cbi nac bene' chegaque', neca yesaguie' be chesote' chosošoque' do lba'ba', neca yesaguie' chen che beyixe'. <sup>21</sup> Nabcho bi yesone' da' ca', le cani'te nita' bene' to to yež chosozejni'ide' ley chechon' dan' bzoj da' Moisesen' dan' žan bi goncho da' ca', na' chosolabe' leyna' yogo' ža che Dios.

<sup>22</sup> Nach postlw ca' len bene' chosogüia chesene'e yezica'chle bene' chesonxene' Jesucriston', na' len bene' chesedop chesežag, gosazlaže' can' gwna Jacobon', na' bosoxi'e choj chope bene' lježe' šja'aque' ciuda Antioquian' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'. <sup>23</sup> Na' bosozoje' to cart da' gosoxe' bene' ca' žan:

“Neto' postlw, len bene' chosogüia chesene'e yezica'chle bene' chesonxene' Jesucriston', na' len yogo' bene' chesedop chesežag len neto', chguapto' le'e tiox le'e zoale Antioquian' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'. <sup>24</sup> Ba nezeto' to chope bene' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyaġa' soale señw dan' že' circuncisi3n na' cheyaġa' gonle yogo' bichle dan' ža ley dan' bzoj da' Moisesen'. Bi nezeto' gosa'aque' na' gague mandadw che neto' gose'e le'e ca'. <sup>25</sup> Da'n'an' gwzoato' txen bento' yela' güexi'a gwlejto' chope bene' quinga chselato' gan' zoalen', txen len postlw Pablon' na' len Bernabén', bene' ca' chaquechgüeto'. <sup>26</sup> Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'. <sup>27</sup> Na' chselato' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga. <sup>28</sup> Chazlaže'to' can' bzejni'i Spiritw che Diosen' neto', na' da'n'an' bi gonto' mandadw bichle da' zdebe gonle san da' quinga chaqueto' chonen byen cbi gonġen. <sup>29</sup> Bi gagwle yela' guagw dan' ba bosoxie' lo ġ gua'a lsacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzoyto' le'e cart nga. Diosen' gaclenšque' le'e.”

<sup>30</sup> Can' goquen' bene' ca' chesonxene' Jesucriston' Jerusalénna' gosesele' bene' ca' chope len Pablon' na' len Bernabén' gosa'aque' zja'aque' ciuda Antioquian'. Na' cate' besežine' Antioquian' bosotobe' bene' ca' chesonxene' Jesucriston' na' bosonežjue' legaque' carten' gosesela' bene' Jerusalén ca'. <sup>31</sup> Na' cate' bene' An-



tioquía ca' bosolaben' besyebede' ca consejon' nyoj le'e carta'. <sup>32</sup> Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' chach laže'gaque' na' gosaclene' legaque' cont gosonxenche' Jesucriston'. <sup>33</sup> Gosenite' Antioquían' zan ža, nach cate' bžin ža šjaya'aque', bene' Antioquía ca' gose'e legaque': "Nayežagcho", na' lecze gose'e legaque' yesyěžine' Jerusalénna' to šagüe' to güen. <sup>34</sup> Na' Silasen' bechoglaže' yega'ane' Antioquían'. <sup>35</sup> Na' Pablon' len Bernabén' gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

**Pablon' gwyeje' da' yoble gan' ba jatixjue'ede' xtiža' Diosen'**

<sup>36</sup> Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjana'cho nac cheson bene' ca'.

<sup>37</sup> Nach Bernabén' goclaže' šja'aque' na' yeseche'e Juan ben' lecž le Marcos. <sup>38</sup> Perw Pablon' gwne' bi gonen güen yeseche'ene' dan' gwlejšyichj Marcosen' legaque' cate' besežine' distritw Panfilian' na' bi benlene' legaque' xšin Diosen'. <sup>39</sup> Cate' gota'bia' ne' toe' bi goclaže' gac can' ža ben' yeto, nach besyele'e. Bernabén' gwze'e gwče'e Marcosen' na' gosoe' lo' barcw ja'aque' Chipren'. <sup>40</sup> Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol' güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. <sup>41</sup> Na' ja'aque' to to yež ca' zjachi' distritw Sirian' na' len distritw Cilician' gosone' chach laže' bene' ca' chesedop chesežag chesonxene' Jesucriston'.

**Timoteon' gwzologüe' chonlene' Pablon' na' Silasen' txen**

**16** Na' Pablon' len Silasen' besyěžine' yež Derben' nach gwdena' besyěžine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego. <sup>2</sup> Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen. <sup>3</sup> Da'n'an' Pablon' gwñabe' šejlen Timoteon' legaque', nach gwchi'ene' gan' bosozoe' le' señw dan' že' circuncisión. Bene' ca' le' yogo' bene' že' na' gosenezde' xa Timoteon' bi naque' bene' Israel na' Timoteon' biña' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'. <sup>4</sup> Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaque' Jerusalénna' che da' ca' cheyała' yesone'. <sup>5</sup> Na' bene' ca' chesedop chesežag chesonxene' Jesucriston' gosenita'chache' gosejnilaže'ne' na' gwyanche' tža tža.

**Pablon' ble'edagüede' to bene' distritw Macedonia chata'yoe'de' le' šeje' laže'**

<sup>6</sup> Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'n'an' gosodie' yež ca' zjachi' distritw ca' gan' nzi' Frigia na' Galacia. <sup>7</sup> Besežinte' gała'ze distritw gana' nzi' Misia na' gosone' xbab yeso'e distritw da' nzi' Bitinia, perw lež na' bi be' Spiritw che Jesús'en' latje šja'aque'. <sup>8</sup> Nach gosodie' gała'ze distritw Misian' na' besežine' ciuda dan' nzi'

Troas dan' chi' cho'a nisaon'. <sup>9</sup>Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'."

<sup>10</sup>Neda' Lucas gwzoa' len legaque' na' da' ble'edagüe Pablon' bene' Macedonian', nach gwnezeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsini'a cheto' cont gwza'to' gwyejto' distritw Macedonian'.

### Pablon' len Silasen' ja'aque' Filipos

<sup>11</sup>Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' licha gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. <sup>12</sup>Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma. <sup>13</sup>Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjaseļ güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. <sup>14</sup>Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'. <sup>15</sup>Nach le' len bene' lo' yo'o che' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwyejto' jasoato' ližen', le bene' byen.

<sup>16</sup>Na' to ža zejto' gan' chosoļ güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chneya'abe', na' gan xen chombe' par xambe' ca' chneya'abe'. <sup>17</sup>Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocanē.

<sup>18</sup>Ba chac zan ža chombe' ca' cate' goque Pablon' zed, na' gwyechje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

<sup>19</sup>Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'. <sup>20</sup>Na' cate' besežine' gan' že' justis ca', gose'e legaque':

—Bene' Israel quinga chesaše' chesebeque' da' zed lo' ciuda nga. <sup>21</sup>Na' chosolo'ede' costumbr da' bi de lsens gao' chio' naccho bene' Roma.

<sup>22</sup>Nach bene' ca' lo' ciudan' gosase' contr Pablon' len Silasen', na' bene' gwnabia' ca' gosone' mandadw goselechje' xagaque' cont goseyine' legaque' xis. <sup>23</sup>Beyož goseyinchgüe' legaque' nach bosoži'e legaque' ližya, chese'e ben' chape' ližyan' gwna'yanē' legaque' cont bi yesyechoje'. <sup>24</sup>Beyož gose'e le' ca', nach bži'e legaque' lo' quart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

<sup>25</sup>Ca' gosenita' Pablon' len Silasen' ca do chel, chosoļ güiže' Diosen' na' chesoļe' no himno chesonxene' Diosen', na' yezica'chle bene' ca' zjade ližyan' chosozenague'. <sup>26</sup>Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'. <sup>27</sup>Bosbanen ben' chape' ližyan' na' cate' ble'ede' ba zjanyaljo puert ca', la' goljte spada chen' cont yeyot cuine', le bene'

xbab ba bosyoxonj yogo' bene' ca' zjade ližyan'.<sup>28</sup> Nach Pablon' gože'ne' zižje:

—Bibi gone cuino'. Nga zoacze yogo'to'.

<sup>29</sup>Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'.

<sup>30</sup>Na' la' bebejte' legaque' lo quart gan' zjajo'en', che'e legaque':

—¿Bi cheyala' gona' cont gata' yela' mban chia' toli tocane?

<sup>31</sup>Nach gose'e le':

—Gwejniłaže' Xancho Jesucriston', le' na' bene' lo' yo'o chio', na' gata' yela' mban chele toli tocane.

<sup>32</sup>Nach ben' chape' ližyan' gwche'e legaque' ližen' na' gosoe'lene' le' len bene' lo' yo'o chen' xtiža' Xancho Jesucriston'.<sup>33</sup>Nach ca hora' ben' chap ližyan' gwdibe' lo güe' che Pablon' na' che Silasen', na' gwdena' jasoe' nis len bene' lo' yo'o che' ca'.<sup>34</sup>Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejniłaže' Diosen' txen len bene' lo' yo'o che'.

<sup>35</sup>Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'.<sup>36</sup>Nach le' gože' Pablon':

—Bene' gwnabia' ca' bač gosesele' rson yosana' le'e. Guac yeyejle to šagüe' to güen.

<sup>37</sup>Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyebje' neto'.

<sup>38</sup>Nach xa'ag ca' jasyeyeže' bene' gwnabia' ca' can' gož Pablon' legaque'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma.<sup>39</sup>Nach bene' gwnabia' ca'

ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo ciudan'.<sup>40</sup>Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chach laže' bene' ca' chesonxene' Jesucriston' na' beyožen' besyeya'aque'.

### Bene' Tesalónica ca' gosone' contr Pablon'

**17** Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyežine' to ciuda da' nzi' Tesalónica gan' zoa to yodao' che bene' Israel.<sup>2</sup>Na' Pablon' ca' costumbr che' gweyje' yodao' ža che Dios. Na' ca' goc, šone ža che Dios be'lene' legaque' diža'.<sup>3</sup>Bzejni'ide' legaque' gože'ne' bene' ca' goso'e xtiža' Diosen' cani' bosozoje' xtiža' Criston'. Gosene' ben' seła' Dios yedenabi'e, cheyala' yosochi yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesúsen' ben' choa' diža' che', le'na' Criston' ben' gwsela' Dios cont nabi'e.

<sup>4</sup>Nach bał bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blao lecze gosejle'e.<sup>5</sup>Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo ciudan' ja'aque' liž ben' le' Jasón chesacde' yesyebje' Pablon' len Silasen' liže'na'.<sup>6</sup>Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebał bene' chesonxene' Jesucriston' na'

goseče'e legaque' lao bene' ca' chesen-  
 abia' ciudan', na' bososye'e gosene':

—Bene' ca' nita' liž benga chesaše'  
 chesebeque' da' zed doxen, na' na'a ba  
 besele'e gan' zoacho nga. <sup>7</sup> Jasón ni ba  
 blebe' legaque' ližen', na' bi chesone' can'  
 ža ley che César ben' nac la'zelagüe bene'  
 gwnabia' chechon' chi' ciuda Roman', na'  
 chesene' zoa yeto rey bene' le Jesús bene'  
 nabi'e chio'.

<sup>8</sup>Na' cate' gosende' diža'na', bene' lo  
 ciuda ca' len bene' gwnabia' čhegaque'  
 ca' gosebecche' žaš. <sup>9</sup>Nach Jasónna' len  
 bene' lježe' ca' bosozie' mechw cont bene'  
 gwnabia' ca' bososane' legaque', con še  
 bich yesyežin Pablon' na' Silasen' lo ciu-  
 dan', chesene'.

### **Pablon' len Silasen' ja'aque' yež Berea**

<sup>10</sup>Nach že'na' bene' ca' chesonxene'  
 Jesucriston' lagüe ciuda Tesalónican'  
 bosyose'e Pablon' na' Silasen' cont  
 ja'aque' yež gan' že' Berea. Na' cate'  
 besyežine' nach ja'aque' lo' yodao'  
 che bene' Israel ca'. <sup>11</sup>Na' bene' Israel  
 ca' že' Berean' zjanacche' bene' šagüe'  
 clal ca' bene' Israel ca' že' Tesalónican'  
 na' besyebede' bosozenague' xtiža'  
 Jesucriston' dan' bosozejni'i Pablon' len  
 Silasen' legaque'. Na' tža tža besyeyiljue'  
 gan' nyoj da' ca' bosozejni'i bene'  
 ca', cont yesenezde' še le can' žan.

<sup>12</sup>Na' zane' gosejle'e xtiža' Xancho  
 Jesucriston' na' lecze zan bene' griego  
 ca' na' zan no'ole blao. <sup>13</sup>Nach bene'  
 Israel ca' že' Tesalónican' bene' ca' cbi  
 chesejle' che Jesucriston', gosende' diža'  
 ba zoa Pablon' len Silasen' Berean'  
 chosozejni'ide' xtiža' Diosen'. Nach  
 gosa'aque' ja'aque' Berean' na' gosone'  
 cont bene' Berea ca' lecz gosone' contr  
 Pablon'. <sup>14</sup>Perw na' bene' Berea ca'  
 chesejnilaže' Jesucriston' la' bososa'te'  
 Pablon' gwyeye' cho'a nisdao'. Na' ca  
 nac Silasen' len Timoteon', legaque'  
 besyega'ane' Berean'. <sup>15</sup>Na' to chop

bene' Berean' ja'aque' jasesane' Pablon'  
 ciuda dan' nzi' Atenas. Na' cate'  
 besyeya'aque' jaya'aque' Berean' Pablon'  
 gwsele' rson len legaque' cont Silasen'  
 len Timoteon' lecz šja'aque' cate gan'  
 zoe'na'.

### **Pablon' bsed blo'ede' bene' Atenas ca'**

<sup>16</sup>Na' Pablon' šlac zoe' ciuda Ate-  
 nasen' chbeze' žin Silasen' len Timoteon',  
 gocchgüe' tole lo' yichjlažda'ogüe' da'  
 ble'ede' da' zan l' gua'a lsaca' da' chesejni-  
 laže' bene' ca'. <sup>17</sup>Da'nan' bzejni'ide' bene'  
 Israel ca' lo' yodao' čhegaque'na' len yez-  
 ica'chle bene' ca' chesonxene' Diosen'.  
 Na' yogo' ža gwyeye' ga chac ya'a je'e  
 xtiža' Diosen' len bene' ca' že'na'. <sup>18</sup>Nach  
 bene' ca' že'na' gwzolao cheso'lene' le'  
 diža'. Baļe' chesejle'e dan' bzejni'i to  
 bene' le' Epicuro, na' yebaļe' chesejle'e  
 dan' bosozoj bene' ca' chesene' estoico.  
 Na' baļe' gosene':

—¿Bin' chon ža benga?

Na' yebaļe' gosene':

—Chacljede' gwzejni'ide' chio' che no  
 bene' cobe bene' šejnilaže'cho.

Gosene' ca' le Pablon' ba bzejni'ide'  
 legaque' xtiža' Jesúsēn' na' ba be'e  
 diža' Jesúsēn' bebane' ladjo bene' guat.  
<sup>19</sup>Nach goseče'e Pablon' to latje dan'  
 nzi' Areópago gan' chesedobe bene' blao  
 čhegaque' cate' chosoxi'e bi da' chesone'.  
 Nach gose'e Pablon':

—Che'neto' gwzejni'ido' neto' bi da'  
 coben' dan' chsed chlo'edo'. <sup>20</sup>Bina'  
 yeneto' diža' can' nac dan' cho'o nga na'  
 chaclaže'to' nezeto' bi zejen yogo' da' ca'.

<sup>21</sup>Ca nac bene' Atenas ca', de costumbr  
 čhegaque' yogo' ža con chesaše' cheso'e  
 diža' o chosozenague' che bi da' cobe da'  
 de, na' lecz ca' cheson no bene' zito' že'  
 Atenas.

<sup>22</sup>Nach Pablon' gwzeche' gachol' le-  
 gaque' gan' chesone' yela' güexi'a na'  
 gože' legaque':

—Le'e bene' Atenas, chacbe'eda' leca chejnilaže'le zan l gua'a lsaca'. <sup>23</sup>Cate' gwdia' tnez ble'eda' gan' chonxenle zan l gua'a lsaca', na' ble'eda' to latje gan' ny-ojen žan: “Che Xancho ben' nono nombia'.” Na' ca nac ben' chonxenle sin cbi nombia'ine', che benan' chyixjue'eda' le'e.

<sup>24</sup>'Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon benačen' cont soe' len chio'. <sup>25</sup>Bibi chyažje Diosen' gwnežjo benačen' le', na' bibi gac yesone' yesaclene' le'. Diosen' cho'e yela' mban che yogo'lol bene', cho'e legaue' biš grasyw na' cho'e legaue' yogo' bi da' zjanape'.

<sup>26</sup>'Diosen' bene' bene' nechon', na' toz ca nac yogo' benač xi'in diaža che'. Na' bsi'e xneze bat nita' to toe' na' ga yesenite'. <sup>27</sup>Diosen' bnite' yogo' benačen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'.

<sup>28</sup>Le' chone' cont zoacho mbancho na' chdacho. Nac da' li can' gosena to čhope bene' poeta chele ben' goso'e diža' xdan, gosene': “Naccho diaža che Diosen'.”

<sup>29</sup>Na' dan' naccho diaža che Diosen' bi cheyala' goncho xbab nac Diosen' ca no l gua'a lsaca' de oro, de plata o de yej. Chesaljlaže' benačen' chesone' da' ca'. <sup>30</sup>Cani' Diosen' be'e latje goston benačen' con ca gwna xbab čhegaue' yela' cbi chejni' čhegaue', perw na'a Diosen' chone' mandaw yogo'lol bene' že' doxen yežlion' yesebejichje' da' malen' chesonen'. <sup>31</sup>Diosen' chaclaže' cuejyichjcho da' malen', le ba mbeje' Jesucriston' gone' yela' justis che yogo' benač na' gwnežjue' castigw che yogo' bene' cbi chesejnilaže' le', na' Diosen' zejcz'e to liča dan' gone' ca'. Na' Diosen' ba nžie' bia' bat gone' yela' justis che benač. Na' dan' bosban Diosen' Jesucriston' ladjo bene' guaten', nezecho

Jesucristwnan' gone' yela' justis che benačen'.

<sup>32</sup>Cate' bene' Atenas ca' beyož gosende' gwna Pablon' yesyeban bene' guat ca', ba'le' gosezi'diže' le' na' yeba'le' gose'ene':

—Na' gwzenagto' xtižon' yeto ža yoble.

<sup>33</sup>Can' goc beza' Pablon' latje gan' že' bene' ca'. <sup>34</sup>Perw ba' bene' Atenas ca' gosaque' Pablon' txe na' gosonxene' Jesucriston'. Na' bene' ca' gosaque' Pablon' txe len to bene' byo le Dionisio na' yeto no'ole le Dámaris. Na' Dionisio' naque' txe len bene' gwnabia' ca' ben' cheson yela' güexi'a gan' nzi' Areópago.

### Ca goc šlac zoa Pablon' Corinto

**18** Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto. <sup>2</sup>Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca hora' doxen gan' mbane naciónna', bene' mandaw besyežaš yogo' bene' Israel ca' že' ciuda Roma. Nach Pablon' gwyeje' jane'e Aquilan' len Priscilan'. <sup>3</sup>Xšin-gaque' naquen chesone' yo'o de lache', na' toze ca nac xšin Pablon'. Nach bega'ane' gosenite' txe na' gosone' žinna' txe. <sup>4</sup>Na' yogo' ža che Dios Pablon' gwyeje' yodao' che bene' Israel ca' jazejni'ide' legaue' che Jesucriston', cont ba' bene' Israel len ba' bene' bi zjanac bene' Israel yesejnilaže'ne'.

<sup>5</sup>Nach Silasen' len Timoteon' gwde gosa'aque' distritw Macedonian' besežine' gan' zoa Pablon', na' cana'ch Pablon' bsane' xšinen' cont gota'ch latje gwduxjue'ede' xtiža' Jesús'en' na' bzejni'ide' bene' Israel ca' Jesucristwnan' naque' bene' chesebeze' se'la' Diosen' yedenabi'e. <sup>6</sup>Perw bene' Israel ca' beseže'e Pablon' na' bosožie' yela' ya'

che. Nach Pablon' gwšibe' xe'na' cont blo'e chbejyichje' legaque', gwne':

—Bibi doľa' napa' dan' cuiayi'le toľi to-cane. Le'e nape doľa'. Na' na'a šjased šjalo'eda' bene' ca' bi zjanac bene' Israel.

<sup>7</sup>Nach bechoje' lo' yodaon'a' na' beze'e bežine' liž to bene' le Justo. Justo na'na' zoe' chonxene' Diosen' na' liže' zoan cuit yodaon'a'. <sup>8</sup>Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o che' gosaque' txe chesejle'e che Xancho Jesucriston'. Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. <sup>9</sup>Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. <sup>10</sup>Neda' zoa' len le' na' bi gona' latje no gone le' da' mal, le bene' zan že' lo' ciuda nga bene' chesonxene' neda'.

<sup>11</sup>Ca' goquen' bega'an Pablon' Corinton' tğüiz yogašje bsd blo'ede' legaque' xtiža' Diosen'.

<sup>12</sup>Na' ca tiempen' ben' le Galiön naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gubernadoren' yela' justisen'. <sup>13</sup>Na' cate' bežežine'na' gose'e gubernadoren':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

<sup>14</sup>Bach zoa ne Pablon' cate' gobernador Galiönna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis. <sup>15</sup>Perw naquen che diža', na' che bene', na' che ley chelen'. Da'nan' le gwye' nacle gonle. Bi co'o lo' na' gona' yela' justis che dan' nac ca'.

<sup>16</sup>Nach bešaše' legaque' gan' chone' yela' justisen'. <sup>17</sup>Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiönna', perw bena' bibi cuent bene' legaque'.

### **Pablon' beyeje' Antioquían' da' yoble**

<sup>18</sup>Na' bega'anch Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': "Nayežagcho", nach beze'e txe len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' bach beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. <sup>19</sup>Na' cate' besyēžine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodaon' che bene' Israel ca' je'lene' bene' ca' ba zjandob na' xtiža' Dios. <sup>20</sup>Na' bene' ca' že' lo' yodaon' gosata'yoede' le' yega'anche' len legaque', perw bi goclaze'. <sup>21</sup>Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidchcza' deña'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. <sup>22</sup>Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquían'. <sup>23</sup>Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' chach laže' bene' ca' chesonxene' Jesucriston'.

### **Apolos gwdixjue'ede' xtiža' Diosen' ciuda Efeson'**

<sup>24</sup>Na' ca tiemp na' bžin to bene' Israel ciuda Efeson' bene' le Apolos.

Naque' bene' ciuda Alejandría. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj. <sup>25</sup>Apolosen' chejle'e dan' bzejni'i Juanna' che Xancho Jesúsén' na' nezde' can' bzo'e bene' nis caten' besyetingde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsén', la'czla' con dan' bsed blo'e da' Juan na'zen' nezde'. <sup>26</sup>Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' che Jesucriston' da' ca' bina' nezde'. <sup>27</sup>Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bexue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejni-laže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan legaque'. <sup>28</sup>Bzejni'ide' yogo'lol bene' gože'ne' clelen' cheson bene' Israel gualaž chen' bi chesejle'e che Jesúsén'. Bzejni'ide' legaque' can' nyoj Xtiža' Diosen' žan Jesúsén' naque' Cristo ben' chesebeze' yedenabi'e.

### Šlac gwzoo Pablon' ciuda Efeson'

**19** Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bał bene' chesonxene' Jesucriston'. <sup>2</sup>Na' gože' legaque':

—¿Zedesoa Spiritw che Diosen' lo' yichjlažda'olen' caten' gwzolao chejni-laže'le Jesucriston'?

Nach gose'e le':

—Bi nezeto' še zoa Spiritw che Diosen'.

<sup>3</sup>Nach Pablon' goze'e legaque':

—¿Bi dižan' chejle'le da' gwzooale nisen' še ca'?

Nach gose'e le':

—Gwzoato' nis can' bzejni'i da' Juanna'.

<sup>4</sup>Nach gož Pablon' legaque':

—Da' Juanna' bzo'e bene' nis cate' besyetingje xtoła'gaque' na' lecze gože' legaque' cheyala' yesonxene' bena' za' sela' Diosen'. Na' da' gwne' ca' be'e diža' che Jesucriston'.

<sup>5</sup>Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejni-laže' Xancho Jesúsén'. <sup>6</sup>Nach Pablon' gwzooa ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosene' diža' da' cbi chesejni'ide' na' goseyixjue'ede' bi dan' gož Diosen' legaque'. <sup>7</sup>Na' yogo' bene' ca' zjanac da do šižinue'.

<sup>8</sup>Na' do šone bio' Pablon' bsed blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwney-oede' legaque' yeson cuingaque' lo' na' Diosen' cont nabi'e legaque' len xbab chegaquen'. <sup>9</sup>Na' bchoj bał bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'n'an' Pablon' bechoje' gan' že' bene' ca' na' bebeje' ben' ba chesonxene' Jesucriston' na' gwche'e legaque' gan' zoa to yo'o xen che to bene' le' Tiranno na' bzejni'ide' legaque' yogo' ža. <sup>10</sup>Na' gwzooa Pablon' chop iz bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsén', bene' zjanac bene' Israel lente bene' bi zjanac bene' Israel. <sup>11</sup>Na' Diosen' bchine' Pablon' cont bene' yeła' guac da' besyebanchgüe bene'. <sup>12</sup>Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yižgüe' chese'ede', na' bene' ca' yo'o nyaz

da' xigüe' yichjlažda'ogaque'na' lecze besyechojen.

<sup>13</sup> Lecze chesaš bał bene' Israel chesyebeje' da' xigüe' da' zjajo'o lo' yichjlaždao' bene' na' gosacłaže' yosočhine' la Xancho Jesúsen' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsen' ben' choe' Pablon' xtiže'na' chonto' mandawd yechojle.

<sup>14</sup> Na' zoa to bxoz gwnabia' che bene' Israel le' Esceva, na' nita' gaže xi'ine'. Na' bene' quingan' bosočhine' la Jesúsen' gosacłaže' yesyebeje' da' xigüen'. <sup>15</sup> Nach goc to šlas chesone' ca' cate' to da' xigüen' boži'in xtižen', gožen legaque':

—Nombi'a Jesúsen' na' ba benda' diža' che Pablon', perw bi nombi'a le'e cont šejli'a xtiža'len'.

<sup>16</sup> Nach bena' yo'o nyaz da' xigüen' bxite' gwnize' bene' ca' betlate' legaque' na' gwčeze' xałana'gaque'. Nach bosyoxonje' liž bena' ga'alyide' na' bedo chen zjanaque' dan' bene' legaque' zi'. <sup>17</sup> Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosacbe'ede' Xancho Jesúsen' naque' bene' zaque'.

<sup>18</sup> Nach bene' zan ba chesejle'e xtiža' Xancho Jesúsen', na' zane' gosexoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. <sup>19</sup> Na' bene' ca' gosac bene' guaža' na' bene' güene' ya'a bosyotob libr čhegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. <sup>20</sup> Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

<sup>21</sup> Nach gwde goc da' ca' Pablon' bene' xbab yeyeje' Jerusalénna', na' gocłaže' yedie' šjajne'e bene' ca' že'

yež gan' mbane distritw Macedonia len Acaya. Nach bene' xbab yeyož yeyeje' Jerusalénna' lecze cheyała' šjeje' ciuda Roma. <sup>22</sup> Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

### **Bene' ca' besegue'ede' Pablon' gosebchgüe' da' zed ciuda Efeson'**

<sup>23</sup> Na' gwche' to da' zed gual ciuda Efeson', le nita' bene' beseže'e xtiža' Jesúsen' dan' bsd blo'e Pablon'. <sup>24</sup> Quinga goc: gwzoa to bene' le' Demetrio bene' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, le gwda'ochguan. <sup>25</sup> Nach btobe' bene' ca' goson žin txen len le' na' nochle bene' goson žin dan' nac ca', na' gože' legaque':

—Nezele ca nac žin dan' nlancho choncho nga, chonlenchon gan xen. <sup>26</sup> Na' ba beneczele na' ba ble'eczele can' chon to bene' le Pablo chsed chlo'ede' bene' lo ciuda Efeso čhecho nga na' lecze chsed chlo'ede' zan bene' že' doxen distritw Asia nga, che'e legaque' bibi zaca' l gua'a lsaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho. <sup>27</sup> Le gonšč xbab nac cle goncho, le xož yesene' che žin dan' choncho nga, na' gague lezen, san lecze xož yesone' cont yodao' che xonax Diana čhechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana čhechon', yogo'cze bene' distritw Asia nga na' bene' gate'tezechle chesonxene' le'.

<sup>28</sup> Beyož gosende' xtiža' Demetrimon' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.



<sup>29</sup>Nach gwche' da' zed doxen lo ciudan', na' gosaque' toze' jasenize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besezine' gan' chesedobe yogo' bene' lo ciudan'. <sup>30</sup>Na' Pablon' goclaže' šo'e gan' zjandobe bene' ca' cont gü'lene' legaque' diža', perw bene' ca' chesonxene' Jesucriston' lo ciudan' bi gosoe' latje šo'e. <sup>31</sup>Baļ bene' zjanaque' bene' gwnabia' distritwna' zjanac xmigw Pablon' na' ľecze gosesele' rson gose'e Pablon' bi šeje' gan' zjandobe bene' ca'. <sup>32</sup>Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjanezde' bichen' zjandobe'na'. <sup>33</sup>Bene' Israel ca' bosozigue' to bene' le Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyaļa' ne'. Na' Alejandron' gwļis ne'e cont gwñabe' nite' šize yosozenague' diža' dan' gü'e laogaquen' gwzoe' rson che bene' ca' chesejnilaže' Jesucriston'. <sup>34</sup>Perw cate' besele'ede' le' gosacbe'ede' ľecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

<sup>35</sup>Na' bene' güezoj chegaquen' cane goc bebeczie' legaque'. Na' gože'ne':

—Le'e bene' gualaž, yogo' bene' že' doxen yežlion' zjanezde' naquen' checho gapši'icho yodao' che xonax Dianan'. Naque' bene' zaque', le 1 gua'a ľsaca' chen' blažon' le'e yaba. <sup>36</sup>Na' nono gac na da' yoble. Da'nan' le soa šize na' bich gonle da' bi zejen. <sup>37</sup>Na' ca nac bene' quinga nche'ele nga, bibi na' yesebane' lo' yodao' checho ca' na' neca na'cho chosožie' yeļa' ya' che xonax Diana chechon'. <sup>38</sup>Na' Demetrio nga len yezica'chle bene' ľježe', še chac bi chac che-

gaque' len bene' yoble, nita' bene' gwnabia' chechon' cont yesone' yeļa' justis chegaquen', con šja'aque' yeso'e legaque' part še ca'. <sup>39</sup>Na' še bichle da' chñable gac, cheyaļa' goncho to yeļa' güexi'a cont choglaon. <sup>40</sup>Perw ca nac žaš da' nga chac na'a, xož baga'cho choncho contr gobiern can' že'cho nga, na' bibi de ye'gacchone' še yeseñabe' bixchen' goc žaš da' nga chac na'a.

<sup>41</sup>Beyož gože' legaque' ca' bene' mandadw besyežaše'.

### Pablon' gweyjeche' distritw Macedonia na' nación Grecia

**20** Nach cate' beyož gwche'ži da' zeden', Pablon' goxe' bene' Efeso ca' chesonxen Jesucriston' cont ja'aque' gan' zoe'na' na' bene' chach laže'gaque' cont yesenite' yesejnilaže' Jesucriston'. Nach gože' legaque': “Nayežagcho”, na' goseyeļa' ľježe' na' beze'e beyeje' da' yoble distritw Macedonia. <sup>2</sup>Na' gwdie' to to yež da' zjachi' gaļa'ze Macedonian' bene' chach laže' bene' ca' chesonxene' Jesucriston', na' beyožen' gweyjeche' nación da' nzi' Grecia. <sup>3</sup>Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwñezde' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le. <sup>4-5</sup>Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater, bene' yež Berea, na' Aristarco len Segundo ben' zjanac bene' ciuda Tesalónica, na' Gayo bene' yež Derbe, na' Timoteon' na' chope bene' za'ac distritw Asia, Tíquico len Trófimo. <sup>6</sup>Na' gwde ľnin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita'

bene' ca' chesebeze' neto', nach gwzoato' na'ze gaže ža.

### Can' goc šlac zoa Pablon' Troas

<sup>7</sup>Na' cate' bžin ža dmigw besedobe bene' ca' chesonxene' Jesucriston' lo' ciuda Troasen' na' gweyeto' güe'ej gwdagwto' txen len legaque', na' Pablon' bzejni'ide' legaque' xtiža' Diosen'. Na' dan' ba zoa yeza' Pablon' ca gwxeze nach be'e diža' bžinte do chel. <sup>8</sup>Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. <sup>9</sup>Na' to bi' güego' lebe' Eutico žiabe' cho'a ventan. Na' Pablon' ton' zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo' che'ele. Nach cate' besyecose'be' bi' guat besyecose'. <sup>10</sup>Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' bene' ca':

—Bi žeble, mbanczbe'.

<sup>11</sup>Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' cho'e'te' dižan' ca' cate' gwyeni'. Nach beze'e. <sup>12</sup>Nach bi'na' blažo' cho'a ventanna', bene' ca' že'na' besyeche'ebe' besyebchgüede' dan' mbanczbe'.

### Gosa'aque' ciuda Troasen' na' ja'aque' ciuda Mileto

<sup>13-14</sup>Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gweyeto' ciuda gan' nzi' Mitilene. <sup>15</sup>Bezsa'to' Mitilenen' na' beteyo bežinto' gała'ze to yežlio da' chi' lo' nisdaon' gan' nzi' Quío. Na' gwde yeto ža bežinto' gan' chi' yeto yežlio lo' nisdaon' da' nzi' Samos. Na' bechojto' lo' barcon' gweyeto' yež dan' nzi' Trogilio gan' bega'anto'

tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto. <sup>16</sup>Ca' bento' bi gwdeto' ciuda Efeson', le Pablon' bi goclaže' šede' yež ca' zjachi' do distritw Asian'. Chachbyende' yob žine' Jerusalénna' še gała' soe' na' ža lni' dan' nzi' Pentecostés.

### Pablon' bšajlene' bene' chosogüia chesene'e bene' ca' chesonxen Jesucriston' Efeson'

<sup>17</sup>Na' šlac zoato' ciuda da' nzi' Mileto Pablon' goxe' bene' Efeson' bene' chosogüia chesene'e yezica'chle bene' ca' chesonxene' Jesucriston'. <sup>18</sup>Na' cate' besela'aque' Pablon' gože' legaque':

—Nezele can' bena' caten' gwzoa' distritw Asia gan' zoa lažlen', bena' da' güen šlac gwzoa' len le'e gwzolaotia' ža nechw žan' bžina' na'. <sup>19</sup>Gwzoa' bena' xšin Diosen' na' bi benxen cuina'. Zan ni'a gwchežchgua' chele. Na' da' zan da' bosochi bososaca' bene' Israel ca' neda'. <sup>20</sup>Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole. <sup>21</sup>Bzejni'ida' bene' zjanac bene' Israel gualaž chia' lente bene' cbi zjanac bene' Israel can' chaclaže' Diosen' yesyetinje xtoła'gaquen' na' yesejnilaže' Xancho Jesucriston'. <sup>22</sup>Na' na'a yeya'a Jerusalén, le Spiritw che Diosen' chonen byen yeya'a, na' bi nežda' bin' gac chia' yežina' na'. <sup>23</sup>Con nežda' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle da' saca'zi'a. <sup>24</sup>Perw bi chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo' na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nzi'ilaže' Diosen' benachen'.

<sup>25</sup>Ca nac le'e, ba bzejni'ida' le'e che yela' chnabia' che Diosen', perw na'a ne tole bich le'ele neda'. <sup>26</sup>Da'nan' chnia' le'e bibi doła' napa' še nole cuiayi'. <sup>27</sup>Bach bzejni'ida' le'e yogo' dan' chaclaže' Diosen' nezele, bibi bcuaša'. <sup>28</sup>Da'nan' cheyała' cuec yichjle che yogo'loł dan' ba bzejni'ida' le'e na' lece ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelalj xchene' beque'e xtoła'chon' cont bozoe' chio' binlo len Diosen' da' yoble. <sup>29</sup>Nezda' cate' bich zoa' len le'e yesela'ac bene' yese'nde' yesexoayague' le'e cont cuejy-ichjle bich gwzenagle che Jesucriston'. <sup>30</sup>Ladjw le'e yesechoj bene' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e le-gaque'. <sup>31</sup>Da'nan' le gwsaca' cont nono yesexoayag le'e. Na' le gon xbab, le šon izen' ba gwzoa' bzejni'ida' le'e na' gwney-oeda' le'e do ža do yel gwchežtia' chele.

<sup>32</sup>Na' na'a bene' migw, Diosen' gac-lene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjazyoalenle Diosen' txen len yezica'chle bene' ba gwlej Diosen' zjanaque' lo ne'e. <sup>33</sup>Bi chzelaža' bi da' de che bene', neca chzelaža' xmechwgaque' na' neca xagaque'. <sup>34</sup>Nezczele can' bena' žin cont bžel da' byažjda' len da' beseyažje bene' ca' gosenite' len neda'. <sup>35</sup>Na' bena' žinna' ca' cont blo'eda' le'e cheyała' gaclencho bene' še bi cheseyažjde'. Na' šjasa'laže'le can' gwna Xancho Jesús'en: "Mbalazech zoacho caten' chnežjwcho bi dan' chnežjwcho bene' clcl ca caten' chesone' chio' bi dan' chesone' chio'."

<sup>36</sup>Na' beyož be' Pablon' dižan' nach bzoa xiben' txen len yogo' bene' ca'

na' bosol güiže' Diosen'. <sup>37</sup>Na' yogo'lole' gosebeže' che Pablon' na' goseyele' le' na' bosonope' ne'ena'. <sup>38</sup>Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

### Pablon' beyeje' Jerusalén

**21** Beyož bze diža' lježto' len bene' ca' nach beyo'oto' lo' barcon' na' zjaydato' licha bžinteto' gan' chi to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach bezsa'to' bezžinto' ciuda Pátara. <sup>2</sup>Na' cate' bežinto' Pátaran' bželetto' yeto barcw dan' chzan' šejen distritw Fenicia, na' beyo'oto' lo'enna'. <sup>3</sup>Na' ba zjaydato' lo' barcon' cate' ble'to' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bezžinto' ciuda gan' nzi' Tiro besyeletje' yoa' da' zonsa' barcon' na' neto' becho-jto' lo' barcon'. <sup>4</sup>Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalénna'. <sup>5</sup>Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' bol güižto' Diosen' cho'a nisdaon'. <sup>6</sup>Beyožen' bze diža' lježto' na' gwdeła' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

<sup>7</sup>Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža. <sup>8</sup>Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesac-lene' postlw ca' len žin bixjw da' gota'.

Na' Felipen' zoateze' cho'e diža' che Jesucriston'. <sup>9</sup>Felipen' nita' tap xi'ine' no'ol güego' na' chosozende' bene' bi dan' ba gož Diosen' legaque'. <sup>10</sup>Zan ža ba gwzoato' liž Felipen' cate' bla' to bene' distritw Judean' bene' le Agabo, ľecze chaque' chzende' bene' bi dan' ba gož Diosen' ľe'. <sup>11</sup>Nach Agabon' gwnabe' xpant Pablon' na' bchejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' ľe' lo na' bene' ca' bi zjanac bene' Israel.

<sup>12</sup>Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'.

<sup>13</sup>Nach Pablon' gwne':

—Bi cuežle chia' o gonľe ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsen'.

<sup>14</sup>Na' cate' gocbe'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xanchon'.

<sup>15</sup>Nach bsini'ato' beza'to' zjaydato' Jerusalén. <sup>16</sup>Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

### **Pablon' bežine' Jerusalénna' jane'e Jacobon'**

<sup>17</sup>Na' cate' bežinto' ciuda Jerusalénna' bene' ľježto' ca' že'na' besyebede' bosoguape' neto' tiox. <sup>18</sup>Na' beteyo gwyejlento' Pablon' jana'to' Jacobon', na' bžinto'na' ba zjandop zjanžag yogo' bene' bla' ben' chosogüia chesene'e yezica'chle bene' ca' chesonxene' Jesucriston' na'. <sup>19</sup>Nach Pablon' bguape'

legaque' tiox na' beyožen' be'lene' legaque' diža' doxen can' ba ben Diosen', ľe zan bene' bi zjanac bene' Israel ba chesonxene' Jesucriston' gan' ba gwyeje' je'lene' legaque' xtiža' Diosen'. <sup>20</sup>Na' cate' bosozenague' dan' gož Pablon' legaque', nach gosoe' yela' choxcľen che Diosen' na' gose'e Pablon':

—Bene' migw, nezdo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj ľe'e ley chechon' dan' bzoj Moisés. <sup>21</sup>Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža ľe'e ley chechon' na' bi yesezoa' xi'ingaque' ca' seňw dan' že' circuncisión. <sup>22</sup>¿Nacxe ye'to' legaque'? ľe zane' yesežag nga cate' yesende' bach zo' nga da' yoble. <sup>23</sup>Güen goncho quinga: nita' tap bene' nga bene' zoa to da' zjango'o cho'en lao Diosen' na' chesacľaže' yesone' can' gosenen'. <sup>24</sup>Na' cheyala' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šľa'ale can' chesenen', san chono' can' žanna'. <sup>25</sup>Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che ľ gua'a ľsacan' chesejnilaže' bene', na' bi yesagüe' chen, na' bi yesagüe' be chat chosošoque' ľba'ba', ľecze bi yesata'lene' no'ole bi nac xo'olgaque' o bene' byo bi nac bene' chegaque'.

### **Gosezene' Pablon' yodao' blaona'**

<sup>26</sup>Beteyo gwza' Pablon' gwche'e bene' ca' tap cont yesyexi' yesyeyache' yo-

dao' blaona' can' ža' ley čhegaque'na'. Nach Pablon' gwyo'e gana' zoa bχozen' gwǰixjue'ede' le' bi ža yanen' yeyož yesaque' xi'laže' cont yosonežjue' beyix'e ca' gote' čhe to to legaque'.

<sup>27</sup> Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bał bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'. <sup>28</sup> Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel čhechon', na' contr ley čhechon' dan' bzoj da' Moisésen', na' contr yodao' čecho nga. Na' na'a ba none' yeto da' mal juisyw contr yodao' dan' nac čhe Dios čhechon', ba gwlo'e bene' bi zjanac bene' Israel lo'enna'.

<sup>29</sup> Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Trófimo, na' gosacde' še Pablonan' gwče'e le' lo' yodao'na', la'czla' bi bene' ca'.

<sup>30</sup> Na' gosonchgüe' to žašyey. La' bese-dobte bene' zan cho'a yodaon' na' goso'e lo' yodaon' gosenize' Pablon', besyebeje' le' na' la' bosyoseyjwte' puert ca'. <sup>31</sup> Na' ba zoa yesote' le' cate' gwneze ben' yo'o lo' ne'e soldadw čhe nación Roma ben' že' lo' ciudan'. Cate' gwneзде' ba chac to žašyey juisyw doxen ciudan', <sup>32</sup> nach btobe' soldadw ca' len bene' gwnabia' čhegaque' ca', na' gosa'aque' zja'acsese' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' čhegaque' ca', la' gosebezte' bich goseyine' Pablon'. <sup>33</sup> Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw čhe' ca' Pablon' na' bosočeje' le' čhope gden. Nach gwñabde' bene' ca' že'na' no nac Pablon' na' bi bene'. <sup>34</sup> Na' bene' ca' že'na'

bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseče'e Pablon' cuartel. <sup>35-36</sup> Nach yogo' bene' ca' zjana'ogüe' legaque' chesosye'e zjam-beque' to žaš juisyw. Na' cate' besežine' cho'a nepe' čhe cuartelen' goselen' soldadw ca' Pablon' neče dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

### Pablon' be'lene' bene' zan ca' diža'

<sup>37</sup> Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Gono' latje gua' to čhope diža'?

Nach bena' gože'ne':

—¿Chaco' diža' griego? <sup>38</sup> ¿Bi naco' bene' nación Egipto ben' gwda btob tap mil bene' güet bene' bat ngaze na' gwče'e legaque' latje dašen' gan' chesone' contr gobiernen'?

<sup>39</sup> Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beñ latje güe'lena' bene' quinga diža'.

<sup>40</sup> Nach bena' bnežjue' latje. Nach Pablon' gwzeche' lo' nepen' bene' señw len ne'e cont bene' ca' že'na' gosenite' šize bosozenague' čhe'. Nach gwzologüe' be'e diža' len legaque' diža' hebreo.

**22** Gože' legaque':

—Bene' gole len bene' xcuide', le gwzenag diža' dan' gua' laole nga.

<sup>2</sup> Na' cate' gosacbe'ede' chne' legaque' diža' hebreo gosenite' šize. Nach Pablon' gože' legaque':

<sup>3</sup>—Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen

can' ža ley che da' xozxta' ocho ca'. Na' godca' chonchgua' can' chazlaže' Diosen', cayanen' chaque le'e za'acle nga na'a. <sup>4</sup>Na' bchi bsaca' zan bene' ca' chesejnilaže' Jesucriston', goclaža' gotto' legaue'. Na' gwxena' no bene' byo na' no no'ole chesonxene' le' na' gwche'egaca'ne' ližya. <sup>5</sup>Bxoz ben' naquech bene' blao na' nochle bene' gole blao ca' chesenabia' nación Israel chechon' zjanezde' can' bena'. Legaue' gosone' yiš dan' bexua' gwya'a ciuda Damascon' gan' godca' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

**Pablon' cho'e diža' can' goc che' cate'  
Diosen' bocobe' yichjlažda'ogüe'**

(Hch. 9:1-19; 26:12-18)

<sup>6</sup>Na' šlac zya'a ciuda Damascon' ca do guagwbiz cate' to be'ni' gual da' za' yaba gwyechjen neda'. <sup>7</sup>Na' gwbiža' lo yon' benda' to bene' gože' neda': "Saulo, Saulo žbixchen' chchi chsaco' neda'?" <sup>8</sup>Nach boži'a xtižen', goša'ne': "žNo le' bene'?" Nach gwne': "Nedan' Jesús bene' Nazaret na' neda' chchi chsaco'." <sup>9</sup>Bene' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsen' neda'. <sup>10</sup>Nach goša'ne': "žBin' cheyała' gona' Xana'?" Nach Xana' Jesúsen' gwne': "Beyas na' gwyejteze ciuda Damascon', na' cate' žino'na' to bene' ye'e le' dan' cheyała' gono'." <sup>11</sup>Na' gwchola' catec gwna'chgua' be'nin', nach bene' ca' zya'alena' txen gosoxe'de' taca' cont bžinto' Damascon'.

<sup>12</sup>Na' to bene' le Ananías zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisésen'. Na' yogo'lo! bene' gualaž checho ca' že'na' cheso'e xtiža' Ananíasen' naque' bene' chon da' güen. <sup>13</sup>Ananíasna' bide' gan' zoan' na' cate' ble'e nach gože' neda': "Saulo,

bele'e." Na' beyož gwne' ca' la' bele'eteda' na' ble'eda' le'. <sup>14</sup>Nach gože' neda': "Dios ben' chonxenko na' ben' benxen da' xozxta' ocho ca', len' ba gwleje' le' cana'te cont nezdo' can' chaclaže' gono', na' ba ble'edo' Xi'ine' ben' nac la'zelagüe bene' chon da' güen, na' ba bendo' xtiže'. <sup>15</sup>Nachen' go'o xtižen' len bene' zan bene' že' lo yežlion' gwzejni'igacdo'ne' da' ca' ba bendo' na' ba ble'edo'." <sup>16</sup>Na' lecz gož Ananíasen' neda': "žBičen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'oguo' len da' malen'." Can' gože' neda'.

**Diosen' gwleje' Pablon' cont  
be'e xtižen' len bene' ca' bi  
zjanaque' bene' Israel**

<sup>17</sup>Na' gwdena' beyeda' ciuda Jerusalén ni na' gwya'a lo' yodao' blaon' jel' güiža' Diosen', na' šlac cho! güiža'ne' ble'edagüeda' Xancho Jesucriston'. <sup>18</sup>Na' Xancho' gože' neda': "Bi šedo' chojo' ciuda Jerusalén ni, le bi yosozenag bene' quinga xtižo' dan' go'o chian'." <sup>19</sup>Nach goša'ne': "Xana', legaue' zjanezde' neda' gwya'a to to yodao' jet jatina' bene' ca' chesonxene' le' na' bseyjwgaca'ne' ližya. <sup>20</sup>Na' lecz naca' bene' ca' txen cate' gosote' Esteban ben' be' xtižon', na' neda' gwna'a xadon che bene' ca' gosot le'." <sup>21</sup>Nach Xancho Jesucriston' gože' neda': "Bchoj na' sela' le' zito' go'o xtižan' len bene' ca' bi zjanac bene' Israel."

**Pablon' len ben' yo'o  
lo ne'e soldadw ca'**

<sup>22</sup>Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

<sup>23</sup>Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'. <sup>24</sup>Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nezde' bičen' bene' lo ciudan' chososya'adie' che'. <sup>25</sup>Na' ba zjančeje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de lsens chinle neda' sin cbi nezele še bin' nona', le neda' naca' bene' nación Roma.

<sup>26</sup>Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdołan', le naque' bene' nación Roma.

<sup>27</sup>Nach ben' yo'o lo ne'e soldadw ca' gwyeje' lao Pablon' gože'ne':

—Gwna neda' žle bene' nación Roma le'?

Nach Pablon' gože'ne':

—Bene' nación Roma neda'.

<sup>28</sup>Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

<sup>29</sup>Nach bene' ca' ba nita' cont yeseyine' Pablon' la' besyecuaste' cuiten', na' ben' yo'o lo ne'e yogo' soldadw ca' lecze bžebe' dan' ba bčeje' Pablon' cont yeseyine'ne'.

### **Gosesele' Pablon' gan' chosoxi'a bene' ca' chesenabia' Israelen'**

<sup>30</sup>Nach beteyo ben' yo'o lo ne'e soldadw ca' gwseže' gdenna' nchej Pablon'. Na' bene' mandadw besedobe bžoz gwnabia' ca' len yogo' bene' gole blao ca'

chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

**23** Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ža na'aža nezda' lo' lažda'ogua' ba bena' can' chazlaže' Diosen'.

<sup>2</sup>Nach Ananías ben' nacch bžoz blao bene' mandadw len bene' ca' zjaze cuit Pablon' yesebaže' cho'ena'. <sup>3</sup>Na' Pablon' gože'ne':

—jDiosen' gone' le' castigw, bene' güexoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

<sup>4</sup>Bene' ca' že' gała'ze gose'e Pablon':

—Bi cheyała' yoži'o xtižen' ca', le naque' bžoz blao che Dios.

<sup>5</sup>Nach Pablon' boži'en gwne':

—Bene' migw, bi gwnezda' še benga bžoz blaon'. Nezda' Xtiža' Diosen' dan' nyojen žan: “Bi yoži'ile diža' zi' len bene' gwnabia' chelen'.”

<sup>6</sup>Pablon' gocbe'ede' bene' ca' chesenabia' nación Israelen' zjanaque' chople. Bałe' chesejle'e can' chsed chlo'e bene' ca' zjansi'e saduceo na' yebałe' can' chsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'in bene' fariseo. Na' zoa' nga chonle yela' justis chia' neche chejli'a yesyeban bene' guat ca'.

<sup>7</sup>Beyož gwne' ca' bene' fariseo ca' len bene' saduceo ca' ben' zjandop zjanžag na' gosezolagüe' chosošaše', na' besechoje' chople. <sup>8</sup>Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spir-itw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw.

<sup>9</sup>Yogo' ben' že'na' chesosye'e chosošaše'. Nach to chope beñe' zjansed ley dan' bzoj Moisésen', ben' zjanac beñe' fariseo, gosezože'e gosone' Pablon' txen, gosene':

—Bibi da' mal non benga. Še no spir-itw o no angl ba gwn̄elen le', bi cheyała' goncho contr le', le contr Diosen' goncho še ca'.

<sup>10</sup>Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw che' ca' cont jasyeleje' Pablon' ladjo beñe' ca' na' besyeche'ene' cuartelen' da' yoble.

<sup>11</sup>Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyała' go'o xtižan' ciuda Roma.

### Bosoxi'e yesote' Pablon'

<sup>12</sup>Na' beteyo bał beñe' Israel bese-dobe' na' bosoxi'e yesote' Pablon'. Na' gosechogbi'en, gosene':

—Diosen' gone' chio' castigw še ye'ej gagwcho sin cbina' gotcho Pablon'.

<sup>13</sup>Nde choa beñe' bosoxi'e yesote' Pablon'. <sup>14</sup>Nach ja'aque' gan' že' b̄xoz gwnabia' ca' len beñe' gole beñe' blao ca' chesenabia' nación Israelen' na' gose'e legaque':

—Bach gwchogbia'to gon Diosen' neto' castigw še ye'ej gagwto' sin cbina' gotto' Pablon'. <sup>15</sup>Na' le yotobe lježle le gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

<sup>16</sup>Na' zoa to bi' byo bi' nac xi'in' beñe' zan Pablon' na' lebe' benebe' da'na' chesacde' yesonde' le'. Na' gwyejbe' cuar-telen' jazenebe' Pablon'. <sup>17</sup>Nach Pablon'

goxe' to beñe' chnabi'e to gayoa soldadw na' gože'ne':

—Ben goclen gwche' bi' nga lao beñe' gwnabia' chelen'. De to da' ye'be' le'.

<sup>18</sup>Beñe' gwnabia' che soldadon' gwche'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwnabe' goclen lagua' cont zedesana' bi' nga laguon', že' de to da' ye'be' le'.

<sup>19</sup>Nach ben' yo'o lo ne'e yogo' soldadw ca' bexue' na'be' gwche'ebe' to šla'ale gwnabde'be':

—¿Bi che'ndo' nao' neda'?

<sup>20</sup>Nach bi'na' gožbe' le':

—Beñe' blao che beñe' Israel gualaž cheto' ca' ba bosoxi'e yesenabe' cuejo' Pablon' gwxe na' yosode'ede' seło'ne' gana' chesežag beñe' gwnabia' chegaquen' cont yeseyljwože' bi da' xinj non Pablon'. <sup>21</sup>Perw bi šejli'o chegaque'. Nde choa beñe' ca' yesebe'na'ogüe' Pablon' tnez cont yesote' le' na' ba gosechogbi'en bibi ye'se'ej ye'sagüe' šlac biña' yesote'ne'. Na' ba chesebeze' gwzenago' chegaque' cont cuejo' Pablon'.

<sup>22</sup>Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rsonna' ba bedesano' lagua' nga.

### Gosesele' Pablon' lao governador ben' le Félix

<sup>23</sup>Nach ben' yo'o lo ne'e yogo' soldadw ca' goxe' chope beñe' gwnabia' ben' chesenabia' to gayoa güeje soldadw na' bene' mandadw yososi'na' chegaque' cont šja'aque' ciuda Cesarea do cheda ga šeže'le na' yeseche'e chop gayoa soldadw beñe' yesa'ac ni'aze na' gayonši beñe' yesebia cabayw na' yechop gayoa soldadw beñe' yesoxe' lanza. <sup>24</sup>Lecze gože' legaque' chyažje cabayw be cuia Pablon', le le'na' yeseche'e gana' zoa gubernadoren' ben' le Félix, na' yesape'



Pablon' cont bibi gac che' tnez. <sup>25</sup>Nach bzoje' to cart che gobernadore' da' bgoxe' legaque', žan:

<sup>26</sup>“Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. <sup>27</sup>Bene' Israel ca' ba gosezene' benga na' ba bosoxi'e yesote'ne', perw cate' gwnezda' naque' bene' nación Roma, gwy'a'a len soldadw chia' ca' jasla'ne' lo na'gaquen'. <sup>28</sup>Na' cont nezda' bichen' chosocuiše' le', gwchi'ane' gan' chosoxi'a bene' gwnabia' che nación Israelen'. <sup>29</sup>Nach gwnezda' chosocuiše' le' che bize da' chesac che' len ley chegaque'na', na' bi nacho bi da' mal ba none' cont yesote' le' o cont gate' ližya. <sup>30</sup>Perw na' ba gwnezda' ba bosoxi'a bene' Israel ca' yesote' le', da'n'an' la' chsela'tia'ne' laguo' le' na' lecz be'na' mandadw len bene' ca' chosocuiš le' šja'aque' laguo' na' yesene' bin' chesac chegaque' len le'. Si'xenšco' yogo' da' quinga chneyoeda' le'. Claudio Lisias.”

<sup>31</sup>Nach soldadw ca' gosone' can' ben bene' gwnabia' chegaquen' mandadw, besyebje' Pablon' na' šeže'le gosegüe'e nez len le' besežine' yež da' nzi' Antípatris. <sup>32</sup>Na' cate' gwyeni' besyebi' soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'. <sup>33</sup>Na' cate' besežine' ciuda Cesarean' bosonežjue' gobernadore' carten' zjanoxe'na' na' lecz gosone' Pablon' lo ne'e. <sup>34</sup>Na' gobernadore' cate' beyož blabe' carten' gwñabde' Pablon' ga bene' naque'. Na' cate' gwnezde' naque' bene' distritw Cilicia, <sup>35</sup>nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

## Pablon' be'e diža' lao gobernador Félix

**24** Cate' bačh goc gayo' ža zoa Pablon' ciuda Cesarean', nach bžin Ananías ben' nac bxož blaoch che bene' Israelen' na' nche'e to čhope bene' gole blao chegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya che Pablon'. <sup>2</sup>Na' cate' jaxi'e Pablon', Tértulon' gwdagüe' xya che, gože' gobernador Félixen':

—Si'xeno', señor gobernador, za'to' laguo' nga. Bin'lo juisyw zoa nación che-chon' na' da' zan da' šagüe' ba chac da' chnabi'o neto'. <sup>3</sup>Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'. <sup>4</sup>Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a. <sup>5</sup>Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret. <sup>6</sup>Na' goclaže' gone' da' mal juisyw lo' yodao' cheton' na' da'n'an' gwzento'ne' cont chogbia'to' che con can' ža ley cheton'. <sup>7</sup>Perw na' gwyaz Lisiasen' ben' nac bene' gwnabia' che soldadw ca' na' beque'ene' lo na'ton'. <sup>8</sup>Na' gože' neto' cheyala' yidto' laguo' nga cont gwcuišto'ne'. Guac ñabdo' Pablon' cuino' cont nezdo' nac da' li can' chcuišto'ne' nga.

<sup>9</sup>Nach bene' Israel ca' za'aclene' Tértulon' gosaque' toze len le' gosene' le can' naquen. <sup>10</sup>Nach gobernadore' bene' señw len Pablon' cont ne', na' Pablon' gwzolagüe' gwne':

—Nezda' ba goc zan iz chono' yela' justis che nación ni, na' da'n'an' chbeda' gwzoa' rson chian' laguon'. <sup>11</sup>Na'a chac šžižiw ža gwy'a'a Jerusalénna' j Xenena' Diosen'. Na' guac ñabdo' bene' ca' be-

sele'e neda' še leca' naquen. <sup>12</sup>Bi n̄acho besele'ede' chacyoža' len no bene' lo' yodao' blaon' ne lo' yodao' yoble o gate'teze lo' ciudan'. <sup>13</sup>Na' bibi gac yeson bene' quinga cont yosolo'e napa' doła' ca dan' chosocuiše' neda'. <sup>14</sup>Bi gwcuša' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'loł Xtiža' Diosen' dan' noyol le'e ley cheton' na' da' ca' bosozoj bene' ca' goso'e xtiža' Diosen' cani'. <sup>15</sup>Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaż chia' can' nite' lez gon Diosen' ca'. <sup>16</sup>Da'n̄an' zoa' chi' yichja' chona' can' chaclaže' Diosen' neche nezda' lo' yichjlažda'ogua' bibi doła' napa' lao Diosen' ne lao benachen'.

<sup>17</sup>Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. <sup>18</sup>Ca' goquen' zoa' lo' yodao' blaon' ba bexi beyacha' can' cheyala' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi n̄acho mbeca' žaš, neca' ndop nžaga' bene' zan. <sup>19</sup>Na' bene' ca' za'ac distritw Asian' cheyala' yesid cuine' yosocuiše' neda' laguo' nga še bi da' mal chesacde' chona'. <sup>20</sup>Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. <sup>21</sup>Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': "Ca' nac yeła' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat."

<sup>22</sup>Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna

Pablon', bich goclaže' gone' yeła' justis che' ca hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

<sup>23</sup>Nach bene' mandadw beche' x̄an soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

<sup>24</sup>Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gobernadore' bene' mandadw gosaxe' Pablon' da' yoble na' bzenague' be' Pablon' diža' gwne' yogo'loł bene' cheyala' yesejnilaže' Jesucriston'. <sup>25</sup>Nach Pablon' be'lenche' le' diža' can' cheyala' gaccho bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' benach' na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

<sup>26</sup>Gobernadore'n' godce' še gwnežjo Pablon' le' mechw cont yosane' le'. Da'n̄an' goxe' Pablon' güeltze be'lene' le' diža'. <sup>27</sup>Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'n̄an' bene' mandadw bega'an Pablon' ližyan'.

### Pablon' bzoa rson che' lao gobernador Feston'

**25** Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeje' Jerusalénna'.  
<sup>2</sup>Nach b̄xoz gwnabia' ca' len nochle

bene' blao che bene' Israel ca' ja'aque' jasene'e le' cont bosocuiše' Pablon'.  
<sup>3</sup>Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosacłaze' yesebe'na'ogüe' Pablon' cont yesote'ne' tnez. <sup>4</sup>Na' gobernador Feston' boži'e xtiza'gaque', gwne':

—Yega'anche' Cesarean' gan' die' ližyan' le neda' bich chžeda' ša'a na'.  
<sup>5</sup>Na' le cuej no bene' gwnabia' chele seła'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

<sup>6</sup>Nach gwzoa gobernadoren' len le-gaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyej Pablon' lagüen'. <sup>7</sup>Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e. <sup>8</sup>Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

<sup>9</sup>Na' Feston' gocłaze' yega'ane' binlo len bene' Israel ca', da'nan' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

<sup>10</sup>Nach Pablon' gwne':

—Rey Césaren' ba nzoe' le' cont gono' yela' justis, na' cheyała' gac yela' justis chia' laguo' nga. Ca nac bene' Israel quinga, le' nezczedo' bibi da' xinj na' gona' len legaque'. <sup>11</sup>Šaca' ba gwdapa' doła' o bichle da' ba bena' da' cheyała' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaque'na'. Da'nan'

chnaba' tia' lao rey Césaren' cont gone' yela' justis chian'.

<sup>12</sup>Nach Feston' bene' yela' güexi'a len bene' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

### Gobernador Feston' bdie' Pablon' lao rey Agripan'

<sup>13</sup>Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedeseguape' Feston' tiox. <sup>14</sup>Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to bene' nyixjw Félixen' ližya nga cate' bechoje'. <sup>15</sup>Na' cate' gwya'a Jerusalénna' bžoz gwnabia' ca' na' nochle bene' blao che bene' Israel ca' gosenabe' choglaguan' cont gaque' castigw. <sup>16</sup>Perw na' goše'gacane' bi de costumbr che chio' bene' nación Roma gwdecho bene' yesaque' castigw še bi yesyedillağüen' len bene' ca' chosocuiš le' cont yosozoa rson chegaque'.

<sup>17</sup>Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'.

<sup>18</sup>Na' cate' bosocuiš bene' ca' le', ne toz da' mal dan' chacda' yosobague'de' le' bibi gosene'. <sup>19</sup>Dan' chac chegaque', bi chejnilaže' Pablon' can' chesejnilaže' legaque', na' cheso'e diža' che to bene' ba got, bene' le Jesús, na' Pablon' že' mbancze'.

<sup>20</sup>Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'. <sup>21</sup>Nach Pablon' gwñabe' šejo' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

<sup>22</sup>Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

<sup>23</sup>Nach beteyo gosacxenchgua rey Agripan' len Berenice cate' goso'e gana' chi' gobernadores', na' lecz zjachi' bene' ca' chesenabia' soldadw ca' na' yogo' no bene' blao che ciudan'. Na' gwdena' Feston' bene' mandadw jasexi'e Pablon'.

<sup>24</sup>Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' benga naque' bene' mal na' yogo'cze' chesene' bi chejala' bane'.

<sup>25</sup>Na' ba gwnabyoža' na' gota'bia' bibi none' da' zaca' choglaguan' che' gate'. Na' ba gwnabe' tie' lao rey César gone' yela' justis che', na' ba gwcheba' gw-dia'ne' ciuda Roma na'ale gan' zoa rey Césarén'. <sup>26</sup>Na' chacžejlaža', le bibi chežellaža' gwzoja' reyen' yapa'ne' bin' none'. Da'nán' bach gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. <sup>27</sup>Chacda' bi naquen to licha sela'ne' Roman' sin cbi gwzoja' še bin' none'.

### **Pablon' bzoe' rson che' lao rey Agripan'**

**26** Nach rey Agripan' gože' Pablon':

—Guac nao' bi da' gaclenen le'.

Nach Pablon' gwlis ne'en lao bene' ca' gwzolağüe' bzoa rson chen', gwne':

<sup>2</sup>—Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'. <sup>3</sup>Le' nombi'o costumbr che chio' bene' Israel na' nezdo' can' chesacyož bene' gualaž checho ca' legacze'. Da'nán' chata'yoeda' le' gapšco' yela' chxenlaže' gwzenago' chia' nga.

### **Quinga ben Pablon' cate' bina' šejnilaže' Criston'**

<sup>4</sup>'Yogo' bene' Israel gualaž chechon' zjañezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén. <sup>5</sup>Na' še chese'nde' yeso'e diža', lecze zjañezde' goca' t xen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogo'lo' costumbr gole can' nyoj ley chechon' clel can' cheson yezica'ch bene' Israel gualaž checho ca'. <sup>6</sup>Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xozxta' ocho ca'. Neche da'nán' zoa' nga na'aža' cont gac yela' justis chian'. <sup>7</sup>Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nán' chesonxene' le' do ža do yel. Lecz neda' zoa' lez gac ca', na' da'nán' ba' bene' Israel gualaž chechon' chosocuiše' neda' nga rey Agripa. <sup>8</sup>Na' le'e chi'le chzenagle' chia', žbixchen' chaquele nono šejle' dan' yosban Diosen' bene' ca' ba gosat?

### **Cana' Pablon' bgue'ede' bene' chesejnilaže' Criston'**

<sup>9</sup>Cana' neda' godca' chejala' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'. <sup>10</sup>Bene' zan bene' chesejle' che Jesúsén' Jerusalénna' gwduxjua' ližya, gw-dapa' yiš dan' bosozoj b'xoz gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'. <sup>11</sup>Na' zan las gwya'a to to yodao' jasaca' legaque' cont yesebejyichje' bich yesonxene' Jesúsén'. Na' catec bgue'eda' legaque' gwya'a yež zito' jalagšiba' legaque'.

**Da' yoble Pablon' cho'e diža'  
can' goc che' cate' Diosen'  
bocobe' yichjlažda'ogüe'**

(Hch. 9:1-19; 22:6-16)

<sup>12</sup>'Can' goc to ža cate' zya'a ciuda Damascon', noxa' yiš che b̄xoz gwnabia' ca' dan' žan gwčhi gwsaca' bene' ca' chesonxene' Jesúsen'. <sup>13</sup>Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyečh-jen neda' len bene' ca' zya'alena' t xen. <sup>14</sup>Na' yogo'to' gwbižto' lo yon', na' neda' benda' to bene' chne' diža' hebreo gwne': "Saulo, Saulo ¿bixchen' chchi chsaco' neda'? Dan' chondo' neda', chone zi' cuino' ca chon to go'n be chlibe lo ya dan' zoa lao carroš cheban'." <sup>15</sup>Nach bol giüiža'ne', goža'ne': "¿No le' bene'?" Nach Xana' Jesúsen' boži'en, gwne': "Neda' Jesús na' neda' chchi chsaco'. <sup>16</sup>Beyas, le bač blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. <sup>17</sup>Na' na'a seła' le' gan' že' bene' ca' bi zjanac bene' Israel. Na' bi gona' latje no got le', ne bene' Israel gualaž chio' ca' na' ne bene' bi zjanac bene' Israel. <sup>18</sup>Chseła' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yozozenague' che Diosen' cont nitlao xtoła'gaque', na' lecze chaclaža' yesaque' t xen len nochle bene' chesejnilaže' neda' bene' ba zjanac lo na' Diosen'."

**Pablon' bsed blo'ede'  
bene' xtiža' Criston'**

<sup>19</sup>'Ca' goc chia' rey Agripa, bzenaga' ca dan' gož Jesúsen' neda' zoe' yaban' caten' ble'edagüeda'ne' tnez. <sup>20</sup>Zgua'tec jazejni'ida' bene' ca' že' ciuda Dam-

asco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyała' yesebejyichje' xtoła'gaque' na' yozozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel. <sup>21</sup>Na' neče dan' chona' ca', bene' gualaž checho bene' cheseque'ede' neda' gosezene' neda' yodao' blaon' na' gosaclačže' yesote' neda'. <sup>22</sup>Perw na' Diosen' zoe' chaclene' neda', na' da'nana' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi na-cho bichle chzejni'ida' bene' da' bi bzoj da' Moisésen' len yezica'chle ben' gosoe xtiža' Diosen' cani'. <sup>23</sup>Gosene' Criston' ben' za' seła' Diosen' saca'zi'e na' gate' na' gaque' bene' nechw yebane' ladjo bene' guat ca'. Na' lecze gosene' le'na' gwzende' bene' Israel len bene' bi zjanac bene' Israel can' cheyała' yesone' cont šo' be'ni' che' lo' yichjlažda'ogaque'.

**Pablon' goclačže' šejnilaže'  
rey Agripan' Jesucriston'**

<sup>24</sup>Ca' cho'e dižan' cate'cze gobernador Feston' gwne' zižje gože'ne':

—¿Chactonton' Pablo! Dan' ba bsdteco' nan' bač chactonto'.

<sup>25</sup>Nach Pablon' gože' gubernadoren':

—Bi chactonta' señor gobernador, san diža' lin' cho'a, diža' da' zaca' gwzenago'. <sup>26</sup>Na' rey Agripa nga nombi'e da' quinga choa' diža' chen, da'nana' bi chžeba' choa' diža' lagüe' nga. Nežda' chacbe'ede' choa' diža' li, le dan' goc che Jesúsen' bi na-cho goquen bagaše'ze. <sup>27</sup>Le' rey Agripa, ¿chejli'o da' ca' bosozoj bene' ca' gosoe xtiža' Diosen' cani'? Nežda' chejli'on.

<sup>28</sup>Nach rey Agripan' gože' Pablon':

—¿Chacdo' bedao' co'oyelo' neda' cont šejnilaža' Jesucriston'?

<sup>29</sup>Nach Pablon' gože'ne':

—Chnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.

<sup>30</sup> Beyož gwna Pablon' ca' bežoža' rey Agripan' len no'ol chen' Berenice, na' len gubernador Feston' na' len bene' ca' gosebe' len legaque'. <sup>31</sup> Nach cate' ba besyeyo'e ga yoble, rey Agripan' na' gubernador Feston' gose' lježe':

—Bi nacho ba non benga da' zaca' gate' o da' zaca' chixjwchone' ližya.

<sup>32</sup> Nach rey Agripan' gože' Feston':

—Šaca' bi gwnabe' tie' lao rey Césaren' cont gac yela' justis che'na' guac yosanhone'.

### Gosesele' Pablon' ciuda Roman'

**27** Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to xan soldadw bene' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. <sup>2</sup> Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia. <sup>3</sup> Nach ža beteyo bžinto' ciuda da' nzi' Sidón. Na' xan soldadw ben' le' Julio bencez' güen len Pablon', be'e latje gwyeje' gan' že' bene' migw che' ca' cont bosonežjue' le' bi dan' byažjde'. <sup>4</sup> Na' cate' bechojto' ciuda Sidónna' beza'to' bedeto' gała'ze gan' nla' yežlio dan' chi' lo' nisdao' dan' nzi' Chipre. Chechjchgua be' clele ca horen', na' yežlion'a' bcue'ejen neto' len be'na'. <sup>5</sup> Na' beyož gwdeto' lo' nisdao' dan' de gała'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

<sup>6</sup> Na' ciuda Miran' xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'. <sup>7</sup> Nach gwza'to' zejto' lo nisen' da' yoble. Zan ža zejto' šolaže', cane bžinto' gwdeto' ciuda gan' nzi' Gnido. Na' dan' ne' chechj ben' clele gan' zejton', da'nan' bi goc šejto' liča, nach gwca'ato' zejto' chcue'ej cuinto' len yelate' yežlio dan' nga'an lo' nisdao' dan' nzi' Creta, gan' bitec gwyečj be', na' gwdeto' gała'ze gan' zoa to ya'a da' nzi' Salmón. <sup>8</sup> Na' zejto' gała'ze ga zoa yo biž chcue'ej cuinto', cane bžinto' gan' nzi' Buenos Puertos gała'ze yež dan' nzi' Lasea.

<sup>9</sup> Goc zan ža zejto' ca' na' bač chžebto' šjažiayi' cuinto' lo' nisdao', le ba bžin tiemp zag cate' chechjchgua be'. Nach Pablon' gwneyoede' bene' ca' yesebeze' na'ze. <sup>10</sup> Gože' legaque':

—Le'e bene' le'e chsa'le barcon', ba chacbe'eda' can' zejcho nga cane chac chzan', xož cuiayi' barcon' len yoa' che-len', na' lente chio' yo'ocho lo' barcon' xož cuiayi'cho.

<sup>11</sup> Nach xan soldadw ca' bzenagche' che xan barcon' na' che ben' chsa' len clel ca che Pablon'. <sup>12</sup> Le bi nac latje güen cho'a nisdao' gan' zoaton' ga'anto' tiemp zaguen', na' gwyan bene' ca' gosacde' cheyała' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxo'a gwbiž.

### To be' gual gwyečjjen lo nisdao'

<sup>13</sup> Cate' gwzolao chechj to be' gol dan' za' che'elle na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to lcue'ej che Cretan'. <sup>14</sup> Gague goc šša cate' ba chac to be' gual da'

nzi' Noreste chečjchguan clele gan' zej barcon'. <sup>15</sup>Na' chžiga'chguan barcon'. Bibi goc yesone' cont šejchto'. Na' bto-blaže'to' gwžiga' ben' barcon' len neto' con can' chechjenna'. <sup>16</sup>Nach bžinto' to lcue'ej yežlio da' nga'an lo' nisen' dan' nzi' Clauda, gan' bitec chečj be'. Na' barcw cha'o gan' yo'oton' nxoben to barcw dao' da' chon žin choslan beŋe' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'. <sup>17</sup>Beyoža' bchejto' barcw cha'ona' do gual cont gwlo'oto' fuers chen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'. <sup>18</sup>Beteyo ba chož nisen' lo' barcon' da' chečjchgua ben', nach gosešaše' yoa' dan' nsa' barcon' gwzolao bosozalašazen' lo' nisen'. <sup>19</sup>Na' ža gwyone goclento' le-gaque' bzala'to' xšinlaz barcon' lo' nisen'. <sup>20</sup>Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

<sup>21</sup>Bač goc sša bi chagwto', nach Pablon' gože' beŋe' ca':

—Le'e beŋe', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiai' yoa' che barcon' len xšinlazen. <sup>22</sup>Perw na'a bi soayaše'le, ne tole cbi cuiayi' yela' mban chele, san barcw ngazen' cuiayi'. <sup>23</sup>Neda' chonxena' Diosen' na' ba ben cuina' lo' ne'e, na' le' ba gwsele' to angl beŋe' blo'elagüe' neda' nže'e. <sup>24</sup>Nach angla' gože' neda' diža' nga: “Bi žebo' Pablo. Cheyaža' žino' lao rey César ben' chi' ciuda Roma, na' da'nan' yelao', bibi gac chio', na' lez yosla Diosen' yogo' beŋe' ca' že' lo' barcon'.” <sup>25</sup>Na' dan' gwna anglen' ca', beŋe', le yebe. Nežda' Diosen' gone' gac dołol

can' gož anglen' neda'. <sup>26</sup>Da' gac checho yecho'onen chio' yo biž da' nga'an late' lo' nisen'.

<sup>27</sup>Na' cate' ba goc žta'gwbiž zejto' lo nisen' nžiga' ben' neto' nile nale lo nis-daon' dan' nzi' Adria, nach ca do chel beŋe' ca' zjansa' barcon' gosacbe'ede' ba zejto' plom ža'ze yo biž. <sup>28</sup>Nach beseletje' to plom lo' nisen' cont boso'ochixe' ca do gaca'te' sitjw nac nisen'. Beyož bosochixen'na' gosenezde' goquen šino'tochoa metr. Nach gosezdie' yelate' na' bosozchixen' da' yoble na' ca horen' goquen gažechoa metr. <sup>29</sup>Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochjejen' xan barcon' cont gosoxen' len, na' do chesežebze' chesebeze' batcan' šeni'. <sup>30</sup>Nach beŋe' ca' zjansa' barcon' gosaclaže' yosyoxonje'. Besyeletje' barcw dao' dan' ncua' xina' barcon', con bosode'ede' yeseletje' ancla ca' dan' ncua' lagüen'. <sup>31</sup>Nach Pablon' boł güiže' xan soldadw ca', gože'ne':

—Še beŋe' quinga bi yesyega'ane' lo' barcw nga, bi yelacho.

<sup>32</sup>Nach soldadw ca' gosechogue' don' zjanca' barcw daon' bososanen' lo' nisa'.

<sup>33</sup>Do šbal Pablon' gwzolao gwney-oede' yesagw beŋe' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle. <sup>34</sup>Chata'yoeda' le'e le gagw cont soale binlo, le ne tole ca cuiayi'.

<sup>35</sup>Beyož gwne' ca' beŋue' to yetex-til, be'e yela' choxclen che Diosen' lao yogo' neto' že'to' lo barcon' na' gwxi'e to pedasen' gwdagüen'. <sup>36</sup>Nach yogo'to' bebeto' na' lecz gwzolaoto' gwdagwto'. <sup>37</sup>Čhop gayoa gayonšino'to' nacto' že'to' lo' barcon'. <sup>38</sup>Na' beyož gwdagwto' ca beljeto', nach trigon' da' ne' nga'anch lo' barcon', gosebejen' bosozalen' lo' nis-daon' cont barcon' bich goctequen ži'i.

### Goxj barcon'

<sup>39</sup> Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enŋa' nac laše' lo yox. Nach gosaque' toze gosaclaže' yesone' cont žin barcon' šjachen' laše' lo yoxen'.  
<sup>40</sup> Na' gosechogue' do che ancla ca', gosebejyichjen' lo' nisen'. Lecze gosešeže' do dan' bosočheje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'.  
<sup>41</sup> Na' gosedie' ga chedił nisdaon' len yeto da' yoble, na' jachaz lagüe barcon' lo' yoxen', bich goc tan. Na' nisen' gwzolao bzoxxjen barcon' catec fuers nsan'.  
<sup>42</sup> Nach soldadw ca' gosaclaže' yesote' pres ca' cont bi yeseyele' nisen' na' yosyoxonje'.  
<sup>43</sup> Perw xan soldadw ca' goclaže' yosle' Pablon', da'n'an' bžone' yeson soldadw ca' can' chesacclaže' yesonen'. Bene' mandadw len pres ca' še noe' chac chyela' nisen' zgua'tec legaque' yesexite' lo nisen' cont yesyechoje' yo biž.  
<sup>44</sup> Na' bene' mandadw bene' ca' bi chac yeseyela' nis yosočhine' no yagla' o bichle xšinlaz barcon' cont yesyežine' lo yo. Na' can' gosone' na' yogüe' besyežine' lo yo bižen'.

### Dan' goc che Pablon' šlac zoe' Malta

**28** Cate' bechojto' lo' nisdaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo yežlio da' nga'anen lo' nisdaon'.  
<sup>2</sup> Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag.  
<sup>3</sup> Nach Pablon' btobe' xonj xis bcue'en lo yin', cate' bchoj to beł be nac venen lo xis ca' gwdi'inba' ne'e gola'ditban'.  
<sup>4</sup> Na' besele'e bene' Malta ca' nala'dit belen' na' Pablon', na' gose' lježe':

—Benga naclje' bene' güet bene'. Da'n'an' la'czla' bele' lo' nisen', Diosen' bi güe'e latje banche'.

<sup>5</sup> Nach Pablon' con gwžib ne'ena' lo yin' na' bexope belen', na' bibi gocde'.  
<sup>6</sup> Yogo' bene' ca' chesebeze' batcan' solao gata' ne'en yi o batca' gate'. Gosebeze' šša na' besele'ede' bibi gocde'. Nach gosone' xbab yoble, gosene' naque' to bene' šejnilaže'cho.

<sup>7</sup> Na' bene' gwnabia' che doxen Malta le' Publio na' yežlio che' zjaden gala'ze latje gan' bžinton', na' blebe' neto', gwzoato' ližen' šone ža.  
<sup>8</sup> Na' xa Publion' chacšenchgüede' yo'e da' la na' che'ede' yiž chen. Nach Pablon' gwyo'e gan' de'na' bol güiže' Diosen', nach gwxo'a ne'en yichj bene' güen' na' beyaque'.  
<sup>9</sup> Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaque', na' lecze besyeyaque'.  
<sup>10</sup> Na' da' zan da' güen goston bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

### Pablon' bžine' ciuda Roman'

<sup>11</sup> Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandría da' gwlezen latjen' šlac gwde da' zaguen'. Na' mben le'e barcon' l' gua'a lsaca' che bene' ca' le' Cástor na' Pólux.  
<sup>12</sup> Na' bžinto' ciuda dan' nzi' Siracusa gan' bega'anto' šone ža.  
<sup>13</sup> Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'elle, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'.  
<sup>14</sup> Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'.  
<sup>15</sup> Na' cate' za' žinto' ciuda Roman' goseneze bene' lježto' že' Roman' ba zoa žinto', na' bale' bedeseleze' neto' latje gan' nzi' Šone



Tiend na' yebałe' lagüe ya'a dan' nzi' Che Apio. Cate' ble'e Pablon' legaque' be'e yela' choxc̄len che Diosen' na' gwbede' lo' yichjlažda'ogüe'. <sup>16</sup>Na' cate' bžinto' Roman', x̄an soldadw ca' bene' yezica'chle pres ca' lo na' bene' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

### Pablon' be'e xtiža' Jesucriston' Roman'

<sup>17</sup>Beyon ža bžinto', Pablon' goxe' bene' blao che bene' Israel ca' že' ciuda Roman'. Na' cate' beyož besedobe'na' gože' legaque':

—Bene' migw, bene' gualaž checho ca' že' ciuda Jerusalén gosezene' neda' gosone' neda' lo na' bene' gwnabia' che nación Roman', la'czła' bibi bena' contr bene' gualaž ca' na' ne contr costumbr che da' xozxta'ochon'. <sup>18</sup>Nach bene' gwnabia' che nación Roman' gosenabyože' na' gosaclaže' yososane' neda' cate' gosacbe'ede' bibi nona' da' zaca' yesote'nda'. <sup>19</sup>Nach bene' gualaž ca' že' Jerusalénna' bosožoncze' yososane' neda'. Da'nan' gwñaba' tia' lao rey Césaren' cont gac yela' justis chia'. Perw bi nacho gagua' xya che bene' gualaž checho da' gosonde' neda' ca'. <sup>20</sup>Da'nan' zoa' nga bač goxa' le'e cont le'eda' le'e na' güe'lena' le'e diža'. Na' ncheja' gden ni neče dan' zoa' lez yosban Diosen' bene' ca' ba gosat, cacze zan chio' bene' Israel zoacho lez.

<sup>21</sup>Nach bene' ca' gose'ene':

—Bibi cart na' la' laoto' nga dan' za' distritw Judean' da' bosozoj bene' Jerusalén ca' güen' diža' še bin' chac len le', na' nono bene' gualaž na' la' bene' ne mal chio'. <sup>22</sup>Perw chaclaže'to' yeneto' go'o diža' che dan' chejli'o che Jesús'en', le nezeto' doxen chesene' che le'e chejle'le che'.

<sup>23</sup>Na' bosožie' bia' to ža cont šjasene'e le' da' yoble, na' cate' bžin žan' bene' zan

ja'aque' gan' zoen'. Nach Pablon' be'lene' legaque' diža' do ža. Be'e diža' che dan' cheyala' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisés'en' na' len dan' bosozoj yezica'chle bene' goso'e xtiža' Diosen' cani' che Jesucriston', cont yesejle'e che'. <sup>24</sup>Na' bał bene' ca' gosejle'e xtižen' da' be'e na' yebałe' bi gosejle'en'. <sup>25</sup>Dan' bi gosone' toz ca' yesone' xbab, gwzola' besyeya'aque'. Nach Pablon' gože' legaque':

—Dan' gož Spiritw che Diosen' da' Isaiásen' dan' bzoje' che da' xozxta'ochoc̄ ca' naquen da' li, žan:

<sup>26</sup>Gwyej gož bene' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

<sup>27</sup>Nacle bene' güedenag na' bač natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtołale' cont yeca'an na' yocoba' yichjlažda'olen'.

<sup>28</sup>Che'nda' nezele ba gwzolaon na'a Diosen' chsele' bene' cheseyixjue'ede' xtižen' len bene' bi zjanac bene' Israel cont yosozenague' che' na' gata' yela' mban chegaque' toli' tocane.

<sup>29</sup>Beyož gwna Pablon' ca', bene' Israel ca' besyežaše' chesacyožchgüe' che dan' gwnen'.

<sup>30</sup>Na' chop iz nya' gwzoa Pablon' ciuda Roman' to yo'o ga chyixjue', na' blebe' yogo'loł bene' jasene'e le'. <sup>31</sup>Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' bene', na' be'e xtiža' Diosen' con can' goclaže'.

## CART DAN' BZOJ POSTLW SAN PABLO ĆHE BENE' CA' ŽE' ROMA

**1** Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw Ćhe', na' gwsele' neda' cont chyixjue'eda' diža' güen Ćhe'. <sup>2</sup>Diosen' ba gwzologüe' bzende' beñachen' diža' güen Ćhe', bene' cont gwnita' bene' gosoe xtižen' cani' na' bozozojen'. <sup>3</sup>Na' diža' güen Ćhe Diosen' chzejni'in chio' Ćhe Xi'ine' Xancho Jesucriston'. Len' golje' beñach lo diaža Ćhe da' rey David. <sup>4</sup>Na' Spiritw Ćhe Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. <sup>5</sup>Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' Ćhe'. Na' Xancho Jesucriston' soe' blaoch cate' bene' že' yogo' nación yosozenague' Ćhe Diosen'. <sup>6</sup>Can' naquen, Diosen' ba gwleje' le'e cont nacle lo na' Jesucriston'.

<sup>7</sup>Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chñaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

### Pablon' goclaže' šjane'e bene' ca' chesejnilaže' Jesucriston' ciuda Roma

<sup>8</sup>Zgua'tec ni'a le'e Jesucriston' zoe' chaclene' neda' cont choa' yela' choxcen Ćhe Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'. <sup>9</sup>Nezcze Diosen' yogo' ni'a cate' cho' güiža'ne' chñaba' gaclene' le'e. Naque' ben' chejni-laža' do yichj do laža' na' chona' xši-

nen' choa' diža' güen Ćhe Xi'ine' Jesucriston'. <sup>10</sup>Chñaba' lao Diosen' gone' latje yedena'a le'e še ca' chnalaže' gona', le ba chac šša zelaža' yida'. <sup>11</sup>Chaclaža' yedena'a le'e na' gwzejni'ichda' le'e cont soachachle šejnilaže'le Diosen'. <sup>12</sup>Na' le'e len neda' soacho gonchachlaže' lježcho dan' chejnilaže'cho Jesucriston'.

<sup>13</sup>Bene' migw, che'nda' nezele zan ni'a ba goclaže' yida' yedena'a le'e, perw bina' gac yedena'a le'e. Chaclaža' yida' gona' xšin Diosen' gan zoale cont šanle gwzenagle Ćhe Jesucriston' ca ba goc yezica'chle yež ga ba gwy'a. <sup>14</sup>Nezda' cheyala' gua' diža' güen Ćhe Jesucriston' len yogo'lo' bene', bene' že' ciudan', na' bene' že' yixe', na' bene' chesac letr na' bene' cbi chesac letr. <sup>15</sup>Da'n'an' che'nchgüeda' gua' xtižen' len le'e že'le Roman' can' ba bian' ga yoble.

### Diža' güen Ćhe Jesucriston' nsan' yela' guac Ćhe Diosen'

<sup>16</sup>Bi cheto'eda' gua' diža' güen Ćhe Jesucriston', le xtižen' nsan' yela' guac Ćhe Diosen' cont bene' chesejle' Ćhen gata' yela' mban Ćhegaque' toli tocañe. Nsan' yela' guac len neto' bene' Israel, na' lecze len le'e bi nacle bene' Israel. <sup>17</sup>Na' diža' güen Ćhe Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban Ćhe' toli tocañe."

### De xtoła' beñachen'

<sup>18</sup>Diosen' zoe' yaban' na' ba blo'ede' beñachen' toli tocañe yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesaclaže' yesombia' bene' yoble diža' li Ćhe Diosen'. <sup>19</sup>Na' Diosen' gone' yesezaca'zi'e, le ba zjanezde' zoe' da'

ba blo'ede' legaque' can' ba benen'.  
 20 Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' benach chesele'ede' da' ca' ba bene'. Da'nan' bibi de da' yosode'e benachen' yesene' bi zjanezde' še zoe'. 21 La'czla' zjanezde' zoa Diosen', bi chesonxene' le', neca cheso'e yela' choxcen che'. Xbab chegaquen' bibi zacan' na' zjanchoj yichjlažda'ogüen' yela' bi chejle' chegaquen'. 22 Chesene' zjanaque' bene' sina' perw chesone' xbab da' bibi zaca'. 23 Chosozoe' Diosen' to šla'ale la'czla' naque' la'zelagüe' bene' zaca' na' zoe' toli tocaņe. Na' gualaz le', chesejnilaže' no l' gua'a lsaca' che benach bene' te che, na' no l' gua'a lsaca' che be zoa xil, che be žia tap ni'a na'ba' na' che no be xigüe'.

24 Da'nan' Diosen' ba gwlejiychje' le-gaque' cont chesone' da' xinj can' ža lo' lažda'ogaquen', na' bale' ba chesonchgüe' da' nac yela' zto' len cuerp chegaquen' toe' len yetoe'. 25 Diosen' gwlejiychje' le-gaque' cont chesone' yela' zto', le le-gaque' gosebejiychje' diža' li che Diosen' na' chesejle'e che da' güenlaže'. Chesejni-laže' da' ca' ben Diosen' na' bi chesejni-laže' Dios ben' cheyała' šejnilaže'cho na' gonxencho toli tocaņe. Ca'czen' gacšca.

26 Da'nan' Diosen' gwlejiychje' le-gaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheyała' yeson no'olen', san cheseque'e ljež no'olgaque' cont chesone' len le-gaque' da' bi cheyała' yesone'. 27 Na' nita' bene' byo bene' bitw chese'nde' yesenita'lene' no'ole, san chesezelaže' ljež bene' byogaque' nach cheseca'a lježe' cont chesone' yela' zto'. Na' dan' ba chbiayi' cuerp chegaquen', naquen castigw da' cheyała' yesezi'e yela' güen da' xinj chen'.

28 Bi chesaclaže' benachen' yosozenague' che Diosen', da'nan' ba gwlejiychje' le-gaque' len xbab mal chegaquen'. Da'nan' nite' chesone' da' bi cheyała' yesone'. 29 Chesonchgüe' yogo' da' xinj. Bene' byo chesata'lene' no'ole bi nac no'ol chegaque', na' no'olen' chesata'lene' bene' byo bi nac bene' chegaque'. Chesexi'e bene'. Chesezelaže' bi da' de che bene'. Zjanaque' bene' xi'a juisyw, chesegue'e lježe', chesot lježe', chesedile', cheseziye'e, zjanacchgüe' bene' güedenag, na' chja'aque' chjaseleje' diža' che bene'. 30 Chesene' mal che bene' yoble, chesegue'ede' Diosen', na' bibi bala'an chesezoe' bene' yoble. Chesa'laže'. Chesonxen cuine' cheso'e diža' zjanaque' bene' güen. Chesaljlaže' bichle da' mal da' yesone'. Bi chosozenague' che xaxne'e. 31 Bi chesejni'ide'. Bi chesone' da' ba gosene' yesone'. Bi chesacde' bene' yoble. Bi chesyezi'xen che lježe' na' bi chesyeyaše' lježe'. 32 Zjanezde' Diosen' že' toli tocaņe yezezaca'zi' ben' cheson da' ca'. Na' la'czla' zjanezde' can' že', con nita'cze' chesone' da' xinjen' na' chesyebede' cate' bene' yoble chesone' can' cheson legaquen'.

### Diosen' zejcz'e to licha da' chone' castigw che xtoła'chon'

**2** Še nacho che bene' yoble da' xinjen' chone', bibi zaca' ye'cho Diosen' gague bi xtoła'cho de, note'tez naccho. Cate' chnecho che da' chon bene' yoble, na' cheyechjen chio', le toz can' choncho len da' cheson legaque'. 2 Nezecho še choncho da' xinj ca' nac da' ca' ba gwnian', Diosen' gone' cont saca'zi'cho che xtoła'chon' na' zejcz'e to licha da' gone' ca'. 3 Čhaquele Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyała' gaguecho bi gone' da' saca'zi'cho, le gonczen'.

<sup>4</sup> ĴBi chacbe'ele Diosen' nacchgüe' bene' šagüe' na' bene' xenlaže' len chio' napcho doĵa' na' chone' ca' cont gacbe'echo da' xinjen' choncho na' yetinjechon? <sup>5</sup> Le'e bi chetinjele xtoĵa'len' nacle bene' yid, na' chonĵe cont Diosen' ža'ache' le'e na' gonche' ga saca'zi'le cate' žin ža čhogbi'e che benachen'. Cana' gwlo'e zejcz'e to liča na' čhogbi'en saca'zi' to to benach che xtoĵa'gaquen'. <sup>6</sup> Na' cana' to tocho saca'zi'cho o gone' ga gac güen čecho con ca nac da' ba bencho. <sup>7</sup> Na' še cheyljwlaže'cho nac goncho cont šjayzoacho len Diosen' toĵi tocanē, na' cont yebe Diosen' chio', na' cont gone' gaccho bene' zaca', soacho goncho da' güen bite'teze da' gwžaglacho. Nach Diosen' gone' cont bancho toĵi tocanē. <sup>8</sup> Na' še zoacho choncho con da' chazlaže'cho na' bi chzenagcho diža' li čhe Diosen', san zoacho chzenagcho čhe da' malen', Diosen' ža'ayichje' chio' na' gone' ga saca'zi'cho toĵi tocanē. <sup>9</sup> Yogo' benach bene' chon da' xinj saca'zi'e na' žaglagüe', zgua'tec žagĵao neto' bene' Israel na' tech yezica'chle bene'. <sup>10</sup> Yogo'cho še choncho da' güen, Diosen' gone' cont šjayzoacho mbalaz len ĵe' na' gone' cont gacxencho, na' gone' cont soacho binĵo len xbab dan' yo'o ĵo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

<sup>11</sup> Toz ca chon Diosen' len yogo'ĵoĵ benach. <sup>12</sup> Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. <sup>13</sup> Gague con yenecho can' ža leyna' cont Diosen' ne' naccho bene' güen len ĵe', san goncho can' žanna', nach Diosen' ne' naccho bene' güen len ĵe'. <sup>14</sup> Bene' bi zjanac bene' Israel na' bi zjanombi'e

ley dan' bzoj Moisésen', tgüeje ĵo' lažda'ogaquen' chonen cont chesone' da' güen can' ža leyna' cheyaĵa' yesone', na' ĵa'czĵa' bi zjanombi'e leyna' dan' zoa yichjlažda'ogaquen' čžian bia' yesone' da' güen, naquen ca to ley len ĵegaque'. <sup>15</sup> Nacbia' zjanezde' ĵo' lažda'ogaque' cheyaĵa' yesone' da' ca' nžia bia' leyna' yesone', ĵe chesone' late' güejen. Na' zjanezde' ĵo' yichjlažda'ogaquen' še da' chesone' naquen güen o še naquen mal. <sup>16</sup> Can' gac caten' žin ža Diosen' gone' ĵo na' Jesucriston' čhoglagüen' čhe to tocho ca nac xbab čechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen čhe Jesucriston'.

#### **Bene' Israel bi chesone' can' ža' leyna'**

<sup>17</sup> Na' le'e nacle bene' Israel gualaż čhia', šeca chonĵe xbab zoale binĵo len Diosen' da' nsedle ley dan' bzoj Moisésen', na' šeca ča'laže'le dan' nombia'le Diosen'. <sup>18</sup> Nezele bin' chazlaže' Diosen' na' chacbe'ele bin' nac da' güen na' bin' nac da' mal, ĵe nsedle xtižen'. <sup>19</sup> Chaquele zaca'le cont co'ole be'ni' ĵo' yichjlaždao' bene' bi nombia' Diosen'. <sup>20</sup> Na' chaquele guac gwzejni'ile bene' cheson clele nac cheyaĵa' yesone', na' chaquele guac gwsed gwlo'ele bene' cobe xtiža' Diosen', ĵe nombia'le diža' li čhen' na' len nsan' doxen da' cheyaĵa' nezele. <sup>21</sup> Le'e chsed chlo'ele bene' yoble, ĵbixchen' bi chsed chlo'e cuinĵe? Le'e žale bi cheyaĵa' no cuan, ĵbixchen' chbanĵe? <sup>22</sup> Le'e žale nono gata'len no'ole bi nac no'ol čhe', na' no'olen' bi gata'lene' ben' bi nac bene' čhe', ĵbixchen' chonĵe da' čhe'le bene' bi gone'? Le'e chgue'ele ĵ gua'a ĵsaca' da' chesejnilaže' bene' ĵbixchen' chjalanĵe bi da' de ĵo' yo'o gan' že' ĵ gua'a ĵsaca' ca'? <sup>23</sup> Ča'laže'le da' nsedle ley da' bzoj Moisésen', perw chzoale Diosen' to šĵa'ale da' bi chonĵe can' ža leyna'. <sup>24</sup> Čac can' nyoj Xtiža' Diosen'

žan: “Da' chonle da' xinj, bene' bi zjanac bene' Israel chesene' mal che Diosen'.”

<sup>25</sup>Še choncho can' ža leyna' zaca'czen dan' ba gwzoacho señw lo cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho señw dan' nzi' circuncióón.

<sup>26</sup>Bene' bi naque' bene' Israel bi zoe' seña'a, na' še chone' can' ža ley che Diosen', Diosnan' ne' naque' txen len chio' zoacho seña'a. <sup>27</sup>Na' bene' cheson can' ža leyna', la'czla' bi zjanaque' bene' Israel na' bi zjazoe' señw dan' nzi' circuncióón lo cuerp chen', chesone' cont nacia' de xtoła' le'e nsedle leyna' perw bi chonle can' žanna'. <sup>28</sup>Bi nacho nacccho dogualje bene' Israel da' na'ocho costumbr che nacióón chechon' na' dan' zoa señw lo cuerp chechon'.

<sup>29</sup>Naccho dogualje bene' Israel gague dan' choncho can' ža leyna' da' nyojen, san da' chejniłaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'n'an' Diosen' güe'e diža' güen checho, la'czla' še notno chne güen checho.

**3** ¿Bi da' güen da' chga'an che chio' bene' Israel da' goljcho lo diaža che da' xozxta'ochon' še ca'? ¿Bi da' güen da' chga'an da' ba zoacho señw da' nzi' circuncióón? <sup>2</sup>Da' xen da' chga'an. Na' da' blaoch da' chga'an, Diosen' bnežjue' da' xozxta'ocho ca' Xtižen' da' nyojen par yogo' benačh. <sup>3</sup>Na' la'czla' zan bene' gualaż checho bi gosejle'e chen, bi nacho Diosen' bi gone' güen can' gwne' gone' len chio' naccho nacióón che'na'. <sup>4</sup>Goncze' con can' že'na'. Yogo' ni'a Diosen' chne' diža' li, la'czla' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan:

Le' gwlo'edo' benačhen' le cho'o diža' li. Na' ca' nac bene' ca' cheson xbab bi chono' can' žon', yesacbe'ede' chonczo' can' žo'na'.

<sup>5</sup>Ba! bene' chesene' cate' choncho da' xinj chlo'en ca' bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. <sup>6</sup>Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' benačh. Perw gonczen'.

<sup>7</sup>Na' nita' ba! bene' chesone' xbab clele, chesene': “Cate' choe'cho diža' güenlaže' chlo'en ca' bene' güen juisyw nac Diosen' da' cho'e pur diža' li. Da'n'an' bi cheyala' ne' napcho doła' cate' chonlaže'cho.” <sup>8</sup>Lecze chesonlaže' ba! bene' chesene' neda' bzejni'ida' guaque goncho da' mal cont gac da' güen. Da' cheyala'cze gon Diosen' cont sacazi' note'tez bene' ža ca'.

### Yogo'cho napcho doła' lao Diosen'

<sup>9</sup>¿Bixen' ša? ¿Naquech chio' bene' Israel bene' güenčh ca' bene' bi zjanac bene' Israel? Bi naccho ca'. Ba bzejni'ida' toz ca' nac che chio' bene' Israel len che bene' bi zjanaque' bene' Israel, yogo'cho de xtoła'cho. <sup>10</sup>Na' Xtiža' Diosen' nyojen žan:

Nono zoa bene' zej to licha, ne toe'.

<sup>11</sup>Nono nla' bene' chejni'i cont gwzenague' che Diosen', nono nla' bene' cheyiljue' le'.

<sup>12</sup>Yogo' benačh ba zjanque'e nez mal. Yogüe' ba zjanaque' ca' to da' bibi zaca'. Ne to nono zoa bene' chone' da' güen.

<sup>13</sup>Len xtiža'gaquen' chesexoayague' bene'.

Ca' zban chl'a' cho'a ba che bene' guat še bi nyeyjon binlo, ca' zban chl'a' xtiža'gaquen'.

Na' ca' venen che bel' znia nac xtiža'gaquen' da' cheso'e.

<sup>14</sup>Pur diža' mal diža' bya' že' cho'agaquen'.

<sup>15</sup>Con bize da' chosode'ede' cont chesote' bene'.

<sup>16</sup> Gate'teze chja'aque' zjanse'e yela' yaše' yela' zi' ca nac da' chesone'.

<sup>17</sup> Bi chesezoe' binlo len lježe'.

<sup>18</sup> Bi chesežebe' Diosen' len bi da' mal chesone'.

<sup>19</sup> Na' nezecho Diosen' bene' chio' bene' Israel ley chen'. Da'nan' ne tocho bi chac nacho bibi xtoła'cho de, le bi choncho can' žanna'. Nachen' Diosen' že' si'cho castigw che xtoła'chon', con can' že' che yogo' benach, le yogüe' bi chesone' can' ža ley chen'. <sup>20</sup> Bi nacho zoa bene' naque' bene' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho bene' güen da' xinj.

### Bene' šejnilaže' Jesucriston' gaque' bene' güen len Diosen'

<sup>21-22</sup> Na' na'a Diosen' ba blo'e can' goncho cont gaccho bene' güen len le', na' bich bi že' che da' ca' ža leyna' cheyała' goncho, san že' cheyała' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen cani'te chzejni'in cheyała' šejnilaže'cho Jesucriston' cont gaccho bene' güen. Na' toz can' chon Diosen' len yogo'loj benach. <sup>23</sup> Le yogo'cho ba bencho da' xinj, na' ne tocho bi naccho bene' güen can' chaclaže' Diosen' gaccho. <sup>24</sup> Perw na' Diosen' nži'ilaže'de' chio', na' gague bi chzi'e par že' naccho bene' güen len le', le Cristo Jesús'en' ba bnitlagüe' xtoła'chon'. <sup>25</sup> Diosen' gwsele' Jesucriston' bnežjw cuine' gosote'ne' neche xtoła' benach. Na' note'teze bene' yesejnilaže'ne' nitlao xtoła'gaque'. Diosen' gwsele'ne' cont nacbia' zeje' to licha da' gwdape' yela' chxenlaže' bezixene' xtoła' bene' ca' gwnita' cani' bene' gosejnilaže'ne'. <sup>26</sup> Na' lecze gwsele'ne' cont nacbia' zeje' to licha da' že' che yogo' chio' chejnilaže'cho Jesús'en' naccho bene' güen.

<sup>27</sup> Bi cheyała' gonxen cuincho güe'cho diža' naccho bene' güen. Šaca' choncho doxen dan' ža leyna' zaca' gonxen cuin-

cho güe'cho diža' naccho bene' güen, perw nono chon can' ža leyna'. Con da' chejnilaže'cho Jesucriston', da'nan' zaca' cont yeyaccho bene' güen len Diosen'. <sup>28</sup> Can' naquen, note'tez bene' chejnilaže' Jesucriston', Diosen' že' naque' bene' güen len le' da' chejnilaže'ne', gague lagüe dan' chone' can' ža leyna'.

<sup>29</sup> ¿Cadaque Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel. <sup>30</sup> Le toze Diosen' zoa na' len' že' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho señw dan' že' circuncisión na' len bene' cbi zjazoa señwna'. <sup>31</sup> ¿Cadaque choncho leyna' ca to da' bibi zaca' da' žacho cheyaccho bene' güen len Diosen' cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

### Can' ben da' Abraham

**4** Na' le'e bene' gualaž chia' len le'e bi nacle bene' Israel, da' xoxxta'oto' Abraham ¿bixe nacho che'? <sup>2</sup> Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'. <sup>3</sup> Quinga ža Xtiža' Diosen' da' nyojen: "Abrahanna' gwejnilaže' Diosen' na' da'nan' Diosen' gwne' naque' bene' güen len le'." <sup>4</sup> Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'. <sup>5</sup> San to goclen chon Diosen' že' che chio' chejnilaže'chone' naccho bene' güen len le', le bi choncho da' güen. Choncho da' xinj, na' Diosen' chnitlagüe' da' xinj chechon' še chejnilaže'chone'. <sup>6</sup> Lecz da' Davin' be'e diža' ca mba chzoa ben' chnitlao Diosen' xtole' na' bibi cuent chone' še ba ben ben' da' güen o ba bene' da' mal. <sup>7</sup> Bzój Davin' da' nga žan:

Mba zoacho še ba bezi'xen Diosen' che da xiñj da' ba bencho.

Mba zoacho še ba ñitlagüe' xtoła'chon'.

<sup>8</sup> Mba zoacho še Diosen' že' checho bibi xtoła'cho de.

<sup>9</sup> ¿Chaquele neto'zen' zoato' señw dan' že' circuncisión gac soato' mba can' gwnen'? Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gwejnilaže'ne'. <sup>10</sup> Gwne' che da' Abrahanna' naque' bene' güen len le' cate' bina' soe' señw dan' že' circuncisión, gague beyož gwzoen'na' gwne' ca'. <sup>11</sup> Na' gwdechle gwzoe' señwna' cont gwnezde' Diosen' ñitlagüe' xtole' da' ba chejnilaže'ne'. Na' da'nan' Abrahanna' naque' xoxxtao' yogo' bene' chesejnilaže' Diosen' cont ñitlao xtoła'gaquen' la'czla' bi zjazoe' señwna'. <sup>12</sup> Na' lecze naque' xoxxtao' neto' bich bi xtoła'to' de da' chejnilaže'to' Diosen', neto' zoato' señw dan' že' circuncisión. Perw gague naque' xoxxta'oto' da' zoato' señwna', san da' chejnilaže'to' Diosen' can' gwejnilaže' da' Abrahanna' le'.

### Diosen' bene' güen len da' Abrahanna' da' gwejnilaže'ne'

<sup>13</sup> Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejnilaže'ne'. Da'nan' gwne' Diosen' naque' bene' güen gague da' bene' can' ža leyna'. <sup>14</sup> Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža che da' Abrahanna'. <sup>15</sup> Na' leyna' nsan' castigw che benachen', le bi chesone' can' žanna. Šaca' bibi ley de da' gwžian bia' bi da' cheyała' gon chio' benach, bibi xtoła'cho de šeca'.

<sup>16</sup> Can' naquen, note'teze bene' chesejnilaže' Diosen', none' legaque' ca xiñj diaža che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoj da' Moisésen' gac cheto' yežlion'. Na' naczen da' li gon Diosen' güen len note'tez bene' chejnilaže'ne'. Na' gone' ca' cont gacbia' to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca xoxxtao' yogo' chio' chejnilaže'chone', <sup>17</sup> chac can' gože' da' Abrahanna' gwne': "Ba nzoa' le' gaco' xoxxtao' bene' še' nación zan." Dios ben' gwejnilaže' da' Abrahanna' nape' yela' guac cont yosbane' bene' guat, na' chac chone' cont gac da' bina' gac.

<sup>18</sup> Abrahanna' bi gwnezde' nac gac can' gwne' Diosen' gac, san con gwzoe' gwejle'e che Diosen' na' gwzoe' lez gon Diosen' cont ñita' bene' zan xiñj diaža' che'. <sup>19</sup> Gwzoacze' gwejle'e can' gož Diosen' le' la'czla' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. <sup>20</sup> Gwzoateze' gwejnilaže' Diosen' na' bi gocžejlaže' len da' gož Diosen' le' gone', san gwzoachache' gwejnilaže'ne' na' benxene'ne'. <sup>21</sup> Abrahanna' gwnezde' Diosen' nape' yela' guac cont gone' can' gwnen'. <sup>22</sup> Da'nan' Diosen' gwne' naque' bene' güen da' gwejnilaže'ne'.

<sup>23</sup> Na' dan' nyojen žan Diosen' gwne' naque' bene' güen da' gwejnilaže'ne', gague nyojen ca' che Abraham na'zen'. <sup>24-25</sup> Leczze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwñitlagüe' xtoła'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bechis bosbane'ne' ladjo bene' guat ca' cont beyone' chio' bene' güen.

### Zoacho binlo len Diosen' da' chejnilaže'cho Jesucriston'

**5** Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nan' ba zoacho binlo len le'. <sup>2</sup>Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'. <sup>3</sup>Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwchejecho cate' de bichle da' saca'zi'cho. <sup>4</sup>Na' še chonxenlaže'cho cate' chzaca'zi'chon', chlo'en zoachachcho chejnilaže'cho Diosen'. Na' še zoachachcho chejnilaže'chone', nezecho šjayzoacho txen len le'. <sup>5</sup>Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw chen' zoan len chio' na' chnen lo' lažda'ochon' žan chacchgüe Diosen' chio'.

<sup>6</sup>Chio' benač naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doła'. <sup>7</sup>Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'. <sup>8</sup>San Diosen' blo'ede' chacchgüede' chio' da' gwsele' Criston' gote' neče chio' la'czla' zoacho choncho da' xinj. <sup>9</sup>Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lo' bene'. <sup>10</sup>Cana' bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bo-

zoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'. <sup>11</sup>Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

### Adánna' gwleque' da' mal yežlio nga, san Jesucriston' gwleque' da' güen

<sup>12</sup>Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzola' chesat yogo' benačen', le yogo'lole' chesone' da' mal. <sup>13</sup>Benačen' gwzola' chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj. <sup>14</sup>Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lole' gosate' can' chesat bene' ža na'aža. La'czla' legaue' bi gosone' güedenag len to da' gož Diosen' legaue' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen seła' Diosen', len' bxie' yela' mban toli' tocañe.

<sup>15</sup>¡Nža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' benač gatcho lagüe da' ben Adánna' da' xinjen', san yogo' chio' benač guac soacho mba da' nži'i Diosen' benačen' na' gwsele' Xi'ine' Jesucriston' cont chaclene' note'tezcho. <sup>16</sup>Toz Adánna' bi bzenague' che Diosen' na' da'nan' Diosen' gwne' yezezaca'zi' yogo'cze benačen' toli' tocañe che xtoła'gaquen'. Nach Diosen' gwsele' toz bene' güen cont bnitlagüe' xtoła' note'tezcho chejnilaže'chone' na' beyone' chio' bene' güen la'czla' da' zan da' xinj ba bencho. <sup>17</sup>De yela' got che chio' benač neče da' xinj da' ben toz



ben' gože' Adán, san mbalaz juisyw chac che chio' benach neche da' güen da' ben Jesucriston' bnežyw yela' mban che' neche yogo'cho. Diosen' nži'ide' chio', nachen' bibi chchixjue' chonze' chio' ca bene' güen še chejnilaže'cho Jesucriston', na' none' chio' yela' mban toli tocane cont nabia'cho txen len Jesucriston'.

<sup>18</sup> Can' naquen, da' ben toz Adánna' da' xinj, Diosen' gwchogbi'en saca'zi' yogo' benachen' che xtoła'gaquen'. Na' neche da' güen da' ben toz Jesucriston' da' bnežyw cuine' gosote'ne', da'nán' nitlao xtoła' note'tezcho chejnilaže'chone', cont none' chio' ca bene' güen. <sup>19</sup> Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' benach. Na' da' bzenag Jesuscriston' che Diosen' na' bnežyw cuine' cont nitlao xtoła' benachen', da'nán' note'tezcho chejnilaže'chone' none' chio' ca bene' güen.

<sup>20</sup> Cate' Diosen' bnežjue' ley chen' da' bzoj Moisésen' na' gwcha'o gwrench da' xinj da' goson benachen', le bi bosozenague' chen. Perw na' la'czla' gwcha'o gwren da' malen', gwcha'o gwrench yela' ži'ilaže' che Diosen' len chio' benach. <sup>21</sup> Can' chac, de yela' got che yogo' chio' benach da' naccho bene' chon da' xinj, ca'cze Diosen' nži'ide' yogo' chio' benach cont note'tezcho gaccho bene' güen len le' na' gata' yela' mban checho toli tocane še šejnilaže'cho Xancho Jesucriston'.

**Bi cheyała' soacho goncho da' xinj san soacho goncho can' chazlaže' Criston'**

**6** ¿Nacxen' cheyała' goncho na'a ba nezecho nži'ilaže' Diosen' chio'? ¿Gonchcho da' malen' cont yezi'xenchcze Diosen' che chio'? <sup>2</sup> Gague can' goncho. Cate' gwzolao chejnilaže'cho Criston' bich goclaže'cho nabia' da' malen' chio'. Da'nán' guac

nacho ba gotcho len da' xinjen cont bich gonchon. <sup>3</sup> ¿Bi chacbe'ele can' zejen da' gwzoacho nis? Zejen da' chejnilaže'cho Jesucriston' ben' got neche chio', bach naccho ca to bene' guat len da' xinjen cont bich gonchon. <sup>4</sup> Na' dan' gwzoacho nis lecze guac nacho bgaše'cho can' bosocuaše' Criston'. Na' con can' bechis bosban Xancho Diosen' Criston' ladjo bene' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

<sup>5</sup> Na' can' žacho ba gotcho len da' xinjen' dan' chejnilaže'cho Criston', lecze guac nacho bechis bosban Diosen' chio' can' bechis bosbane' Criston', le ba bocobe' yichjlažda'ochon'. <sup>6</sup> Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neche chio', ba none' chio' ca to bene' guat len da' xinjen' cont bich gonchon na' cont da' mal dan' yo'o lo' yichjlažda'ochon' bich soan nabian' chio'. <sup>7-8</sup> Bene' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho nabia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' toli tocane. <sup>9</sup> Na' nezecho Criston' beyas bebane' ladjo bene' guaten' na' gwbat gate' da' yoble le bich soe yela' gotten' le'. <sup>10</sup> Na' cate' gosote' Criston', tni'aze bnežyw yela' mban che' neche xtoła'chon'. Bich chyažjen gwnežyw cuine' da' yoble, san ba zoalene' Diosen' chone' con bi da' chazlaže' Diosen'. <sup>11</sup> Nach dan' gote' neche xtoła'chon', cheyała' soacho goncho cont da' mal dan' yo'o lo' yichjlažda'ochon' bich nabian' chio', na' cheyała' soacho txen len Xancho Jesucriston' cont goncho dan' chazlaže' Diosen'.

<sup>12</sup> Da'nán' bi güe'cho latje nabia' da' malen' cuerp chechon' dan' nac da' gat na' goncho bi da' xinj da' selažen'. <sup>13</sup> Bi

cheyala' gon cuincho lo na' da' gwxiyen' cont goncho da' mal len cuerp chechon'. Cheyala' gon cuincho lo na' Diosen' cont goncho da' güen. Guac nacho Diosen' bechis bosbane' chio' ladjo bene' guaten' da' bocobe' yichjlažda'ochon'.<sup>14</sup> Bich nabia' da' malen' chio', le nezecho Diosen' chbede' chio' gague neče da' choncho can' ža ley dan' bzoj da' Moisés, san dan' naque' bene' šagüe'.

**Bene' chzenag che da' malen' naque'  
ca bene' zoa xan, bene' chnabia'  
le' cont gonche' da' malen'**

<sup>15</sup> ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyala' goncho? Bitw goncho ca'.<sup>16</sup> Nezecho še ba chzenagcho che to bene' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gac šjayzoalencho Diosen' toli tocañe še ca' choncho. San še zoacho chzenagcho che Diosen', nachen' zejczcho choncho da' güen na' šjayzoalencho Diosen' toli tocañe.<sup>17</sup> Na' choa' yela' choxclen che Diosen' na'a ba chzenagle do yichj do laže'le tixi' Diosen' da' ba bzejni'ito' le'e, na' bich chzenagle che da' malen' can' benle cana'.<sup>18</sup> Diosen' ba bebeje' le'e lo' da' malen' na' ba ben cuinle lo ne'en cont soale gonle da' güen.<sup>19</sup> Ba bzejni'ida' le'e bia' diža' che bi da' chac che chio' benach cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chelen', na' benchgualē da' malen', lecze can' cheyala' gon cuinle lo na' Diosen' gonle da' güen cont chazlaže' Diosen' can' chonlen'.

<sup>20</sup> Caten' ne' zejcho choncho da' malen' bi chzenagcho che Diosen' neca choncho da' güen.<sup>21</sup> Na' bibi banez na' le'echo che da' mal ca' ba bencho, san na'a ba cheto'echo chen. Bene' ca' ne' cheson-

teze' da' malen' gata' castigw chegaque' toli tocañe.<sup>22</sup> Na' chio', Diosen' ba bebeje' chio' lo da' malen' na' yo'ochō lo ne'ena'. Da'nan' zejch choncho da' güen can' chazlaže' Diosen' na' šjayzoacho len le' toli tocañe.<sup>23</sup> Še zoacho choncho da' xinjen', gata' castigw checho toli tocañe cate' gatcho. San Diosen' chondadze' chio' to da' güen juisyw, chio' chejni-laže'cho Xancho Jesucriston', chone' cont šjayzoacho len Diosen' toli tocañe.

**Naccho ca to bene' ba got  
len ley da' bzoj Moisésen'**

**7** Bene' migw, da' nga žia' le'e, le nombia'le ley dan' bzoj Moisésen'. Nezczecho con bene' ca' zjamban cheyala'cze yosozenague' che leyna'.<sup>2</sup> Ca to no'ole nšagna', šlac mban bene' che' cheyala' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'.<sup>3</sup> Še no'olen' soalene' bene' yoble šlac ne' mban bene' chen', nape' doļa' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi nacho chone' da' xinj yošagne'e.

<sup>4</sup> Bene' migw, can' naquen len chio' chejni-laže'cho Criston'. Ba belacho len leyna' da' žan saca'zi'cho che xtoļa'chon' toli tocañe. Na' ba gwnitlao xtoļa'chon' dan' bnežjw Criston' yela' mban chen' gosote'ne' le'e yag cruzen'. Da'nan' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'.<sup>5</sup> Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocañe cate' gatcho.<sup>6</sup> Perw na'a ba belacho len ley da' žan cheyala' si'cho castigw toli tocañe, le' Criston' beque'e xtoļa'chon'.

Na' ba chaclaže'cho goncho can' chaclaže' Diosen', na' chonchon gague cont na Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

### Bi güe'cho latje nabia' da' malen' chio'

<sup>7</sup>Bi cheyała' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyała' gona' cont gocbe'eda' chona' da' xinj. Na' gwnezda' naquen mal chzelaža' bi da' de che bene', le leyna' žan: "Bi selaže'le bite'teže da' de che bene'." <sup>8</sup>Na' cate' gwnezda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj. <sup>9</sup>Neda' gwzoa' to timp bi gocbe'eda' bi cheyała' selaža'. Perw cate' bžin ža gwnezda' nžian bia' bi cheyała' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nana' gwnezda' cheyała' sia' castigw che xtolan' toli tocane. <sup>10</sup>Leyna' nyojen cont gwzenagcho chen na' gata' yela' mban checho toli tocane, perw da' bi bzenaga' chen, bzejni'in neda' gata' castigw chia' toli tocane. <sup>11</sup>Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtolan' toli tocane.

<sup>12</sup>Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to licha. <sup>13</sup>¿Nacho leyna' da' naquen güenchguan' chonen cont saca'zi'cho che xtoła'chon' toli tocane? Bi nac len. Da' mal da' yo'o lo' yichjlažda'ochon' bi ben' latje goncho can' cheyała' goncho, na' da'nana' gwchoglaon checho saca'zi'cho che xtoła'chon' toli tocane. Leynan' da' nac da' güen chlo'en chio'

Diosen' chgue'echgüede' da' mal da' choncho.

<sup>14</sup>Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj. <sup>15</sup>Bi choncho da' güen da' chaclaže'cho goncho, san da' xinj da' chgue'echo lenen choncho. Bi chacbe'echo bixchen' choncho ca'. <sup>16</sup>Na' dan' chgue'echo da' mal dan' chonchon', zejen chacbe'echo nac leyna' güen. <sup>17</sup>Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon. <sup>18</sup>Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. <sup>19</sup>Bi choncho da' güen da' chaclaže'cho goncho, san choncho da' xinj da' bi che'necho goncho. <sup>20</sup>Da'nana' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

<sup>21</sup>Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. <sup>22</sup>Lo' yichjlažda'ochon' chbecho goncho can' ža ley che Diosen', <sup>23</sup>perw chacbe'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

<sup>24-25</sup>¿Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nana' si'cho castigw toli tocane. Choxclen Diosen' len' soede' da' mal dan' yo'o lo' yichjlažda'ochon' cont bich nabian'

chío', le ba chejnilaže'cho Xancho Jesucriston'.

**Spiritw che Diosen' chonen  
chío' yela' mban toli tocane**

**8** Na' na'a da' ba naccho txen len Cristo Jesúsén', bich gata' castigw checho toli tocane, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. <sup>2</sup> Cate' ne' zoacho chontezcho da' malen' nchoglaon checho si'cho castigw che xtoła'chon' toli tocane, perw na'a Spiritw che Diosen' ba benen chío' yela' mban toli tocane da' chejnilaže'cho Cristo Jesúsén' na' Spiritw chen' chnabian' yichjlažda'ochon'. Da'nan' bich saca'zi'cho toli tocane. <sup>3</sup> Ley da' bzoj Moisésén' bi gwzoen yebejen chío' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goczze cuerp chen' ca cuerp che chío' bene' güen da' xinj. Na' Jesucriston' bnežjw cuine' neče xtoła'chon' cont da' malen' bich nabian' chío' len xbab da' yo'o lo' yichjlažda'ochon'. <sup>4</sup> Diosen' gwsele'ne' cont soacho goncho da' güen can' ža ley chen' cheyała' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

<sup>5</sup> Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. <sup>6</sup> Le še zoacho chebecho da' malen', nachle si'cho castigw toli tocane, na' še chebecho da' ca' chazlaže' Spiritw che Diosen', guata' yela' mban checho toli tocane na' soa cuzcho binlo len xbab dan' yo'o lo' yichjlažda'ochon'. <sup>7</sup> Choncho ze bene' chgue'e Diosen' cate' chebecho da' malen', le cate' chebecho da' malen' bi

chazlaže'cho neca chac gwzenagcho che ley chen'. <sup>8</sup> Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chío'.

<sup>9</sup> Na' chío', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnilaže' Criston'. (Spiritw che Criston' lecze naquen Spiritw che Dios.) <sup>10</sup> Perw na' še ba zoa Criston' len chío', Diosen' že' naccho bene' güen len le' na' lecze šjayzoacho len le' toli tocane la'czla' yesat cuerp chechon' neče da' malen' dan' de yežlion'. <sup>11</sup> Diosen' bechis bosbane' Cristo Jesúsén' ladjo bene' guaten', na' lecze gwžin ža cate' Diosen' yechis yosbane' chío' len cuerp checho quinga da' chesat, le Spiritw chen' zoan lo' lažda'ochon'.

<sup>12</sup> Da'nan' bene' migw, chonen byen gwzenagcho che Spiritw che Diosen'. Bi cheyała' gwzenagcho che da' mal dan' yo'o lo' lažda'ochon'. <sup>13</sup> Le še soacho gwzenagcho che da' mal dan' yo'o lo' lažda'ochon', saca'zi'cho toli tocane. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocane.

<sup>14</sup> Na' note'tezcho še chzenagcho che dan' chzejni'i Spiritw che Diosen' chío', naccho xi'in Dios. <sup>15</sup> Diosen' bene' chío' Spiritw chen' caten' gwque'e chío' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san choj güižchone', che'chone': "Xa". <sup>16</sup> Na' lecze Spiritw chen' chnen lo' lažda'ochon' cont nezecho naccho xi'in Dios. <sup>17</sup> Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyała'cze zanlaže' cuincho saca'zi'cho bi da' gac checho cont

Diosen' gone' ga gacchgua güen checho txen len le' yaban'.

<sup>18</sup>Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'.

<sup>19</sup>Diosen' bene' beṇaḥ, bene' beyixe', len bica'chle da' zjade. Na' yogo'cho len bichle da' ca' bene' zoacho lo juisyw chbezcho batcan' gon Diosen' gacchgua mba che chio' naccho xi'ine'. <sup>20</sup>Na' yogo' da' ca' ben Diosen' bich zjanacšagüen'. Na' gague con to gualazan zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' beṇaḥ.

Na' txen chbezcho gone' cont gac checho binlo. <sup>21</sup>Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yesyeyacšagüe' da' ca' cont bich te chegaquen. <sup>22</sup>Nezecho ža ṇa'aža yogo' da' ca' ben Diosen' chesežaglaon ca to no'ole beṇe' chzan. <sup>23</sup>Na' gague da' ca'ze chesežaglaon, san lencze chio' beṇaḥ chžaglaochon na' chbežgüe'cho. Ba beṇ Diosen' chio' Spiritw chen' cont nezecho gwžin ža gaquech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. <sup>24</sup>Cate' Diosen' bene' yela' mban checho toli' tocaṇe gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. <sup>25</sup>Na' še bina' le'echo da'na' chbezcho gac, cheyla' cuezcho gaquen sin cbi chjaxe'laže'cho.

<sup>26</sup>Na' Spiritw che Diosen' chaclenen chio', le bi nezecho can' cheyla' goncho yoł güižcho Dios, san Spiritw che Diosen' chacbe'en cate' con chebanecho na' cate' bi cheželecho diža' da'

güe'lencho Diosen', nach chnen gualazcho len diža' da' bi chejni'icho. <sup>27</sup>Na' Dios ben' chna' chgüie' yichjlaždao' yogo'cze bene', chejni'ide' bin' chaclaže' Spiritw chen' cate' chnen gualazcho, le ba gwleje' chio' naccho lo ne'e. Na' con da' chaclaže' Diosen' chṇab Spiriton' lagüen'.

### Diosen' de'e chio' na' da'nan' nono soe chio'

<sup>28</sup>Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwnalaže'. <sup>29</sup>Cate' bina' galjcho Diosen' gwnežde' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch. <sup>30</sup>Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacchgua güen checho txen len Jesucriston' yaban'.

<sup>31</sup>¡Catec güenna' chon Diosen' len chio' ba bsi'e xnezen' gac checho yogo' da' ca'! Len' de'e chio', nachen' notno soe chio'. <sup>32</sup>Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho. <sup>33</sup>Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuış chio' lagüen', le ba gwne' bibi xtoła'cho de. <sup>34</sup>Nono zoa no gac gon cont ṇa Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo beṇe' guat ca', chi'e chnabi'e txen len Diosen'. Na' len' chnie' gualaz chio' lao Diosen'. <sup>35</sup>¿De da' gwžon cont Criston' bich gacde' chio'? ¿Gwžon no da' mal da' gac

checho? ¿Gwžon no yeła' yaše' yeła' zi' da' gac checho? ¿Gwžon no yeła' xi'a che bene' chgue'e chio'? ¿Gwžon no yeła' chbił chdon checho? ¿Gwžon cate' bi de xałana'cho? ¿Gwžon še bi da' xož gac checho? ¿Gwžon še za' no bene' gote' chio'? Bibi de da' gwžon cont Criston' bich gacde' chio'. <sup>36</sup> Chac can' nyojce Xtiža' Diosen' žan:

Ǫxanto' Dios, da' chejnilaže'to' le' nita' bene' chesaclaže' yesote' neto' do ža do yel.

Chesone' xbab nacto' ca to xila' be yesote'.

<sup>37</sup> Na' la'czła' yogo' da' mal ca' za'ac len chio', bi chac chop laže'cho, san chebechğüecho le nezecho zoacze Criston' chacde' chio'. <sup>38</sup> Neda' nezda' bibi de da' gac gwžon cont Diosen' len Criston' bich yesacde' chio'. Yeła' goten' bi gonen, ne yeła' mbanna', ne no angl, ne no da' xigüe', ne no bene' gwnabia', ne da' chac checho na'a o bichle da' za'za'. <sup>39</sup> Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Ǫxancho Jesucriston' beque'e xtoła'chon'.

### Diosen' gwque'e bene' Israel ca' ca xi'ine'

**9**<sup>1-2</sup> Neda' naca' txen len Criston' na' choa' diža' li, bi chonlaža', chnia' chacyaše'chgüeda' na' chacchgüeda' lo' lažda'ogua' che bene' gualaž chia' bene' bi chesejnilaže' Criston'. Spiritw che Diosen' chaclenen neda' cont nezda' diža' lin' choa'. <sup>3</sup> Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaž chia' ca' yesejnilaže' Criston'. Chacda' legaque', le gosaljje' zjanaque' bene' Israel ca' neda'. <sup>4</sup> Diosen' gwque'e xozxtao' neto' bene' Israel ca' xi'ine', na' gwzoe' len legaque' lo' be'ni' juisyw. Na' gwne'

gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'. <sup>5</sup> Bene' gole blao bene' za' che'ełte gosaque' xozxtao' neto' bene' Israel. Na' lo diaža chegaque'na' golje Criston' ben' gwseła' Diosen'. Criston' leczze naque' Dios na' chnabi'e yogo'te benač, yogo'te beyixe' na' yogo'lol' bichle da' de yežlio nga na' gate'teze. Cheyała' gonxenčhone' toli to-cane. Na' can' gonščaczcho.

<sup>6</sup> Na' bi cheyała' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža che da' Israelen' na Diosen' nacto' bene' Israel, le gague yogo'to' chejnilaže'to'ne'. <sup>7</sup> Na' gague yogo' neto' goljto' lo diaža che da' Abrahanna' nacto' dogualje xi'in' diaža che', le gague yogo'to' chejnilaže'to' Diosen' can' gwey-jnilaže' da' Abrahanna' le'. Quinga gož Diosen' Abrahanna' cani', gwne': "Xi'in' diaža che da' Isaaquen' gona' cuent lo di-aža chion'." <sup>8</sup> Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosaljje' lo diaža che bene' Israelen', san bene' chesejle'e gon Diosen' gac chegaque' can' že' con can' gweyjele' da' Abrahanna', legacze' zjanaque' xi'ine' na' zjanaque' xi'in' diaža che da' Abraham. <sup>9</sup> Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni."

<sup>10</sup> Na' gague da' na'zen', san lecz ca' Diosen' be'e diža' che xi'in' da' Rebecan' bin' gosac choptebe' xi'in' da' xozxta'oto' Isaac. <sup>11-12</sup> Cate' bina' yesaljje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabia'be' lebe'." Gwne' ca' cont neze-

cho chbeje' bene' gac güen chegaque', gague lagüe da' chesone' bi da' güen, san cont gac can' chnalazen'.<sup>13</sup> Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

<sup>14</sup> Bi cheyala' goncho xbab Diosen' cbi chone' da' zej to licha dan' chone' ca'. Zejczje to licha.<sup>15</sup> Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." <sup>16</sup> Diosen' chbeje' bene' cont yeyaše'laže'de' le', gague can' chaclaže' benachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. <sup>17</sup> Na' Xtiža' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yela' guac chia' da' chona' len le'. Chonan' cont yeseneze bene' že' doxen lo yežlion' zoa' chnabi'a." <sup>18</sup> Can' naquen, Diosen' cheyaše'laže'de' con non' chazlaže' yeyaše'laže'de', na' lecze bene' zjanaque' bene' güedenag, lecze chazlaže' gone' legaque' bene' güedenag.

<sup>19</sup> Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' benačh. ¿Bixčen' že' de xtoła'chon' še ca'?" <sup>20</sup> Perw ¿no nac chio' benačh gacyožlencho Diosen'? Ca to no yeso' xguague bi gac yen' bene' ben len: "¿Bixčen' beno' neda' quinga?" <sup>21</sup> Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

<sup>22</sup> Na' bi nacho chon Diosen' con can' chazlaže' len chio' benačh yogo' ni'a, nžie' bia' gwnežjue' castigw toli tocane che bene' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' sela'te' legaque' lo yi' gabilen' la'czla' zjazaque' yesebiaye'e.

<sup>23</sup> Chone' ca' le nžie' bia' gone' da' güen juisyw len note'tezcho chejnilaže' chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. <sup>24</sup> Chion' ba gwleje' gac güen checho balcho naccho bene' Israel na' balcho bi naccho bene' Israel. <sup>25</sup> Can' ža le'e libr dan' bzoj Oseas ben' be' xtiža' Diosen' cani', žan:

Bene' ca' bi zjanaque' yež chia', neda' Dios nia' legaque' yež chia', na' bene' ca' bi gocda', yapegaca'ne' chacda' legaque'.

<sup>26</sup> Na' yež gan' gož Diosen' bene' ca': "Bi nacle yež chia'", na'teze Dios ben' zoa toli tocane ye'e legaque' xi'ine'.

<sup>27</sup> Na' Isaías ben' be' xtiža' Dios cani' gwne' quinga che da' xozxtao' neto' bene' Israel: "La'czla' chio' bene' Israel šancho ca' yox da' chi' cho'a nisdao', bal' gacho šjayzoacho len Diosen'. <sup>28</sup> Le Diosen' gone' can' ba nchoglagüen' len chio' benačh, na' bedao'nez gone' doxen can' ba ngüie' gone'." <sup>29</sup> Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'ane' to chope bene' lo nación Israel chechon', ba gwžiai'cho can' gosac che bene' Sodoma na' bene' Gomorra ca'.

### **Bene' Israel bene' bi chesejnilaže' Criston'**

<sup>30</sup> Quinga ba goc, bene' bi zjanaque' bene' Israel bi besyeyiljue' nacle yesone' cont Diosen' ne' zjanaque' bene' güen len le', perw bale' ba chesejnilaže' Criston' na' da'nan' ba zjanaque' bene' güen len Diosen'. <sup>31</sup> Na' zan bene' Israel gualaž cheto' zjanao' to ley da' chžian bia' nacle' yesone' cont yesaque' bene' güen len Diosen'. Perw bi zjanaque' bene' güen len le', le bi chesone' doxen can' žanna'. <sup>32</sup> Na' bi goc yesaque' bene' güen len Diosen', le gosacde' yesone' da' güen

cont yesaque' bene' güen len le' na' bi gosache'ede' con bene' yesejnilaže'ne' yesaque' bene' güen len le'. Goc chegaque' ca chac che bene' jati'i to yej.<sup>33</sup> Quinga nyoj Xtiza' Diosen' chegaque': Gan' nzi' Sión seļa' to bene', na' bena' zaca'lebe' ca to yej da' chego' bene' na' ca to yej xen da' šjati'i bene' na' bixe',

le bene' zan bi yesejnilaže' ben' seļa'.

Na' note'teze' yesejnilaže' bena' seļan', gwbat yesyetinjde' che dan' gosejnilaže'ne'.

**10** Bene' migw, lo' lažda'ogua' che'nchgüeda' bene' Israel gualaż chia' yesejnilaže' Jesucriston' cont gata' yela' mban chegaque' toli tocaņe, nachen' choļ güiža' Diosen' chnaba' gaclene' legaque'.<sup>2</sup> Nežda' da' zan da' chesone' chesacde' yebe Diosen' legaque', perw bi chesache'ede' bin' chazlaže' Diosen'.<sup>3</sup> Bi chesejni'ide' cheyaļa' yesejnilaže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'nan' bi chesejnilaže' Jesucriston' can' chaclaže' Diosen' yesone'.<sup>4</sup> Le yogo' bene' chesejnilaže' Criston' ba besyeyaque' bene' güen len Diosen'. Na' chio' chejnilaže'chone' ba nezecho nono gac gonyañe' can' ža ley dan' bzoj Moisésen', neca gac yeyaque' bene' güen da' na'ogüe' lezen.

<sup>5</sup>Da' Moisésen' bzoje' can' cheyaļa' gon bene' cont gaque' bene' güen len Diosen', gwne': "Note'teze bene' chone' cayanen' ža leyna', nachen' guac bane' toli tocaņe."<sup>6-7</sup> Na' chio' ba naccho bene' güen len le' da' chejnilaže'chone', na' bich choncho xbab načo: "¿No gac cue yaban' na' no gac yetj gan' že' bene' guaten'?" šaca' nacle goncho šjaxi'cho Criston' cont gaclene' chio'.<sup>8</sup> San diža' güen da' chyixjue'eto' žan: "Ba nombia'cho diža' da' cha-

clenen chio'. Choncho xbab che len na' choe'cho diža' can' žan." Lenña' diža' da' chyixjue'eto' bene' cont yesejnilaže' Jesucriston'.<sup>9</sup> Che'to' bene': "Še güe'lenle bene' diža' cont yesenezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bechis bosbane' Jesucriston' ladjo bene' guaten', nachen' gata' yela' mban chele toli tocaņe."<sup>10</sup> Le cheyaļa' šejle'cho lo' yichjlažda'ochon' cont yeyaccho bene' güen len Diosen' na' lece cheyaļa' güe'lencho bene' diža' che dan' chejnilaže'cho Criston' cont gata' yela' mban checho toli tocaņe.

<sup>11</sup>Xtiza' Diosen' nyojen žan: "Note'tez bene' yesejnilaže' Diosen', gwbat yesyetinjde' che da' gosejnilaže'ne'."<sup>12</sup> Baļcho naccho bene' Israel na' baļcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'loļ bene', na' cheyaše'laže'de' note'tezcho chnabcho gaclene' chio'.<sup>13</sup> Can' gwne': "Note'tez bene' yesenabe' gaclena' legaque', neda' naca' Xanle yebeja' legaque' lo da' malen'."<sup>14</sup> Na' žnacxe yeson bene' yesenabe' goclen lagüen' še bi chesejnilaže'ne'? Na' žnacxe yesone' yesejnilaže'ne' še biņa' yesende' xtižen'? Na' žnacxe yesende' xtižen' še nono zoa no güe'lene' legaque' xtižen'?<sup>15</sup> Na' žnacxe yeson bene' yeseyixjue'ede' xtiža' Diosen' še Diosen' bi seļe' legaque' yeseyixjue'eden'? Chac can' nyoj Xtiza' Diosen' žan: "Chbechgüecho caten' za'ac bene' chesyixjue'ede' diža' güen chosozejni'ide' guac soacho binlo len Diosen'."

<sup>16</sup>Perw gague yogo' bene' gualaż cheto' chosozenague' diža' güen che Diosen'. Chac can' gwna Isaías ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'."<sup>17</sup> Bia'cze cheyaļa'cze yesene bene' diža'



güen da' chzejni'in che Criston' cont yesejnilaže'ne'.

<sup>18</sup>Na' chḡaba: ĩbiḡa' yesene beḡe' Israel gualaž cheton' diža' güen da' chzejni'in che Criston'? Bač gosenden'. Chac can' nyoj Xtiža' Diosen' žan:

Beḡe' že doxen lo yežlion' ba gosende' xtižen';

ba zej xtižen' doxen.

<sup>19</sup>Na' chḡaba' da' yoble: ĩbi gosejni'i beḡe' Israel gualaž cheton' diža' dan' chzejni'in che Criston'? Ba gosejni'iczden'. Le da' Moisésen' bzoje' da' gwna Diosen' čhegaque', žan:

Neda' Dios gona' güen len beḡe' bi zjanac beḡe' nación čhia', na' gue'ele legaque'.

Na' gona' güen len beḡe' nación ca' beḡe' bi chesejni'i, na' ža'ale.

<sup>20</sup>Nach Isaíasen' ben' be' xtiža' Diosen' cani' bi bžebe' gwđixjue'ede' da' nga gwna Diosen', žan:

Beḡe' bi besyeyiljw neda', besyeželde' neda'.

Na' beḡe' bi gosēnab neda', blo'elagua' legaque'.

<sup>21</sup>Na' Diosen' gože' beḡe' Israel gualaž cheton', gwne': "Yogo' ni'a chḡeyoeda' le'e cont gwzenagle čhia', na' zoachächle chonle güedenag len xtižan'."

### **Baḡ beḡe' Israel yesejnilaže' Jesucriston'**

**11** Bi cheyaḡa' goncho xbab Diosen' bechojlaže' nación Israel četo' to ši'ize. Neda' naca' beḡe' Israel, golja' lo diaža' che da' Abraham na' naca' di-aža' che da' Benjamín. <sup>2</sup>Biḡa' yechojlaže' Diosen' neto' nacto' diaža' che ben' gože' Israel, le gwleje' neto' cani'te cont nacto' nación čhe'. Le gon xbab can' nyoj dan' gwna Elías ben' be' xtiža' Diosen' cani', gwđagüe' xya čhe da' xozxta'oto' ca', gože' Diosen': <sup>3</sup>"Xana', beḡe' gualaž čhia' quinga ba gosote' beḡe' ca' goso'e xtižon', na' ba bosyočinje' mes de yej

ca' gan' cheyaḡa' yesonxene' le'. Yetoga neda' zoa' chzenaga' čho' na' lencze neda' chese'nde' yesote'." <sup>4</sup>Nach Diosen' boži'e xtižen' gože'ne': "Ne' nita' gaže mil beḡe' ba gwleja' beḡe' biḡa' yoso-zoa xibe' yesonxene' ĩ gua'a ḡsaca' dan' nzi' Baal." <sup>5</sup>Na' ca'cze naquen ža na'aža, neto' beḡe' Israel chejnilaže'to' Criston' bi nacto' beḡe' zan, perw Diosen' ba gwleje' neto' cont chonxento'ne', le nži'ilaže'de' neto'. <sup>6</sup>Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' chon Diosen' neto' lo yela' beḡe' šagüe' čhe' cate' chbeje' neto' še ca', san naquen to goclenze.

<sup>7</sup>Zan beḡe' nación Israel četon', la'czḡa' chesonchgüe' da' chesacde' cheyaḡa' yesone', bi chesyeželde' naclen' yesone' cont yesaque' beḡe' güen len Diosen'. Perw Diosen' gwleje' baḡto' cont šejnilaže'to'ne' na' none' neto' ca to beḡe' güen. Na' beḡe' yezica'chle zjanaque' güedenag len Diosen'. <sup>8</sup>Chac čhegaque' can' nyoj Xtiža' Diosen' žan: "Diosen' bene' cont zjanaque' ca beḡe' bicze nte. Na' ža na'aža zjanaque' ca to beḡe' bi chle'e len yejlagüen', na' ca to beḡe' bi chene len nagen'." <sup>9</sup>Na' da' Davin' gwne' čhegaque':

Yogo' da' de da' chesyebede' yesaquen ca to da' yeben legaque', na' yesaquen ca to ga šjaselažoe' yesaque' castigw.

<sup>10</sup>Yesečoḡ yichjlažda'ogaquen', na' yedote yesezaca'zi'e can' chzaca'zi' ben' nlegw čože' no'e yoa' zi'i.

### **Diosen' gwleje' baḡ beḡe' bi zjanac beḡe' Israel cont chesejnilaže'ne'**

<sup>11</sup>Nezeczecho zan beḡe' Israel gualaž cheton' bi chesejnilaže' Criston'. Na' chḡaba', ĩzjanaque' ca beḡe' gwyo'o yēja' ni'e? ĩše zjanaque' ca beḡe' gwbiže' na'

gote? Zjanaque' ca to bene' con gwyo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'nan' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel. <sup>12</sup>Da' yoble chnia', da' bi chesejnilaže' bene' gualaž cheto' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel cheton' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogote bene' gualaž cheto' yesenite' yesejnilaže' Diosen', na' cana'ch gac mba juisyw.

<sup>13</sup>Na' le'e bi nacle bene' Israel, che'nda' nezele Diosen' gwseje' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'. <sup>14</sup>Le chaclaža' gona' cont bene' gualaž chia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban chegaque' toli tocaņe. <sup>15</sup>Diosen' ba bnite' zan bene' Israel gualaž cheton' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž cheto' len le'. Na' leca mba gac cate' yesyebigue' len Diosen'. <sup>16</sup>De costumbr che neto' nacto' bene' Israel cate' chonto' yetextil, na' chnežjwto' Diosen' to bļoļ dao' cuazin' cont chlo'eto'ne' doxenen naquen che'. Na' lecze še nacho to loe yaguen' naquen che Diosen', zejen lecze xoze' yaguen' naquen che'. Na' da' xoxxta'oto' ca' ben' gosejnilaže' Diosen' cani' zjazacalebde' ca bļoļ dao' cuazina' na' ca' loe yaguen'.

<sup>17</sup>Nación Israel cheton' zacaleben ca xoze' yag da' ba nchog xan yaga' to lao yag olivo güen na' ba bniten' šla'ale.

Na' le'e bi nacle bene' Israel zacalebe ca xoze' yag olivo da' ze do yixe', da' ba gwchogue' lagüen na' ba bozoen' yag güen cont beyaquen toze. Nach guac nacho loe yag güenna' ba noxen' le'e na' niže' chenna' chac banlenle. <sup>18</sup>Bi gaquele naquechle bene' güen ca bene' Israel gualaž cheto' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

<sup>19</sup>Le'e bi nacle bene' Israel, šeca che'lja lježe: "Diosen' bene' bene' Israel ca yag da' gwchogue' xozen' cont goc bozoe' chio' gualaz legaque'." <sup>20</sup>Da' li can' žalen'. Perw da' bi gosejnilaže' Criston', Diosen' bene' len legaque' ca xoze' yag da' ba gwchog xan yaguen' len, na' ba bozoe' le'e lagüe da' chejnilaže'le Criston'. Da'nan' bi ga'laže'le, san le gwsaca' cont soachachle šejnilaže'lene'. <sup>21</sup>Da' bi gosejnilaže' Criston', Diosen' bene' cont gwdi gwxcaca' bene' Israel gualaž cheto' ca' bene' zjazacalebe' ca xoze' yag güenna', na' lecze ca' gone' saca'zi'le še bi soachachle šejnilaže'lene'. <sup>22</sup>Le gonšc xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soachachle šejnilaže'lene' cont bi gone' saca'zi'le can' ba bene' len bene' Israel gualaž cheton' bi gosejnilaže'ne'. <sup>23</sup>Na' Diosen' yebede' si' lo ne'e bene' Israel gualaž cheto' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca xoze' yag da' bezyone' toze len yag chen da' yoble. <sup>24</sup>Le'e nacle ca xoze' yag olivo da' ze yixe', Diosen' gwchogue' le'e na' bozoe' le'e lo xoze' yag güen la'czla' bi nacle dogualje xozen'. Na' naquechxe yebede' yozoe' bene' Israel gualaž cheto' ca' le'e yaguen' da' yoble bene' ca' zjazacalebe' ca dogualje xoze' yaguen'.

**Beñe' zan beñe' Israel  
yeseyaque' lo na' Diosen'**

<sup>25</sup> Beñe' migw, che'nda' šejni'ile da' nga da' nono ña' ñeze cont bi ga'laže'le gaquele zaca'chle clcl ca beñe' Israel gualaž cheto' ca'. Diosen' be'e latje zane' zjanaque' beñe' güedenag len xtižen' šlac yesejnilaže' beñe' bi zjanaque' beñe' Israel ben' ba bsi'e xpeze yesejnilaže'ne'.

<sup>26</sup> Nach gwžin ža yogo' beñe' Israel gualaž cheto' ca' yesenita' yesaque' lo na' Diosen'. Gac can' nyoj Xtiža' Diosen' žan: To beñe' choj lo ciuda Sión yebeje' le'e lo da' mal da' chonle,

le'e za'le lo diaža che da' Jacob.

<sup>27</sup> Na' cate' žin ža yeca'a xtoła'len', cana'ch ba goc can' ba gwnia' gona'.

<sup>28</sup> Dan' bi chesejle' zan beñe' Israel gualaž cheton' diža' güen che Diosen', da'nana' ba bzoe' šla'ale nación cheton' na' ba gwleje' le'e bi nacle beñe' Israel cont chejle'le che'. Perw na' Diosen' ñe' chacde' beñe' ca', le gwleje' da' xoxzta'oto' ca' cont yesaque' nación che'. <sup>29</sup> Na' Diosen' bi chetiñjde' che beñe' mbeje' yesaque' nación che', ñeca chetiñjde' che goclen da' chone' len beñachen'. <sup>30</sup> Cana'te le'e bi bzenagle che Diosen' na' da' bi gosaclaže' beñe' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'. <sup>31</sup> Na' da' bi chosozenag beñe' Israel gualaž cheto' ca' che Diosen' ña'a, chac ca' cont žin ža gwlo'e Diosen' ñe' cheyaše'laže'de' legaue' can' cheyaše'laže'de' le'e. <sup>32</sup> Diosen' ba gwchoglagüe' che yogo' beñachen' de xtoła'gaue' da' bi chosozenague' che', na' ba bene' ca' cont lecze gwlo'ede' cheyaše'laže'de' yogo'cze'.

<sup>33</sup> Leca beñe' sina' Diosen'. Nezczede' yogo'loł. Gwbat šejni'icho da' nžie' bia' gac o da' nžie' bia' gone' lo yeła' sina' che'. <sup>34</sup> Nyoj Xtižen' žan: "Nono ñeze

yogo' xbab che Xancho Diosen'; nono nape yeła' sina' cont gwzejni'ide' le' can' cheyała' gonen'. <sup>35</sup> Na' nono cheyała' gon xbab yebi'i Diosen' güen len le' še bi da' ba be'ene'." <sup>36</sup> Yogo'loł da' de naquen che Dios. Bene' beñach, beyixe' na' bica'chle da' zjade. Na' lagüe yogo'loł da' bene' zoe' blao. Len' gacxene' toli tocañe. Can' gacšca.

**Cheyała' gon cuincho lo na' Diosen'**

**12** Beñe' migw, Diosen' ba cheyaše'laže'de' chio'. Da'nana' chñeyoeda' le'e le gon doxen cuinle lo na' Diosen' ña'a mbanle. Le gonen do yichj do laže'le. Na' le gac beñe' laždao' xilaže' le can' chazlaže' gonxenchone'. <sup>2</sup> Bi goncho ca cheson beñe' bi zjanombia' Diosen'. San cheyała' ñabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to liča.

<sup>3</sup> Diosen' nži'ilaže'de' neda' na' ba gwsele' neda' cont chyixjue'eda' xtižen'. Da'nana' chnia' bi cheyała' gonxen cuincho, san cheyała' gacbe'echo Diosen' ba goclene' chio' cont chejnilaže'chone' na' non'e' grasyw checho cont goncho bi da' goncho. <sup>4</sup> Can' nac cuerp chechon', zan cuen naquen na' gague toze žin da' cheson to to cuenen. <sup>5</sup> Lecze can' naquen len chio', beñe' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

<sup>6</sup> Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyała' chixjue'echon' na' šejle'cho gaclene' chio' gonchon. <sup>7</sup> Na' še Diosen' ba none' checho gaclencho beñe', cheyała' gaclencho legaue'. Na' še ba none' checho gwsed gwlo'echo beñe', cheyała' gwsed gwlo'echone'. <sup>8</sup> Na' še Diosen' ba none' checho ñeyoecho beñe' cont

yesone' da' güen, cheyała' neyoechone'. Na' še ba none' checho gwnežjwcho da' chyažje bene', cheyała' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyała' cue' yichj-cho güia na'cho legaue'. Na' še ba none' checho yeyaše'cho no bene' yaše', no bene' gole o no bene' güe', cheyała' yebecho gaclenchone'.

### Da' cheyała' gon chio' chejnilaže'cho Jesucriston'

<sup>9</sup>Cheyała' gague ljež benachcho do yichj do laže'cho, na' cheyała' gue'echo da' malen' na' soaczcho goncho da' nac da' güen. <sup>10</sup>Ca chaque biše' goljcho, ca'cze cheyała' gaguecho note'teze bene' lježcho na' gonchone' bene' xench ca cuincho.

<sup>11</sup>Bi gaccho bene' xagüed, san goncho da' non Diosen' chio' goncho do yichj do laže'cho, le chonxenchoncho Xancho Jesucriston' len dan' chonchon'.

<sup>12</sup>Cheyała' yebecho da' nezecho šjayzoacho len Diosen'. Cheyała' gwyo gwchejcho cate' chyi chzaca'cho. Na' lecz cheyała' yoł güižcho Diosen' zan ni'a yogo' ža.

<sup>13</sup>Cheyała' gaclencho bene' lježcho bene' chesejnilaže' Diosen' še bi da' cheseyažjde' na' gwlebcchone' ližcho še zjanaque' bene' zito'.

<sup>14</sup>Cheyała' nabcho lao Diosen' gac güen chebene' chosoči chososaca' chio'. Nabcho gac da' güen chegaue', gague da' mal.

<sup>15</sup>Cheyała' yebecho txen len bene' chesyebe na' cuežcho txen len bene' chesebež'.

<sup>16</sup>Yogo'cho cheyała' goncho toze xbab. Bi cheyała' galaže'cho, san yoł güižcho bene' yaše' bene' bibi chac na' bi gon cuincho bene' sina'.

<sup>17</sup>Še bi da' mal chone bene' chio', bi nacho lecze da' mal yebi'cho len

le'. Cheyała' cue' yichjcho goncho da' güen cont yesena bene' le naczen güen dan' chonchon'. <sup>18</sup>Cheyała' goncho bi da' gac goncho cont soacho binlo len yogo'loł bene'. <sup>19</sup>Chacda' le'e, nachen' chnia' cheyała' gwdecho to šla'ale bite'teze da' chesone bene' chio'. Diosen' gwyoecze' nac gone' len bene' chosoči chososaca' chio'. Xtižen' nyojen žan: "Xancho Diosen' že: Neda' yoži'a che da' mal da' chesone', na' neda' gwnežjua'ne' castigw." <sup>20</sup>Na' lecze žan: "Še chbil chdon bene' chgue'ede' chio', cheyała' güe'chone' da' ye'ej gagüe; le še goncho güen len le', guacbe'eljede' chone' da' mal." <sup>21</sup>Bi güe'cho latje nabia' da' malen' chio' na' yebi'cho mal len bene' chonde' chio' mal, san yebi'cho güen len legaue' cont yesyetinjde' che da' malen' chesonen'.

**13** To tocho cheyała' gwzenagcho che justis bene' chesenabia', le Diosen' bnite' legaue' chesenabi'e. <sup>2</sup>Še bi chzenagcho che bene' chesenabia', bi choncho da' nžia bia' Diosen' goncho, na' lecze chyljwze xtoła'cho na' gaccho castigw da' bi chzenagcho chegaquen'. <sup>3</sup>Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaue', con soacho goncho da' güen da' yesyebede'. <sup>4</sup>Justis ca' chesone' xšin Dios cont soacho güen. Perw še choncho da' xinj, cheyała' žebcho legaue', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal. <sup>5</sup>Da'n'an' cheyała' gwzenagcho chegaue' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. <sup>6</sup>Lecze da'n'an' cheyała' chixjwcho no che bien na' bichle da' cheyała' chixjwcho, cont bene' ca' chesenabia'

guac yesone' da' yo'o lo ne'e yesone', na' cheyała' gwzenagcho chegaque', le Diosen' ba bzo'e legaque' cont chesone' dan' cheyała' yesone'.

<sup>7</sup>Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'an bene' cheyała' dap bala'an. Na' gonxencho bene' cheyała' gacxen. <sup>8</sup>Cheyała' chixjwcho doxen bi da' čala'cho che bene', na' lecze cheyała' gaque yogo' ljež benačho, le še chaquecho legaque', ba choncho da' non ley che Diosen' mandaw goncho. <sup>9</sup>Leyna' žan: "Bi gata'lenle no'ole bi nac no'ol čele o bene' byo bi nac bene' čele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' nžia bia' leyna' goncho, bač chonchon še chzenagcho che dan' žanna': "Le gaque ljež benačle ca chaque cuinle." <sup>10</sup>Še chaque lježcho, bibi da' mal gonechone'. Da'n'an' choncho doxen can' nžia bia' leyna' še ba chaque lježcho.

<sup>11</sup>Caten' gwzolaoco chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'n'an' bich cheyała' gacho ca bene' čhtas, bene' bi chon xbab. <sup>12</sup>Yežlio nga zaca'leben ca ga nac čhol, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' čazlaže' Diosen', le ba zoa yide Criston' yedyxi'e chio'. <sup>13</sup>Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo' ĩnin' ga chbe' žaš, bi cheyała' gacho borrašw, bi cheyała' gata'lencho no'ole bi nac no'ol čecho o bene' byo bi nac bene' čecho o goncho bichle da' nac da' yela' zto', na' bi cheyała' tilen

lježcho o gue'echo bene'. <sup>14</sup>Cheyała' gon cuincho lo' na' Xancho Jesucriston' na' cue' yichjcho goncho da' čazlaže' cont da' malen' da' yo'o lo' yichjlažda'ochon' bi nabian' chio'.

### Toz Diosen' nezde' še bene' lježcho nape' doła'

**14** Še zoa to bene' ba chejnilaže' Criston' na' biña' šejni'ide' nac cheyała' gone', con zoe' čacžejaže', le gwlebe' gaque' txen len le'e, perw bi gacyožlenle' che xbab čen'. <sup>2</sup>Nita' bene' chesejniłaže' Diosen' chesacde' bi zjanape' doła' da' chesagüe' bite'teze yela' guagw, na' lecz nita' bene' yoble biña' yesejni'ide' bite'teze da' ye'ej gagwcho naquen güen lao Diosen'. Da'n'an' chesacde' bi cheyała' yesagüe' bela' na' chesagüe' yixe' cuanze. <sup>3</sup>Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'. <sup>4</sup>¿Noxe nac chio' gwlaže' čecho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

<sup>5</sup>Nita' bene' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To tocho cheyała' soacho do yichj do laže'cho goncho da' chejni'icho cheyała' goncho. <sup>6</sup>Bene' cheson xbab de ža da' zaca'ch ca ža ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' ža ca', lecze chesonxene' Diosen' chesone' xbab' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxclen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene'

Diosen' na' lecze cheso'e yela' choxcen che'.

<sup>7</sup>Ne tocho bi yo'o lo na'cho gwziacho bia' can' soa cuezcho šlaque mbancho, na' neca yo'o lo na'cho gwziacho bia' nac gatcho. <sup>8</sup>Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xanchon'. <sup>9</sup>Cuin Xancho Criston' gote' na' beyas bebane' ladjo bene' guat ca' cont naque' Xan yogo' bene' chesejnilaže'ne' bene' zjamban na' bene' ba gosat.

<sup>10</sup>Bi cheyała' nacho che bene' lježcho zjanape' doła' še bi da' chesone', na' bi cheyała' gue'e lježcho. Yogo'czecho techao lao Criston' cont le' chogbi'en checho še de xtoła'cho o še bibi de. <sup>11</sup>Nyojczye Xtiža' Diosen' žan:

Xancho Diosen' že':

Da' li naca' Dios, zoa' mbana',  
na' yogo' bene' yedesezoa xibgaque'  
laguan',  
na' yogüe' yesene' toz neda' zaca'  
yesonxen benach.

<sup>12</sup>Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

### **Bi goncho da' gwžigan' bene' lježcho gone' da' mal**

<sup>13</sup>Da'nan' chnia', bi cheyała' necho che bene' lježcho neche bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze bene' lježcho gone' da' xinj o še len chonen ca' šjabix šjalažoe'. <sup>14</sup>Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'. <sup>15</sup>Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtez-

chon. Criston' bnežjw cuine' gote' neche bene' lježchon', na' chio' bi cheyała' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e. <sup>16</sup>Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj. <sup>17</sup>Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'. <sup>18</sup>Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

<sup>19</sup>Da'nan' cheyała' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'.

<sup>20</sup>Diosen' ba bnitlagüe' xtoła' bene' lježcho na' bi cheyała' gagwcho da' gonen gac choplaže' no bene' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho.

<sup>21</sup>Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. <sup>22</sup>Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho. <sup>23</sup>Na' de xtoła'cho še chagwcho to yela' guagw na' chaczejlaže'cho chaquecho bilja

cheyala' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

### Cheyala' cue' yichjcho bene' lježcho

**15** Balcho ba zoachachcho chejnilaže'cho Criston' na nezecho de latje ye'ej gagwcho bite'teze. Perw cheyala' gapcho yela' chxenlaže' len bene' bina' yesejni'šagüe'de', na' bi goncho con da' žan checho. <sup>2</sup>To tocho cheyala' goncho bi da' güen da' chazlaže' bene' lježcho ca' goncho, cont gaclenen legaque' yesejnilaže'che' Diosen'. <sup>3</sup>Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'." <sup>4</sup>Na' Xtiža' Diosen' da' bosozoj bene' cani' chzejni'in chio' cont gwyo gwchejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. <sup>5</sup>Diosen' chone' chio' yela' chxenlaže' cont chy chchejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesús'en'. <sup>6</sup>Na' gone' ca' cont toze can' nale gonxenle Dios ben' nac Xa Xancho Jesucriston'.

### Diosen' chaclaže' bene' bi zjanac bene' Israel yesonxene' le'

<sup>7</sup>Da'nan' cheyala' le'e to to bene' lježcho binlo ca Criston' chle'ede' to to chio' binlo, chio' chejnilaže'chone'. Goncho ca' cont gacxen Diosen'. <sup>8</sup>Can' goc len Cristo Jesús'en', bzexjw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaque'. <sup>9</sup>Na' lecze bid Criston' cont le'e bi nacle bene' Israel lecze gonxenle Diosen'

da' ba beyaše'laže'de' le'e. Chac ca nyoj Xtiža' Diosen' dan' žan:

Da'nan' gua' yela' choxcen chio' gan' že bene' bi zjanac bene' Israel, gola' gonxena' le'.

<sup>10</sup>Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' nación che'.

<sup>11</sup>Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

<sup>12</sup>Na' da' Isaías ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diža' che da' Isaí.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' legaque'.

<sup>13</sup>Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soachachle yebele da' nezele šjayzoale len le'.

<sup>14</sup>Bene' migw, nezda' ba nacle bene' šagüe' bene' chon da' güen, na' nezda' chejni'ichgüele na' chac chneyoe lježle.

<sup>15</sup>Pero le'e cart nga ba beyaxjda' gwdila' le'e cont gonchle xbab, le Diosen' beži'ilaže'de' neda' gwleje' neda'.

<sup>16</sup>Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaque' cont bale' gosejle'e xtižen' na' gosaque' lo ne'e cate' Spiritw chen' benen lažda'ogaquen' xilaže'.

<sup>17</sup>Chbeda' chona' xšin Diosen' da' ba goclen Cristo Jesús'en' neda' chona'.

<sup>18</sup>Bi cheyaxjda' gua' diža' che bi da' ba ben bene' yoble, san choa' diža'

che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'.<sup>19</sup> Spiritw che Diosen' goclenen neda' cont bena' yela' guac na' bichle da' besyebane bene' gate'teze gwy'a be'lena' legaue' xtiža' Diosen', gwzologua' Jerusalén na' bžintia' gan' nzi Ilfrico. Na' ba gwdixjue'eda' xtižen' doxen gan' gwsele' neda'.<sup>20</sup> Na' ba bena' byen da' bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'.<sup>21</sup> Da'n'an' chac can' nyoj Xtiža' Diosen' žan:

Bene' ca' bina' yesende' xtižen' yesombi'ene',  
na' bene' ca' bina' yesenezde' che' yesejni'ide' che'.

### Pablon' šej'e Roma

<sup>22</sup> Da' chzejni'ida' bene' ga yoble xtiža' Criston', da'n'an' bi goc yida' gan' zoalen' la'czla' zan ni'a ba goclaža' yida'.<sup>23</sup> Cana'te zelaža' yedena'a le'e, perw na'ach ba beyož bena' da' gwlo'o Diosen' lo na' gona' do nga.<sup>24</sup> Nach cate' ša'a España cana' chacda' tia' yedena'a le'e. Na' mbalaz soa' yeyož le'eda' le'e na' gaclenle neda' cate' ša'a España'.<sup>25</sup> Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'.<sup>26</sup> Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'.<sup>27</sup> Bene' ca' bosotoben' besyebede' bosonežjue' mechon', na' naquen to goclen da' cheyała' yesone' len bene' Israel gualaž cheto' ca', le la'czla' legaue' bi zjanaue' bene' Israel, ba zjanone' chegaue' yogo' da' güen da' ba bzejni'i Diosen' neto' bene' Israel,

na' da'n'an' cheyała'cze yesaclene' bene' gualaž cheto' ca' len da' cheseyažjde'.<sup>28</sup> Cate' bačh beyož bena' lo na' bene' Jerusalén ca' mechon' bdooben', cana'ch sa'a ša'a España' na' tia' na'a le'e.<sup>29</sup> Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda'olen' na' soachguacho mba.

<sup>30</sup> Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'n'an', bene' migw, chnaba' gacle neda' txen yol güižcho Diosen' cont gaclene' neda'.<sup>31</sup> Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo na' Diosen' yesazlaže' ca dan' güe'gaca'ne'.<sup>32</sup> Nach še Diosen' gone' latje, mbalaz yedena'a le'e na' yeyaclaža' soa' na' len le'e.<sup>33</sup> Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcacze gac.

### Pablon' chguape' tiox bał bene' že' Roma

**16** Chneyoeda' le'e le gon txen len bene' zanchu Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencrea.<sup>2</sup> Le gwlebe' ca cheyała' gonle len ljež chio' yo'ochu lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'.

<sup>3</sup> Le gwguap tiox Priscila len bene' che' Aquila. Legaue' ba gosone' žin che Cristo Jesús'en' txen len neda'.<sup>4</sup> Besezanlaže' cuingaque' yesate' cont bososle' neda' lo na' yela' goten'. Choa' yela' choxclen chegaue' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonx-



ene' Jesucriston' cheso'e yela' choxc-len chegaque'. <sup>5</sup>Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwejnilaže' Criston'. <sup>6</sup>Nach le gwguap tiox María no'olen' ba benchgua xšin Diosen' gan' zoalen'. <sup>7</sup>Na' le gwguap tiox bene' gualaž cheto' Andrónico len Junias. Legaque' byobch gosejnilaže' Criston' clel ca' neda' na' t xen gota'to' ližya. Lecz ca' postlw ca' yezica'chle cheso'e diža' güen chegaque'.

<sup>8</sup>Le gwguap tiox bene' xmigua' Amplias, le chacda'ne' da' ba chejnilaže' Xancho Criston'. <sup>9</sup>Na' le gwguap tiox Urbano ben' chon xšin Criston' t xen len chio', na' lecze Estaquis, le chacda'ne'. <sup>10</sup>Lecz le gwguap tiox xmigua' Apelles. Da' zan ba bene' blo'e chejnilaže' Criston' do yichj do laže'. Na' le gwguap tiox bene' ca' že' liž Aristóbulo. <sup>11</sup>Na' le gwguap tiox bene' gualaž chia' Herodión na' lecze bene' ca' že' liž Narciso, con noe' chesejnilaže' Criston'. <sup>12</sup>Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox bene' zanco Pérsida. Chaquechone' da' ba benchgüe' xšin Xancho'. <sup>13</sup>Na' le gwguap tiox Rufo. Naque' bene' blao len chio' chejnilaže'cho Xancho Jesucriston'. Na' lecze le gwguap tiox xne'ena', le ba none' neda' ca' xi'ine'. <sup>14</sup>Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaque'. <sup>15</sup>Na' le gwguap tiox Filólogo na' Julia na' len Nereo na' bene' zanen', na' Olimpas na' yogo' bene' lježcho nita' len legaque'.

<sup>16</sup>Na' cate' chežagle t xen le gwnopa' na' lježle cate' chguap lježle tiox cont nacbia' chaque lježle. Na' bene' ca' chesedop chesežag chesonxene' Criston'

yogo'te yež gan' ba gwy'a chosoguape' le'e tiox.

<sup>17</sup>Bene' migw, chneyoeda' le'e le gwsaca' cont bi gwzenagle che bene' zjanac bene' güetil, bene' chesaclačže' gonle da' xinj, le bi chesone' t xen len dan' ba bsedle che Diosen'. <sup>18</sup>Bi chosozenague' che Xancho Jesucriston' san chosozenague' che da' mal da' yo'o lo yichjlažda'ogaquen' na' chesone' con can' žanna'. Na' cheso'e diža' xdan chosopede' bene' chesejle'daze cont chesexoayague' legaque'. <sup>19</sup>Yogo'ze bene' zjanezde' chzenagle che bene' chosozejni'ide' le'e, na' danan' chbeda'. Perw chaclaža' gacle bene' sina' cont gwzenagle che da' nac da' güen, gague gwzenagle che da' nac da' mal. <sup>20</sup>Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcacze' le'e.

<sup>21</sup>Timoteo ben' chonlen neda' xšin Criston' nga chguape' le'e tiox, na' lecze ca' cheson bene' gualaž cheto' Lucio na' Jasón na' Sosípater.

<sup>22</sup>Neda' Tercio chzoja' cart nga con can' ža Pablon', na' lecze chguapa' le'e tiox, le naccho t xen chejnilaže'cho Xancho'.

<sup>23</sup>Lecz Gayo chguape' le'e tiox. Neda' Pablo zoa' liže' na' lecze liže' nga chesežag bene' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len bene' biše' Cuarto.

<sup>24</sup>Soašca Xancho Jesucriston' gaclenšque' yogo'le. Na' ca'šcacze' gac.

### Chonxene' Diosen'

<sup>25</sup>Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyixjue'eda' chzejni'ida' bene' che Jesucriston'. Na' chzejni'ida' xtiža' Diosen' da'

nono na' neze cate' za' xete yežlion',  
<sup>26</sup>perw na'a Diosen' ba bzejni'ide' chio'  
 bi zejen da' ca' none' mandadw bosozoj  
 bene' ca' bosozoj Xtižen' cani'. Na' Dios  
 ben' zoa toli tocane chaclaže' šej diža'  
 čen' yogo' yež cont yogo' chio' benach  
 šejnilaže'cho Jesucriston' na' gwzenag-  
 cho čhe'.

<sup>27</sup>Toze Diosen' zaque' gonxen chio'  
 benach, na' tozen' napchgüe' yela' sina'.  
 Na' da' gwsele' Xancho Jesucriston' cha-  
 clene' chio', da'nan' chac chonxenchone'  
 toli. Ca'šcacze gac.

## CART NECHW DAN' BZOJ POSTLW SAN PABLO CHE BENE' CA' ŽE' CORINTO

### Pablon' chzoje' bene' chesedop chesežague' chesonxene' Jesucriston' Corinto

**1** Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiox txen len bene' migw checho Sóstenes ben' lecze chejnilaže' Jesucriston'. <sup>2</sup>Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nana' Diosen' ba gwleje' le'e cont yo'ole lo ne'e, can' gwleje' yogo' ben' chosol giüiže' Xancho Jesucriston' na' zjanaque' le' txen gate'tezechle, le lecze naque' Xangaquen'. <sup>3</sup>Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'lo lo yichjlažda'ole.

### Diosen' chaclene' chio' chejnilaže'cho Criston'

<sup>4</sup>Yogo' ni'a choa' yela' choxclen che Diosen' par le'e can' chaclene' le'e lagüe chejnilaže'le Jesucriston'. <sup>5</sup>Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' chen'. <sup>6</sup>Na' ba chonle cont nacbia' xtiža' Criston' da' chejle'le naquen da' li. <sup>7</sup>Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. <sup>8</sup>Na' Diosen' gaclene' le'e soachachle gonle can' chazlažen' cont bibi doła' gaple caten' yid Xancho Jesucriston' yeto. <sup>9</sup>Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

### Nža' nža'te chesena bene' chesonxen Jesucriston' Corinton'

<sup>10</sup>Bene' migw, le'e chejnilaže'le Jesucriston'. Da'nana' chneyoeda' le'e, le gon txen len lježe' na' bich gacle chople o šon taple len da' chonle xbab na' len da' žale. <sup>11</sup>Chnia' ca' bene' migw, le bene' nita' liž Cloé ba gose'e neda' chdile chšašle. <sup>12</sup>Chnia' chdile chšašle, le balle žale: "Naca' txen len da' chsed chlo'e Pablon'." Na' yeballe žale: "Naca' txen len da' chsed chlo'e Apolosen'." Na' yeballe žale: "Naca' txen len da' chsed chlo'e Pedron'." Na' yeballe žale: "Naca' txen len da' chsed chlo'e Criston'." <sup>13</sup>¿Chaquele bid Criston' neche to chopzle? ¿Chaquele nedan' Pablo bnežjw cuina' gota' le'e yag cruz neche le'e? ¿Zsoale nis cont blo'ele chejnilaže'le neda'? Gague can'. <sup>14</sup>Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis. <sup>15</sup>Da'nana' noch no zoa len le'e bene' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'. <sup>16</sup>Na' neda' lecze bzoa' nis bene' ca' že' liž Estéfanos, na' bi za'laža' še zoa nochle bene' bzoa' nis. <sup>17</sup>Nezda' Criston' bi gwsele' neda' cont gwzoe' bene' nis san cont chixjue'eda' diža' güen chen'. Na' bi cheyiljua' no diža' da' chaque benachen' diža' sina' choa' cate' chyixjue'eda' diža' güen chen', le še bene' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

### Criston' bedelo'ede' yela' guac che Diosen' na' yela' sina' che'

<sup>18</sup>Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche xtoł'agaque' le'e yag cruzen'. San chio'

chejnilaže'chone', chio' ba de yeļa' mban checho toli tocaņe, nezecho diža' nan' naquen da' zaca'chgua, le nsan' yeļa' guac che Diosen'. <sup>19</sup> Chac can' nyojen žan:

Neda' gona' cont nacbia' gague da' li zjansina' bene' ca' chesene' zjanaque' bene' sina'.

Na' gona' cont bene' ca' chesejni'i da' zana yežlio nga, bibi de gon ca dan' chesejni'ide'.

<sup>20</sup> Chacljele ĳchixe bene' ca' zjansed yeļa' sina' che benačen'? na' ĳchixe bene' chososed chosolo'ede' ley che Diosen'? na' ĳchixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yeļa' sina' chegaquen' bi naquen da' sina'. <sup>21</sup> Diosen' naque' bene' sina' na' ba bene' cont yeļa' sina' che benačen' bi chaclenen legaue' yesombi'ene'. Le Diosen' chazlaže' con bene' yesejle' xtiže' dan' choe'to' gata' yeļa' mban chegaque' toli tocaņe, la'czļa' yezica'chle bene' chesacde' bibi zaca' xtižen' dan' choe'ton'.

<sup>22</sup> Bene' Israel gualaž cheto' chesenabe' yesele'ede' yeļa' guac cont yesejle'e bin' ža Diosen', na' bene' chesac diža' griego cheseyiljue' no diža' da' chesacde' naquen da' sina'. <sup>23</sup> San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel ļecze chesacde' bibi zaca' dižan' chyixjue'eton'. <sup>24</sup> Perw chio' ba gwlej Diosen' naccho xi'ine', la'aczļa' še naccho bene' Israel o še bi naccho bene' Israel, nezecho Diosen' blo'e yeļa' guac chen' na' yeļa' sina' chen' dan' gwseļe' Criston' bnežjw cuine' neče chio'. <sup>25</sup> Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na'

chesacde' chlo'en bibi yeļa' guac nap Diosen'. Perw gague can', san xbab che Diosen' naquen da' sina'ch ca xbab che benačen', na' nape' yeļa' guac xench ca benačen'. <sup>26</sup> Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanļe nacle bene' sina' len xbab che benačen', gague zanļe nacle bene' chnabia', gague zanļe golļe lo diaža che bene' blao. <sup>27</sup> Diosen' ba gwleje' chio' naccho xi'ine' la'czļa' bibi yeļa' sina' che yežlio nga napcho, na' chesaque benačen' bibi chac goncho; nach Diosen' chaclene' chio' len yeļa' guac che' na' yeļa' sina' che' cont bene' zjanac bene' sina' len xbab che benačen' yesacbe'ede' na' yesacde' zto'. <sup>28</sup> Diosen' ba gwleje' chio' naccho xi'ine', zanchi naccho no bene' yixe', no bene' chesegue'e benač, na' gwleje' chio' cont gwlo'ede' bene' zjanaque' blao len benačen' bibi zjazaque' len le'. <sup>29</sup> Diosen' bene' cont nono gac gonxen cuine' lagüen'. <sup>30</sup> Diosen' ba none' chio' txen len Cristo Jesús'en, na' Criston' nse'e yeļa' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yeļa' sina' chen', na' yeļa' bene' güen chen', na' yeļa' bene' laždao' xilaže' chen', na' ba beque'e xtoļa'chon'. <sup>31</sup> Da'nan' Xtiža' Diosen' nyojen žan: "Bi cheyaļa' gonxen cuincho san gonxencho Xanchon'."

### Pablo be'e xtiža' Criston' ben' gosote' le'e yag cruz

**2** Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwyejni'ile na' gague bia' diža' xdan cont gaguele naca' bene' sina'. <sup>2</sup> San bečhoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neče xtoļa'chon', na' bi be'lena' le'e bichle diža'. <sup>3</sup> Na' cate' gwzoa' len le'e gocbe'eda' bibi chac gona',

na' leca bžeba' na' goła' gwxiza' bena' xbab še bi gwzenagle xtižan'. <sup>4</sup>Na' diža' da' be'lena' le'e gague bian' len yela' sina' che benachen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle. <sup>5</sup>Goclaža' šejnilaže'le Criston' gague neche yela' sina' che benachen', san neche da' gwša' Diosen' xbab chelen' len yela' guac chen'.

### Spiritw che Diosen' chonen yela' chejni'i

<sup>6</sup>Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' chegaquen'. <sup>7</sup>Diosen' ba bzejni'ide' neto' to yela' sina' da' nono gwyejni'i cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yequ'e xtola'chon' cont soacho mbalaz toli tocanē. <sup>8</sup>Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. <sup>9</sup>Na' Xtiža' Diosen' da' nyojen žan: Nono zoa bene' ba ble'ede' da' güen da' gon Diosen' len bene' ca' chesacde' le'.

Nono na' yende' diža' can' gone', nēca na' yesone' xbab lo' lažda'ogüen' can' gaquen'.

<sup>10</sup>Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benachen'.

<sup>11</sup>Can' naquen len benachen', nono neze bi xbab chon bene' yoble, con to tocho nezecho bi xbab' choncho. Na' ca'cze naquen len Diosen', con Spiritw che' na'zen' nezen bi xbab chone'.

<sup>12</sup>Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'nan' bi choncho xbab can' cheson bene' bi chosozenag che Diosen'. <sup>13</sup>Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

<sup>14</sup>Na' bene' bi yo'o Spiritw che Diosen' lo' yichjlažda'ogaque' bi chesejle' che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. <sup>15</sup>Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw bene' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. <sup>16</sup>Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba bene' chio' Spiritw che' cont šejni'icho xbab che Criston'.

### Gaccho txen len nochle bene' cheson xšin Diosen'

**3** Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab chezle. Da'nan' zaca'leble ca' bidao'. <sup>2</sup>Cate' gwzola' be'lena' le'e xtiža' Diosen' žinten ža' na'aža, bina' šejni'ile da' ca' chaclaže' Diosen' šejni'ile. Da'nan' ba bsed blo'eda' le'e da' bi naquen zdebe šejni'ile. <sup>3</sup>Chzenagle che xbab chezle na' da'nan' bi chac šejni'ile xtiža' Diosen' da' naquen zdebe. Da' chgue'e lježle na' chdile chšašle, nacbia' chzenagle che xbab chezle can' cheson bene' bi chese-

jniłaže' Criston'. <sup>4</sup> Chnia' chonle ca bene' bi chesejniłaže' Diosen', le bałle žale: "Nacto' txen da' chsed chlo'e Pablo", na' yebałle žale: "Nacto' txen da' chsed chlo'e Apolos."

<sup>5</sup> Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwejniłaze'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnalaže'. <sup>6</sup> Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsed blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwejle'le xtižen' da' be'lento' le'e. <sup>7</sup> Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsed blo'echde' le'e, san Diosen' zaca'chgüe' da' bene' cont gwejle'le xtižen'. <sup>8</sup> Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. <sup>9</sup> Neto' chzejni'to' le'e xtiža' Diosen', guac nacho nacto' bene' goz go'oñ che Diosen' na' le'e nacle yežlio gan' chac žinna'.

Na' le'e chdop chžagle chonxenle Criston' lecze zaca'leble ca to yo'o che Diosen'. <sup>10</sup> Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'a nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyał'a' gonyane' xbab še xšinen' gonen txen len lene yo'o dan' ba gwlecan'. <sup>11</sup> Na' nono gac cuec bichle lene yo'o, le ba gwlecan', na' Jesucristo bene' chejniłaze'cho, len' nacho naque' lene yo'ona'. <sup>12</sup> Na' bite'teze ze'e da' chozoa bene' lo lene yo'ona', chchejen con nac nonen', še nonen' de

oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. <sup>13</sup> Na' cate' žin ža yid Criston', gone' cont gacbia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. <sup>14</sup> Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon. <sup>15</sup> Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nachguaze gac yechojcho bi šeycho.

<sup>16</sup> ¿Ba beyanłaze'le chio' chdop chžagcho chonxencho Jesucriston' yogo'cho txen zaca'lebocho ca to yodao' gan' chesonxene' Diosen'? ¿Ba beyanłaze'le zoa Spiritw che Diosen' len chio'? <sup>17</sup> Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocanę che bene' gon ca', le Diosen' zoe' len chio' na' naccho lo ne'e.

<sup>18</sup> Bi siye' cuinle. Note'tezle še chaquele nacle bene' sina' len yela' sina' che yežlio nga, cheyał'a' gacbe'ele yela' sina' chelen' bi gaclenen le'e len Diosen'. Na' cheyał'a' gacle ca to bene' bibi chejni'i cont Diosen' gone' le'e yela' sina' chen'. <sup>19</sup> Bene' bi chesejniłaze' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyayin' legaque'." <sup>20</sup> Na' yeto gan' nyojen žan: "Xancho nan' neзде' da' yesede che xbab che bene' sina' ca'." <sup>21</sup> Da'nana' bi cheyał'a' gałaze'le da' nacle txen len note'teze bene' chsed chlo'ede' le'e, le yogo'loł bi da' de zjanaquen chele cont yesaclenen le'e. <sup>22</sup> Neda', len Apolosen',

na' len Pedron', gwsela' Diosen' neto' cont chacento' le'e. Na' yežlio nga na' yela' mbanna', na' yela' goten', na' da' de na'a na' da' gata' bate'teze, yogo' da' ca' zjaden cont yesaclenen le'e. <sup>23</sup>Na' nacle lo na' Criston' na' Criston' naque' lo na' Diosen'.

#### Da' yo'o lo na' postlw ca' yesone'

**4** Cheyala' gacbe'ele neto' ba gwdixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'. <sup>2</sup>Na' chonen byen gonto' con can' ngüe'e lo na'to' gonto'. <sup>3</sup>Na' ca naca' neda', bibi nonen len neda' še no justis che yežlio nga o še le'e nale bi chona' can' cheyala' gona'. Na' neca chnia' che cuina' še chona' can' cheyala' gona'. <sup>4</sup>Lo' lažda'ogua' chacda' bibi doła' napa' len bite'tez da' chona', perw gague da'nana' na Diosen' chia' bibi xtoła' de. Xancho Jesucriston' ne' še chona' can' cheyala' gona' o še bi chonan'. <sup>5</sup>Da'nana' bi cheyala' žialaole nale che note'teze bene' še chone' can' cheyala' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gacbe'echo can' nac xbab da' yo'o lo' yichjlaždao' benachen'. Na' cana' na Diosen' še nocho chon güen.

<sup>6</sup>Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyala' galaže'le da' nacle txen len to bene' chsedde' le'e na' gue'ele yetoe'. <sup>7</sup>Na' žbixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben Diosen' yogo' da' de chele, bi cheyala' galaže'le. <sup>8</sup>Chacljele bibi chyažjele na' chacljele ba nacle bene' zaca'chgua len Diosen' na' guac nabilia'le ca no rey, na' chaquele bi chyažjele neto'. Yebeto'

šaca' da' li nacle ca no rey can' chaque-len' cont soato' mbalaz txen len le'e. <sup>9</sup>Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagiue bene' bibi zaca', ca bene' nchoglaon chegaque' yesate'. Na' benachen' len angl ben že' gan' zoa Diosen' chesene'e can' chac cheto' ca to bene' chne'e to da' yežejde'. <sup>10</sup>Na' da' chonto' xšin Criston' da'nana' bene' zan chesacde' bibi zaca'to', perw le'e, dan' ba chejni-laže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'. <sup>11</sup>Ža na'aža zan ni'a chdeto' gwbin chbił chdonto', bibi xalana'to' de, chesebaže' bene' neto' na' bibi ližto' de. <sup>12</sup>Len ni'a na'to' chonto' žin cont chacbanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chchejto' bi da' chesonde' neto'. <sup>13</sup>Cate' chesene' cheto', chol güižto' legaque' diža' šagiue'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

<sup>14</sup>Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e. <sup>15</sup>Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwdixjue'eda' le'e diža' güen che Jesucriston' cont chejni-laže'lene'. <sup>16</sup>Na' da'nana' chneyoeda' le'e gonle can' chonan'.

<sup>17</sup>Da'nana' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejni-laže' Xancho Jesucriston', na' zoacze' chone' can' cheyala' gone'. Na' chsela'ne' cont šjaye'ede' laže'le can' gwzoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop

chesežague' chesonxene' Criston'. <sup>18</sup> Na' ballé cha'laže'le chaquele bich yida' gan' zoalen'. <sup>19</sup> Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedeña'a bene' ya'laže' ca' še yesone' can' chesenen'. <sup>20</sup> Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gaque' na'zen' gwlo'en še chnabi'e yichjlažda'ogaque'. <sup>21</sup> ¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

### To bene' gwzoalene' xna'zie' ca xo'ole'

**5** Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. <sup>2</sup> Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e. <sup>3</sup> La'czla' bi zoa' na' len le'e, zoaczcho txen na' ba gwchoglagua' can' cheyala' gonle len ben' chon da' malen', can' gonle la'czla' ca' zoa' len le'e. <sup>4</sup> Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesúsén' chaclene' le'e len yela' guac chen'. <sup>5</sup> Nach le cuej ben' ca'ale na' le gone' lo na' Satanás dan' chnabía' da' xigüe' ca' cont gonen can' chaclažen' len le'. Le gon ca' cont še yoša'sca yichjlažda'ogüe' na' bi cuiaye'e toli to-cane cate' žin ža yid Xancho Jesúsén' yeto.

<sup>6</sup> Bi cheyala' gaguele chonchguale güen lao Diosen'. ¿Bi chacbe'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosochine' cate' chesone' yetextil chonnen cont cheyas doxen cuazin'?" <sup>7</sup> Bene' Israel gualaž cheto' bi chesagüe' yetextil da' nchixen levadura lo lni pascw

cheto' na' bi cheso'e latje yega'an ne late'ze levaduran' lo' ližgaque' lo lni'. Na' ca'cze chio' chejnilaže'cho Criston' bi cheyala' güe'cho latje šo' da' malen' yichjlažda'ochon'. Cheyala' cuejyichjcho yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž cheton' lo lni pascon'. <sup>8</sup> Da'nán' cheyala' cuejyichjcho bite'teze da' mal, cont gaccho ca to bene' cobe, soacho do yichj do laže'cho na' goncho da' zej to li.

<sup>9</sup> Cana' bzoja' to cart gwnia' bi cheyala' soacho binlo len bene' chosozoa xtoe' na' bene' cheson bichle da' nac da' yela' zto' len cuerp chegaque'. <sup>10</sup> Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de che bene', na' bene' chesegue'e da' de che bene' na' bene' chesonxene' l gua'a lsaca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'. <sup>11</sup> San da' žia' cheyala' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l gua'a lsaca', o chzi'diže' bene', o naque' bene' borrašw o bene' gwban. Neca cheyala' gagwlencho bene' lježcho bene' cheson ca'. <sup>12</sup> Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyala' chogbi'acho che lježcho še chesonteze' da' mal. <sup>13</sup> Na' Diosen' chogbi'e che xtoła' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.



**Beñe' Corinto chesejnilaže'  
Criston' chesagüe' xya çe  
lježgaque' lao justis ca'**

**6** Chebanda' çeche can' chonle da' chagwle xya tole yetole na' chjaña'le beñe' bi chosozenag çe Diosen' cont chesone' yela' justis çeche. Cheyała' nabe lježle le'e ba gwlej Diosen' nacle lo ne'e cont legaque' yesone' yela' justis çeche. <sup>2</sup> ¿Bi nezele žin ža cate' chio' naccho lo na' Diosen' goncho yela' justis çe yezica'chle beñe' že' yežlio nga? Na' še goncho yela' justis çehegaque', guac goncho yela' justis çe bi da' dao' da' bitec zjazaca'. <sup>3</sup> Na' lece žin ža goncho yela' justis çe angl ca'. Na' naquechxe goncho yela' justis çe bi da' cheson beñe' lo yežlio nga. <sup>4</sup> Na' cate' gagwle xya çe lježle, bi šejle lao beñe' bi chesejnilaže' Criston' cont yesone' yela' justis çeche, le xbab çehegaquen' bi naquen da' zaca'chgua len chio' chejnilaže'cho Criston'. <sup>5</sup> Žia' ca' cont yeto'ele çe dan' chonle na' bich gonle ca'. ¿Ne tole bi nacle beñe' sina' cont gon yela' justis çe lježle cate' bi chac çeche? <sup>6</sup> ¿Da'nan' ch-jatagwle xya çe lježle len justis ca' beñe' bi chesejnilaže' Criston'?

<sup>7</sup> Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone beñe' lježlen' le'e. Yejni'a güe'le latje yeseque'e bi da' de çeche. <sup>8</sup> Perw le'e chca'ale bi da' de çe lježle na' da' zan da' chone lježle.

<sup>9</sup> ¿Bi nezele beñe' ca' zjanaque' beñe' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' beñe' chosoza toxe' na' beñe' cheson bichle da' yela' zto' da' nac ca'. Na' nita' beñe' chesonxen l' gua'a lsaca'. Na' nita' beñe' chesatalene' no'ole bi nac no'ol çehegaque' o beñe' byo bi nac beñe' çehegaque', na' nita' beñe' byo bxej. <sup>10</sup> Nita' beñe' chesebane' na' beñe' chesezelaže' bi da' de çe beñe',

na' beñe' borrašw, na' beñe' chesezi'diža' lježgaque' na' beñe' cheseziye'e beñe' yoble cont yeseque'e da' de çehegaque'. Na' ne to beñe' chon da' mal dan' zjanac ca' bi yesyežine' yaba gan' zoa Diosen' chnabi'e. <sup>11</sup> Baļle beñle da' mal dan' zjanac ca', perw na'a da' chejnilaže'le Xancho Jesúsen', Spiritw çehe Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle beñe' güen len le'.

**Cheyała' goncho da' güen  
len cuerp çehechon'**

<sup>12</sup> Da' li can' chesena beñe', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho bite'teze, bi cheyała' güe'cho latje nabia' bi dan' gonchon' chio'. <sup>13</sup> Na' da' li can' chesena yebaļe', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te çehegaquen. Na' cuerp çehechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lece chaclene' chio' len cuerp çehechon'. <sup>14</sup> Diosen' bosbane' Xancho Jesucriston' ladjo beñe' guat ca', na' lece žin ža cate' yosbane' chio' ladjo beñe' guat ca' len yela' guac chen'.

<sup>15</sup> ¿Bi nezele naccho txen len Criston' na' cuerp çehechon' zjanaquen çe'? Na' bi cheyała' goncho cuerp çehechon' da' nac çe Criston' lo na' no no'ole zle'. <sup>16</sup> Note'tezle še chata'le len no'ole bi nac no'ol çeche o beñe' byo bi nac beñe' çeche, cuerp chelen' gaquen toze len cuerp chen', can' ža Xtiža' Diosen' da' nyojen žan: "Beñe' ca' chope yesaque' toze cuerp." <sup>17</sup> Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

<sup>18</sup> Da'nan' bi cheyała' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosoziayin' cuerp chechon', perw da' ca' zjanac ca' chosoziayin' cuerp chechon'. <sup>19</sup> ¿Bi chacbe'ele Spiritw che Diosen' zoan lo' yichjlaždao' to tocho ca zoa to bene' liže'? le Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho. <sup>20</sup> Na' da' zaca' xen da' ben Xancho Criston' cont bechojcho lo na' gwxiyen'. Da'nan' cheyała' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

### Pablon' cho'e diža' che yela' güešagna'

**7** Na' che dan' chnabele neda' le'e cart chelen', še bene' byon' bi chaclaže' si'e no'olen' gague' xo'ole', güenna' chone'. <sup>2</sup> Perw na' že'chgua bene' chesedalene' no'ole bi nac no'ol chegaque', na' bene' cheson bichle da' nac da' yela' zto' len cuerp chegaquen', na' da'nan' yejni'a gwšagna'le na' to to bene' byo soa xo'ole' na' to to no'ole soa bene' che'. <sup>3</sup> Na' to to bene' byo cheyała' gone' da' naquen gone' len no'ol che' na' to to no'ole cheyała' gone' da' naquen gone' len bene' che'. <sup>4</sup> No'olen' bi gac ne' to gualaze' nac gone' len cuerp chen' na' neca bene' byon' bi gac ne' to gualaze' nac gone' len cuerp chen', san cheyała' yosozenag che lježe'. <sup>5</sup> Na' le'e nšagna'le bi gwžonle gonlen lježle da' cheyała' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yoł güižle Diosen'. Na' te termen' yezoalen lježle da' yoble, le Satanás dan' chnabia' da' xigüie' ca' co'oyelan' le'e gonle da' mal še leca žan soalen lježle.

<sup>6</sup> Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. <sup>7</sup> Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

<sup>8</sup> Na' le'e nac to gualazle, chacda' güenč bi gwšagna'le, na' lecze le'e ba got bene' chele bi yošagna'le, san soale to gualazle can' zoa' neda'. <sup>9</sup> Perw še leca žan soalenle no'ole o soalenle bene' byo, yejni'a gwšagna'le cont bi nabia' yela' chzelažen' le'e.

<sup>10</sup> Na' le'e no'ole le'e nšagna'le, chona' mandadw bi yela'ale len bene' chelen'. Na' gague neda'ze žia' ca', le naquen da' chon Xancho Criston' mandadw. <sup>11</sup> Na' še no'olen' yele'e len bene' che', cheyała' soa to gualaze' bi yeque'e bene' yoble o cheyała' yeyeje' šjayzoalene' bene' che' da' yoble. Na' lecze le'e bene' byo le'e nšagna'le, bi yela'ale len xo'ollen'.

<sup>12</sup> Na' le'e bene' yezica'chle, nia' can' chona' xbab cheyała' gonle, la'czla' Xan-chon' bibi gwne' che da' ca'. To to le'e bene' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyała' yela'ale len le'.

<sup>13</sup> Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len le'.

<sup>14</sup> Bi naquen mal lao Diosen' soalenle bene' chele o no'ol chele bene' bi chejni-laže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'inle ca' zjanacbe' ca xi'in bene' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole. <sup>15</sup> Perw še bene' chele o no'ole chele bi chejni-laže' Criston' na' bich chaclaže' soalene' le'e, le yela'a, le Diosen' chaclaže' soa-cho binlo len lježcho. <sup>16</sup> Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

17 To tocho cheyała' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandaw yesone' ca' gate'teze chesedop chesežague' chesonxene' Criston'. 18 Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yentit señon'. Na' še bina' soale señon' cate' gwlej Diosen' le'e nacle xi'ine', bi nable yosozoe' le'e señon'. 19 Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyała' goncho con bi chaclaže' Diosen'. 20 Con can' naccho caten' gwlej Diosen' chio' naccho xi'ine', ca'tezecen' cheyała' soa cuezcho. 21 Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo na' xanlen', le chixjon na' yechojle. 22 Na' la'czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague benachen'. Na' chio' bina' gaccho esclavo che bene', nac Criston' Xancho, na' guac nacho naccho esclavo che'. 23 Da' zaca' xen da' ben Xancho Criston' cont bechojcho lo na' gwxiyen'. Da'nana' bi cheyała' goncho xbab no benach naque' xancho. 24 Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

25 Na' can' cheyała' gac che no'ol güego' ca', Xancho Criston' bi bene' mandaw can' gac chegacbe', perw neda' nia' can' chacda' cheyała' gac, na' ba beyaše' beži'ilaze' Xancho' neda', na' da'nana' diža' da' choa' zaca'czen gwzenagle chen. 26 Ba za' da' saca'zi'cho na'a, na' da'nana' chacda' güench soa cuezcho con can' ba zoacho. 27 Le'e nšagna'le, bi yela'ale len xo'olle, na' le'e bina' soa xo'olle, bi chiljw xo'olle. 28 Perw bi nacho naquen mal še gwšagna'le, na' neca naquen mal še no no'ol güego' gwšagna'. Con da' zan da'

zed de yežlio nga che bene' zjanšagna', na' chaclaža' bi gac chele ca'.

29 Bene' migw, chaclaža' nia' le'e da' nga: Bich chega'an yezan iz cont goncho dan' ngüia Diosen' goncho. Da'nana' le'e zoa xo'olle cheyała' soale gonle xšin Diosen' ca bene' nono xo'ole' zoa. 30 Na' še de da' yegüine'le, cheyała' soale gonle xšin Diosen' ca bene' bi chegüine'. Na' še zoale mbalaz, cheyała' soale gonle xšine' ca bene' bi zoa mbalaz. Na' še si'le bi da' si'le, cheyała' soale gonle xšin Diosen' ca bene' bibi gwxi'e. 31 Na' še bi da' chchinle da' de yežlio nga, bi cheyała' cue' yichjle che len, le da' te che yog'o' da' chle'echo yežlio nga.

32 Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xancho' gone'. 33 Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. 34 Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

35 Ba gwnia' ca' gague cont gwžona' gwšagna'le san cont gaclena' le'e. Con chaclaža' gaguele Xancho Diosen' do yichj do laže'le sin cbi gwžonen gonle can' chazlaže'.

36 Na' še to bene' chacde' cheyała' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chnabe' le'. 37 Perw še zoa to bene' chacde' güench nono si' xi'ine' no'olen' na' bi nacho chonen byen gwšagna'be',

nacczen güen gone' can' chazlažen' na' bi gwnežjue' bi' chen' gwšagna'be'.  
 38 Can' naquen, bene' chnežjue' bi' chen' chšagna'be' chone' güen, na' bene' bi chnežjue'be' chone' güench.

39 Na' note'teze no'ole nšagna', cheyała' soe' len bene' che'. Perw še ba got bene' che', guac yeque'e bene' yoble, con še bene' chejnilaže' Xancho Criston'.  
 40 Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

### Yela' guagw da' chosožia bene' lao l gua'a lsaca' chesejnilaže'

8 Na' gwnable nac cheyała' goncho len yela' guagw da' chosožie' lao l gua'a lsacan' chesejnilaže'. Da' li yogo'cho chejni'icho bibi zjazaca' l gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyljwlaže'cho nacle goncho cont gaclen lježcho. 2 Na' še chaquecho ba gwyejni'icho to da' zejen, cheyała' gacbe'echo bibi de da' chejni'icho ca cheyała' šejni'ichon.  
 3 Perw cate' chaquecho Diosen', nachle Diosen' nombi'e chio'.

4 Gwnable še guac gagwcho yela' guagw da' chosožia bene' lao l gua'a lsacan' chesejnilaže'. Nezecho l gua'a lsaca' ca' bibi zjazacan', na' toz Diosen' zaque' šejnilaže'chone'. 5 Da' li de da' zan da' chesena beņachen zjanaquen xanguaque' da' chesejnilaže'. Na' la'czła' nita' bene' chesejnilaže' da' de yaba na' yežlion' chesene' da' ca' zjanaquen xanguaque', 6 chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoa-cho cont gonxenchone'. Na' nezecho toze Jesucriston' naque' Xancho, na' le' bene' yogo' beņach, beyixe' na' bichle da' zjade, na' le' chone' yela' mban checho.

7 Gague yogo' bene' lježcho bene' chesejnilaže' Criston' chesejni'ide' da' nga nezecho. Bale' zjayolagüe' chesone' xbab bene' zaca' l gua'a lsaca' ca', na' cate' chesagüe' yela' guagw da' ba bžia bene' lao l gua'a lsacan', chesacde' chesagüe' da' naquen che l gua'a lsacan'. Da'nana' lo' yichjlažda'ogaque' chesacde' malen' chesone', le bina' yesejni'isagüe'de' naquen' naquen.  
 8 Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. 9 Perw bal bene' bina' yesejni'isagüe'de' gague bi nonen len Diosen' še bin' ye'ej gagwcho. Na' neche legaque' cheyała' gwsaca'cho can' goncho cont bi goncho ca yeselažoe' lo da' malen' neche dan' che'ej chagwchon'.  
 10 Le'e nezele nono nac l gua'a lsaca' ca', na' da'nana' guac cue'le ye'ej gagwle ga chesone' lni che l gua'a lsacan' sin cbi bi doła' gaple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. 11 Na' guacte gwžiyi'cho bene' lježcho yela' chejni'i checho, la'czła' Criston' bnežjw cuine' gote' neche le'.  
 12 Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'. 13 Da'nana' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

### Pablon' že' naque' dogualje postlw

9 Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsena' na' bena' xšine' gan' zoale na' da'nana' chejnilaže'lene'. 2 Na' la'czła' še yezica'chle bene' bi chesejle'e naca' postlw, perw le'e chejle'le chia', le

da' chejnilaže'le Xanchon' ben' gwsela' neda', chlo'en da' li naca' postlw.

<sup>3</sup>Quinga choži'a xtiža' bene' ca' chesene' bi gwsela' Diosen' neda' naca' postlw: <sup>4</sup>Guac naba' yeson bene' da' ye'ej gagua' šaca' chaclaža' gona' ca'. <sup>5</sup>Na' guac gwšagna'lena' no'ole chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xanchon'. <sup>6</sup>¿Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyxjue'eto' xtiža' Diosen'?

<sup>7</sup>Nono soldadw zoa bene' nacho cuinze' chyxjue' gastw che'. Na' nono gaz yag uvas še bi gagüe' uvasen' cate' chbian. Na' lecze ca' nono bene' chyoe šib xila' ca' nacho bi che'eje' late' xize'ba' cate' chsien'. <sup>8</sup>Na' dan' žia' nga bi naquen con xbab cheza', le lez can' ža ley dan' bzoj da' Moisésen'. <sup>9</sup>Quinga bzoje' le'e ley: "Bi gwseyjwle cho'a go'n ca' šlac chosolej chosošošjba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'. <sup>10</sup>San že' ca' chzejni'iczde' chio' che bene' ca' cheson xšin Diosen'. Da'nan' že' bene' chgua'ane' go'n na' bene' chonšagüe' trigw cheyała' yesenite' lez yesezi'e late' güeje cosešen'. <sup>11</sup>Na' ca' neto' ba bzejni'ito' le'e xtiža' Diosen', le gon xbab čnaquen da' zcha'och ca' da' cheyała' gonle šaca' gonle da' ye'ej gagwto' na' bichle da' chyažjeto'? <sup>12</sup>Naquen da' cheyała'cze gonle dan' choe'le da' cheseyažje yezica'chle bene' chososed chosolo'ede' le'e, perw nacchen da' cheyała' gonle gonle neto' da' chyažj chchine neto' clal ca' legaque'.

Perw bi gwnabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che

Criston'. <sup>13</sup>Nezele bene' cheson mandadw lo' yodao' che neto' bene' Israel chesacbane' len da' chosonežjw bene' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'. <sup>14</sup>Na' ca'czen' non Xancho Criston' mandadw, bene' chosozenag xtižen' cheyała' yosonežjue' da' cheseyažje ben' cheseyixjue'ede' diža' güen chen'. <sup>15</sup>Perw neda' bi gwnaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clal ca' naba' gonle da' chyažjda', le chebechgüeda' dan' bibi gan chona' chyxjue'eda' xtiža' Criston'.

<sup>16</sup>Bi gac nia' chona' to goclen cate' chyxjue'eda' diža' güen che Jesucriston', le Diosen' gwleje' neda' chyxjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'. <sup>17</sup>Šaca' chona' to da' ža xbab chia' chyxjue'edan', guac nia' zaca'czen sia' bi da' gonle neda' ca' laxjua'. Perw chona' da' gwlo'o Diosen' lo' na' gona', na' gague chona' to da' ža xbab chezan'. <sup>18</sup>Na' še nable bi chcu'a'anen len neda' da' chyxjue'eda' xtiža' Diosen', nach nia' chcu'a'anen da' chbechgüeda' bibi laxjua' chzia' chyxjue'eda' xtižen', la'czla' zaca'cza' si' laxjua'.

<sup>19</sup>Bi naca' xmos bene', perw chzexjw yichja' chon cuina' ca' xmos yogo'te bene' cont šanch bene' yesejnilaže' Criston'. <sup>20</sup>Cate' zoa' len bene' Israel gualaž cheton', chona' can' cheson legaque' na' chona' ca' nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' nezda' bi chonen byen ga'oguan' cont soa' binlo len Diosen'. <sup>21</sup>Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'. Perw bi na-

cho chzoa' ca'ale dan' ža Diosen', le chzenaga' can' ža Criston'. <sup>22</sup> Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaue'. Chon cuina' lebe len yogo'lo' bene' cont gaclena' legaue' na' bale' yesejnilaže' Criston'. <sup>23</sup> Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

<sup>24</sup> Nezecho cate' chosoxonj zan bene' cont choj to bene gon gan, yogüe' chesa'acese', la'czla' tozen' gon gan na' si'e premio. Na' ca chesa'acses bene' ca' do yichj do laže', ca' to to chio' cheyala' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. <sup>25</sup> Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. <sup>26</sup> Da'nana' bi gona' ca to bene' chxonj, to bene' bi nezde' ga cheyala' yežine', o ca to bene' chdile' len ponet, bene' bi nezde' ga cuaže'. <sup>27</sup> Bi chzenaga' che da' mal cate' žan gona' da' mal len cuerp chian', san chona' con ga zelao choeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwduxjue'eda' xtižen' len bene' yoble.

### Cheyala' na'yane'cho cont bi goncho da' malen'

**10** Bene' migw, chaclaža' nezele Diosen' gwzoe' len yogo'lo' da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xna. <sup>2</sup> Na' yogüe' gosaque' txen

len da' Moisésen' cate' gwche'e legaue' gan' gwžialao bejon' laogaue' na' cate' gosodie' nisdao'. <sup>3</sup> Na' yogüe' gosagüe' toze yela' guagw da' bnežjw Diosen' legaue'. <sup>4</sup> Na' yogüe' gose'eje' toze nis da' bnežjw Diosen' legaue'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' legaue'. <sup>5</sup> Na' la'czla' Diosen' goclene' yogüe', zane' bi gosone' cont yebe Diosen' legaue', na' da'nana' gosebiaye'e latje dašen'.

<sup>6</sup> Na' yogo' da' goc chegaue' chzejni'in chio' bi cheyala' selaže'cho goncho bi da' mal can' goson legaue'. <sup>7</sup> Da'nana' chnia' le'e, bi šejnilaže'cho l'gua'a lsaca' can' goson bal da' xozxta'oto' ca'. Le nyox Xtiža' Diosen' žan: "Gosebi'e gose'ej gosagüe' na' gosenite' gosone' l'ni." <sup>8</sup> Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'nana' šonechoa mile' gosate' yela' güen da' xinj chegaquen' lao toze ža. <sup>9</sup> Bi cheyala' goncho Xancho Criston' prueba še gone' can' ba gwnen'. Cani' bal da' xozxta'oto' ca' bi gosejle'e Diosen' gaclene' legaue' can' gwnen', na' Diosen' gwsele' be'lnia gosotba' legaue'. <sup>10</sup> Na' lecze bi cheyala' bixjwcho len Diosen' can' goson bal da' xozxta'oto' ca' cani', na' Diosen' gwsele' to angl che' bene' betue' legaue'.

<sup>11</sup> Yogo' da' ca' gosac chegaue' zjanyojen le'e Xtiža' Diosen' cont chosozejni'in chio' nac cheyala' goncho zoacho na'a, le ba zoa yeyož yežlion'. <sup>12</sup> Da'nana' note'tezcho še chaquecho ba zoachachcho chejnilaže'cho Jesucriston', cheyala' na'yane'cho naquen' goncho cont bi lažo'cho lo da' malen'. <sup>13</sup> Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio'

nac goncho cont soecho bi goncho da' malen'.

<sup>14</sup> Da'nan' bene' migw ben' chacda', le cuejyichj yogo' bi da' cheson bene' chesejnilaže' l gua'a lsaca' ca'. <sup>15</sup> Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. <sup>16</sup> Na' da' ca' che'ej chagwcho chjajze'echo bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejni-laže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. <sup>17</sup> Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejni-laže'cho Criston' naccho toze len lježcho, le toze yetextilen' chagwcho txen.

<sup>18</sup> Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. <sup>19</sup> Bi chaclaža' gonle xbab žia' l gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. <sup>20</sup> Gague can', le cate' bene' chosožie' bi da' chosožie' lao l gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. <sup>21</sup> Bi gac ye'ej gagwcho da' che'ej chagwcho chjajze'echo bi zejen da' got Xancho Criston' na' lecze ye'ej gagwcho gonxenchio da' xigüe' ca'. Bi gac ye'ej gagwcho chopten. <sup>22</sup> Ža'a Diosen' chio' še goncho ca'. Na' bi naccho bene' gual ca' Diosen' cont soecho bi da' gone' gac checho.

### Bi goncho da' chaque bene' lježcho naquen mal

<sup>23</sup> Chesene': "De latje goncho bite'teze", perw nezecho gague yogo' da'

choncho naquen güen, na' la'czla' še de latje goncho bite'teze, gague yogo' da' choncho chaclenen chio'. <sup>24</sup> Ne tocho bi cheyala' goncho da' naquen güen len chio'ze, san goncho xbab še naquen güen len bene' lježcho.

<sup>25</sup> Bite'teze bela' chesote' lagüe' ya'a le gagon' na' bi nable še bosozien' lao l gua'a lsacan' chesejnilaže', cont bi gaczejljaže'le še nable doła' gagwlen. <sup>26</sup> Le Xtiža' Diosen' nyojen žan: "Che Xancho Dios yežlio nga, benach, beyixe' na' yogo'te da' zjade lo yežlion'."

<sup>27</sup> Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosozien' lao l gua'a lsacan', le Diosen' bi che'nde' gaczejljaže'cho še napcho doła' che'ej chagwchon. <sup>28</sup> Perw še no ye' chio': "Da' nga bosozie' lao l gua'a lsacan'", bi gagwchon cont bene' gwna ca' bi gacde' lenczcho chejni-laže'cho l gua'a lsacan', o gacde' napcho doła' chagwchon. <sup>29</sup> Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnable čbixchen' cheyala' cuejyichjcho bich goncho bi da' choncho še bene' lježcho chesacde' napcho doła' chonchon? <sup>30</sup> Na' chonle xbab čbixchen' ža bene' lježcho choncho da' mal chagwcho to yela' guagw še choe'cho yela' choxclen che Diosen' neche len? <sup>31</sup> Quinga naquen, cate' che'ej chagwcho o bite'teze da' choncho, cheyala' gonchon cont gacxen Diosen'. <sup>32</sup> Na' bi cheyala' goncho bite'teze da' choncho še gonen cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxenchio Diosen'. <sup>33</sup> Can' chona' neda', bite'teze da' chona' cheyljwlaža' nacle gona' cont to to bene' soe' mba. Na' bi cheyljwlaža' nacle gona' da' gaclen

cuina' san da' gaclen bene' zan cont gata' yela' mban chegaque' toli tocane.

**11** Neda' chona' con can' ben Criston', na' chneyoeda' le'e gonle can' chonan'.

**Can' cheyała' yeson no'ol ca' cate' chdop chžagcho chonxencho Diosen'**

<sup>2</sup>Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. <sup>3</sup>Na' chaclaža' šejni'ile da' nga. Yogo' bene' byo cheyała' yosozenague' che Criston', le Criston' naque' blaoch ca legaque', na' yogo' no'ole cheyała' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. <sup>4</sup>Note'teze bene' byo še nzoa xłape' cate' choł güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blao len le'. <sup>5</sup>Na' note'teze no'ole še choł güiže' Diosen' o chyixjue'ede' xtiza' Diosen' sin cbi gwcuase' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. <sup>6</sup>Na' še no'olen' bi chaclaže' gwcuase' yichje' can' ba gwnian', yejni'a gwšib doxen yichjen'. Da'nana' še chaquele zto' gwšiblen, nach gwcuase'czlen can' cheson yezica'chle no'ol ca'. <sup>7</sup>Na' le'e bene' byo, bi cheyała' gwcuase' yichjlen' cate' yol güižle Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene' zaca'. <sup>8</sup>Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. <sup>9</sup>Na' Diosen'

bi bene' bene' byon' cont gaclene' no'olen', san bene' no'olen' cont gaclene' bene' byon'. <sup>10</sup>Da'nana' no'ol ca' cheyała' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. <sup>11</sup>Perw naccho txen len Xancho Jesucriston' la'czla' še naccho bene' byo o še no'ole, na' bi cheyała' yeson no'olen' xbab bi cheseyazjde' bene' byo na' neca bene' byo yesone' xbab bi cheseyazjde' no'olen'. <sup>12</sup>Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxañ le', na' Diosen' bene' yogo' benač len bica'chle da' zjade.

<sup>13</sup>Le gon xbab chele na' gacbe'ele bi chazlaže'cho cate' to no'ole choł güiže' Dios sin cbi chcuase' yichje', le can' nac costumbr chechon'. <sup>14</sup>Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. <sup>15</sup>Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcuasen' yichjen'. <sup>16</sup>Še nole chaquele gwšašle che da' nga ba gwnia', cheyała' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

**Bi chjasyeze'ede' Criston' cate' chese'ej chesagüe'**

<sup>17</sup>Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. <sup>18</sup>To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'. <sup>19</sup>Na' ca'ljjan' cheyała'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. <sup>20</sup>Na' cate' chežagle chagwle txen, bi chonle xbab bnežjw cuin Xancho



Jesucriston' neche xtoła'chon', la'czła' chdop chžagle cont šjayze'elen. <sup>21</sup>To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwaxattele na' chzože'le. <sup>22</sup>Yejni'a yega'an ližle ye'ej gagwle clēl ca gagwle lao bene' yaše' bene' bi de chegaque'. Da' chonle ca', nabcia' chgue'e lježle bene' cheyała' yesaque' txen len le'e da' chonxenle Diosen', na' chonle cont chesaque' tole da' bi de chegaque'. Na' naquen malchgua da' chonle ca', bi gac ni'a chonle güen.

### Chjayze'echo bnežjw cuin Xancho Criston' neche xtoła'chon'

(Mt. 26:26-29; Mr.

14:22-25; Lc. 22:14-20)

<sup>23</sup>Xancho Jesúsēn' bzejni'ide' neda' can' šjayze'echo da' bnežjw cuine' neche xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsēn' bexue' to yetextil. <sup>24</sup>Na' be'e yela' choxclen che Diosen' na' beyož be'e yela' choxclen che' na' bzojjen', na' gwne': "Le gagw yetextil nga. Lenna' naquen cuerp chia' da' chnežjua' neche xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'." <sup>25</sup>Na' lecze ca' bene' cate' beyož gosagüe' xše', bexue' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonen'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'." <sup>26</sup>Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neche xtoła' benachen'. Na' can' gonchczcho šlac bina' yide' da' yoble.

### Naquen' goncho cate' chjayze'echo yela' got che Xancho Jesúsēn'

<sup>27</sup>Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsēn' perw še bi chonxenchone' cate' choncho ca', napcho doła', le chonchon ca da' bibi zaca' cuerp che' dan' bnežjue' na' xchene' da' blalje' neche xtoła'chon'. <sup>28</sup>Da'nan' cheyała' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsēn'. <sup>29</sup>Le še ye'ej gagwcho sin cbi gonxencho Xancho Jesúsēn' da' bnežjw cuine' gote' neche xtoła'chon', Diosen' gone' chio' castigw. <sup>30</sup>Na' zanle bi zoale güen na' chacšenele na' bal' bene' ba gosate' da' bi gose'ej gosagüen' do laže'. <sup>31</sup>Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon. <sup>32</sup>Na' cate' napcho doła' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli' tocane can' yesezi' bene' bi chesejnilaže'ne'.

<sup>33</sup>Da'nan' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen. <sup>34</sup>Na' še chbil' chdonle, yejni'a yega'an ližle ye'ej gagwle, clēl ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

### Spiritw che Diosen' chaclenen to tocho cont choncho bi da' choncho

**12** Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

<sup>2</sup>Nezele cate' bina' šejnilaže'le Criston' gweyēle'le diža' güenlaže' na' da'nan'

gwejnilaže'le 1 gua'a 1saca' da' bibi biš grasyw nye'. 3 Na' da'nana' chaclaža' šejni'le da' nga na'a. Note'teze bene' že': "Chgue'eda' Jesúsen'", bi zoa Spiritw che Diosen' len le', perw bene' že': "Jesúsen' naque Xana'", že' ca' da' zoa Spiritw che Diosen' chaclenen le'.

4 Toz Spiritw che Diosen' zoa, perw nža' nža' da' chaclenen to tocho choncho o nezecho. 5 Toz Xancho Jesucriston' chonxencho la'czla' nža' nža' ca chon to tocho xšinen'. 6 Na' la'czla' nža' nža' da' chon to tocho, toz Diosen' chone' cont to tocho chac choncho xšinen'. 7 Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho. 8 Diosen' ba nsi'e xnezen' chon Spiritw chen' cont balcho chac chzejni'icho bene' yoble xbab sina' chen', na' 1ecze Spiriton' chonen cont yeba1cho nezecho to da' nezecho na' chzejni'ichon bene'. 9 Na' 1ecze toz Spiritw chen' chonen cont balcho chejni-laže'chguacho Diosen' na' chac bite'teze da' chnabechone'. Na' da' chaclen Spiriton' chio', balcho chac choncho cont chesyeyaque bene' chesacšene. 10 Na' 1ecze Spiritw nan' chonen cont balcho chac choncho yela' guac, na' balcho chac chyixjue'echo bi da' ba gwna Diosen' chio'. Na' Spiritw che Diosen' chonen cont balcho chacbe'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont balcho choe'cho gwde gwdele diža' da' bi nsedcho, na' yeba1cho chac che'cho bene' lježcho bi zeje diža' ca'. 11 Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

**Yogo' chio' chejni-laže'cho Criston' naccho toze can' nac cuerp chechon'**

12 Cuerp chechon' nsan' zan part, perw zjangoden' txen na' naquen toze. Na' 1ecze ca' chio' chejni-laže'cho Criston'

naccho toze len le' na' len bene' lježcho ca'. 13 Bal' chio' naccho bene' Israel na' yeba1 chio' bi naccho bene' Israel. Bal'cho naccho esclavo na' yeba1cho bi naccho. Perw yogo'czcho gwzoacho nis par blo'echo ba ben Spiritw che Diosen' cont naccho txen len Criston', na' 1ecze toze Spiritw che Diosen' zoan lo' yichjlaždao' yogo'cho.

14 Cuerp chechon' nsan' zan part, na' nža' can' nac to to parten'. 15 Ni'acho guac nan: "Bi naca' toze len cuerpen', le bi naca' ne'en." Perw la'czla' še nan ca', naquen toze len cuerpen'. 16 Na' nagcho guac nan: "Bi naca' toze len cuerpen', le bi naca' yejlagüen'." Perw la'czla' še nan ca', naquen toze len cuerpen'. 17 Šaca' doxen cuerp chechon' naquen yejlaecho, bi gac yenecho. Na' šaca' doxen cuerpen' naquen nagcho, bi gac le'echo. 18 Perw Diosen' bžie' bia' nsa' cuerp chechon' zan part da' cheson žin con can' gwyazlaže'. 19 Na' bi nya' cuerp chechon' šaca' nsan' toze part. 20 San cuerpen' nsan' zan part da' naquen txen cont naquen toze cuerp.

21 Da'nana' yejlaochon' bi gac yen' na'chon': "Bi chyažjda' le'." Na' neca gac ye' yichjchon' ni'achon': "Bi chyažjda' le'." 22 Na' la'czla' bal' part cuerp chechon' chaquecho bitec naquen da' gual, perw chyažjechon. 23 Na' la'czla' bal' part cuerp chechon' chaquecho bitec bi zacan', perw chi' yichjchon, da'nana' cheyacw xacho. Na' part che cuerp chechon' da' bi chaclaže'cho le'e bene', chcuša'e'chon len xacho. 24 Perw part da' nsa' cuerp chechon' da' naquen xdan, bi chcuša'e'chon. Na' Diosen' none' cont chi' yichjcho che part ca' da' bi zjanaquen xdan. 25 Na' none' cuerp chechon' toz cont to to parten' chapši'i lježen lebze na' chesonen žin txen. 26 Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

<sup>27</sup> Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'. <sup>28</sup> Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bał bene' cont cheseyixjue'ede' da' ba gož Diosen' legaque'. Na' da' gwyone gwleje' yebał bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont chesyeyaque bene' chesacšene, na' gwleje' bene' chesaclene' bene' yoble cate' bi da' cheseyažjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'. <sup>29</sup> Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac. <sup>30</sup> Gague yogo'cho chac choncho cont chesyeyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'. <sup>31</sup> Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyała' soa cuezcho.

### Cheyała' gague lježcho

**13** La'czla' še chaccho gwde gwdele diža' da' chesac benachen' na' da' chesac angl ca', perw še bi chaque ljež benachcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež. <sup>2</sup> Na' la'czla' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež benachcho. Na' la'czla' še nezecho

yogo'loł da' nono na' neze, na' la'czla' še chejni'icho yogo'loł da' naquen da' zaque', bibi zaca'cho še bi chaque ljež benachcho. Na' la'czla' še leca chejni-laže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho. <sup>3</sup> Na' še gwnežjwcho bene' yaše' yogo' bi da' de checho na' gwnežjw cuincho yosozey bene' chio', bi gaclenen chio' lao Diosen' še bi chaque lježcho.

<sup>4</sup> Še chaque lježcho, chapcho yela' chxenlaže' len legaque', na' choncho güen len legaque', bi chgüe'echo legaque' še chac güen chegaque', na' bi chonxen cuincho len xtiža'cho, na' bi cha'laže'cho. <sup>5</sup> Na' cate' chaque lježcho bi choncho nacteze len legaque', bi choncho xbab che cuinzcho, bi chbixjwcho, na' bi chgo'olaže'cho. <sup>6</sup> Na' cate' chaque lježcho bi chbecho še chon bene' lježcho da' mal, san chbecho še chone' da' zej to li. <sup>7</sup> Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'loł bene', na' zoacho lez yesone' güen yogo' las, na' chyo chchejlaže'cho bite'teze da' chesone bene' chio'.

<sup>8</sup> Gwbat te che da' cheyała' gague ljež benachcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yažje bichle da' šejni'icho. <sup>9</sup> Biņa' nezecho na'a yogo' da' za' nezecho, na' biņa' gac chixjue'echo binlo yogo'loł da' ba gož Diosen' chio'. <sup>10</sup> Perw gwžin ža cate' gon Diosen' cont yogo' da' de gaquen can' cheyała' gaquen. Cana' te che da' bi naquen ca cheyała' gaquen.

<sup>11</sup> Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwyejni'icho can' chesejni'i bidao'. Na' na'a ba gwcha'ocho na' ba gwlejyichjcho bich choncho can' cheson bidao'.

<sup>12</sup>Na'a biṇa' nezecho binḷo da' nac che Diosen'. Zaca'lebcho ca bene' chne'e to lo spejw da' bitec chlo'e binḷo. Perw gwžin ža cate' le'echo binḷo na' nezecho doxen da' nac che Diosen', na' canan' gombia'chone' binḷo ca binḷo nombi'e chio'. <sup>13</sup>Nachen' da' quinga šone non Diosen' mandawd goncho toli tocaṇe: šejnilaže'chone', soacho lez gone' ga gacch giēn checho, na' gaquecho Diosen' na' ljež benačho. Na' da' zejehen goncho lao da' ca' šone, gaquecho Diosen' len ljež benačho.

**Bene' ca' chesoe'lene' Diosen'  
diža' da' bi zjansede'**

**14** Cheyaḷa' cue' yichjle gaquele Diosen' na' len ljež benačle, na' lecze cheyaḷa' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen bene' bi da' chesone', da' zaca'chen da' cheseyixjue'ede' bi da' ža Diosen'. Lenṇa' cheyaḷa' selaže'chguale gonle. <sup>2</sup>Balcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho benačhen' diža', le notno chejni'i xtiža'chon', con naquen diža' da' chon Spiritw che Diosen' choe'lenchone' la'czla' bi chejni'ichon. <sup>3</sup>Perw bene' chyixjue'ede' bi da' ba gwna Diosen', chaclene' bene' yoble yesenita'chache' yesejnilaže' Diosen', na' yesenite' mbalazech, na' chesyeyacxenlaže' še bi da' chesac čegaque'. <sup>4</sup>Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. <sup>5</sup>Yebeda' šaca' yogo'le gac güe'lenḷe Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e.

Lenṇa' zejehen clēl ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen bene' ljezcho yesenita'chache' yesejnilaže'ne'. <sup>6</sup>Bene' migw, nežda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedēna'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nežda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

<sup>7</sup>Ca nac bžejo, bi mbanen perw zoa ši'in cate' chcuež bene' len, na' lecze ca' arpan' cate' chyin bene' len. Na' še toz nota da' chcuež ben' len bžejoa' o toz nota da' chyin ben' cate' chyine' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. <sup>8</sup>Cate' zoa to bene' chcueže' trompeta cont cheseneze soldadw ca' naquen' yesone', še bi gwcuežen' binḷo, bi yesejni'ide' cheyaḷa' šja'aque' lo gwdile. <sup>9</sup>Ca'cze naquen len chio', še güe'lencho Diosen' diža' da' bi chesejni'i bene', bi gaclenen legaque', le len legaque' naquen ca' che bene' chšalj toze'. <sup>10</sup>Nezecho bene' že' doxen yežlion' gwde gwdele diža' da' chesaque', na' to to benač chesejni'ide' dižan' goljelene'. <sup>11</sup>Na' še chio' bi chaccho diža' da' chac yeto bene', nezecho naque' bene' zito' len chio' na' naccho bene' zito' len le'. <sup>12</sup>Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyaḷa' cue' yichjle gaclenen le'e gonle da' gaclen lježle cont yogo'le soačhačle šejnilaže'le Diosen'.

<sup>13</sup>Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyaḷa' nabocho lecze gaclenen chio' gwzejni'icho

bene' bi zeje diža' dan' choe'lencho Diosen'. <sup>14</sup>Le cate' Spiriton' chonen cont choļ güiža' Diosen' len diža' da' bi nseda', con nezda' lo' yichjlažda'ogua' choe'lena' Diosen' diža', perw bi chona' xbab čen, le bi chejni'idan'. <sup>15</sup>Quinga cheyaļa' goncho cate' choļ güižcho Diosen', cheyaļa' güe'lenchone' bite'teze diža' da' chon Spiritw čen' chio' la'czļa' še bi chejni'ichon, na' lecze cheyaļa' güe'lenchone' diža' da' chejni'icho. Na' cheyaļa' golcho bite'teze da' chon Spiritw čhe Diosen' golcho la'czļa' še bi chejni'ichon, na' lecze cheyaļa' golcho da' chejni'icho. <sup>16</sup>Le še chonxencho Diosen' o choe'cho yela' choxcen čhe' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'. <sup>17</sup>La'czļa' še choe'cho yela' choxcen čhe Diosen' binlo, perw bi chaclenen bene' yoble še bi chesejni'ide' xtiža'chon'. <sup>18</sup>Choa' yela' choxcen čhe Diosen' da' choe'lencha'ne' gwde gwdele diža' da' bi nseda' clcl ca le'e. <sup>19</sup>Perw cate' ndop nžagcho chonxencho Criston' yejni'a gua' gayo'ze diža' da' yesejni'i bene' cont gwzejni'ida' legaque', clcl ca gua' ši mil diža' da' bi yesejni'ide'.

<sup>20</sup>Bene' migw, bi cheyaļa' šo'cho xbab čhe bidao' biņa' šejni'i, san šo'cho xbab čhe bene' chejni'i. Perw len da' malen' cheyaļa' gaccho ca bidao' bi' biņa' gon da' mal. <sup>21</sup>Xtiža' Diosen' nyojen žan: "Neda' Dios gona' cont bene' zito' yesoe'lene' bene' Israel quinga xtiža', perw ne ca'cze bi yosozenague' čhia'." Can' ža Xancho Diosen'. <sup>22</sup>Da'nan' nezecho Diosen' chchine' gwde gwdele diža' da' choe'lenchone' cont bene' bi yesejnilaže'ne' yesacbe'ede' zoacze' len chio'. Na' chio' chejnilaže'chone', Spiritw čhe Diosen' chonen cont bene' cheseyixjue'ede' chio' bi da' ba gož Diosen' legaque'. Can' chone' chzejni'ide' chio'. <sup>23</sup>Le gon xbab nac gac še šlac

ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' baļ bene' bi chesejni'i naquen' choncho chonxenchone' o bene' bi chesejnilaže'ne', legaque' yesene' chactontcho. <sup>24</sup>Perw še bene' ca' bi chesejnilaže' Diosen' o bene' ca' bi chesejni'i naquen' chonxenchone' yesela'aque' šlac yogo'cho chzejni'i lježcho bi da' ba gož Diosen' chio', nach yesacbe'ede' zjade xtole' cate' yesende' xtiža' yogo'cho, na' yesyetinjde' da' malen' chesonen'. <sup>25</sup>Le yesacbe'ede' Diosen' nombi'e xbab da' chesone' lo' yichjlažda'ogüen', nach yosozoa xibe' yesonxene' Diosen' na' yesene': "Da' licze zoa Diosen' len bene' quinga."

#### **Cheyaļa' gonxencho Diosen' binlo na' bi gonchon nacteze**

<sup>26</sup>Bene' migw, cate' chežagle chonxenle Diosen' quinga gonle: Baļle de to da' golle gonxenle Diosen', na' baļle de da' gwsed gwlo'e lježle, na' baļle de da' ba gož Spiritw čhe Diosen' le'e, na' baļle de gwde gwdele diža' da' güe'le da' bi nse-dle, na' yebaļle chaclaže'le čixjue'ele bi zejen gwde gwdele dižan' ba gwna bene' lježlen'. Naquen güen gonle yogo' da' ca' con še gonlen ga gaclenen lježle. <sup>27</sup>Na' še nole güe'lenle Diosen' gwde gwdele diža' da' bi nsedle, le güen', perw do čhopzle o še šonzle na' tgüeje tgüejle, na' tena' choj bene' yozejni'ide' bi zejen diža' dan' ba be'le. <sup>28</sup>Na' še nono zoa no yozejni'i bi zeje dižan', bi cheyaļa' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. <sup>29</sup>Na' še čixjue'ele bi da' ba gwna Diosen', lecze do čhopzle o šonzle chojle čixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen lebze len Xtiža' Diosen' dan' nyoj. <sup>30</sup>Na' še šlac tole choe'le diža', Diosen' gwze-

jni'ide' yetole to da' chixjue'ele, cheyała' cuezle na' güe'le latje chixjue'e ben' yeto dižan'. <sup>31</sup>Yogo'le guac chixjue'ele da' gož Diosen' le'e, perw gonlen tğüeje tğüe-jle cont yogo'le šejni'ichle na' gaclenen le'e. <sup>32</sup>Na' le'e chyixjue'ele bi da' ba gwna Diosen', cheyała' chixjue'elen con baten' naquen güen chixjue'elen. <sup>33-34</sup>Le Diosen' chaclaže' gwsa'le binlo da' chonle caten' chdop chžagle chonxenlne' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža ley na'. <sup>35</sup>Na' še bi da' chesac-laže' no'ol ca' yesenezde', guac yesenabde' bene' chegaque' cate' yesyežin ližgaque', le naquen da' yela' zto' še no no'ole güe'e diža' šlac ndop nžagcho.

<sup>36</sup>Le gon xbab, gague le'e gocle bene' nechw bene' gweyjnilaže' xtiža' Criston', na' bi nacho nezechle ca bene' chesedop chesežag ga yoble chesonxene'ne'. <sup>37</sup>Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyała' gacbe'ele da' quinga chzoja' le'e naquen da' non Xancho Criston' mandadw goncho. <sup>38</sup>Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

<sup>39</sup>Na' quinga naquen bene' migw, le cuec yichjle gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e. <sup>40</sup>Perw binlo gonle yogo' da' chonle cate' chdop chžagle na' bi gonlen nacteze.

### Beban Criston' ladjo bene' guaten'

**15** Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle chen na' zoachachle chejle'len. <sup>2</sup>Na' nezele šjayzoale len Diosen' še soatezle gwzenagle che diža' güen chen'. Na' še bi gwzenagle chen, bibi zejen da' žale chejle'len'.

<sup>3</sup>Diosen' bzende' neda' da' quinga da' zjanaquen la'zelagüe' da' zejen na' bach gwduxjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. <sup>4</sup>Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. <sup>5</sup>Nach jaylo'elagüe' Pedron' na' gwdechle jaylo'elagüe' yezica'chle postlw ca'. <sup>6</sup>Beyoža' jayezlo'elagüe' gwdele gayo' gayoa bene' to ši'ize, bene' chesonxene' le'. Na' zan bene' ca' ne' zjamban, la'czla' bale' ba gosate'. <sup>7</sup>Nach jayzlo'elagüe' Jacobo. Gwde na' jayzlo'elagüe' yogo' postlw ca'.

<sup>8-9</sup>Bzebte bedyelo'elagüe' neda', zaca'leba' ca' bi golje cate' bina' žin ža, le cana' bchi bsaca' bene' ca' chesedop chesežag chesonxene' Criston'. Na' da'n'an' chacda' bicze zaca' yososi'e neda' postlw. <sup>10</sup>Perw Diosen' nži'ilaže'de' neda' na' gwleje'nda' naca' postlw che', na' choncha' xšinen' clel ca' bene' lježa' ca' yezica'chle. Na' nezda' gague chonan' neda', san Diosen' chaclene' neda' cont chonan'. <sup>11</sup>Da'n'an' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le chen'.

### Yesyeban bene' guat ca'

<sup>12</sup>Yogo' neto' chyixjue'eto' beban Criston' ladjo bene' guat ca'. Da'n'an' ĵbixchen' ža balle bi yesyeban bene' guat ca'? <sup>13</sup>Šaca' naquen diža' li dan' žale bi chosban Diosen' bene' guat ca',

zejen bi beban Criston' še ca'. <sup>14</sup> Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'. <sup>15</sup> Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. <sup>16</sup> Le šaca' bi chosbane' bene' ba gosat, lecze bi bosbane' Criston'. <sup>17</sup> Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtoła'chon'. <sup>18</sup> Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'. <sup>19</sup> Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clcl ca' che yezica'chle bene' še ca'.

<sup>20</sup> Perw na' da' li Diosen' bosbane' Criston' ladjo bene' guat ca', na' da'nan' nezecho žin ža yosbane' yezica'chle bene' chesejnilaže'ne' še ba gosate'. <sup>21</sup> Gwxexela' gotten' yežlio nga da' gwzoa' to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat. <sup>22</sup> Le gwxe yela' gotten' cate' Adanna' bene' da' malen', da'nan' yogo' benačhen' chesate'. Nach Criston' bene' cont yogo' bene' yesaque' txen len le' yesenite' toli tocane. <sup>23</sup> To tocho yebancho ladjo bene' guaten' cont soalencho Criston' con caten' ba bsi'e xpezenna'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho. <sup>24</sup> Nach te che yežlio nga. Na' Criston' gwñitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e. <sup>25</sup> Diosen' bžie' bia' zoa Criston'

chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšošje' bene' ca' na' bichle da' ca' bi cheson txen len le'. <sup>26</sup> Na' cate' yeyož gwlej gwšošje' yogo' bichle da' bi chon txen len le', nach gwcueze' yela' gotten'. <sup>27</sup> Diosen' ba nsi'e xnezen' cont yogo'loł da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'. <sup>28</sup> Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' benač na' yogo' angl yesacbe'ede' Diosen' naque' Xangaque', na' lecze yesacbe'e da' xigüe', beyixe' na' bichle da' zjade.

<sup>29</sup> Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

<sup>30</sup> Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'. <sup>31</sup> Bene' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'. <sup>32</sup> Guac nacho bež znia' ba gwdillena' Efeso nga ga ba gosadabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

<sup>33</sup> Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze so-lao gone' can' chesone'na'." <sup>34</sup> Le yeyon xbab šagüe' na' cuejyichje' xbab mal dan' chonlen', le balle biņa' šejni'ile che Diosen'. Chnia' ca' da' chaclaža' gaquele zto' che da' malen' chonle.

**Cuorp che bene' yesyeban  
ladjo bene' guat ca'**

<sup>35</sup> Balle nabljale nac gac yesyeban bene' guat ca' o nac gac cuerp chegaquen' cate' yesyebane'. <sup>36</sup> Ncho! yichjlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheya!a' yexinjen cont la' yel dao'. <sup>37</sup> Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' čhen. <sup>38</sup> Diosen' chone' cont chla' yag dao' dan' chazchon', bi chla' yag yoble da' bi gozcho. <sup>39</sup> Na' gague toze ca nac cuerp che chio' benač len cuerp che be žia tap ni'a na'ba'. Nža' cuerp che benač na' nža' cuerp che be žia xil, na' lecze nža' cuerp che be chesaš lo' nis. <sup>40</sup> Nža' cuerp che benač, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che benač na' che beyixe' ca' chesaš lo' yežlion'. <sup>41</sup> Na' nža' ca' chseni' gwbiž, nža' ca' chseni' bio' na' lecze nža' ca' chseni' to to beljw ca'. <sup>42</sup> Nach cate' yesyeban bene' ca' ba gosat, cuerp chegaquen' bi gaquen ca cuerp da' gosape' cate' gosebane'. Cuerp chegaque' da' bosocuaše' lo' ban' ba beyožon', perw cuerp cobe chegaquen' gague da' te čhen. <sup>43</sup> Bibi zaca' cuerp che bene' guat ca', zjanaquen cuerp šen, na' cheyožon', da'n'an' hcuaše'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuerp chegaque' da' güen juisyw na' da' gual. <sup>44</sup> Cuorp chegaquen' zjanaquen de bela' chen cate' chosocuašen' perw cate' yesyebane' ladjo bene' guat ca' nža' ba zjanac cuerp chegaquen', le yesyeyaquen cuerp cobe da' yeson con can' ža Spiritw che Diosen'. Nezecho

cuorp chechon' da' de na'a naquen de bela' chen, na' lecze cheya!a' nezecho žin ža cate' yeyaquen da' cobe na' gonen con can' ža Spiritw che Diosen'.

<sup>45</sup> Xtiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebbe' ca Adánna', le Criston' chone' yela' mban toli tocañe. <sup>46</sup> Na'a cuerp chechon' bi naquen to da' čzenag che Spiritw che Diosen', perw žin ža yeyaquen da' cobe na' gwzenaguē che Spiriton'. <sup>47</sup> Diosen' bene' bene' nechw len bište yo cont gwzoe' lo' yežlio nga, perw Xancho Criston' ben' zaca'lebbe' ca bene' nechon' ze'e yaba. <sup>48</sup> Na' chio' benač, cuerp chechon' naquen ca cuerp che bene' nechon' da' ben Diosen' len bište yo, da'n'an' naccho che yežlio nga. Na' chio' chejni-laže'cho Criston', žin ža cate' cuerp chechon' yayaquen da' cobe can' nac cuerp che Criston' bene' za' yaba. <sup>49</sup> Na'a šlac zoacho yežlion' naccho ca bene' ben Diosen' len bište yo, perw cate' žin ža šjayzoacho yaban', gaccho ca Cristo ben' za' yaba.

<sup>50</sup> Bene' migw, chnia' le'e bi gac yežincho yaba gan' zoa Diosen' len cuerp chechon' de bela' chen. Da' te che cuerp checho quinga, da'n'an' bi gac šjayzoalenchon len Diosen' toli tocañe. <sup>51</sup> Chnia' le'e to da' nono gwneze cani', gague yogo'chon' gatcho, perw yogo'chon' yeža' can' gaccho. <sup>52</sup> Bedao'nez, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'. <sup>53</sup> Le cuerp chechon' da' mbanecho yežlio nga da' te čhen. Naquen da' chat, na' cheya!a' yayaquen da' cobe da' bi gat, da' bi gožo' na' da' bi te che. <sup>54</sup> Cate' ba beyac cuerp chechon' da' cobe da' bi



gat na' bi te čhen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yeļa' goten', na' chone' yeļa' mban toli tocane. <sup>55</sup>Bich soe yeļa' goten' chio' da' yoble. Gwbatech gatcho šo'cho lo' ba." <sup>56</sup>De yeļa' got čhecho na'a le chio' beṇač choncho da' mal. Da' neze chio' beṇač can' ža ley čhe Diosen' cheyaļa' goncho na' bi chzenagcho gonchon, da'nan' chnabia' da' malen' chio'. <sup>57</sup>Chočclen Diosen' gwseļe' Xancho Jesucriston' beque'e xtoļa' chio' chejni-laže'chone'. Da'nan' bi soe yeļa' goten' chio', san de yeļa' mban toli tocane čhecho.

<sup>58</sup>Da'nan' bene' migw chia', chacda' le'e na' chneyoeda' le'e le soachach len toze xbab. Na' le gonchgua xšin Xancho, le nezcecho cate' choncho xšinen' chejni-laže'chone', gague da' chondadzchon'.

### **Beṇe' Corinto chosotobe' mechw cont yesaclene' beṇe' Jerusalén ca'**

**16** Nach nia' naquen' gonle cate' gwtohle mechw da' gaclenen beṇe' ca' chesejni-laže' Diosen' Jerusalénna'. Le gon can' bena' mandadw yeson beṇe' ca' chesedop chesežag chesonxene' Criston' to to yež da' zjachi' distritw Galacia. <sup>2</sup>Yogo' ža dmigw to tole cheyaļa' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtohlen cate' yedena'a le'e. <sup>3</sup>Nach cate' la'a gan' zoalen', cana' gwzoja' cart da' yesoxe' beṇe' ca' chaclaže'le šjasesane' xmechwlen' Jerusalénna'. <sup>4</sup>Na' še chonen byen ša'a, cuina' čhi'a legaque' Jerusalénna'.

### **Pablon' chone' xbab šjane'e beṇe' Corinto ca'**

<sup>5</sup>Na' yida' gan' zoale cate' yeyož yedia' Macedonia, le cheyaļa' šjayna'a beṇe' lježcho ca' nita' na'. <sup>6</sup>Na' chacda'

yega'anlena' le'e do tbio' do čhop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. <sup>7</sup>Bi chaclaža' yedena'a le'e na'a, le con teza' še ba za'a, na' chaclaža' soa' šša len le'e cate' yida' še Xancho Diosen' goṇšque' latje. <sup>8</sup>Chaclaža' yega'ana' Efeso nga žinch ža gala' lni dan' že' Pentecostés. <sup>9</sup>Le bene' zan že' nga bene' chesaclaže' yosozenague' čhe Criston' na' lecze že' bene' zan bene' bi chesaclaže' čhixjue'eda' xtizen'.

<sup>10</sup>Na' še la' Timoteon' gan' zoalen', le gwlebe' na' le gwzenag čhe' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'. <sup>11</sup>Ne tole bi cheyaļa' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle beṇe' lježcho ca'.

<sup>12</sup>Na' ca' nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle beṇe' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

### **Yeto čhope diža' da' choe'len Pablon' beṇe' Corinto ca'**

<sup>13</sup>Le soa le na' can' chonlen', na' le soa len toze xbab šejni-laže'le Criston'. Bi žeble, san le soachach gonle can' chazlaže' Diosen'. <sup>14</sup>Na' le gaque lježle bite'teze da' chonle.

<sup>15</sup>Bene' migw chia', nezele beṇe' ca' že' liž Estéfanos gosaque' beṇe' nechw gosejni-laže' Criston' distritw Acayan' na' ba gosaclenchgüe' yezica'chle beṇe' lježcho beṇe' chesejni-laže'ne'. <sup>16</sup>Da'nan' chneyoeda' le gwzenag čhegaque' na' gonle can' chesenen', na' le gwzenag čhe nochle beṇe' cheson xšin Diosen' na' chesaclene' beṇe' lježcho ca' can' chesone'na'. <sup>17</sup>Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont

bich chacyaše'da' dan' bi zoale nga len neda'. <sup>18</sup>Ba gosone' cont beyaclaža' can' ba gosoncze' len le'e cana', na' da'nana' cheyała' güe'cho yela' choxc̄len chegaque' che dan' ba gosonen'.

<sup>19</sup>Beñe' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' beñe' ca' chesežag ližgaque' chesonxene' Criston' lecze chosoguapchgüe' le'e tiox. <sup>20</sup>Nach yogo' bene' lježcho že' nga chosoguape' le'e tiox. Na' cate' chdop chžagle txen, le

gwnopa' na' lježle cate' gwguap lježle tiox cont gacbia' chaque lježle.

<sup>21</sup>Cuincza' neda' Pablo chzoja' late' dao' le'e cart nga chguapa' le'e tiox.

<sup>22</sup>Na' še ñe' nchixe balle bi chaquele Xancho Jesucriston', Diosen' gone' cont cuiaye'e toli tocañe. Xancho Jesucristo, yidšco' da' yoble.

<sup>23</sup>Gaclenšca Xancho Jesucriston' le'e. <sup>24</sup>Chacda' yogo'le da' naccho txen chejnilaže'cho Cristo Jesúsena'. Da' na'zen' žia' le'e.

## CART GWCHOPE DAN' BZOJ POSTLW SAN PABLO ĆHE BENE' CA' ŹE' CORINTO

### Postlw Pabło chzoje' bene' chesonxen Jesucriston' ciuda Corinto

**1** Neda' Pabło naca' postlw Ćhe Jesucriston', le can' chaclaŹe' Diosen'. Chzoja' cart nga Ćhe le'e chdop chŹagle chonxenle Diosen' lo ciuda Corinto, na' Ćhe note'tezechle bene' Źe' doxen distritw Acaya bene' ba gwlej Diosen' cont zjanaque' lo ne'e. Neda' len bene' migw Ćhecho Timoteo chguapto' le'e tiox. <sup>2</sup> Na' chnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlaŹda'olen'.

#### Da' ca' gwdi gwxaca' Pablon'

<sup>3</sup> Cheyala' soacho gonxenko Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaŹe' cheŹi'ilaŹe'de' chio' na' len' cheyoe'xene' chio' cate' chac bi da' chac Ćhecho. <sup>4</sup> Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle bene' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' bene'. <sup>5</sup> Leca chy chzaca'to' can' gwdi gwxaca' Criston', na' ca'cze leca cheyoe'xen Diosen' neto' da' chejniłaŹe'to' Criston'. <sup>6</sup> Da' zan da' chac Ćheto' da' chsed chlo'eto' xtiŹa' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont Źjayzoale len Diosen'. Na' cheyoe'xen Diosen' neto' cate' bin' chac Ćheto', cont lecze neto' cheyoe'xento' le'e len bi da' chac Ćhele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'. <sup>7</sup> Chbezto' gwyo gwĆhejle da' chac Ćhele, le nezetoto' caten'

chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

<sup>8</sup> Bene' migw, chaclaŹa' nezele can' gwdi gwxaca'to' caten' gwzoato' distritw Asia. Gwdi gwxaca'chguato', con bich bi goc gonto' na' bento' xbab gatzeto'. <sup>9</sup> Da' li bento' xbab lo' yichjlaŹda'oto' ba za' yela' goten'. Na' goc Ćheto' ca' cont gocbe'eto' bi soeczeto' gwyo gwĆhejto' dan' chzaca'zi'ton' san cheyala' ŹejniłaŹe'to' Diosen' cont gone' Ćhach laŹe'to', Dios ben' chosban bene' guat ca'. <sup>10</sup> Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze. <sup>11</sup> Zoato' lez yoslacze' neto' con Źe gaclenle neto' yol' giiŹlene' Ćheto'. Na' Źe zanle gonle ca', nach lecze zanle gie'le yela' choxcen Ćhe' cate' ba goclene' neto'.

#### Pablon' gwŹede' Źeje' ciuda Corinto

<sup>12</sup> Chbeda' choa' diŹa' can' chonto', le nezetoto' lo' laŹda'oto' chonto' giuen len le'e do yichj do laŹe'to' na' lecze len note'tezechle bene'. Bi nacho chonto' giuen neĆhe da' nacto' bene' sina', san da' nŹi'ilaŹe' Diosen' neto', da'nan' chaclene' neto' chonto' giuen len yogo'lol' bene'. <sup>13</sup> Cart quinga chzojto' le'e, bi gonle xbab Źe naquechle zejen, san Źejni'ilen con can' nyojen, na' zoa' lez Źejni'ilen binlo. <sup>14</sup> Na' zoa' lez Źin Źa cate' gacbe'eyane'le cont yebele gie'le diŹa' nacle neto' txen, can' ba chacbe'ele late' dao' na'a. Na' cate' Źin Źa yid Xancho JesuŹen' da' yoble, yebele gie'le diŹa' nacle neto' txen na' neto' yebeto' gie'to' diŹa' nacto' le'e txen.

<sup>15</sup> Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e. <sup>16</sup> GoclaŹa' tia' yedena'a le'e caten' gwy'a'a Macedonia na' lecze goclaŹa' yedia' gan' zolna' cate' beza' Macedonian'. Na' godca' yeyoŹa'

gaclenle neda' yeya'a Judean'. <sup>17</sup> Do laža' godca' gona' ca', gague chona' con can' žan chia' ca cheson baļ bene' bi cheseniłaže' Diosen', to chesene' yesone' to da' yesone' na' to chesene' bi yesonen'. <sup>18</sup> Ca Diosen' chone' con can' že', leče ca' neto' chnato' do laže'to' cate' chnato' to da' gonto'. <sup>19</sup> Na' leče Jesucriston' bene' naque' Xi'in Diosen', toz can' naque' bate'teže, na' nac da' li yogo' can' gwnen', con can' gwdixjue'eto' xtizen' len le'e, neda', Silvano na' Timoteo. <sup>20</sup> Na' yogo' da' güen da' ba gwna Diosen' gone', nezecho gonon' da' gwsele' Jesucriston'. Da'n'an' len yela' chaclen che Jesucriston' chonxencho Diosen' che'chone': "Gacšca ca'." <sup>21</sup> Na' Diosen' chone' cont neto' na' le'e zoachachcho chejniłaže'cho Criston'. Na' bene' chio' Spiritw che'na' cont gac goncho xšinen'. <sup>22</sup> Na' leče zoa Spiriton' lo' yichjlažda'ochon' cont nezecho Diosen' ba gwque'e chio' ca xi'ine' na' cont nezecho yogo' da' güen da' gwne' gone', žin ža cate' gonon'.

<sup>23</sup> Da' biņa' yida' da' yoble Corinto gan' zoalen' yedeņa'a le'e can' gwnia' gona', biņa' yida' cont bi yedetila' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'. <sup>24</sup> Nezeto' gague neto' ye'to' le'e da' ni da' na' šejle'le. Ba zoachachle chejniłaže'le Criston', na' neto' con chalcen'to' le'e cont soachle mbalazch.

**2** Ca' goquen' bechoglaža' bi yedeņa'a le'e, le gocbe'eda' šaca' bedeņa'a le'e gocyas'e'cho. <sup>2</sup> Na' šaca' bena' cont gocyas'e'le, nono zoa no yeyon cont yezoa' mbalaz, le ba bena' cont gocyas'e'laže'le še ca'. <sup>3</sup> Bzoja' carten' ca' cont cate' yida' gan' zolna' bich gonle da' mal da' gonon gacyas'e'da', le cheyaļa' gonle cont yebeda'. Na' zoa' lez leče mbalaz soa le'e cate' gonle soa' neda' mbalaz. <sup>4</sup> Bzoja' le'e do chegiüne'laža', da' gwzoachgua' gocyas'e'da' che dan' chonlen', na' gwchežchgua' chele. Na' da' bzoja'

carten' ca', gague gwzelaža' yegüine'le, san gwzelaža' gacbe'ele leca chacda' le'e.

### Gwne' cheyaļa' yesyezi'xene' che bene' ben da' malen'

<sup>5</sup> Da' li gocyas'e'da' can' ben bena' ben da' malen', perw gague neda'zen' gocyas'e'da'. Yogo'czle ba gocyas'e'laže'le late' güeje can' ba goquen'. Chnia' gocyas'e'le late' güeje cont bi nia' benche' chio' zi'ch ca cheyaļa' nia'. <sup>6</sup> Ndop nžagle txen gwchoglaole castigw che', na' da' na'zen' cheyaļa' si'e. <sup>7</sup> Bich güe'ln'e castigw, san yezi'xenle che' na' le gon chach laže' cont soede' yela' chacyas'e'laže' chen' na' bi cuejyichje' Diosen'. <sup>8</sup> Da'n'an' chneyoeda' le'e le gon cont gacbe'ede' chaquelene'. <sup>9</sup> Ba bzoja' le'e cana' cont gwnezda' naquen' chonle, še chzenagle chia' len yogo' dan' gwnia' gonle. <sup>10</sup> Na' na'a chaclaža' nezele note'teže bene' chezi'xenle che', leče neda' chezi'xena' che'. Na' cate' chezi'xena' che bene', še zoa da' cheyaļa' yezi'xena', chezi'xenan' lao Criston', na' ba bezi'xena' che bena' cont chaclena' le'e. <sup>11</sup> Na' chezi'xencho che bene' cont Satanás dan' chnabia' da' xigüe' ca' bi soen gonon chio' gan, le nezecho can' chaclažen' siye'czen chio'.

### Pablon' goclaže' yežague' Titon'

<sup>12</sup> Cate' bžina' Troas gan' gwdixjue'eda' diža' güen che Criston', nacbia' Diosen' ba bene' cont bene' že' na' gosaclaže' bosozenague'. <sup>13</sup> Perw benchgua' xbab che bene' migw checho Titon' da' bi bžine' na'. Da'n'an' goša' bene' ca': "Nayežagcho", na' beza' beya'a distritw Macedonian'.

### Zoach mbalaz da' nombia'cho Criston'

<sup>14</sup> Choχclen Diosen', none' cont Jesucriston' ba bebeje' chio' lo' na' gwxiyen' na' mbalaz cheče'e chio' soacho len le'. Na' gate'teže zoach, Diosen' chone' cont

chesacbe'e bene' naquen da' güen juisyw nombia'cho Criston'. <sup>15</sup> Diosen' chebede' choncho cont chesacbe'e bene' naquen da' güen juisyw yesejnilaže' Criston'. Na' bale' chesejnilaže'ne' na' de yela' mban chegaque' toli tocane, na' yebale' bi chesejnilaže'ne' na' chesebiaye'e. <sup>16</sup> Na' bene' ca' chesebiayi' bi chesyebede' can' chonchon', le che'chone' yesebiaye'e. Na' bene' chesejnilaže'ne' chesyebede', le ba goclenchone' cont ba de yela' mban chegaque' toli tocane. Perw chio' bi chaccho to gualazcho gwlo'echo bene' ca güenna' naquen yesejnilaže' Criston'. <sup>17</sup> Bene' zan chosoše'e diža' da' cheso'e che Diosen' cont chesyebe bene' len xtiža'gaque' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da' nacto' Criston' txen, le Diosen' gwsele' neto' choe'to' xtižen'.

### Da' cobe da' gwna Diosen' gone' cont gaclene' benačen'

**3** Bi gonle xbab chonxen cuinto' choe'to' diža' quinga. Nezele chonto' xšin Diosen' do laže'to', na' bi chyažjen goxe'to' cart cont nezele nac nacto', na' neca chyažjen gwzojle cart da' goxe'to' cate' šejto' ga yoble. <sup>2</sup> Chaqueto' le'e da' gwduxjue'eto' xtiža' Criston' len le'e cont gweyjnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yesenezde' can' chonto' xšin Diosen'. <sup>3</sup> Gweyjnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nacbia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

<sup>4</sup> Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'. <sup>5</sup> Nezeto' bi chac bi gonto' to gualazto', na' nezeto' gague neche bi da' ba ben neto' bchoj xšin Diosen' güen, le Diosen' chone' cont chac bite'teze da' chac. <sup>6</sup> Na' Diosen' ba bene'

cont chac chyixjue'eto' da' coben' da' gwne' gone' gaclene' chio' benačh. Na' da' coben' bi naquen ca ley che' dan' byoj cani' chzejni'in chio' benačh cuiayi'cho yela' güen da' mal chechon', san na'a Spiritw chen' chonen yela' mban toli tocane che chio' chejnilaže'chone'.

<sup>7</sup> Cate' Diosen' bnežjue' da' Moisésen' ley che' dan' byoj le'e yaj ta'a ca', bene' cont bene' Israel ca' gosacbe'ede' ley chen' naquen da' zaca'. Na' cana' catec goctitechgua cho'alao Moisésen', bi goc yesena' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in benačen' cuiayi'cho yela' güen da' mal chechon'. <sup>8</sup> Da'n'an' nezecho leca zaca'ch da' chon Spiritw che Diosen' na'a cont gata' yela' mban checho toli tocane. <sup>9</sup> Diosen' blo'e yela' zaca' che ley chen' la'czla' bzejni'in chio' benačh si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen. <sup>10</sup> Da' naquen da' zaca'chgua cani', bičh naquen da' zaca' na'a, le ba de yeto da' zaca'chgua da' xench. <sup>11</sup> Na' da' blo'e Diosen' yela' zaca' che da' ben žin šložze cani', cheyala' gacbe'echo leca da' xench zaca' da' coben' da' bi te che.

<sup>12</sup> Na' da' nezeto' gague da' te che da' cobe da' ba gwduxjw Diosen' cont chac-lene' benačen', da'n'an' bi chedi'to' chyixjue'eto' xtižen' sin cbi chžebto'. <sup>13</sup> Da' Moisésen' bcuaše' cho'alagüen' len to lache' bxin cont bene' Israel ca' bi be-sele'ede' chenit late' güeje yela' chactit che cho'alagüen'. Perw na'a gague chcuashe'to' yela' zaca' che da' chon Diosen'. <sup>14</sup> Bene' Israel gualaz cheto' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaque'. Con bene' ca' chesejnilaže' Criston' chesejni'ide' bi zejnen. <sup>15</sup> Ža na'aža cate' bene'

Israel gualaž četo' ca' chosolabe' da' ca' bzoj Moisésen', zjanaquen ca to da' ngaše' len legaque' yela' bi chejle' čhegaquen'. <sup>16</sup> Perw note'teze' cate' chesejni-laže' Xancho Criston', da' ca' zjanyoj bich chesaquen ca to da' ngaše' len legaque'. <sup>17</sup> Xancho Criston' naque' toze len Spiritw čhe Diosen'. Na' cate' ba zoa Spiritw čhe Xanchon' lo' yichjlaždao' bene', bach zoe' binlo len Diosen'. <sup>18</sup> Yogo' chio' chejni-laže'cho Criston', yela' zaca' juisyw čhe Xancho Criston' bich ngašen' len chio', na' ba zejch cheyaquechcho bene' güen can' nac le', le zoa Spiritw čhe Xancho Criston' lo' lažda'ochon' chocoben xbab čechon'.

**4** Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'. <sup>2</sup> Na' bibi chonto' bagaše'ze ca no da' nac da' yela' zto'. Bi chončeto' bene' na' neca choša'to' xtiža' Diosen' cont yesyebe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li. <sup>3</sup> Con bene' ca' ba zjambiyi' yela' bi chejle' čhegaquen', legacze' bi chesejni'ide' diža' güen dan' choe'lento' legaque'. <sup>4</sup> Le bene' bi chesejle' xtiža' Diosen' chosozenague' čhe Satanás dan' chnabia' da' xigüe' ca' latje da' yosozenague' čhe Diosen', na' Satanásen' chonen cont nčhol yichjlažda'ogaquen'. Da'nan' diža' güen čhe Criston' bi chsenin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'. <sup>5</sup> Na' ca nac diža' da' chyixjue'eto', chyixjue'eton' gague cont gwzenagle čhe neto', san cont gwzenagle čhe Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da'

chaclenen le'e. <sup>6</sup> Na' Dios ben' gwne' gata' be'ni' yežlio nga gan' goc čol, ba gwlo'e be'ni' čhen' lo' yichjlažda'ochon' cont nombia'cho Jesucriston' ben' nac bene' zaca' juisyw, na' cate' ba nombia'chone' chacbe'echo can' nac yela' bene' zaca' čhe Diosen'.

### **Pablo cho'e xtiža' Diosen' lagüe' da' chejni-laže'ne'**

<sup>7</sup> Cuerp čhecho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' čhen' lo' yichjlažda'ochon' na'a šlac ne' mbancho len cuerp čhecho quinga cont gacbe'echo bibi chac goncho še bi gone' yela' guac xen čhen' cont gac bi da' goncho. <sup>8</sup> Na' neto', da' zan da' chyi chzaca'to', perw bi chbejyichjto' xšin Diosen'. Zan ni'a bi čežellaže'to' nacle gonto', perw nezeto' Diosen' chaclene' neto'. <sup>9</sup> Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'. <sup>10</sup> Gate'teze chejto', con yogo' ni'a chosoči chososaca' bene' neto' na' chesaclaže' yesote' neto' can' gosote' Jesúsén'. Na' Diosen' cho'e latje chac četo' ca' cont nacbia' zoacze Jesúsén' chaclene' neto' šlac mbanto' len cuerp četo' quinga. <sup>11</sup> Na' šlac ne' mbanto', yogo' ža nita'cze bene' chesaclaže' yesote' neto' lagüe' da' chyixjue'eto' xtiža' Jesúsén'. Na' chac četo' ca' cont nacbia' zoacze Jesúsén' chaclene' neto' šlac mbanto' len cuerp četo' quinga da' yesat. <sup>12</sup> Can' chac, tža tža chesaclaže' yesote' neto', san le'e ba de yela' mban čele toli točane.

<sup>13</sup> Xtiža' Diosen' nyojen žan: "Čhejni-laža' Diosen' na' da'nan' choa' diža' čhe." Na' ca ben' bzoj da'na' gwejni-laže' Diosen', ca'czen' chejni-laže'to'ne' na' da'nan' choe'to' xtižen'. <sup>14</sup> Le nezeto' Dios ben' bosban Xancho Jesúsén' ladjo bene' guat ca' lecze žin ža yosbane' chio' še ba

gotcho, na' neto' txen len le'e šjayzoa-cho gan' zo'e'na'. <sup>15</sup>Neche le'e bžaglaoto' yogo'lo' da' ba goc čheto'. Le chaclaže'to' gac zanco gaclenchgua Diosen' chio' cont šejnilaže'cho Xancho Jesúsen', na' lecze gac zanco güe'cho yela' choxclen che' catec bene' zacan' naque'.

<sup>16</sup>Da'nan' bi chjaxaque'laže'to'. La'czla' tža tža zej chaxo'ch cuerp čheto' quinga, lecze tža tža Diosen' chocobche' yichjlažda'oto'. <sup>17</sup>Yob te che bite'teze da' dao' da' chžaglaoch yežlio nga. Na' da' ca' chyi chzaca'cho chesaclenen chio' cont soacho mbalaz juisyoch cate' šjayzoacho len Diosen' toli tocane, na' lenna' da' zaca'ch ca bite'tezchle. <sup>18</sup>Nachen' bi chi' yichjcho che da' chle'echo yežlio nga, san chi' yichjcho che da' bi chle'echo. Le yesede che da' ca' zjade yežlio nga da' chle'echo, na' da' ca' bi chle'echo, gague da' yesede chegaquen, nita'czen toli tocane.

**5** Cuerp chechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen checho yaban' da' soa toli tocane; na' lenna' gague naquen to da' ben benač. <sup>2</sup>Na' šlac ne' zoacho mbancho yežlio nga, chbežyaše'cho lo' lažda'ocho zelaže'chguacho šjayzoacho lo' yo'o da' non Diosen' checho yaban'. <sup>3</sup>Chona' xbab cuerp cobe da' gone' zaca'leben ca to xacho da' chyažjen chazcho cate' yežincho yaba. <sup>4</sup>Da' li chio' ne' chžaglaoch len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te chen len to da' soa toli tocane. <sup>5</sup>Na' Diosen' gwleje' chio' cont šjayzoacho len le' na' gwsele' Spiritw chen' zoan lo' yichjlažda'ochon' cont nezecho dech da' gone' checho.

<sup>6</sup>Da'nan' bi chacžejlaže'cho, le nezecho šlac mbancho len cuerp checho quinga bina' šjayzoacho len Xancho Criston'. <sup>7</sup>Na' la'czla' bina' le'echo da' ca'

gone' checho, zoacho chejnilaže'chone'. <sup>8</sup>Na' da'nan' bi chacžejlaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'. <sup>9</sup>Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho. <sup>10</sup>Le to tocho cheyala' techo lao Criston' gan' chone' yela' justisen' cont chogbi'en checho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

### Benachen' guac yesenite' binlo len Diosen'

<sup>11</sup>Na' dan' nezeto' yogo'cho yodecho cuent lao Xancho Criston' che yogo'lo' da' ba bencho, da'nan' chneyoeto' bene' yosozenague' che'. Diosen' nezde' do laže'to' chneyoeto' bene' yosozenague' che', na' zoa' lez lecze le'e chacbe'ele lo' lažda'olen' zoato' chonton' do laže'to'. <sup>12</sup>Bi nacho chonxen cuinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' bene' ca' chesenelagüe' čheto'. Bene' ca' chesa'laže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'. <sup>13</sup>Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chaclento' le'e. <sup>14</sup>Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neche yogo'cho, na' da' naccho txen len le' guac nacho yogo'cho ba gotcho len le'. <sup>15</sup>Bnežjw cuine' gote' neche yogo' chio' benač, cont soa cuezcho goncho can' chazlaže' na' bich soa cuezcho goncho con ca' žan checho. Gote' na' bebane' ladjo bene' guaten' neche chio'. <sup>16</sup>Neto' cate' bina' šejnilaže'to' Criston' goqueto' bibi zaque', le bento' xbab

zaca' bene' še no naque' lo yežlio nga o še bi da' de che'. Perw na'a bich chonto' xbaben' ca' che Criston' o che note'teze bene'. <sup>17</sup>Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

<sup>18</sup>Diosen' bozoe' chio' binlo len le' na' bene' cont beyaccho ca bene' cobe cate' gwejnilaže'cho Criston'. Na' gwlo'e lo na'cho ye'cho bene' can' yesenite' binlo len Diosen'. <sup>19</sup>Ye'cho legaue' Diosen' gwsele' Criston' cont note'teze bene' yesejnilaže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyała' ye'cho bene' cont yesenite' binlo len Diosen'. <sup>20</sup>Criston' gwsele' chio' ca cuine' na' Diosen' chaclaže' neyoecho bene' ca cuincze Criston' chneyoede' legaue', ye'chone': "Le soa binlo len Diosen'." <sup>21</sup>Criston' bibi da' mal bene'. Perw na' Diosen' bene' cont Criston' gwxcaca'zi'e neche xtoła'chon' cont none' chio' bene' güen da' chejnilaže'chone'.

**6** Neto' chonto' xšin Diosen' txen len le'. Da'nan' chneyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'. <sup>2</sup>Nyoj can' gwne': Cate' bžin ža goc da' bžia' bia', cana' bzenaga' chio'. Na' cate' bžin ža benan', cana'chen' goclena' le'.

Na' dan' nyojen ca' zejen na'a bačh bžin žan' chaclen Diosen' benačhen', le ža na'aža chnežjue' yela' mban toli tocane che bene' chesejnilaže' Jesucriston'.

<sup>3</sup>Bi chonto' bite'teze da' gwžon cont bene' bi yesejnilaže'ne', le chaclaže'to' bibi gata' da' yesenelagüe bene' che xšin Diosen' da' chonto'. <sup>4</sup>Da'nan' bite'teze da' chonto' chlo'eto' chonto'

xšin Diosen' ca cheyała'. Chyo chchejto' cate' chosoči chososaca' bene' neto', cate' chzaca'zi' chzaca'yaše'to', na' cate' za'ac bichle da' mal len neto'. <sup>5</sup>Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejšto' bišgal na' gwbił gwdonto'. <sup>6</sup>Na' da' chi' yichjšto' chonto' xšin Diosen' can' chazlažen', bitw bi da' yela' zto' chonto'. Chzejni'ito' bene' len yela' chejni'i che Diosen', napt'o yela' chxenlaže' len yogo'lol bene' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'lol bene'. <sup>7</sup>Zoato' chzejni'ito' bene' diža' li, na' chonto' yogo'lol da' chonto' len yela' guac che Diosen'. Na' da' zoato' chonto' da' zej to licha, chaclenen cont soeto' tiliento' da' malen' na' cont bi gwzenagto' che gwxiyen'. <sup>8</sup>Zoato' chonto' xšin Diosen' can' chazlaže' cate' chesonxen bene' neto' na' cate' chesegue'ede' neto', cate' chesene' güen cheto' na' cate' chesene' mal. Choe'to' diža' li, cate' bene' chesejle'e cheto' na' cate' bene' chesacde' chonlaže'to'. <sup>9</sup>Bał bene' bi chesejle'e chonto' da' zaca', perw yebale' zjanezde' chonto' da' zaca'. Zan las chonto' xbab gatzto', perw ne' mbanto'. Na' la'czla' yogo' da' ca' chac cheto', bina' yesote' neto'. <sup>10</sup>Da' zan da' chac cont gacyaše'to', perw chbet'o lo' lažda'oton'. Nga'anyaše'to', perw chonto' cont bene' zan nite' mbalaz. Na' la'czla' bibi de cheto', yogo'lol bi da' de naquen cheto' da' nacto' Criston' txen.

<sup>11</sup>Le'e bene' Corinto, bačh be'lento' le'e yogo' diža' da' yo'o lo' lažda'oton', le chacchgüeto' le'e. <sup>12</sup>Nži'ilaže'to' le'e, perw le'e bitec nži'ilaže'le neto'. <sup>13</sup>Chata'yoeda' le'e ca chon to bene' len xi'ine', le gaque neda' ca chacda' le'e.



**Spiritw che Diosen' zoan lo'  
yichjlaždao' chio' chejnilaže'chone'**

<sup>14</sup> Bi cheyała' gaccho txen len bene' bi chesejnilaže' Criston'. Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyała' goncho txen len bene' bi yo'o be'ni' čhen' lo' yichjlažda'ogaque'. <sup>15</sup> Criston' bi chac gone' txen len Satanás dan' chnabia' da' xigüe' ca', na' ca'cze bene' chejni-laže' Criston' bi cheyała' gone' txen len bene' bi chejni-laže' Criston'. <sup>16</sup> Nezecho bi gac še' l' gua'a lsaca' da' chesejni-laže' bene' lo' yodao' gan' chejni-laže'cho Diosen', na' ca'cze bi chac soa Diosen' len chio' chejni-laže'chone' še zoa bichle da' chejni-laže'cho. Chac can' gwna Diosen': Soa' len legaque' na' talena' legaque'.

Neda' Dios naca' ben' yesejni-laže' na' le-gaque' yesaque' yež chia'.

<sup>17</sup> Da'nan' cheyała' goncho can' gwna Xancho Diosen':

Le yechoj len bene' bi chesejni-laže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

<sup>18</sup> Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yela' guac xen.

**7** Le'e bene' chacda', ba nezecho can' gwna Diosen' gone' güen len chio'. Da'nan' cheyała' cuejyichjcho bich goncho bite'teže da' xinj da' gwčhenen cuerp chechon' o yichjlažda'ochon'. Na' cheyała' gapcho Diosen' bala'an gwzenagcho che' tža tža na' šejch gaccho bene' güen can' chaclaže'.

**Ba bža' xbab che bene' Corinto ca'**

<sup>2</sup> Le gaque neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'. <sup>3</sup> Gague žia' ca' cont tila' le'e, le can' ba gwnia' cana', chacda' le'e

na'a šlac mbancho na' lecz ca' gacda' le'e cate' ba gota'. <sup>4</sup> Nezda' lo' lažda'ogua' gonle can' chazlaže' Diosen', na' chbeda' choe'lena' bene' diža' ca' güenna' chonle. Ba beyacxenlaža' da' gwnezda' chonle güen, na' zoa' mbalaz la'czla' da' zan da' chac chia'.

<sup>5</sup> Cate' bežinto' Macedonian' bibi latje gota' cont yezi'laže'to' len da' gwdi gwaca'to'. Gwnita' bene' bosošašlene' neto' na' lecze bžebto' lo' yichjlažda'oto' goqueto' nac gacto'. <sup>6</sup> Na' Dios ben' cheyoe'xene' bene', beyoe'xene' neto' da' bela' Titon'. <sup>7</sup> Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebede' gwnezda' da' ca'.

<sup>8</sup> Chacbe'eda' gocyashe'le can' gwnia' le'e carten' bzoja' le'e. Na' gwdechle betinjda' da' bena' cont gocyashe'le, perw na'a bich chetinjda' da' gwsela' carten', le šložzen' gocyashe'le. <sup>9</sup> Chbeda' na'a, le goclenen le'e cont begüine'laže'le che da' xinjen' benle na' betinjele čhen, can' goclaže' Diosen'. Na' can' goquen' bi bchojen mal dan' gocyashe'len'.

<sup>10</sup> Cate' ba bencho da' xinj, Diosen' chaclaže' yegüine'cho che dan' benchon' na' yetinjchon. Na' chone' yela' mban toli tocanę che chio' chetinje xtoła'chon', na' leca mbalazch soacho še ba betinjecho xtoła'chon'. Perw bene' zan cate' chesezüine'laže' bi chesyetinjde' xtoła'gaquen', nach yesebiaye'e. <sup>11</sup> Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca' yebeda'. Nach be'le castigw che ben' ben da' xinjen'. Nacbia' bich bi xtoła'le de can' benlna'. <sup>12</sup> Na' ca' nac carten' bzoja' le'e,

gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gacbe'ele lao Diosen' ne' chaguele neto' na' ne' chaclaže'le gonle can' che'to' le'e. <sup>13</sup>Na' na'a ba beyacxenlaže'to' da' bzenagle cheto'.

Na' lecze chebechgiüeto' ca mbalaz zoa Titon', le yogo'le benle ga bezoa Titon' binlo len xbab da' yo'o lo' yichjlažda'ogüen'. <sup>14</sup>Goša' Titon' nezda' gonle güen. Na' bi cheto'eda' da' goša'ne' ca', le ca da' li zjanac yogo' da' chzejni'ito' le'e, lecze ca' da' li bchoj dan' gožto' Titon', na' nacbia' be'to' diža' li. <sup>15</sup>Na' ba chachde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'. <sup>16</sup>Da'n'an' chebeda' na' nezda' yeyož gonle can' chazlaže' Diosen'.

### Besezande' da' gota' chegaque' gosaclene' bene' yoble

**8** Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'. <sup>2</sup>Gocchgua yela' yaše' yela' zi' chegaque', perw Diosen' bene' cont gwnita'chgüe' mbalaz lo' yichjlažda'ogaquen' na' besyebchgiüede' bosotobe' mechw xen cont gosaclene' bene' yoble. <sup>3</sup>Nezda' na' choa' diža' bosonežjochgüe' da' beseyažje bene' yoble la'czla' bibi gota' chegaque', na' con xbab chegaczen' gosone' ca'. <sup>4</sup>Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'. <sup>5</sup>Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosaclaže'chgüe' yesone' can' chazlaže' Diosen'. <sup>6</sup>Da'n'an' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolao btoble cana'. <sup>7</sup>Güenchgua chonle chejnilaže'chguale Criston'

na' choe'chguale xtižen', da' zan da' chejni'ile che Diosen', chonchguale xšinen', na' chaguechgüele neto'. Lecze le gon güenchgua na' le gwtobe da' cheseyažje bene'.

<sup>8</sup>Bi chona' byen gwnežjwle mechon', san chaclaža' gonle xbab še chaguele Diosen' na' še chague lježle do laže'le can' goson bene' Macedonian' da' chesacde' Diosen' na' lježgaque'. <sup>9</sup>Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'lol da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

<sup>10</sup>Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na' gwzolaole btoble mechon' do yichj do laže'le. <sup>11</sup>Na' chacda' güen yeyož gwtoblen na'a do yichj do laže'le can' gwzolaole, na' gwnežjwle con ca zelao saque'le. <sup>12</sup>Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

<sup>13</sup>Bi žia' gonle cont bich bi yega'an chele na' gata' che bene' yoble. <sup>14</sup>Con chaclaža' gata' da' chyažje yogo'le. Šlac na'a de che le'e, cheyla' gaclenle bene' ca' cheseyažjde'. ĆChixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le. <sup>15</sup>Nach gac can' nyoj Xtiža' Diosen' žan: "Bene' botobe' da' zcha'o, bitw nacho becho'onen che', na' bene' botobe' late'ze, gota'cze da' byažjde'."

### Titon' na' bene' lježe' ca'

<sup>16</sup>Choxcnen Diosen' bene' cont Titon' zelaže'chgüe' gaclene' le'e con can' zelaža' neda'. <sup>17</sup>Na' cate' goša'ne' yedene'e

le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

<sup>18</sup>Na' chselato' yeto bene' ljezcho len Titon'. Na' to cuen to cuen bene' ca' chesedop chesezag chesonxen Jesucriston' cheso'e diža' che benga chselato', chesene' binlo chyixjue'ede' diža' güen che Jesucriston'. <sup>19</sup>Nachen' lecze gosebeje' le' cont sa'lene' neda' cate' ša'a gan' že' bene' ljezcho ca' šjasana' mechw dan' chtobcho. Na' gwnežjwcho mechon' cont gaxcen Xancho Jesucriston' na' cont gwlo'ele chbele chaclen bene' lježle. <sup>20-21</sup>Yo'o yichjto' gonto' da' nac güen lao Xanchon' na' lao benachen', le mechw xenna', na' bi chaclaže'to' yesene' chonto' clele len len.

<sup>22</sup>Na' lecze chselato' yeto bene' ljezcho len legaque'. Zan nia' ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' zelaže'chguale gonle can' chazlaže' Diosen'. <sup>23</sup>Na' ca nac Titon', chone' xšin Diosen' txen len neda' cont chalciento' le'e. Na' bene' ca' yechope, zjanite' chesone' cont Criston' chaxene', na' bene' ca' chesedop chesezag chesonxene' Jesucriston' gosebeje' legaque' na' chesesele' legaque'. <sup>24</sup>Da'nan' chnia' le gon güen len legaque' cont bene' ca' chesonxene' Criston' to to yež yesenezde' chaquele legaque', na' le gwlo'e chonle güen can' gwnato' cate' be'to' diža' güen chele.

### Bosotobe' mechon'

**9** Bi chonen byen gwzoja' le'e nia' cheyała' gwnežjwle mechw da' gaclen bene' chesejnilaže' Criston' ga yoble. <sup>2</sup>Nezda' chaclaže'le gaclenle legaque'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nan' bene'

ca' že' zan yež distritw Macedonia lecze ba chesone' ca'. <sup>3</sup>Perw bia'cze chselato' bene' ca' len Titon' cont diža' dan' ba bia' chele catec güenna' chonle bi gaquen ca' da' güenlaže'. Chaclaža' yeyož gwtoble mechua' cont ba den cate' yida'. <sup>4</sup>Le še sa'len no bene' Macedonia neda' cate' yedena'a le'e da' yoble, na' yeto'eda' chele še bina' gata' mechua', na' lecze le'e yeto'ele da' bi benle can' gwnia' gonle. <sup>5</sup>Da'nan' godca' güen yesebialao bene' ljezcho ca' šone yeside' gan' zoalen' cont yesaclene' le'e yeyož gwtoble mechw dan' gwnale gwnežjwle. Nachen' gwnežjwlen do yichj do laže'le, gague gwnežjwche'elen.

<sup>6</sup>Le gon xbab can' chesene': "Bene' chaz late'ze, late'ze chelape', na' bene' chaz da' zcha'o, da' zcha'o chelape'." <sup>7</sup>Da'nan' to tole cheyała' gwnežjwle gacate' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'. <sup>8</sup>Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'loł da' chyažjecho bate'teze neche gac gwnežjwcho da' chyažje bene' yoble na' goncho bichle da' güen. <sup>9</sup>Quinga nyoj Xtiža' Diosen' che bene' chzande' da' de che', žan: Ba bnežjue' da' beseyaže' zan bene' yaše'. Na' bi ganlaže' Diosen' da' güen dan' benen'.

<sup>10</sup>Diosen' chone' cont chata' no xoa' bin na' bichle da' chazcho; chone' cont chata' da' che'ej da' chagwcho. Lecze le' gone' cont gata' bichle da' chyažjele na' cont cha'o xenchen, na' gone' cont šejchle gonchle da' güen. <sup>11</sup>Bite'teze da' chac chele, Diosen' gone' cont gata' da' zcha'o da' gwnežjwle bene' yoble. Nach cate' šjanežjwto' bene' yaše' ca' dan' ba btoble, yeso'e yela' choxclen che Diosen'. <sup>12</sup>Le da' gwnežjwle da' cheseyaže' bene' chesejnilaže' Jesucriston' ga yoble, bene'

zan yeso'e yela' choxcen che Diosen'.  
<sup>13</sup>Na' cate' bene' yaše' ca' yesezi'e mechon' chtoble, gwlo'en chzenagle diža' güen che Criston' do yichj do laže'le. Nach legaque' yeso'e yela' choxcen che Diosen' da' gwseła'le da' zcha'o mechw da' gaclenen legaque'. Lecze yeso'e yela' choxcen che' da' chaclenle yogo' bene' chesejnilaže' Criston'.  
<sup>14</sup>Na' do chesacde' le'e yosol güiže' Diosen' yeseñabe' gaclenche' le'e, le nacbia' ba nži'ilaže'chgua Diosen' le'e.  
<sup>15</sup>Choxcen Diosen' gwsele' Xancho Jesucriston' len chio'. Bibi diža' de da' nacho catec zaca' goclenña' da' bene' len chio' gwsele'ne'.

**Diosen' gwleje' Pablon'  
 cont bzejni'ide' bene'**

**10** Chesena bal bene' chžeba' tila' le'e cate' zoa' len le'e na' con cate'ze zoa' zito' chzoja' cart chdila' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene' šagüe'.  
<sup>2</sup>Chneyoeda' le'e gonle da' güen cont bi tila' le'e caten' yedetiła' bene' chesacde' chona' con can' žan chia'.  
<sup>3</sup>Na' la'czla' zoato' lo yežlion' na' nacto' benachze, cate' chdillento' da' malen' bi chdillenton' ca' benachze.  
<sup>4</sup>San Diosen' none' neto' yela' guac cont choeto' chlej chšoštjo' yogo' da' chon gwxiyen', le bi soeto' tillenton' to gualzto'.  
<sup>5</sup>Can' chac, Diosen' chaclene' neto' chonto' cont chosozexjwyichj bene' chosozenague' che Criston' na' chesebejyichje' xbab mal chegaquen' na' bichle da' cheseza'laže' da' chžonen yesombi'e Diosen'.  
<sup>6</sup>Na' cate' yeyož gata'bia' še yogo'le gwzenagle che Diosen', cana' ngüiato' gonto' castigw che nole bi chzenagle che'.

<sup>7</sup>Le gon xbab che dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen

len le'.  
<sup>8</sup>Na' bi yeto'eda' güe'cha' diža' yelate' can' ba bian', le chebeda' gwseła' Xancho Criston' neto' cont bzejni'ito' le'e diža' da' goclenen le'e, gague da' bžiyain' le'e.  
<sup>9</sup>Bi chaclaža' no gacde' še chzoja' cart quinga cont gwšeba' le'e.  
<sup>10</sup>Bene' ca' cheseñelagüe' chia' chesene' cate' zoa' zito' chzoja' cart znia ca che no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle.  
<sup>11</sup>Bene' ca' cheseñelagüe' chia' cheyla' yeseñezde' can' žato' le'e cart da' chzojto' le'e cate' zoato' zito', lecz ca' gonto' cate' yedesoato' len le'e.

<sup>12</sup>Bi chaclaže'to' gonlebetto' bene' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güen chlel ca' cheson bene' lježe', na' bibi zejen chesone' ca'.  
<sup>13</sup>Neto' bi gonxen cuinto'. Con güe'to' diža' che da' ca' goclen Diosen' neto' bento' gan' ba gwsele' neto', le lecze gan' zoalen' ba gwsele' neto'.  
<sup>14</sup>Da'nan' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'.  
<sup>15</sup>Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'.  
<sup>16</sup>Na' chaclaže'to' chixjue'eto' diža' güen che Criston' ga naquen zito'ch ca' gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

<sup>17</sup>Bi cheyla' gonxen cuincho, san cheyla' gonxencho Xancho Dios.  
<sup>18</sup>La'czla' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

**Pablon' na' bene' ca'  
cheson cuingaque' postlw**

**11** Chaclaža' gwzenagle yeto chop diža' güen da' gua' che cuina' la'czla' še chaquele naquen diža' da' bibi zaca'. <sup>1</sup>Le gwzenag chia'. <sup>2</sup>Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši' cuine' da' chacde' toz bene' byo bene' si' le'. <sup>3</sup>Chxožda' yeseziye' bene' le'e cont bich šejnilaže'le Criston' do laže'le na' bich gaquele toz le'. Can' gwziye' belen' da' no'ole nechon', no'olen' gože' Eva, da' nacba' be xigüe'. <sup>4</sup>Cate' chesela'ac bene' gan' zoale na' chosozejni'ide' le'e che Jesús'en' nža'le can' ba bzejni'ito' le'e, o chosozejni'ide' nža'le che Spiritw che Diosen' o che diža' güen chen', la' chzenagtele chegaque'. Da'n'an' chxožda' yeseziye'e le'e. <sup>5</sup>Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'. <sup>6</sup>La'czla' bi choa' diža' xdan ca chesoe' legaque', ba ble'eczele yogo' dan' ba bento' na' nezczele chejni'ito' xtiža' Diosen' binlo.

<sup>7</sup>¿Chaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz. <sup>8</sup>Gwxia' mechw da' goson bene' ca' chesedop chesežag chesonxene' Criston' ga yoble cont be'lena' le'e xtiža' Diosen'. <sup>9</sup>Na' cate' gwzoo' len le'e, la'czla' bi gota' da' byažjda', bi gwñabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chhinda'. <sup>10</sup>Chebeda' chac chnia' bibi gan chona' chyixjue'eda' xtiža' Diosen' len le'e o len bene' že' yež

yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont gonle da' chyažj chhinda'. <sup>11</sup>Perw gague da' bi chacda' le'e bi gonda' le'e zed. Diosen' nezde' chacda' le'e.

<sup>12</sup>Na' gonchcza' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'. <sup>13</sup>Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseła' Criston' legaque'. <sup>14</sup>Bi yebanele can' chesonen', le ca'czen' chziye' Satanásen' chio', cheyon cuinen ca to angl bene' chactitchgua cont gaquecho naquen to angl güen bene' za' gan' zoa Diosen'. <sup>15</sup>Na' ca'czen' cheson bene' ca' chosozenag chen, chesonlede' le'e cont gaquele chosozejni'ide' diža' güen. Perw žin ža yesezaca'zi'e toli tocane yela' güen da' mal chegaquen'.

**Da' ca' gwdi gwxcaca'  
Pablo da' naque' postlw**

<sup>16</sup>Da' yoble žia' le'e, bi gaquele chona' xbab da' bibi zaca' can' chon bene' bi chejni'i. Perw la'czla' še chaquele chona' xbab da' bibi zaca', le gwzenag chia' šlac gua' to chope diža' güen che cuina'. <sup>17</sup>Gua' diža' güen che cuina' la'czla' nezda' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i. <sup>18</sup>Bene' zan cheso'e diža' güen che cuingaque' che bi da' ba gosone' o bi da' ba goc chegaque', na' ca'czen' gona' neda'. <sup>19</sup>Ba non cuinle bene' sina' na' da'naljan' chbele chzenagle che bene' cheson xbab da' bibi zaca'. <sup>20</sup>Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle che-

gaque', na' bia'cze choe'le latje chosozejni'ide' le'e. <sup>21</sup> Chonljale xbab bžebto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', lecze cheyaxjda' gua' dižan' nac ca' che cuina'. <sup>22</sup> Chesonxen cuingaque' da' gosaljje' gan' že' bene' chesaque' diža' hebreo. Nezczele lecze goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecze bene' Israel neda'. Na' chesonxen cuingaque' da' gosaljje' lo diaža' che da' Abraham. Na' nezczele lecze diaža' che da' Abrahanna' neda'. <sup>23</sup> Chesene' Criston' gwsele' legaue' cont yesone' xšine'. Nezczele Criston' gwsele' neda' na' ba bencha' xšinen' ca' legaue'. Si'xenje dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca' legaue', zan ni'ach ba goseyin justis ca' neda' da' choa' xtiža' Diosen' clal ca da' ba goc che' legaue'. Na' zan ni'ach bene' ca' chesegue'ede' neda' ba goseyixjue' neda' ližya clal ca dan' ba goc che bene' ca' chosozejni'ide' le'e. Na' zan ni'a ba bela' cbi gota'. <sup>24</sup> Gayo' ni'a goseyin bene' Israel gualaž chia' neda' tašjw de yid togaljechoa ni'a güeje. <sup>25</sup> Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a bočinj nisaon' barcon', na' cane bžina' yo biž. Na' lo šon ni'an beyinjenna', tni'a gwdeļa' nisaon' tža tyel. <sup>26</sup> Zan ni'a ba gwy'a yež zito' jatixjue'eda' xtiža' Criston'. Zan ni'a cane goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaž chia' gosaclaže' yesote' neda', na' zoa cate' bene' bi zjanaque' bene' Israel gosaclaže' yesote' neda'. Na' zan ni'a do lo ciuda, do ga nono bene' že' na' do lo nisaon' yelate'ze bi gota'. Na'

yogo' ža chaš bene' chesonlaže' chesene' zjanaque' chio' txen na' chxožda' yosoži-aye'e xšin Diosen' dan' chonan'. <sup>27</sup> Zan ni'a ba bena' xšin Diosen' benten ga jaxaque'chgüeda', na' zan ni'a bchejda' bi gwtasa'. Nombi'a yela' chbiļ chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

<sup>28</sup> Da' zanch da' ba gwdi gwxaca' da' bi choa' diža', na' lecze yogo' ža ch'chgua yichja' nac chac che le'e chdop chžagle chonxenle Criston' to to yež. <sup>29</sup> Note'tezle cate' bi zoachachle len Criston' o bi chzoele gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'.

<sup>30</sup> Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'.

<sup>31</sup> Dios bene' cheyala' gonxencho toli to-cane neзде' choa' diža' li. Len' naque' Xa Xancho Jesucriston' na' chonxen Jesucriston' le'. <sup>32</sup> Na' yeto da' goc chia', cate' gwzoa' ciuda Damasco, bene' goc gubernador šlac gwnabia' rey Aretas bnite' bene' gosape' cho'a puert da' zoa le'e ze'e da' nyečj ciudan' cont yesezene' neda' cate' yechoja'. <sup>33</sup> Perw bene' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyečje ciudan' cont bi gosezene' neda'.

### Da' ble'edagüe' Pablon'

**12** Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'eda' na' da' ca' ba bzejni'i Xancho Criston' neda'. <sup>2-3</sup> Ba chejniļa' Criston' cate' goc chia' quinga ba goc žta' iz. Diosen' bene' neče gwy'a yaban' gan' zoen'. Bi nežda' še gwy'a len cuerp chia', Dios nan' neзде'. <sup>4</sup> Con nežda' bžina' gan' zoa Diosen' na'

benda' bene' ca' že' na' cheso'e diža' zaca' da' bi chac nia', diža' zaca' da' bi de latje güe' beñač yežlio nga. <sup>5</sup>Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'. <sup>6</sup>Šaca' žan gonxen cuina', da' zan da' güen ba bena' da' gac gua' diža' čhen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca cheyała'. Yejni'a yesone' xbab še zaca' con ca nac da' chesele'ede' chona' na' can' chesende' choa' xtiža' Diosen'.

<sup>7</sup>Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca cha'a yeše' lo cuerp chia' nga, na' leca chaclaže' Satanásen' gacda' tole da' chac chia' ca'. <sup>8</sup>Šone ni'a ba gwñabda' Xancho Criston' yeque'e dan' chžaglagua' len cuerp chian'. <sup>9</sup>Nach Xancho' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyała' gono'." Da'n'an' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yela' guac čhen'. <sup>10</sup>Na' da'n'an', cont gaxen Criston', chbeda' bite'teze da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' bene' chosolagšibe' neda', na' cate' bichle da' chžaglagua', le cate' chac chia' ca', cana'ch chaclench Criston' neda' len yela' guac čhen'.

**Pablon' gwche' yichje' che bene'  
chesonxen Criston' Corinto**

<sup>11</sup>Ba bia' diža' benxen cuina' ca chon bene' bi chejni'i. Le'e cheyała' güe'le diža'

chia' naca' bene' zaca', perw bi chonle ca'. Da'n'an' benen byen bia' dižan' ca'. Da' juisyw chonxenle bene' ca' ba nonele ca postlw chele. Na' neda' ne late'ze bi chyažjen cont gaca' bene' zaca' ca le-gaque'. Žia' ca' la'czla' chacbe'eda' bibi zaca' šaca' bi zoa Diosen' len neda'. <sup>12</sup>Ba ble'ele naca' dogualje postlw, le cate' gwzoa' len le'e, Diosen' blo'e zoa yela' guac čhen' len neda' na' bene' cont goc bichle da' zaca' yesyebane bene', na' goclene' neda' bchejda' yogo' da' goc chia' šlac bena' xšinen' gan' zoalen'. <sup>13</sup>Toze ca güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

<sup>14</sup>Chaclaža' yida' deña'a le'e da' gwyone ni'a. Na' bi gonda' le'e zed cate' yida'. Bi chaclaža' gonle neda' bi da' de chele, con chaclaža' gwzenagle chia' na' gon cuinle lo na' Criston'. Ca no bidao' bi cheyała' gwnežjwbe' bi da' chyažje xaxna'be', san xaxna'be' cheyała' gwnežjue' da' chyažje lebe', ca'czen' naquen len le'e na' len neda'. <sup>15</sup>Chbeda' chzanda' bite'teze da' de chia' na' lente cuina' cont gaclencha' le'e, la'czla' šlac neda' chaquechda' le'e, le'e bi chaquetele neda'.

<sup>16</sup>Na' ba'le, la'czla' chacbe'ele bi benda' le'e zed len da' byažj bchinda', žale gwziya'a le'e. <sup>17</sup>¿Bi nezele bi gwziya'a le'e cate' gwseła' note'teze bene' ca' ba gwseła' gan' zoale na'? <sup>18</sup>Gwney-oeda' Titon' bedene'e le'e na' gwseła' yeto bene' lježcho len le'. ¿Bi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

<sup>19</sup>¿Chaquetele ba bia' diža' quinga cont nezele bibi da' xinj chonto'? Gague da'n'an' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezde' yogo' da' ba gwnia'

le'e, na' naca' Criston' txen chzejni'ida' le'e. <sup>20</sup>Con chžeba' cate' yedena'a le'e še gata'bia' bi chonle güen can' chaclaža' gonlen', na' še ba chonle da' mal, bi šolaže'le can' gona' len le'e. Chacda' chixe še chdile chšaše na' chgue'e lježle o chloc lježle o chazlaže'le gac güen che cuinzle. Chixe še chne che lježle, še chhitjle diža', še cha'laže'le o še de da' zed chele. <sup>21</sup>Chžeba' cate' yedena'a le'e še gata'bia' zanle bina' cuejyichjle da' malen' ba benle, na' bina' yetinjle che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

**Pablon' že' gone' castigw che  
no chon da' malen'**

**13** Na'a gac šone ni'a yedena'a le'e. Cate' gagwcho xya che note'teze bene', guatabia' nape' dola' še yotilen can' chesena chope o šone bene' cheso'e diža' can' goquen'. <sup>2</sup>Goša' le'e šlac gwzoa' len le'e caten' bedena'a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e. <sup>3</sup>Chaclaže'le gona' to da' gwlo'en chne Criston' len neda'. Da'nan' gona' castigw che nole chon da' xinjen'. Na' Criston' gwlo'e yela' guac xen che' cont saca'zile che da' xinj da' nonle. <sup>4</sup>Na' la'czla' Criston' ben cuine' ca' bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen len Criston' ben cuinto' ca' bene' bibi chac gon, perw gwlo'eto' le'e zoa' yela' guac che Diosen' len neto'.

<sup>5</sup>Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'. <sup>6</sup>Na' zoa' lez lecze gacbe'ele zoe' len neto' na' nacto' postlw che'. <sup>7</sup>Chol' güižto'ne' chele chnabto' bich bi da' mal gonle, gague cont gacbe'ele zoa' Jesucriston' len neto', san cont soale gonle da' güen. Le toze ca' nonen še chesacbe'e bene' zoe' len neto' o še bi chesacbe'ede'. <sup>8</sup>Na' bibi castigw gonto' le'e še chzenagle diža' li che Jesucriston', con gaclento' le'e, še ca'. <sup>9</sup>Yebeto' gonto' ca' bene' bibi yela' chnabia' nape', con še le'e ba chnabia'le chonle can' cheyala' gonle. Na' zoaczt'o' chol' güižto' Diosen' chnabto' gaclene' le'e gonle doxen can' cheyala' gonlen'. <sup>10</sup>Ba bzoja' da' quinga za' yedena'a le'e cont yetinjle xto'la'len' na' bi yažjen gona' znia len le'e. Diosen' gwsele' neda' naca' postlw che' na' bene' neda' yela' chnabia' cont gaclena' le'e, gague cont gwžiaya'a le'e.

<sup>11</sup>Bene' migw chia', chnaba' gacšca güen chele. Le cuec yichjle gonyane'le yogo' da' chaclaže' Diosen' gonle. Le gon chach laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda'ochon', nachen' chnaba' soaščacze' len le'e. <sup>12</sup>Le gwnopa' na' lježle gwguap lježle tiox cate' chežagle txen, cont gacbia' chaque lježle tole yetole. <sup>13</sup>Yogo' bene' ca' chesejnilaže' Criston' do nga chosoguape' le'e tiox.

<sup>14</sup>Na' chnaba' Xancho Jesucriston' gaclenščacze' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab chele gaquen toze len xbab chen. Da' na'zen' chzoja'.



## CART DAN' BZOJ POSTLW SAN PABLO ÇHE BENE' GALACIA CA'

### Pablon' chguape' tiox bene' ca' chesonxene' Criston' Galacia

**1**<sup>1-2</sup>Neda' Pablo chzoja' le'e chdop chzagle chonxenle Criston' yež ca' zjachi' distritw çe Galacia. Neda' len yogó' bene' lježcho ca' nite' nga chguapto' le'e tiox. Gague benač gwlej neda' cont gona' xšine', san Jesucriston' txen len Xe' Diosen' ben' bosban le' ladjo bene' guat ca', legaque' gosebeje' neda' cont naca' postlw čhegaque'.<sup>3</sup>Na' čnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binjo len xbab da' yo'o lo' yichjlažda'ole. <sup>4</sup>Jesucristnan' bnežjw cuine' neče xtoła'chon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen'<sup>5</sup>ben' cheyała' gonxencho toli tocaņe. Na' ca'šcaczce goncho.

### Bich bi yeto diža' de da' gac nacho diža' güen çe Diosen'

<sup>6</sup>Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle çe yeto da' chaquele naquen diža' güen. <sup>7</sup>Perw bi naquen diža' güen. Con nita' bene' chososed chosolo'ede' xtiža' Diosen' clele na' chesone' cont chaczejlaže'le çe diža' güen çe Criston' dan' bsed blo'eto' le'e. <sup>8</sup>Šaca' neto' čixjue'eto' yeto da' bi naquen diža' güen çe Criston', čnabda' Diosen' gone' cont cuiayi'to'. Na' la'czla' to angl bene' za' gan' zoa Diosen' čixjue'ede' yeto da' bi naquen diža' güen çe Criston', lece čnaba' gon Diosen' cont cuiaye'e. <sup>9</sup>Can' ba gwnian', lece can' žia' da' yoble na'a: še note'teze bene' ba čyxjue'ede' xtiža'

Criston' nža'le can' ba nsedlen, čnaba' gon Diosen' cont cuiaye'e toli tocaņe.

<sup>10</sup>Čnia' ca' cont na Diosen' chona' güen, gague cont yesena benačen' chona' güen, na' gague cont yebe benačen' neda'. Šaca' čhi' yichja' nacle gona' cont yebe benačen' can' chonan', bi chzenaga' çe Criston' šaca'.

### Diosen' gwleje' Pablon' na' gwsele'ne' cont goque' postlw

<sup>11</sup>Bene' migw, če'nda' nezele diža' güen çe Criston' dan' ba be'lena' le'e bitw naquen xbab çe benač. <sup>12</sup>Gague benačen' bzenden' neda', na' neca na-cho benačen' bene' cont gwejni'idan', san cuin Jesucriston' bzejni'ide' neda' diža' güen čen'.

<sup>13</sup>Ba beneczele diža' can' ba bena' cate' ne' na'ogua' costumbr çe neto' bene' Israel. Leca bčhi bsaca' bene' ca' chesonxene' Criston', goclaža' yesyenite'. <sup>14</sup>Na' gwche'chgua yichja' çe costumbr dan' gosa'o da' xozxta'ogua' ca' na' bsedchan' clel ca' zan bene' l gualja' bene' lece zjanac bene' Israel. <sup>15</sup>Perw cate' bina' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwčhoglagüen' gone', <sup>16</sup>nach bene' cont bemb'i'a Xi'ine' Jesús. Na' bzejni'ide' neda' cont čyxjue'eda' xtiža' Jesús'en' len bene' ca' bi zjanac bene' Israel. Na' cate' ben Diosen' ca' len neda' notno gwnabda' gwzejni'ide' neda'. <sup>17</sup>Na' neca gwy'a Jerusalenna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwy'a'tia' gan' nzi' Arabia, na' gwdechle beza' Arabia bežina' Damasco.

<sup>18</sup>Na' gocch šon iz gwy'a'a Damascon', nach beza' beya'a Jerusalenna' cont bemb'i'a Pedron' na' jaso'a len le' žta'gwbiž. <sup>19</sup>Perw bitw bšaga' yezica'chle postlw ca' san toze Jacobo bene' biše' Xan-

chon'. <sup>20</sup>Nezeczce Diosen' da' nga chzoja' naquen diža' li.

<sup>21</sup>Nach gwy'a yež ca' zjachi' gan' nzi' Siria na' Cilicia. <sup>22</sup>Na' bene' ca' chesedop chesežag chesonxene' Criston' yež ca' zjachi' distritw Judean', le-gaque' biŋa' yesombi'e neda' ca hora'. <sup>23</sup>Con ba gosende' chesena bene' chia': "Ben' bchi bsaque' neto' bich chone' ca'. Ba chyixjue'ede' cheyała' šejnilaže'cho Criston', la'czła' cana' goclaže' gone' cont nono yesejnilaže' Criston'." <sup>24</sup>Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

### Yezica'chle postlw gosazlaže' can' chon Pablon'

**2** Na' gocch žta' iz gwy'a Jerusalénna' nach da' yoble gwy'a len Bernabén', na' lecze gwchi'a Titon'. <sup>2</sup>Diosen' bzejni'ide' neda' cheyała' ša'a, na' da'nan' gwy'a. Na' btoba' bene' ca' zjanaque' blao len bene' ca' chesonxen Criston' Jerusalénna' na' legacze' bzejni'ida' bin' chyixjue'eda' len bene' ca' bi zjanaque' bene' Israel cate' choelena' legaque' diža' güen che Criston'. Bzejni'ida' legaque' bin' chsed chlo'eda', le goclaža' yesenezde' cont bi yesene' bibi zaca' dan' chona' na' da' ba bena'. <sup>3</sup>Ca' goquen' bitw chole gosone' byen soa bene' lježa' Titon' seńw dan' nzi' circuncisión la'czła' bi naque' bene' Israel. <sup>4</sup>Goc ca' la'czła' gwnita' bał bene' gosaque' txen len bene' lježcho ca' Jerusalénna' ca hora', bene' gague do laže' gosejnilaže' Criston', con bedesen'e še na'oto' costumbr ca' zjanyoj le'e ley che neto' bene' Israel. Legaque' gosaclaže' yesone' byen ga'oto' costumbr ca', la'czła' nezecho chebe Diosen' chio' dan' chejnilaže'cho Criston', gague dan' choncho can' ža leyna'. <sup>5</sup>Perw neto' ne late'ze bi bzenagto' che le-gaque', le goclaže'to' bi gata' da' gwžon gwzenaguechle diža' güen che Criston' da' naquen da' li. <sup>6</sup>Na' ca nac bene' ca'

gosac bene' blao len bene' ca' chesejnilaže' Criston' Jerusalénna', bitw gosaclaže' gwša'a can' chsed chlo'eda' che Criston'. (Žia' ca' la'czła' bitw bi nonen len neda' še gosaque' bene' blao o še bi gosaque', le len Diosen' tozce can' zjazaca' yogo'loł bene'.) <sup>7</sup>Gosacbe'ede' Diosen' ngüe'e lo na' chyixjue'eda' diža' güen che Criston' len bene' ca' bi zjanaque' bene' Israel can' ngüe'en lo na' Pedron' chyixjue'eden' len bene' Israel gualaž cheto' ca'. <sup>8</sup>Le Diosen' ben' chaclene' Pedron' len yela' guac chen' cont chyixjue'ede' xtiža' Criston' len bene' Israel gualaž cheto', leczen' chaclene' neda' len yela' guac chen' cont chyixjue'eda' xtiža' Criston' len bene' bi zjanaque' bene' Israel.

<sup>9</sup>Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaque' yesonen' len bene' Israel gualaž cheto' ca'. <sup>10</sup>Toze dan' gose'e neto' gonto', gaclento' bene' yaše' ca'. Na' da' licze čičh'g'ua yichja' chona' ca'.

### Pablon' gwdiłe Pedron' gan' nzi' Antioquía

<sup>11</sup>Na' gwdechle gwy'a gan' nzi' Antioquía. Na' šlac zoa' na' bid Pedron', na' gwdiła'ne' can' chone', le bla'alaon chone' da' mal. <sup>12</sup>Cate' za' bžine' Antioquían', gwzolažie' che'ej chagüe' txen len bene' ca' chesejnilaže' Criston' la'czła' bi zjanaque' bene' Israel; perw gwdechne' cate' besežin bene' Jerusalén ben' gwsela' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi

yesena bene' ca' cheson xbab note'teze bene' chejnilaže' Criston' cheyala' soe' señw dan' že' circunciśi3n. <sup>13</sup>Nach yezica'chle bene' Israel ca' chesejnilaže' Criston' ľecze besyebix'e' bich gose'ej gosagiue' txen len bene' ca' bi zjanaque' bene' Israel, na' gosego'oyeľe' Bernab3n' cont lencze' bebix'e'. Na' gosone' ca' cont yesebe bene' Jerusal3n ca' ľegaque', ľa'czľa' gosenezde' bi naquen mal yese'ej yesagiue' txen len bene' ca' bi zjanaque' bene' Israel. <sup>14</sup>Gocbe'eda' bi chesone' can' cheyala' gon chio' nombia'cho diža' ľi che Criston'. Na' da'nana' gwdila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejjyichjo' costumbr che chio' bene' Israel cont chono' txen len bene' ca' bi zjanaque' bene' Israel. Da'nana' bitw cheyala' gono' byen yeson bene' ca' bi zjanaque' bene' Israel can' nac costumbr che chio' bene' Israel."

### Con bene' chesejnilaže' Jesucriston' zjanaque' bene' gi3en len Diosen'

<sup>15</sup>Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'. <sup>16</sup>Perw ba nezet0' Diosen' bitw že' nacto' bene' gi3en len ľe' neče' da' chonto' can' ža ley dan' bzoj da' Moiss3sen'. Con bene' chesejnilaže' Jesucriston' zjanaque' bene' gi3en len Diosen'. Da'nana' lencze neto' chejnilaže'to' Criston' cont Diosen' že' cheto' ba nacto' bene' gi3en lagie'na'; že' ca' gague neče' dan' chonto' can' ža leyna'. Le bi nacho zoa bene' nac bene' gi3en len Diosen' neče' chone' bi da' ža leyna'.

<sup>17</sup>Baľ neto' bene' Israel ba chejnilaže'to' Criston' cont Diosen' none' neto' ca' bene' gi3en. Da'nana' chache'eto' toz ca' bene' gi3en da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. ľeca cľelen' cheson bene' xbab še

chesacde' ca'. <sup>18</sup>Nezecho bi chyažjen ga'ocho costumbr che da' xozxta'o neto' bene' Israel cont gaccho bene' gi3en len Diosen'. Na' še ba gwlejjyichjo' costumbr ca' na' yezolaocho yeya'ocho da' yoble, gwlo'elaon naccho bene' gi3en da' xinj. <sup>19</sup>Ley dan' bzoj da' Moiss3s ba bzejni'in neda' bi naca' bene' gi3en len Diosen', ľe bi chona' can' žanna'. Perw dan' bi gwzoen yeyonen neda' bene' gi3en len Diosen', da'nana' bich chonxenan', san yo'o yichja' soacza' gwzenaga' che Diosen'. <sup>20</sup>Criston' bnežjw cuine' gote' neče' xtolan', na' dan' chejnilaža'ne' da'nana' ba none' neda' ca' to bene' guat len da' xinjen' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Ľen' chacde' chio' na' bnežjw cuine' gote' neče' chio'. <sup>21</sup>Diosen' nži'ilaže'de' chio' na' da'nana' gwseľe' Criston', perw chzoa'cho to šľa'ale dan' bnežjw cuine' gote' še chaquecho naccho bene' gi3en len ľe' neče' choncho dan' ža leyna', ľe bitw byažjen bnežjw cuin Criston' neče' chio' šaca'.

### Naccho bene' gi3en len Diosen' dan' chejnilaže'cho Criston'

**3** Le'e bene' Galacia, nčhoľ yichjlažda'olen'. ěNo gwziye' le'e cont chaquele cheyala' gonxenľe costumbr che da' xozxta'oto' ca'? Ba bzejni'iyane'da' le'e che dan' got Criston' ľe'e yag cruzen' neče' chio'. <sup>2</sup>Da' ngazen' chnabda' le'e: ěZoa Spiritw che Diosen' lo' yichjlažda'ole neče' dan' chonľe can' ža ley dan' bzoj da' Moiss3sen'? Bitw naquen ca', san zoan len le'e neče' dan' chejnilaže'le Criston'. <sup>3</sup>Spiritw che Diosen' gwyo'on lo' yichjlažda'olen' caten' gwzolao chejnilaže'le Criston'. ěDa' ľeca nčhoľ yichjlažda'olen' chaquele chyažjen gonle can' ža leyna' cont yeyož gacle

can' chazlaže' Diosen'? <sup>4</sup>Da' zan da' bosochi bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheyala' gonle can' ža leyna'? <sup>5</sup>Nezele Diosen' ba bene' Spiritw chen' zoan len le'e na' chone' yela' guac da' chle'ele neche chejle'le xtiža' Criston' dan' bzeneto' le'e, gague chac ca' neche dan' chonle bi dan' ža leyna'.

<sup>6</sup>Da' Abrahanna' gweyjnilaže' Diosen', na' da'nana' Diosen' gwne' naque' bene' güen lagüen'. <sup>7</sup>Da'nana' cheyala' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'. <sup>8</sup>Diosen' bzie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'nana' Xtižen' dan' nyojen žan gože' da' Abrahanna' diža' güen qui cate' bina' žin ža gaquen': "Dan' chejnilažo' neda' gona' güen len bene' ca' že' yogo' nación." <sup>9</sup>Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gweyjnilaže'ne'.

<sup>10</sup>Na' note'tez bene' chon xbab gaque' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan: "Da' mal juisyw gac che note'tez bene' še bi nita'teze' yesone' yogo'ol can' ža leyna' bate'teze." <sup>11</sup>Na' Xtiža' Diosen' nyojen, žan: "Bene' chesejnilaže' Diosen' zjanaque' bene' güen lagüe', na' da'nana' guata'cze yela' mban chegaque' toli tocañe." Na' da' žan ca' nezecho bitw že' che note'tezcho nacho bene' güen lagüen' neche choncho bi dan' ža leyna' goncho. <sup>12</sup>Na' leyna' bi žan cheyala' šejnilaže'cho Diosen', san con žan: "Note'teze bene' chon doxen can' ža leyna' gac bane' toli tocañe."

<sup>13</sup>Perw Criston' bnitlagüe' xtoła'chon' cont bi gac da' mal juisyw checho dan'

bi chzoecho goncho doxen can' ža leyna'. Bnežjw cuine' goc da' mal juisyw che' laz chio'. Goc che' can' nyojen, žan: "Da' mal juisyw chac che note'tez bene' chesote' chosode'ene' le'e yag." <sup>14</sup>Goc ca' cont lencze le'e bi nacle bene' Israel šejnilaže'lene' na' soale mbalaz ca mbalazen' gwzoa da' Abrahanna' dan' gweyjnilaže' Diosen'. Nachen' da' chejnilaže'cho Cristo Jesúsena', Diosen' gwsele' Spiritw chen' zoan len chio' can' gwne' gone'.

### Ley dan' bzoj da' Moisésen' na' dan' gwna Diosen' gone' len da' Abrahanna'

<sup>15</sup>Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benachze. <sup>16</sup>Na' ca nac dan' gož Diosen' Abrahanna' gone' da' güen len le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo. <sup>17</sup>Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoza' bene', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'. <sup>18</sup>Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen che xi'in diaža che da' Abrahanna' can' ba gwne' gone' šaca'. Perw Abrahanna' goque' bene' güen len le' da' gwejle'e gon Diosen' can' gože'ne'.

<sup>19</sup>Še naquen ca' ¿bixchen byažje ley dan' bzoj da' Moisésen'? Diosen' bnežjuen' da' xozxta'oto' bene' Israel cate'

ba gwde tiemp che da' Abrahanna' cont gosacbe'ede' bi chesone' can' non Diosen' mandadw yesone'. Na' bžie' bia' gonen žin šlac biŋa' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'in diaža che da' Abraham. Na' ca nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xoxta'oto' bene' Israel ca' can' žanna'.<sup>20</sup> Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

### Da' chzejni'i leyna' chio'

<sup>21</sup> Na' bitw cheyała' gaguecho ley dan' bzoj da' Moisésen' chonen clele len da' gwna Diosen' gone' la'czła' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' ža leyna' nach gaccho bene' güen len Diosen' šaca'.<sup>22</sup> Perw Xtiža' Diosen' dan' nyojen žan yogo'loł benachen' yesezi'e castigw toli' tocane neče xtoła'gaquen', na' con bene' yesejnilaže' Jesucriston' nit-lao xtoła'gague' can' bsi Diosen' xnezen', cont gac güen chegaque' can' gwne' gac che xi'in diaža che da' Abrahanna'.

<sup>23</sup> Ca nac neto' bene' Israel, cate' biŋa' nezeto' cheyała' šejnilaže'to' Criston', nchoglaon cheto' si'to' castigw toli' tocane dan' nombia'to' leyna' na' bitw chonto' can' žanna'.<sup>24</sup> Len neto' leyna' zaca'leben ca to bene' chgüia chne'e xi'in bene', da' zan da' chi'ebe' gombe' na' da' zan da' chi'ebe' bi gombe'. Perw na'a ba bid Criston', na' note'tezcho chejnilaže'chone', Diosen' že' naccho bene' güen len le'.<sup>25</sup> Na' dan' ba bid Criston' leyna' bich naquen ca bene' chgüia chne'e neto' bene' Israel, neto' chejnilaže'to'ne'.

<sup>26</sup> Yogo' chio' chejnilaže'cho Cristo Jesúsén' naccho xi'in Dios. <sup>27</sup> Na'

note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'.<sup>28</sup> Na' tozeczce can' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca toze bene' neče dan' naccho txen len Cristo Jesúsén'.<sup>29</sup> Na' dan' naccho txen len Criston', lao Diosen' naccho xi'in diaža che da' Abraham, na' gon Diosen' güen len chio' can' gwne' gone' len xi'in diaža che da' Abrahanna'.

**4** To bene' gwni'a še zoa xi'ine', bi'nan' gac lo na'be' da' de che'. Perw na' šlac ne' nacbe' bidao' bitw nacho mbal-azech chac chebe' clcl ca che to bene' güen žin la'czła' žin ža gac lo na'be' yogo' dan' de che xaben'.<sup>2</sup> Bene' güen žin ca' nite' lo' yo'o chosogüia chesene'ebe' na' chesenabi'ebe' šlac biŋa' cha'obe' na' šlac žin ža co'o xaben' lo na'be' dan' de chen'.<sup>3</sup> Can' goc len neto' bene' Israel šlac biŋa' yid Criston', gwxcaca'lebto' ca xi'in bene' gwni'an'. Na' leyna' gwzaca'leben ca bene' ca' chesenabia' xi'in bene' gwni'an' šlac biŋa' žin ža si'be' dan' de che xaben'.<sup>4</sup> Perw cate' bžin ža bžia Diosen' bia' gwseła' Xi'inén' yežlio nga, gwxcan to no'ole le'. Na' Xi'in Diosen' lecze benen byen bzenague' che leyna'.<sup>5</sup> Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

<sup>6</sup> Na' cont nezecho ba non Diosen' chio' ca xi'ine', ba gwsele' Spiritw chen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont choł güižcho Diosen' che'chone': "Xa".<sup>7</sup> Nachen' dan' ba non Diosen' chio' ca xi'ine' bich cheyała' soacho ca to esclavo len dan'

non leyna' mandadw goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

**Pablon' chi' yichje' nac cheson  
bene' ca' chesejnilaže' Criston'**

<sup>8</sup> Cate' bina' gombia'le Diosen', gwejnilaže'le da' ca' bi cheyala' šejnilaže'cho, na' legaquen gosenabian' xbab chele. <sup>9</sup> Perw na'a ba nombia'le Diosen', o še güen ch nacho Diosen' ba nombi'e le'e. Na' chebanchgüeda' chele dan' chebiga'le cosxanle na' da' yoble chonxenle costumbr ca' ca no che da' ye'ej gagwcho, che ža ca', na' che cuerp chechon', na' cho'ele latje chesenabian' xbab chele la'czla' bitw zjazacan' cont yesaclenen chio'. <sup>10</sup> Ba chonxenle costumbr che no ža lini, che bio' ca', che tiemp ca' na' che iz ca'. <sup>11</sup> Chžeba' še bich chzenagle che dan' ba bsed blo'eda' le'e, le še bich chzenagle chen, ba gwžiai' dan' bena' len le'e.

<sup>12</sup> Bene' migw, chata'yoeda' le'e gacbe'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca' chacbe'eda' bi yesaclenen neda' lao Diosen'. Na' caten' bedesoa' len le'e cana', bitw nacho ba benle mal len neda'. <sup>13</sup> Nezeczele bega'anlena' le'e da' nechw dan' gocšenda' na' gwdixjue'eda' diža' güen che Criston' len le'e. <sup>14</sup> Na' dan' gocšenda' ca' hora' zacan' gue'ele neda', perw bitw bgue'ele neda', san do yichj do laže'le bleble neda' ca' šale bleble to no angl che Dios o ca' šale cuin Jesucriston'. <sup>15</sup> Mbalaz gwzoale cate' gwzoa' len le'e cana'. ¿Bixchen' bich chebele xtižan' na'a? Nezda' da' leca goquele neda' bzanele bite'teze da' de chele na' goclaže'le lente cuinle zanele gaclenle neda'. <sup>16</sup> Na' na'a žba chaquele chgue'eda' le'e dan' choe'lena' le'e diža' lin'?

<sup>17</sup> Bene' ca' chososed chosolo'ede' le'e na'a leca zjachi' yichjgaque' le'e, perw

gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle le-gacze'. <sup>18</sup> Naqueczen güen yesebe' yichj bene' le'e bate'teze, gague cate'zen' zoa' len le'e, con še yesone' güen len le'e. <sup>19</sup> Xi'indagua', da' yoble chžaglagua' lo' lažda'ogua' neče le'e can' chžaglao to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. <sup>20</sup> Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' chele.

**Da' Agar na' da' Saran'**

<sup>21</sup> Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésen' žbina' yenele can' ža dan' nyojen? <sup>22</sup> Žan gwnita' chope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol checze', no'ole nga bi goque' esclava. <sup>23</sup> Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol checze', goljbe' neče Diosen' gože'ne' san no'ol chen' la'czla' naque' no'ol güiž. <sup>24</sup> Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le' Agar zaca'lebde' ca' ley dan' ben Diosen' mandadw bzoj da' Moisésen'. Bzojen' par da' xozxta'o neto' bene' Israel lo' ya'a Sinaí, na' bene' ca' zjazaca'lebde' ca' esclavos. <sup>25</sup> Na' doxen nación Israelen' zaca'leben ca' da' Agaren' no'ole esclava che da' Abrahanna'. Diosen' bnežjue' da' xozxta'oto' ca' leyna' lo' ya'a Sinaí' gan' nzi' Arabia, na' ža na'aža bene' Israel gualaž cheto', bene' guac nacho bene' Jerusalén, ne' zjanaque' ca' esclavos neče chesacde' chonen byen yesa'ogüe' costumbr ca' dan' ža leyna'. <sup>26</sup> Perw chio' chejnilaže'cho Criston' naccho txen len yogo' bene' šjaya'aque' yaba gan' zoa

Diosen' gan' ľecze nzi' ciuda Jerusalén. Na' nezecho bitw chonen byen ga'ochó costumbr ca' dan' ža leyna'.<sup>27</sup> Quinga ža Xtiža' Diosen' dan' nyojen:

Bebe no'ole güiž, no'ole cbi chzan, bosya'a yeļa' chbe chio', le' biņa' gaco' bes che yeļa' sanņa'.

Chacdo' bi chaque Diosen' le' da' nono xi'ino' zoa,

perw nita' zanch xi'ino' clel ca nita' che no'olen' ba gwzan xi'in' bene' byon' gwzoalene'.

<sup>28</sup> Bene' migw, xi'in' da' Abrahanna' bin' le Isaac goljbe' neche gož Diosen' Abrahanna' san no'ol chen' ľa'czļa' goque' no'ole güiž. Na' ca'cze chio' chejni-laže'cho Criston', Diosen' none' chio' ca xi'in' diaža che da' Abrahanna' bin' goljbe' neche goc dan' gož Diosen' le'.<sup>29</sup> Bi' che da' Agaren', bin' goljbe' neche gwzoalen da' Abrahanna' le', bchi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža na'aža, bene' ca' chesa'o costumbr ca' dan' ža leyna' chosoči chososaque' chio' chejni-laže'cho Criston'.<sup>30</sup> Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' chen', le bitw gwnežjua'be' dan' gwnia' gwnežjua' bi' gwzan no'ol chio'na'."<sup>31</sup> Da'nana' bene' migw, nezecho zaca'lebcho ca xi'in' da' Saran', gague ca xi'in' da' no'ole esclavan'.

### Bi cheyaļa' yesa'ogüe' costumbr da' bi zjazaca'

**5** Caten' gwejni-laže'cho Criston', le' bebeje' chio' lo' yogo' da' choncho chaquecho chebe Diosen' chio' lagüe dan' chonchonņa'. Da'nana' bi cheyaļa' yey-onxencho costumbr da' bi zjazacan' len Diosen'.

<sup>2</sup> Neda' Pablo žia' le'e to da' žialao. Še soale seņw dan' nzi' circuncisión na'a ba chejni-laže'le Criston', bibi zacan' dan' ba gwzolao chejni-laže'lene' še

ca'.<sup>3</sup> Da' yoble žia' le'e, note'teze bene' soe' seņw dan' nzi' circuncisión, ľecze cheyaļa' gone' yogo'lo' bite'teze dan' ža ley dan' bzoj da' Moisésen'.<sup>4</sup> Na' še chaquele gonle doxen can' ža leyna' cont gacle bene' güen len Diosen', ba chzoale Criston' to šļa'ale še can' chaquele, na' bich chonle xbab catequen' nži'ilaže' Diosen' chio'.<sup>5</sup> Da' chejni-laže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho bene' güen len le' cate' yežincho gan' zoe'na'.<sup>6</sup> Ca nac chio' chejni-laže'cho Cristo Jesúsena', bitw bi nonen len Diosen' še ba zoa-cho seņw da' nzi' circuncisión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gague ľježcho cont gacbia' chejni-laže'chone'.

<sup>7</sup> Cana' gwzoale chonle can' chebe Diosen', perw na'a žnon' ba ben cont bich chzenagle che diža' li' che Diosen'?<sup>8</sup> Dios ben' gwleje' le'e nacle xi'ine', bitw nacho le'na' chone' cont chzenagle che diža' yoble.<sup>9</sup> Le gon xbab can' ža diža' nga: "Late'ze levadura chonen cont chas doxen cuazina'."<sup>10</sup> Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che bene' chon cont chacžejlaže'le, note'teze naque'.

<sup>11</sup> Bene' migw, ca nac neda', šaca' ne' chsed chlo'eda' nia' yogo' bene' byo cheyaļa' yesezoe' seņw dan' že' circuncisión cont yesenite' binlo len Diosen', bilja chosoči chososaca' bene' Israel gualaž chian' neda' šaca', le can' chososed chosolo'e ľegaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nana' bi chesazlaže' xtižan'.<sup>12</sup> Na' ca nac bene' ca' cheson cont chaquele bilja chebe Diosen' le'e še bi zoale seņon', yebeda' šaca' yesečog cuin-gaque' yelate'.

<sup>13</sup> Bene' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ocho dan' ža ley cont soacho binlo len le'. Perw bitw cheyała' goncho bite'teze da' mal dan' ža lažda'ochon' goncho. Dan' cheyała' goncho, cheyała' gaclen lježcho lagüe dan' chaque lježcho tocho yetocho. <sup>14</sup> Na' ba zoaczcho choncho yogo'loł can' ža leyna' še choncho can' nyojen žan: "Cheyała' gague lježcho ca chaque cuincho." <sup>15</sup> Perw še chacyožlen lježcho o chdillen lježcho, chžiai'cho dan' non Diosen' cont naccho toze.

### Can' goncho še gwzenagcho che Spiritw che Diosen'

<sup>16</sup> Chnia' le'e to da' zejen, cheyała' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'. <sup>17</sup> Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'n'an' bitw choncho da' mal dan' ža lažda'ochon' goncho. <sup>18</sup> Na' še chzenagcho che dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisésen'.

<sup>19</sup> Nacbia'cze bene' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga: chesata'lene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque'; <sup>20</sup> chesejnilaže' l gua'a lsaca'; chosozenague' xtiža' bene' ca' chesenelen da' xigüe'; chesegue'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin cbi yesone' xbab

nac gac che lježe'; bitw chesone' txen len lježe'; <sup>21</sup> chesezelaže' bi da' de che bene' yoble; chesote' bene'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' za gwnicza', nono yežin yaban' gan' bo ziosen' chnabi'e še chone' da' xinj ca' zjanac ca'.

<sup>22</sup> Perw na' še chzenagcho che Spiritw che Diosen', goncho yogo' da' quinga: gaguecho ljež benachcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež benachcho bite'teze da' chesonde' chio'; goncho güen len bene' yezica'chle; gaccho bene' šagüe' len yogo'loł bene'; goncho bi da' si' lo' na'cho goncho; <sup>23</sup> gaccho bene' gwzexjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal. <sup>24</sup> Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'. <sup>25</sup> Spiritw che Diosen' ba benen yela' mban toli tocane checho, na' da'n'an' cheyała' soacho goncho can' chaclažen'. <sup>26</sup> Na' bi cheyała' ga'laže'cho gaguecho leca bene' güen naccho, le še goncho ca', chonen cont yeseža'a bene' lježcho chio' na' yesegue'ede' chio'.

### Cheyała' gaclen lježcho

**6** Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyała' gaclenchwne' yetinjden' cont yezoe' binlo len Diosen'. Na' cheyała' gwsaca'cho, le xož lecze chio' lažo'cho goncho da' malen'. <sup>2</sup> To tocho cheyała' gaclen bene' lježcho ca' bite'teze da' chesac chegaque', le can' gwna Criston' chaclaže' goncho.



<sup>3</sup>Na' še goncho xbab naccho bene' güen cate' bi naccho, chziye'ze cuinchon' še ca'. <sup>4</sup>To tocho cheyala' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güen ch ba ben chio' clel ca bene' yoble. <sup>5</sup>Le to tocho choglao Diosen' checho še bencho güen o še bencho mal.

<sup>6</sup>Še no chsed chlo'e chio' xtiža' Diosen', cheyala' gwnežjwchone' late' bi da' šagüe' da' güen da' de checho.

<sup>7</sup>Bitw güe'le latje no si'ye' le'e, bitw gac gwcuase'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho." <sup>8</sup>Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocane; perw ben' chon can' chazlaže' Spiritw che Diosen', Spiriton' gonen cont bane' toli tocane. <sup>9</sup>Na' bitw cheyala' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjcho choncho can' chaclažen'. <sup>10</sup>Da'nan' cheyala' goncho güen len yogo'loł bene' bate'teze de latje, na' chonchen byen goncho güen len bene' chesejnlaže' Criston' clel ca len yezica'chle bene'.

### Yeto chope dan' che' Pablon' legaque'

<sup>11</sup>Le na'šc letr cha'o quinga, le cuina' chzoja' le'e. <sup>12</sup>Bene' ca' chesac-laže' yesone' byen soale señw dan' že' cir-

cuncisión chesacde' yesyebe bene' Israel gualaž cheto' ca' legaque' še ba bosozoe' le'e señon'. Cheseyiljwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neche chio' cate' gote' le'e yag cruzen'. <sup>13</sup>Bene' ca' chesene' cheyala' soale señon' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesac-laže' soale señon' cont yesonxen cuingaque' lao bene' Israel gualaž cheton'. <sup>14</sup>Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neche chio'. Bitwbi nonen len neda' še benachen' yesyebede' neda', le neda' bich chebeda' da' ca' chesena benachen'. <sup>15</sup>Na' len chio' chejnlaže'cho Cristo Jesúsén' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob Diosen' yichjlažda'ochon'. <sup>16</sup>Lao Diosen' naccho dogualje bene' Israel še ba chejnlaže'cho Jesucriston'. Na' chnaba' gaclen Diosen' yogo'le ba zoale chzenagle che' cont soa cuezchle binlo len xbab chele, na' lecze chnaba' yeyaše' yeži'ilaže'de' le'e.

<sup>17</sup>Na' na'a chnabšca' bich gonle güednag len xtižan', le cuerp chia' nga nsan' yiž che dan' bosochi bososaca' bene' neda' neche chyixjue'eda' xtiža' Xancho Jesúsén'.

<sup>18</sup>Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

## CART DAN' BZOJ POSTLW SAN PABLO ĆHE BENE' CA' ŽE' EFESO

### Pablon' bzoje' bene' chesejnilaže' Criston' ciuda Efeso

**1** Neda' Pablo naca' postlw ĉhe Jesu-  
criston' con can' gwnalaže' Diosen'.  
Na' chzoja' le'e zoale Efeso le'e nacle  
lo na' Diosen' da' chejnilaže'le Criston'.  
<sup>2</sup> Ćhñabda' Ćxacho Diosen' na' Ćxancho Je-  
sucriston' yesaclene' le'e na' yesone' cont  
soa cuezle binlo len xbab ĉhelen'.

### Diosen' chaclenchgüe' chio' da' ngode'cho txen len Criston'

<sup>3</sup> Ćheyaĵa' gonxencho Diosen' ben'  
nac Ćxa Ćxancho Jesucriston' na' le' leće  
chonxene' Diosen'. Chio' naccho txen  
len Criston', Diosen' ba bene' chio'  
yogo' da' ĉhyažje yichjlažda'ochon'  
cont šjayzoacho len le' yaban'. <sup>4</sup> Na' da'  
bnežjw cuin Criston' neće chio', da'nan'  
Diosen' gwleje' chio' cate' biña' xe  
yežlion' cont gaccho bene' laždao' xilaže'  
na' bibi doĵa' gapcho lagüen'. <sup>5</sup> Diosen'  
ĉhadde' chio' cate' biña' soacho. Da'nan'  
bsi'e xnezen' none' chio' ca xi'ine' con  
can' gwnalaže', na' da'nan' gwsele'  
Jesucriston' neće chio'. <sup>6</sup> Ćheyaĵa'  
soaczcho gonxencho Diosen' catec  
nži'ilaže'de' chio', le gwsele' Jesucriston'  
ben' ĉhadde' cont le' goclenchgüe' chio'.  
<sup>7</sup> Ćaten' got Criston', blalj xĉhene' neće  
da' xinjen' ben chio' chejnilaže'chone'.  
Da'nan' Diosen' bezi'xene' xtoĵa'chon', le  
nži'ilaže'chgüede' chio'. <sup>8</sup> Na' chonchgüe'  
güen len chio', chone' chio' doxen yela'  
sina' na' yela' chejni'i da' ĉhyažjecho.  
<sup>9</sup> Na' bzejni'ide' chio' da' gwnalaže' da'  
nono gwneze cani' da' bžie' bia' gac.  
<sup>10</sup> Le Diosen' bžie' bia' žin ža cate' yogo'  
bene' že' yaba len bene' že' yežlion'

yosozenague' ĉhe Criston' na' yesaque'  
txen len le'.

<sup>11</sup> Ca nac chio' naccho txen len  
Criston', Diosen' bsi'e xnezen' none' chio'  
ca xi'ine' cont gac lo na'cho da' ĉaclaže'  
gone' chio'. Na' Diosen' chone' cont ĉac  
dan' ĉhsi'e xnezen' na' chone' da' nezde'  
naquen güen. <sup>12</sup> Ćani'te neto' bene' Ćrael  
ba ĉbezto' yid Criston', le zgua'tec  
gwlej Diosen' neto' cont gonxento'ne'  
da' naque' bene' zaca' juisyw. <sup>13</sup> Na'  
leće ca' le'e, cate' benele diža' güen ĉhe  
Criston' dan' nac da' li na' gwnezele  
ĉaclaže' gone' yela' mban ĉhecho toĵi  
tocane, nach gwyejnilaže'lene'. Da'nan'  
leće le'e ba nacle txen len Criston',  
na' Spiritw ĉhe Diosen' bžinen zoan lo'  
yichjlažda'olen', can' gwne' soan. Na'  
Spiriton' zoan len chio' cont nezecho  
ba non Diosen' chio' ca xi'ine'. <sup>14</sup> Leće  
zoan lo' yichjlažda'ochon' cont nezecho  
žin ža gac lo na'cho yogo' da' ca' za'  
gonĉ Diosen' chio' naccho xi'ine' cate'  
gone' cuerp cobe ĉhechon'. Na' gonĉe'  
chio' da' ca' cont gonxenĉhone' da'  
naque' bene' zaca' juisyw.

### Pablon' gwñabe' gwnežjw Diosen' bene' chesejnilaže'ne' yela' sina' ĉhe'

<sup>15</sup> Da'nan' cate' benda' diža' can' chejni-  
laže'le Ćxancho Jesúsen' na' can' ĉaquele  
yezica'ĉle bene' chesejnilaže'ne', gwzo-  
lagua' <sup>16</sup> ĉoa' yela' choĵcĉlen ĉhe Diosen'  
neće le'e cate' choĵ güiža' Diosen', na'  
bi ĉezi'laža' chona' ca'. <sup>17</sup> Dios ben'  
chonxen Ćxancho Jesucriston', ben' nac  
Će' na' ben' nac bene' zaca' juisyw,  
len' choĵ güiža'. Na' ĉhñabda'ne' cue'  
yela' sina' ĉhen' lo' yichjlažda'olen' na'  
gaclene' le'e cont gombia'ĉhlene'. <sup>18</sup> Na'  
ĉhñaba' šo' be'ni' ĉhe' lo' yichjlažda'olen'  
cont nezele bi da' güenna' zoacho lez  
gone' len chion' ba gwleje' naccho  
xi'ine'. Na' ĉhñaba' gone' cont nezele  
catec güen juisyw nac yogo' da' ca'  
za' gone' yesaquen ĉhe chio' chejni-

laže'chone'. <sup>19</sup> Na' ľecze chnaba' šo' be'ni' che' ľo' yichjlažda'olen' cont nezele ľeca nape' yela' guac xen cont gac-lene' chio' chejnilaže'chone'. Blo'e yela' guac xen juisyw che' <sup>20</sup> cate' bosbane' Criston' ladjo bene' guaten'. Na' gwde bosbane'ne' nach nzo'e'ne' cuite' yaban' gan' chesenabi'e txe. <sup>21</sup> Ľe Criston' chnabia'che' ca note'teze angl. Chnabia'che' ca benač, na' ca da' xigüe', na' ca bi da' chesejnilaže' bene', na' ca note'tezechle chesenabia' na'a na' tiemp da' za' za'. <sup>22</sup> Diosen' ba gwlo'e ľo' na' Criston' yogo' bene' na' bica'chle da' zjade cont ľe' chnabi'e. Na' Diosen' bzo'e' Criston' ca Xancho cont chnabi'e yogo' chio' chejnilaže'chone'. <sup>23</sup> Da'n'an' chio' chejni-laže'chone' zaca'ľebcho ca to cuerp, na' Criston' zaca'ľebe' ca yichj cuerpen'. Guac nacho nya' Criston' neche chio' chejnilaže'chone'. Na' Criston' zoe' chnabi'e doxen.

### Diosen' chacde' chio'

**2** Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwɔduple doľa' lao Diosen'. Da'n'an' gogle ca bene' guat da' bi bzenagle che'. <sup>2</sup> Con gwɔdaczle benľe da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen benačhen'. Na' ža na'aža Satanásen' ne' chnabian' yichjlaždao' bene' bi chosozenag che Diosen'. <sup>3</sup> Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'ochon'. Na' da' bebecho da' malen' ľo' yichjlažda'ochon', da'n'an' gwchoglaon checho si'cho castigw che xtoľa'chon' toľi tocaņe, can' gac len yezica'chle bene' bi chosozenag che Diosen'. <sup>4-5</sup> Goccho ca bene' guat len yichjlažda'ochon' da'

gwzoacho bentezcho da' malen'. Na' šlac ne' naccho ca', Diosen' ľeca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'n'an' bocobe' yichjlažda'ochon' cate' gwyejnilaže'cho Criston', na' bene' yela' mban checho toľi tocaņe. <sup>6</sup> Na' da' bocobe' yichjlažda'ochon', guac nacho bene' len chio' can' bene' len Cristo Jesúsen' cate' bosbane' ľe' ladjo bene' guat ca'. Na' da' naccho txe len Criston', mbalaz bač zoacho chbezcho len ľe' na'a can' soacho cate' yežincho yaban' gan' chi'ena'. <sup>7</sup> Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', ľe gonchgüe' zanch da' güen len chio' naccho txe len Cristo Jesúsen'. <sup>8</sup> Da' nži'ilaže' Diosen' chio', ba bene' yela' mban checho toľi tocaņe cate' gwyejnilaže'cho Criston'. Con bene' to golen, gague neche bi da' güen da' ben chio'. <sup>9</sup> Ľe Diosen' bi chačlaže' güe'cho diža' o gaguecho bnitlagüe' xtoľa'chon' neche bi da' güen da' ba bencho. <sup>10</sup> Diosen' bene' chio' na' cate' gwyejnilaže'cho Cristo Jesúsen' bocobe' yichjlažda'ochon' cont soacho goncho da' güen. Cate' biņa' soacho, bsi'e xnezen cont soacho goncho da' güen.

### Bene' Israel na' bene' bi zjanaque' bene' Israel, Criston' bozoe' ľegaque' binľo toe' yetoe'

<sup>11</sup> Da'n'an' ľe gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' ľježto': "Chio' zoacho seňw da' že' circuncisión", na' che'to' le'e: "Bi zoale seňw da' že' circuncisión" (seňw da' chosoza bene' Israel gualaž četo' ca' ľo cuerp che bi' byo dao' ca'). <sup>12</sup> Na' ľe gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto'

bene' Israel. Bi gwzoale lez šjayzoale len Diosen' na' neca gwejnilaže'le Diosen' lo yežlio nga. <sup>13</sup>Perw Criston' bnežjw cuine' gosote'ne' na' blalj xchene' neče chio'. Na' na'a da' chejnilaže'lene' ba nacle txen len Cristo Jesúsén'. Na' ba nacle toze len neto' bene' Israel, la'czla' cana' gocle bene' zito' len neto' na' len Diosen'. <sup>14</sup>Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho. <sup>15</sup>Caten' bnežjw cuine' gote', bzoe' ca'ale ley da' bzoj da' Moisésén' len yogo' da' žan cheyala' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel. <sup>16</sup>Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lecze naccho toze na' bich chgue'e lježcho.

<sup>17</sup>Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'. <sup>18</sup>Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choelencho Diosen' diža'. <sup>19</sup>Da'nan' le'e bi nacle bene' Israel bich nacle ca' bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca' bene' lo' yo'o che'. <sup>20</sup>Chio' chejnilaže'chone' zaca'lebcho ca to yo'o de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebto' ca lene yo'ona'. Na' Jesucriston' zaca'lebe' ca yej squin che yo'ona'. <sup>21</sup>Na' chio' naccho txen len Criston' lecze zaca'lebcho ca yej da' zjancua' zjangoden' gan' chac yo'o

de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca to yo'o gan' zoa Diosen'. <sup>22</sup>Le'e txen len neto' na' len note'teze bene' chesejnilaže' Criston' naccho ca to yo'o gan' zoa Diosen', le zoa Spiritw chen' lo' yichjlažda'ochon'.

**Diosen' gwleje' postlw Pablon'  
cont jatixjue'ede' xtižen' len  
bene' bi zjanac bene' Israel**

**3** Na' da' naquen ca', neda' Pablo choł güiža' Diosen' neče le'e. Dia' ližya nga da' chyixjue'eda' xtiža' Cristo Jesúsén' len le'e bi nacle bene' Israel. <sup>2</sup>Chacda' ba nezeljele nži'ilaže' Diosen' neda' na' bsi'e xnezen' chzejni'ida' le'e xtižen'. <sup>3</sup>Ba bzejni'ide' neda' da' nono gwneze, can' ba bzoja' le'e to chope diža' le'e cart nga. <sup>4</sup>Cate' gwlable cart nga gacbe'ele chejni'ida' da' nono gwejni'i cana' che Criston'. <sup>5</sup>Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'. <sup>6</sup>Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neče da' chejnilaže'cho Cristo Jesúsén', na' txen naccho ca toze bene', na' txenna' chaclen Diosen' chio' can' gwne' gone'.

<sup>7</sup>La'czla' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'. <sup>8</sup>Chacda' ne late'ze bibi zaca' ladjo yogo' bene' ba gwlej Diosen' zjanaque' lo' ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' güen juisyw gone' len yogo' chio' chejni-laže'cho Criston'. <sup>9</sup>Na' Diosen' gwlo'e lo' na' chzejni'ida' yogo'lo! bene' da' nžie'

bia' gac. Gwzolaoten cate' gwxe yežlion', nono gwņeze da' nžie' bia' gac, con toz Diosen' gwņezde', Dios ben' bene' yogo'loł bene', yogo' beyixe' na' yogo' bichle da' de. <sup>10</sup>Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonx-encho Jesucriston', cont yesacbe'ede' nape' yela' sina' len yogo'loł da' chone'. <sup>11</sup>Chone' can' bžie' bia' gone' caten' bina' xe yežlion', le cani'te bsi'e xņezen' sele' Xancho Jesucriston'. <sup>12</sup>Na' naccho txen len Criston' da' chejnilaže'chone'. Da'n'an' bi chžebcho Diosen', san chbecho nezecho chac choe'lenchwn'e diža'. <sup>13</sup>Nachen' chņeyoeda' le'e bi gacže-jlaže'le che da' chac chia' nga chyi chzaca' lagüe da' chyxjue'eda' xtiža' Jesucriston' len le'e. Naquen da' yebele, gague da' gacžejlaže'le.

#### **Criston' chacde' chio' chejnilaže'chone'**

<sup>14</sup>Na' da' naquen ca', chzoa xiba' chol giüža' Xa Xancho Jesucriston'. <sup>15</sup>Le' bxie' yogo' diaža che chio' zoacho yežlio nga na' che bene' že' yaba. <sup>16</sup>Diosen' naque' bene' zaca' juisyw na' nape' la'zelagüe' yela' guac xen. Nachen' chņabda'ne' gone' ga soa Spiritw chen' lo' lažda'olen' cont soa chach laže'le len yela' guac chen. <sup>17</sup>Chņaba' soateze soa Criston' len le'e da' chejnilaže'lene'. Na' chņaba' soaczle gaquele Diosen' na' gague lježle do yichj do laže'le, <sup>18</sup>cont gac šejni'ile txen len yezica'chle bene' zjanaque' lo' na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca' chacde' chio'. <sup>19</sup>Le bina' šejni'icho catec chaquechgüede' chio'. Na' lecze chņaba' zej gacchle bene' güen doxen can' nac Diosen'.

<sup>20</sup>Na' Diosen' chac chone' yogo'loł, na' chone' da' gualch ca da' chņabechone' o da' choncho xbab gone'. Na' chone' cont

Spiritw chen' zoan lo' yichjlažda'ochon' chaclenen chio' len yela' guac chen'. <sup>21</sup>Na' chio' chdop chžagcho chonx-encho Criston', cheyala' gonx-encho Diosen' na'a na' toli tocane da' gwsele' Cristo Jesús'en neche chio'. Na' can' gonščaczcho.

#### **Naccho toze len yogo' bene' chesejnilaže' Criston'**

**4** Neda' dia' ližya nga da' chyxjue'eda' xtiža' Xancho Jesucriston'. Nachen' chņeyoeda' šejšcale gonle güen can' cheyala' goncho da' gwlej Diosen' chio' naccho xi'ine'. <sup>2</sup>Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yela' chxenlaže' len bene' lježle na' le gacle' bite'teze yesone'. <sup>3</sup>Spiritw che Diosen' ba nonen chio' toze da' chejni-laže'cho Criston', na' le gon con ga zelao saque'le cont soaczle gonle toze xbab len bene' lježle, le Diosen' ba bozoe' le'e binlo tole yetole. <sup>4</sup>Yogo' chio' chejni-laže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'. <sup>5</sup>Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis. <sup>6</sup>Na' toz Diosen' chonx-encho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

<sup>7</sup>Na' Criston' chaclene' to tocho na' none' checho gwde gwdele da' gon to tocho. <sup>8</sup>Da'n'an' nyoj Xtiža' Diosen' žan:

Cate' beyepe' yaban' bebeje' bene' zan lo' na' gwxiyen' cont bechi'e legaque'.

Na' bi'e che benachen' da' gac gon to toe'. <sup>9</sup>Na' can' žan: "Beyepe' yaban'", zejen betje' golje' benach yežlio nga na' gwden' gote' bgaše'. <sup>10</sup>Na' ben' betj golje' benach, lecze len' beyepe' yaban' gan' zoa Diosen', na' na'a zoe' chnabi'e doxen.

<sup>11</sup> Na' lecze len' none' che bałcho naccho postlw, na' none' che bałcho chyxjue'echo bi da' ba gwne', na' none' che yebałcho chje'cho diža' güen chen' len bene' bina' yesenden', na' yebałcho none' checho chgiüia chna'cho bene' chesonxene' le' na' chsed chlo'echo legaque'.  
<sup>12</sup> Can' chon Criston' cont chio' naccho lo ne'en chac choncho xšinen'. Na' chonchon cont to to chio' naccho toze len le' zejech gacchcho can' chazlažen'.  
<sup>13</sup> Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyane'cho can' cheyała' gaccho, na' gaccho bene' güen can' nac Criston'.  
<sup>14</sup> Na' še gaccho ca', bich šo'cho xbab ca che to bidao', šejcho qui šejcho ca'ale na'ocho to to yela' chejnilaže' da' chesaljaže' bene' güenlaže' na' bene' gwxiye' cont chesonlede' chio'.  
<sup>15</sup> Na' cheyała' güelencho bene' diža' li, perw gaccho bene' šagüe' len legaque' cont yesacbe'ede' le chaquechone'. Goncho ca' cont zejech gacchcho bene' šagüe' bene' güen can' nac Criston' ben' chnabi'e chio'.  
<sup>16</sup> Cate' to to cuen cuerp chechon' ngoden' na' noxe' lježen len bela' na' len žit na' len bechj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyała'. Na' ca'cze chio' chejnilaže'cho Criston' ngode'cho txen cont to tocho goncho da' non Diosen' checho goncho, na' yogo'cho txen zej gacchcho bene' šagüe' na' zej gaquech lježcho.

**Diosen' ba bocobe' yichjlaždao'  
chio' chejnilaže'chone'**

<sup>17</sup> Da' nga chnia' le'e, Xancho Criston' none' mandadw gwzejni'idan' le'e: bi cheyała' soacho goncho xbab ca cheson bene' bi chesejnilaže' Diosen', le bibi zacan'.  
<sup>18</sup> Nchoł yichjlažda'ogaque'. Na' bi zjanape' yela' mban toli tocane ca da' non Diosen' chio', neca chesejni'ide'

che Diosen', le zjanaque' bene' güedenag len le'.  
<sup>19</sup> Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'.  
<sup>20</sup> Le'e ba nse-dle can' ža Criston' na' nezele bi cheyała' goncho ca',  
<sup>21</sup> le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li chen'.  
<sup>22</sup> Nezele bich cheyała' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'.  
<sup>23</sup> San na'a cheyała' gwša'cho xbab da' choncho lo' yichjlažda'ochon'.  
<sup>24</sup> Cheyała' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

<sup>25</sup> Da'n'an' bich gonlaže'cho, san güelen lježcho diža' li, le ngode' lježcho naccho ca toze bene'.

<sup>26</sup> Na' cate' chža'cho bi cheyała' goncho da' xinj. Cheyała' yob yeyacxenlaže'cho na' bich ža'cho do ža.  
<sup>27</sup> Na' bi güe'cho latje cont Satanás dan' chnabia' da' xigüe' ca' nbian' xbab chechon' cont goncho da' xinj.

<sup>28</sup> Na' nole še ba yolaole chbanle, bich cheyała' cuanle. Cheyała' gonle žin da' nac güen len ni'a na'le cont gata' da' gwnežjwle bene' chyažj chchine.

<sup>29</sup> Na' bi cheyała' güe'cho bite'teze diža' zban, san güe'cho diža' šagüe' len yogo'lol bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'.  
<sup>30</sup> Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

<sup>31</sup> Cheyała' cuejyichjcho yogo' da' mal, bich gonchon. Bich colaže'cho, bich ža'cho, na' bich güe'cho diža' loc diža'

lžej. Bi necho che bene', neca gaccho bene' xi'a. <sup>32</sup>San cheyała' gaccho bene' šagüe' na' yeyaše' lježcho tocho yetocho. Na' cheyała' yezi'xen che lježcho bite'tez da' chesonde' chio' con can' bezi'xen Diosen' checho cate' gwyejni-laže'cho Criston'.

### Cheyała' goncho can' chon Diosen'

**5** Nachen' cheyała' soacho goncho can' chon Diosen', le naccho xi'ine' na' chacde' chio'. <sup>2</sup>Cheyała' soacho gaque lježcho ca Criston' chacde' chio' na' bnežjw cuine' gote' neche chio'. Na' chebe Diosen' da' bene' ca', can' chebe bene' to da' chla' zix.

<sup>3</sup>Da' naccho lo na' Diosen' cheyała' gue'echo da' malen'. Gwbatech cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyała' selaže'cho da' de che bene'. <sup>4</sup>Bi cheyała' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyała' soacho güe'cho yela' choxcen che Diosen'. <sup>5</sup>Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezeczele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca' nac bene' chesezelaže' bi de che bene', toz ca' malen' chesone' len da' cheson bene' chesejni-laže' l' gua'a lsacan'.) <sup>6</sup>Bi güe'le latje no' siye' le'e len diža' güenlaže'. Diosen' chnezjue' castigw toli' tocanē che bene' ca' bi chosozenag che', bene' cheson da' mal ca' ba gw-nia'. <sup>7</sup>Da'nan' bi cheyała' gaccho txen len bene' cheson ca'.

<sup>8</sup>Cana' nchoł yichjlažda'ochon', perw na'a ba yo'on be'ni' che Xancho Criston', na' cheyała' soacho goncho da' güen can' chaclaže' Diosen' gon chio' nom-bia'chone'. <sup>9</sup>Na' še ba gwo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to licha. <sup>10</sup>Cheyała' gwsedcho cont nezecho can' chaclaže' Xancho Criston' goncho. <sup>11</sup>Bi cheyała' goncho txen len da' malen' cheson bene' ca' zjanchoł yichjlažda'ogaque', le chesone' da' bibi zaca'. San cheyała' gwzejni'icho le-gaque' da' malen' chesone', <sup>12</sup>le naquen da' cheto'echo güe'cho diža' che da' ca' chesone' do bagaše'ze. <sup>13</sup>Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le be'ni' chen' chzejni'in benachen' che xbab chegaque' na' bi da' chesone' še naquen güen o še naquen mal. <sup>14</sup>Da'nan' nyojen quinga che note'teze bene' chon da' malen': Naco' ca' bene' chtas na' ca' bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

<sup>15</sup>Nachen' cheyała' soacho na'cho dan' choncho. Cheyała' goncho da' naquen da' sina', gague goncho ca' bene' bi chejni'i. <sup>16</sup>Na' yogo' ža cheyała' goncho can' chazlaže' Diosen', le na'a že'chgua bene' chesone' da' malen'. <sup>17</sup>Bi goncho ca' bene' bibi xbab nye'. Cheyała' šejni'icho can' chaclaže' Diosen' goncho cont gonchon. <sup>18</sup>Na' bi cheyała' gaccho bene' borrašw, le bene' chesezožde' chosoži-ayi' cuine'. San chio' cheyała' güe'cho latje soachgua Spiritw che Diosen' lo' lažda'ochon' naban' chio' len da' choncho. <sup>19</sup>Cheyała' gwšaljlen lježcho no' salmos na' gollen lježcho no' himnos o bichle da' ža Spiritw che Diosen' gołcho. Na' cheyała' nechon na' gołchon do yichj do laže'cho gonxencho Xancho Jesucriston'. <sup>20</sup>Yogo' ni'a cheyała' güe'cho

yela' choxclen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxclen che'.

**Can' cheyala' soalen  
bene' lo' yo'o chechon'**

<sup>21</sup> Da' chapcho Diosen' bala'an cheyala' gwzexjw yichjcho gwzenagcho tocho yetocho.

<sup>22</sup> Na' le'e no'ole, le'e nšagna'le, to tole cheyala' gwzenagle che bene' chele, le chzenagle che Xancho Criston' cate' chzenagle chegaque'. <sup>23</sup> Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli' tocane. <sup>24</sup> Na' ca chio' chonxenchoncho Criston' cheyala' gwzenagcho che', ca'czen' le'e no'ole le'e nšagna'le, to tole cheyala' gwzenagle che bene' chele yogo' bin' chese'e le'e.

<sup>25</sup> Na' le'e bene' byo le'e nšagna'le, to tole cheyala' gague no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'. <sup>26</sup> Na' cont gwlo'e chio' lo' na' Diosen', beyone' lažda'ochon' xilaže' cate' gweyjl'cho xtižen'. <sup>27</sup> Na' bene' ca' cont yebede' chio' cate' yežincho lagüen', bibi xtoła'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'. <sup>28</sup> Na' con can' nži'ilaže' Criston' chio', can' cheyala' ži'ilaže' to to bene' byo no'ol chen'. Le'e bene' byo, to tole cheyala' ži'ile no'ol chelen' can' nži'ile cuerp chelen', le nži'icze cuinle cate' chonle ca'. <sup>29</sup> Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'. <sup>30</sup> Na' chone' ca' da' naccho ca to cuen güeje cuerp chen', ca žit

da' yo'e na' ca xpele'. <sup>31</sup> Na' Xtiža' Diosen' nyojen žan: "Da'nan' bene' byo le'e len xaxne'e na' si'e no'olen' gwšagna'lene' le' na' yesaque' toze." <sup>32</sup> Diža' quinga ba bzoja' naquen to da' nono gweyjni'i cani', perw chnia' naquen to da' chzejni'in chio' chdop chžagcho chonxenchoncho Criston' cont nezecho can' cheyala' soacho len le'. <sup>33</sup> Na' lecze ca' le'e bene' byo le'e nšagna'le, to tole cheyala' gague no'ol chele can' chaque cuinle, na' le'e no'ole nšagna'le, to tole cheyala' gaple bala'an bene' chele.

**6** Na' le'e bidao', le gwzenag che xaxna'le, le can' cheyala' gon chio' naccho t xen len Xancho Criston'. <sup>2</sup> Cate' Diosen' bnežjue' xoxxta'oto' ca' ley chen', gwne': "Le gap bala'an xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaque' še yosozenague' chen, gwne': "Le gap bala'an xaxna'le <sup>3</sup> cont gac güen chele na' cont banle sša lo' yezlio nga."

<sup>4</sup> Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

<sup>5</sup> Na' le'e mos, le gwzenag che xan žin chelen' do laže'le na' le yeyiljwlaže' naquen gonle da' yesazlaže' to toe', le lecze chzenagle che Criston' caten' chzenagle chegaque'.

<sup>6</sup> Le gwzenag chegaque' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho. <sup>7</sup> Na' cheyala' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze. <sup>8</sup> Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi' naccho esclavos.



<sup>9</sup>Na' le'e nacle bene' xan zin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen zin chelen', na' toz can' chone' len yogo'lol bene' note'teze zjanaque'.

### Can' goncho cont Satanásen' bi gonen chio' gan

<sup>10</sup>Nachen' bene' migw, da' naccho txen len Xancho Criston', cheyała' soachachcho šejnilaže'chone', le nape' yela' guac xen cont chaclene' chio'. <sup>11</sup>Cheyała' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chyljwlažen' siyen' chio'. <sup>12</sup>Le gague bene' nac bela' chenna' chdiilencho, san chdiilencho da' xigüe' ca', da' ca' besyeyaquen da' mal, na' bichle da' chesenabia' bene' že' yežlio nga bene' nchoł yichjlažda'ogaque' len da' malen'. Chdiilencho yogo'lol spiritw mal ca' gate'teze chesašen. <sup>13</sup>Da'n'an' cheyała' gon cuincho gual doxen can' chaclaže' Diosen', cont Satanásen' bi soeczen chio' ža cate' tillenen chio'. Na' cate' ba bencho can' chazlaže' Diosen', nach cheyała' soachachcho len le'. <sup>14</sup>Na' cont soachachcho bi siye' Satanásen' chio', cheyała' güe'cho diža' li yogo' ni'a. Na' še goncho ca', gaclenen chio' ca da' chčej soldadon' cho'a li'e. Na' cheyała' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya chcue'ejen cho'alcho'e. <sup>15</sup>Na' cheyała' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'. <sup>16</sup>Na' da' zejechen ca bichle da' goncho, cheyała' soachachcho šejnilaže'cho Diosen'. Na' še soachachcho šejnilaže'chone', nach

gaclenen chio' cont bi gwzenagcho che Satanásen'. Gaclenen chio' ca escudo da' chčhin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' chcue'ejen le' len da' ca' zja'ac yeseyidjon cuerp chen'. <sup>17</sup>Na' cheyała' yosa'laže'cho Criston' ba bene' yela' mban checho toli tocaņe, cont gaclenen chio' ca chaclen lapa' de ya da' chčhin soldadon'. Na' lecze Xtiža' Diosen' da' ben Spiritw che Diosen' cont nyojen, le gonchgua xbab chen cont gaquen len le'e ca to spada da' chčhin soldadon'. <sup>18</sup>Na' do tiemp cheyała' yol güižcho Diosen' nabcho yogo' da' chzejni'i Spiritw chen' chio'. Na' cheyała' gaccho bene' banlaže' na' yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e. <sup>19</sup>Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze cani'. <sup>20</sup>Le Diosen' gwsele' neda' ca gualaze' cont bia' xtižen', na' da'n'an' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

### Pablon' chone' chach laže'gague'

<sup>21</sup>Chsela' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyała' gone'. <sup>22</sup>Nachen' chsela'ne' cont nezele can' chac cheto' na' cont gone' chach laže'le.

<sup>23</sup>Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gague lježle na' soachachle šejnilaže'lene'. <sup>24</sup>Soašcacze Diosen' gaclene' yogo' bene' chesacde' Xancho Je-

sucriston' sin cbi yesebeze'. Da' na'zen'  
chzoja'.

**CART DAN' BZOJ POSTLW  
SAN PABLO CHE  
BENE' CA' ŽE' FILIPOS**

**Pablo bozje' carten' šlac die' ližya**

**1** Neda' Pablo chsel'a' cart nga txen len bene' lježa' Timoteo. Chopte neto' gwlej Diosen' cont chonto' xšinenen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejni-laže'le Cristo Jesús'en'. Na' le'e nchojle chgüia chna'le bene' lježle chesejni-laže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' nia' le'e len cart nga. <sup>2</sup> Chnabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'o lo' yichjlažda'olen'.

**Pablo chnabde' Diosen' gaclene' bene' ca' chesejni-laže' Criston' Filipos**

<sup>3</sup> Yogo' ni'a cate' chjayze'eda' le'e, choa' yela' choxclen che Diosen' ba naccho txen chejni-laže'chone'. <sup>4</sup> Na' yogo' ni'a cate' chol giüiža' Diosen', chbeda' chnaba' gaclene' le'e. <sup>5</sup> Na' choa' yela' choxclen chen' naccho txen chejle'cho diža' güen che Jesucriston', gwzolaoten cate' za' gwyejnilaže'lne'. <sup>6</sup> Na' da' nga nezda', Diosen' gwzologüe' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. <sup>7</sup> Da' cheyala'cze gona' xbab chele ca', le chacchgüeda' le'e. Na' nezda' Diosen' ba goclene' le'e can' ba goclene' neda' šlac dia' ližya nga, na' šlac ba gwduxjue'eda' diža' güen che Criston' len bene' bi gosejle'e chen, bzejni'ida' legaque' naquen diža' li. <sup>8</sup> Diosen' nezde' chacchgüeda' yogo'le, le Cristo Jesús'en' chone' cont chacda' le'e. <sup>9</sup> Na'

chnabda' Diosen' gonšque' cont gaguechlne' na' gagueche lježle na' lecze šejni'ichle yogo'lo' da' chaclaže' Diosen' šejni'ile na' gacbe'ele bi da' naquech güen gonle cont gaclen lježle. <sup>10</sup> Chnaba' da' ca' cont gacbe'ele bin' chazlaže' Diosen' gonle, na' lecze cont soacze do laže'le na' bibi do'la' gape cate' žin ža yid Criston' da' yoble. <sup>11</sup> Nach gaclen Jesucriston' le'e gonchuale da' nac güen, na' Diosen' si'e yela' bala'an na' yezica'chle bene' yesonxene' Diosen' can' chonlen'.

**Pablon' chacde' Criston'  
do yichj do laže'**

<sup>12</sup> Bene' migw, che'nda' nezele yogo' dan' ba goc chia' ba gosacclenen cont bene' zanch gosende' diža' güen che Criston'. <sup>13</sup> Le yogo'lo' soldadw gop ca' cheson žin che bene' gwnabia' nga, na' yezica'chle bene' že' do nga zjanezde' dia' ližya neche choa' xtiža' Criston'. <sup>14</sup> Na' bene' zan bene' lježcho že' nga lecze ba chesejni-laže'chgüe' Xancho Criston' da' ba besele'ede' can' chaclene' neda' šlac dia' ližya nga. Da'nana' legaque' lecze ba cheseyaxjchde' cheso'e xtiža' Diosen' sin ca chesežebe'.

<sup>15</sup> Da' li ba'e' cheseyixjue'ede' xtiža' Criston' da' chesacxi'ede' neda' na' da' chesacclaže' yesacche' blaoch ca neda', perw yezica'chle bene' ca' cheseyixjue'eden' do laže'. <sup>16</sup> Na' bene' ca' to cuen cheseyixjue'ede' xtiža' Criston' cont yesacxen cuine', gague cheseyixjue'eden' do laže'gague'. Chesone' xbab zoayaša' da' cheseyixjue'eden'. <sup>17</sup> Na' bene' ca' yezica'chle cheseyixjue'eden' lagüe chesacde' Criston' na' chesacde' neda', le zjanezde' neda' dia' ližya nga neche chzejni'ida' bene' bi chesejle'e diža' güen che Criston', chape'gaca'ne' naquen da' li. <sup>18</sup> Perw bibi nonen len neda' še cheseyixjue'eden' do laže' o še gague do

laže', con chebeda' cheso'e diža' che Criston' da' nac diža' li.

Na' dehcze da' chebeda', <sup>19</sup>le nezdā' yechoja' güen len da' quinga chac chia' lagüe dan' chñable gaclen Diosen' neda' na' lagüe dan' zoa Spiritw che Jesucriston' len neda' chonen chach laža'.

<sup>20</sup>Da'nān' zoa' lez gaclen Diosen' neda' gua' xtiža' Criston' sin cbi žeba'. Na' la'czla' še soacha' o la'czla' še gata', chaclaža' si' Criston' yela' bala'an na'a len da' gona' na' len da' gac chia' con can' ba gwxi'e yela' bala'an.

<sup>21</sup>Chzelaža' gacxen Criston' len bite'tez da' chona' šlac ne' mbana', na' lecze nezdā' soa' mbalazchgua cate' ba gota', le šjayzoalena'ne'. <sup>22</sup>Perw še soacha' yežlio nga na' goncha' xšin Xancho Criston' cont šanch bene' yesejnilaže'ne', o še gata', bi nezdā' non' nac güenč.

<sup>23</sup>Naquen zdebe nia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'. <sup>24</sup>Perw lecze chona' xbab le'e chyažjele soacha' banča'. <sup>25</sup>Na' da' chacbe'eda' chyažjele soacha', nezdā' soacha' len le'e cont gaclena' soachle mbalaz da' chejni-laže'le Criston' na' soachle šejni-laže'ne'.

<sup>26</sup>Na' cate' yechoja' nga soacha' len le'e da' yoble, yebele güe'le diža' can' ben Cristo Jesúsen' cont bechoja' ližyan'. <sup>27</sup>Na' bite'teze gac, le soa le gon da' güen can' cheyała' gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoachle len toze xbab, chonle txen len bene' lježle, na' chonle con ca zelao chzaque'le cont yezica'chle bene' yosozenague' xtiža' Criston' da' ba chejni-laže'le, <sup>28</sup>neca žeble še bi yesone bene' le'e neche chesegue'ede' le'e. Še bi žeble da' yesonde' le'e, gonen cont yesacbe'ede' ba zoa yesebiaye'e toli tocane; lecze gonen cont yesacbe'ede' Diosen' gone' cont šjayzoale len le'. Yogo'

da' ca' zjanaquen da' gon Diosen'. <sup>29</sup>Na' Diosen' ba bsi'e xnezen' gacxen Criston', gague lagüe da' chejni-laže'lene' na'zen', san lecze gacxene' da' yosoči yososaca' bene' le'e neche chejni-laže'lene'. <sup>30</sup>Le'e len neda', toz can' chosoči chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

### **Criston' chaxene' da' bzande' yela' zaca' che' cont bide' golje' benach**

**2**Nezdā' zoale mbalaz da' chejni-laže'le Criston', nezdā' chaclaže'le gonle da' güen lagüe dan' chaque Criston' le'e, nezdā' zoa Spiritw chen' len le'e, na' nezdā' chaque lježle na' cheyaše'laže'lene' cate' bi da' chesac che'. <sup>2</sup>Da'nān' chneyoeda' le'e, le gon cont yebechgüeda' nezdā' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. <sup>3</sup>Bibi cheyała' goncho cont gac güen che cuinzcho na' bibi goncho cont gacxen cuincho, san cheyała' gwzexjwlaže'cho na' goncho xbab zaca'ch bene' lježcho clal ca chio'.

<sup>4</sup>Ne tocho bi cheyała' cue' yichjcho che cuinzcho, san cheyała' cue' yichjcho che dan' gaclenen bene' lježcho ca'. <sup>5</sup>Cheyała' goncho xbab ca xbab da' ben Cristo Jesúsen'. <sup>6</sup>Le la'czla' naque' Dios, bzande' yela' chnabia' che' na' yela' bala'an xen che' dan' nape' lagüe da' naque' toz len Xe' Diosen' cont bide' golje' benach. <sup>7</sup>Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benach. <sup>8</sup>Na' ba naque' benachen' bzexjwlaže' cont bene' con can' gwna Xe' Diosen'. Bzenague' che' cont bnežjw cuine' gosote'ne' le'e yag cruz ca chesote' bene' malchgua. <sup>9</sup>Da'nān' Diosen' benxenchgüe' le' na' bsi'e xnezen' cont Jesucriston' naque' Xan benach, angl, da' xigüe' na' yogo' bichle da' de, na' cont Jesucriston' chn-

abia'che' ca note'tezechle. <sup>10</sup>Na' žin ža cate' yogo'loł benač na' yogo'loł angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'. <sup>11</sup>Yogo'loł bene' yo'o biš grasyw yosozexjwyichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gaxcene' cate' yogüe' yesene' ca'.

### **Bene' chesejnilaže' Criston' zjazacalebde' ca be'ni'**

<sup>12</sup>Da'nan' bene' migw, con can' ba gwzoale bzenagle chia' cate' gwzoo' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nacbia' Diosen' ba bene' le'e yela' mban toli tocane, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soečo da' malen' še ba chzenagcho čen. <sup>13</sup>Na' Diosen' chone' cont che'nele gonle can' chazlažen', na' chaclene' le'e chonlen.

<sup>14</sup>Le gon yogo' dan' chazlaže' sin cbi gacyožlen'ne', neca žeše'le che'. <sup>15</sup>Le gon ca' cont yesacbe'e bene' chonle can' chazlaže' Diosen' sin cbi doła' gaple. Bibi da' xinj gonle. Bi gonle ca cheson bene' laždao' mal ben' chesonchgua clele. Nach gacle ca to da' chseni' len yezica'chle bene že' yežlio nga, <sup>16</sup>güe'lenle legaque' xtiža' Criston' da' nsa' yela' mban toli tocane. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zoalen', gague bendadzan'na'. <sup>17</sup>Le'e chzane cuinle chonle xšin Diosen' lagüe dan' chejnilaže'lene', na' da'nan' zaca'leble ca to beyixe' be ba gosot bene' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'nan' zaca'leba' ca to vino da' chosolalje bene' lao Diosen' cate' chesonxene'ne'. <sup>18</sup>Le yebe len neda' da'

chzane cuina' gac da' gac chia', na' le soa mbalaz can' zoa' neda'.

### **Timoteo na' Epafrodito**

<sup>19</sup>Zoa' lez gon Xancho Jesúsén' latje yob sela' Timoteo gan' zoalen', le yebechgüeda' yenda' can' ba chonlen'. <sup>20</sup>Le nono nochle zoa bene' sela' bene' chi'chgua yichje' gac güen chele can' chi' yichj Timoteon'. <sup>21</sup>Yezica'chle bene' con zjachi' yichjgaque' che dan' chac čhegaque', na' bi zjachi' yichje' can' chaclaže' Jesucriston' gac. <sup>22</sup>Perw nezezele ca zoacze Timoteon' chone' da' zaca', na' nezele can' ba goclene' neda' cont gwdixjue'eda' xtiža' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'. <sup>23</sup>Da'nan' zoa' lez guac sela'ne' gan' zoalen' cate' la' nezteda' nac gac chia' nga, <sup>24</sup>na' sela'ne' la'czla' chejli'a gon Xancho Criston' cont lecze neda' yob yedena'a le'e.

<sup>25</sup>Na' lecze chacda' chonen byen yesela' bene' lježcho Epafrodito gan' zoalen', ben' gwseła'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen. <sup>26</sup>Che'nchgüede' yele'ede' le'e, na' leca da' chacde' gwnezele gocšende'. <sup>27</sup>Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'. <sup>28</sup>Da'nan' zelaže'cha' yesela'ne' gan' zoalen' cont soale mbalaz yežagle da' yoble na' cont bich soayaše'le che'. <sup>29</sup>Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle bene' chon can' ba benen'. <sup>30</sup>Le yelate'ze ca gote' da' bzane cuine' goclene' neda' nga

len xšin Criston', can' goncze le'e šaca' zoale nga len neda'.

### Soa cuezcho goncho can' chazlaže' Diosen'

**3** Na' na'a bene' migw, cheyała' soacho mbalaz da' chejniłaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab chen. <sup>2</sup>Le gwsaca' cont bi gwzenagle che bene' ca' chesene' cheyała' soale señw dan' že' circuncisión da' yesechogue' lo cuerp chelen', le zjanaque' bene' zban na' chesyelalde' chesone' da' mal. <sup>3</sup>Le de to señw checho cont nezecho naccho xi'in Dios. Señwna' naquen da' ba ben Diosen' chio' Spiritw chen' cont chaclenen chio' chonxenchone'. Chebechgüecho chejniłaže'cho Cristo Jesúsén', na' bi zoacho lez gata' bichle da' gaclenen chio' lao Diosen', ca no señw da' zoa lo cuerp chechon' o bichle da' goncho. <sup>4</sup>De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neche da' ba bena' o nac naca'. Nono zoa no nacho ba benche' da' zan da' yebe Diosen' ca neda'. <sup>5</sup>Le naca' bene' Israel na' golja' lo diaža che da' Benjamín, na' bosozoe' neda' señw che circuncisión to xmanzda'. Na' goljlena' diža' hebreo da' nac xaxna'a bene' chesaque' diža' hebreo. Na' bsedyana' ley dan' bzoj da' Moisésén' con can' chosozejni'i bene' fariseo ca' len. <sup>6</sup>Na' leca gwche' yichja' diža' gole che bene' Israel gualaž chia'. Da'nan' bchi bsaca' bene' ca' chesejniłaže' Criston'. Na' con ga zelao gwzoeda' bzenaga' che yogo' dan' ža ley cheton' cheyała' gonto' o bi cheyała' gonto'. <sup>7</sup>Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chacbe'eda' bi yesaclenen. Ba bchojyichja' da' ca' cate' gwejniłaža' Criston', le gocbe'eda' bi yesaclenen neda' lao Diosen'. <sup>8</sup>Na' na'a da' nombi'a Xana' Cristo Jesúsén' naquen da' zaca'chgua

len neda'. Bibi zaca' yogo' da' ca' godca' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'. <sup>9</sup>Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da' chejniłaža' Criston', gague lagüe da' chona' bi da' ža ley dan' bzoj Moisésén' cheyała' goncho. Le con bene' chesejniłaže' Criston' none' legaque' ca bene' güen. <sup>10</sup>Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzanlaže' cuina' saca'zi'a can' gwdi gwxaca' le'. Na' ca Criston' gote' neche xtolan', chaclaža' gaca' ca to bene' guat len da' malen', bich gonan'. <sup>11</sup>Zoa' chbeza' ca', le cheyiljwlaža' nacle gona' cont yechis yosban Diosen' neda' ladjo bene' guat ca' cate' ba gota'.

### Pablo chaclaže' gac yichjlažda'ogüe' can' nac yichjlaždao' Criston'

<sup>12</sup>Bi nia' bačh nac yichjlažda'ogua' can' cheyała' gaquen, le bina' gaquen can' nac yichjlaždao' Cristo Jesúsén'. Perw chona' con ga zelao saqueda' cont gaquech yichjlažda'ogua' can' nac che le', le ba gwleje' neda' naca' xi'ine'. <sup>13</sup>Bene' migw, nezda' bina' gac yichjlažda'ogua' can' cheyała' gaquen, perw ba bchojyichja' yogo' da' ca' gosac da' zaca' len neda' cana' na' yogo' bin' ba bena', na' chi' yichja' da' mbalaz da' chbeza' gac. <sup>14</sup>Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsén' lagüe da' chejniłaža'ne'.

<sup>15</sup>Na' yogo'cho še ba zej chaccho can' chaclaže' Diosen' gaccho, cheyała' goncho xbabén' ca', na' še yo'ocho bichle xbab yoble, Diosen' gwzejni'iden' chio'.

<sup>16</sup>Perw na' cheyała' soaczcho goncho can' ba bzejni'i Diosen' chio'.

<sup>17</sup>Bene' migw, le gon can' chona' neda', na' le na' can' cheson yezica'chle bene' cheson can' ba bzejni'ida' le'e, cont gonle can' chesonen'. <sup>18</sup>Da' yoble žia' can' ba gwnia' zan las, can' zjanita' bene' zan, nacb'ia' chesegue'ede' Criston' ben' bnežjw cuine' gote' le'e yag cruzen' neche xtola'chon'. Na' chbeža' da' chesone' ca'.

<sup>19</sup>Žin ža yesebiayi' bene' ca' toli tocanē, le chesyebchde' chese'ej chesagüe' cled ca' yesonxene' Diosen'. Chesacłaže' cheso'e diža' che bi da' yela' zto' da' chesone', na' zjachi' yichje' tloaze da' chac yežlio nga. <sup>20</sup>Perw chio', bich choncho xbab nac lažcho yežlion', le nezechon naquen gan' zoa Xancho Jesucriston' ben' non chio' yela' mban toli tocanē, na' chbezcho batcan' yide' da' yoble.

<sup>21</sup>Na' caten' yide' da' yoble, gone' cont cuerp checho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp che le'. Gone' ca', le nape' yela' guac neche gone' cont yogo'loł da' zjade yosozenaguen che'.

#### **Cheyała' soacho mbalaz da' chejnilaže'cho Criston'**

**4** Na' na'a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neche le'e. Le'e bene' chacda', le soachach šejnilaže'le Xancho Jesucriston'.

<sup>2</sup>Na' chneyoeda' le' Evodia, na' lececa le' Síntique, le soašca binlo na' le gac txen tole yetole da' chejnilaže'le Xancho'. <sup>3</sup>Na' ca' nac le' bene' lježa', len' beno' xšin Diosen' do yichj do lažo' txen len neda' cana', na' chneyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle bene' lježcho ca', na' zjanyoj la yogo' bene' ca' le'e libr che Diosen' gan'

zjanyoj la bene' ba zjanape' yela' mban toli tocanē.

<sup>4</sup>Le yebe yogo'te ža da' chejnilaže'le Xancho Jesucriston'. Da' yoble žia', le yebe. <sup>5</sup>Le gon cont yogo'loł bene' yesenezde' nacle bene' šagüe', le ba zoa yid Xancho' da' yoble.

<sup>6</sup>Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxclen cate' bi da' nabelene'. <sup>7</sup>Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesús'en', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe'echo bixchen' zoachguacho binlo.

#### **Cheyała' cue' yichjcho che da' zjanac güen**

<sup>8</sup>Na' da' la'zelagüe dan' chaclaža' neyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

<sup>9</sup>Da' ca' bzejni'ida' le'e, yogo' dan' benele gwnia' cate' bsd blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda'ochon' soacze' gaclene' le'e.

#### **Can' gosaclen bene' Filipos ca' Pablon'**

<sup>10</sup>Chbechgüeda' lao Xancho Cristo Jesús'en' da' ba chi' yichjle chaclenle neda' da' yoble. Nezda' gwzoale chonle xbab chia', perw bi benen gaclenle neda'.

<sup>11</sup>Na' žia' da' qui gague neche byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. <sup>12</sup>Ba yolagua'

yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de. <sup>13</sup> Chac chona' bite'teze da' cheyala' gona', le zoa Criston' len neda' chac-lene'nda'. <sup>14</sup> Perw benle güen gwseła'le da' goclennen neda' cont naccho txen len dan' chyi chzaca' nga.

<sup>15</sup> Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, benle txen len neda' cate' beza' distritw Macedonian', gwseła'le da' byažjda', na' nono nochle bene' ca' chesedop chesežag chesonxene' Criston' yež yoble goson ca'. <sup>16</sup> Le cate' ne' zoa' Tesalónica gwseła'le da' byažjda' zan ni'a. <sup>17</sup> Perw gague chzelaža' bi da' gonle neda', san chzelaža' soaczle gonle güen cont yebe Diosen' le'e. <sup>18</sup> Ba benle doxen da' cheyala' gonle na' da' zcha'och ca'te' da' cheyala' gonle. Ba decze da' zcha'o chia' na'a. Bibi chyažjda', le ba

ben Epafrodito da' gwseła'le chia'. Na' da' gwseła'le zaca'leben ca to yal da' chla' zix da' chzey bxozen' lao Diosen', le Diosen' chebede' can' benlen'. <sup>19</sup> Na' Dios chia' nan' goncze' yogo'te bi da' chyažjele lagüe chejnilaže'le Cristo Jesúsén', le yogo' da' de yo'on lo ne'e. <sup>20</sup> Cheyala' gonxencho Xancho Diosen' toli tocañe. Can' gonšcaczcho.

#### **Pablon' zelagüe' bzede' legaque' diža'**

<sup>21</sup> Le gwguap tiox yogo'loł bene' Filipos ca' yo'o lo na' Diosen' da' chesejnilaže' Jesucriston'. Bene' lježcho ca' nita' nga len neda' chguapto' le'e tiox. <sup>22</sup> Na' lecze yogo' bene' Roma quinga ba yo'o lo na' Diosen' chosoguape' le'e tiox, lente bene' ca' cheson žin che rey ben' nac la'zelagüe' bene' gwnabia' ben' chi' Roma.

<sup>23</sup> Xancho Jesucriston' soašque' gaclenšque' le'e len xbab da' yo'o lo' yichjlažda'olen'. Da' na'zen' chzoja'.



**CART DAN' BZOJ POSTLW  
SAN PABLO CHE BENE'  
CA' ŽE' COLOSAS**

**Pablon' chzoje' bene' chesonxen  
Jesucriston' ciuda Colosas**

**1** Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len bene' lježcho Timoteon' chguapto' le'e tiox. <sup>2</sup>Chzoja' le'e zoale Colosas, le'e chejnilaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

**Pablo chnabde' Diosen' gaclene'  
bene' ca' že' Colosasen'**

<sup>3</sup>Yogo' ni'a cate' chol' güižto' Dios ben' nac Xa Xancho Jesucriston' choe'to' yela' choxcen che' can' chonlen'. <sup>4</sup>Le ba beneto' diža' can' chejnilaže'le Cristo Jesúsén' na' can' chaquele yogo' bene' ca' yezica'chle zjanaque' lo na' Diosen'. <sup>5</sup>Na' nezeto' chejnilaže'lene' na' chaquele legaue' lagüe da' zoale lez šjayzoale len Diosen'. Caten' gwzolaobzenagle che xtiža' Diosen' da' naquen da' güen na' da' li, gwejni'ile gac chele ca'. <sup>6</sup>Na' xtiža' Diosen' da' ba bzenagle ba goslasen doxen, na' bene' zan ba chosozenague' chen. Na' legaue' lecze chesone' güen ca gwzolaob le'e chonle caten' gwejni'ile diža' li da' chzejni'in nži'ilaže' Diosen' le'e, na' ne' chonle güen ža na'aža. <sup>7</sup>Chaqueto' Epafras ben' bzejni'ide' le'e xtiža' Criston'. Chone' xšin Diosen' can' choneto', na' zoateze' chone' can' ža Criston' da' chaclaže' gaclene' le'e. <sup>8</sup>Len' ba gože' neto' ba ben Spiritw che Diosen' cont chaquele Diosen' na' chaquete lježle.

<sup>9</sup>Da'nán' caten' gwnezeto' ca güenna' chonle, gwzolaoto' yogo' ni'a cate' chol' güižto' Diosen' chnabeto'ne' gaclene' le'e. Chnabto' gon Spiritw chen' le'e

yogo' cuen yela' sina' na' yela' chejni'i cont nezele nacyanen' chaclaže' gonle. <sup>10</sup>Chnabto' soale gonle can' cheyala' gon chio' nombia'cho Xanchon', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'lné'. <sup>11</sup>Chnabto' gaclen Diosen' le'e len yela' guac xen che' cont soatezle šejnilaže'lene' na' gapple yela' chxenlaže' bite'tezen' chac. <sup>12</sup>Na' chnabto' soale mbalaz güe'le yela' choxcen che Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juisyw. <sup>13</sup>Bebeje' chio' lo na' gwxiyen' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na'a gwzenagcho che le'. <sup>14</sup>Na' Xi'in Diosen' bnežjw cuine' gote' cont beque'e xtoła'chon' na' chezi'xen Diosen' checho.

**Criston' bozoe' chio' binlo len Diosen'**

<sup>15</sup>Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'lol da' de le'e yaban' na' lo yežlion'. <sup>16</sup>Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gacxene'. <sup>17</sup>Criston' ba zoacze' cate' bina' nita' yogo'lol da' de le'e yaban' na' lo yežlion'. Na' yogo' bite'teze da' zjade zjanaquen con can' zjanaquen, le Criston' zoacze' chone' cont zjanaquen ca'. <sup>18</sup>Na' Criston' chnabi'e chio' chdop chžagcho chonxenchone'. Len' bxie' yela' mban toli tocane che bene' chesejnilaže'ne', na' naque' bene' nechw bebane' ladjo bene' guaten' ben' bich nabia' yela' goten'

le'. Da'nan' naque' la'zelaogüe bene' blao na' chnabi'e yogo'lo' bene' na' bica'chle da' zjade. <sup>19</sup>Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che Xi'ine' Criston' doxen can' nac yela' guac che le'. <sup>20</sup>Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blalj xchene' le'e yag cruzen' cont gac yesenite' binlo len le'.

<sup>21</sup>Can'a' bi nombia'le Diosen'. Bgue'elne' na' gwzoale benle da' malen'. Perw na'a ba bozoa Criston' le'e binlo len Diosen', <sup>22</sup>le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'. <sup>23</sup>Na' še soacho šejnilaže'cho Criston' na' soachachcho len toze xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont benachen' chesenden', na' Diosen' gwleje' neda' Pablo chyixjue'edan'.

### Diosen' gwleje' Pablon' cont bsed blo'ede' bene' chesonxen Criston'

<sup>24</sup>Da' zan da' chyi chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac nacho cuin Criston' chžaglagüe'. <sup>25</sup>Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'. <sup>26</sup>Can'i' nono na' neze da' güen da' chon Diosen' len bene' chesejnilaže'ne',

perw na'a Diosen' ba bzejni'iden' chio', chion' naccho lo ne'e. <sup>27</sup>Diosen' chaclaže' nezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacze Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'. <sup>28</sup>Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'. <sup>29</sup>Da'nan' chona' con ga zelao choeda' chyixjue'eda' bene' xtižen', na' chaclenchgüe' neda' len yela' guac xen chen'.

**2** Chaclaža' nezele chonchgua' ga zelao choeda' cont chaclena' le'e na' bene' lježcho že' Laodicea na' yezica'chle bene' lježcho bina' yesele'ede'nda'. <sup>2</sup>Chaclaža' gona' chach laže'le cont yichjlažda'olen' yesaquen toze lagüe da' chaque lježle. Na' chaclaža' nezeyane'le can' cheyała' gonle xbab cont šejni'ile da' ba bzejni'i Diosen' chio' che Criston' da' nono gwneze cani'. <sup>3</sup>Criston' nse'e doxen yela' sina' na' yela' chejni'i che Diosen' cont gwzejni'iden' chio'. <sup>4</sup>Chnia' ca' cont nono siye'e le'e len diža' da' chaquele naquen xdan. <sup>5</sup>Na' la'czla' bi zoa' na'le len le'e, zoa' chona' xbab chele na' chebeda' nezda' chonle can' cheyała' gonle na' zoachachle chejnilaže'le Criston'.

<sup>6</sup>Na' na'a, con can' ba gwzolaole chejnilaže'le Criston' na' ba nonlene' Xanle, con can' soachachle len le'. <sup>7</sup>Le soachach le šejnilaže'ch Criston' can' ba bsdlena', cont gacle ca to yag da' ba gwyaz loen sitjw. Na' le soa le güe'chgua yela' choxcen che Diosen' can' chaclene' le'e.

**Criston' ba bocobe' yichjlažda'ochon'**

<sup>8</sup>Le gwsaca' cont nono co'oyełe' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyała' goncho da' bibi zjazaca', na' bitw chosozejni'ide' che Criston'.

<sup>9</sup>Yichjlaždao' Criston' naquen' cayanen' nac yichjlaždao' Diosa, na' nac yela' guac che Criston' doxen can' nac yela' guac che le'. <sup>10</sup>Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuezcho binlo. <sup>11</sup>Na' lecze da' naccho txen len Criston' de to checho da' zaca'leben ca señw da' že' circuncisión, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. <sup>12</sup>Na' da' gwzoacho nis caten' gweyjnilaže'chone', zejen con can' got Criston' neče xtoła'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac chen'. <sup>13</sup>Cana' gwxaca'lebcho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtoła'chon'. <sup>14</sup>Bi bencho yogo'loł can' ža ley che Diosen' cheyała' goncho, na' bencho da' žan bi cheyała' goncho. Da'nan' gota' xya checho len leyna' na' nchoglaon checho saca'zi'cho toli tocane. Perw Criston' bnežjw cuine' bosode'ene' le'e yag cruza' neče doła'

xya chechon', na' da'nan' nezecho Diosen' ba bnitlagüe' xtoła'chon'. <sup>15</sup>Criston' cate' gote' le'e yag cruza' beque'e yela' gwnabia' che da' xigüe' ca' na' blo'ede' benachen' ba blej bšošjen'.

**Cue' yichjcho che da' ca' zjazacan' len Diosen'**

<sup>16</sup>Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no ža lni, o bene' chesena qui ca' goncho cate' naquen bio' che'en, o bene' chesena ža ni ža na' nac ža che Dios. <sup>17</sup>Yogo' da' ca' con bosozejni'in late'lasze che Criston', perw na'a da' bid Criston' bich chyažjecho da' ca', le ba nombia'chone'. <sup>18</sup>Bi gwzenagle še no bene' chzejni'ide' cheyała' gon cuinle ca to da' bibi zaca' cont soale binlo len Diosen', o bene' chzejni'ide' cheyała' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljlaže' zaca'chguan, len bitw bi zacan', <sup>19</sup>le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bechj bnia' ca' zjanoxen' len con ca non Dios chegaquen.

<sup>20</sup>Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'nan' bi cheyała' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyała' gonle na' da' ca' chesene' bi cheyała' gonle? <sup>21</sup>Chesene': "Bi goxe'le da' nga", "Bi ye'ej gagwle da'

na", "Bi canle da' na". <sup>22</sup> Na' yogo' da' ca' chesene' bi goxe'cho, bi ye'ej gagw-cho na' bi cancho, da' chesede chen cate' chchinchon, na' dan' chesene' cheyala' goncho len da' ca', con xbab chegaczen'. <sup>23</sup> Guacte goncho xbab nac da' sina' da' chesene' cheyala' goncho, na' goncho xbab gaclenen chio' gonxencho Diosen', le chesene' cheyala' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chacle-nen chio' cont bitw gwzenagcho che da' malen'.

**3** Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'nan' cheyala' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'. <sup>2</sup> Na' cheyala' yebecho da' naquen da' zaca' len Diosen', gague da' naquen da' zaca' len benachen'. <sup>3</sup> Le guac nacho Criston' ba none' chio' ca to bene' guat len da' malen' cont da' malen' bich nabian' chio', na' mbancho len Criston' na'a cont naccho txen len Diosen'. <sup>4</sup> Criston' none' chio' yela' mban toli tocanē. Na' cate' le' yide' da' yoble, šjayzoacho txen len le' gan' yo'ochgua be'ni'.

### Can' bencho cana' na' can' cheyala' goncho na'a

<sup>5</sup> Da'nan' cheyala' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' nēca yebecho bi da' nac da' yela' zto'. Bitw selaže'cho goncho bite'teze da' mal, nēca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejnlaže' l gua'a lsaca' ca'. <sup>6</sup> Žin ža cate' Diosen' gone' cont bene' cheson da' ca' yezezaca'zi'e toli tocanē.

<sup>7</sup> Le'e lecze gwzoale cana' benle da' mal ca' ba gwnia'. <sup>8</sup> Perw na'a cheyala' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw nele che lježle, na' bitw güe'le diža' zban. <sup>9</sup> Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyala' gwzenagle chen da' yoble. <sup>10</sup> Ba chzenagcho che Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chacch xbab chechon' can' nac chen'. <sup>11</sup> Na' chio' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho señw da' že' circuncisión o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejnlaže'cho Criston' na' len' zoe' len yogo'cho.

<sup>12</sup> Diosen' gwleje' chio' cont naccho lo ne'ena' na' chacde' chio'. Da'nan' cheyala' yeyaše'cho bene' na' gaccho bene' šagüe' len yogo'lol' bene'. Bi cheyala' ga'laže'cho, san gaccho bene' chzexjwlaže' na' gapcho yela' chxenlaže' len yogo'lol' bene'. <sup>13</sup> Na' cheyala' gwdecho ca'ale še bi chac checho len bene' lježcho na' yezi'xencho še bi da' ba gosonde' chio', yezi'xencho con can' ba bezi'xen Xancho Criston' checho. <sup>14</sup> Na' yeto da' zejechen goncho ca yogo' da' ca', cheyala' gague lježcho, le še chaque lježcho gaclenen goncho yogo' da' ca' can' cheyala' gonchon. <sup>15</sup> Diosen' gwleje' chio' cont soa cuezcho binlo, na' cheyala' gwzenagcho che Criston' na' gacbe'echo yogo'cho naccho toze cont soa cuezcho binlo. Na' lecze cheyala' soacho güe'cho yela' choxcen che Diosen'.

<sup>16</sup> Cheyala' soacho goncho xbab che xtiža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina'

che Diosen' cont yogo'cho goncho da' güen. Na' cheyała' gołcho no salmos, no himnos, na' bichle da' ža Spiritw che Diosen' gołcho, na' güe'cho yela' choxcen che Diosen' lo' yichjlažda'ochon'.<sup>17</sup> Na' bite'teze da' goncho na' bite'teze diža' güe'cho, cheyała' nabcho gaclen Xancho Jesúsen' gonchon can' chazlaže', na' güe'cho yela' choxcen che Xacho Diosen' con can' chaclen Xancho Jesúsen' chio' chonchon'.

### Can' cheyała' goncho len lježcho

<sup>18</sup>Le'e no'ole nšagna'le, to tole le gwzenag che bene' chele, le can' cheyała' gon chio' chejnilaže'cho Xancho Criston'.<sup>19</sup> Na' le'e bene' byo nšagna'le, to tole le gague no'ol chele na' bi gonle znia len legaue'.<sup>20</sup> Na' le'e bi' bixjw, le gwzenag che yogo'loł bi da' yesena xaxna'le, le can' chazlaže' Xancho Criston' gonle.<sup>21</sup> Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele.<sup>22</sup> Na' le'e chonle xšin bene', le gwzenag yogo'loł can' ža xan žinna' gonle. Bitw gonlele xan žinna' gonle ca' bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'.<sup>23</sup> Na' bite'teze da' gonle, le gonon do yichj do laže'le cont yebe Xancho Criston', gague contze yebe bene'.<sup>24</sup> Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'.<sup>25</sup> Na' note'tezcho še bi choncho can' cheyała' goncho, Xancho Diosen' gone' saca'zi'cho neče dan' ba bencho. Na' toz can' chon Diosen' len yogo'loł bene'.

**4** Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

<sup>2</sup>Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxcen che', na' bi cheyała' güedcho yoł güižcho Diosen'.<sup>3</sup> Na' le nabe Xancho Diosen' gone' cont gac güe'lento' bene' xtiža' Criston' da' bina' yesejni'ide', le neče dan' ba bia' xtiže'nan' dia' ližya nga.<sup>4</sup> Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

<sup>5</sup>Cheyała' soacho goncho güen len bene' bina' yesejnilaže' Criston' na'a šlac de latje.<sup>6</sup> Na' cheyała' güe'cho diža' šagüe' diža' da' zejen len yogo'loł bene', na' cheyała' goncho xbab nac yoži'icho xtiža' yogüe'.

### Pablo chguape' bene' migw che' ca' tiox

<sup>7</sup>Bene' lježcho Tíquico ye'e le'e yogo'loł can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'.<sup>8</sup> Ba gwsela'ne' gan' zoalen' cont nezele can' chac cheto' na' cont gone' chach laže'le.<sup>9</sup> Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyała' gone' na' chaquechone'. Legaue' yese'e le'e yogo' da' ba chac nga.

<sup>10</sup>Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'.<sup>11</sup> Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' chach laža' can' ba gosaclene' neda'.<sup>12</sup> Nach lecze bene' gualaž chele Epafras chguape' le'e tiox.

Chone' xšin Criston' na' yogo' ni'a cate' choḷ güiže' Diosen' chnabchgüe' gwzejni'i Diosen' le'e yogo'loḷ da' chaclaže' gonle cont soachachle gonlen na' gacle cayanen' chazlaže' Diosen'. <sup>13</sup> Che'nda' nezele zoateze' choḷ güiže' Diosen' neche le'e chejnilaže'le Criston' le'e nita'le Colosas, Laodicea na' Hierápolis. <sup>14</sup> Nach Lucas ben' chon rmed, ben' chaquecho, chguape' le'e tiox na' lecze ca' Demas.

<sup>15</sup> Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen'

ližen'. <sup>16</sup> Na' cate' yeyož gwlable cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwseḷa' che bene' Laodicean'. <sup>17</sup> Na' le ye' Arquipo chneyoeda'ne' gwza'lagüe' gone' doḷoḷ xšin Diosen' da' gwlo'o Xancho Criston' lo ne'e gone'.

<sup>18</sup> Cuincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' na'a.

## CART NECHW DAN' BZOJ POSTLW SAN PABLO CHE BENE' CA' ŽE' TESALÓNICA

### Pablo bzoje' bene' Tesalónica ca' ben' chesonxene' Jesucriston'

**1** Neda' Pablo chzoja' le'e chdop chža-  
gle chonxenle Xancho Jesucriston'  
Tesalónica na' nacle txen len le' na' len  
Xacho Diosen'. Na' neda' len Silvano na'  
Timoteo chnabto' lao Xacho Diosen' na'  
lao Xancho Jesucriston' yesaclene' le'e  
na' yesone' ca' soa cuezle binlo len xbab  
dan' yo'o lo' yichjlažda'olen'.

### Bene' Tesalónica bosolo'ede' chesejle'e che Jesucriston'

<sup>2-3</sup> Yogo' ni'a cate' choļ güižto' Xacho  
Diosen' choe'to' yela' choxclen che'  
par yogo'le. Na' cate' choļ güižto'ne'  
chjayza'laže'to' yogo'loļ da' güen  
dan' chonle dan' chejnilaže'le Diosen'  
na' chaquelne'. Na' chjayza'laže'to'  
can' zoachachle chbezle yid Xancho  
Jesucriston' yeto. <sup>4</sup> Nezetō' bene' migw,  
Diosen' chacde' le'e na' ba gwleje' le'e  
cont nacle lo' ne'e. <sup>5</sup> Na' diža' güen da'  
bzejni'ito' le'e che Jesucriston' gague  
naquen con to diža'ze. Spiritw che  
Diosen' goclenen neto' bzejni'ito' le'e len  
yela' guac chen na' nezeto' diža' dan'  
bzejni'ito' le'e naquen da' li. Na' nezele  
can' bento' da' güen šlac gwzoato' len  
le'e cont gocleno' le'e.

<sup>6</sup> Na' le'e zoale chonle da' güen can'  
ba ben neto' na' can' ben Xancho Jesu-  
criston'. Bzenagle dan' gwduxjue'eto' le'e  
che Jesucriston', na' Spiritw che Diosen'  
chonen cont chbele chzenaglen, la'czla'  
da' zan da' ba gwdi gwzaca'le dan' ba  
bzenagle chen'. <sup>7</sup> Na' da' zoale chonle  
da' güenna', bene' ca' chesejnilaže' Je-  
sucriston' distritw Macedonia na' dist-  
ritw Acaya ba zjanezde' naquen cheyala'

yesone'. <sup>8</sup> Doxen ba bzenele bene' xtiža'  
Xancho Jesucriston', gague bene' že'  
Macedonia na' Acaya na'zen'. Na' ca'cze  
yogo'ze bene' ba zjanezde' can' chejni-  
laže'le Diosen', na' da'nan' bi chyažjen  
güeto' diža' chele. <sup>9</sup> Na' bene' zan cheso'e  
diža' ca' güen benle len neto' caten' be-  
dena'to' le'e na' cheso'e diža' can' benle  
gwlejyichjle cbich chejnilaže'le l' gua'a  
lsaca' chele ca', san na'a ba chejnilaže'le  
ben' nac dogualje Dios ben' zoa toli to-  
cane. <sup>10</sup> Na' cheso'e diža' can' chbezle  
yetj Xi'ine' Jesúsēn' yaban' yide' yežlio  
nga yeto, ben' bosban Diosen' ladjo bene'  
guaten'. Na' dan' chejnilaže'cho Jesúsēn'  
ba bosle' chio' cont bi saca'zi'cho cate'  
žin ža bene' bi chosozenague' che Diosen'  
yesale'chgüede' toli tocane.

### Pablon' gwzoe' Tesalónican'

**2** Bene' migw, le'e nezele dan'  
bedena'to' le'e goclenchguan le'e.  
<sup>2</sup> Na' nezele can' gwdi gwxcaca'to' cate'  
gwyeto' Filipos, na' can' gosezi'diža'  
bene' ca' neto' dan' gwduxjue'eto' che  
Jesucriston'. Perw Diosen' goclene'  
neto' cont bi bžebto' gwduxjue'eto'  
diža' güen che' len le'e la'czla' bene'  
zan bosožone' chixjue'eton'. <sup>3</sup> Dan'  
gota'yoeto' le'e gwzenagle che Diosen'  
bitw nacho bzejni'ito' le'e clele, neca  
goclaže'to' gonto' da' mal, na' neca  
bento' xbab gonleto' le'e. <sup>4</sup> San zoato'  
choe'to' diža' can' chazlaže' Diosen' ben'  
ba gwleje'nto' par chyixjue'eto' diža'  
güen che'na'. Na' chyixjue'eton' gague  
cont yebe bene', san cont yebe Diosen'  
ben' neze bin' yo'o lo' yichjlažda'ochon'.  
<sup>5</sup> Nezele can' bento', ne tni'aze bina'  
gwpeto' le'e len xtiža'ton', na' neca  
benleto' le'e cont gonle cheto' bi da'  
de chele. Cuiin Diosen' nezde' can'  
naquen. <sup>6</sup> Na' neca cheyiljwlaže'to'  
nacle gonto' cont yesonxen bene' neto'.  
Neca nacho chaclaže'to' gonxenle neto',  
na' neca chaclaže'to' yezica'chle bene'

yesone' ca'. Zaca'to' gonto' ga gwzenagle cheto' la fuers da' gwsela' Criston' neto' choe'to' xtiže'na', perw bitw chonto' ca'.<sup>7</sup> Nži'ito' le'e cacze no'ole šagüe' nži'ide' xi'ine' bi' chosgol chosča'ogüe'.<sup>8</sup> Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuinto' bento' ga zelao gwzaueto' cont goclento' le'e, le chaqueto' le'e.<sup>9</sup> Za'laže'czle bene' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwdixjue'eto' le'e diža' güen che Diosen'.

<sup>10</sup>Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna napt'o' doła'.<sup>11</sup> Nezele can' gota'yoeto' le'e gonle da' güen na' can' bento' chačh laže' to tole gonlen. Bento' can' chon to bene' byo len xi'ine'.<sup>12</sup> Bento' mandaw gonle da' güen ca cheyala' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

<sup>13</sup>Bate'teze choe'to' yela' choxcen che Diosen' dan' bzenagle xtiže'na' caten' gwdixjue'eton' le'e. Zacbe'ele bi naquen xtiža' benačh, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'.<sup>14</sup> Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž chegaque' bosochi bososaque' legaue', na' lecze can' bosochi bososaca' bene' gualaž chelen' le'e.<sup>15</sup> Na' bene' Israel ca' gosote' Xancho Jesucriston' con can' gosote' da' bene' gosoe'lene' legaue' xtiža' Diosen' cani'. Na' lecze can' gosone' bosolağšibe' neto'. Na' ža na'aža ne' nite' chesone' da' bi chazlaže' Diosen' na'

chesegue'ede' yogo'lol benačhen',<sup>16</sup> le chosožone' gwzejni'ito' yezica'chle bene' bi da' cheyala' goncho cont gata' yela' mban checho toli tocañe. Can' chesone' do tiemp chosozanch xtoła'gaquen' na' Diosen' ba chža'achgüe' legaue'.

### Pablo goclaže' šjajne'e bene' nita' Tesalónica

<sup>17-18</sup>Na' neto' bene' migw, cate' zoato' ga bi chle'e lježcho, chjayze'eto' le'e. Da'n'an' cate' ba goc sša bina' le'e lježcho ba chaczejlaže'to' chele na' goclaže'to' yedena'to' le'e. Na' to chop ni'a godca' yida', perw Satanás dan' chnabia' da' xigüe' ca' bi benen latje.<sup>19-20</sup> Chebeto' chonchguale güen na' da'n'an' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbeto' na' cont zoato' mbalaz.

**3**<sup>1-2</sup>Na' bich gwzoeto' dan' bi chle'e lježchon'. Da'n'an' bečhoglaže'to' gwsela'to' bene' lježcho Timoteon' gan' zoalen' na' neto' bega'anto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwsela'to'ne' bedeyata'yoede' le'e bi soayaše'le na' bedeyene' chačh laže'le cont zoachachle chejnilaže'chle Criston'.<sup>3</sup> Gwsela'to'ne' gan' zoalen' cont ne tole bi gaczejlaže'le bixchen' chyi chzaca'le. Ba nezele chio' chejnilaže'cho Criston' cheyala' saca'zi'cho lo yežlio nga.<sup>4</sup> Caten' gwzoalento' le'e bzeneto' le'e leca yosochi yososaca' bene' chio'. Na' nezele ba chac can' gwnato'na'.<sup>5</sup> Na' dan' bi gocxenlaža' dan' bina' la' rson chelen', nachen' gwsela' Timoteon' gan' zoalen' cont nezda' še do laže'le chejnilaže'le Criston'. Le bena' xbab godca' še ba gwzoe gwxiyen' benlen le'e. Le še ba benlen le'e, con bendadzeto' xšin Diosen' len le'e še ca'.



<sup>6</sup>Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'loł beñe'. Na' ľecze gwne' chjazyze'ele neto' na' zelaže'le yežagcho da' yoble ľecze can' chaclaže' neto'. <sup>7</sup>Ca'czen' beñe' migw, chžaglaoto' na' chyi chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'. <sup>8</sup>Da' ľi ba beyacxenlaže'to' na' zoato' mbalaz dan' zoachachle chejnilaže'le Xancho Criston'. <sup>9</sup>Na' da'nana' ľeca chbeto' lao Diosen' can' chonle na' ľeca choe'chguato' yela' choxclen che' can' chonlen'. <sup>10</sup>Ľeca chol' güižto'ne' do ža do yel chnabeto'ne' gone' ga yele'e ľežcho da' yoble cont gwzejni'ichto' le'e na' šejchle šejnilaže'chlene'.

<sup>11</sup>Chnabeto' Xacho Diosen' len Xancho Jesucriston' yesone' latje yedena'to' le'e. <sup>12</sup>Na' chnabeto' Xancho' gone' cont gaquech ľežle tole yetole na' gone' ga gaquechle yogo' beñachen' con catezen' chaqueto' le'e. <sup>13</sup>Chnabeczeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cbibi doła' gapple cate' yid Xancho Jesúsen' da' yoble nche'e yogo'loł beñe' ba gwlej Diosa' cont zjanaque' lo ne'e.

### **Pablon' bzejni'ide' can' che'ne Diosen' yesezoa yesebeze'**

**4** Na'a beñe' migw, bač bsd blo'eto' le'e gonle can' chazlaže' Diosen', na' bač zoale chonle ca'. Na' can' ža Xancho Jesucriston' chata'yoeto' le'e na' chonto' mandaw šejchle gonchle dan' chazlaže' Diosen'.

<sup>2</sup>Ba nezczele bica' da' ca' bento' mandaw gonle na' zjanaquen con ca' ža Xancho Jesúsen'. <sup>3</sup>Diosen' chaclaže' soatez soacho gaccho beñe' laždao' xilaže'. Bi chazlaže' gata'lencho no'ol bi nac no'ol checho o beñe' byo bi nac beñe' checho.

<sup>4</sup>Chaclaže' neze to tole naquen' cheyała'

soalen xo'ollen' sin cbi gapple doła' na' gonelene' ca beñe' zaca'. <sup>5</sup>Bitw gonle can' cheson beñe' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. <sup>6</sup>Ne tole bitw gonle da' bi cheyała' gonle na' siye' beñe' ľežle na' soalenle no no'ol che'. Ba be'czto' diža' bosnisetto' le'e can' gon Xancho Diosen' can' yesezaca'zi'chgua beñe' cheson bite'tez da' xinjen' zjanac ca'. <sup>7</sup>Diosen' gwleje' chio' cont gaccho beñe' laždao' xilaže', gague cont goncho bi da' xinj da' zjanac ca'. <sup>8</sup>Da'nana' note'tez le'e še bi chzenagle che da' qui ba bzejni'ito' le'e, gague xtiža' beñachen' chzoale ca'ale, san Diosa' chzoale ca'ale. Ľen' beñe' chio' Spiritw čen' na' Spiriton' naquen laždao' xilaže'.

<sup>9</sup>Bitw chyažjen gwzoja' le'e can' cheyała' gague ľež chio' chejnilaže'cho Jesucriston'. Dios nan' ba bsdedde' le'e cont chaque ľežle tole yetole. <sup>10</sup>Na' da' ľi ba chaquele yogo' beñe' ľežcho ca' nita' doxen Macedonian'. Na' chata'yoeto' le'e beñe' migw, ľe gaquech ľegaque'. <sup>11</sup>To tole ľe yeyiljwlaže' bi žin gonle cont soa cuezle binlo can' nonto' mandaw na' bitw tale gwgiuia na'le bi cheson beñe' yoble. <sup>12</sup>Ľe gon can' ba gwnia' cont beñe' bi zjanaque' txen len chio' yesacbe'ede' chonle güen, na' ľecze cont bibi gac falt še bi dan' chyažj chčhinele.

### **Can' gac cate' yid Criston' da' yoble**

<sup>13</sup>Beñe' migw, chaclaže'to' nezele can' yesac che beñe' gosejnilaže' Jesucriston' na' ba gosate'. Chaclaže'to' nezenen cont bi yegüine'le ca cheson beñe' bi nita' lez šjasyezoe' len Jesucriston'. <sup>14</sup>Nezecho gosot beñe' Jesúsen' na' bebane' ladjo beñe' guat ca'. Ľecze nezecho Diosen' gone' cont yid Jesúsen' da' yoble nche'e beñe' ca' ba gosat con beñe' gosejnilaže' le'.

<sup>15</sup> Na' diža' nga chzeneto' le'e naquen dan' non Xancho Jesúsén' mandadw gwzeneto'. Chio' mbancho na'a chejni-laže'chone', še ne' mbancho cate' yide' da' yoble, bitw nacho yobch yežagchone' clél ca bene' ca' ba gosat. <sup>16</sup> Na' ca nac Xancho Jesúsén', cuine' yetje' le'e yaban', na' ne' zizje gone' mandadw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejni-laže' Criston', legaue' zgua'tec yesyebane' ladjo bene' guaten'. <sup>17</sup> Na' ca yeyoža', chio' chejni-laže'chone' še ne' mbancho yežlio nga, gon Diosen' cont yeyepcho txen len legaue' le'e yaban' to lo' bejw na' yežagcho Xancho Jesúsén' le'e yaban'. Nach šjayzoacho len le' toli to-cane. <sup>18</sup> Da'n'an' le gon chach laže' lježle tole yetole güe'le diža' can' gaca'.

**5** <sup>1-2</sup> Bene' migw, bitw chyažjen gwzoja' cont gwzenda' le'e bi ža bi hor yid Xancho Jesúsén' yeto. Nezele con yalzelaže'le žin ža žin hor can' chžin bene' gwban bene' chda šeže'le. <sup>3</sup> Na' šlac chesena bene': "Mba zoacho, bibi chac checho", cate' concze žin ža yesebiaye'e. Can' chac che no'ole cate' yalzelaže' chaque' bes che yela' san, ca'czen' zjyalzelaže' yesebiayi' bene' ca' bi chesejni-laže'ne'. Bitw gac yosoxonje'. <sup>4</sup> Perw chio' bene' migw, bi nchole yichjlažda'ochon', da'n'an' bitw gac checho can' chac che bene' chzenyal gwbanna' le'. <sup>5</sup> Diosen' ba bzejni'ide' chio' nombia'chone' na' be'ni' chen' ba chsenin' len chio'; da'n'an' bitw nchole yichjlažda'ochon'. <sup>6</sup> Cheyala' gonyane'cho xbab naquen' chaclaže' Diosen' goncho na' nabia' cuincho goncho can' chazlaže'na'. <sup>7</sup> Bene' ca' cbi chosozenag che Diosen' zjazaca'lebe' ca bene' zjantas na' ca bene' chesezože. <sup>8</sup> Perw ba bzejni'i Diosen' chio' cont bi goncho can' chesone'na'. Da'n'an' cheyala' nabia' cuincho goncho can' chazlažen'. Cheyala' šejnilaže'cho Diosen' na' gaque

lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldadw ben' nyaze' to de ya da' chcue'ejen le' cont bibi chac che' cate' chdile' len bene'. <sup>9</sup> Gague gwlej Diosen' chio' cont saca'zi'cho che xtoła'chon'. Gwleje' chio' cont šejnilaže'cho Xancho Jesucriston' na' šjayzoacho len le'. <sup>10</sup> Na' Jesucriston' bnežjw cuine' neche chio' cate' gosot bene' le' cont šjayzoacho len le' la'czla' še mbancho o še ba gotcho cate' yide' da' yoble. <sup>11</sup> Da'n'an' le gonch can' ba chonle, le gon chach laže' lježle tole yetole na' le gaclench lježle cont soachachle šejnilaže'le Jesucriston'.

#### **Pablon' bzejni'ide' bene' chesejni-laže' Jesucriston' can' cheyala' yesone'**

<sup>12</sup> Chata'yoeto' le'e bene' migw, gape bala'an' bene' ca' cheson xšin Xancho Jesucriston' chosogüia chesene'e le'e na' chosozejni'ide' le'e naquen' cheyala' soa cuezle. <sup>13</sup> Gapchgualne' bala'an' na' gaguechgüele legaue' dan' chesone' xšin Diosen' do laže'. Na' le soa binlo len lježle tole yetole.

<sup>14</sup> Ca'cze bene' migw, le tile bene' bi chesac'laže' yeson žin, le gon chach laže' bene' chesacde' zdebe chosozenague' che Jesucriston', na' le gaclen bene' bina' yesejni'ide' naquen' cheyala' yesone'. Le soa le gap yela' chxenlaže' len yogo'lol bene'.

<sup>15</sup> Še bi da' mal cheson bene' len le'e, le gon byen bi yoži'ile da' mal len legaue'. Le yeyiljwlaže' naclen' gonle güen len lježle tole yetole na' len note'tez bene'.

<sup>16</sup> Do tiemp le yebe. <sup>17</sup> Le soateze le soa le yo! güiž Diosen'. <sup>18</sup> Le güe' yela' choxc'len che Diosen' bite'tez da' chac chele, le da'n'an' chaclaže' gon chio' chejni-laže'cho Cristo Jesúsén'.

<sup>19</sup> Bitw gwžonle gon Spiritw che Diosen' can' chaclažen' gonen len le'e o len bene' yoble. <sup>20</sup> Bi gwzoale ca'ale dan'

chesena beṇe' cheso'e diža' dan' ba gož Diosen' legaque'. <sup>21</sup> Na' le gonyane' xbab che yogo'loḷ diža' da' cheso'e cont soale gwzenagle che da' nac güen. <sup>22</sup> Na' bitw gonle bite'tez da' nac da' mal.

<sup>23</sup> Diosen' chone' ca chzoa chbezcho binlo len xbab dan' yo'o lo' yichjlažda'ochon'. Na' chṇabda'ne' gone' cont lažda'olen' gacyaṇen' xilaže'. Na' lecze gonšque' cont bibi da' mal gonle len yichjlažda'olen' ṇeca len cuerp chelen' cont bibi doḷa' gaple caten' yid Xancho Jesucriston' yeto. <sup>24</sup> Diosen' ben' ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

**Pablon' gwnabe' gaclen  
Diosen' beṇe' Tesalónican'**

<sup>25</sup> Beṇe' migw, le soa le nab gaclen Diosen' neto'.

<sup>26</sup> Na' cate' chežagle le gwnopa' na' lježle cont nacbia' chaque lježle.

<sup>27</sup> Chona' mandadw gwlable cart nga ga yesene yogo'loḷ beṇe' lježcho ca' nita' gan' zalna', le can' chaclaže' Xancho Jesucriston' gonle.

<sup>28</sup> Na' soateze Xancho Jesucriston' gaclenšque' le'e. Da' na'ze chzoja' ṇa'a.

## CART GWCHOPE DAN' BZOJ POSTLW SAN PABLO CHE BENE' CA' ŽE' TESALÓNICA

**Pablon' bzoje' bene' Tesalónican'  
bene' chesonxen Jesucriston'**

**1** <sup>1-2</sup>Neda' Pablo chzoja' le'e chdop chzagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda'olen'.

**Cate' yid Criston' da' yoble Diosen'  
gwnežjue' da' yezezaca'zi'  
bene' bi chosozenag che'**

<sup>3</sup>Bene' migw, neto' cheyała' soateze soato' güe'to' yela' choxcen che Diosen' che dan' chonlen'. Cheyała' gonto' ca' da' zejle chejnilaže'chle Diosen' na' zej chaquech lježle. <sup>4-5</sup>Da'nan' chbeto' choe'to' xtiža'len' len yezica'chle bene' ba gwlej Diosen' na' chesežague' chesonxene' Jesucriston' ga yoble. Choe'to' diža' ca' güen chonle dan' chyo chchejele chejnilaže'le Jesucriston' la'czla' da' zan da' chac chele na' chosoči chososaca' bene' le'e. Da'nan' nezecho Diosen' zejze' to' licha da' nchogbi'e zaca'le par yeyejle yaban' gan' zoe' chnabi'e.

<sup>6</sup>Na' Diosen' zeje' to' licha da' gone' cont yezezaca'zi' bene' ca' chosoči chososaque' le'e. <sup>7</sup>Na' lecze zeje' to' licha da' gwcueze' yogo'te dan' chyi chzaca'chon'. Gwcuezen' cate' le'echo yetj Xancho Jesúsen' le'e yaban' len angl che' ca' bene' zjans'e yela' guac che'. Yetje' nyechjde' yi' beł. <sup>8</sup>Na' gwnežjue' da' yezezaca'zi' bene' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesu-

criston'. <sup>9</sup>Łegaque' yezezaca'zi'e tołi to-cane. Gwbat šjasyenite' len Xancho Jesucriston' ben' nac bene' zaca' juijyw na' nape' yela' guac xen. <sup>10</sup>Cate' žin žan' yid Jesucriston' da' yoble, chio' chejni-laže'chone' na' naccho lo' ne'e gwlo'echo naque' bene' zaca' juijyw na' yebanecho catec bene' güen naque'. Nacto' txen len le'e da' ba chejle'le che diža' dan' be'lento' le'e.

<sup>11</sup>Da'nan' zoatez zoato' chnabeto' Diosa' gaclene' le'e gonle güen cont yebede' ba gwleje' le'e par nacle xi'ine'. Na' chnabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. <sup>12</sup>Chnabto' gonle cont Xancho Jesucriston' gacxene', na' le' gone' ga gacxenle txen len le', le' Dios chechon' na' Xancho Jesucriston' nita'cze' chesaclene' le'e.

**Choj ben' gonchgua  
güedenag len Diosen'**

**2** Bene' migw, da' yoble chnia' le'e ca' gac cate' yid Xancho Jesucriston' yeto, yotobe' chio' šjayzoacho txen len le'. <sup>2</sup>Chneyoeto' le'e bitw gacžejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gacžejlaže'le še bi da' yenele o še la' no cart güenlaže' da' chesena bene' gwseła' neto', žan ba bžin ža yid Jesucriston'. <sup>3</sup>Bi güe'le latje no siye' le'e še bi yesene' o še bi da' yesone'. Le' cate' za' yid Xancho Jesúsen' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo' yi' gabiłen'. <sup>4</sup>Gaque' bene' ya'laže' na' gue'ede' Diosen' na' lecze ca' gue'ede' bite'tezech da' chesejni-laže' bene'. Na' cui'e lo' yodao' blao gan'

chesonxene' Diosen', gon cuine' ca Dios cont yesonxen bene' le'.

<sup>5</sup> ĆBi za laže'le cate' gwzoa' len le'e bzejni'ida' le'e can' gac cate' yid Jesucriston' da' yoble? <sup>6</sup> Na' na'a nezeczle bi dan' chžon choj bene' blao ben' gonchgua güedenag len Diosen', perw cate' ba bžin ža bžin hor, cana' choje'. <sup>7</sup> Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyed-abaga'chgüe' Diosen'. <sup>8</sup> Cana'chen' choj bene' blaon' ben' gonchgua güedenag len Diosen'. Nach Xancho Jesúsen' yide' nyechjhgüede' be'ni', na' cate' bene' blaon' le'ede' le' nach Xancho'n' güe'e diža' na' ši'en goten le'. Can' gone' yonitlagüe'ne'. <sup>9</sup> Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' le-gaque'. <sup>10</sup> Yogo'te da' mal gone' gonlede' bene' ba naquen yesebiaye'e toli tocanē. Yesebiaye'e da' bi chesejle'e diža' lin', le lenna' zaca' yesejle'e cont gata' yela' mban čhegaque' toli tocanē. <sup>11</sup> Na' da'nan' Diosen' güe'e latje yeseziye'e le-gaque' cont yosozenague' diža' güenlaže'. <sup>12</sup> Nach yesezaca'zi'e toli tocanē da' bitw gosejle'e diža' li čhe Xancho'n' san besyebede' da' malen'.

### **Diosen' chbeje' bene' na' chone' cont gac šjasyenite' len le' toli tocanē**

<sup>13</sup> Bene' migw, chaque Xancho Jesucriston' le'e. Na' neto' cheyała' soatez soato' güe'to' yela' choxclen čhe Diosen' da' gwleje' le'e cate' bina' xe yežlion' cont šjayzoale len le'. Na' cate' gwzolao chejle'le diža' li čhe Diosen' nach gwsele' Spiritw čhen' chonen cont nacle bene' laždao' xilaže'. <sup>14</sup> Neče da'nan' gwlej Diosen' le'e, na' dan' gwyejle'le diža' güen čhe Jesucriston' da' be'lento' le'e, žin ža

gon Diosen' cont soale mba juisyw can' zoa Xancho Jesucriston'.

<sup>15</sup> Da'nan' bene' migw, le soa čhačh le gwzenag do yichj do laže'le čhe dan' bzejni'ito' le'e, diža' dan' ba be'lento' le'e na' dan' ba bzojto'. <sup>16-17</sup> Xacho Diosen' chacde' chio'. Gague da'te čhe dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chnabda' cuin Xancho Jesucriston' len Xacho Diosen' yesone' čhačh laže'le na' yesaclenšque' le'e cont yogo' da' gonle na' diža' da' güe'le yesaquen güen.

### **Gwnab Pablon' yosoł güiže' Diosen' gaclene' le' len bene' lježe' ca'**

**3** Na'a bene' migw, yoł güižscale Diosen' gaclene' neto' cont yob šjadixjue'eto' čhe Xancho Jesucriston' doxen, na' cont bene' yezica'chle yesebede' yosozenague' can' ba ben le'e. <sup>2</sup> Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'. <sup>3</sup> Xancho Jesucriston' zoatez zoe' chone' can' že' gone', na' gaclene' le'e cont soachachle šejnilaže'lene'. Na' lecze gwcuas gwcue'je' le'e len da' malen'. <sup>4</sup> Na' nezeto' chalcenze' le'e cont chonle da' ba bento' mandadw gonle na' cont nita'czle gonlen. <sup>5</sup> Chnabda' Xancho Jesucriston' gone' cont nezele catec chaque Diosen' chio'. Na' lecze chnabda'ne' gone' cont gwyo gwčhejle len da' chyi chzaca'le can' gwzoa Criston' byo bčeje' len da' gwdi gwxaque'.

### **Pablon' bene' mandadw yesone' žin**

<sup>6</sup> Bene' migw, chzeneto' le'e can' chon Xancho Jesucriston' mandadw, bi cheyała' gonle txen len note'tez bene' lježchon' bene' bi chesaclaže' yesone' žin, le bi chesone' ca nac da' bsd

blo'eto' legaque'. <sup>7</sup>Neto' benczto' žin cate' gwzoato' len le'e, na' da'nan' nezele can' cheyała' gonle. <sup>8</sup>Cuent cheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwñabeto' le'e da' byažje bchineto'. <sup>9</sup>Zaca'czto' ša gwñabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyała' gonle. <sup>10</sup>Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'." <sup>11</sup>Perw na' ba beneto' diža' chesene' balle bitw bi žin chonle, con chdale chacle diža'. <sup>12</sup>Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

<sup>13</sup>Na' le'e bene' migw, bitw yeche'ele gonle da' güen. <sup>14</sup>Na' še no bene' chon

güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. <sup>15</sup>Perw bitw gue'elne', san gwzejni'ilne' diža' šagüe', le naque' bene' lježcho.

**Pablon' gwñabde' Diosen'  
gaclene' bene' Tesalónica**

<sup>16</sup>Na' chñabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'ochon', gonš-cacze' cont soa cuezle ca' yogo'te ža bite'teze da' chac. Len' soašcacze' len yogo'le.

<sup>17</sup>Na' cuincza' neda' Pablo chzoja' late' dao' le'e cart nga chguapa' le'e tiox. Can' choncza' len yogo' cart dan' chsel'a' cont nacbia' nedan' chselan', le ba nombia'le letr chian' can' chzojan'. <sup>18</sup>Xancho Jesucriston' gaclenšque' yogo'le. Da' na'zen' chzoja' na'a.

## CART NECHW DAN' BZOJ POSTLW SAN PABLO ĆHE TIMOTEO

### Pablo chzoje' cart ĉhe Timoteo

**1** Neda' Pablo chzoja' cart nga ĉhio' le' Timoteo. Naca' postlw ĉhe Jesucriston', le Diosen' len Xancho Jesucriston' gosone' mandadw chona' xšinen'. Dios nan' none' ĉhio' yela' mban toli to-cane na' Xancho Jesucriston' chone' cont zoacho lez šjayzoacho len le' toli to-cane. <sup>2</sup>Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' ĉhnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesac-lene' le', na' yesone' cont soa cuezo' binlo len xbab da' yo'o lo' yichjlažda'oguoñ'.

### Nita' bene' chosozejni'ide' diža' güenlaže'

<sup>3-4</sup>Caten' gwza'a Efeson' gwya'a Macedonian' gwñeyoeda' le' cont bega'ano' Efeson' neĉhe nita' bał bene' chosozejni'ide' bene' Efeso ca' diža' güenlaže'. Con bi cheyož yedo chesonĉgüe' xbab ĉhe diaža ĉhe da' xozxta'ocho ca' na' cheso'e zan cuent ĉhe legaque'. Na' da' yoble ĉhneyoeda' le' gono' mandadw bich yosozejni'ide' ĉhe da' ca'. Dan' chosozejni'ide' chonen ga yesacžejlaže' bene', na' bi chaclenen yesone' dan' gwlo'o Diosen' lo' na'cho gon ĉhio' ba ĉhejle'cho xtizen'.

<sup>5</sup>Na' gono' mandadw yesone' güen, le ĉaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li ĉhe Diosen' do yichj do laže'. <sup>6</sup>Bene' ca' chosozejni'ide' diža' güenlaže' bi chesone' ca', na' da'nana' cheso'e

diža' da' bibi zaca'. <sup>7</sup>La'czła' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyała' goncho.

<sup>8</sup>Nezecho ley nan' naquen güen con še gwĉhinchon can' cheyała' gwĉhinchon. <sup>9</sup>Na' leće nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag ĉhe Diosen', na' bene' chesonteze' da' malen', na' bene' bi chesape' Diosen' bala'an neca chesonxene'ne', na' bene' chesot no xaxna'gague', na' len nochle bene' güet bene'. <sup>10</sup>Lecze chosbagan' bene' chesata'lene' no'ole bi nac xo'olgaque' o bene' byo bi nac bene' ĉhegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseĉhe'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' ĉhio'. <sup>11</sup>Na' diža' güen da' ba bzejni'i Diosen' ĉhio' zaca'ĉhguan, na' Dios ben' zoa mba juisyw, le'na' ba gwlo'en lo' na' chyixjue'dan' bene'.

### Pablon' cho'e yela' choĉcľen ĉhe Diosen' na' ĉhe Jesucriston'

<sup>12</sup>Choa' yela' choĉcľen ĉhe Xancho Jesucriston' ben' chon cont ĉac chyixjue'eda' xtize'na'. Choĉcľenen' ĉacde' gona' xšinen' can' ĉazlaže' na' da'nana' gwleje'nda' gonana'. <sup>13</sup>Gwleje' neda' la'czła' cana' bia' diža' bya' ĉhe na' bgue'eda'ne' na' bĉhi bsaca' bene' ca' chesonxene' le'. Na' la'czła' bena' ca', Diosen' beyaše' beži'ilaže'de' neda', le bina' šejnilaža'ne' ca' hora' na' bina' gacbe'eda' chona' clele. <sup>14</sup>Nach Xancho Jesucriston' nži'ilaže'ĉhgüede' neda'

na' goclene'nda' cont gweyjnilaža'ne', na' na'a chacda'ne' na' lecce chacda' yezica'chle bene'.

<sup>15</sup> Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe gwyanch xtoła'. <sup>16</sup> Na' la'czła' naca' bene' la'zelagüe gwyanch xtoła', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesabe'ede' nape' yela' chxenlaže' xen na' yesejnilaže'ne' na' gata' yela' mban čhegaque' toli tocane. <sup>17</sup> Cheyala' gonxencho Diosen' ben' nac Rey čhechon' toli tocane. Gague da' te čhen'. Zoacze' la'czła' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'an toli tocane. Na' can' gonščaczczo.

<sup>18</sup> Xi'ina' Timoteo, ben xbab čhe dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecce can' chneyoeda' le' gonon' do yichj do lažo', la'czła' še gacdo' zdebe gonon'. Soačhačo' šejnilažo' Diosen', na' soatezo' gono' cont nezdō lo' laždaguo' bibi da' mal chono'.

<sup>19</sup> Bał bene' chesontezē da' malen' la'czła' zjaneztede' lo' lažda'ogüe' bi cheyala' yesonen', na' da'nan' ba gosebejyichje' bich chesejnilaže' Diosen'. <sup>20</sup> Can' goc čhe Himeneo na' čhe Alejandro. Da'nan' ba gwñabda' Diosen' yesaque' lo' na' Satanás dan' chnabia' da' xigüe' ca', na' gonnen con ca' chaclažen' len legaque' cont yesabe'ede' bi cheyala' yeseneye'e čhe Diosen'.

### Dan' cheyala' nabecho Diosen' gone'

**2** Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'loł bene', na' nabechone' gaclene' yogo'loł bene', na'

güe'cho yela' choxcen čhe Diosen' čhe bi da' güen da' chesac čhe yogüe'. <sup>2</sup> Cheyala' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuzcho binlo na' bibi gwžon gonxencho Diosen', naca gata' da' gwžon goncho bichle da' cheyala' goncho. <sup>3</sup> Naquen güen nabecho Diosen' gaclene' yogüe' na' naquen da' chazlaže' Diosen', Dios ben' none' chio' yela' mban toli tocane. <sup>4</sup> Le chaclaže' gwnežjue' yela' mban toli tocane čhe yogo'loł bene' na' chaclaže' yesejni'ide' diža' li čhe'. <sup>5</sup> Toz Diosen' zoa bene' zaca' yesonxen yogo'loł bene', na' leccz toz ben' chozoe' chio' binlo len Diosen', le'na' Jesucriston' ben' golje benač. <sup>6</sup> Jesucristw nan' bnežjw cuine' gote' neche da' mal da' goson yogo'loł benač, na' cate' bžin ža Diosen' bžie' bia', cana' bene' cont gosezeze benačen' čhe'. <sup>7</sup> Na' Diosen' gwleje' neda' cont naca' postlw čhe' na' cont chyixjue'eda' xtiže'. Choa' diža' li, bi chonlaža', le' naca' Criston' txen, gwleje'nda' cont chzejni'ida' bene' ca' bi zjanac bene' Israel diža' li čhe' cont yesejnilaže'ne'.

<sup>8</sup> Na' dan' čhe'nda' gac gate'teze chesedop chesežague' chesonxene' Diosen', chaclaža' bene' ca' yosoł güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' o yosošašlene' bene'. <sup>9</sup> Na' ca' nac no'ol ca' chesonxen Jesucriston', bi cheyala' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay. <sup>10</sup> San cheyala' yesebec yichjgaque' yesone' da' güen ca' chaclaže' Diosen' yeson yogo' bene' chesejnilaže'ne'. <sup>11</sup> Na' no'ol ca' lecce cheyala' nite' šize yosozenague' čhe bene' ca' chososed chosolo'ede' xtiža' Diosen', na' yesone' con da' yese'ene'. <sup>12</sup> Neda' bi chona' latje cont



no'ol ca' yosozejni'ide' bene' byo latje lagüe', na' neca chona' latje yesenabi'e bene' byo. Cheyala' yesenite' šize, <sup>13</sup>le cate' Diosen' bene' benachen' zgua'tec bene' Adánna' na' gwdechle bene' Evan'. <sup>14</sup>Na' cate' Satanás dan' chnabia' da' xigüe' ca' gwxoayaguen bene' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nan' beyaque' bene' güen da' xinj. <sup>15</sup>Perw na' la'czla' no'ol ca' chesežaglagüe' chesezan xi'ingaque', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle bene', na' še zjanite' chesone' can' chazlaže' Diosen' len yela' sina' da' ba brežjue' legaque'.

### Can' yeson bene' ca' yosogüia yesene'e yezica'chle bene' chesonxene' Diosen'

**3** De to diža' da' zaca' šejle'cho da' žan: "Bene' chesaclaže' yosogüia yesene'e yezica'chle bene' chesonxene' Diosen', chesaclaže' yesone' to da' güen, še ca'." <sup>2</sup>Na' bene' gwłane' gone' žin dan' nac ca' cheyala' soateze' gone' da' güen yogo' ža sin cbi gone' da' zaca' tilchone'. Cheyala' soa toz no'ol che', na' cheyala' gague' bene' yo'o xbab, na' gague' bene' chnabia' cuine' chone' da' güen, na' gague' bene' chon da' zej toli' cont bene' yoble yesape' le' bala'an. Cheyala' yebede' gwlebe' bene' liže', na' cheyala' gague' bene' chac chzejni'ide' xtiža' Diosen' binlo. <sup>3</sup>Bene' chžože bi gac gwłane' žinna'. Bi cheyala' gague' bene' yolao chdile chšaše'. Cheyala' gague' bene' šagüe' bene' chon güen len yezica'chle bene', na' bi cheyala' gague' bene' chon znia, neca selaže'chgüe' gone' gan mechw. <sup>4</sup>Na' cheyala' gague' bene' neze can' gone' cont xi'ine' ca' na' nochle bene' nita' liže' yosozenague' che' na' yesape' le' bala'an. <sup>5</sup>Le še bi nezde' nac gone' cont xi'ine' ca' yosozenagbe' che'

na' yesapbe' le' bala'an, bi gac gone' cont bene' chesedop chesežag chesonxene' Diosen' yosozenague' che'. <sup>6</sup>Bi cuejle bene' za' chzolao chejnilaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. <sup>7</sup>Na' bene' cuejle cheyala' soe' gone' cont bene' ca' bi zjanac txen yesenezde' chone' güen, le še gone' da' malen' yesene' bene' che' na' Satanásen' co'oyelan' le' gonche' da' malen'.

### Bene' ca' yeson žin bixjw

<sup>8</sup>Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaque' bala'an. Lecze cheyala' yesaque' bene' chesoe' diža' li da' šejle'cho, bene' bi zjayolagüe' chesezožde', na' bene' bi yesezelaže' yeseni'e che xšin Diosen' dan' yesone'na'. <sup>9</sup>Cheyala' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenezde' lo' yichjlažda'ogüe' chesone' can' chazlaže' Diosen'. <sup>10</sup>Na' cate' za' cuejle bene' ca' yeson žin bixjwna', le na'yane' can' chesonen', na' še gata'bia' chesonen' binlo bibi chesechoe', nachen' cuejle legaque'. <sup>11</sup>Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolağüe' sožde', san cuejle no'ol ca' yesenite' yesone' can' chazlaže' Diosen'. <sup>12</sup>Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. <sup>13</sup>Le še bene' ca' cheson žin bixjon' yesone' binlo dan' yo'o lo' na'gague' yesone', nach yesejni-

laže'chgüe' Jesucriston' sin cbi yesežebe', na' yezica'chle bene' yesape' legaque' bała'an.

**Da' chejni'icho che Diosen' dan' nono gwneze cana'**

<sup>14</sup> Chzoja' le' da' quinga da' cheyała' gonle la'czła' zoa' lez yob yida' gan' zon', <sup>15</sup> cont še šeda' ba nezd' nac cheyała' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocanē. Na' chio' chdop chžagcho chonxenchone' yo'o lo na'cho choncho cont chesombia' bene' diža' li che Diosen'. <sup>16</sup> Da' licze da' zaca'chgua dan' ba bzejni'i Diosen' chio'. Cana' nono gwneze da' quinga dan' bzejni'ide' chio' che Jesucriston', žan:

Diosen' bide' golje' benach,  
na' Spiritw che Diosen' blo'en naque' bene' güen juisyw.  
Na' bene' ca' zjanac angl che Diosen' bedesen'e le'.  
Na' bžin ža Diosen' bene' cont beyepe' yaba gan' yo'ochgua be'ni'.  
Na' bene' ca' cheso'e xtižen' ba goseyixjue'eden' len bene' že' nación zito', na' zan bene' že' lo yežlion' ba chesejle'e che'.

**Žin ža bał bene' yesebejyichje' diža' li che Diosen'**

**4** Na' Spiritw che Diosen' ba ben' diža' li cont šejni'icho žin ža cate' bał bene' yesebejyichje' diža' li che Diosen' dan' chejle'cho na' yesejle'e che bi da' yeson da' xigüe' ca' cont yesexoayaguen legaque'. <sup>2</sup> Da' xigüe' ca' yesonen cont nita' bene' yosozejni'ide' diža' güenlaže' da' siyen' bene', na' bene' ca' yosozejni'ide' diža' güenlažen' bibi yesacde' lo' yichjlažda'ogüe' caten' yeseziye'e bene'. <sup>3</sup> Yosožone' yosošagna' bene' na' yosožone' ye'ej gagwcho bał yela' guagw, la'czła' Diosen' bene' cont

zjade yela' guagw ca' cont chio' chonxencho Criston' na' nombia'cho diža' li chen' gagwchon na' güe'cho yela' choxclen che'. <sup>4</sup> Yogo' dan' ben Diosen' naquen güen na' bi naquen da' gue'echo, con še güe'cho yela' choxclen che' caten' gagwchon. <sup>5</sup> Na' nezecho guac gagwcho bite'teze yela' guagw, le ba gwna Diosen' naquen güen, na' güe'cho yela' choxclen che' cate' gagwchon.

**Can' gon Timoteo xšin Diosen'**

<sup>6</sup> Ca' nac bene' ljež chio' chonxencho Jesucriston', cheyała' gwzejni'ido' legaque' da' quinga ba gwnia' le' cont gacleno' legaque' can' chazlaže' Jesucriston', le gwleje' le' cont gwzejni'ido' bene'. Lecz gonen chačhlažo' še gwzejni'ido' bene' xtiža' Diosen' dan' chejle'cho, le naquen to diža' güen, na' ba bzenago' chen do yichj do lažo'. <sup>7</sup> Bi gwzenago' che diža' güenlaže' dan' chesaljlaže' bene' bi chesonxene' Diosen'. Ben byen soaczo' gono' can' chazlaže' Diosen'. <sup>8</sup> Nezecho cate' chda ni'a na'cho chaclenen cuerp chechon' late'. Perw na' cate' choncho can' chazlaže' Diosen', chaclenchen chio' cont zoa chbezcho binlo na'a na' lecz ca' cate' šjayzoacho len le' toli tocanē. <sup>9</sup> Can' ža to diža' dan' zaca' šejle'cho na' dan' zaca' gwzenagcho chen do yichj do laže'cho. <sup>10</sup> Na' cont choncho can' chazlaže' Diosen', da'nan' chonchguacho xšinen' na' chyo chchejlaže'cho cate' chzi'diža' bene' chio', le nezecho Diosen' zoe' toli tocanē na' zoa'cho lez gone' güen len chio'. Le' chaclaže' gwnežjue' yela' mban toli tocanē che yogo' benach, na' can' nacczen gone' len bene' chesejnilaže' Jesucriston'. <sup>11</sup> Da'nan' bzejni'i bene' da' ca' ba gw-nian' na' ben mandadw yosozenague' che yogo'czen. <sup>12</sup> Bi go'o latje yosoza' bene' le' šla'ale lagüe da' naco' bene' xcuide'. Len xtižo' na' len da' chono' ben güen cont yogo' bene' chesejnilaže'

Criston' yesape' le' bala'aṅ. Len xtižo' na' len da' chono' blo'e legaque' ca cheyała' yesacde' Diosen' na' bene' ljež-gaque', ca cheyała' yesenita'chache' yesejnilaže'ne' na' ca cheyała' yesaque' bene' laždao' xilaže'. <sup>13</sup>Na' na'a šlac bina' yida' da' yoble, gwlec yichjo' gwlabo' Xtiža' Diosen' dan' nyojen len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen. <sup>14</sup>Bi gatlažo' dan' gwlo'o Diosen' lo nao' gono' caten' go-seḡoa na' bene' blao ca' yichjon', bene' ca' chosogüia chesene'e ljež chio' chonxencho Diosen', bosozende' le' gwlej Diosen' gono' xšinen'.

<sup>15</sup>Cheyała' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen. <sup>16</sup>Na' gwsaco' can' soa cuezo' cont soachacho' gono' con can' chazlaže' Diosen' na' soachacho' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont šjayzoalenle Diosen' cate' žin ža.

### Can' cheyała' gon Timoteo len yezica'chle bene' chesejnilaže' Criston'

**5** Še no bene' byo gole chone' bi da' mal, bi tiło'ne', san gwneyoede' cuejyichjen', con ben xbab naque' xao'. Na' še no bene' xcuide' chone' bi da' mal, gwneyoede' cuejyichjen', con ben xbab naque' bene' bišo'. <sup>2</sup>Na' še no no'ol gole chone' bi da' mal, gwneyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwneyoede' cuejyichjen', con ben xbab naque' bene' zano'. Cheyała' gwsaco' cont gaco' bene' laždao' xilaže' len legaque'.

<sup>3</sup>Chio' chdop chžagcho chonxencho Criston' cheyała' gwnežjwcho da' cheseyažje no'ol ca' ba gosat bene'

chegaque' še da' li zjanaque' bene' chyažj chchine. <sup>4</sup>Perw še nita' no xi'ingaque' no xesoagaque', bzejni'ide' legaque' cheyała' yosonežjue' da' cheseyažje no'ol ca', le no'ol ca' ba bosogole' legaque', na' Diosen' chaclaže' yesone' güen len legaque' cont yosolo'e chesejnilaže'ne'. <sup>5</sup>No'ol ca' nono zoa bene' gwnežjw legaque' da' cheseyažjde' na' zjanaque' dogualje güezebe, yesenite' lez gaclen Diosen' legaque' na' do ža do yel yesenite' yesenabde'ne' gaclene' legaque'. <sup>6</sup>Perw no'ol güezeb ca' chesacde' yesone' con ca' žan chegaque', len Diosen' yichjlažda'ogaquen' naquen ca' che to bene' ba got la'czla' ne' zjambane'. <sup>7</sup>Ben mandaw neche bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tiłe legaque'. <sup>8</sup>Še no bene' bi chaclene' cont gata' da' chyažje bene' zjanac diaža che', ba bzoe' šla'ale xtiža' Diosen' dan' chejle'cho chen, na' malech chone' ca' bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o che'.

<sup>9</sup>Quinga nezdo' no no'ol güezeb ca' cheyała' gwchelo' le'e yiš cont bene' ca' chesedop chesežag chesonxene' Jesucriston' yosogüe'ej yosoguagüe'ne' na' yosonežjue' bichle da' cheseyažjde'. Cuejle no'ol gol ca' bene' ba gwde gayon iz, no'ole goc toze bene' che'. <sup>10</sup>Cuejle con no'ol ca' zjaneze bene' ba gosonchgüe' da' güen, ca no da' quinga: še bosgole' bi' che' binlo, še blebe' bene' liže', še goclene' yezica'chle bene' chesonxene' Diosen', še goclene' bene' ca' cheseyi chesezaque', o še ba bene' bite'tezechle da' güen.

<sup>11</sup>Bene' ca' chesedop chesežag chesonxene' Jesucriston' bi cheyała' yesego'o lo' na'gaque' yosogüe'ej yosoguague' no'ol güezeb xcuide' ca'. Le no'ol ca', gwžin ža yesaclaže'

yosyošagne'e da' yoble, <sup>12</sup>na' yesape' doła' še yesebejyichje' xšin Criston' dan' gosechebe' yesone'. <sup>13</sup>Na' lecze no'ol güezeb xcuide' ca' bi naquen güen gwco'olaochwne' yeselaže' to to liž bene', cont bi yesaque' bene' xagüed, na' cont bi yesaque' bene' güetob diža'. Bi yeselaže' to to liž bene' yesezi'diže' bi chac, le bi cheyała' yesone' dan' nac ca'. <sup>14</sup>Da'n'an' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont bene' ca' chesegue'ede' chio' yesene' chesone' da' mal. <sup>15</sup>Chnia' ca' le nita' bał no'ol güezeb xcuide' ca' ba gosebejyichje' Criston' na' chosozenague' che Satanásen'.

<sup>16</sup>Note'tez bene' chejnilaže' Criston', še nita' no'ol güezeb lo diaža chegaque', cheyała' yosonežjue'ne' da' yese'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyała' yesego'o lo na' bene' ca' chesedop chesežag chesonxene' Criston'.

<sup>17</sup>Na' ca nac bene' blao ba zjanchoj chosogüia chesene'e bene' ca' chesedop chesežag chesonxene' Criston' to to yež, še chesene'e bene' ca' binlo, da' xen cheyała' yesaxene', na' cheyała' gwnežjwchone' da' yesacbande'. Na' zaca'che' yesaxene' še cheseyixjue'ede' xtiža' Diosen' na' chosozejni'ide' bene' bi zejen. <sup>18</sup>Cheyała' yesaxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a goñ cont ca gagwba' cate' chlej chšošjba' trigon' neche choj xen'." Na' lecz nyojen žan: "Bene' güen žin cheyała' si' laxjue'."

<sup>19</sup>Bi gono' cuent cate' no bene' gagw xya che to bene' blao bene' nchoj chgüia chne'e bene' lježe' chesonxene' Criston' še bi zoa yeto bene' o yečhope bene' co' da'

bałi. <sup>20</sup>Na' še da' li ba bene' da' malen', cheyała' tiło'ne' lao bene' ca' chesedop chesežag chesonxene' Criston' cont yezica'chle bene' ca' yesežebe' yesone' da' malen' nac ca'. <sup>21</sup>Na' toze can' cheyała' gono' len note'teze bene', bitw nacho bał bene' gonxenchguachone' na' yebałe' gonchone' nacteze. Na' Diosen' len Xancho Jesucriston' na' len angl bene' ca' zjanchoj chesone' mandadw che' zjanezde' chona' mandadw gono' yogo' da' ca' ba gwnia' nga. <sup>22</sup>Bitw yob cuejo' bene' güia ne'e lježe' cont gague leno' gapo' doła' še ben' gwlejon' gone' da' mal. Gwsaco' cont bibi doła' gapo'.

<sup>23</sup>Na' dan' tolize chac li'o, bi ye'ejo' toze nis, san güe'ej late' güeje vino.

<sup>24</sup>Bał bene' nacbia' chesone' da' mal na' yogo'ze bene' zjanezde' can' chesonnen' la'czla' bina' žin ža yesezi'e castigw chen. Na' bał bene' chesone' da' malen' dan' ngaše' na' da' bi nacbia', perw žin ža gwlo'elaon. <sup>25</sup>Na' lecz ca' naquen len bene' ca' cheson da' güen, nacbia' še da' güenna' chesone', na' la'czla' gague nla' da' güenna' chesone', bi nacho yega'ancze bagaše'ze dan' chesonen'.

**6** Na' bene' ca' chesejnilaže' Criston', bene' zjanac esclavos, cheyała' yesacbe'ede' bene' ca' zjanaque' xan žin chegaquen' zjazaque' cont yosozenague' chegaque'. Cheyała' yesape' legaque' bala'an cont nono ne yela' ya' che Diosen', neca no ne che dan' chzejni'ichon'. <sup>2</sup>Bene' ca' zjanac esclavos, še xangaque' lecze chesejnilaže' Criston', bi cheyała' yesone' xbab bi yosozenague' chegaque' neche zjanaque' txen chesonxene' Criston', san nachle cheyała' yesone' žinna' do laže'che' na' cheyała' yesacde' xan žin ca' ca bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyała' yesone' na' gwneyoe bene' yosozenague' chen.

**Cheyała' soacho  
mbalaz len da' de checho**

<sup>3</sup>Nita' bene' chosozejni'ide' xbab chegacze' na' bi chososed chosolo'ede' diža' li che Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'. <sup>4</sup>Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'. <sup>5</sup>Con bi cheyož chedo chesedił chosošaše', le ba yo'o da' malen' lo' yichjlažda'ogüe' na' bi zjanombi'e diža' li che Diosen'. Con chesacde' yososed yosolo'ede' xtiža' Diosen' cont yesaque' bene' gwni'a. Bi gono' txen len ben' cheson ca'. <sup>6</sup>Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de checho. <sup>7</sup>Ga'alcho bla'cho yežlion' na' ga'alcho cate' yeza'cho. <sup>8</sup>Na' še de da' che'ej chagwcho na' še de xałana'cho da' chyažjecho, cheyała' soacho mba len da' ca'. <sup>9</sup>Bene' ca' chesezelaže' yesaque' bene' gwni'a chosozenague' che da' malen' na' cheselažoe' lo' na' gwxiyen'. Chesezelaže' da' zan da' gata' chegaque' da' yesede chen, na' da' ca' chesezelaže' chesonen mal len legaque' na' žin ža yesebiyae'. <sup>10</sup>Bene' chzelaže' mechw nach chzenague' che bite'teze da' mal. Na' nita' bene' ba gosebeyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaque'na'.

**Cheyała' cuec yichj  
Timoteon' gone' xšin Criston'**

<sup>11</sup>Na' ca nac le' Timoteo, bi gono' can' cheson bene' ca', le Diosen' gwleje' le'

cont gono' xšinen'. Cuec yichjo' gono' da' zej to licha, ben con can' chazlaže' Diosen', soachacho' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'. <sup>12</sup>Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocanē, le Diosen' gwleje' le' šjayzo' len le', na' ba bi'o diža' lao bene' zan žo chejnilažo'ne'. <sup>13</sup>Dios ben' chnežjo yela' mban che yogo' benačen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaque' zjanezde' chona' mandadw <sup>14</sup>gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble. <sup>15</sup>Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'. <sup>16</sup>Totec Dios nan' bi nacho žin ža gate'. Na' catec yo'ochgua be'ni' gan' zoen', nono gac bigue' gala'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyała' gonxenchone' le chnabi'e toli tocanē. Na' can' gonšcaczcho.

<sup>17</sup>Na' ca nac bene' ca' chesejnilaže' Criston', bene' zjanac bene' gwni'a lo yežlio nga, gože' bi yesaque' bene' ya'laže'. Na' yo'o legaque' bi yesone' xbab yesenite' mba lagüe zjanaque' bene' gwni'a, le yob te che bite'tez da' de chegaque'. Yo'o legaque' yesezoe' lez yesenite' mbalaz len Dios ben' zoe' toli tocanē. Toga le' chone' chio' yogo' da' güen da' chyažjecho na' da' chbecho. <sup>18</sup>Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one'

yesezande' da' de chegaque' cont yesac-  
lene' bene' na' yesebede' yesone' ca'. <sup>19</sup>Še  
yesone' ca', na' gaquen ca to yeļa' gwñi'a  
da' bi te chen, le Diosen' chaclaže' yesac-  
lene' bene', na' gone' cont yesenite' mba  
cate' šjasyenite' len le' toli' tocaņe še  
yesone' ca'.

**Pablon' chzože' carten'**

<sup>20</sup>Timoteo, gwlecchgua yichjo' che  
yogo' dan' ba bzejni'i Diosen' le'. Bi

gwzenago' che bene' chosošalj diža' da'  
bibi zaca', ne che dan' chesene bene'  
dan' bi zej lebe len diža' li che Diosen'.  
Chesonlaže' chesene' cheso'e diža' sina'.  
<sup>21</sup>Bene' bosozenague' che dižan' nac ca'  
ba gosebejyichje' diža' li che Diosen' da'  
chejle'cho na' bich chesejnilaže'ne'.

Chnabšca' gaclen Diosen' le'. Da'  
na'zen' chzoja'.

## CART GWCHOPE DAN' BZOJ POSTLW SAN PABLO CHE TIMOTEO

### Pablon' chzoje' Timoteon'

**1** Neda' Pablo naca' postlw che Jesu-  
criston', le Diosen' gwnalaže' gwsele'  
neda' chyixjue'eda' can' gwne' gone' cont  
note'teze bene' yesejnilaže' Jesucriston'  
gata' yela' mban čhegaque' toli tocaņe.  
<sup>2</sup>Na' chzoja' le' Timoteo, ba nona' le'  
ca xi'ina'. Chnaba' lao Xacho Diosen' na'  
lao Xancho Jesucriston' yesaclenšque' le'  
na' yesyeyaše'laže'de' le', na' yesonšque'  
ca so' binlo len xbab da' yo'o lo'  
yichjlažda'oguoņ.

### Cheyała' güe'cho diža' che Jesucriston'

<sup>3</sup>Chonxena' Diosen' do yichj do laža'  
can' goson da' xozxta'ogua', na' nežda'  
lo' yichjlažda'ogua' chona' can' chazlaže'  
Diosen'. Na' yogo' ni'a cate' choľ güiža'  
Diosen', lagüe ža na' šeže'le, choa' yela'  
choxcen che dan' chonon'. <sup>4</sup>Chjaza'laža'  
gwchežo' cate' beza' gan' zon', na' zelaža'  
le'e lježcho da' yoble, le yebechgüeda'  
še ca'. <sup>5</sup>Na' chona' xbab can' chejnilažo'  
Diosen' do yichj do lažo' can' zgua'tec  
goson taguo' Loida na' xna'o Eunice, na'  
nežda' lec ca' chono' le' na'a.

<sup>6</sup>Da'nan' chņeyoeda' le' da' yoble,  
güe'lažo' gono' da' gwlo'o Diosen' lo'  
nao' gono' caten' gwxoā na'ton' yichjon'.  
<sup>7</sup>Diosen' bene' chio' Spiritw čhen' zoan  
lo' lažda'ochon', na' Spiriton' chacle-  
nen chio' cont bi žebcho, na' chonēn  
chio' yela' guac cont goncho can' cha-  
zlaže' Diosen'. Lecze chaclenen chio'  
cont chaque lježcho na' cont choncho  
da' zejen na' güe'cho diža' da' zaca'.  
<sup>8</sup>Da'nan' chņeyoeda' le', bi yeto'edo'  
chixjue'edo' xtiža' Xancho Jesucriston',  
na' neca yeto'edo' chia' la'czla' dia' ližya

nga da' chzenaga' che Jesucriston' na'  
chyixjue'eda' xtižen'. Cheyała' gono' can'  
chonān' na' gwyo gwchejlažo' bi da'  
gac chio' cate' chixjue'edo' diža' güen  
čhen', le zoa Diosen' chaclene' chio' len  
yela' guac čhen'. <sup>9</sup>Diosen' ba nonē' chio'  
yela' mban toli tocaņe na' gwleje' chio'  
cont naccho lo ne'en. Na' bene' ca' da'  
nži'ilaže'de' chio', gague neče bi da'  
güen bencho. Cate' biņa' xe yežlion'  
bsi'e xņeze seľe' Jesucriston' cont gac-  
lene' chio'. <sup>10</sup>Na' na'a Diosen' ba blo'e  
nži'ilaže'de' chio', le ba gwseľe' Jesu-  
criston' ben' chon yela' mban čechon'  
toľi tocaņe. Na' žin ža gwcuez Jesu-  
criston' yela' goten' na' gone' cont chio'  
chejle'cho diža' güen čhen' šjayzoacho  
len le' toľi tocaņe.

<sup>11</sup>Na' Diosen' gwleje' neda' naca'  
postlw che' na' gwseľe'nda' cont chy-  
ixjue'eda' diža' güen che Jesucriston' na'  
chsd chlo'eda' bene' bi zjanac bene' Is-  
rael. <sup>12</sup>Na' dan' chona' ca', chžaglagua'  
da' quinga chac chia', perw bi cheto'eda'  
čhen, le nombi'a Diosen' ben' chejnilaža'.  
Ba ben cuina' lo ne'e, na' nežda' nape'  
yela' guac gone' cont ne' soačhača' še-  
jnilaža'ne' caten' žin ža yid Jesucriston'  
da' yoble.

<sup>13</sup>Soačhačo' gwzejni'ido' bene' diža'  
zaca' can' ba bendo' chzejni'idan', na'  
soatezo' šejnilažo' Jesucriston' na'  
gacdo'ne' do yichj do lažo'. <sup>14</sup>Be' latje  
gaclen Spiritw che Diosen' le' cont  
soatezo' gwzejni'ido' bene' diža' li da'  
bsed blo'eda' le'e, le zoa Spiriton' lo'  
lažda'ochon'.

<sup>15</sup>Neždo' Figelo na' Hermógenes len  
yezica'chle bene' migw chia' ca' že' dis-  
tritw che Asia ba gosebejyichje'nda'.  
<sup>16</sup>Na' chnaba' gaclenšca Xancho Diosen'  
Onesíforo len bene' lo' yo'o che', le bi  
beto'ede' chia' da' dia' ližya nga, san  
zan ni'a bedetipe' laža' nga. <sup>17</sup>Cate' bide'  
Roma nga, bene' byen beyiljue' neda'  
con cate'ch beželde'nda'. <sup>18</sup>Neždo' lecze

da' lan bene' goclene' neda' cate' gw-  
zoa' Efeso. Chnaba' lao Xancho Diosen'  
gacšca güen che' cate' žin ža yid Xancho  
Jesucriston' da' yoble.

### Cheyała' gwyo gwčhejcho len da' saca'zi'cho

**2** Xi'indagua', chnaba' soačach'o'  
šejnilažo' Jesucriston' lagüe' da'  
nži'ilaže'de' le'. <sup>2</sup>Na' yogo' da' ba bendo'  
gwdixjue'eda' lao bene' zan, da' ca'  
bsed blo'en bene' yosozenag čhen do  
yichj do laže'gaque', bene' ca' guac  
yosozejni'iden' bene' yoble.

<sup>3</sup>Na' byo bčhej len da' saca'zi'o šlac  
chono' xšin Jesucriston'. Goc ca to sol-  
dadw bene' bi chžeb bi gac che'. <sup>4</sup>Neze-  
cho bene' zej yela' soldadon' bi chac gon  
xšine' šlac zeje' lao gwdila', san chbejy-  
ichjen' cont gone' bin' ža ben' nac xan  
soldadw ca'. <sup>5</sup>Na' nezecho bene' chja'ac  
lo güitj cheyała' yesone' cayanen' ba  
bosoxi'e yesone' cate' yeseyitje', cont gac  
yesezi'e da' yesone' gan. <sup>6</sup>Na' leze neze-  
cho bene' chelale chone' žin yiçe' chzi'e  
da' nechw da' chbia lao coseš čhen'. <sup>7</sup>Ben  
xbab che da' quinga ba gwnia' le', na'  
Xancho Jesucriston' gaclene' le' šejni'ido'  
yogon'.

<sup>8</sup>Ben xbab che Jesucristw ben' beyas  
bebane' ladjo bene' guaten', ben' nac  
xi'in diaža che da' rey Davin'. Che len'  
chzejni'ida' cate' chyixjue'eda' diža' güen  
che'. <sup>9</sup>Na' da' chyixjue'eda' diža' güen  
čhen' chosoči chososaque'nda' na' dia'  
lišya nga ca to no bene' mal juisyw.  
Perw nezda' bibi gac yesone' cont bi gas  
lalje xtiža' Diosen' lo yežlion'. <sup>10</sup>Da'nan'  
chzanlaže' cuina' gac bi da' gac chia'  
lagüe da' chyixjue'eda' xtiža' Diosen', le  
chaclaža' yezica'chle bene' ba gwleje'  
cont gata' yela' mban čhegaque' toli to-  
cane yesejnilaže' Jesucriston', na' žin ža  
šjasyezoe' len le' toli tocane gan' chac da'  
güen juisyw. <sup>11</sup>Diža' quinga zjanaquen  
da' li:

Še chejnilaže'cho Criston' ben' got neče  
xtola'chon',

chio' lecze naccho ca to bene' guat len  
da' xinjen' cont bich gonchon.

Na' con can' bosban Diosen' Criston' ladjo  
bene' guaten',

lecze ca' bocobe' yichjlaždao' chio' cont  
šjayzoacho txen len le'.

<sup>12</sup>Na' še soačach'cho šejnilaže'chone'  
bite'teze chac čecho, lecze gone'  
cont nabia'cho txen len le'.

San še cuejyichjcho Criston', lecze le'  
cuejyichje' chio'.

<sup>13</sup>Na' la'czla' še chio' bi goncho can' gw-  
nacho goncho,

Diosen' zoe' chone' con da' ba gwne'  
gone',

le Diosen' bi gac gwše'e da' ba nžie' bia'  
gone'.

### Ben' chon xšin Diosen' binlo

<sup>14</sup>Bi go'o latje yesanlaže' bene' ca'  
chesejnilaže' Jesucriston' da' ca' ba  
bzejni'ida'. Na' yosnisdo' legaque'  
naquen mal len Xancho Diosen' yesedił  
yosošašlen lježe' che bize diža'. Bibi  
zejen yesone' ca', le cate' bene' chesende'  
chesedił chosošaše', chonen cont bi  
yesejle'e che xtiža' Diosen'. <sup>15</sup>Ben con  
ga zelao saque'do' cont yebe Diosen'  
can' chonon' na' cont bi gacdo' zto'  
lagüen' can' chono' xšinen'. Gwsed  
gwlo'edo' xtižen' to liča. <sup>16</sup>Bi gono'  
txen len bene' chesoe'chgüe' bite'teze  
diža' da' bibi zaca', diža' da' bibi zejen  
len Diosen', le dižan' zjanac ca' chziyen'  
bene' yesonche' da' mal. <sup>17</sup>Dižan' nac  
ca' chžiyain' bene' ca to yižgüe' mal.  
Can' ba goc che Himeneo na' Fileto,  
<sup>18</sup>gosebejyichje' diža' li da' chzejni'in  
che Criston'. Chososed chosolo'ede'  
chesene' bi soacho lez žin ža yebancho  
ladjo bene' guaten', le chesene' ba gwde'  
che da' ca'. Na' bal' bene' ba chesejnilaže'  
Criston' chesacžejlaže' na'a neče xtiža'  
bene' ca'. <sup>19</sup>San chio' zoačach'cho



chzenagcho diža' li che Criston' na' Diosen' chone' cont bi chbejyichjchon. Da'nan' zaca'lebcho ca to lene yo'o da' nac da' gual. Na' nyojczje Xtiža' Diosen' žan: "Diosen' nežde' no bene' zjajo'o lo ne'e." Na' leczje nyojen žan: "Note'tez bene' že' chejni-laže' Xancho Diosen', cheyała' cuejyichje' bich gone' da' mal."

<sup>20</sup> Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Lecze de yeso' xguag de gona', na' de no batia na' bichle de yag da' chesonen žin da' bitec zjazaca'. <sup>21</sup> Can' naquen len chio', note'tezcho še cuejyichjcho da' malen', nach Xancho Diosen' gwchine' chio' neche goncho da' zan da' güen da' chaclaže' goncho. Na' še goncho ca', saca'lebcho ca to tas o to xguag de oro da' zaca'chgua.

<sup>22</sup> Na' ca nac le', cheyała' cuejyichjo' bite'teze da' mal da' chzelaže' lažda'oguo' gono', da' ca' chesezelaže' note'teze bene' güego' yesone'. Bey-iljwlaže' nac gono' cont gaco' bene' güen len Diosen' na' cont soačhačo' šejni-lažo'ne', cont gacdo' Diosen', na' cont soa cuezo' binlo len bene' lježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'. <sup>23</sup> Bi gono' txen len bene' bi chesejni'ide', bene' chosošaše' cheso'e diža' da' bibi zejen, le xtiža'gaquen' chonen ga chesacyož bene'. <sup>24</sup> Chio' choncho xšin Diosen' bi cheyała' tile gwšašlencho bene'. Cheyała' gaccho bene' šagüe' len yogo'ze bene', cheyała' nezecho naquen' gwzejni'icho legaque' che Diosen', na' cheyała' gapcho yela' chxenlaže' len legaque'. <sup>25</sup> Na' cate' güe'cho consejw che bene' bi chesaclaže' yosozenague' diža' li che Criston', cheyała' güe'lencho legaque' diža' šagüe', na' cuezcho gaclen Diosen' legaque' yosoša' xbab chegaquen' cont yosozenague' che diža' li chen'. <sup>26</sup> Can' goncho cont Diosen' gwnežjue' legaque' to xbab šagüe' na' yesyechoje' lo

na' Satanás dan' chnabia' da' xigüe' ca', le chonen cont nite' chesone' con can' chazlažen'.

### Naquen' yeson bene' cate' ba zoa yid Xancho Jesucriston' da' yoble

**3** Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. <sup>2</sup> Bene' zan yesonxen cuingaque', na' zane' yesebec yichje' gata' da' zcha'o xmechwagaque'. Zane' yeso'e diža' ca güenpa' chesone' na' yesaque' bene' ya'laže'. Yeseney'e che Diosen'. Bi yosozenague' che xaxna'gaque'. Bi yeso'e yela' choxcen che Diosen' na' bi yesape' le' bala'an. <sup>3</sup> Bi yesacde' bene', bi yesyezi'xen che lježe', yesene' mal che bene' yoble, con yesonteze' bite'teze da' mal da' žan chegaque', yesacchgüe' bene' znia, na' yesegue'ede' bite'tez da' nac da' güen. <sup>4</sup> Yosode lježgaque' lo na' bene' chesegue'ede' legaque', bi yesežebe' yesone' bite'ze da' mal, yesone' xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'. <sup>5</sup> Lecze da' zan da' yesone' cont yesaque' bene' chesonxenchgüe' Diosen', perw bi soa yela' guac che Diosen' len legaque'.

Bi gono' txen len bene' ca' cheson da' ca' ba gwnian'. <sup>6</sup> Bene' ca' cheson ca' chja'aque' liž no'ole bene' chesejle'daze', na' chesonlede' legaque' len diža' da' cheso'e. No'ol ca' zjadechgua xtoła'gaque', le chesonteze' da' mal can' ža lo' lažda'ogaquen'. <sup>7</sup> No'ol ca' chosozenague' che note'teze' že' gwzejni'ide' legaque', perw na' bi chžin ža yesejni'ide' diža' li che Diosen'. <sup>8</sup> Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaque', na' ca'czen' nita' bene' gwxiye' na'a chesegue'ede' diža' li che Diosen'. Nchoł yichjlažda'ogaque' yela' güen da'

mal čhegaquen', na' gague da' li chese-  
jnilaže' Diosen'. <sup>9</sup>Bi gac yesonlede' bene'  
sša, le yob gac čhegaque' can' goc čhe  
da' Janes na' da' Jambres, žin ža cate'  
yezica'chle bene' yesacbe'ede' chosoze-  
jni'ide' clele yela' bi chejni'i čhegaque'.

**Consejw da' zelagüe' da'  
bnežjw Pablon' Timoteon'**

<sup>10-11</sup>Na' le' Timoteo, nezczedo' can'  
ba bzejni'ida' le' na' can' zoa' chona' da'  
güen. Nezdó' chi' yichja' gona' yogo'lol  
da' ža Diosen'. Nezdó' zoachacha' chejni-  
laža' Diosen' bite'tez da' chac čhia'. Na'  
nezdó' napa' yela' chxenlaže' len ljež  
benacha' na' zoacza' chacda' legaue'.  
Nezdó' bi chbejyichja' xšin Diosen' da'  
chona', la'czla' da' zan da' ba bosochi  
bososaca' bene' neda'. Na' nezdó' da' ca'  
gosonde' neda' cate' gwzoa' ciuda Antio-  
quía na' cate' gwy'a a yež Iconio len yež  
Listra, na' can' gwdi' gwxcaca'. Na' nezdó'  
Xancho Jesucriston' bosle' neda' lo yogo'  
da' ca' da' goc čhia'. <sup>12</sup>Da' li yesenita'  
bene' yosochi yososaque' note'tez chio'  
chejnilaže'cho Cristo Jesúsén', chio' chi'  
yichjcho chzenagcho čhe'. <sup>13</sup>Bene' mal  
bene' güexoayag ca' šja'acze' yesonche'  
da' xinjen', yeseziye'e bene' na' lecze  
yesejle'e čhe diža' güenlaže' da' yesoe'  
bene' yoble.

<sup>14</sup>Na' le' Timoteo, cheyala' soachacho'  
gwzenago' čhe da' ca' chejni'ido' čhe  
Criston'. Nezdó' naquen diža' li, le bze-  
jni'iton' le'. <sup>15</sup>Cate' nactio' bidao' ba  
nombi'o Xtiža' Diosen' da' nyojen. Na'  
Xtiže' nan' chzejni'in chio' cheyala' šejni-  
laže'cho Cristo Jesúsén' cont gata' yela'  
mban čhecho toli tocané. <sup>16</sup>Cuin Diosen'  
bzejni'ide' bene' ca' bosozoj Xtižen' cont  
bosozoje' xbab čhen'. Da'nán' doxen  
Xtiža' Diosen' dan' nyojen zaca'chguan  
da' chzejni'in chio' čhe Diosen', chdilén  
chio' cate' choncho da' xinj, na' chzejni'in  
chio' nac goncho cont na Diosen' chon-

cho da' güen. <sup>17</sup>Na' chio' chejnilaže'cho  
Diosen', Xtižen' chzejni'in chio' yogo'lol  
da' cheyala' nezecho cont soacho goncho  
yogo' da' güen.

**4** Yid Xancho Jesucriston' da' yoble  
cont gone' yela' justis čhe yogo'  
benach, bene' ne' zjamban lente bene'  
ba gosat, na' caten' yide' da' yoble  
nach solao nabi'e yežlio nga. Na' Tim-  
oteo, Diosen' len Xancho Jesucriston'  
zjanezde' chona' mandadw gono' da'  
quinga: <sup>2</sup>Chixjue'edo' xtiža' Diosen' cate'  
nlatjo' na' cate' chacdo' bi nlatjo'. Be'len  
bene' diža' cont yesenezde' chesone'  
da' xinj, gwdi' legaue' čhe da' malen'  
chesone' cont yesyetinjden', na' gwdap  
yela' chxenlaže' bzejni'ide' da' cheyala'  
yesone'. <sup>3</sup>Gwžin ža cate' bi yesaclaže'  
bene' yosozenague' xtiža' Diosen' da'  
chzejni'icho da' naquen da' li, na' yoso-  
tobe' bene' yosozejni'ide' legaue' diža'  
yoble da' yesazlaže' legacze'. <sup>4</sup>Yesebejy-  
ichje' bich yosozenague' čhe diža' lin' na'  
yosozenagche' čhe diža' da' chesaljlaže'  
bene'. <sup>5</sup>Perw ca naco' le', cheyala' gaco'  
bene' yo'o xbab, na' gwdap yela' chxen-  
laže' len yogo'te da' sacazi'o, na' soatezo'  
go'o diža' güen čhe Jesucriston' do yichj  
do lažo'. Ben yogo' da' gwlo'o Diosen' lo  
nao' gono'.

<sup>6</sup>Na' ca nac neda', ba zoa yesote' neda',  
da' li ba chžin ža šjayzoa' len Diosen'.  
<sup>7</sup>Na' chebeda' guac nia' do yichj do laža'  
ba gwdi'llena' da' chgue'e Diosen'. Ba  
bena' yogo'lol da' gwlo'o Diosen' lo na'  
gona' na' ba gwzoachacha' chejnilaža' Je-  
sucriston' na' ne' zoachachcza'. <sup>8</sup>Na' cate'  
šjayzoa' len Diosen', gone' cont soa' mba  
da' bena' güen šlac mbana'. Xancho Je-  
sucriston' zeje' to licha, na' cate' žin ža  
čhoglagüe' nac gac čhe yogo'lol bene',  
gague neda'zen' gone' soa' mba, san  
yogo' nochle bene' chesyebede' chese-  
beze' baten' yide' da' yoble, lecze gone'  
cont legaue' yesenite' mba.

**Da' chaclaže' Pablon' gon Timoteon'**

<sup>9</sup>Ben byen con ga zelao saque'do' yob yido' nga. <sup>10</sup>Ben ca', le Demas ba gwlejičhje'nda' na' ba zjayde' yež Tesalónica da' chi'chgua yichje' bin' gata' che' lo yežlio nga. Na' Crescente ba zeje' Galacia na' Titon' ba zeje' Dalmacia. <sup>11</sup>Yetoga Lucas nga'anlen neda' nga. Na' chešco' Marcos cate' yido', cont gaclene' neda' len xšin Dios da' chona'. <sup>12</sup>Ca nac Tíquicon', ba gwseła'ne' ciuda Efeso. <sup>13</sup>Na' chaclaža' goxo' xadon čhia' da' bocua'ana' yež Troas liž Carpo cate' yido', na' lecz goxo' libr ca', na' da' žialaoch goxo' yid ca' da' ba zjanyoj.

<sup>14</sup>Alejandro bene' güechach yan' ba benchgüe' mal len neda'. Xancho Diosen' gwnežjue' le' castigw che da' malen' bene'. <sup>15</sup>Na' gwsaco' len le', le chonchgüe' clele len xtiža' Diosen' da' chyixjue'echo.

<sup>16</sup>Cate' bosodie' neda' lo na' justis ca' da' nechw, nono gwzoo no gaclen neda', yogo' bene' ca' godca' yesaclen neda' gosebejičhje'nda'. Diosen' yezi'xene' chegaque' da' bi

gosaclene'nda'. <sup>17</sup>Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yela' goten'. <sup>18</sup>Na' nezda' yoslacze Xancho Jesucriston' neda' lo yogo' da' mal da' gac čhia', na' guaclencze' neda' šlac žin ža šjayzoalena'ne' gan' zoe' chnabi'e. Cheyala' gonxenchwne' toli tocaņe. Can' gonščaczcho.

**Pablo chguape' tiox yeto čhope' na' chnablaže' gaclen Diosen' legaque'**

<sup>19</sup>Gwguapšco' tiox Prisca na' Aquila na' lecz ca' bene' lo' yo'yo' che Onesíforo. <sup>20</sup>Erasto bega'ane' ciuda Corinto, na' bocua'ana' Tróximo yež Mileto, le gocšende'. <sup>21</sup>Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnižaže' Jesucriston' nga chosoguape' le' tiox.

<sup>22</sup>Chnaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

## CART DAN' BZOJ POSTLW SAN PABLO ÇHE TITO

### Pablon' bzoje' cart nga

**1** Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejni-laže'ne', cont yeseņezde' can' ža diža' li che Diosen'. Na' diža' li čhen' chzejni'in can' goncho da' chazlaže', <sup>2</sup> na' chzejni'in zoacho lez šjayzoacho len Diosen' toli to-cane. Za' xe yežlion' Diosen' gwne' bene' yesejni-laže' le' šjasyenite' len le' toli to-cane, na' Diosen' bi chonlaže' bite'teze da' že'. <sup>3</sup> Na' na'a ba chac da' bžie' bia' gac da' ba chzejni'ida' bene' xtižen', le Dios ben' none' yela' mban checho toli to-cane gwlo'e lo na' chyixjue'eda' bene' xtižen'. <sup>4</sup> Chzoja' le' Tito, naco' ca dogualje xi'ina' da' bzejni'ida' le', na' naccho txen chejni-laže'cho Jesucriston'. Xacho Diosen' na' Xancho Jesucriston' ben' none' yela' mban checho toli to-cane yesaclenšque' le'e na' yesyeyaše'de' le'e na' yesone' cont soa cuezle binlo len xbab chelen'.

### Da' chon Titon' gan' nzi' Creta

<sup>5</sup> Cate' boca'aṇa' le' gan' zoa yežlio da' nzi' Creta dan' chi' lo nisaon', gw-nia' gwzožo' gono' dan' chona' cate' gw-zoa' na', to to yež cuejo' bene' blao bene' yosozejni'i na' yosogüia yesene'e yez-ica'chle bene' chesejni-laže' Jesucriston'. <sup>6</sup> Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol che', še xi'ine' ca' chesejni-laže' Criston', na' še bi zjanaque' bene' chesyedabaga', san chosozenague' cont bi zjalaže' chesone' da' xinj, ca bene' nac ca' cheyała' cuejo' güia na' lježe'. <sup>7</sup> Cate' cuejo' bene' co' Diosen' lo ne'e güia ne'e yezica'chle bene' chesejni-laže' Jesu-

criston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw. <sup>8</sup> Bene' cuejo' cheyała' gaque' bene' chbede' chlebe' bene' zito' ližen'. Cheyała' gaque' bene' zoateze' chone' da' güen na' bene' chon xbab, bene' chon da' zej to liča, bene' chon da' chazlaže' Diosen' na' bene' chon con ga zelao chzaque'de' cont chone' bi da' ža Diosen'. <sup>9</sup> Cheyała' gaque' bene' zoachache' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chachlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yeseņezde' cle-len' chesone'.

<sup>10</sup> Chnia' gono' ca', le nita' bene' zan bene' Israel gualaž chia' na' yebał bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', con chesonlede' bene'. <sup>11</sup> Na' da' zjachi' yichjgaque' yesone' gan mechw, da'nan' chosozejni'ide' da' zej clele. Cheyała' gonle cont yesenite' šize bich yosozejni'ide' diža' güenlažen', le clelen' chesone'. Na' bene' zan len bene' lo' yo'o čegaque' chesacžejlaže' che xtiža' Diosen' neče xtiža'gaquen'.

<sup>12</sup> Cana' gwzoa to bene' gwneya'a, goque' bene' Creta, na' gwne' che bene' gualaž che' ca': "Bene' Creta bate'teze zjanaque' bene' güenlaže' na' zjanaque' ca bež znia' yela' güen da' xinj čegaquen'. Lecze zjanaque' bene' lia na' bene' xagüed." <sup>13</sup> Na' da' li can' gw-nen'. Da'nan' tiło' legaque' che da' xinjen' chesonen' cont nita'chache' yesejle'e xtiža' Criston'. <sup>14</sup> Gono' ca' cont bich yosozenague' che diža' güenlažen' chesaljšaže' bene' Israel gualaž chia' ca',

na' nēca yosozenague' che nochle bene' ba gosebeyichje' diža' li che Diosen'.

<sup>15</sup>Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca nac bene' yichjlaždao' mal ca', bene' bi chesejnilaže' Criston', bibi de da' naquen da' xilaže' len legaue'. Chesone' xbab mal, na' bibi de cheseza'laže' cate' chesone' da' xinjen'. <sup>16</sup>Chesene' zjanombi'e Diosen', perw nacbia' bi zjanombi'ene', le chesonteze' da' xinjen'. Chesone' da' chgue'e Diosen'; zjanaue' bene' güedenag len xtižen' na' bi chesac yesone' da' güen.

### Xtiža' Diosen' da' chsed chlo'echo bene' naquen güen

**2** Na' le', cheyała' gwzejni'ido' bene' yesone' can' ža diža' li che Diosen'. <sup>2</sup>Bzejni'i bene' byo gol ca' bi yesezožde', san yesenite' cont bene' yezica'chle yesape' legaue' bala'an. Bzejni'i legaue' to toe' cheyała' yesenabia' cuine' cont yesenite' yesone' da' güen, na' bzejni'i legaue' cheyała' yesenita'chache' yesejnilaže' Diosen'. Cheyała' yesacde' bene' na' yesape' yela' chxenlaže' bite'teže da' chac. <sup>3</sup>Leče ca' bzejni'i no'ol gole ca' cont yesenite' yesonxene' Diosen', na' bi yesene' che bene', nēca yesezožde'. Cheyała' yesenite' yesone' da' güen cont yeseneže bene' yezica'chle can' cheyała' yesone'. <sup>4</sup>Na' no'ol gol ca' cheyała' yosozejni'ide' no'ol xcuide' ca' yesenite' binlo len bene' che to toe' na' yesacde' legaue' len bi' chegaue' ca'. <sup>5</sup>Na' yosozejni'ide' legaue' cont to toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaue' binlo, yesaque' bene' šagüe' na' yosozenag to toe' che bene' chegaue'. No'ole xcuide' ca' cheyała' yesone' güen

can' ba gwnian' cont nono ne mal che xtiža' Diosen'.

<sup>6</sup>Na' leče cheyała' neyoedo' bene' byo xcuide' ca' cont to toe' yesenabia' cuine' na' yesone' da' cheyała' yesone'. <sup>7</sup>Na' le', bite'teže da' gono', ben con da' nac güen cont yesacbe'e bene' yoble naquen' cheyała' yesone'. Cate' chsed chlo'edo' bene', bzejni'i legaue' do lažo', benen cont nacbia' chapo' Diosen' bala'an. <sup>8</sup>Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyeželde' bi da' mal yesene' checho.

<sup>9</sup>Gož bene' güen žin ca' yosozenague' che xangaquen' na' yesone' bite'teže da' yesene' sin cbi yosyoži'e xtiža'gaquen'. <sup>10</sup>Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesacbe'ede' güenna' nac xtiža' Diosen', Dios ben' none' yela' mban checho toli tocanē.

<sup>11</sup>Diosen' nži'ilaže'de' chio' benač na' ba blo'e chaclaže' gone' yela' mban toli tocanē che yogo'cho. <sup>12</sup>Na' da' none' ca' chzejni'in chio' cheyała' cuejyichjcho yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyała' soa cuezcho nābia' cuincho cont goncho da' nac da' zaca'. Na' cheyała' goncho da' zej to liča; na' cheyała' soacho gonxenchō Diosen' yežlio nga. <sup>13</sup>Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naue' Dios checho ben' chonxenchō na' ben' none' yela' mban checho toli tocanē, na' zaca'chgüe'. <sup>14</sup>Len' bnežjw cuine' neče chio' cate' gosote'ne' cont bnitlagüe' xtoła'chon', na' beya' beyibe' yichjlažda'ochon' len da' malen' cont none' chio' ca' xi'ine'. Na' bene' ca' cont yebecho goncho da' güen.

<sup>15</sup> Can' cheyała' gwzejni'ido' bene'. Na' cheyała' gono' chach laže' yesone' da' güen na' tilo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaque'. Bi go'o latje yosozoe' le' to šla'ale.

### Can' cheyała' gon chio' chejnilaže'cho Jesucriston'

**3** Da' yoble yozzendo' bene' chesejnilaže' Jesucriston' cheyała' yosozexjwyichje' yosozenague' che justis ca' na' che bene' gwnabia' chegaque' ca' na' bate'teze cheyała' yesone' da' güen. <sup>2</sup>Yozzendo' legaque' bi cheyała' yesene' mal che note'teze bene'. Bi cheyała' yesedił yosošaše', san cheyała' yesaque' bene' šagüe' na' yesape' yela' chxenlaže' len yogo'lol bene'.

<sup>3</sup>Chio' lecze bi gwzejni'icho cana' na' bencho güedenag len Diosen'. Gwejl'e'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e' bene' chio' na' bgue'e' lježcho. <sup>4</sup>Perw bžin ža Dios ben' none' yela' mban checho toli tocane blo'ede' chio' catec bene' šagüe' naque' na' catec chacde' chio' benach. <sup>5</sup>None' chio' yela' mban toli tocane gague neche bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzolao chejnilaže'chone', na' Spiritw chen' bocoben yichjlažda'ochon'. <sup>6</sup>Diosen' gwsele' Spiritw chen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocane gwnabde'ne' selen'. <sup>7</sup>Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocane.

<sup>8</sup>Da' ca' ba gwnia' nga zjanaquen da' li, na' gono' byen yosozenag bene' ca'

gwzejni'ido' chen. Le bene' ca' ba chesejnilaže' Diosen' cheyała' yesebec yichjgaque' yesone' da' güen. Na' da' quinga ba gwnia' zjazaca'chguan na' yesaclenen note'teze bene'. <sup>9</sup>Perw bi gono' txen len bene' chesedił chosošaše' che bize diža' da' bi zejen. Na' bi cuec yichjo' che diža che da' xozxta'ocho ca'. Bi gono' txen len bene' chesedił chosošaše' che bi zejen dan' nyoj le'e' ley da' bzoj da' Moisésen', le da' chesone' ca' bi chaclenen bene' na' bi naquen da' zaca'.

<sup>10</sup>Na' bene' ca' cheson cont bene' ca' chesedop chesežague' chesonxene' Jesucriston' chesechoje' chople, neyoedo' legaque' bich yesone' ca'. Na' še ba gwneyoedo' legaque' to chope ni'a na' bi chosozenague', yebejo' legaque' ca'ale. <sup>11</sup>Le da' bi chosozenague' nachen' nezecho zjambiaye'e' na' zjanape' doła' che da' xinjen' chesone'.

### Can' cheyała' gon Titon'

<sup>12</sup>Cate' sela' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega'ana' na' tiemp zag. <sup>13</sup>Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažde' chanez. <sup>14</sup>Bene' lježcho ca' chesejnilaže' Criston' cheyała' yesoe'laže' yesone' da' nac güen na' yesaclene' bene' chyažj chchine. Le cheyała' gaccho bene' chon da' zaca'.

### Bene' ljež Pablon' chosoguape' Titon' tiox

<sup>15</sup>Yogo' bene' cheson xšin Diosen' txen len neda' nga chosoguape' le' tiox. Na' chnaba' gwguapšco' tiox bene' ca' zoaleno' na', bene' ca' chesacde' chio' da' naccho txen chejnilaže'cho Criston'. Diosen' gaclenšque' yogo'le. Da' na'zen' chzoja'.

## CART DA' BZOJ POSTLW SAN PABLO ÇHE FILEMÓN

### Pablo chzoje' carten'

**1** Neda' Pablo dia' ližya nga da' chyixjue'eda' xtiža' Cristo Jesúsen'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'. <sup>2</sup>Na' lecze chguapto' tiox bene' ca' chesedop chesežague' chesonx-ene' Jesucriston' ližo'. Na' le' Apia, naco' ca bene' zanto', na' le' Arquipo, chono' neto' txen choncho xšin Diosen', lecze chguapto' le'e tiox. <sup>3</sup>Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

### Filemónna' chejnilaže' Jesucriston' na' chacde' bene' lježe'

<sup>4</sup>Na' le' Filemón, yogo' ni'a cate' chjayze'eda' le' šlac choł giüža' Diosen', choa' yela' choxcen che' can' ba chono'. <sup>5</sup>Ba benda' diža' can' chejnilažo' Xancho Jesucriston' na' can' chacdo' lježcho bene' lecze chesejnilaže' Jesucriston'. <sup>6</sup>Na' chnaba' gaclen Diosen' bene' ca' ba gosejnilaže' Jesucriston' lagüe be'leno' legaque' diža' can' chejnilažo'ne'. Chnaba' gaclene' legaque' cont yesacbe'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. <sup>7</sup>Bene' migw, leca chbeda' na' chac chach laža' nezda' chacchgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

### Gwñabe' yezi'xen Filemónna' che Onésimo

<sup>8-9</sup>Dan' chacdo' Criston' na' chacdo' bene' lježo' ca', da'nana' chneyoeda' le' gono' to da' chaclaža' gono'. Da' naca'

postlw che Criston' guac gona' byen gono' da' gwžia' bia' gono' šaca' žan gwchina' yela' chnabia' da' yo'o lo na'. Perw bi žan gona' ca'. Neda' Pablo ba naca' bene' gole na' lecze na'a ba dia' ližya nga da' chyixjue'eda' xtiža' Jesucriston'. <sup>10</sup>Na' chnaba' goclen laguon' par Onésimo ben' ba nona' ca' xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

<sup>11</sup>Cana' bi goque' mos güen chio', san na'a ba naque' mos güen chio' na' lecze ca' chia' neda'. <sup>12</sup>Ba chesela'ne' laguo', na' chneyoeda' le' yolebo'ne' na' yezi'xeno' che', le leca chacda'ne'. <sup>13</sup>Zelaža' yega'anlene' neda' cont gaclene' neda', gone' da' cheyala' gono' šlac dia' ližya nga da' chyixjue'eda' xtiža' Jesucriston'. <sup>14</sup>Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gonchi'on. <sup>15</sup>Diosen' be'e latje beza' Onésimon' ližon' šlož cont soale txen toli tocanē. <sup>16</sup>Na' na'a bich naque' mos chio' na'ze san naque' ca' bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyala' gacchdo'ne', gague con ca' chacdo' note'teze benač, san can' chacdo' bene' lježo' chesejnilaže' Xancho'.

<sup>17</sup>Da'nana' še da' li naccho txen chejni-laže'cho Jesucriston', yolebo'ne' cacze chlebo' neda' cate' chedena'a le'e. <sup>18</sup>Na' še bi da' mal bende' le' o še bi da' chale' chio', neda' chixjuan'. <sup>19</sup>Quincza' neda' Pablo chzoja' da' nga, neda' chixjua' bi da' chale'. Na' bibi chnia' che da' čalo' le' chia' neda' da' ba de yela' mban chio' toli tocanē. <sup>20</sup>Bene' migw, da' chaquecho Xancho Jesucriston' chaclaža' gono' dan' chnaba' nga ca to goclen chia'. Benšca ca soa' mbalaz, le naccho txen len Criston'.

<sup>21</sup>Zoa' lez gwzenago' chia' na' goncho güen clal ca dan' žia' le', da'nana' chzoja' le'. <sup>22</sup>Na' yeto da' chnaba', chaclaža'

yedesoa' ližon' cate' yida' gan' zoalen'.  
 Le zoa' lez yob gac yedyeṇa'a le'e can'  
 chṇable lao Diosen' cate' choḷ giüižlene'.

**Bene' ca' nita' len Pablon'  
 chosoguape' Filemónna' tiox**

<sup>23</sup> Epafras die' ližya nga txen len neda'  
 da' chyixjue'ede' xtiža' Cristo Jesúsén'.

Na' le' chguape' le'e tiox. <sup>24</sup> Na' lecz  
 ca' bene' ca' chesaclene' neda' len xšin  
 Diosen' nga, Marcos, na' Aristarco, na'  
 Demas, na' Lucas, chosoguape' le'e tiox.

<sup>25</sup> Xancho Jesucriston' soašque' len le'  
 gaclenšcacze' le'. Da' na'zen' chzoja'.



## CART DAN' NYOJ CHE BENE' HEBREO CA'

### Diosen' gwsele' Xi'ine' cont be'lene' benachen' diža'

**1** Cani' Diosen' be'lene' da' xozxta' ocho ca' diža' len bene' gwsele' goso'e xtižen'. Zan las goso'e da' bene' ca' xtižen' na' nža'te ca goso'en toe'. <sup>2</sup> Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni'ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' ben-gaquen' con can' gwnalaže' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'. <sup>3</sup> Na' Xi'in Diosen' chlo'e catec bene' zaca' nac Diosen', le cayane' nac yichjlaž-dao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjyachi'e cuit Xe' Diosen' ben' nac bene' zaca' juisyw na' chnabi'e txen len le'.

### Xi'in Diosen' zaca'che' ca angl ca'

<sup>4</sup> Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'. <sup>5</sup> Diosen' bina' ye'e ne to angl ca dan' gože' Xi'inen', gože'ne':  
Len' naco' Xi'ina';  
na'aža ba blo'a zoaczo'.  
Na' bina' güe'e diža' che note'teze angl can' bi'e diža' che Xi'inen', gwne':  
Neda' gona' cont gacbia' naca' Xe',  
na' gona' cont gacbia' naque' Xi'ina'.

<sup>6</sup> Na' da' nac Xi'in Diosen' la'zelagüe bene' zaca', da'nan' cate' Diosen' gwsele'ne' yežlio nga gwne':  
Yogo'lol angl chia' cheyala' yesonxene' le'.

<sup>7</sup> Na' che angl ca' gwne':  
Chona' cont angl chia' ca' bene' chesone' žin chia' chesaque' ca be' dan' chechj na' chesaque' ca yi' beł.

<sup>8</sup> Perw che Xi'inen' be'e diža', gwne':  
Len' naco' Dios na' nabi'o toli tocañe.  
Na' leca güen chnabi'o, chono' con da' zej to licha.

<sup>9</sup> Chebedo' da' zej to licha na' chgue'edo' da' malen'.

Da'nan' neda' Dios ben' chonxeno' ba bena' cont zoacho' mbalazech ca note'teze bene'.

<sup>10</sup> Na' da' yoble gozna Diosen' che Xi'inen':

Xana' Dios, beno' yežlion' ža gwlaste, na' yogo' da' chle'echo le'e yaban' lecze le' benon'.

<sup>11-12</sup> Na' gwžin ža cate' te che yogo' dan' chle'echo le'e yaban' na' lo yežlion', perw le' bi te chio'; soaczo' toli tocañe.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'.

Perw le', tozecze can' gaco' toli tocañe, gwbat žin ža te chio'.

<sup>13</sup> Diosen' bina' ye'e ne to angl ca dan' gože' Xi'inen', gože'ne':

Gwche'edo' cuita' nga nabia'cho txen, na' gona' cont yogo' no chesegue'e le' yosozexjw yichje' yosozenague' chio'.

<sup>14</sup> Na' ca nac angl ca', yogue' zjanaque' bene' cheson xšin Diosen', na' chsele' le-gaque' chesaclene' chio' ba gwleje' šjaj-zoacho len le'.

**Cheyała' gwzenagcho che  
Diosen' cont yeque'e xtoła'chon'**

**2** Na' da' nac Xi'in Diosen' bene' zaca'ch ca angl ca', do yichj do laže'cho cheyała' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichj-chon. <sup>2</sup>Diosen' goclaže' yosozenag da' xozxta'ocho ca' che ley che' dan' goseyixjue'e angl ca'. Da'nan' Diosen' bnežjue' castigw da' cheyała' si' to toe' bate'tez bi bosozenague' chen, con ca nac da' mal da' gosone'. <sup>3</sup>Gague da' yelacho bi si'cho castigw še bi gwzenagcho xtiža' Xancho Jesúsén' da' gwdixjue'ede' že' chaclaže' gone' yela' mban checho toli tocane. Da' zaca'chgua da' ben Xancho Jesúsén' cont gata' yela' mban checho toli tocane. Cuine' gwdixjue'eden' da' nechw, na' bene' ca' gosedalen le' bosolo'ede' chio' le naquen da' li. <sup>4</sup>Diosen' bene' cont gosone' da' zaca' yebanecho, na' bnežjue' legaue' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesuscriston' naquen da' li.

**Jesucriston' goque'  
can' nac chio' benačh**

<sup>5</sup>Na' gague angl can' yesenabia' cate' žin ža gata' yežlio cobe dan' choe'cho diža' chen. <sup>6</sup>Na' de late' Xtiža' Diosen' gan' nyoj diža' da' be'len to bene' Diosen', gwne':

¿Bixchen' nži'ilažo' neto' benačh? le bitec bi zaca'to'.

Na' ¿bixchen' chi' yichjo' chacleno' neto'?

<sup>7-8</sup>Beno' cont benačhen' zjanaque' blao, na' con angl ca'ze zjanaquech blao ca benačh.

Na' beno' cont benačhen' naque' bene' zaca' na' cont chaxene'.

Beno' cont yogo'loł da' zjade yesaquen lo na' benačh, na' len yogo'loł beyixe' yesacba' lo na'gaue'.

Na' da' ben Diosen' cont yogo'loł da' de yesaquen lo na' benačhen' na' yogo' beyixe' yesacba' lo na'gaquen', bibi bocua'an Diosen' da' bi gwlo'e lo na' benačhen', la'czła' na'a bina' le'echo yesac yogon' na' yogo'ba' lo na' benačhen'. <sup>9</sup>Perw yogo'loł ba yo'ocze lo na' Jesúsén', la'czła' šlac gwzoe' yežlio nga angl ca' gosacche' blaoch ca le'. Perw na'a da' bzanlaže' cuine' gote', da'nan' Diosen' bene' cont chaxenche' ca legaue' na' cont nacbia' naque' bene' zaca' juisyw. Le da' nži'ilaže' Diosen' chio' benačh, da'nan' bžie' bia' got Jesúsén' cont gac yeque'e xtoła' to to benačh.

<sup>10</sup>Diosen' bene' benačh, bene' beyixe' ca' na' bite'tezechle da' zjade cont chaxene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxaca'zi' Jesúsén' cont gac gone' yela' mban toli tocane che chio' benačh. <sup>11</sup>Jesúsén' ba gwlo'e chio' lo na' Diosen' na' txen len Jesúsén' naccho xi'in Dios. Da'nan' bi cheto'e Jesúsén' ne' naccho biše' lježe'. <sup>12</sup>Quinga gwna Jesúsén' gože' Diosen':

Gwzejni'ida' bene' biše' lježa' ca' can' nac yichjlažda'oguon',

na' txen len bene' ca' zjandop zjanžag chesonxene' le' goła' gonxena' le'.

<sup>13</sup>Nach Jesúsén' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca xi'ine'.

<sup>14</sup>Chion' ba gwca'a Diosen' ca xi'ine' naccho bene' bela' chen, na' da'nan' Jesúsén' lecze golje' goque' bene' bela' chen cont bnežjo cuine' gosote'ne'. Na' da' got Jesúsén', da'nan' gwzoede' bzoe' šla'ale Satanás dan' chnabia' da' xigüe' ca' na' dan' chonen yela' got che benačhen'.

<sup>15</sup> Jesúsen' bene' cont bich chžebcho gatcho, can' chesežeb yezica'chle benach šlac de yela' mban chegaque', chesežebe' yesate'. <sup>16</sup> Jesúsen' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'. <sup>17</sup> Na' da'nan' benen byen goc Jesúsen' doxen can' nac chio' benach cont naque' bžoz blao checho lao Diosen'. Na' bnežw cuine' bnitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežw cuine' bnitlagüe' xtoła'chon', zaca'lebbe' ca bžoz blao che nación Israel chechon' ben' gwyej lao Diosen' bežue' chen che beyixe' cont gwñabe' yezi'xen Diosen' xtoła'gaquen'. <sup>18</sup> Na' da' bžaglao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nan' nežde' naclen' gaclene' chio' cate' chgo'oyela' gwxiyen' chio' goncho da' mal.

### Jesúsen' zaca'che' ca da' Moisésen'

**3** Bene' migw, Diosen' ba gwleje' chio' naccho lo ne'e, na' cheyała' goncho xbab che Cristo Jesús ben' gwsele'. Naque' bžoz blao checho na' ben' chejni-laže'cho. <sup>2</sup> Jesúsen' bene' cayanen' gwna Dios ben' gwseła' le' šlac gwde' yežlion', ca'cze ben da' Moisésen' cate' le' goclene' da' xozxta'ocho ca' can', bene' ca' gosac diaža che Dios. <sup>3</sup> Perw Jesúsen' zaca'che' ca da' Moisésen', le len' bxie' diaža che Diosen', na' da' Moisésen' naque' con to bene' za' lo diaža che Diosen'. <sup>4</sup> Gwnita' benach bene' bxie' to to diaža yežlio nga, san ca nac Diosen', len' bxie' yogo'te da' zjade. <sup>5</sup> Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ocho bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue'e Diosen' benachen' ca tiempa'. <sup>6</sup> Perw Criston' bi goque' ca to

mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoachachcho chejni-laže'chone' na' chebecho nezecho gac güen checho.

### Guac soacho mbalaz len Diosen'

<sup>7</sup> Da'nan' cheyała' gwzenagcho can' ža Spiritw che Diosen' len da' nga da' nyojen, žan:

Še Diosen' nie' le'e na'a,

<sup>8</sup> bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

<sup>9</sup> Nach Diosen' gwne':

Bi gosejle'e še leda' dan' goša' legaque' gwnežjua' da' yezezaca'zi'e neche xtoła'gaquen'.

Bi gosejle'e chia' cate' gosaše' latje dašen', la'czła' choa iz besele'ede' can' bena' len legaque'.

<sup>10</sup> Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže', na' bi chosozenague' chia' cont yesone' can' chazlažan'.”

<sup>11</sup> Nachen' bža'a legaque' na' da' balı gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

<sup>12</sup> Bene' migw, bi güe'le latje nabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toli tocane. <sup>13</sup> Na' šlac na'a ne' decze latje gwzenagcho che Diosen', le neyoe lježle tža tža cont ne tole bi gonle xbab' clele, gaquele bibi nonen gontezle da' xinj. <sup>14</sup> Da' li naccho Criston' txen še ne' zoacho chejni-laže'chone' cate' žin ža gatcho, con can' gwzola'cho chejni-laže'chone'.

<sup>15</sup> Nyoj Xtiža' Diosen' che chio', žan: Še Diosen' nie' le'e na'a,

bi gonle güedenag can' goson da' xozxta'ole cani' cate' besyedabague' Diosen'.

<sup>16</sup>Na' da' žan ca', choen' diža' che da' xozxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'. <sup>17</sup>Da'nan' choa iz Diosen' bže'e legaque' neče gosone' da' xinjen', na' gosat ben' besyedabague' Diosen' šlac ne' zjalaže' latje dašen'.

<sup>18</sup>Na' legaque', da' bi bosozenague' che Diosen', da' baļi gwlo'e, gwne' bi güe'e latje yesenite' mbalaz yesyezi'laže' can' chezi'laže' Diosen'. <sup>19</sup>Na' nacbia' da' bi gosejle'e che Diosen', da'nan' bi goc nite' mbalaz yesyezi'laže' can' chezi'laže' le'.

**4** Na' ca' nezecho ľecze neče chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'nan' cheyaļa' gwsaca'cho cont bi goncho güedenag len le'. <sup>2</sup>Chio' ba benecho diža' güen cont gac soacho mbalaz ca diža' dan' gosene da' xozxta'ocho ca' cani', perw diža' da' gosende' bi goclenen legaque', le bi gosejle'en. <sup>3</sup>Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan: Nachen' bža'a legaque' na' gwlo'a da' baļi, gwnia':

“Gwbat nite' mbalaz yesyezi'laže' can' chezi'laža' neda'.”

Na' nezecho Diosen' gwzologüe' chezi'laže' cate' beyož bxie' yaban' na' yežlion' na' bichle da' bene' ža gwlaste.

<sup>4</sup>Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

<sup>5</sup>Na' ľecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

<sup>6</sup>Na' ne' naquen da' li baļ bene' yesejle'e xtiža' Diosen' na' nite' mbalaz yesyezi'laže' can' chezi'laže' le', na' bene' ca gosende' diža' güen chen' cani' bi gosejle'en, na' bi goc yesenite' mbalaz yesyezi'laže' yela' güedenag čhegaquen'.

<sup>7</sup>Na' gwdechle gwne' Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' nie' le'e na'a,

bi gonle güedenag.

<sup>8</sup>Da' Josué gwchi'e da' xozxta' chio' bene' Israel gan' gosezi'e yežlion' da' bnežjw Diosen' legaque', perw bi bene' cont yesenita' bene' ca' mbalaz yesyezi'laže'. Da'nan' Diosen' be'e diža' gwdele, gwne' gwžin ža yesenite' mbalaz yesyezi'laže'. <sup>9</sup>Na' da'nan' bene' ba gwlej Diosen' cont yesaque' lo ne'e, legaque' guac yesenite' mbalaz yesyezi'laže' ca mbalazen' gwzoa le' cate' gwzologüe' chezi'laže'.

<sup>10</sup>Na' bene' ca' ba nita' mbalaz chesyezi'laže' can' chezi'laže' Diosen', bich chesone' can' ža xbab čhegaquen', san chesone' can' ža Diosen'. Da'nan' žacho zjanite' mbalaz chesyezi'laže' can' zoa Diosen' mbalaz chezi'laže' da' beyož bxie' yogo' da' zjade. <sup>11</sup>Da'nan' cheyaļa' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac čhecho še goncho güedenag len xtižen' can' goson da' xozxta'ocho ca'.

<sup>12</sup>Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nľachgua chop ľa'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal. <sup>13</sup>Bibi de da' bi neze nle'e

Diosen', ne to benačh, angl, da' xigüe' o bi da' zjade. Diosen' nezde' yogo'te da' yo'o lo' yichjlažda'ochon'. Na' gwžin ža nabyožde' chio' che yogo'te da' ba bencho.

### Jesúsen' naque' b̄xoz gwnabia' checho

<sup>14</sup> Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' b̄xoz blao checho bene' la'zelagüe zaca'. Da'n'an' cheyała' soačhačcho šejnilaže'chone' can' ba be'cho diža' goncho. <sup>15</sup> Jesús ben' nac b̄xoz blao chechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžagłao chio', perw bibi da' mal bene'. <sup>16</sup> Na' dan' zoe' naque' b̄xoz blao chechon' ben' cheyaše'de' chio', da'n'an' cheyała' yoł güižcho Diosen' gan' chi'e chnabi'e, na' bi žebcho güe'lenchone' diža', nabe-chone' yezi'xene' checho na' gaclene' chio' bate'teze chacbe'echo chyažjecho gaclene' chio', le nži'ilaže'de' chio'.

**5** Yogo' bene' ca' ba gosaque' b̄xoz blao che nación Israel chechon' gosac lo ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtola' da' xozxta'ocho ca'. <sup>2</sup> Na' b̄xoz ca' gosape' yeła' chxenlaže' len bene' bina' yesejni'i can' cheyała' yesone' na' len bene' ba n̄xoayag da' malen' legaque', le lecze benačh bene' güen da' xinj le-gaque'. <sup>3</sup> Da'n'an' benen byen b̄xoz ca' gosote' beyixe' na' bosolalje' xchemba' cont gosenabe' yezi'xen Diosen' xtolen' lente xtola' yezi'ca'chle bene'.

<sup>4</sup> Na' ne to b̄xoz ca' bi benxen cuine' neca gwlej cuine' cont gaque' b̄xoz blao, san Diosen' gwleje' to toe' gosaque' b̄xoz blao can' gwleje' da' Aarón. <sup>5</sup> Na' ca'cze goc len Criston', bitw beyiljue' nac gone' cont gaxene', neca gwlej cuine' cont

naque' b̄xoz blao checho, san Diosen' gwleje'ne' na' gože'ne':

Len' naco' Xi'ina',

na'aža ba bena' cont nacbia' zoaczo'.

<sup>6</sup> Na' ga yoble nyoj yeto da' gwne':

Naco' b̄xoz tołi tocañe can' nac b̄xoz ben' le' Melquisedec.

<sup>7</sup> Na' Criston' šlac gwzoe' yežlion' bol güiže' Xe' Diosen' ben' nape' yeła' guac cont yosle' le' bi gate', gwne' zižje na' gwcheže' gwnabe' gaclene' le'. Na' da' bzexjw yichj Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yeła' goten'.

<sup>8</sup> Na' la'czła' Criston' naque' Xi'in Dios, bžaglagüe' yogo'loł da' ca' goc che' cate' bzenague' che Diosen' cont gwyejni'ide' can' chac che chio' benačh. <sup>9</sup> Na' beyož goc che' yogo'loł da' goclaže' Diosen', nach ba guaque' gwnežjue' yeła' mban tołi tocañe che yogo' bene' yosozenague' che'. <sup>10</sup> Can' naquen, Diosen' gwleje' le' cont naque' b̄xoz blao checho, na' naque' ca b̄xoz Melquisedec.

### Gwsaca'cho cont bi cuejyichjcho xtiža' Diosen'

<sup>11</sup> Na' ne' de da' zan da' chaclaža' nia' le'e che da' ngan', perw naquen zdebe nian' ca šejni'ilen, le bich chebele šejni'ilen. <sup>12</sup> Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' bsedle da' nechw. Da'n'an' zaca'leble ca to bidao' bina' gac gagw na' con chaže'be'. <sup>13</sup> Na' bene' zjanac ca to bidao' ne' chaže', bina' yesejni'ide' xtiža' Diosen' binlo cont yesone' da' zej to licha len Diosen'. <sup>14</sup> Na' dan' ža xtiža' Diosen' da' naquech zdebe, zaca'leben ca yeła' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

**6**<sup>1-2</sup> Cana' betinjecho xtola'chon', na' gwyejni'ilaže'cho Criston', na'

bsedcho diža' güen che'. Goccho ca to bene' guat len yichjlažda'ochon' neche da' choncho da' xinj, perw ba betinjecho xtoła'chon' na'a. Bich chyažjen yezolaacho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' chxoā na'cho yichj bene' na' chnabcho gaclen Diosen' legaque'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yesezaca'zi' bene' ca' ba goson da' xinj. Ba nsedcho da' ca', na' na'a bach cheyała' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. <sup>3</sup> Lenna' goncho na'a še Diosen' gonšque' latje.

<sup>4</sup> Nita' bene' ba gwyo'o be'ni' che Criston' lo' yichjlažda'ogaque', na' ba chesacbe'ede' can' nac yela' mban da' chon Criston', na' ba zoa Spiritw che Diosen' lo' yichjlažda'ogaque'. <sup>5</sup> Ba zjanezde' xtiža' Diosen' naquen güen na' ba zjanombi'e yela' guac che Diosen' da' za' gwlo'echde' benachen'. <sup>6</sup> Na' še žin ža bich yesejnilaže' Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaque' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'. <sup>7</sup> Cheyała' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach chac cosešen'. Na' chata' dan' cheseyažje bene' chesazen'. Na' nacbia' Diosen' chebede' yežlion' nac ca'. <sup>8</sup> Bi gaccho ca to yežlio gan' chla' yag yeše' na' bichle yiže' da' nono chagw. Yežlion' nac ca' bibi zacan', na' ba zoa cuejyichj xanen len na' yiže' da' chla' lagüen žin ža šeyen.

### Nezecho šjayzoacho len Diosen'

<sup>9</sup> Le'e bene' migw, chacda' le'e, na' la'czla' ba bia' dižan' ca', nezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'. <sup>10</sup> Diosen' zeje' to liha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejnilaže'ne'. Na' chonle ca' da' chaquale Diosen'. <sup>11</sup> Na' chaclaža' to tole soatezle gonchle ca' do yichj do laže'le šlac biña' žin ža gatle, cont nezele šjayzoale len Diosen'. <sup>12</sup> Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaque' gone', na' gosape' yela' chxenlaže' cate'ch bžin ža benen'.

<sup>13</sup> Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' bałi gac can' gwnen', le nono zoa bene' napch yela' gwnabia' ca Diosen'. <sup>14</sup> Gwne': "Da' li goncza' cont gac güen chio' na' cont yesac xi'in diaža chio' bene' zan." <sup>15</sup> Na' Abrahanna' gwdape' yela' chxenlaže' šlac gwleze', nach bžin ža gwzolao chac can' gwna Diosen'. <sup>16</sup> Benachen' zjayolagüe' chosozoe' Diosen' cue'e da' bałi che bi dan' chesene', le Diosen' chnabia'che' ca' legaque'. Chesone' ca' cont bene' ca' chesacyože' len legaque' yesejle'e na' yesyeyacxenlaže'. <sup>17</sup> Na' Diosen' bzoa cuine' cue'e da' bałi cont neze bene' ca' zjanac xi'in diaža che da' Abrahanna' gague da' te che dan' gwne' gonen'. <sup>18</sup> Diosen' bene' chope da' qui: gwne' can' gone' na' lecze bzoa cuine' cue'e da' bałi gac can' gwnen', na' gague da' te bi gac can' gwnen'. Chaclaže' chio' ba betinje xtoła'chon' yebecho nezecho šjayzoacho len le'. Na' Diosen' bi chac güe'e diža' güenlaže'. <sup>19-20</sup> Na' da'

nezecho šjayzoacho len Diosen', bi soa xbab chechon' quile ca'le. Jesúsen' ba gwžialagüe' gwyo'e gan' zoa Diosen' gan' nono benačh goc šo', na' bene' cont chio' gac šo'cho. Le naque' bꝑoz blao checho toli tocane, na' naque' ca bꝑoz Melquisedec.

### Jesúsen' naque' ca bꝑoz Melquisedec

**7** Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blao gwleje' le' cont goque' bꝑoz. Na' goquen' Abrahanna' zeze'e lao gwdile gan' bene' gan' gayo' rey, na' Melquisedequen' jašague'ne' na' gwđixjue'ede' gac da' güen che da' Abrahanna'. <sup>2</sup>Ca horen' Abrahanna' zeze'e zonse'e yogo'lo! da' jaytobe' da' bene' gan' lo yela' gwđilen', na' gwlequen' ši cuen na' bnežjue' to cuen che bꝑoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo". <sup>3</sup>Bi nyojen še no goc da' xaxna' Melquisedequen'. Neca nyojen še no goc xozxta'ogüe', na' neca nyojen baten' golje' na' baten' gote'. Da'nán' ža-cho Melquisedequen' zaca'lebde' ca Xi'in Dios ben' zoa toli tocane naque' bꝑoz checho, le bi golje Melquisedequen' lo diaža che nochle bꝑoz, na' neca gw-zoa nochle bene' lo diaža che bene' tie' gwłane' xlatje'.

<sup>4</sup>Le gon xbab catec bene' blao goc bꝑoz Melquisedequen'. Da'nán' da' xozxta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjuen' bꝑoz Melquisedequen'. <sup>5</sup>Na' da' xozxta'ocho bene' ca' gosaljje lo diaža che da' Leví, ben' besyeyale' gosaque' bꝑoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze'

gosaque' diaža che da' Abrahanna', bꝑoz ca' na' bene' yezica'chle. <sup>6</sup>Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwñabde' Diosen' gac güen che da' Abrahanna' ben' gwna Diosen' yesac xi'in diaža che bene' zan. <sup>7</sup>Na' nezecho bene' chac chñabde' Diosen' gac güen che bene' yoble zaca'che' ca ben' gac che' da' güenna'. <sup>8</sup>Na' bene' ca' zjanac bꝑoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' bꝑoz ca' zjanaque' con ljež benačhcho bene' chesat. Na' che bꝑoz Melquisedequen' ben' gwxi' to cuen lo ši cuen da' jaytob da' Abrahanna', Xtiža' Diosen' choen' diža' che' ca to bene' ne' zoacze. <sup>9-10</sup>Na' da' bnežjo Abrahanna' le' da' ca', guac nacho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xozxta' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

<sup>11</sup>Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson bꝑoz ca' bene' gosaljje' lo diaža che da' Levín'. Perw bꝑoz ca' bi goc yesone' cont yichjlaždao' benachen' yesaquen xilaže' len Diosen'. Da'nán' byažjecho bid Jesúsen' naque' bꝑoz checho toli tocane, na' le' naque' ca bꝑoz Melquisedequen', gague ca da' bꝑoz Aarón. <sup>12</sup>Na' cont goc zoa Jesúsen' naque' bꝑoz chechon', byažjen bža' ley da' nonen mandadw non' gac bꝑoz. <sup>13</sup>Le Xancho Jesúsen' ben' nac bꝑoz chechon' bi golje' lo diaža che da' Leví, na' noch no na' choj lo diaža che Jesúsen' bene' naque' bꝑoz. <sup>14</sup>Nezcecho Xancho Jesúsen' golje' lo diaža che da' Judá, na' da' Moisésen' bi bzoje' le'e leyna' ga nan

bene' galje' lo diaža che da' Judán' guac yesaque' b̄xoz.

<sup>15</sup> Na' nacia' ba b̄za' leyna', le ba zoa Jesúsén' naque' b̄xoz cobe chechon' na' naque' ca b̄xoz Melquisedequen'. <sup>16</sup> Bito golje' lo diaža che da' Leví can' gosac b̄xoz ca' bene' goson žin can' ža ley da' bzoj da' Moisésén', san naque' b̄xoz da' bi gwzoe yela' goten' le' na' zoe' toli tocane'. <sup>17</sup> Quinga nyoj da' gwna Diosen' che', žan:

Naco' b̄xoz toli tocane, can' nac b̄xoz ben' le' Melquisedec.

<sup>18</sup> Na' b̄xoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benachen' to ši'i. <sup>19</sup> Na' leyna' lecze bi goc gonen cont yesac yichjlaždao' benachen' xilaže' len Diosen'. Perw na'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac ch̄nelenchone'.

<sup>20</sup> Na' cont nezecho Jesúsén' naque' b̄xoz checho, Diosen' bzoa cuine' gwlo'e da' bałi le soacze Jesúsén' gague' b̄xoz chechon'. <sup>21</sup> Bene' ca' gosaque' b̄xoz can' bzoj da' Moisésén', Diosen' bitw bzoa cuine' cue'e da' bałi cont šejle'cho zjanaque' b̄xoz. Perw nyoj can' gože' Jesúsén', žan:

Diosen' bzoa cuine' gwlo'e da' bałi na' bi gwše'e can' ba gože'ne' gone':

“Naco' b̄xoz toli tocane can' nac b̄xoz ben' le' Melquisedec.”

<sup>22</sup> Na' da'nan' zoa Jesúsén' chone' cont nezecho Diosen' gaclene' chio' toli tocane can' gwne' gone'. Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'. <sup>23</sup> Na' bene' ca' gosaque' b̄xoz can' ža ley dan' bzoj da' Miosésén', gosaque' bene' zan, le cate' gosat tğüeje tğüeje', la' benita'te bene' yoble. <sup>24</sup> Perw Jesúsén' zoe' toli tocane, na' da'nan' naque' b̄xoz checho toli tocane. <sup>25</sup> Da'nan' chac chone' yela' mban

tołi tocane che chio' ch̄nabcho yezi'xen Diosen' checho, le zoacze' toli tocane ch̄nabe' goclen lao Diosen' che chio' chejnilaže'chone'.

<sup>26</sup> Na' Jesúsén' nacyane' bene' chyaž-jecho gague' b̄xoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len benačh bene' cheson da' xinj. Jesúsén' ba beyepe' zoe' gan' zoa Diosen', na' chnabi'e t xen len le'. <sup>27</sup> Nža'le naque' len b̄xoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtoła'gague', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtoła' yezica'chle bene' Israel gualaž checho ca'. Perw Jesúsén' šni'aze bnežw cuine' neče xtoła' benachen' cate' gosote'ne' le'e yag cruzen', na' bi byažjde' gote' beyixe' can' goson b̄xoz ca' tža tža neče xtoła'gague' na' neče xtoła' bene' yezica'chle. <sup>28</sup> Bene' gosac b̄xoz blao can' ža ley da' bzoj da' Moisésén' gosaque' bene' güen da' xinj can' zjanac yezica'chle bene'. Na' cate' ba goc zan iz bzoj Moisésén' leyna', Diosen' bzoa cuine' gwlo'e da' bałi zoacze Xi'ine' Jesúsén' naque' b̄xoz blao checho. Na' Xi'ine' Jesúsén' zoacze' toli tocane na' nac yichjlaždagüen' cayanen' chazlaže' Diosen'.

**Jesúsén' bene' cont gwzolao chac da' cobe da' gwna Diosen' gone' cont gaclene' chio'**

**8** Da' nga zejehen lao yogo' da' ba gw-  
nia': zoa b̄xoz blao chechon' ben' nac cayane' chazlaže' Diosen', na' ba chi'e yaban' chnabi'e t xen len Diosen' ben' nac la'zelagüe bene' zaca'. <sup>2</sup> Chone' žin gan' zoa Xancho Diosen', gague' lo' yo'o dan' goson benačh cont yesonxene' le'. <sup>3</sup> Na' yogo' b̄xoz blao che bene' Israel gualaž



chechon' nite' chosonežjue' Diosen' bi da' chosonežjue'ne' na' chesote' beyix'e' chosomalje' xchemba' lao Diosen'. Na' dan' nac Jesús'en b̄xoz blao checho, benen byen bnežjw cuine' blalj xchene' neche xtoł'a'chon'. <sup>4</sup>Na' šaca' ne' zoe' yežlio nga bi naque' b̄xoz, le nita' b̄xoz che bene' Israel' gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisés'en'. <sup>5</sup>Na' bene' ca', chesone' bi da' chesone' lo' yodao' da' naquen ca l gua'a šaca' che yaban' gan' zoa Diosen'. Na' nezecho naquen ca l gua'a šaca' che yaban' gan' zoa Diosen', le cate' za' gon Moisés'en' yodao' dan' chacte chedobe gan' goson b̄xoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayanen' blo'eda' le' caten' gwzoa-cho lo ya'an." <sup>6</sup>Na' da' chon Jesús'en', da' xen zaca'chen ca da' cheson b̄xoz che bene' Israel' gualaž chechon', na' can' gwna Diosen' gaclene' chio' lagüe da' bnežjw cuin Jesús'en' neche xtoł'a'chon', lecze da' xen zaca'chen ca dan' gože' da' xozxta'ocho ca' cani'.

<sup>7</sup>Le Diosen' gože' da' xozxta'ocho ca' gac güen chegaque' še yesone' can' ža ley chen', perw bi bosozenague', na' da'n'an' byažjen gwdixjue' to da' cobe. <sup>8</sup>Na' Diosen' bi bebede' legaque', san gwne':

Gwžin ža cate' nia' to da' cobe da' gona' gaclena' le'e nacle xi'in diaža che bene' ca' gosonite' Israel,  
na' len le'e nacle xi'in diaža che bene' ca' gosonite' Judá.

Neda' naca' Xanle Dios žia' ca'.

<sup>9</sup>Nža' can' goša' da' xozxta'ole gona' gaclena' legaque' cani',  
bži'ilaže'da' legaque' na' bena' cont besyechoje' lo na' bene' nación Egipto.

Legaque' bi gosone' can' goša'ne' cont gac güen chegaque'.

Na' da'n'an' gwleza' bich goclena'ne', neda' Xanle Dios žia' ca'.

<sup>10</sup>Na' quinga gona' gaclena' xi'in diaža che le'e nacle bene' Israelen' cate' žin ža:

Neda' Xanle Dios gona' cont šo' yichj-gaque' da' nona' mandadw yesone', na' gona' cont yesyebeden' lo' yichjlažda'ogaquen',  
na' toza' neda' yesejnilaže',  
na' legaque' yesaque' nación chia'.

<sup>11</sup>Na' bi yažjen yosozejni'i lježe' cont yesombi'e neda',  
neca yažjen yosozejni'i no bene' biše' lježe',

le cana' yogo'lole' yesombi'e neda',  
bi' bixjw lente bene' nac bene' gole.

<sup>12</sup>Canan' yezi'xena' xtoł'a'gaquen', na' bich gona' cuent še bi da' malen' ba gosonen'.

<sup>13</sup>Na' Diosen' be'e diža' che da' cobe da' gwne' gone' gaclene' nación chechon', na' da'n'an' nezecho ba bzoe' to šla'ale da'n'a' gože' da' xozxta'ocho ca' cani'. Na' da' gole da' ba bzoe' to šla'ale ba zoa yeniten.

### Yodao' da' zoa yežlion' na' dan' zoa yaba gan' zoa Diosen'

**9** Cani' Diosen' gože' da' xozxta'ocho ca' gaclene' legaque' na' gac güen chegaque' še yesone' can' ža ley chen'. Na' šlac ne' chon žin da' nechw da'n'a' gože' legaque' cani', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga.

<sup>2</sup>Gosone' yodao' da' nsan' chope quart. Na' lo' quart nechon' bosozoe' to candelar na' to mes gan' bosocue'e yetextil da' naquen che Dios. Na' cuartna' bososi'en Latje che Dios. <sup>3</sup>Na' bosozie' to lache' lo' yo'ona' cont bchojen chope quart, na' quart gwchopen' bososi'en Latje ga Zoa Dios. <sup>4</sup>Na' lo' quart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguazje' oro doxenen. Na' lo' cajan' gosegüe'e to yeso'

de oro gan' gosegüe'e late' yeł'a guagw da' nzi' maná, na' gosegüe'e carrot che da' Aarón dan' bexėje. Lecze lo' caj nan' gosego'ošagüe' yej ta'a ca' gan' byoj yogo' dan' bžia bia' Diosen' yesone' cont gac-lene' legaque'. <sup>5</sup> Na' cože' cajen' bosonite' chope l' gua'a łsaca' bene' gosone' ca angl bene' bososi'e querubines, cont nacbia' zoa Diosen' gan' žia cajen' na' naque' bene' zaca' juisyw. Na' cože' cajen' ladjo angl ca' gan' nžiljo xilgaquen', bosoži'e xchen beyixe' cate' gosenabe' yezi'xen Diosen' xtoł'a' bene' Israel gualaž checho ca' to to iz. Perw bi chonen byen güe'cho diža' na'a doxen can' goca'.

<sup>6</sup> Na' beyož gosone' yodaon' na' bosonite' yogo' da' ca' lo'enna', nach yogo' ža bžoz ca' gosole' lo' quart nechon' na' gosone' can' bžia bia' Diosen' gosone' gosonxene' le'. <sup>7</sup> Na' quart gwchopen', toz bžoz blao goc gwyo'e lo'enna' tni'a tgüiz. Na' cate' gwyo'ena' benen byen bexoe' chen che beyixe' bži'en lo' cajen' cont Diosen' bezi'xene' xtoł'e' na' bezi'xente' xtoł'a' yezica'chle bene' Israel gualaž checho neče da' xinj da' gosone' sin cbi gosacbe'ede'. <sup>8</sup> Na' da' bi de łsens šo' nochle bene' lo' quart gwchopen', Spiritw che Diosen' chzejni'in chio' bina' gac šo' benachen' gan' nac latje ga zoa Diosen' šlac ne' chon žin yodao' nechua' lo' yežlion'. <sup>9</sup> Na' yodaon' len yogo' da' cheson bžoz ca' lo'enna' chlo'en chio' zoacho na'a can' chac yaban' gan' zoa Diosen'. Na' la'czł'a' da' zan chesoe' bene' Diosen' na' be zan beyixe' chesote' chesonxene' le', bibi yeł'a' guac zjansa' da' ca' cont yesenezde' bibi doł'a' zjanape' len Diosen'. <sup>10</sup> Na' da' ca' cheson bene' gualaž chechon' lo' yodaon' naquen costumbr che no nis yeł'a' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp chegaque' na'ze. Na' ba gosonen žin šlac Diosen' bina' gwše'e costumbr ca' len da' coben'.

<sup>11</sup> Na' na'a Criston' naque' bžoz blao checho na' ba bžin ža bxi'e costumbr güen ca'. Na' zoe' yaban' naque' bžoz checho lao Diosen', na' gan' zoen' zaca'chen ca' yodao' da' goson benachen' yežlio nga. <sup>12</sup> Na' bi bexoe' chen che no šib no go'n' dao' cate' gwyo'e gwnabe' cont Diosen' bezi'xene' xtoł'a'chon', san da' bnežjw cuine' gosote'ne' na' blalj xchene' neče xtoł'a'chon' tni'aze le'e yag cruzen', da'n'an' goc gwyo'e gan' zoa Diosen' na' ba beque'e xtoł'a'chon' tołi tocaņe. <sup>13</sup> Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e bžozen' legaque' xchen no šib no go'n' na' nchixen len de da' chega'an' cate' chosozeye' to vaca' dao'. <sup>14</sup> Na' xchen Criston' da' bedelalje' neče xtoł'a'chon' zaca'chen ca' xchen beyixe' ca', le' xchenen' cheyonen yichjlažda'ochon' xilaže' len da' xinj da' ba bencho. Da'n'an' bich nchoglaon checho gatcho neče xtoł'a'chon', san soaczcho gonxencho Diosen' ben' zoa tołi tocaņe. Spiritw che Diosen' goclenen Criston' bnežjo cuine' beque'e xtoł'a'chon', na' bibi xtoł'a' Criston' gota'.

<sup>15</sup> Criston' bedelalj xchene' cont gwzola'o chac da' coben' dan' gwna Diosen' gone' cont soacho binlo len le'. Na' ba bxi'e da' coben' cont balteze bene' ba gwlej Diosen' šjasyenite' len le' tołi tocaņe. Na' da' got Criston' bedelalj xchene', da'n'an' gwnitlao xtoł'a' bene' ca' gosejnilaže' Diosen' šlac ne' chon žin dan' gwduxjue' da' nechw dan' gwne' gone' cont chio' bene' Israel soacho binlo len le'. <sup>16</sup> Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'. <sup>17</sup> Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'. <sup>18</sup> Na' goc ca' len da' nechon' da' gož Diosen' da' xozxta'ocho

ca' gone' gaclene' legaque'. Da'nan' bžie' bia' bosolalje' xchen beyixe' cont gwxen. <sup>19</sup>Cate' da' Moisésen' beyož be'lene' da' xoxxta'ocho ca' diža' che yogo' dan' bžia bia' Diosen' yesone' can' ža ley chen', nach Moisésen' bži'e legaque' xchen go'n dao' na' xchen šib dao' na' nis. Bži'e legaque' da' ca' len late' yiša' xa xila' da' mben color xna na' len to xis yiže' dao' da' nzi' hisopo. Lecze bži'en lao libren' gan' nyoj ley chen'. <sup>20</sup>Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." <sup>21</sup>Na' lecž ca' bene' bži'e chenna' yodaon' na' yeso' ša' ca' bosochine' gan' gosonxene' Diosen'. <sup>22</sup>Ley dan' bzoj Moisésen' nžian bia' gwže'e bxozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še bina' lalj chen, Diosen' bi yezi'xene' xtoła' benachen'.

**Criston' gote' blalj xchene' cont beque'e xtoła' bene' chesejnilaže'ne'**

<sup>23</sup>Can' goc benen byen bosoži'e xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l' gua'a lsaca' da' chzejni'in can' nac yaban'. Perw da' de yaban' byažjen to chen da' zaca'ch. <sup>24</sup>Na' gan' gwyo'o Criston' gague naquen to yodao' da' naquen con to l' gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'. <sup>25</sup>Bxoz blao che bene' Israel gualaz checho ca' cheso'e yodaon' tñi'a tgiüz gan' nzi' Latje gan' Zoa Dios na' chosoži'e chen che beyixe', perw Criston' bi bnežjw cuine' zan ni'a gosote'ne'. Tñi'aze blalj xchene' neche xtoła' benachen'. <sup>26</sup>Šaca' byažjen blalj xchene' zan ni'a, ba gote' zan ni'a gwzolaon cate' gwmete yežlion', perw

bi benen byen gac che' ca'. Bedelalj xchene' tñi'aze cate' gwna Diosen' ba bžin ža che', cont chac cheque'e xtoła' benach. <sup>27</sup>Na' can' chac che benachen', žin ža gat to toe' na' te yesate' nach na Diosen' che to toe' še yesezaca'zi'e o še yesenite' mbalaz. <sup>28</sup>Na' can' yesat benachen' tñi'aze, ca'cze bnežjw cuin Criston' tñi'aze gosote'ne' cont chac cheque'e xtoła' benachen'. Nach žin ža yide' da' yoble perw gague cont yeque'e xtoła' benachen', san cont yeche'e bene' ca' chesebeze' batcan' yide' nach nite' mbalaz len le'.

**10** Ley da' bzoj da' Moisésen' len costumbr da' nžian bia' goncho cate' gonxencho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyixe' yogo' iz. <sup>2</sup>Šaca' yichjlažda'ogaque' beyaquen güen cate' gosote' beyixe' ca' na' cate' bxoz ca' bosoži'e legaque' xchemban' neche xtoła'gauen', ba gwnitlao xtoła'gauen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. <sup>3</sup>Perw da' chesote' beyixe' ca' na' bichle da' chesone' neche xtoła'gauen' to to iz, bi chac yesanlaže' zjanape' doła'. <sup>4</sup>Le xchen no go'n dao' no šib dao' bi gac yeca'an xtoła' benach.

<sup>5</sup>Da'nan' cate' Criston' bide' yežlio nga gože' Diosen':

Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'nan' beno' cont golja benach.

<sup>6</sup>Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtoła'gauen', gague da' can' chbedo'.

<sup>7</sup>Da'nan' gwnia' can' nyoj le'e libr gan' žan: "Dios chia', za'a nga zedeyena' con can' chazlažo'."

<sup>8</sup>Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtoła'gaquen', gague da' can' zelažo' na' gague da' can' chbedo'", la'czla' leyna' nžian bia' yogo' da' ca'. <sup>9</sup>Nach Criston' gože' Diosen': "Za'a nga zedeyena' con can' chazlažo'". Da'nan' nezecho ba bzoe' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'. <sup>10</sup>Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tni'aze cani', da'nan' ba beyac yichjlažda'ocho xilaže' lao Diosen', chio' chejnilaže'chone'.

<sup>11</sup>To to bxoz che bene' Israel gualaz checho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyala' yesone', la'czla' xchen beyixen' bi gac yeca'an xtoła' benachen'.

<sup>12</sup>San Criston' tni'azen' bnežjw yela' mban che' na' zaca'czen cont yeca'an xtoła' benachen' toli tocaņe. Na' beyož bnežjw cuine' zjaychi'e gan' chnabi'e txen len Diosen'. <sup>13</sup>Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. <sup>14</sup>Na' da' bnežjw cuin Criston' tni'aze cani', bene' cont chio' naccho lo na' Diosen' beyac lažda'ochon' xilaže' toli tocaņe. <sup>15</sup>Na' Spiritw che Diosen' lecze benen cont nezecho naquen ca', le nyojen, žan:

<sup>16</sup>Quinga gona' gaclena' legaque' cate' žin ža, gona' cont šo' yichjgaque' da' nžia' bia' yesone', na' gona' cont yesyebeden' lo' yichjlažda'ogaquen', can' ža Xancho Diosen'.

<sup>17</sup>Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtoła'gaque' ba gota'.

<sup>18</sup>Na' cate' ba gwnitlao xtoła'chon' bich chyažjen gotcho no beyixe' neche xtoła'chon'.

### **Cheyala' soacho gonxencho Diosen' neca žebcho**

<sup>19</sup>Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na' beque'e xtoła'chon'. <sup>20</sup>Guac nacho gwsaljue' to nez cobe, to da' chonen chio' yela' mban toli tocaņe, le da' bnežjw cuine' gote' neche chio', guac šo'cho gan' zoa Diosen' na' bich naquen ca part yodaon' da' ngaše' len lache' da' ze gan' nono gac šo'. <sup>21</sup>Na' zoa bxoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejni-laže'chone'. <sup>22</sup>Da'nan' cheyala' soacho gonxencho Diosen' do yichj do laže'cho neca žebcho, na' cheyala' soacho še-jle'cho xchen Jesucriston' ba beca'an xtoła'cho, le nezecho ba gwzoacho nis da' chejnilaže'chone'. <sup>23</sup>Na' can' gwzola'cho be'cho diža' gwnacho šjayzoa-cho len Diosen', ca'cze cheyala' goncho bate'teze, na' da' li šjayzoaczcho len Diosen', le zoacze' chone' con can' gwnen'. <sup>24</sup>Lecze cheyala' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen. <sup>25</sup>Na' bi cuejyichjcho da' chdop chžagcho txen chonxencho Diosen' ca chesebeyjyichj bal' bene'. Cheyala' neyoe lježcho soaczcho šejnilaže'cho Criston', na' gonchcho ca' na'a ba nacia' ba zoa te che yežlion'.

<sup>26</sup>Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'. <sup>27</sup>Na' cheyala'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi'

yogo' bene' chesegue'e Diosen'. <sup>28</sup> Cani' da' xozxta'ocho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' chope o šone bene' toz can' gos'o'e diža' che da' xinjen' none'. <sup>29</sup> Na' da' mal juisyoch gac che chio' še gue'echo Xi'ina Diosen' na' gaquecho bibi zaca' xchen Criston' da' blalje' cont beque'e xtoła'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolao chac da' cobe da' gwna Diosen' gone' gac-lene' bene' yesejnilaže'ne'. <sup>30</sup> Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yezezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca xi'ine'." <sup>31</sup> Na' leca naquen da' žebcho še cuejyichjcho Diosen' ben' zoa toli tocanē, le gone' cont saca'zi'cho toli tocanē.

<sup>32</sup> Perw le šjayza'laže' can' bchejele da' zan da' gwdi gwxcac'le cate' beyož gwyo'o be'ni' che Criston' lo' yichjlažda'olen'. <sup>33</sup> Tgüejje gosezi'diže' le'e lao yogo' bene' yež na' tgüejje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. <sup>34</sup> Beyaše'le bene' lježcho ca' bene' gosata' ližya na' goclenle legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. <sup>35</sup> Da'n'an' bi cuejyichjle da' chejnilaže'le Diosen', neca žeble, le žin ža cate' soachguale mbalaz. <sup>36</sup> Cheyała' gwyo gwchejle cont yeyož gonle yogo'loł da' chnalaže' Diosen', na' tena' gone' cont soale mbalaz toli tocanē can' gwne'. <sup>37</sup> Can' nyoj Xtiža' Diosen', žan: La' žinte ža yid ben' seła' gan' zoalen', bich šede'.

<sup>38</sup> Na' xi'ina' bene' zjanac bene' güen len neda' yesata' yela' mban che' toli tocanē da' chesejnilaže' neda'.

Na' še bich yesejnilaže' neda', bich yebeda' legaque'.

<sup>39</sup> Perw chio' bi naccho ca bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjayzoa-cho len Diosen' toli tocanē.

### Da' chejnilaže'cho Diosen' naquen to da' zejen

**11** Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' bina' le'echo. <sup>2</sup> Bal bene' gwlas ca' bebe Diosen' legaque' da' gosejnilaže'ne'.

<sup>3</sup> Da' chejnilaže'chone' chejle'cho con gwnie' na' goc yaban' len yežlion'. Na' bibi bchine' da' le'echo cate' bene' yogo' da' ca' chle'echo.

<sup>4</sup> Cani' da' xozxta'ocho Abel gwejnilaže' Diosen' na' da'n'an' bnežjue' Diosen' to da' gocch da' güen ca da' bnežjw bene' biše' Caín. Na' dan' bebe Diosen' dan' bnežjw Abelen' le', da'n'an' gwneze Abelen' naque' bene' güen len Diosen'. Na' la'czla' ba got Abelen', da' gwzoe' gwejnilaže' Diosen', naquen ca to da' chneyoen chio' soaczcho šejnilaže'cho Diosen'.

<sup>5</sup> Na' lecze da' xozxta'ocho Enoc gwzoe' gwejnilaže' Diosen', na' da'n'an' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xtiža' Diosen', žan Diosen' bebede' Enoquen' šlac gwzoe' yežlion'. <sup>6</sup> Na' Diosen' bi chebede' note'teze bene' bi chejnilaže'ne'. Le note'tez bene' yoł güiže' Diosen' cheyała' šejle'e zoacze Diosen' na' šejle'e gwnežjue' yela' mban toli tocanē che note'tez bene' nabden' le' do yichj do laže'.

<sup>7</sup> Na' ca nac da' Noé, lecze gwejnilaže' Diosen', na' cate' Diosen' bosnisde' le' can' za' gac, gwejle' Noén' can' gož Diosen' le', na' do bžebe' bene' to barcw

gan' gwo'e len bene' lo' yo'o che' ca' cont bi gosate' lo nisen'. Na' da' gwey-  
jle' Noén' can' gwna Diosen', blo'ede' yez-  
ica'chle bene' že' na' zjanape' doľa' da' bi  
bosozenague' che Diosen'. Na' lecze da'  
gwejnilaže' Diosen', goc gwna Diosen'  
naque' bene' güen len le'.

<sup>8</sup>Da' Abrahanna' lecze gwejnilaže'  
Diosen'. Da'nana' bzenague' cate' boľ güiž  
Diosen' le' na' gože'ne' šejje' ga de to  
yežlio zito' da' gaquen che'. Na' gweyje'  
la'czla' bi nombi'e latjen'. <sup>9</sup>Na' Abra-  
hanna', da' gwejnilaže' Diosen' jasoe'  
laž bene' zito' da' gwna Diosen' gac che'  
na' gac che xi'in diaža che'. Gwzoe' lo'  
yo'o de lache'ze na' lecz lo' yo'o de  
lache'ze gwnita' xi'ine' Isaaquen' na' xi'in  
xesoe' Jacob bene' lecze gož Diosen' gac  
yežlion' chegaque'. <sup>10</sup>Abrahanna' gwzoa  
gwleze' ca' lo yežlion', le gwneзде' žin ža  
šjayzoe' gan' zoa Diosen' gan' naquen to  
ciuda güen da' bi te chen, ciuda da' ben  
Diosen'.

<sup>11</sup>Na' Saran' no'ol nac no'ol che Abra-  
hanna', la'czla' naque' bene' güiž na'  
naque' bene' gole par soa xi'ine', Diosen'  
bene' to yela' guac cont gwzoa xi'ine',  
le gweyje'e gon Diosen' con can' gwne'  
gone'. <sup>12</sup>Ca' goquen' gwzoa bi' che da'  
Abrahanna' la'czla' goque' bene' gole  
par soa xi'ine', nachen' xi'in diaža che'  
gosaque' bene' zan can' zjanac beljw ca'  
na' can' nac yox da' chi' cho'a nisaon' da'  
nono chac gwlab.

<sup>13</sup>Yogo' bene' ca' ne' chesejnilaže'  
Diosen' cate' bžin gosate'. Na' la'czla'  
bina' gac lo na'gaque' dan' gože' le-  
gaque' gac chegaquen', bi gosacžejaže',  
san gwnite' mbalaz gosejle'e gwžin ža  
gon Diosen' can' gwnen'. Goso'e diža'  
zjanaque' ca' bene' zito' len bene' že'  
lo yežlion' na' bibi lažgaque' de lo  
yežlion'. <sup>14</sup>Na' da' goso'e diža' bibi  
lažgaque' de yežlion', nabilia' goseze-  
laže' yesyežine' ga yoble gan' gac laž-  
gaque'. <sup>15</sup>Šaca' gosone' xbab che yežen'

gan' gosaljen' naquen lažgaque', gota'  
latje jaya'aque' šaca', perw bi gosone'  
xbaben' ca'. <sup>16</sup>Gosezelaže' yesyežine' ya-  
ban', le gosejle'e na'len' nac lažgaque', na'  
gosezede' nacchen güenč ca yežlion'.  
Da'nana' Diosen' bi cheto'ede' chegaque'  
že' naque' Dios ben' chesonxene', na' ba  
benšagüe' to ciuda gan' zjanite'.

<sup>17</sup>Na' Abrahanna' da' gwejnilaže'  
Diosen' da'nana' bzenague' cate' Diosen'  
bene' le' prueba gože'ne' cheyala' got  
xi'ine' Isaaquen' lao Diosen' cont gonx-  
ene'ne'. Ba zoa gote' xi'inen' la'czla'  
gwneзде' Diosen' gože'ne': <sup>18</sup>“Gona' cont  
nita' xi'in diaža chio' bene' yesac xi'in  
diaža che Isaaquen'.” <sup>19</sup>Da' Abrahanna'  
bechoglaže' gote'be', le gwneзде' Diosen'  
chac chosbane' bene' guat. Perw na'  
Diosen' bi be'e latje gote'be'. Da'nana' guac  
nacho bosbane'be' ladjo bene' guaten',  
la'czla' gague gotbe'.

<sup>20</sup>Gwdechle Isaaquen' gwejnilaže'  
Diosen'. Da'nana' gwñabde' Diosen' gone'  
güen len xi'ine' Jacob na' Esaú. <sup>21</sup>Lecze  
da' Jacoben' gwejnilaže' Diosen'.  
Da'nana' cate' ba zoa gate', gwñabde'  
Diosen' gone' güen len xi'in xesoe' ca'  
bin' gosac xi'in da' José. Na' bcheque'  
yichje' benxene' Diosen' nchiše'teze'  
carrot che'. <sup>22</sup>Na' da' Josén' gwejnilaže'  
Diosen', na' gweyje'e žin ža yesyechoj  
bene' gualaž che' ca' Egipton' can' gwna  
Diosen'. Nachen' cate' ba zoa gate'  
bžie' bia' yesyeyo'e žit benat chen' cate'  
yesyeya'aque'.

<sup>23</sup>Cate' golje da' Moisésen', da'  
leca gosejnilaže' xaxne'en Diosen', bi  
besežebe' yesyedabague' dan' bžia  
bia' reyen' yesone', gwne' cheyala'  
yesote' bi' byo chegaque' ca'. Šone bio'  
bosocuaše'be' ližgaquen', le gosacde'  
nacchguabe' xdan. <sup>24</sup>Nach bi' no'ol che  
rey beque'ebe' boscha'ogüe'be'. Perw  
cate' ba gwcha'o da' Moisésen' bžone'  
yesone' le' ca' xi'in bi' no'ol che rey  
che Egipton', le gwejnilaže' Diosen'.

<sup>25</sup> Da'nan' gwyazlaže'che' bžaglagüe' txen len bene' gualaż che' ca' yogo' dan' bososaca'zi' bene' Egipto ca' legaque', clcl ca gone' txen len bene' Egipto ca', le gocbe'ede' yob te che yela' chebe che da' xinj' ca' cheson legaque'. <sup>26</sup> Goclaže' bžaglagüe' can' bžaglao Criston' cont bene' can' gwyazlaže' Diosen', bi gwzelaže' gac che' yogo' yela' gwñi'a da' de che bene' Egipto ca', le gwñezde' gwžin ža gon Diosen' cont soe' mbalaz. <sup>27</sup> Na' da' gwejnilaže' Diosen', bi bžebe' rey cate' bžin ža besyechoje' Egipton' la'czla' reyna' bža'achgüe' legaque', con gwzoacze' bzenague' che Diosen'. Gwñezde' zoacze Diosen' la'czla' bi chle'echone'.

<sup>28</sup> Nach Moisésen' da' gwejnilaže' Diosen' bžie' bia' da' xozxta'ocho ca', bene' že' to to yo'o gosote' to xila' dao' na' bosoži'e xchemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o. <sup>29</sup> Na' da' xozxta'ocho ca' gwnita' cani', da' gosejni-laže' Diosen' da'nan' Diosen' bene' cont Nisdao' Xnan' goquen chople, na' bla' yo biž gacholen cont goc goselaguen'. Perw bene' Egipto ca' cate' gosaclaže' leze yeselague' nisdaon', bocuaše' nisa' gan' chesedien', na' gosate' gose'eje' nisen'.

<sup>30</sup> Lecze da' gosejnilaže' da' xozxta'ocho ca' Diosen', da'nan' Diosen' bene' cont bebix ze'e da' gwyechj doxen ciuda Jericó cate' gosechje' ze'en yogo' ža lao gaže ža. <sup>31</sup> Na' da' no'olen' le' Rahab, no'olen' goque' no'ol zle', lecze gwejnilaže' Diosen', na' da'nan' bi gwžiyae'e txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia jasene'e lažen'.

<sup>32</sup> Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefté, che

da' rey David, che da' Samuel, na' che yezica'chle bene' goso'e xtiža' Diosen' cani'. <sup>33</sup> Da' gosejnilaže' Diosen' besechoje' gosone' gan cate' gosedi'e len no rey, na' ba'e' gosaque' bene' gwnabia' na' gosone' byen goson bene' yoble da' güen, yeba'e' besele'ede' ben Diosen' bi da' güen da' gwne' gone' len legaque', yeba'e' Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'. <sup>34</sup> Lecze da' gosejnilaže' Diosen', ba'e' bi goseye' cate' bene' bosozale' legaque' lo yi', yeba'e' besyele' cate' bene' gosaclaže' yesote' legaque' len spada, yeba'e' beyon Diosen' legaque' bene' gual cate' bich zjanale', yeba'e' goclene'ne' gosaque' soldadw gual cont gosone' gan cate' soldadw bene' zito' gosedi'lene' legaque'. <sup>35</sup> Na' gwnita' no'ol ca' da' gosejnilaže' Diosen' da'nan' Diosen' bosbane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejni-laže' Diosen' da'nan' gosate', bi gosaclaže' yesyele' lo' na' bene' mal ca'. Goso'e latje bosochi bososaque' legaque', le gosenezde' gwžin cate' Diosen' yechis yosbane' legaque' ladjo bene' guat ca' cont yesenite' len le'. <sup>36</sup> Gwnita' yeba'e' leca gosezi'diža' bene' legaque' na' leca goseyine' legaque', na' bosochije' legaque' gden na' goseyixjue' legaque' ližya. <sup>37</sup> Na' bene' ca' besegue'e legaque' gosote' legaque', ba'e' bosochel'e' legaque' yej, yeba'e' bosozoxje' cuerp chegaquen' len sier, yeba'e' gosote' len spada. Na' ba'e' bene' ca' gosejni-laže' Diosen' benen byen gosaše' yixe' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'. <sup>38</sup> Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjazaca'chgüe' na' bene' že' yežlio nga

bi zjazaque' yesenite' txen len legaque'.  
<sup>39</sup>Diosen' bebede' yogo' bene' ca' da' gosejnilaže' le', perw šlac gosenite' bina' gone' yogo' da' güen da' gwne' gone' che xi'in diaža che da' Abrahanna'.<sup>40</sup>Le goclaze' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

### Cheyala' soacho goncho xbab che Jesúsén'

**12** Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyala' goncho. Da'nan' cheyala' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyala' soatezcho goncho can' ža Diosen' sin cbi yeche'echo.<sup>2</sup> Jesúsén' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyala' soacho goncho xbab ca' Jesúsén' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnezde' za' gon Diosen' cont soe' mbalaz len le'. Na' na'a Jesúsén' ba chi'e chnabi'e txen len Diosen'.

<sup>3</sup>Cheyala' goncho xbab can' byo bchejlaže' Jesúsén' len yogo' da' ca' gosone bene' mal' ca' le' na' bene' can' gwna Diosen'. Na' ca'cze cheyala' gwyo gwchejlaže'cho goncho can' chazlaže' Diosen' la'czla' še chaquechon zdebe; bi cheyala' yeche'echo.<sup>4</sup>Da' zan da' ba bžaglaole chdillenle da' malen', perw bina' lalj xchenle na' bina' yesote' le'e.<sup>5</sup>¿Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj, na' bi gaco' tole cate' chdile' le'.

<sup>6</sup>Le Xancho Diosen' chzejni'ide' yogo' bene' chacde', na' chnežjue' da' saca'zi' yogo' bene' ba gwque'e ca' xi'ine' cate' chesone' da' xinj.

<sup>7</sup>Cheyala' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca' benachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj.<sup>8</sup>Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca' xi'ine' chnežjue' da' yezezaca'zi'e cate' chesontez' da' xinjen'.<sup>9</sup>Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyala' yesone'. Nacchxe cheyala' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocanē.<sup>10</sup>Na' xaxna'chon' to chop izzen' šlac bososgole' chio' gosone' castigw checho con ca' gosaclaze'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'.<sup>11</sup>Na' bite'tez da' chy chzaca'cho, šlac chaquen bi chazlaže'chon, perw cate' ba gwden chacle- nen goncho da' zej to licha na' chacle- nen soacho binloch len xbab da' yo'o lo' yichjlažda'ochon'.

### Diosen' gone' da' saca'zi'cho še bi gwzenagcho che'

<sup>12</sup>Da'nan' le' soa le' gon can' chazlaže' Diosen' sin cbi yeche'ele.<sup>13</sup>Le' soa le' gon da' güen cont gaclenle bene' ca' ne' chesaczejlaže' naquen yesone' cont le-



gaque' yosozenagche' che Diosen' na' bi yesebejyichje' xtižen'.

<sup>14</sup>Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. <sup>15</sup>Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzolaochoncho güedenag len Diosen', bedao' chča'o chxenen na' guacte gonen cont bene' zan yesonche' da' xinj. <sup>16</sup>Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. <sup>17</sup>Nezele gwdechle goclaže' yeyac lo ne'e da' bdie' lo na' bene' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

<sup>18</sup>Nža'le chac che chio' na'a na' can' goc che da' xozxta'ocho cani' cate' Diosen' bnežjue' legaque' ley chen'. Cate' betje' lo ya'a Sinaí gwyechj yi' bel ya'ana', gwxoan žen, beyaquen chol, na' gwyechjchgua be'. <sup>19</sup>Gosende' gwchež to trompeta, na' gosende' be' Diosen' diža' len legaque'. Na' besežebchgüe' na' gosata'yoede' Moisésen' bich güe'len Diosen' legaque' diža'. <sup>20</sup>Besežebchgüe', le Diosen' ba gožle' legaque' še noe' yesebigue' lo ya'an cheyala' yesote'ne' yosochelene' yej, na' lecz ca' yesone' še len beyixe'. <sup>21</sup>Da' zaca' žebcho goc lo ya'an, lente da' Moisésen' gwne': "Leca chaž chžeba' can' chaquen'."

<sup>22</sup>Perw chio' chejnilaže'cho Criston' ba naccho txen len Diosen' ben' zoa toli to-cane na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'n'an' guac nacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'. <sup>23</sup>Na' naccho txen len yogo'lošte

bene' chesedop chesežag chesonxene' Jesucriston' gate'teze, bene' zjanyoj la-gaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chio'. Na' naccho txen len Diosen' bene' choglaogüen' che yogo' benačh še de xtoła'gaque'. Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'. <sup>24</sup>Na' naccho txen len Jesús ben' blalj xchene' cont gwzolaochac da' coben' da' gwna Diosen' gone' gaclene' benačhen'. Na' blalj xchene' cont ba bñitlao Diosen' xtoła' chio' chejnilaže'chone'. Da'n'an' xchen Jesús en' zaca'chen ca xchen da' Abelen' da' gwllalj caten' betw bene' bišen' le'.

<sup>25</sup>Da' mal juisyw še goncho güedenag len Diosen' cate' chne' chio'. Bene' cont gosezaca'zi' da' xozxta'ocho ca' cate' gosone' güedenag len xtižen' da' gwnelene' legaque' lo yežlion' cani', na' gonche' da' saca'zi' chio' še goncho güedenag len xtižen' da' choelene' chio' lo' lažda'ochon' zoe' yaba na'ate. <sup>26</sup>Leca gwxo' cate' Diosen' betje' lo ya'a Sinaín' cont be'lene' da' xozxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." <sup>27</sup>Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. <sup>28</sup>Da'n'an' cheyala' güe'cho yela' choxcen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheyala' gacbe'echo bene' zaca'chgua nac Diosen' cont gonxenchone' do yichj do laže'cho can' chazlažen'. <sup>29</sup>Cheyala' gwzenagcho

chen', le Dios chechon' leca chgue'ede' da' malen', na' sele' lo yi' gabil' bene' ca' bi yesyetejnide' che da' xinjen', da'nan' zaca'lebde' ca' yi' bel'.

### Da' chazlaže' Diosen' goncho

**13** Bitw gwsanle gague lježle, le yogo'cho chejnilaže'cho Jesucriston' naccho ca biše' lježcho. <sup>2</sup>Na' bi ganlaže'le cheyała' gwleble bene' za'ac zito' ližlen' bene' chesejnilaže' Jesucriston'. Bal xozxta'ochu ca' cate' bosolebe' bene' zito' ližgaquen' bosolebe' angl bene' gwseła' Diosen' neca gosacbe'ede'.

<sup>3</sup>Cheyała' gonle xbab che bene' lježcho ca' chesata' ližya cont gaclenle legaque'. Na' cheyała' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' chosochi chososaca' bene' legaque', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gale'le šaca' chac chele can' chac che bene' ca'.

<sup>4</sup>Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

<sup>5</sup>Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." <sup>6</sup>Da'nan' bibi de da' žebcho, na' to tocho guac nacho:

Xana' Diosen' zoe' chaclene' neda'.

Bi žeba' bi da' gone benachen' neda'.

<sup>7</sup>Le šjazyze' bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosacbe'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

<sup>8</sup>Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gague' toli tocañe. <sup>9</sup>Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e bałe'. Da' chon Diosen' lo' lažda'ochon' neche da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca' nac da' ca' chesene' cheyała' ye'ej gagwcho cont yebe Diosen' chio', bina' yesaclenen bene' ca' chesene' cheyała' gagwchon, na' neca gaclenen chio'.

<sup>10</sup>Xancho Jesucriston' bnežjw cuine' gosote'ne' neche chio', na' da' chejnilaže'chone' ba gwnitlao xtoła'chon'; perw bene' ca' ne' chosolalje' xchen beyixe' na' chosozeje'ba' cate' chesenabe' yezi'xen Diosen' chegaque', da' got Jesucriston' bi chaclenen legaque'. <sup>11</sup>Nezecho tni'a tgüiz bene' nac bxoz blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chnabde'ne' yezi'xene' xtoła' yogo'loł gague'. Nach yezica'chle bxoz ca' chosozeje' cuerp che beyixe' ca' cho'a yežen'. <sup>12</sup>Na' ca' ca'le goc che Jesúsen' dan' gosote'ne' cho'a ciuda Jerusalénna' cate' bnežjw cuine' cont beque'e xtoła'chon' len xchene' dan' blaljen'. <sup>13</sup>Da'nan' cheyała' šejnilaže'cho Jesúsen' na' cuejyichjcho costumbr gol ca', la'czla' yesegue'e bene' chio' da' choncho ca'. <sup>14</sup>Gate'tez zoacho lo' yežlio nga da' te chen, perw chbezcho šjazyzoalencho Diosen' lo' ciuda da' bi te chen. <sup>15</sup>Da' ba beca'a Jesucriston' xtoła'chon' cheyała' güe'cho yela' choxclen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'. <sup>16</sup>Na' cheyała' soacho goncho da' güen na' cheyała' gwnežjwcho con gacate da' saque' gwnežjwcho gaclencho bene' bi

de čhegaque', le chazlaže' Diosen' cate' chonxenchone' choncho ca'.

<sup>17</sup>Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaue' cheyala' yosyodie' cuent lao Diosen' še naquen' ba gosone'. Le gwzenag čhegaue' cont yesyebede' na' cont da' chesone' bi gaquen to da' zdebe, le še gonle güedenag len legaue', bibi da' güen chga'an chele še ca'.

<sup>18</sup>Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen güen. <sup>19</sup>Na' leca chata'yoeda' le'e yol güižle Diosen' nable yob gac yidcha' gan' zoalen'.

### Chnabe' gaclen Diosen' legaue'

<sup>20</sup>Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bechis bosbane' Xancho Jesucriston' ladjo bene' guat, le da' blalj xchenen' le'e yag cruzen' gwzolao chac da' cobe da' gwna Diosen'

gone' gaclene' bene' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca to bene' güeye' xila' bene' chon da' güen juisyw len be che' ca'. <sup>21</sup>Na' chnabda' Diosen' gac-lene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli tocane. Na' ca' gonšcaczcho.

<sup>22</sup>Bene' migw, chnabšca' bi gaquele zed da' ba bzoja' le'e chneyoeda' le'e nga, le bitec naquen da' tone. <sup>23</sup>Na' chzenda' le'e bene' migw checho Timoteon' ba bechoje' ližyan' na' chbeza'ne' nga. Na' še yob yele'e nach čhi'ane' cate' yedena'a le'e.

<sup>24</sup>Ca nac neda', chguapa' tiox bene' blao ca' choszejni'ide' le'e na' chosogüia chesene'e le'e, na' lecze chguapa' tiox yogo' nochle bene' chesejnilaže' Diosen'. Bene' lježcho ca' za'ac Italia lecze chosoguape' le'e tiox.

<sup>25</sup>Diosen' gaclenšque' le'e. Da' na'zen' chzoja'.

## CART DAN' BZOJ SANTIAGO

### Santiagoŋ' chguape' tiox bene' ca' zjanaslas zan yež

**1** Neda' Santiago naca' bene' güen žin che Diosen' na' che Xancho Jesucriston'. Chguapa' le'e tiox, le'e nacle šižinw cue' xi'in diaža che da' Israel, le'e chejnilaže'le Jesucriston' na' naslasle yežlion'.

### Nac nezecho can' che'ne Diosen' goncho

<sup>2</sup>Bene' migw, cheyała' yebechgüecho cate' chac bite'teze da' chac checho. <sup>3</sup>Cate' chac bi da' chac checho chonen chio' prueba še gončachlaže'cho šejnilaže'cho Diosen'. Na' nezecho cate' chončachlaže'cho chejnilaže'chone', chacle-nen chio' cont gapchcho yela' chxenlaže' len bite'teze da' chac checho. <sup>4</sup>Na' da'nan' cheyała' gapple yela' chxenlaže' bite'teze dan' chac chele na' gončachlaže'le šejnilaže'le Diosen' cont gacle can' chaclaže' le'.

<sup>5</sup>Note'tezcho cate' bi nezecho naquen' chaclaže' Diosen' goncho, cheyała' nabe-chone' gwzejni'iden' chio', na' gwzejni'iczeden'. Le chebede' chaclene' chio', na' bitw chdile' chio' cate' chnabe-chone' gaclene' chio'. <sup>6</sup>Perw cate' chnabe-chone' gwzejni'ide' chio', cheyała' šejle'cho chzenagcze' chechon' na' bitw gacžejlaže'cho. Bena' chacžejlaže' še chzenag Diosen' che', zaca'lebde' ca nisdao' dan' chas chata' cate' chechj be' lagüen' na' chjatan' nile na'le. <sup>7</sup>Ben' chacžejlaže' še chzenag Diosen' che', bitw cheyała' soe' lez gwnežjw Diosen' le' bite'teze da' chnabe'. <sup>8</sup>Na' ben' chon ca' bitw nezde' bi xbab chone', con šayichj šayen chaque' len bite'teze dan' chonen'.

<sup>9</sup>Na' bene' migw, le'e chejnilaže'le Diosen', še nole nacle bene' yaše', le

soa mbalaz, le nacle bene' zaque' len Diosen'. <sup>10</sup>Na' bene' migw, še nole nacle bene' gwni'a, le soa mbalaz dan' ba chacbe'ele lao Diosen' bitw zaca'chle clel ca yezica'chle bene'; na' yob te che yela' gwni'an' can' chde che yej ca' zjaze yixe'. <sup>11</sup>Cate' chna'chgua gwbižen' chesecquad yixe' ca', na' cheseyinj laga' che yejen' na' bich chosolo'en xdan. Can' chac len yej ca', lecze can' gac len bene' gwni'a ca', yeyol yenite' lao xšinen'.

### Cheyała' soateze soacho šejnilaže'cho Jesucriston' bite'teze dan' chac checho

<sup>12</sup>Še chyo chčejlaze'cho len da' chac checho na' chončachlaže'cho chejnilaže'cho Diosen', nachen' leca mbalaz zoacho. Na' cate' te dan' chy chzaca'chon', Diosen' gone' cont bancho len le' toli tocane can' gwne' ban yogo'cho chaquechone'. <sup>13</sup>Na' note'tezcho cate' žan goncho da' malen', bitw gac nacho Dios nan' chgo'oyele' chio' goncho da' malen', le Diosen' bitw chgo'oyele' bene' yesone' da' mal. Lecze ca' le', bitw bi de da' chgo'oyela' le' cont gone' da' malen'. <sup>14</sup>Yela' chzelaže' checho dan' yo'o lo' yichjlažda'ocho chonen cont chzelaže'cho choncho da' mal. <sup>15</sup>Na' še ba choncho can' ža yela' chzelaže' dan' yo'o lo' yichjlažda'ocho na' zoacho choncho da' malen', nach gwžin ža cate' cuejyichj Diosen' chio' na' bitw šjayzoacho len le'.

<sup>16</sup>Bene' migw, bitw siye' cuinle gonle xbab Dios nan' chgo'oyele' le'e cont gonle da' malen'. <sup>17</sup>Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. <sup>18</sup>Gwyazlaže' Diosen' bocobe' yichjlažda'ocho cate' gwyejle'cho che diža' li chen'. Na' ba

bocobe' yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

### Can' goncho cont yebe Diosen' chio'

<sup>19</sup> Bene' migw, nezele cheyała' yebecho gwzenagcho che diža' güen, na' cheyała' goncho xbab cate' za' necho, na' neca la' ža'atecho. <sup>20</sup> Cate' chža'acho, bitw chac goncho güen can' chaclaže' Diosen' goncho. <sup>21</sup> Da'nan' cheyała' cuejyichjcho yogo'lol da' xinjen' ba benchon' na' yogo'lol da' chgue'e Diosen' da' gwcha'o gw Xenen lo' yichjlažda'ochoc cate' bina' šejnilaže'chone'. Cheyała' gwzexjw yichjcho na' gwzenagcho diža' li che Diosen' dan' ba yo'o lo' yichjlažda'ochon', cont gata' yela' mban checho toli tocane.

<sup>22</sup> Na' cheyała' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. <sup>23</sup> Ben' chene diža' li che Diosen' na' bi chone' can' žanna', zaca'lebbe' ca to bene' chna' cho'alagüen' lo spejw, <sup>24</sup> le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'. <sup>25</sup> Perw bene' zoacze' chzenague' xtiža' Diosen' do yichj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

<sup>26</sup> Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'. <sup>27</sup> Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

### Toze can' cheyała' goncho len yogo' bene'

**2** Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyała' goncho len note'teze bene', bitw nacho balze bene' gonxenchguachone' na' yebale' gonechone' nacteze. <sup>2</sup> Še yesela' chope bene' gan' chdop chžagcho chonx-encho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyała' goncho len chope'. <sup>3</sup> Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo". <sup>4</sup> Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

<sup>5</sup> Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'. <sup>6</sup> Perw na' chonle bene' yaše' ca' ca bene' bibi zjazaca'. Na' bene' gwni'a ca' chongaclene' ca bene' zjazaca'chgua; len legaquen' chosochi chososaque' le'e na' cheseche'xoxje' le'e lao justis ca'. <sup>7</sup> Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

<sup>8</sup> Ley dan' nac da' žialao lao yogo' da' ca' nyela' le'e Xtiža' Diosen' žan: "Le gague ljež benachle ca' chaque cuinle." Še da' licze chonle can' žanna' chonczle güen. <sup>9</sup> Perw ley che Diosen' chchoglaon chele nable doła' še chonxenle bal bene' na' yebale' chongaclene' ca bene' bibi zaca'. <sup>10</sup> Can' naquen, note'teze bene' zoe'

chone' dołoł can' ža leyna', perw na' še ba gwchoe' to da' dao', len doxen leyna' chape' doła' še ca'. <sup>11</sup>Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leczen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba naccho bene' güet bene', bia'cze napcho doła' len leyna'. <sup>12</sup>Xtiža' Diosen' chaclenen chio' cont bi gwzenagcho che da' malen'. Na' cheyała' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'. <sup>13</sup>Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benače'. Perw bene' ca' chesyeyaše' chesyezi'ilaže'de' ljež benače', Diosen' yeyaše' yeži'ilaže'de' legaque'.

#### Bitwbi zejen še con žacho chejnilaže'cho Jesucriston'

<sup>14</sup>Bene' migw, še to bene' že' chejni-laže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli' tocañe še con žaze' ca'. <sup>15</sup>Bał bene' lježcho bene' chesejnilaže' Jesucriston' bi de da' yese'ej yesagüe' na' bi de xałana'gaque'. <sup>16</sup>Na' še bitw gaclenchone' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen", bitwbi zejen dan' con nacho ca'. <sup>17</sup>Da'nana', še con žacho chejni-laže'cho Jesucriston' perw bitw choncho da' nac da' güen, bitwceze bi zejen dan' žacho chejnilaže'chonen'.

<sup>18</sup>Nita' bene' chesene' guac yesejni-laže' Jesucriston' la ca' yesone' da' nac da' güen. Na' lecze nita' bene' chesene' še chejnilaže'cho Jesucriston' cheyała' goncho da' nac güen. Na' žia' le'e, še nacho chejnilaže'cho Jesucriston' perw bitw choncho da' güen, bitw nacbia' še

chejnilaže'chone'. Perw še da' li chejni-laže'chone' nach soacho goncho da' güen na' yesacbe'e bene' le chejnilaže'chonen'. <sup>19</sup>Chejle'cho toze Diosen' zaque' gonxenchone', na' ca'czen' cheyała' šejle'cho. Perw gague da' ca'zen' cheyała' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben. <sup>20</sup>Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žacho chejni-laže'chone'. <sup>21</sup>Da' xozxta'ocho Abrahanna' blo'e le gwejnilaže' Diosen' dan' bzenague' che Diosen'. Da'nana' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'nana' Diosen' gwne' che' le naque' bene' güen len le'. <sup>22</sup>Na' nezecho can' ben da' Abrahanna', gague con gwejnilaže'ze Diosen', san lecze bzenague' che'. Na' dan' bene' ca' blo'e le gwejnilaže' Diosen'. <sup>23</sup>Da'nana' goc can' nyoj Xtiža' Diosen' che', žan: "Abraham gwejnilaže' Diosen' na' da'nana' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

<sup>24</sup>Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nana' že' naccho bene' güen len le'. <sup>25</sup>Na' da' Rahab goque' no'ole zle' no'ol con gwej len note'teze bene' byo, perw bzenague' che Diosen' cate' blebe' bene' ca' chope jasegüia jasene'e laže'na'. Na' blo'ede' legaque' yetole nez ga jaya'aque' cont bi jasyexen soldadw che rey legaque'. Na' dan' goclene' bene' ca', blo'e gwejnilaže' Diosen'. Na' gwna Diosen' naque' bene' güen len le'. <sup>26</sup>Quinga naquen: Še to bene' bich nye'e biš grasyw, nacbia' naque' bene' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

### Choncho da' xinj len xtiža'cho

**3** Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'nan' žia' le'e, gague la' si'te lo na'le gwsed gwlo'ele bene' yoble xtiža' Diosen'. <sup>2</sup>Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen na' gwzoczdde' nabi'e doxen cuerp chen' še ca'. <sup>3</sup>Caten' chgo'ocho freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'. <sup>4</sup>Na' ľecze bene' ca' chososa' barcw xen ca' chosochine' yag da'oze dan' chosose'eden' cont chejen con gate'teze chesende', ľa'czla' še chžiga' to be' gual ľegaquen'. <sup>5</sup>Ca'czen' naquen len ľože'chon'. Toze da' dao' rizen' naquen lao cuerp chechon', perw chac chnelenchon diža' da' zjazaca'. Na' ca' nac to yi' dao' riz, guac gwzeyen to ya'adao' xen, ca'czen' naquen len ľože'chon' cate' chnelenchon diža' mal. <sup>6</sup>Ľože'chon' naquen to da' chnabia' chonchguan da' xinj juisyw lao doxen cuerp chechon'. Ľože'chon' naquen ca' to yi' beľ da' chla'an chca'an nile na'le chzeyen bite'teze da' de, ľe še choe'cho diža' malen' chyaľa'ch yogo'ľolte da' xinj dan' chonchon', na' chonen cont zoacho chonchguacho da' xinj yešlale mbancho. Na' che gwxiyen' chzenagcho caten' choe'cho diža' mal ca'. <sup>7</sup>Chac chnabia'cho yogo'te beyixe', be žia tap ni'a na', be žia xil, be chda nxobe ľe'e, na' be ca' že' ľo' nis. Ba gwnita' bene' gosenabi'eba'. <sup>8</sup>Perw ne to chio' bitw soečo ľože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca' venen che to beľ znia. <sup>9</sup>Len xtiža'chon' chonxencho Dios ben' naque' Xacho. Na' ľecze len xtiža'chon' chžiacho yela' ya' che ľež benachcho

bene' ca' ben Diosen' can' nac ľe'. <sup>10</sup>Na' cho'acho na' chchoj diža' šagüe' cate' chonxencho Diosen' na' ľecze chchoj diža' mal cate' chžiacho yela' ya' che ľež benachcho. Bene' migw, bitw choncho ca' cheyaľa' goncho. <sup>11</sup>Nezecho ga' chal nis bitw žia nis sia na' nis zbapj toz bej. <sup>12</sup>Na' ľecze ca' bene' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' ľecze ca' ga' chal nis, bitw chchoj nis sia to bej ga' žia nis zbapj.

### Can' goncho še Diosen' ba bene' chio' yela' sina' chen'

<sup>13</sup>Še note'tezle žale nacle bene' sina' na' chejni'ile xtiža' Diosen', cheyaľa' gonľe yogo'ľol can' chazlaže' Diosen'. Cheyaľa' gonľe da' güen sin cbi gonxen cuinľe cont nacbia' nacle bene' sina'. <sup>14</sup>Perw še chgue'e ľežle na' chzelaže'le gacchle bene' blaoch ca' bene' ľežle, bitw cheyaľa' nale nacle bene' sina', ľe con chonlaže'len' še ca'. <sup>15</sup>Na' še chgue'e ľežle na' chzelaže'le gacle bene' blaoch ca' bene' ľežle, bitw nacle bene' sina', san xbab chelen' zan' che Satanás dan' chnabia' da' xigüe' ca', na' con chonľe da' xinjen' can' ža lažda'olen' na' can' cheson bene' ca' bi zjanombia' Diosen'. <sup>16</sup>Še chgue'e ľežcho na' chzelaže'cho gaccho bene' blaoch ca' ľegaque', bitw zoacho binľo len ľegaque' še ca', na' choncho yogo'te da' xinj. <sup>17</sup>Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binľo len ľežcho na' naccho bene' xenlaže' na' chzexjw yichjcho cont chzenag che ľežcho. Na' ľecze cheyaše' cheži'ilaže' ľežcho na' choncho da' güen len ľegaque', na' toz ca' choncho len note'tez bene'. Na' bite'tez da' choncho, chonchon do laže'cho. <sup>18</sup>Nach še chebecho yesezoa yesebez bene' binľo na' chaclencho bene' yezica'chle cont yesezoa

yesebeze' binjo, na' chaclenen cont yeson bene' da' güen.

**Bitw gac goncho can' cheson  
bene' bi zjanombia' Diosen'**

**4** Chdile chšašlen lježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca žan chele. <sup>2</sup> Chzelaže'chguale bi da' gata' chele na' chdile chšašlen lježle na' chaclaže'tele gotle bene' cont gata' chele dan' chzelaže'len'. Perw bitw gata' dan' che'nelen' lagüete chonle da' xinj na' bi chnabele Diosen' gone' cont gata' dan' chyažjelen'. <sup>3</sup> Na' cate' chnabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele. <sup>4</sup> Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len bene' mal ca', choncho contr Diosen' na' bich chaquechone' ca cheyała'. Zaca'lebcho ca to no'ole nzoa xto, no'ole ben' bich chacde' bene' che'. <sup>5</sup> Chonljale xbab Xtiža' Diosen' bitw bi zacan' gan' nyojen žan: “Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'.” <sup>6</sup> Diosen' chaclenchgüe' chio' cont chzenagcho che toz le'. Da'nan' nyoy Xtiža' Diosen' žan: “Diosen' chone' contr bene' ca' chesonxen cuingaque', perw chaclene' bene' ca' chesacbe'ede' bi chosozenague' che' ca cheyała'.” <sup>7</sup> Da'nan' cheyała' gon cuincho lo' na' Diosen' na' gwyo gwchejlaže'cho bi gwzenagcho che Satanásen'. Še goncho ca', gwcuasecen ca'ale. <sup>8</sup> Le soa le yo! güiž Diosen', nach soe' gaclene' le'e. Cheyała' cuejyichjle da' xinj da' chonle. Na' še chonle xbab guac

gonxencho Diosen' na' gontezcho can' ža lažda'ochon', clelen' chonle xbaben' še ca', na' cheyała' güe'le latje yeyon Diosen' yichjlažda'olen' xilaže'. <sup>9</sup> Bi cheyała' yebele, san cheyała' yegüine'le neche da' xinjen' ba benlen' na' yeto'ele chen. <sup>10</sup> Cheyała' gwzexjw yichjle lao Xancho Diosen', nach Diosen' gone' cont gacxenle.

**Bi cheyała' nacho che  
lježcho nape' doła'**

<sup>11</sup> Bene' migw, bi cheyała' nelaocho che lježcho. Ben' chnelagüe' che lježe' o chosbaguede' lježe', benan' chne' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca bene' zaque' cont že' che bene' lježe' nape' doła', chone' ley che Diosen' ca to da' bibi zaca'. <sup>12</sup> Toz Dios nan' gwduxjue' leyna', na' toz le'na' zaque' choglagüe' che to tocho še napcho doła'. Na' toz le' zaque' gone' cont bi šjaya'ac bene' lo' yi' gabilen', na' lecze zaque' cont yesele' bene' lo' yi' gabilen'. Perw chio' bitw zaca'cho nacho che bene' lježcho zjanape' doła'.

**Bitw nezecho bin' gac gwxe güižj**

<sup>13</sup> Na' le gwzenag da' nga: Balle chchogbia'len šejle to ga šejle gonle negosyw cont gonle gan. Na' chbejle to ža cate' šejle na' chchogbia'len yega'anle na' tgüiz, <sup>14</sup> neca chacbe'ele bi nezecho bin' gac checho o nac goncho gwxe güižj. Yela' mban chechon' zaca'leben ca to bejw, le bejon' šlože chle'echon na' cheyasen. <sup>15</sup> Cheyała' nacho: “Še Xancho Diosen' gone' latje bancho, na' goncho to da' goncho.” <sup>16</sup> Perw da' xinjen' choncho še chonxen cuincho chžiacho bia' naquen' goncho sin cbi nabecho Diosen'. <sup>17</sup> Na' še nezecho cheyała' goncho da' nac güen na' bi chonchon, napcho doła' lao Diosen'.



**Da' malchgua gac che bene' gwñi'a  
ca' bene' bi chosozenag che Diosen'**

**5** Na' ca nac le'e bene' gwñi'a, le'e bi chzenagle che Diosen', le soayaše' na' le cuezyaše', le leca za' saca'zi'le. <sup>2</sup>Lao Diosen' dan' de chele naquen ca to da' ba chbiayi', na' lache' šagüe' che-len' naquen ca to da' ba chl'e'e belzila'. <sup>3</sup>Na' mechw chelen' dan' nac de oro na' de plata, len Diosen' naquen ca to da' ba chzen xche'en. Da'nan' žin ža žaglaochguale lo yi' gabilen'. Ba gwche' yichjle tloaze btoble da' scha'o xmehwlen', la'czla' ba zoa gon Diosen' da' saca'zi'le. <sup>4</sup>Cheyała' gonle xbab can' benle len bene' güen žin chele ca', bene' yaše' ca' besyelap coseš chelen'. Benlele legaue' dan' bitw gwduxjwlene' ca cheyała'. Na' dan' bi bnežjwle laxjwgaquen' ca cheyała', chlo'en nacle bene' güen da' xinj. Diosen' chzenague' che bene' güen žin ca' dan' chesyegüine'de', Dios ben' nape la'zelagüe yela' guac xen. <sup>5</sup>Zoatezle che'ej chagwšagüe'le na' chonditjele dan' de chele chonle con ca žan chele, na' bi chache'ele ba zoa gon Diosen' da' saca'zi'le. Na' lagüe dan' chonle ca', zaca'leble ca to beyixe' ben' chgüe'ej chguagwšagüe'cho cont ba chane'ba' cate' žin ža gotchoba'. <sup>6</sup>Na' gan' chi'le chonle yela' justisen', ba gwchoglaolen yesote' bene' goson da' güen, bene' bibi gosonde' le'e.

**Cuezcho batcan' yid Xancho  
Jesucriston' da' yoble  
na' yol güižcho Dios**

<sup>7</sup>Ca nac le'e bene' migw, le gape yela' chxenlaže' len dan' chyi chzaca'le, le ba zoa yid Xancho Jesucriston' da' yoble. Bene' ca' chesaz, chesenite' chesebeze' cosešen', le cosešen' naquen da' zaca'. Na' chesape' yela' chxenlaže' chesebeze' chde tiemp yejon', le cate' chbeze yejon', cana'chen' chosyotobe'

cosešen'. <sup>8</sup>Da'nan' bite'teze dan' chyi chzaca'le, cheyała' gape yela' chxenlaže' na' gonchachlaže'le šejnilaže'le Xancho Jesucriston', le ba zoa yide' da' yoble. <sup>9</sup>Bene' migw, bitw yosbaga' lježle še bin' chac chele. Še bin' yosbaga' lježle, ba zoa yid Xancho' da' yoble na' choglagüen' chele naple doła'. <sup>10</sup>Le gon xbab che da' bene' ca' goso'e xtiža' Xancho Diosen' cani'. Leca bosochi bososaca' bene' le-gaque', perw bia'cze bosoyo bosochje', can' cheyała' gonle. <sup>11</sup>Da' li mbalaz bene' ca' gwnita'teze' gosonchachlaže' gosejni-laže' Diosen' la'czla' besežaglagüe'. Na' ba benele xtiža' da' Job can' benchachlaže' gwyejni-laže' Diosen', la'czla' da' zan da' gwdi gwxaque'. Perw na' cate' gwde dan' gwdi gwxaquen', Diosen' bene' cont gwzoache' mbalazch clel can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

<sup>12</sup>Bene' migw, da' naquen da' žialao, gwbat gwzoale no co' da' bači che bite'teze. Bitw nale yaban' co'on da' bači choe'le diža' li, neca nale yežlio nga co'on da' bači choe'le diža' li, neca bite'tezechle. Cheyała' güe'cho diža' li da' šejle' bene' cont Diosen' bi choglagüen' checho saca'zi'cho.

<sup>13</sup>Note'tezcho cate' chac bi da' chac checho, cheyała' yol güižcho Dios. Na' note'tezcho cate' zoacho mbalaz, cheyała' golcho gonxenchone'. <sup>14</sup>Note'tezcho cate' chacšenecho, cheyała' gaxcho bene' ca' gwlejcho cont chosogüia chesene'e chio' chdop chžagcho chonxencho Jesucriston'. Na' yosotope' yichjcho late' set, na' yosol güiže' Dios, yesenabe' yeyaquecho len yela' guac che Xancho Jesucriston' lagüe' da' chejni-laže'chone'. <sup>15</sup>Na' chio', cate' choł güižcho Xancho Diosen', cheyała' šejle'cho le chzenagcze' checho cont yeyone' ben' chačenen', na' še ba bene' da' xinj, güezi'xencze Xancho'

che'. <sup>16</sup>Da'nan' cheyała' xoadola'cho lao bene' lježcho na' yol' güižcho Dios tocho yetocho cont ca' yezoacho güen še bin' chac checho. Na' še naccho bene' güen len Diosen', Diosen' chzenagcze' checho cate' chol' güižchone' na' chone' da' zan da' güen dan' chnabechone' gone'. <sup>17</sup>Le gon xbab che Elías ben' be' xtiža' Diosen' cani'te. Goque' beñač cayanen' nac chio'. Na' cate' bol' güiže' Diosen' do yichj do laže' gwñabe' bi gac yejw, na' Diosen' bzenague' che' na' bitw goc yejon' lao šon iz yogašjo. <sup>18</sup>Na' yetni'a

cate' bol' güiže' Diosen' gwñabde'ne' sele' yejon' da' yoble, nach Diosen' gwsejen'. Na' goc coseš che bene' ca' da' yoble.

<sup>19</sup>Bene' migw, cate' to bene' lježcho ba gwlejyichje' dan' nac da' li dan' bzejni'i Diosen' chio', cheyała' gaclenchone' cont yetinjde' xtole'na'.

<sup>20</sup>Chaclaža' nezele, cate' choncho cont note'teze bene' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czla' še naquen da' zan. Da' na'zen' chzoja' na'a.

## CART NECHW DAN' BZOJ POSTLW SAN PEDRO

### Pedro chzoje' cart nga che bene' ca' zjanaslas chesejnilaže' Criston'

**1** Neda' Pedro naca' postlw che Jesu-  
criston'. Na' chzoja' cart nga che le'e  
chejnilaže'le Jesucriston', le'e naslasle  
distrítw ca' gan' nzi' Ponto na' Gala-  
cia na' Capadocia na' Asia na' Bitinia.  
Chio' chejnilaže'cho Jesucriston' nac-  
cho ca bene' zito' len yezica'chle bene'  
že' yežlio nga. <sup>2</sup>Con can' bsi'e xnezen'  
gwlatte, Xacho Diosen' gwleje' chio' cont  
Spiritw chen' bocoben yichjlažda'ochon'  
na' gwlo'on chio' lo na' Diosen'. Bene'  
ca' cont chzenagcho che Jesucriston'  
na' cont Jesucriston' zoacze' cheyone'  
lažda'ochon' xilaže' dan' blalj xchenen'  
neče chio' le'e yag cruzen'. Chnaba'  
soacze Diosen' gaclenchgüe' le'e na'  
soacze' gone' cont soa cuezle binlochgua  
len xbab chelen'.

### Zoacho lez šjayzoacho len Diosen'

<sup>3</sup>Cheyała' gonxencho Diosen'. Le'  
naque' Xa Xancho Jesucriston', na'  
Xancho Jesucriston' lecze chonxene' le'.  
Leca cheyaše' cheži'ilaže' Diosen' chio',  
na' da'nana' bocobe' yichjlažda'ochon' na'  
bene' cont zoacho lez šjayzoacho len le',  
le Jesucriston' beyas bebane' ladjo bene'  
guat ca'. <sup>4</sup>Na' Diosen' gone' ga gac da'  
güen checho, to da' mbachgua da' bi  
yenit neca te chen, to da' ngo'ošagüe'  
cont gaquen checho cate' yežincho  
yaban'. <sup>5</sup>Na' Diosen' len yela' guac xen  
chen' chcuas chcue'eje' chio' len da'  
malen' lagüe chejnilaže'chone'. Chone'  
ca' šlac bina' žin ža le'echo da' mba da'  
gone' gac checho caten' šjayzoacho len  
le'.

<sup>6</sup>Da'nana' zoachgualle mbalaz la'czla'  
chonen byen da' zan da' chy chzaca'le

šlož güeje na'a. <sup>7</sup>La'czla' da' te che oron',  
benachen' chosozeyen' cont chesyebeje'  
bi da' nchixen da' bibi zaca'. Na' ca'cze  
zaca'lebe dan' choe' Diosen' latje chac  
chele, chaquen cont gwlo'ele še da' li  
chejnilaže'lene' cate' chac bi da' mal  
chele. Na' še soatezle šejnilaže'lene', leca  
zaca'chen clal ca no oro. Nach cate' Je-  
sucriston' yide' da' yoble Diosen' güe'e  
diža' ne' benle güen na' gone' le'e yela'  
bala'an xen na' gone' soale txen len le'  
gan' yo'ochgua be'ni'.

<sup>8</sup>Chaquele Jesucriston' la'czla' bina'  
le'elne'. Na' la'czla' bi chle'elne' na'a,  
chejnilaže'lene'. Da'nana' zoale mbalaz  
juisyw. Na' catec mbalaz zoale con bi  
chac gwzejni'ile bene' cayanen' chebele.  
<sup>9</sup>Na' da' chejnilaže'le Jesucriston', žin ža  
šjayzoale len Diosen'.

<sup>10-11</sup>Da' bene' ca' goso'e xtiža' Diosen'  
cani' gosene' yeyaše' yeži'ilaže' Diosen'  
chio' zoacho na'a. Spiritw che Criston'  
gwzoan len legaque' bzejni'in legaque'  
yid Criston' yežlion' na' saca'zi'e na' yey-  
oža' gwlo'e Diosen' naque' bene' zaca'  
juisyw. Da'nana' bososedyane' na' besyey-  
iljwože' non seła' Diosen' gaclene' chio'  
na' batcan' yide'. <sup>12</sup>Na' Diosen' bze-  
jni'ide' legaque' che da' ca' bosozoje' cont  
goseņezde' gaquen che chio' zoacho na'a  
na' gague che cuingaque'. Na' na'a Spiri-  
ton' dan' za' gan' zoa Diosen' ba benen  
cont gwnita' bene' goseyixjue'ede' le'e  
diža' güen che Criston', na' diža' güen  
chen' naquen lebe len dan' bosozoj da'  
bene' ca' goso'e xtiža' Diosen' cani'. Na'  
lente angl che Diosen' chesezelaže' yese-  
jni'ide' naquen' chaclen Diosen' chio'.

### Cheyała' gac lažda'ochon' xilaže' len yogo' da' choncho

<sup>13</sup>Da'nana' cheyała' soale len toze xbab  
na' gonle con ga zelao saque'le cont  
gonle can' chazlaže' Diosen'. Cheyała'  
soale yebele gon Diosen' gacchgua mba  
chele caten' yid Jesucriston' da' yoble.

<sup>14</sup>Na' da' nacle xi'in Dios cheyała' gwzenagle che', na' bich gwzenagle che da' malen' can' gwna lažda'olen' gonle cana' cate' bina' šejni'ile che Diosen'.

<sup>15</sup>Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca' nac le' bene' laždao' xilaže', leče can' cheyała' gaccho bene' laždao' xilaže' len yogo' da' choncho. <sup>16</sup>Le Xtiža' Diosen' nyojen žan: "Cheyała' gacle bene' laždao' xilaže', le neda' Dios naca' bene' laždao' xilaže'."

<sup>17</sup>Chio' chol' güižcho Diosen' che'chone': "Xato' Dios". Na' Diosen' chchoglagüen' che to to chio' benach še nocho napcho doła' ca' nac da' choncho, na' toz can' chone' len note'tezcho. Da'nan' cheyała' žebcho goncho da' bi chazlaže' Diosen' šlac zoacho yežlio nga. <sup>18</sup>Nezecho Diosen' ba bebeje' chio' lo da' ca' bosozejni'i da' xoxxta'ocho ca' chio' da' bibi zaca'. Na' nezecho ca' nac no mechw de plata o de oro na' bichle da' ca' chesede čhen, bi goc yesyebjen chio' lo da' ca' choncho da' bibi zaca'.

<sup>19</sup>San byažjen gwseła' Diosen' Criston' blalj xčhene' da' zaca'čgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž čheton' cont bezi'xen Diosen' xtola'gaque'. <sup>20</sup>Za' xe yežlion' Diosen' gwleje' Criston' cont bnežjw cuine' neče xtola'chon'. Na' Diosen' gwsele'ne' nga na'a ba zoa te che yežlion' cont chaclene' chio'. <sup>21</sup>Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

<sup>22</sup>Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac

lažda'ochon' xilaže', na' da'nan' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyała' goncho, cheyała' gague lježcho do yichj do laže'cho, gague gaguechone' de diža'ze. <sup>23</sup>Xaxna' chio' zoacho yežlio nga zjanaque' bene' chesat, perw gague neče da' goljcho len legaue' naccho xi'in Dios, san naccho xi'ine' da' bocobe' yichjlažda'ochon' cate' gwyejle'cho xtižen'. Na' xtižen' zoan toli tocane, gague da' te čhen. <sup>24</sup>Chac can' nyojen, žan:

Yogo' benach chesede che' ca chesede che no yixe' dao',

na' yogo' da' chebe benachen' yežlio nga da' chesacde' zaca'čguan, zaca'leben ca yej da' žia yixe'.

Chesebiž yixe' ca' na' chesecud chesebiž yej da' zjažia yixe'.

<sup>25</sup>Perw xtiža' Diosen' zoan toli tocane, gague da' te čhen.

Na' xtiže' nan' diža' güen da' ba gwdixjue'eto' len le'e.

**2** Da'nan' cheyała' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' güen, bi xi'acho bene', bi necho diža' mal che bene'.

<sup>2</sup>Na' ca' bi' che'eñ dao' žan yesaže'be' xiže'gacbe', can' cheyała' selaže'cho yenecho xtiža' Diosen', le naquen da' güenčgua, na' cate' chzenagchon chaclenen chio' cont choncho can' cheyała' gon chio' ba de yela' mban čhecho toli tocane. <sup>3</sup>Le ba chacbe'echo na'a Xancho Criston' naque' bene' šagüe'.

### Criston' zaca'lebbe' ca to yej squin che yo'o

<sup>4</sup>Cheyała' gwzenagcho che Xancho Jesucriston' ben' chon' chio' yela' mban toli tocane. Bene' zan chesegue'ede' le' la'czla' Diosen' gwleje'ne' cont chaclene' chio' na' zaca'čgüe' len Diosen'. Da'nan' Jesucriston' zaca'lebbe' ca to yej

güen da' gwlej bene' cont gaquen yej squin ližen', perw bene' goson žinna' bi gosazlažen' na' gosebequen' šla'ale. <sup>5</sup>Na' chio' napcho yeļa' mban da' chejni-laže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca b̄xoz bene' zjanac lo na' Diosen', le naccho lo na' Diosen' na' chaclen Jesucriston' chio' cont zoaccho chonxencho Diosen' con can' chazlaže'. <sup>6</sup>Na' Xtiza' Diosen' nyojen, žan:

Sela' to bene' ciuda Sión na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

<sup>7</sup>Nach len chio' chejni-laže'chone', Jesucriston' naque' leca bene' zaca'. San bene' bi chesejni-laže'ne', nyojczde da' nga che-gaque', žan:

Yej da' bi gosac-laže' bene' güen yo'o ca' yosochine',

len ba naquen yej squin.

<sup>8</sup>Na' lecze ca' žan:

Zaca'lebde' ca to yej da' chchego' bene' na' ca to yej da' chgo'o ni'e na' chjasebixe'.

Nyojen žan chesechegüe' le bi chosozenague' xtiza' Diosen'; na' Diosen' bžie' bia' yesac chegaque' ca'.

### **Chio' chejni-laže'cho Diosen' naccho xi'ine'**

<sup>9</sup>Na' chio', Diosen' ba gwleje' chio' cont chejni-laže'chone'. Na' len Diosen' naccho ca rey na' ca b̄xoz. Gwleje' chio' cont naccho nación che', na' nactecho diaža' che', le chaclaže' chixjue'echo catec da' güen juisyw chone'. Le'na' bebeje' chio' lo da' malen' bencho na' gwlo'e be'ni' xen chen' lo' yichjlažda'ochon' cont soacho goncho da' güen. <sup>10</sup>Cana' le'e bi gwyejni-

laže'le Diosen' na' bi gogle nación che', perw na'a ba nacle nación che'. Cana' bina' yeyaše'de' le'e, san na'a Diosen' ba beyaše' beži'ilaže'de' le'e.

### **Cheyaļa' goncho can' chazlaže' Diosen'**

<sup>11</sup>Chacda' le'e bene' migw, na' chney-oeda' le'e le gon xbab le yežlio nga bi naquen laže. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'. <sup>12</sup>Le soa le gon da' güen cont bene' ca' bi chesejni-laže' Diosen' yesele'ede' da' güen da' chonle, na' la'czla' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža chogbi'en nac gac che to toe'.

<sup>13</sup>Da' chejni-laže'le Xancho Criston', le gwzenag che yogo' bene' ba bosozoa benachen' cont yesenabi'e le'e. Le gwzenag che rey ben' chnabia' doxen gan' zoachon', <sup>14</sup>na' lecze le gwzenag che bene' gwnabia' ca' chsela' reyen'. Le nac lo na'gaque' yesone' castigw che bene' ca' cheson da' xinj na' yesonxene' bene' cheson can' cheyaļa' yesone'.

<sup>15</sup>Diosen' chaclaže' goncho da' güen cont bene' ca' bi chesejni'i che', ben' zjanchoļ yichjlažda'ogaque', bi žel diža' da' yesene' yosocuiše' chio'.

<sup>16</sup>Cheyaļa' soa cuzcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyaļa' soa cuzcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho. <sup>17</sup>Cheyaļa' gapcho bala'añ yogo'loļ bene'. Na' cheyaļa' gaque bene' lježcho bene' chesonxene' Jesucriston'. Cheyaļa' žebcho goncho da' bi chazlaže' Diosen'. Na' cheyaļa' gapcho bene' gwnabia' chechon' bala'añ.

**Criston' byo bcheje'  
dan' gwxaca'zi'ena'**

<sup>18</sup> Le'e chonle žin che bene', le gwzenag che xan žin chele da' chaple legaque' bala'an. Gague tlooze gwzenagle che xan žin chelen' še zjanaque' bene' šagüe' bene' yo'o xbab, san lecze le gwzenag chegaque' še zjanaque' bene' znia. <sup>19</sup> Še bibi da' mal nonle na' bia'cze chosoči chososaque' le'e, chebe Diosen' chyo chchejle len da' chesonde' le'e lagüe nezele chaclaže' Diosen' goncho ca'. <sup>20</sup> Perw bibi zacan' še ba benle bi da' xinj na' chyo chchejle cate' chesebaže' le'e. San še chosoči chososaque' le'e cate' chonle da' güen na' chyo chchejle len da' chesonde' le'e, nachle chebe Diosen' le'e. <sup>21</sup> Le Diosen' gwleje' chio' cont gwyo gwchejcho len bi da' yosoči yososaca' bene' chio', na' Criston' gwxaca'zi'e neche chio' na' byo bchejde' len da' goc che' cont nezecho ca'czen' cheyala' goncho. <sup>22</sup> Bibi da' xinj ben Criston', ne to diža' güenlaže' bi be'e. <sup>23</sup> Cate' gosezi'diža' bene' le', bi boži'e dižan' nac ca' len legaque'. Na' cate' bosochi bososaque'ne', bi gwne' yebi'e mal len legaque'. Ben cuine' lo na' Diosen', le gwnezde' Diosen' chogbi'en yesezaca'zi' bene' ca' con can' cheyala' gac chegaque'. <sup>24</sup> Criston' bnežjw cuine' neche xtola'chon' cate' gosote'ne' le'e yag cruzen'. Da'nan' cheyala' cuejyichjcho da' xinjen' choncho na' soacho goncho da' güen. Gwxaca'zi'e cont bozoe' chio' binlo. <sup>25</sup> Goccho ca xila' be gosacžeje, perw na'a ba nacho ca be yo'o lo na' xamba' cont chyoeba', le Criston' chgüia chne'e chio' na' yo'o lo ne'e lažda'ochon' chcuas chcue'ejen' len da' malen'.

**Can' cheyala' yeson bene' zjanšagna'**

**3** Na' lecze le'e no'ole nšagna'le, to tole cheyala' gwzenagle che bene' chele. Bale' bina' yosozenague' xtiža' Diosen',

na' še gwzenagle chegaque', yesacbe'ede' xtiža' Diosen' naquen da' güen la'czla' bibi ye'ln'e'. Na' yosozenague' che Diosen' <sup>2</sup> cate' yesele'ede' chaple legaque' bala'an na' chi' yichjle soa cuezle cont lažda'olen' gaquen xilaže' len Diosen'. <sup>3</sup> Na' le'e no'ole, bi nacho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' chazle lache' šagüe'. <sup>4</sup> Dan' nac da' žialao, gac lažda'olen' güen, la'czla' nono chle'e len. Zaca'chgvan len Diosen' gaccho bene' nexjwlaže' na' bene' xenlaže', le bi te che yichjlažda'ochon'. <sup>5</sup> Gosenita' no'ole cani' no'olen' gosejnilaže' Diosen' na' gason cuine' lo ne'e. Legaque' gosaque' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'. <sup>6</sup> Da' Sara, no'ol che da' xozxta'oto' Abrahanna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in' da' Saran' lagüe chonle can' benen'.

<sup>7</sup> Na' le'e bene' byo nšagna'le, lecze cheyala' gacle bene' šagüe' len no'ol chele na' gaplene' bala'an, le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' none' chio' yela' mban toli' to-cane, ca'tezecen' ba none' len legaque'. Nachen' cheyala' goncho güen len legaque' cont bibi gwžon gwzenag Diosen' checho cate' chol' güižchone'.

**Can' goncho še yosoči yososaca'  
bene' chio' la'czla' choncho da' güen**

<sup>8</sup> Yogo'cho cheyala' goncho toze xbab na' cheyala' yeyaše'cho lo' lažda'ochon' še bi da' chac che bene' lježcho. Cheyala' gaque lježcho do laže'cho ca bene' biše' lježcho, na' cheyala' gaccho bene' šagüe' len bene' lježcho na' bi gon cuincho bene' xen. <sup>9</sup> Še bi da' mal cheson bene' len

chío', bi n̄acho ľecze da' mal yebi'icho len ľegaque'. Na' še bene' chesezi'diže' chío', bitw yoži'icho dižan' nac ca' len ľegaque', san n̄abcho gac da' güen chegaque'. Le Diosen' ba gwleje' chío' cont goncho ca' na' cont gone' latje soacho mbalaz. <sup>10</sup> Goncho ca' ľe nyojen, žan:

Bene' chaclaže' soa cueze' mbalaz, cheyaľa' gwsaque' bich güe'e bite'teze diža' mal, na' gwsaque' bich güe'e bite'teze diža' güenlaže'.

<sup>11</sup> Cheyaľa' cuejichje' yogo' da' mal na' gone' da' güen.

Cheyaľa' cuec yichje' gone' con ga zelao saque'de' cont soe' binlo len bene' ľježe'.

<sup>12</sup> Le Xancho Diosen' chgüia chne'e bene' ca' cheson da' zej to ľicha, na' chzenague' chegaque' cate' chosol güiže'ne'.

San bene' ca' cheson da' xinj, Diosen' ngüie' gone' cont yesezaca'zi'e.

<sup>13</sup> Na' nono zoa no gone chío' mal še zoatezcho choncho da' güen do yichj do laže'cho. <sup>14</sup> Na' ľac'zľa' še tgüej cate' yosoči yososaca' bene' chío' lagüe choncho da' zej to ľicha, Diosen' gone' soacho mbalaz. Na' bi cheyaľa' žebcho bene', neca gacžejlaže'cho.

<sup>15</sup> San cheyaľa' gonxencho Criston' ľo' lažda'ochon', ľe naque' Xancho. Na' bate'teze cheyaľa' soacho probnidw cont yoži'icho xtiža' bene' še yesenabde' chío' bixchen' zoacho lez šjayzoacho len Diosen' toľi tocanē. Na' cheyaľa' gapcho ľegaque' bala'an na' güe'lenchone' diža' šagüe'. <sup>16</sup> Tža tža cheyaľa' goncho cont nezecho ľo' yichjlažda'ocho bibi doľa' napcho len Diosen'; nachen' cate' yesezi'diže' chío' da' chejnilaže'cho Criston', yesacbe'ede' ľe choncho güen na' yesacde' zto'. <sup>17</sup> Yejn̄i'a saca'zi'cho neče choncho da' güen, še can' chaclaže' Diosen' gac checho, clēl ca saca'zi'cho neče choncho da' xinj.

<sup>18</sup> Le Criston' ľecze gwdi gwxaque'. Ľac'zľa' gwyejczē' to ľicha len Diosen', bnežjw cuine' gote' neče xtoľa' benach tñi'aze, na' da' bene' ca' zaca'czen' toľi tocanē. Gote' cont ba bozoe' chío' binlo len Diosen'. Perw ľac'zľa' gosote'ne', beyas bebane' ladjo bene' guaten', dan' ne' zoa spiritiw chen'. <sup>19</sup> Na' len Spiritiw chen' gwyeje' jatixjue'ede' xtiža' Diosen' len bene' ca' ba zjanyeyw gan' yesezaca'zi'e toľi tocanē. <sup>20</sup> Ľegaque' bi bosozenague' che Diosen' ža gwlaste, ľac'zľa' gwdape' yela' chxenlaže' len ľegaque', gwleze' yosozenague' šlac da' Noén' bene' to barcw xen. Na' to chopga bene' goso'o ľo' barcon' na' bi gosebiaye'e ľo' nisen', con xono'gue' besyela. <sup>21</sup> Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toľi tocanē. Na' gague gwzoacho nisen' cont beyaccho xilaže' len cuerp chechon', san gw̄nabecho Diosen' beyone' lažda'ochon' xilaže' cont nezecho bibi doľa' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'. <sup>22</sup> Na' na'a Jesucriston' ba beyepe' yaban' gan' chnabi'e txen len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

#### Diosen' none' da' gon to tocho cont chaclen ľježcho

**4** Criston' goque' bene' bela' chen na' gwxcaca'zi'e yežlio nga, da'n̄an' chío' cheyaľa' gonchachlaže'cho bi gacžejlaže'cho cate' saca'zi'cho. Goncho ca', ľe cate' ba gwzaca'zi'cho chaclenen bich chzenagcho che da' malen'. <sup>2</sup> Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chío' benach, san soa cuezcho goncho con can' chazlaže' Diosen'. <sup>3</sup> Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze

da' mal da' gwzelaže' lažda'olen', gwzožele, benle no žaš len lni chelen' na' güe'ejchguale, na' gwyejnilaže'le l gua'a lsaca' da' ca' gwna Diosen' bi cheyała' šejnilaže'chon. <sup>4</sup>Na' bene' ca' ne' cheson ca' chesyebande' bich chonle txen len legaque' can' chesaše' chosožiayi' cuingaque', nach chesezi'diže' le'e. <sup>5</sup>Perw žin ža cate' Diosen' nabyožde' legaque' che yog'o'lo' da' ba gosone', Dios ben' chbeze' čhogbi'en nac gac che bene' zjamban len bene' ca' ba gosat. <sup>6</sup>Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli' tocane' can' zoa le', la'czla' nchoglagüen' de yela' got che yog'o' benačh yežlio nga.

<sup>7</sup>Ba zoa te che yežlion'. Da'nan' cheyała' soacho len toze xbab na' goncho byen goncho can' chazlaže' Diosen' cont bibi gwžon soacho yo' güižchone'. <sup>8</sup>Na' da' nac da' žialaoch, cheyała' gaque lježcho do yichj do laže'cho, le cate' chaque lježcho chezi'xencho čegaque' bite'teže da' chesonde' chio'. <sup>9</sup>Na' cheyała' gwle-bcho bene' lježcho cate' yeside' ližchon' sin cbi bixjwcho. <sup>10</sup>Con can' ba goclen Diosen' to tocho da' none' chio' grasyw che bi da' chac choncho, can' cheyała' gaclen lježcho len dan' choncho. Cheyała' gwčhincho bite'teže grasyw da' non Diosen' chio' con can' chaclaže' gwčhinchon, le nža' nža'te da' none' che to tocho choncho. <sup>11</sup>Še Diosen' ba none' čhecho čixjue'echo xtižen', le xtiže' na'zen' cheyała' čixjue'echo. Na' še ba none' čhecho gaclencho bene', cheyała' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli' tocane' na' zaca'cze' nabi'e toli' tocane'. Can' gacšca.

### Guata' da' saca'zi' chio' chejnilaže'cho Criston'

<sup>12</sup>Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'. <sup>13</sup>Cheyała' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxcaca'zi'e. Le yebe caten' chzaca'zi'le cont leče yebele na' soale mbalaz cate' žin ža le'ele yid Criston' ben' nac bene' zaca' juisyw. <sup>14</sup>Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zoan chacle-nen le'e. Bene' ca' chosoči chososaque' le'e chesene' mal che Criston', san le'e chonxenlne'. <sup>15</sup>Na' še saca'zi'le, yejni'a gaquen neče chonle da' güen, gague neče da' betwle bene' o gwlanle da' de che bene' o benle bichle da' xinj o blaže' čhele len bi da' chac che bene'. <sup>16</sup>Le še saca'zi'le neče chejnilaže'le Criston', bi cheyała' gaguele zto' can' chac chele, san cheyała' gonxenle Diosen' da' ba chejnilaže'ln'e.

<sup>17</sup>Ba bžin ža Diosen' ba chone' cont chyí chzaca' chio' naccho xi'ine' neče bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o' che', nezecho leca gwnežjwche' da' yesezaca'zi' bene' ca' bi chosozenag diža' güen čhen'. <sup>18</sup>Na' ca' nac bene' zja'ac to liča, nacchguaze yesyele' bi yesezaca'zi'e toli' tocane, nach bene' bi chesejnilaže' Diosen' na' chesonteze' da' xinj, gague bi de da' yosla legaque'. <sup>19</sup>Da'nan' cate' chsi' Diosen' xnezen' chyí chzaca'cho, cheyała' soacho gonczcho da' güen na' gon cuincho lo' na' Diosen', le len' bene' chio' benačh na' zoacze' chacle-ne' chio'.



**Can' cheyała' gon chio'  
chejnilaže'cho Criston'**

**5** Na'achen' de da' nia' le'e nchojle cont chgüia chña' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choelena' bene' diža' can' goquen', na' lecze nežda' žin ža šjayzoa' len le' gan' yo'ochgua be'ni' ca le'e šjayzoalen'ne'. <sup>2</sup>Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonon do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen. <sup>3</sup>Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesacbe'ede' lecze can' cheyała' yeson legaque'. <sup>4</sup>Xancho Jesu-criston' zaca'lebd'e' ca to bene' güeyoe' xila' bene' chnabi'e' nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyała', na' gague da' te che yela' zoa mbalaz chelen' ca chde che no premio da' chesone' yežlio nga.

<sup>5</sup>Nach lecze ca' le'e bene' xcuide', cheyała' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le: Diosen' chdillene' bene' zjanac ya'laže', san chaclene' bene' chosozexjwlaže' lagüen'.

<sup>6</sup>Cheyała' gwzexjw yichjcho gwzenag-cho che Dios ben' nape yela' guac xen, cont žin ža gone' ga gaxencho. <sup>7</sup>Na' cheyała' gwcua'ancho yogo'lo' da' chi' yichjcho chen lo na' Diosen', le len' chgüia chne'e chio'.

<sup>8</sup>Cheyała' goncho byen goncho da' nac da' zaca', na' cheyała' gwsaca'cho cont Satanás dan' chnabi'a' da' xigüe' ca' bi co'on chio' to lo nez mal, le

chgue'en chio' na' cheyiljwlažen' nac gonon gwžiyain' chio', ca to bež znia chosya'aba' chdaba' chyiljwba' be gagwba'. <sup>9</sup>Cheyała' soachachcho bi gwzenagcho che Satanásen' na' soachachcho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'. <sup>10</sup>Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'. <sup>11</sup>Cheyała' soacho gonxenchone' toli tocan'e da' naque' bene' zaca' juisyw, na' nabia'che' ca note'tezechle. Can' gonščaczcho.

**Pedron' chguape' tiox  
bene' ca' yosolab carten'**

<sup>12</sup>Bene' migw checho Silvano, ben' chacda', zoateze' chone' can' cheyała' gone', na' ba bzoje' xtiža' le'e cart dao' nga. Na' le'e cart nga chneyoeda' le'e soacze gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'n'an' cheyała' soacze šejnilaže'ne'.

<sup>13</sup>Bene' ca' ba gwlej Diosen' cont chesedop chesežague' chesonxene' Jesu-criston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. <sup>14</sup>Cate' chdop chžagle txen le gwnopa' na' lježle cate' gwguap lježle tiox cont gabia' chaque lježle.

Na' chnaba' yogo'le chejnilaže'le Criston' soa cuezle binlo len xbab da' yo'o lo' yichjlažda'olen'. Da' na'zen' chnia'.

## CART GWCHOPE DAN' BZOJ POSTLW SAN PEDRO

### Pedron' bzoje' cart nga che bene' chesonxen Jesucriston'

**1** Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejni-laže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocane le zejzce' to licha. Na' da' zaca'chgwan chejni-laže'chone'.<sup>2</sup> Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'ln'e' na' nombia'le Jesús ben' nac Xanchon'.

### Can' cheyala' gon chio' chejni-laže'cho Jesucriston'

<sup>3</sup> Dan' nap Diosen' yela' guac xennan', ba none' chio' yogo' da' chyažjecho cont de yela' mban checho toli tocane na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'.<sup>4</sup> Na' da' naque' bene' zaca' bene' šagüe', da'n'an' ba gwne' gaclene' chio' na' gone' da' güen juisyw len chio'. Na' zaca'chgwan da' gwne' ca', le da' chaclene' chio' can' gwne', da'n'an' yichjlažda'ochon' chesyeyaquen güen can' nac yichjlažda'ogüen', na' chac chbejyichjcho da' mal da' chžiayin' bene' bi chesejni-laže' Diosen', lagüe chesone' con ca' žan chegaque'.<sup>5</sup> Na' da'n'an' chio' chejni-laže'cho Jesucriston' cheyala' goncho con ga zelao saque'cho cont goncho da' güen, na' cont šejni'ichcho.<sup>6</sup> Na' cheyala' goncho con ga zelao saque'cho cont bi nabia' da' malen' chio'. Cheyala' soachachcho šejnilaže'cho Diosen' caten' chyi chzaca'cho, na' cheyala' soaczcho gonxenchone'.<sup>7</sup> Na' cheyala' ži'icho bene' lježcho ben' chesejni-laže' Jesucriston',

na' lecce cheyala' gaquecho yogo'ze bene'.<sup>8</sup> Le še zejcho chonchguacho yogo' da' ca', nachen' gaccho can' cheyala' gac chio' nombia'cho Xancho Jesucriston', na' xšinen' da' goncho chojen güen.<sup>9</sup> Na' note'tez bene' bi chon da' ca' ba gwnia' cheyala' goncho, nchol yichjlažda'ogüe' na' biña' šejni'išagüe'de' can' cheyala' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'.<sup>10</sup> Da'n'an' bene' migw, cheyala' goncho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca' xi'ine'. Na' še goncho ca', gwbat cuiayi'cho,<sup>11</sup> na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocane, Jesucristw ben' none' yela' mban checho toli tocane.

<sup>12</sup> Da'n'an' ba gwchoglaža' yogo' ni'a güe'lena' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoachachle chejni-laže'le diža' li che Diosen' dan' nombia'le.<sup>13</sup> Nan' chacda' šlac ne' mbana' cheyala' gona' cont šjayze'elen.<sup>14</sup> Le nezda' yob žin ža gata', con can' ba bzejni'i Xancho Jesucriston' neda'.<sup>15</sup> Da'n'an' gona' con ga zelao saque'da' cont šjayze'ele can' gwnia' che da' quinga cate' ba gota'.

### Postlw ca' besele'ede' cate' Diosen' blo'ede' yela' zaca' che Criston'

<sup>16</sup> Ca' nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'.<sup>17</sup> Ble'eto'ne' cate' Xacho Diosen' bnežjue'ne' yela' bala'an xen na' cate' Dios ben' nac bene' zaca' juisyw bene' cont gwyechje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'."<sup>18</sup> Neto' beneto' can' gwna Dios ben' zoa

yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

<sup>19</sup>Napcho Xtiža' Diosen' dan' bosozoj bene' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwseñin' lo' yichjlažda'olen' ca to yi' da' chseni' ga nac chol. Bi cheyala' yeche'echo gwzenagcho chen tža tža šlac žin ža yid Criston' da' yoble na' co'оче' be'ni' chen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'. <sup>20</sup>Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' cani', ne tozen bi gac šejni'ichon to gualazcho, <sup>21</sup>le ne toz da' ca' bosozoje' bi zan' che xbab chegacze'. San bene' gosaque' lo na' Diosen' gosenie' dan' gož Spiritw che Diosen' legaque' na' bosozojen'.

### Bene' ca' chosozejni'ide' xtiža' Diosen' clele

**2** Cani' lecze besechoj bał bene' gualaž cheto' bene' gosonlaže' gosene' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiayin' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocañe. Perw žin ža yesebiaye'e yalzelaže'. <sup>2</sup>Bene' zan yosozenague' chegaque' na' yesone' da' xinj dan' nac da' yela' zto' can' yeson legaque'. Na' neče yesone' ca', yesenita' bene' yesene' bibi zaca' diža' güen che Diosen' da' chlo'en chio' dogualje nez güenna'. <sup>3</sup>Na' bene' güenlaže' ca' yesezelaže' yeseque'e xmechwle. Da'nan' yosozejni'ide' le'e diža' da' yesaljlaže'

cont gwnežjwle legaque' mechw. Perw cani'te Diosen' ba nžie' bia' yesebiaye'e.

<sup>4</sup>Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca chol, na' zjanite' zjancheje' gden šlac žin ža gone' yesezaca'zi'e toli tocañe. <sup>5</sup>Neca bezi'xen Diosen' che bene' ca' že' lo yežlion' bene' bi bosozenag che' caten' gwzoa da' Noé. Gwsele' yejw sio' juisyw da' bžiayin' legaque'. Na' Noén gwzoe' gwduxjue'ede' can' cheyala' yesone' da' zej to liča. Da'nan' Diosen' bosle' le' len yegaže bene' lježe'. <sup>6</sup>Na' Diosen' lecze bechoglaže' bžiayi'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeye' ciuda ca' na' yešinga de bega'an. Na' bene' ca' cont chosnisde' bene' za' za'ac gwnežjue' castigw chegaque' še bi yosozenague' che'. <sup>7</sup>Na' cate' Diosen' bžiaye'e ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'. <sup>8</sup>Loten' goque' bene' güen na' bžaglagüe' lo' lažda'ogüe' tža tža ble'ede' goson bene' ca' da' bi cheyala' yesone' na' bende' diža' che da' malen' gosone'. <sup>9</sup>Can' naquen, Xancho Diosen' nezde' nac gone' yosle' chio' chejnilaže'chone' lao da' ca' yesonen cuejyichjchone', na' nezde' nac gone' cont bene' ca' bi zjanac bene' güen len le' yesenite' yesezaca'zi'e na'a na' cate'ch žin ža chogbi'en yesezaca'zi'e toli tocañe.

<sup>10</sup>Diosen' gwnežjwchgüe' da' yesezaca'zi' bene' ca' chesonteze' da' yela' zto' can' chesezelaže' lažda'ogaquen' yesone' len cuerp chegaquen'. Bene' ca' bi chesape' Xancho Diosen' bala'an cont yosozenague' che'. Bitw chesežebe' chesone' con bi žan chegaque', na' neca chesežebe' chesezi'diže' no angl bene' zaca' na' no da' xigüe'. <sup>11</sup>San ca nac angl che Diosen', zjanaque' bene' gualch ca chio'

benach na' zjanapche' yela' chnabia' xench ca chio', perw legaque' bi cheseyaxjde' yesezi'diže' no bene' zaca' na' no da' xigüe', san cheso'e diža' šagüe' chosocuiše' bene' ca' na' len no da' xigüe' lao Xancho Diosen'.

<sup>12</sup> Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen benachen' legacba' na' yesote'ba'. Na' ca'cze yesebiayi' bene' ca' chosozejni' diža' güenlažen', <sup>13</sup> yesezaca'zi'e da' chosoči chososaque' bene' yoble. Chesazlaže' chesaše' chese'ej chesagwxatteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagwxate' catec chziye' da' malen' legaque'. Da'nan' zjazacalebde' ca to da' bzigüe' da' dope to lo lache' šiš o ca to yiž xen da' žia cho'alo bene'.

<sup>14</sup> Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chesego'oyele' bene' bina' yesenita'chache' len Jesucriston' cont yesone' da' xinjen' txen len legaque'. Bene' ca' chosozejni'i diža' güenlažen' ba zjayolagüe' chesezelaže' bi de che bene'. Diosen' leca chgue'ede' yogo' da' chesone'. <sup>15</sup> Le ba gosebejyichje' xnez Diosen' da' zej to licha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'in da' Beor. Balaanna' gwzelaže' yeseiyixue'ne' len mechw cont nabe' gac da' mal che bene' Israel. <sup>16</sup> Na' Diosen' bene' cont xpurren' be bi chac chneba' gwnceczba' ca to benach na' gwdilba' le' che yela' tont chen', gožba' le' cueze' bich gone' da' xinjen' nac ca'.

<sup>17</sup> Bene' ca' chosozejni'ide' diža' güenlažen' zjazacalebde' ca bej gan' bibi

nis žia na' ca bejw da' nžiga' to be' gual. Ba nchoglaon chegaque' yesezaca'zi'e gabil toli tocane ga nacchgua chol. <sup>18</sup> Le cheso'e chgüe' diža' chesonxen cuingaque' na' chese'go'oyele' bene' za besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp chegaquen' can' chesoncze bene' ca'. <sup>19</sup> Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan chegaque', la'czla' zjanaque' ca to esclavo len da' nac da' yela' zto'. Le note'tezcho naccho ca to esclavo len da' xinjen' cate' choncho con can' žan goncho. <sup>20</sup> Na' bene' ba zjanombi'e Xancho Jesucriston' ben' none' yela' mban checho toli tocane, ba besyechoje' lo' da' xinj ca' dan' nac da' yela' zto' dan' gosone' cate' bina' yesombi'ene', na' še soe da' xinjen' legaque' na' da' yoble yeso'e latje naban' legaque' cont yesonchen', da' malch gac chegaque' clal ca caten' bina' yesyechoje' lo da' xinjen' da' nechua'. <sup>21</sup> Yejni'a šaca' bi gosombi'e xnez Diosen' da' zej to licha clal ca gosebejyichje' nez güen da' nžia bia' Diosen' šejlencho. <sup>22</sup> Ba goc chegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bach bguazjchoba' cheyo'oba' lo gonan' da' yoble."

### Yid Jesucriston' da' yoble

**3** Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le. <sup>2</sup> Le šjayze'e diža' da' bosozoj bene' ca' gosac lo na' Diosen' ben' goso'e xtižen' cani'. Na' lecze le šjayze'e dan' nžia bia' Xancho Jesucriston' goncho, Jesucristw ben' none' yela' mban checho toli tocane. Lenna' diža' da' ba bzejni'i neto' postlw le'e.

<sup>3</sup>Naquen da' žialao šejni'ile da' nga. Na'a ba zoa te che yežlion', na' yesechoj bene' yesonle' che xtiža' Diosen' na' yesenite' yesone' con can' ža xbab mal chegaquen'. <sup>4</sup>Na' yesonle' che Diosen' yesene': "¿Batxen' gac can' gwna Diosen' yid Criston' da' yoble? Bi naquen da' šejl'e'cho, le toz can' chac ža na'aža lecze can' goc cate' gwnita' da' xozxta'ocho ca', na' lecze ca'czen' goc caten' gwxete yežlion'." <sup>5</sup>Bene' chesena ca' bi chesaclaže' yesone' xbab can' ba ben Diosen'. Caten' gwx e yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyechj mbi'in doxen, na' bchine' nisen' cate' benen'. <sup>6</sup>Nach bžin ža cate' da' ca' bene' bži-aye'en len yejw sio' juisyw da' goc cate' bexoa nisen' lo yežlion'. <sup>7</sup>Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yezezaca'zi' bene' mal ca' toli tocaņe.

<sup>8</sup>Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca' nac to ža o to mil iz, bi naquen sša len le'. <sup>9</sup>Baļ bene' chesacde' ba chže Xancho Diosen' da' biņa' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' benač na' chbeze' da' bi chaclaže' cuiayi' note'tezcho. Chaclaže' yogo'cho yetinje xtoļa'chon'.

<sup>10</sup>Na' Xancho Jesucriston' yide' da' yoble cate' bi nane'laže' bene', can' chac cate' cho'o gwban liž bene' šže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin lo yi' gual, na' yežlion' na' da' de laģien lecze yeseyen.

<sup>11</sup>Na' da' nezecho yesyenit yogo' da' ca' can' ba gwnia', cheyaļa' gon cuincho

lo na' Diosen' na' soaczcho gonxenchone' do yichj do laže'cho. <sup>12</sup>Na' cheyaļa' soa cuezcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten. <sup>13</sup>Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con bene' cheson da' ğien da' zej to liča yesenita' cana'.

<sup>14</sup>Da'nan' bene' migw chia', šlac chbezcho gac da' ca', cheyaļa' goncho con ga zelao saque'cho cont soacho binlo len Diosen' cont bibi doļa' de da' gwchenen yichjlažda'ochon'. <sup>15</sup>Na' cheyaļa' gacbe'echo nape Xancho Diosen' yela' chxenlaže' len chio' benač cont gwzenagcho che' na' gone' yela' mban checho toli tocaņe. Lecze can' ba bzoj postlw Pablon' checho ben' chaquecho, cho'e dižan' len yela' sina' da' bnežjw Diosen' le'. <sup>16</sup>Na' yogo' cart che' ca' chesoen' diža' che da' quinga ba bzoja', la'czļa' bzoje' baļ da' nac zdebe šejni'icho. Na' bene' biņa' yesejni'i xtiža' Diosen' binlo na' biņa' yesezoačhače' yesejni'laže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nan' zjangü'e nez da' gwžiyayin' legaque'.

<sup>17</sup>Chacda' le'e bene' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soačhač le gwzenag che Diosen'. <sup>18</sup>Na' zej gacbe'echle catec chaque Xancho Jesucriston' le'e na' zej gombia'chlnē', Jesucristw ben' none' yela' mban checho toli tocaņe. Cheyaļa' soacho gonxenchwne' na'a na' toli tocaņe. Can' gonščaczcho.

## CART NECHW DAN' BZOJ POSTLW SAN JUAN

Jesucriston' chenežjue' yeļa' mban  
toļi tocaņe che bene' chesejnilaže'ne'

**1** Chyixjue'eda' le'e che ben' nzi' Xtiža'  
Dios, ben' chnežjue' yeļa' mban  
toļi tocaņe che bene' chesejnilaže'ne'.  
Ba zoacze' caten' gwxe yežlion'. Neto'  
postlw bzenagto' xtižen', ble'eto'ne'  
na' gwdanto'ne'. <sup>2</sup>Len' golje' benach  
na' ble'eto'ne' na' choe'to' diža' žato'  
mbancze'. Chyixjue'eto' le'e ba zoacze'  
len Xacho Diosen' caten' gwxe  
yežlion' na' bedesoalene' chio' benach.  
<sup>3</sup>Chyixjue'eto' le'e che bena' ble'eto' na'  
che bena' bzenagto' xtižen' cont gonļe  
neto' txen. Na' ca nac neto', da' li ba  
nacto' txen len Xacho Diosen' na' len  
Xi'ine' Jesucriston'. <sup>4</sup>Chzojto' le'e cart  
nga cont soale yebechgüele.

**Diosen' naque' la'zelagüe bene' güen**

<sup>5</sup>Neto' bzenagto' be' Jesucriston'  
diža' che Xe' Diosen' na' chyixjue'eton'  
le'e, bzejni'ide' gwne' Diosen' naque'  
ca to be'ni' da' naque' la'zelagüe bene'  
güen bene' laždao' xilaže'. Bibi da' xinj  
none'. <sup>6</sup>Na' še žacho choncho txen  
len Diosen' šlac choncho da' xinjen',  
con chonlaže'cho. Dan' chonchon' bi  
zejen to li. <sup>7</sup>Diosen' naque' la'zelagüe  
bene' güen bene' laždao' xilaže'. Na'  
še chio' zoacho choncho da' güenna'  
can' zoa Diosen' chone' da' güenna',  
nachen' naccho txen tocho yetocho na'  
yichjlažda'ochon' chega'anen xilaže'  
lagüete Xi'ine' Jesucriston' blalj xchene'  
cont beque'e yogo'loļ xtoļa'chon'.

<sup>8</sup>Še žacho bibi xtoļa'cho de, chziye'ze  
cuinchon' na' bi choe'cho diža' li.  
<sup>9</sup>Perw na' še chxoadoļa'cho lao Diosen',  
chezi'xene' doļa' chechon' na' chnitlagüe'  
yogo'te da' xinj da' choncho, le chone'

con can' že' na' chone' da' zej to li. <sup>10</sup>Še  
žacho bibi da' mal na' goncho, choncho  
Diosen' ca to bene' güenlaže' na' bina'  
šejle'cho diža' li chen'.

**Criston' chņabe' gaclen  
Xacho Diosen' chio'**

**2** Xi'inda'ogua', chzoja' le' cart nga  
cont cbi gonļe da' xinj. Perw na' še  
no chio' goncho da' xinjen', zoa Jesu-  
criston' ben' chon da' zej to li na' chņabe'  
yezi'xen Xacho Diosen' checho. <sup>2</sup>Jesu-  
criston' blalj xchene' neche xtoļa'chon'  
cont yozoe' chio' binļo len Diosen', na'  
gague neche xtoļa' chio'zen' blalj xchene'  
san neche xtoļa' yogo'loļ benach.

<sup>3</sup>Na' še choncho can' ža Diosen'  
nachen' guac nacho ba nombia'chwne'.  
<sup>4</sup>Na' še žacho ba nombia'chwne' na'  
bi choncho can' že'na', naccho bene'  
güenlaže' na' diža' li che Diosen' bina'  
šon' yichjlažda'ochon'. <sup>5</sup>Ba chaquecho  
Diosen' ca cheyaļa' gaguechone' še chon-  
cho con can' že'na', na' še ba chon-  
cho ca', nezecho ba nacchone' txen.  
<sup>6</sup>Na' note'tezcho še žacho naccho Diosen'  
txen, cheyaļa' soacho goncho da' güen  
can' ben Jesucriston'.

**Dan' ža Diosen' cheyaļa' goncho**

<sup>7</sup>Le'e bene' chacda', dan' chzoja' nga  
chona' mandadw naquen' gonļe, bi  
naquen to da' cobe. Naquen to da' gole  
dan' gwnezele caten' gwzolaole chejni-  
laže'le Jesucriston', le naquen diža' da'  
ba benele. <sup>8</sup>Na' dan' chona' mandadw  
naquen' gonļe, bia'cze naquen ca to da'  
cobe, le ba bla' diža' güen che Criston'  
len benachen' na' ba chzolao chde che  
yogo' da' ca' da' chgue'e Diosen'. Na'  
dan' chona' mandadw gonļe, Criston' ba  
blo'ede' naquen da' zaque' na' lec' le'e ba  
chlo'ele naquen da' zaque'.

<sup>9</sup>Note'tezcho la'czļa' žacho ba noncho  
Diosen' txen, bi naquen ca' še chgue'e  
lježcho; nac chol' lo' lažda'ochon'.

<sup>10</sup>Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to da' yo'o be'ni'. <sup>11</sup>Na' note'tezcho še chgue' lježcho nac chol' lo' lažda'ochon' na' zejcho ca to bene' lchol' bene' bi chacbe'e galen' yeque'e, le bi chacbe'echo can' cheyala' goncho.

<sup>12</sup>Ba bzoja' da' quinga par le'e xi'inda'ogua', le Diosen' ba bezi'xene' chele dan' chejni-laže'le Jesucriston' do yichj do laže'le. <sup>13</sup>Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le bach gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. <sup>14</sup>Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'n'an' ba gwzoele bi chzenagle che Satanásen'.

<sup>15</sup>Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. <sup>16</sup>Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen che Xacho Diosen', naquen che da' mal dan' de yežlio nga. <sup>17</sup>Na' da' te che yežlio nga len da' ca' cheseze-laže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocane.

### Nezecho bin' nac da' li

<sup>18</sup>Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'n'an' nezecho ba zoa žin ža te che yežlion'. <sup>19</sup>Ladjo chio' besechoj bene' ca' chesegue'ede' Criston'. Gague do laže' gosone' txen len chio' chejni-laže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bach besyechoje' nacb'ia' bi zjanaque' chio' txen.

<sup>20</sup>Criston' ba bene' chio' Spiritw che Diosen' na' da'n'an' yogo'cho nezecho can' ža diža' li che Diosen'. <sup>21</sup>Chzoja' le'e da' nga le bach nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca nchixe diža' li che'na'.

<sup>22</sup>Bene' güenlaže' ben' ža Diosen' bi gwsele' Jesucriston' golje' benach. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'. <sup>23</sup>Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

<sup>24</sup>Le soa le gwzenag che da' ca' ba bzeneto' le'e caten' gwzolaotele chejni-laže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'. <sup>25</sup>Na' da' gwna Jesucriston' gone' checho, gone' yela' mban toli tocane.

<sup>26</sup>Ba bzoja' le'e da' nga bia' diža' che bene' ca' chesaclaže' yesonjede' le'e. <sup>27</sup>Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lo' dan' cheyala' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwze-

jni' i chio' bi dan' nac da' li. Da' nan' le gwzenag dan' bzejni' i Spiriton' le' e na' le soa len Jesucriston'.

<sup>28</sup> Na' na' a xi'inda'ogua', cheyała' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuša'e'chone' cate' le'echo ba ble'e. <sup>29</sup> Na' nezecho Criston' zeje' chone' con can' cheyała' gone', lecze ca' nezecho yogo'czecho še zejcho choncho can' cheyała' goncho naccho xi' in Dios.

### Naquen' goncho še naccho xi' in Dios

**3** Le gon xbab catec chaquegüe Xa-cho Diosen' chio' da' chne' naccho xi'ine', na' da' licze xi'ine' chio'. Bene' bi chesejnilaže' Diosen' bi chesejni'ide' naccho xi' in Dios, le bi chesacbe'ede' non' nac Diosen'. <sup>2</sup> Xi'inda'ogua', chio' chejnilaže'cho Jesucriston' bačh naccho xi' in Dios. Na' biña' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'. <sup>3</sup> Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

<sup>4</sup> Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba žbie' bia' goncho. <sup>5</sup> Nezczecho Jesucriston' bide' yežlio nga cont beque'e xtola' chio' beñačh, na' ca nac Jesucriston', le bibi da' xinj none'. <sup>6</sup> Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biña' šejni'icho che' na' biña' gombia'chone'. <sup>7</sup> Xi'inda'ogua', bi güe'le latje no siye' le'e, še choncho da' güen can' cheyała' goncho, zejcho to liča can' zej Jesucriston'. <sup>8</sup> Na' še zoacho choncho da' xinj, naccho xi' in Satanásen', le Satanásen' zoaczen chonen

da' xinj cate' gwxcete yežlion'. Na' bid Xi' in Diosen' yežlio nga par gwcuzeze' dan' chon Satanásen'.

<sup>9</sup> Note'tezcho še Diosen' ba gwque'e chio' ca xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. <sup>10</sup> Na' da' nga chlo'en non' nac xi' in Diosen' na' non' nac xi' in Satanásen': note'tezcho še bi zoacho choncho da' güen, bi naccho xi' in Dios, na' lecze ca' note'tezcho še bi chaque lježcho, bi naccho xi' in Dios.

### Cheyała' gaque lježcho

<sup>11</sup> Na' da' nga ba beneczecho cate' gwzola'ochi chejnilaže'cho Jesucriston': cheyała' gaque lježcho tocho yetocho. <sup>12</sup> Bi gaccho ca goc da' Caín, goque' xi' in Satanásen' na' beyote' bene' biše'. ¿Nezele bičen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

<sup>13</sup> Da' nan' xi'inda'ogua', bi yebanele cate' bene' ca' bi chosozenag che Diosen' chesegue'ede' le'e. <sup>14</sup> Nezecho bich mbiayi' yichjlažda'ochon', san ba de yela' mban checho toli tocanē le ba chaque lježcho. Na' še bi chaque lježcho, ne' mbiayi' yichjlažda'ochon'. <sup>15</sup> Note'tezcho še chgue'e lježcho, lao Diosen' naccho bene' güet bene'. Na' nezecho bene' güet bene' bi de yela' mban che' toli tocanē. <sup>16</sup> Bzane cuin Jesucriston' neče chio' gosote'ne' dan' leca chacde' chio', da' nan' nezecho can' cheyała' gaque lježcho. Na' ca'cze chio' cheyała' zane cuincho gatcho cont gaclen lježcho še chonen byen. <sup>17</sup> Na' cate' de da' de checho na' nezecho bene' lježcho chyažden', še bi cheyaše'chone' bi gac nacho chaquecho Diosen'. <sup>18</sup> Xi'inda'ogua', bi cheyała' gaque lježcho de diža'ze. Cheyała' gaque lježcho do yichj do laže'cho na' soacho gaclen lježcho.



### Nac goncho cont bi žebocho Diosen'

<sup>19</sup>Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'. <sup>20</sup>Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca' xbab chechon' na' neзде' yogo'lol. Da'n'an' cheya'la' gwzenagcho can' žen', gague con can' ža xbab chechon'. <sup>21</sup>Le'e bene' chacda', še lo' yichjlažda'ochon' chacbe'echo bitw napcho do'la', nachen' bich chžebocho Diosen'. <sup>22</sup>Na' bite'tez dan' chnabechone' chonczen', le choncho da' nžie' bia' goncho na' can' chaclažen'. <sup>23</sup>Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gague lježcho tocho yetocho, con can' nžie' bia'. <sup>24</sup>Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw chen' zoan lo' lažda'ochon.

### Spiritw che Diosen' na' dan' chon contr Criston'

**4** Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'. <sup>2</sup>Na' quinga guac nezecho še Spiritw che Diosen' bzejni'in legaque' dižan' cheso'e: yogo' bene' cheso'e diža' chesene' Jesucriston' naque' Dios golje' beñač, nezecho yo'o Spiritw che Diosen' lo' yichjlažda'ogüe'. <sup>3</sup>Na' bene' cheso'e diža' chesene' Jesucriston' bi naque' Dios golje' beñač, nezecho Spiritw che Diosen' bi yo'on lo' yichjlažda'ogüe'. Bene' ca'

cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

<sup>4</sup>Xi'inda'ogua', ba nacle Diosen' txen na' da'n'an' bi chejle'le che bene' güenlaže' ca'. Chzoele cbi chejle'le chegaque' neče da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca' Satanásen' dan' zoa len bene' ca' bi chosozenag che Diosen' yežlio nga. <sup>5</sup>Bene' ca' bi chosozenague' che Diosen' cheso'e diža' che dan' chac yežlio nga, na' da'n'an' bene' lježe' ca' chosozenague' chegaque'. <sup>6</sup>Ca' nac chio', ba naccho Diosen' txen. Da'n'an' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanásen' le'.

### Diosen' chacde' beñač

<sup>7</sup>Le'e bene' chacda', cheya'la' soacho gague lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacbia' naccho xi'in Dios na' nombia'chone'. <sup>8</sup>Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' beñačen', le con can' nac yichjlažda'ogüe'. <sup>9</sup>Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocane še chejnilaže'chone' do yichj do laže'cho. <sup>10</sup>Bi goque'cho Diosen'; jelen' gocde' chio' na' gwsele' Xi'ine' Jesucriston' cont bnitlagüe' xtola'chon'.

<sup>11</sup>Le'e bene' chacda', dan' chaque Diosen' chio' lecz ca' cheya'la' gague lježcho tocho yetocho. <sup>12</sup>Nono zoa

bene' ba ble'ede' Diosen'. Perw na' še zoacho chaque lježcho tocho yetocho, nacbia' Diosen' zoacze' len chio' na' ba chaquechone' can' cheyała' gaguechone'. <sup>13</sup> Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'. <sup>14</sup> Na' neto' postlw ba ble'eto' na' choe'to' diža' nezeto' gwseła' Xacho Diosen' Xi'inen' cont gwnitlagüe' xtolā' note'tez bene' šejnilaže' le'. <sup>15</sup> Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

<sup>16</sup> Chio' ba nezecho na' chejle'cho chaque Diosen' chio'. Diosen' zoacze' chacde' benachen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. <sup>17</sup> Diosen' zoacze' chaclene' chio' cont chaquechone' can' cheyała' gaguechone' na' chaque lježcho can' cheyała' gague lježcho, na' Diosen' chone' ca' cont bi že-bcho cate' žin ža gone' yela' justis che yogo' benač. Na' bi že-bcho še zoacho chaque lježcho yežlio nga can' chon Jesucriston'. <sup>18</sup> Še chaquecho Diosen' ca cheyała', bibi de da' že-bcho. Caten' chžebchon' naquen ca to castigw len chio', na' še ne' chžebcho biņa' gaguecho Diosen' can' cheyała' gaguechone'.

<sup>19</sup> Chio' chaquecho Diosen' le len' godce' chio' da' nechw. <sup>20</sup> Note'tezcho še chgue'e lježcho, la'czła' žacho chaquecho Diosen', con chonlaže'chon'. ¿Nacxe goncho gaguecho Diosen' ben' bi chle'echo še bi chaque lježcho bene' chle'etecho? <sup>21</sup> Na' ba bene' mandadw can' cheyała' gon chio' chaquechone', že' lecz cheyała' gague lježcho.

### Gwcuascho da' malen'

**5** Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gague lježcho, le lecz xi'in Dios bene' lježchon'. <sup>2</sup> Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. <sup>3</sup> Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon. <sup>4</sup> Note'tezcho še ba bob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nān' chzoecho chcuascho da' xinjen' dan' de yežlion' bi chonchon. <sup>5</sup> Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

### Diosen' cho'e diža' že' Jesucriston' naque' dogualje Xi'ine'

<sup>6</sup> Quinga ben Jesucriston' šlac bide' yežlio nga, bnežjw cuine' gwzoe' nis na' blalj xchene'. Bi nacho con gwzoaze' nis, san lecz blalj xchene'. Na' Spiritw che Diosen' choen' diža' bene' ca', na' Spiriton' choen' pur diža' li. <sup>7</sup> Na' nita' šone' bene' chesegüe'e da' balī yaban' cheso'e diža' che Jesucriston': Xacho Diosen', len Jesucriston' ben' nzi' Xtiža' Dios na' len Spiritw che Diosen'. Na' toz can' cheso'e diža' che Jesucriston'. <sup>8</sup> Lecz de šone' da' chese'go'on da' balī cheso'en' diža' che Jesucriston' yežlio nga: Spiritw che Diosen', na' dan' gwzoe' nis na' dan' blalj xchene'. Na' toz ca cheso'en' xtižen'. <sup>9</sup> Chejle'cho xtiža' benachen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'. <sup>10</sup> Na' še chejle'cho

Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' güenlaže' da' bi chzenagcho diža' dan' cho'e che Xi'ine'na'. <sup>11</sup> Na' xtiža' Diosen' chzejni'in chio' guata' yela' mban che benachen' toli tocane še yesejnilaže' Xi'ine' Jesucriston'. <sup>12</sup> Quinga naquen, de yela' mban checho toli tocane še chejnilaže'cho Jesucriston', na' bi de yela' mban checho toli tocane še bi chejnilaže'chone'.

**Can' beyož cart nga  
da' bzoj Postlw San Juan**

<sup>13</sup> Ba bzoja' le'e cart nga, le'e chejni-laže'le Xi'in Diosen', cont nezele de yela' mban chele toli tocane.

<sup>14</sup> Na' bitw chžebcho chol' güižcho Diosen', le nezecho chzenague' checho cate' chnabcho lagüen' da' chazlaže'.

<sup>15</sup> Na' cate' nezecho chzenague' checho bite'tez dan' chnabechone', lecz nezecho gone' da' ca' ba gwnabechone'.

<sup>16</sup> Na' še chacbe'echo bene' lježcho chone' bi da' xinj da' bi zaca' sela' Diosen'

le' lo yi' gabil, cheyała' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bal' bene' zacan' sela' Diosen' legaue' lo yi' gabil. Bi žia' nable gaclen Diosen' bene' ca'. <sup>17</sup> Napcho doła' še choncho bite'tez da' xinj, perw gague yogo' da' xinj dan' chonchon' sela' Diosen' chio' lo yi' gabilen'.

<sup>18</sup> Nezecho še ba bocob Xacho Diosen' yichjlažda'ochon' bi zoacho choncho da' xinjen' le' zoa Jesucriston' ben' nac Xi'in Diosen' chcuase' chio' len dan' chon Satanásen', na' da'nan' bi soen gwžiyain' chio'.

<sup>19</sup> Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

<sup>20</sup> Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocane che bene' chejnilaže' le'. <sup>21</sup> Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.

## CART GWCHOPE DAN' BZOJ POSTLW SAN JUAN

### Chio' nombia'cho diža' li che Diosen' cheyaļa' gaque lježcho

**1** Neda' naca' bene' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' bene' yezica'chle bene' zjanombia' diža' li che Diosen' chesacde' le'e. <sup>2</sup>Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocanē. <sup>3</sup>Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li che Diosen' na' ba chaque lježle tole yetole.

<sup>4</sup>Leca gwbeda' cate' gwnežda' baļ bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho. <sup>5</sup>Dan' cheyaļa' goncho, no'ole, cheyaļa' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejniłaže'le Jesucriston'. <sup>6</sup>Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole chejniłaže'le Jesucriston' bzejni'to' le'e cheyaļa' gaque lježcho.

### Čaš bene' chesonlede'

<sup>7</sup>Bene' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' beñač. Note'tez bene' chon ca' naque' bene' gwxiye' na' chone' contr Criston'. <sup>8</sup>Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

<sup>9</sup>Note'tezcho še chzoacho ca'ale dan' bsed blo'e Criston' cont chzenagcho bichle diža' dan' chzejni' bene' chio', bi zoa Diosen' len chio' še ca'. Na' note'tezcho še zoacho chzenagcho che dan' bsed blo'e Criston', Xacho Diosen' len Xi'ine' Criston' nite' len chio'. <sup>10</sup>Na' še no bene' yide' gan' zoalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. <sup>11</sup>Cheyaļa' gonelene' ca', le še gwlebelene' zejen txen chonlenlne' da' xinjen'.

### Goclaže' šjane'e legaque'

<sup>12</sup>De da' zan da' nia' le'e perw bich chaclaža' gwzozan' le'e yiš. Zoa' lez yida' gana' zoale na' güe'lēna' le'e diža' cho'a cont soacho mbalaz juisyw.

<sup>13</sup>Xi'in' no'ole bilon', no'ole ben' lecze gwlej Diosen' cont chzenague' che', chosoguape' le'e tiox. Da' na'zen' chzoja' na'a.

## CART GWYONE DAN' BZOJ POSTLW SAN JUAN

### Postlw San Juanna' cho'e diža' güen che ben' le Gayo

**1** Neda' naca' bene' gole blao, na' chzoja' cart nga par le', xmigua' Gayo. Da' li chacda' le'.

<sup>2</sup>Bene' migw, chnaba' lao Diosen' gac güen chio' na' so' güen ca güenna' ba zoa lo' yichjlažda'ogu'. <sup>3</sup>Leca bebeda' cate' besela'ac to chope bene' lježcho goso'e diža' can' zoaczo' chono' güen da' chzenago' diža' li che Diosen' do yichj do lažo'. <sup>4</sup>Len neda' le'e nacle ca xi'ina', na' bich bi de da' chbechda' ca chbeda' chnezda' chzenagle diža' li che Diosen' do yichj do laže'le.

<sup>5</sup>Bene' migw, chono' güen dan' chacleno' bene' lježcho ca' bene' zjanac bene' zito'. <sup>6</sup>Legaque' ba goso'e diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güešco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'. <sup>7</sup>Ba gosa'ac laže' cont cheso'e xtiža' Criston' na' bibi goclen chesezi'e che bene' ca' bi chesejle'e che Criston'. <sup>8</sup>Da'nan' cheyaļa' gwlebcho bene' ca', gaclenchwne' na' gonchone' txen cont yesombia' bene' diža' li che Diosen'.

### Diótreres chone' da' mal

<sup>9</sup>Bach bzoja' le'e chdop chžagle chonxenle Jesucriston', perw na' Diótreres cha-

claže' gague' la'zelaoze bene' blao len le'e na' bi chzenague' cheto'. <sup>10</sup>Da'nan' caten' yida' dezna'a le'e na' yapa'ne' che yogo' dan' chone' contr neto' na' diža' güenlaže' dan' chne' cheto'. Na' gague da' na'zen' chone', lecz bi chlebe' bene' lježchon' liže' bene' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

<sup>11</sup>Bene' migw, bi gono' txen len bene' ca' cheson da' xinjen', san ben txen len bene' ca' cheson da' güen. Note'tez bene' zoateze' chone' da' güen, nacia' nombi'e Diosen', na' note'tez bene' zoateze' chone' da' xinjen', nacia' bina' gombi'e Diosen'.

### Demetrimon' chone' da' güen

<sup>12</sup>Yogo'ze bene' cheso'e diža' güen che Demetrio na' nacia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

### Can' beyož carten'

<sup>13</sup>Dech da' zan da' godca' nia' le'e, perw bich chaclaža' gwzojan' le'e yiš. <sup>14</sup>Zoa' lez yob yežagcho cont güe'cho diža' cho'a cate' soacho txen.

<sup>15</sup>Soago' binlo len xbab dan' yo'o lo' yichjlažda'oguon'. Bene' migw chion' nita' nga chosoguape' le' tiox. Na' chnaba' gwguapšco' tiox to to bene' migw cheto' ca' nita' gan' zolen'. Da' na'zen' chzoja' na'a.

## CART DAN' BZOJ SAN JUDAS

### San Judas chzoje' bene' ca' zjanaque' lo na' Diosen'

**1** Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. <sup>2</sup> Chnaba' gon Xacho Diosen' cont gacbe'echle cheyaše' cheži'ilaže'chgüede' le'e, na' gone' cont soa cuezechle binlo len xbab da' yo'o lo' y'ichjlažda'olen', na' gone' gacbe'echle chacchgüede' le'e.

### Bene' ca' chososed chosolo'ede' diža' güenlaže'

(2 Pedro 2:1-17)

<sup>3</sup> Bene' migw, chacda' le'e, na' ba goclaže'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocane. Perw na'a ba chonen byen chzoja' chneyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' nacho lo ne'en. <sup>4</sup> Nita' bal bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyała' yosozenag yogo' benachen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtola'gaquen'.

<sup>5</sup> Na' la'czla' ba gwnezele yogo' can' goquen', chaclaža' gona' cont šjazyalaže'le Xancho Diosen' bosle' da' xozxta'o neto' bene' Israel lo na' bene' Egipto ca', perw gwdechle bžiaye'e balteze' bi gosejle'che'. <sup>6</sup> Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch.

Nachen' besyechoje' gan' bžia Diosen' bia' yesenite'. Nach Diosen' gwsele' legaque' gan' nacchgua choł, na' zjancheje' gden toli tocane cont yesezaca'zi'e cate' žin ža gac juisyw. <sup>7</sup> Na' lecze ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosata'lene' ljež bene' byogaque' gosone' le' ca' xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiayi'tecczen'. Na' da' bene' ca', chosnisde' chio' benach gata' castigw lo yi' gabil' toli tocane che bene' bi yosozenag che'.

<sup>8</sup> Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' bene' zjazaca'chgua. <sup>9</sup> Perw nža'le cheson angl che Diosen', le cani' gwzoa to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tilje' le'." <sup>10</sup> Perw bene' quinga chesezi'diže' bite'teze da' bi chesejni'ide'. Na' chesonteze' da' ca' ža cuerp chegaquen' yesone', ca cheson beyixe' be bi chesejni'i, na' da' ca' chesonen' chosožiyin' legaque'.

<sup>11</sup> Nyaše'chgua gac chegaque'. Zjanite' chesegue'e lježgaque' can' ben da' Cañ, na' lecze chesoe'laže' chesone' da' mal cont yesone' gan mechw can' ben da' Balaam. Chesone' güedenag len bene' ca' gwlej Diosen' cont chesenabi'e legaque' cacze güedenag ben da' ben' gože' Coré cani', na' can' gwžiyi' da' Corén

neche yela' güedenag chen', lecz ca' yesebiaye'e. <sup>12</sup>Na' cate' le'e che'ej chagwle txen cont chlo'ele chaque lježle, legaque' chesagwxatteze' con nacteze žan chegaque' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'nana' zjazacalebde' ca bzigüe' da' dope to le'e lache' šiš, na' lecz zjazacalebde' ca bene' güeye' xila' bene' chna' cuine' na' bi chne'e xila' ca'. Lecze zjazacalebde' ca bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen na' chbixen lo yo. <sup>13</sup>Na' neche yela' zton' cheson bene' ca', zjazacalebde' ca nisdao' da' chas chata' na' checho'onen bžina' ga nac lo yo cho'a nisdan'. Na' zjazacalebde' ca beljw da' bich zjažian xišne'en gan' cheyała' yesebian, le Diosen' bžie' bia' yesezaca'zi'e toli tocanę gan' nac leca chol.

<sup>14</sup>Gwzolaon cate' gwzoa da' Adán bžinten cate' gwzoa da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca' <sup>15</sup>cont chogbi'en yesezaca'zi' yogo' bene' zjanape' doła'. Yogo' bene' ca' bi bosozenag che' yesezaca'zi'e toli tocanę neche da' gosone' da' mal juisyw yela' güedenag chegaquen' na' neche da' gosene' diža' ya' che'." <sup>16</sup>Na' ca nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaque'. Len xtiža'gaquen' chesonxen cuingaque' na' chosopede' bene' yoble cont yesone' gan mechw o cont yesaclen bene' legaque'.

### San Judas che'e bene' chesonxen Jesucriston' can' cheyała' yesone'

<sup>17</sup>San le'e bene' migw, bene' chacda', cheyała' šjayze'ele diža' nga gosena postlw ca' bene' ca' gwlej Xancho Jesucriston'. <sup>18</sup>Gosene': "Tiempen' cate' ba zoa yid Xancho Jesucriston', nita' bene' bi yesejle' che Diosen' na' yesonle' che' na' yesonteze' con da' žan chegaque' da' nac yela' zto'." <sup>19</sup>Na' na'a bene' ca' chesone' cont le'e chejnilaže'le Criston' bi chonle toze xbab, san nža' nža'te ca žale. Chesone' xbab che da' chnalaze' cuerp chegaque', le bi yo'o Spiritw che Diosen' lo' yichjlažda'ogaquen'.

<sup>20</sup>Perw le'e bene' migw, chacda' le'e, na' chneyoeda' le gonchach laže'le cont soachachle šejle'le diža' li che Diosen' da' zaca'chgua. Na' le yol güiž Diosen' ye'ln'e da' chzejni'i Spiritw chen' le'e. <sup>21</sup>Na' le soa le gon cont gacbe'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjayzoalenchone' toli tocanę. Da'nana' le soa le cueze batcan' gone' ca'.

<sup>22</sup>Baļ bene' chesacžejlaže' še cheyała' yesone' can' ža Diosen'. Le gwzejni'i legaque'. <sup>23</sup>Na' bene' ca' ba chesezolagüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaque' nez güenna'. Na' yebaļ bene' chesonchgüe' da' xinj, na' lecze cheyała' yeyaše'cho legaque', perw do chaž chžebcho, do chgue'echo dan' chesonen' na' cheyała' gwsaca'cho cont bi goncho txen len da' xinjen' chesonen'.

### Judasen' chonxene' Diosen'

<sup>24-25</sup>Cheyała' gonxencho toz Dios ben' zaca' gonxencho, ben' none' yela' mban checho toli tocanę. Dios nan' naque' bene' sina' juisyw. Chac chone' cont bi lažo'cho goncho da' xinj, na' chac chone' cont bibi xtoła'cho gata' cate' yežin-

cho lagüen' gan' yo'ochgua be'ni'. Leca  
yebecho cana'. Diosen' naque' la'zelagüe  
bene' zaca' bene' blao, na' zaque' chn-  
abi'e doxen. Naque' Xan yogo' benach  
na' yogo' bica'chle da' de. Len' gocxene'

cate' bina' xe yežlion' na' cheyała' gonx-  
enchone' toli tocane dan' gwsele' Xancho  
Jesucriston' chaclene' chio'. Cašca gac.  
Da' na'zen' chzoja'.



## JESUCRISTON' BZEJNI'IDE' SAN JUANNA' CHE DA' CA' ZA' GAC

### Diosen' bzejni'ide' Jesucriston' diža' quinga

**1** Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'. <sup>2</sup>Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

<sup>3</sup>Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le ba zoa gac can' žanna'.

### Juanna' chzoje' bene' ca' chesonxen Jesucriston' yež ca' gaže

<sup>4</sup>Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw chen' yesenita'sque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' bina' xe yežlion', na' soacze' toli tocaṇe. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e. <sup>5</sup>Na' Jesucriston' lecze soašque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yela' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtoła'chon'. <sup>6</sup>Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bxož, Dios ben' nac Xe' na' lecze naque' ben' chonxene'. Cheyala'

gonxenchone' toli tocaṇe, le zoacze' chnabi'e toli tocaṇe. Can' gonšcaczcho.

<sup>7</sup>Jesucriston' yide' da' yoble to lo' bejw, na' yogo'lo! bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

<sup>8</sup>“Neda' naca' Dios ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z.” Can' ža' Xancho Dios ben' nape' yela' guac xen juisyw, ben' ba zoacze' cate' bina' xe yežlion' na' soacze' toli tocaṇe.

### Juan ble'edaogüede' leca bene' zaca' juisyw nac Criston'

<sup>9</sup>Neda' Juan naca' bene' lježle dan' naccho txen chzenagcho che Jesúsen' cont Diosen' chnabi'e yichjlažda' ocho, na' toz can' chosoči chososaca' bene' chio' neče xtižen', na' txen chaclen Jesucriston' chio' cont chyo chčejecho len yogo' da' chac checho. Da' ba gwduxue'eda' xtiža' Diosen' na' ba bia' diža' che Jesucriston', da'nana' gosezene' neda' na' gosesele' neda' pres gan' že' Patmos dan' nac to yežlio dao' lo' nisaon'. <sup>10</sup>Na' to ža' dmigw Spiritw che Diosen' benen cont ble'edaogüeda', na' benda' Jesucriston' chne' cožan' zižjechgua ca ga chbež trompeta. <sup>11</sup>Na' gože' neda':

—Neda' naca' ben' ben' yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' sełon' lao bene' ca' nita' gaž yež che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

<sup>12</sup>Na' gwyechja' gwna'a non' chne' na' ble'eda' gaže candeler de oro. <sup>13</sup>Na' gacho! candeler ca' gaže, ble'eda' to bene' nac ca to benach perw gočbe'eda' bi

naque' beṇaḥze. Nyaze' to lache' ton da' bžinte lo nī'e na' nchej cho'alcho'en ca to bant de oro. <sup>14</sup>Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' chaḷa'nin. <sup>15</sup>Nī'e ca' ble'edan' ca to de bronze da' nḷachgua cate' naquen ya'alj xoan lo yi'. Na' ši'en nenen zižjehgua ca chziž yegw cate' dechgua nis. <sup>16</sup>Na' noxe' gaže beljw len ne'e lichan' na' lo' cho'en chchojen ca to spada da' nḷa chop la'an. Na' cho'alagüen' goctiten ca gwbiž cate' chṇa'chguan.

<sup>17</sup>Na' cate' ble'eda'ne' gwbiḅa' xni'en gottia' šlat. Nach bli ne'e lichan' gwḅoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te chen. <sup>18</sup>Naca' ben' nsa' yela' mban. Cana' gota' perw bebana' ladjo beṇe' guat na' zoacza' toḷi tocaṇe. Na' naquen lo na' nīa' bat yesat to to beṇe' na' nac gac chegaque' cate' baḅ gosate'. <sup>19</sup>Na' na'a bzoj diža' che da' ca' ba ble'edo' na' diža' che da' ca' chac na'a na' diža' che da' ca' za' gac. <sup>20</sup>Na' da' nono na' neze che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže beṇe' ca' cheso'e xtiža' len gaže cuen beṇe' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen beṇe' ca' chesonxen neda'.

**Da' gwna Jesucriston' che beṇe' ca' chesonxen le' lo ciuda ca' gaže: Da' gože' beṇe' Ereso ca'**

**2**'Bzoj ben' choe' xtiža' len beṇe' ca' chesedop chesežag chesonxene' neda' lo ciuda Ereson', yo'one' neda' noxa' beljw ca' gaže len na' lichan' na' chda' gachol candeler de oro ca' gaže, na' yo'one' nedan' chapa'ne' diža' quinga: <sup>2</sup>“Neze nḷe'eda' ca güenna' chonle, can' chchejlaže'le zoale chonchguale xšinan'. Nezda' bi chleble beṇe' cheson da' xinj, le

ba ble'ele can' cheson beṇe' güenlaže' ca' chesene zjanaque' postlw na' chache'ele bi zjanaque' dogualje postlw. <sup>3</sup>Ba byo bchejle len yogo' dan' ba goc chele na' ba benchgual xšinan' na' bi jaḅaque'laže'le. <sup>4</sup>Perw da' nga bi chazlaža' can' chonle, da' bich chaquele neda' can' goquele neda' cana'. <sup>5</sup>Da'nana' le gon xbab can' gwzoale goquele neda' na' can' gwzoale bzenagle chia' na' yetinje toḷa'le cont da' yoble gonle güen can' benle cana'. Na' še bi yetinjele toḷa'len', yedeyena' cont bich gac candeler chia'. <sup>6</sup>Perw la'czla' bi chontecle güen, chebeda' chgue'ele da' xinj da' cheson beṇe' ca' zjanzi' nicolaí' tas, beṇe' ca' chesene' guac gontezechle da' xinj, le neda' lecze chgue'eda' can' chesonen'. <sup>7</sup>Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' gona' da' gagwle da' chbia lo yag yela' mban da' zoa latje xdan che Diosen'.”

**Da' gože' beṇe' Esmirna ca'**

<sup>8</sup>Na' na'a bzoj ben' choe' xtiža' len beṇe' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo beṇe' guat ca', na' yo'one' nedan' chapa'ne' diža' quinga: <sup>9</sup>“Neze nḷe'eda' ca güenna' chonle. Nezda' chy chzaca'le. Nezda' nacchguale beṇe' yaše', la'czla' de chele da' zaca'ch clal ca yela' gwni'an'. Na' ca nac beṇe' Israel beṇe' ca' chesene' ba gwlej Diosen' legaque' cont gone' güen len legaque', nezda' bale' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosozenague' che Satanás dan' chnabia' da' xigüe' ca'. <sup>10</sup>Bi žeble da' ca' za' gac chele, le Satanásen' gonen cont yeseyixjue' balle ližya cont gata'bia' še soen

gonen cuejyichjle xtižan'. Na' lo to čhope ža yosochi yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocane. <sup>11</sup>Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocane dan' žacho yela' got gwchope."

### Da' gože' bene' Pérgamo ca'

<sup>12</sup>'Na' bzoj ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: <sup>13</sup>"Neze nle'eda' ca güenna' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda che-len' gan' že' bene' zan bene' chosozenag che Satanásen'. <sup>14</sup>Perw de to čhope da' chonle da' bi chazlaža'. Le nita' balle chzejni'i lježle guac gontezle da' xinj. Ca'cze nac dan' bzejni'i da' Balaam da' rey Balac cani'. Da'n'an' gwsele' no'ole gosego'oyele' bene' Israel ca' cont gosagüe' yela' guagw da' nac che l' gua'a lsaca' gosejni-laže' bene' zito' ca' na' cont gosone' da' yela' zto' len cuerp čhegaque'. <sup>15</sup>Na' lecze nita' balle chzenagle che dan' chgue'eda' dan' chososed chosolo'e bene' ca' zjanz'i nicolaítas. <sup>16</sup>Da'n'an' le yetinje che da' xinjen' chonle. Na' še bi yetinjele xtoła'len', la' yidtia' yedetillena' nole chonle da' xinjen' len spada dan' chchoj choan'. <sup>17</sup>Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo

yežlion', to da' zaca'leben ca maná, na' gona' to yej šiš' che to tole gan' yoj lale da' naquen to lale da' cobe da' nono nombia', lete le'e gaquen lo na'le gombia'len."

### Da' gože' bene' Tiatira ca'

<sup>18</sup>'Na' bzoj ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' čala'nin' na' ni'a ca' chesaquen ca bronze da' cheyac ya'lj cate' xoan lo yi'. Yo'one' neda' chapa'ne' diža' quinga: <sup>19</sup>"Neze nle'eda' ca güenna' chonle, nezda' zoale chaquele neda', chejni-laže'lenda', chonchguale xšinan' na' chchejele bite'teze chac chele, na' nezda' chonchle güen na'a clal can' benle cana'. <sup>20</sup>Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejni-laže' neda' cont bale' chesone' da' nac da' yela' zto' len cuerp čhegaquen' na' lecze chesagüe' yela' guagw da' chesena bene' naquen che l' gua'a lsaca' chesejni-laže'. <sup>21</sup>Ba gwleza' cont yetinjde' che yela' zto' dan' chonen', perw bi chclaže' yetinjden', na' bi'na' cuejyichje' yela' zton' chonen'. <sup>22</sup>Da'n'an' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecze yesale'chgüede' še bi yesebejyichje' da' ca' chzejni'ide' legaque' yesone'. <sup>23</sup>Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesacbe'ede' nombi'a yogo'te xbab da' yo'o lo' yichjlaždao' benach, na' gona' cont to toe' soe' mbalaz o saca'zi'e con ca nac da' ba bene'. <sup>24</sup>Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono

nombia', bi nia' bichle da' cheyała' gonle.  
<sup>25</sup> Con soaczele gonle da' güen can' chonle  
 tza tza, cont ne' chonle güen caten' yida'  
 da' yoble. <sup>26</sup> Note'tezle še soele bi cue-  
 jychjle xtižan', na' še soele ne' soatezle  
 gonle can' nona' mandadw cate'ch yida'  
 da' yoble, gona' cont nabia'le nación ca'  
 txen len neda'. <sup>27</sup> Ca Xan' ba bene' cont  
 chnabi'a nación ca', lecze can' gona' cont  
 bene' bi yesebejychje' xtiža' yesenabi'e  
 txen len neda'. Na' yesenabi'e nación  
 ca' na' žan ca žan bene' nación ca'  
 yosozenague' čhegaque', na' bene' ca' bi  
 chosozenag, yosožiaye'e legaue' ca to  
 bene' chzoxj to no yeso' xguague. <sup>28</sup> Na'  
 gwnežjua' legaue' beljw xsilen'. <sup>29</sup> Le'e  
 žia nagle da' chene, le gwzenag čhe dan'  
 ža Spiritw čhe Diosen' chen' le'e chdop  
 chžagle chonxenle neda' gate'teze."

### Dan' gože' bene' Sardis ca'

**3** 'Na' lecze bzoj ben' choe' xtiža'  
 len bene' ca' chesedop chesežag  
 chesonxen neda' lo ciuda Sardis, yo'one'  
 napa' Spiritw čhe Dios dan' nac ca  
 gaže spiritw, na' noxa' beljw ca' gaže,  
 na' neda' chapa'ne' diža' quinga: "Neze  
 nle'eda' yogo'loł dan' chonle. Nežda' na-  
 cle ca bene' guat la'czla' chze čhele  
 naple yela' mban toli tocanē. <sup>2</sup> Le gon  
 xbab can' chonle na' le šejnilaže'ch neda'  
 na' le gwzenag chia' šlac bina' yeyož  
 cuiayi'le, le dan' chonlen' bi naquen can'  
 chebe Dios ben' chonxena'. <sup>3</sup> Le soa le  
 gon xbab čhe xtižan' dan' bosozejni'i  
 bene' le'e na' da' bzenagle čhen cana'.  
 Le gwzenag čhen na'a da' yoble cont  
 yetinjele xtoła'len'. Na' še bi gonle xbab  
 yetinje xtoła'len', žin ža yedexenyala' le'e  
 na' gona' castigw čhele ca chzenyal to no  
 bene' gwban cate' chbane'. Bi nezele bi ža  
 bi hor. <sup>4</sup> Bia'cze nita' balle bene' Sardis  
 bina' gonle da' malen' txen len bene' yez-  
 ica'chle. Na' le'e nac lažda'olen' xilaže'  
 len neda', žin ža gona' lache' šiš čhazle  
 na' talenle neda', le zaca'le cont gonle

neda' txen. <sup>5</sup> Note'tezle še soele bi cuejy-  
 ichjle xtižan', žin ža gona' lache' šiš čha-  
 zle, na' gwbat yoxia' lalen' le'e libr chia'  
 gan' nyoj la yogo' bene' zjanape' yela'  
 mban toli tocanē, na' güe'lena' Xan' diža'  
 na' len bene' zjanac angl čhe' ca' yape-  
 gaca'ne' nacle neda' txen. <sup>6</sup> Le'e žia nagle  
 da' chene, le gwzenag čhe dan' ža Spir-  
 itw čhe Diosen' chen' le'e chdop chžagle  
 chonxenle neda' gate'teze."

### Da' gože' bene' Filadelfia ca'

<sup>7</sup> 'Na' lecze bzoj ben' choe' xtiža' len  
 bene' ca' chesedop chesežag chesonxen  
 neda' lo ciuda Filadelfia, yo'one' naca'  
 bene' laždao' xilaže' juisyw, na' zoateza'  
 chona' can' gwnia' gona'. Napa' xinya čhe  
 da' rey David. Cate' chsaljua' cont yeso'o  
 bene' gan' zoa Diosen' chnabi'e, nono  
 gac yosejyw, na' cate' chseyjua' cont bi  
 yeso'e, nono gac saljw. Yo'one' neda'  
 chapa'ne' diža' quinga: <sup>8</sup> "Neze nle'eda'  
 ca güenna' chonle. Nach ba gwsaljua' ca  
 to puert čhe le'e da' nono gac yosejyw.  
 Na' la'czla' bi nac zanle, ba chzena-  
 gle xtižan' na' bi gwlejyichjlen caten'  
 bosochi bososaque' le'e. <sup>9</sup> Bał bene' Is-  
 rael že' gan' zoalen' chesene' ba gwlej  
 Diosen' legaue' cont gone' güen len  
 legaue', perw bi gwleje' legaue', le  
 bi chesejnilaže'ne'. Zjanaque' dapa' txen  
 chosozenague' čhe Satanás dan' chnabi'a  
 da' xigüe' ca'. Na' ca nac legaue', gona'  
 cont žin ža yesape' le'e bala'añ cate'  
 yesacbe'ede' chacda' le'e. <sup>10</sup> Ba byo bche-  
 jle len yogo' dan' gwdi gwxcac'le na'  
 benle can' nona' mandadw, na' da'nan'  
 gona' yechojle güen cate' žin ža saca'zi'  
 yogo' benač. Cana' gata'bia' čhe to to  
 benač še yosozenague' chia' o še bi  
 yosozenague'. <sup>11</sup> Ba zoa yida' da' yoble.  
 Le soachach le šejnilaže'nda' na' gwzena-  
 gle chia' cont bibi gwžon soale mbalaz  
 toli tocanē. <sup>12</sup> Note'tezle še soele bi cue-  
 jychle xtižan', žin ža gona' gacle ca  
 bdope da' zjanita' lo' yodao' blao čhe

Dios ben' chonxena', le yežinle gan' zoa Diosen' na' yega'anlen'ne' toli' tocanē. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe. <sup>13</sup>Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

### Dan' gože' bene' Laodicea ca'

<sup>14</sup>'Na' bzoj ben' choe' xtiža' len bene' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaze' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' benach na' yogo'loj bichle da' de le'e yaban' na' lo yežlion'. Yo'one' neda' chapa'ne' diža' quinga: <sup>15</sup>"Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'. <sup>16</sup>Na' da' bi chonle cuent gaquele neda', da'nan' ba zoa cuejyichja' le'e bich gona' le'e ca xi'ina'. <sup>17</sup>Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chacbe'ele leca bene' zban nacle len Diosen'. Bi chacbe'ele nacle ca to bene' bi chle'e o ca to bene' laže' ga'alyid da' bi chejni'ile xtižan' neca chzenagle chen. <sup>18</sup>Da'nan' chnia' le'e cheya'la' si'le da' gona' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' gona' le'e cont da' li soale mbalaz. Na' le nab yezi'xena' xto'la'le cont gac lažda'olen' xilaže' can' chac xalana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheya'la' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gacbe'ele da' chaclaže'

Diosen' gonle. <sup>19</sup>Note'teze bene' chacda', chdi'la'ne' na' chnežjua'ne' castigw cate' chone' da' xinj. Da'nan' cheya'la' cuec yichjle yetinjele xto'la'len'. <sup>20</sup>Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. <sup>21</sup>Na' note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lana'ne' chnabi'a'to' txen. <sup>22</sup>Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

### Ben' že' yaban' chesonxene' Diosen'

**4** Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw zižjehgua cacze zižje chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

<sup>2</sup>Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. <sup>3</sup>Na' ble'eda' ben' chi' chnabian' chactite' ca chactit yejese, yej da' nzi' jaspe na' da' nzi' cornalina. Na' to da' nac ca to pita' gwyechjen gan' chi'e chnabi'en, na' chactiten ca chactit to yej da' nzi' esmeralda. <sup>4</sup>Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'. <sup>5</sup>Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' cha'la'nin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. <sup>6</sup>Na' doxen lagüe' gan' chi'e chnabi'en

nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüejje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. <sup>7</sup> Bene' nechw naque' ca to león, na' bene' gwchope ca to go'n, na' bene' gwyoñe nac cho'alagüe' ca che benač, na' bene' gwdape naque' ca to bsia be ze lo be'. <sup>8</sup> Na' dapte bene' ca' to toe' žia xop güeje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene': Leca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli' tocane.

<sup>9</sup> Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze toli' tocane, yogo' ni'a cate' chesonxene' le' cheso'e yela' choxcen che', <sup>10</sup> bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli' tocane chesonxene' le' gan' chi'e chnabi'e na' chosonite' corona čhegaquen' xni'en, chesene':

<sup>11</sup> Xanto' Dios, zaco' gonxento' le', na' soato' le' bala'an' na' güe'to' diža' che yela' guac xen čhion', le len' beno' yogo'lol' da' de, na' beno' yogo'lo'len con ca gwnalažo'.

**Jesucristw ben' zaca'lebe  
ca xila' daon' gosot bene'  
Israel ca' neče xtoła'gaque'**

**5** Na' ble'eda' Dios ben' chi' chnabia', len ne'e liča noxe' to yiš da' ndobyoyen na' nyoj chop la'aten na' nyeyjon nyišen' gaže seyw. <sup>2</sup> Na' ble'eda' to angl gual gwne' zižje gwne':

—ž Non' zaca' gwzoxj seyw ca' cont šaš yišen'?

<sup>3</sup> Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'čh le'ezden' nac naquen. <sup>4</sup> Na' gwčežchgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen. <sup>5</sup> Nach to bene' gwlej Diosen' cont naque' blao gože'nda':

—Bitw cuežo'. Gwñašc, na' zoa Jesucristw ben' golje lo diaža che da' Judá, naque' rey can' nac da' xoxta'ogüe' David, na' da' nape' yela' chnabia' xen zaca'lebbe' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac nitlao xtoła' benačhen'.

<sup>6</sup> Nach ble'eda'ne' zeche' gan' chi' ben' chnabian' na' ladjo bene' ca' tap ben' zjažia xil, do gachoł bene' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'. <sup>7</sup> Nach ben' ble'eda' ca to xila' dao' jaxi'e yiš dan' noxe' ben' len ne'e liča gan' chi'e chnabi'en. <sup>8</sup> Na' cate' jaxi'e yišen' bene' ca' tap lente bene' blao ca' tapechoa bosozoa xibgaque' lagüen'. Na' to to bene' blao ca' zjanoxe' to arpa na' to barser de oro gan' chey yal, na' yalen' zejen xtiža' bene' ca' zjanac lo na' Diosen', dižan' cheso'lene' le' caten' chosoł güiže'ne'. <sup>9</sup> Nach bene' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxjo' seyw ca' nyišen', le bnežjw cuino' gosote' le'.

Blalj xcheno' cont bnitlaguo' xtoła'to', na' gwxi'o neto' cont nacto' lo na' Dios, neto' nacto' bene' to to nación, to to yež, to to diaža na' chacto' gwde gwdele diža' da' de lo yežlion'.

<sup>10</sup> Na' gwlejo' neto' cont nacto' ca rey, na' zoato' chonxento' Dios čheton' ca bxož, na' žin ža nabia'to' lo yežlion'.

<sup>11</sup> Nach gw<sub>na</sub>'a na' ble'eda' bene' zan juisyw angl, neca gwzoeda' gwlabane'. Zjazeera angl ca' cue'ej cuit ben' chi' chnabian' na' gan' že' bene' ca' tap na' bene' blao ca' tapechoa. <sup>12</sup> Na' benda' cheso'e dižan' zižje chesene':

Jesucriston' bnežjw cuine' neče xtoła' benachen',  
na' da'nan' zaca'lebde' ca xila' daon' gosot bene' Israel cont gwnitlao xtoła'gaque'.

Na' Jesucriston' zaca'cze' gonxenchone', le chnabi'e doxen, na' yo'o lo ne'e yogo'te da' zjade.

Naque' bene' sina' gual, na' nape' yela' guac xen.

Cheyała' güe'chone' yela' bala'an, na' güe'cho diža' naque' bene' zaca' juisyw.

<sup>13</sup> Na' lecze benda' yogo' bene' že' yaban' na' yežlion' na' bene' že' latje che bene' guat, na' bene' zjanita' lo nisdao', cheso'e diža' chesene':

Tołi toca<sub>ne</sub> chonxencho Dios ben' chi' chnabia'

na' Jesucriston' ben' zaca'lebde' ca xila' daon' gosot bene' Israel cont gwnitlao xtoła'gaque'.

Zjanape' yela' bala'an, na' zjanaque' bene' zaca' juisyw,

na' zjanape' yela' guac xen juisyw toli toca<sub>ne</sub>.

Na' benda' lecze can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

<sup>14</sup> Nach bene' ca' tap ben' zjažia xil gosene':

—Cašcacze gac.

Na' bene' blao ca' tapechoa bosozoa xibgaque' gosonxene' Dios ben' zoa toli toca<sub>ne</sub>.

### Seyw ca' gaže

**6** Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž cheto' neče

xtoła'gaque' bzo<sub>xj</sub>e' seyw nechon'. Nach bene' ca' tap zjažia xil, toe' gwne' zižje, ca zižjen' chašjw chtin yi' gwzio', gwne':

—Da, na' gw<sub>na</sub>' da' nga.

<sup>2</sup> Na' cate' gw<sub>na</sub>'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neče da' ba bene' gan lo gwdile, na' na'a ba zeje' da' yoble cont tillene' nochle bene' chesegue'ede' le' na' gone' gan lega<sub>que</sub>'.

<sup>3</sup> Na' ben' zaca'lebde' ca xila' dao' be gosot bene' gualaž cheto' neče xtoła'gaque', cate' bzo<sub>xj</sub>e' seyw gwchope benda' gwne yeto ben' žia xil, ben' nac bene' gwchope, gwne':

—Da, na' gw<sub>na</sub>' da' nga.

<sup>4</sup> Nach bchoj yeto cabayw, na' bena' nacba' be xna. Na' ben' žie' cože'ban' gwyo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

<sup>5</sup> Na' cate' ben' zaca'lebde' ca xila' daon' be gosot bene' gualaž cheto' neče xtoła'gaque' bzo<sub>xj</sub>e' seyw gwyone, benda' gwne bene' gwyone ben' žia xil, gwne':

—Da, na' gw<sub>na</sub>' da' nga.

Nach gw<sub>na</sub>'a na' ble'eda' to cabayw gasj na' ben' žie' cože'ban' noxe' to xigonz. <sup>6</sup> Na' benda' gwne to bene' do gan' že' bene' ca' tap ben' zjažia xil, gože' ben' žia cože' cabayw gasja', gwne':

—Gwyej jažiyai' trigw na' cebada cont yesa<sub>quen</sub> gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiyai' set na' vino.

<sup>7</sup> Na' cate' ben' zaca'lebde' ca xila' daon' be gosot bene' gualaž cheto' neče xtoła'gaque' bzo<sub>xj</sub>e' seyw gwdape, benda' gwne bene' gwdape ben' žia xil, gwne':

—Da, na' gw<sub>na</sub>' da' nga.

<sup>8</sup>Nach gwña'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlawc yežlion' dan' gosac lo ne'e.

<sup>9</sup>Nach cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoxje' seyw gayo', ble'eda' mes gan' bene' ca' že' yaban' chosoz-eye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaque' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'. <sup>10</sup>Na' bene' guat ca' gosene' zižje gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca žo'. ¿Batcan' gono' yela' justis che bene' ca' že' yežlion' ben' gosot neto'? ¿Batcan' gono' cont yezezaca'zi'e da' bosolalje' xchenton'?

<sup>11</sup>Nach Diosen' bnežjue' to to bene' guat ca' tgüeje xagaque' da' šiš da' gosaze'. Na' gože' legaque' yesyezi'laže'che' yeto chop ža šlac yeseza' bene' cheyala' yesat can' gosate' lagüe da' chesonxene' Criston', bene' zjanac ca biše' lježe'.

<sup>12</sup>Nach ben' zaca'lebde' ca xila' daon' be gosot bene' gualaž cheto' neche xtoła'gaque', cate' bzoxje' seyw gw-xope, gwña'a na' leca gwxo'. Na' gwbižen' beyaquen gasj ca lache' gasj da' chesaz bene' cheseğüine', na' doxen bion' beyaquen xna ca chen. <sup>13</sup>Na' beljw ca' beseyinjen besežinten lo yežlion' can' chyinj no yixgüigw da' žia lo xyaguen cate' chechj to be' gual da' chtan len. <sup>14</sup>Nach le'e yaban' benittecczen ca to no yiš da' chedobloen. Na' yogo' ya'a ca' na'

no yežlio dao' da' ca' zjachi' lo' nesdaon' bosoša' xišnan'. <sup>15</sup>Nach yogo'lo' bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwña'a, yogo' bene' cheson xšin bene' yoble ca beyixe', na' len yezica'chle bene', yogo'cze' bosocuaše' cuin-gaque' do xan bloj, do ladjo yej xen da' zjažia lo ya'a ca'. <sup>16</sup>Na' gosene':

—Chešca bdiinj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot bene' neche xtoła'gaque' bi gone' saca'zi'cho. <sup>17</sup>Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

#### **Bene' Israel ca' bene' zjanyiše' seyw che Diosen'**

**7** Gwdena' ble'eda' tap angl zjazeche' tap squin che yežlion' bosozague' ben' cont bi gwyečhjen lo yežlion', lo nesdaon' o gan' ze yag ca'. <sup>2</sup>Na' ble'eda' yeto angl bene' za' gan' chla' gwbiž na' noxe' to da' gwchine' gwčiše'de' seyw che Dios loxga bene' ca' chesonxen le', Dios bene' zoa toli tocanē. Na' anglen' gwne' zižje bol güiže' angl ca' tap ben' zjanac lo ne'e yesone' gac yela' zi' lo yežlion' len lo nesdaon'. <sup>3</sup>Gože' legaque':

—Bi gwžiyi'le yežlion', ne nesdaon', ne yag ca' šlac bina' gwčiša' seyw che Dios checho loxga bene' ca' chesonxen le'.

<sup>4</sup>Na' benda' gwne' ba' bene' bchiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'. <sup>5</sup>Šižinw mile' za'aque' lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad, <sup>6</sup>na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da'



Manasés, <sup>7</sup> na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Isacar, <sup>8</sup> šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

### **Beñe' zan zjanyaze' lache' šiš**

<sup>9</sup> Na' gwdena' gwna'a da' yoble na' ble'eda' zjaze beñe' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot beñe' Israel neche xtoła'gaque'. Na' nono goc yosolab bal beñe' že', le gosaque' beñe' zan juisyw, beñe' to to nación, to to yež, to to diaža, na' gosaque' beñe' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin.

<sup>10</sup> Na' chesyebede' bososye'e gosene':

Xanto' Dios ben' chi' chnabi'a' na' Jesucristw ben' zaca'lebde' ca xila' daon' be gosot beñe' Israel neche xtoła'gaque',  
legaque' ba gosone' yela' mban checho toli tocane.

<sup>11</sup> Nach yogolo'lo' angl ca' zjaze' cue'ej cuite' gan' chi'e chnabi'e, na' beñe' blao ca' tapechoa na' beñe' ca' tap zjažia xil, yogolo'le' jasechaze' coscho'ale lo yon' gosonxene' Diosen', <sup>12</sup> gosene':

Chac can' cheyala' gac, Dios cheto'.

Zaca'czo' gonxento' le' toli tocane,

le naco' beñe' zaca' juisyw,

naco' la'zelagüe beñe' sina',

zaco' güe'to' yela' choxcen chio' na'

güe'to' yela' bala'an chio' toli tocane,

chnabi'o doxen, na' napo' la'zelagüe yela' guac xen.

Can' nacczen.

<sup>13</sup> Nach to beñe' blao ben' nac txen len beñe' tapechoa ca' gože'nda':

—¿Nezdo' no zjanac beñe' quinga zjanyaz lache' šiš na' ga za'aque'?

<sup>14</sup> Na' boži'an goša'ne':

—Le' nezdo' beñe' gole, bi nezda' neda'.

Nach gože' neda':

—Beñe' quinga ba gosale'de' da' ba gosac chegaque' yežlion'. Na' bach gwnitlao xtoła'gaque' na' ba zjanyaze' lache' šiš, le chesejnilaže' Jesucristw ben' blalj xchene' ca xila' dao' be gosot beñe' Israel cont bezi'xen Diosen' xtoła'gaque'. <sup>15</sup> Da'nan' nite' lao Diosen' gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape' legaque'. <sup>16</sup> Bich yesebil yesedone', na' gwbižen' bich gwzeyen legaque', neca yesacde' zeye'. <sup>17</sup> Le Jesucristw ben' zaca'lebde' ca xila' daon' ben' gosot beñe' Israel neche xtoła'gaque', len' chgüia chne'e legaque'. Ze' lao Diosen' gacho' gan' chi'e chnabi'e na' gone' cont nita'chgüe' mbalaz. Gone' cont bich yesebeže' neca yesegüine'de'.

### **Seyw gažen'**

**8** Gwde gože' neda' ca', nach Jesucristw ben' zaca'lebde' ca xila' daon' be gosot beñe' gualaž cheton' bzojje' seyw gaže da' nyiše' yiša', na' cate' bzojjen' gocži yaban' do gašj hor. <sup>2</sup> Na' ble'eda' gaže angl ca' zjazeche' lao Diosen', na' bnežjue' legaque' tgüije trompeta. <sup>3</sup> Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' beñe' ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zcha'o yal na' bžien' lo yi' ya'alj da' žia lo mesen'. Anglen' bene' ca' cont naquen txen len ši'i beñe' ca' chesonxene' Diosen' bate'teze choso' güiže'ne'. <sup>4</sup> Nach gwyas žen che yala' noxe' anglen' gwloen lao Diosen' len xtiža' beñe' ca' chesonxene' le'. <sup>5</sup> Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

### Trompeta ca'

<sup>6</sup>Nach angl ca' gaže ben' zjanoxe' trompeta ca' bosozan' cho'agaque' cont yosocuežen'.

<sup>7</sup>Angl nechon' bcuež trompeta chen', na' gwche'chgua yej lo yežlion' na' nchixen yi' na' chen. Na' da' zcha'o yežlion' gwžiyai', yelate'ze ca' goc gašje yo da' de lo yežlion' gwyeyen, lente yag da' ze lagüen goseyen, na' ľecze yeto ca'ate' yixe' ga' da' de lo yežlion' goseyen.

<sup>8</sup>Nach angl gwchope bcuež trompeta chen', na' to da' nac ca to ya'a xen blažon' lo' nisdaon' čala'ninen. Na' yelate'ze ca' goc gašje nisdaon' beyaquen chen. <sup>9</sup>Na' yelate'ze ca' goc gašje be ca' že' lo' nisdaon' gosatba', na' leze yeto ca'te' barcw ca' čaš lo nisen' gosebiayin'.

<sup>10</sup>Nach angl gwyone bcuež trompeta chen' na' to beljw xen blažon' ľe'e yaba čala'ninen ca to yi' yech. Jago'onen lo da' zan yegw na' da' zan ga čal nis lo yežlion', yelate'ze ca' goc gašje yegw ca' na' ga čal nis dan' zjade yežlion' gan' jago'onenna'. <sup>11</sup>Na' beljon' nzin' Da' Zla', na' nisen' gan' jago'onenna' beyaquen zla' na' bene' zan gosat dan' gose'eje' nisen'.

<sup>12</sup>Nach angl gwdape bcuež trompeta chen' na' yelate'ze ca' goc gašje gwbižen' gwžiyain', ľecze yeto ca'te' bion' gwžiyain' na' ľecze yelate'ze ca' goc gašje beljw ca' gosebiayin'. Na' da' ca' gosebiayin' bich bososenin'. Da'nan' gwdena' goc čol yelate'ze ca' goc gašj ža' gašj yel, na' goc ca' yogo' ža' yogo' yel.

<sup>13</sup>Nach gwna'a na' ble'eda' chda lo be' to angl do gachol ľe'e yaban' na' benda' gwne' zižje, gwne':

—iNyaše'chgua yesac čhe bene' ca' že' yežlion' yeyož yosocuež angl ca' yešone trompeta čegaquen'!

**9** Nach angl bene' gayo' bcuež trompeta chen' na' ble'eda' to beljw da' blažon' ľe'e yaban' jago'onen lo yežlion'. Na' beljon' goquen ca to

bene' na' Diosen' bnežjue'ne' xinya cont saljue' yechw zitjwchgua dan' nac lo gabil'. <sup>2</sup>Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc čol ľe'e yaban' can' čac cate' čičhgua žendao', lao gwbižen' len lo be' goquen čol catec gwche' ženna'. <sup>3</sup>Gan' gwyas ženna' besežaš biše'zo zan gwyasba' lo yežlion', be yeseyižba' bene' can' cheson bexjoni' be čaš yežlio. <sup>4</sup>Diosen' gože'ba' bibi yesoneba' yixe' ga', ne da' zjanaze' na' neca yag ca' ze yežlion', san yeseyižba' bene' ca' bi nyiše' sey čhe Diosen' loxgagaque'. <sup>5</sup>Na' bi be'e latje yesotba' ľegaque', san šašba' gayo' bio' yosoči yososaca'ba' bene' ca'. Na' cate' yeseyižba' bene', yesežaglagüe' can' čžaglaochi cate' chyž bexjonin' chio'. <sup>6</sup>Na' cate' žin ža yesomba' ca', bene' že' yežlion' yeseñablaže' yesate', perw bi yesate'; yesaclaže' bich yesenite', perw bi gac can' yesaclažen'.

<sup>7</sup>Ca nac biše'zo ca', ble'eda' zjanacba' ca cabayw be šja'ac lo gwdile. Yichj-gacban' zjazoa da' nac ca corona de oro. Cho'alaoban' naquen ca cho'alaoban' benach. <sup>8</sup>Zjažiaba' yiša' da' nac ca yiša' yichj no'ole. Layban' zjanaquen ca lay bež znia be nzi' león. <sup>9</sup>Na' zjanyazba' to da' nac de ya da' chcue'ejen cuerp čhegacban'. Na' sšag da' chesomba' len xilgacban' chninen ca chnin cate' chesa'aces cabayw zan zja'acba' lo gwdile zjanxobba' carret. <sup>10</sup>Na' lo xban biše'zo ca' zjazoa liba' zjanaquen ca xban bexjoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' ľegaque'. <sup>11</sup>Angl ben' beyac da' xigüe' dan' chn-abia' gabilen' naquen xan biše'zo ca'. Lenna' nzi' Abadón diža' hebreo na' ľecze nzin' Apolión diža' griego, na' zejen diža' Da' Chžiyain'.

<sup>12</sup>Ba gwde yela' zi' nechon' na' za' za'ac yechopen.

<sup>13</sup>Nach bcuež angl gwxopen' trompeta chen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'.  
<sup>14</sup>Na' boł güiže' angl gwxop ben' noxe' trompetan', gože'ne':

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

<sup>15</sup>Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' benach, na' caten' gosaše', yelate'ze ca' goc gašje bene' že' yežlion' gosote'.  
<sup>16</sup>Na' gwnita' chop gayoa millón soldadw chegaque' zjažie' cože' cabayon'.

<sup>17</sup>Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaque' na' yana' chnan' ca' color che yi' na' chnan' da' azul na' da' gaše. Na' yichj cabayw ca' zjanaquen ca' yichj bež znia be nzi' león, na' chchoj yi' cho'agacba' len žen na' len azufre da' čala'nin.  
<sup>18</sup>Yelate'ze ca' goc gašje bene' že' yežlion' gosat len yi' na' len žen na' len azufre da' bchoj lo cho'agacba'.  
<sup>19</sup>Na' bosochin cho'agacba' na' len xbangacba' cont gosotba' benach, na' xbangacban' gosaquen ca' bel na' zjansa' yichjen cont goseyi'inen bene'.

<sup>20</sup>Na' bene' ca' besyega'an bi gosat cate' gwyas' cabayw ca' lo yežlion', legaque' bi besyetingjde' che da' mal ca' chesone', neca bososane' da' chesonxene' da' xigüe' ca' na' i' gua'a lsaca' chegaque' ca' da' zjanac de oro, de plata, de bronze, de yej o de yag, la'czla' i' gua'a lsaca' ca' bi chesele'en, neca chesenen, na' neca chac yesa'aquen.  
<sup>21</sup>Na' neca besyetingjde' cont yesebejyichje' bichle da' mal da' chesone', ca' dan' chesote' bene', da' chesone' txen len no bene'

guaža', da' chesone' da' yeļa' zto' len cuerp chegaquen', na' da' chesebane' da' de che bene'.

### Angl bene' noxe' yiš dao' ndobyoyen

**10** Nach ble'eda' yeto angl gual gwze'e yaban' betje' lo yežlion'. To bejw nychjen le' na' zoa to pita' yichjen'. Cho'alagüen' chna'titen ca' gwbiž, na' yeñe' ca' ble'edan' zjanaquen ca' bdope da' čala'nin.  
<sup>2</sup>Anglen' noxe' to yiš dao' da' ba beyašen. Na' bzoa šla'a ni'e licha lo nisdaon' na' yešla'an bzo'e lo yežlion'.  
<sup>3</sup>Na' bosye'e zižje ca' zižje chosya'a be nzi' león. Na' cate' bosye'e gwne gwzio' gaž ni'a na' to to gwzion' zoa da' gosenan.  
<sup>4</sup>Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda':  
 —Bi gwzojo' dižan' bendo' šlac gwne gwzion', san gwdapen lo' yichjlažda'oguo'.

<sup>5</sup>Nach angl ben' zoa šla'a ni'en lo nisdaon' na' yešla'an lo yežlion' gwlis ne'e lichan' yabale.  
<sup>6</sup>Na' gwlo'e da' balı' gac can' ža Dios ben' zoa toli' tocañe, ben' ben' le'e yaba len yogo'te da' chle'echo le'enña', bene' yežlion', benach, beyix'e, na' bite'tezechle da' de lo yežlion', na' bene' nisdaon' len be ca' na' da' ca' že' lo'enña'. Gwne':

—Bich cuez Diosen' gone' can' ba nžie' bia' gone'.  
<sup>7</sup>San cate' žin ža gwcuež angl gažen' trompeta chen', cana'ch gac da' nžia Diosen' bia' gac, can' ba gože' bene' ca' goso'e xtižen', da' nono gwneze canı'.

<sup>8</sup>Nach da' yoble ben' zoa yaban' ben' ba benczeda' gwnie' neda', gwne':

—Gwyej jaxi' yiš dao' dan' ba beyaš dan' noxe' angl ben' zecha zoa šla'a ni'en lo nisdaon' na' yešla'an lo yežlion'.

<sup>9</sup>Da'nan' gwyaa' gan' zoa anglen' janaba' yišen'. Na' anglen' gože'nda':

—Bexon' gwdagon'. Lo' cho'on gacdon' zix ca' šina' beser, perw lo' li'on yeyaquen zla'.

<sup>10</sup>Nach beḡoa' yišen' noḡe' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an. <sup>11</sup>Nach anglen' gože' neda':

—Da' yoble cheyała' go'o xtiža' Diosen' na' nao' can' gac che zan yež, che zan nación, che bene' chesac gwde gwdele diža' da' de yežlion', na' che zan bene' gwnabia'.

### Chope bene' gosoe xtiža' Diosen'

**11** Nach anglen' bene' neda' to ya ca nac da' chosochine' cate' chosochixe' yo'o, na' gože'nda':

—Gwyej jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' bał bene' že' chesonxene' le'. <sup>2</sup>Perw bi gwchixo' chyo'on, le ba naquen lo na' bene' bi zjanac bene' Israel bene' bi chesejnilaže' Diosen' cont yesone' nacteze chesaclaže' lo ciuda che Dios lao chopeyon bio'. <sup>3</sup>Na' sela' chope bene' yeso'e xtiža', na' yesaze' lache' gasj ca to bene' chegüine' na' yeseyixjue'ede' xtižan' lao to mil chop gayoa gayon ža.

<sup>4</sup>Bene' ca' chope zjazaca'lebe' ca yag olivos ca' chope na' ca candeler ca' chope da' zjazoa lao Diosen' ben' nac Xan yežlio. <sup>5</sup>Na' še no chaclaže' gonxi'e legaue', choj yi' cho'a bene' ca' yeso'e xtižan' na' gwzeyen bene' chgue'ede' legaue'. Can' gac yesat note'teze bene' chende' gonxi'e bene' ca' chope. <sup>6</sup>Na' bene' ca' yeseyixjue'ede' xtižan', gac lo na'gaque' yesone' cont bi gac yejw šlac yeso'e xtižan', na' gac lo na'gaque' yesone' cont nisen' yeyaquen chen, na' bate'teze yesaclaže', yesone' gac bite'tezechle da' yesežagłao bene' že' yežlion'. <sup>7</sup>Perw cate' yeyož yeso'e xtižan', nach choj lo' gabił gan' nac yechw zitjwchgua to bež xigüe' nizba' legaue' na' gotteba' legaue'. <sup>8</sup>Na' bene' ca' že'na' yosyocua'añe' cuerp

chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto. <sup>9</sup>Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje yeseğaše'. <sup>10</sup>Bene' ca' že' yežlion' yesyebede' da' gosat bene' ca' chope, na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len legaue', le leca zed chesacden'. <sup>11</sup>Na' ble'edaogüeda' gwde šone ža yogašje Diosen' bosbane' bene' ca' chope na' gosezeche' da' yoble. Na' yogo' bene' besele'e legaue' besežebchgüe'. <sup>12</sup>Nach bene' ca' gosoe' xtiža' Diosen' gosende' gož Diosen' legaue' zizje:

—Le yeda, le yeyep nga.

Nach bene' ca' chesegue'e legaue' besele'ede' besyeyepe' yaban' to lo' bejw. <sup>13</sup>Šlac chesyeyepen' leca gwxo' na' gwži-ayi' late' ciudadan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

<sup>14</sup>Ba gwde yela' zi' gwchopen' na' za' gac da' gwyone.

### Can' goc cate' angl gaže bcueže' trompeta chen'

<sup>15</sup>Nach angl bene' gažen' bcuež trompeta chen' na' benda' bał bene' ca' že' yaban' gosene' zizje, gosene':

Doxen yela' chnabia' che yežlion' bach naquen lo na' Xancho Diosen' na' lo na' Cristo ben' gwleje' cont chnabi'e.

Na' Diosen' zoacze' chnabi'e toli tocañe.

<sup>16</sup>Nach bene' blao ca' tapechoa ben' zjachi' cue'ej cuit Diosen', jasechaze' coscho'ale lo yon' gosonxene' Diosen', <sup>17</sup>gosene':

Chonto' yela' choxclen chio' Xanto', le naco' Dios ben' nap yela' guac xen.

Ba zoaczo' cate' bīna' xe yežlion',  
 na' soaczo' toli tocane.  
 Na' ba gwzolao chnabi'o len yela' guac  
 xen chion' cont gac can' chazlažo'  
 doxen.  
<sup>18</sup> Bene' nación ca' že' yežlion' beseže'e  
 le',  
 perw ba bžin ža gono' yesezaca'zi'e.  
 Ba bžin ža choglaguo' che yogo' bene' ca'  
 ba gosat še noe' nap doļa'.  
 Na' gono' cont bene' güen xšino' ca' bene'  
 ca' goso'e xtižon' yesenite' mbalaz,  
 len yogo' bene' gwlejo' cont zjanaque' lo  
 nao', bene' gosonxen le'.  
 Con yogo' bene' gosonxen le' yesenite'  
 mba, bene' gole len bene' xcuide'.  
 Lecze ba bžin ža yesebiayi' bene' ca'  
 bosožiai' ljež benache' yežlion'.  
<sup>19</sup> Nach byaljo gan' chesonxene'  
 Diosen' yaban' na' ble'eda' caj gan' že'  
 yej ca' gan' nyoj da' ca' gož Diosen'  
 bene' Israel gualaž cheto' ca' yesone'  
 cont gaclene' legaque'. Na' šlac gwña'a,  
 gwyep yes, gocchgua sšag, gošj gwtin,  
 gwxo' na' gwche'chgua yej.

### No'olen' na' bel be zoa gaž yichj

**12** Na' ble'edaogüeda' to da'  
 yebanchgüecho le'e yaban',  
 ble'eda' to no'ole na' nyaze' gwbižen' ca  
 xe'. Nleje' lo bion' na' zoa to corona  
 yichje' da' žian šižinw beljw. <sup>2</sup>No'olen'  
 no'e bdao' na' chosye'e, le' chaque' bes  
 che yela' sanna'. <sup>3</sup>Na' ble'eda' yeto da'  
 zaca' yebanecho le'e yaban', ble'eda'  
 Satanás dan' chnabia' da' xigüe' ca',  
 ba naquen ca to bel be žia gaž yichj,  
 be xen juisyw. Nacba' be xna na' žia  
 ši lozba' na' zoa tgieje corona to to  
 yichjban'. <sup>4</sup>Na' bta xbamban' cont  
 bchinjen zan beljw ca' žia le'e yaban' na'  
 beselažon' lo yežlion', yelate'ze ca goc  
 gašje beljw ca' zjažia le'e yaban' bchinj  
 xbamban'. Na' gwlezba' xni'a no'olen'  
 ba zoa sanna' cont yebba' bdao' chen'  
 cate' sane'be'. <sup>5</sup>Nach no'olna' gwxxane' to

bi' byo bi' nabia' nación ca' na' žan ca  
 žan yosozenague' chebe'. Nach Diosen'  
 beyo'ebe' gan' chi'e chnabi'e. <sup>6</sup>Nach  
 no'olen' boxonjde' belen', na' gwyeje' to  
 latje daš da' benšagüe' Diosen' che', gan'  
 yeso'ene' da' ye'ej gagüe' lao to mil chop  
 gayoa gayon ža.

<sup>7</sup>Gwde na' goc to gwdiļe yaban', le  
 angl blao ben' le' Miguel na' soldadw  
 che' ca' gosedillene' bel ben' žia gaž yichj  
 lencze angl che belen' bene' ca' besyeyac  
 da' xigüe'. <sup>8</sup>Na' belen' len da' xigüe' ca'  
 bi gosezoen angl ben' zjanac bene' che  
 Dios, na' bich bi latje gota' che belen'  
 yaba, neca che da' xigüe' ca' zjanac leba'  
 txen. <sup>9</sup>Angl che Diosen' bosozale'ba' lo  
 yežlion'. Na' lecze bosozale' da' xigüe' ca'  
 lo yežlion'. Belnan' ben' zoa ža gwlaste  
 nacba' gwxiye' na' leba' Satanás, na' ne'  
 zoaczba' na'a chziye'ba' yogo' benach.

<sup>10</sup>Nach benda' to bene' zoa yaban'  
 gwne' ziže gwne':

—Bač bžin ža ben Dios chechon' cont  
 bene' ca' chesejnilaže'ne' zjanite' len le'.  
 Bač bžin ža nacbia' Dios chechon' nape'  
 yela' guac xen. Ba bžin ža chnabi'e cont  
 gac con da' cheyala'cze gac. Na' ba bžin  
 ža Criston' ben' gwleje' cont nabi'e bač  
 chnabi'lene' le'. Gac da' cheyala'cze gac,  
 le Satanás dan' ba gwzoa lao Diosen'  
 do ža do yel bcuišen bene' chesejnilaže'  
 Criston', bač besyebejen'. <sup>11</sup>Na' bene'  
 gosejnilaže' Criston' na' ba gosate', gose-  
 zoede' bi bosozenague' che Satanásen', le  
 gosejle'e Jesucriston' blalj xchene' neche  
 xtoļa'gaque' na' goso'e diža' chesejni-  
 laže'ne'. Bene' ca' ba gosat gosacbe'ede'  
 yejni'a yesate' clel ca yesebejyichje' Jesu-  
 criston'. <sup>12</sup>Yaban' cheyala' gosya'an yela'  
 chebe chen, na' le'e že'le gan' zoa Diosen'  
 cheyala' yebele, perw nyaše'chgua gac  
 che le'e zoale lo yežlion' na' lo' nisaon',  
 le Satanás dan' chnabia' da' xigüe' ca'  
 ba betjen gan' zoalen' chaclocchguan, le  
 nezen yešložga de latj chen.

<sup>13</sup>Nach cate' belen' gocbe'eba' bosozale'ba' lo yežlion', blagsesba' no'olen' gwaxan bi' byo daon'. <sup>14</sup>Perw Diosen' bnežjue' chop xile' da' xen ca xil bsiadao' cont gwyeye' latje daš gan' bi goc zin belen', latje gan' benšagüe' che' gan' yeso'ene' da' ye'ej gagüe' šon iz yo gašje. <sup>15</sup>Na' bchoj nis zil cho'a belen' goquen to yegw cont bžinen gan' zoa no'olen' na' guan' le'. <sup>16</sup>Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'. <sup>17</sup>Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'chache' chesejnilaže' xtiža' Jesucriston'.

### Chope bež xigüe' be ble'e Juan

**13** Na' gwzia' cho'a nisdan' na' ble'eda' bchoj to bež xigüe' lo' nisdan'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. <sup>2</sup>Ble'eda' bežen' nacba' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach bel' ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' benach bosozenague' cheba'. <sup>3</sup>Ble'eda' to yichj bežen' nachguan güe', ca to da' gatlemba', perw beyacba'. Na' yogo'lol' benach besyebande' dan' beyacban' na' bosozenague' cheba'. <sup>4</sup>Yogo'ze bene' gosonxene' belen' dan' bamba' cont gwnabia' bež xigüen', na' lecze gosonxene' bež xigüen', gosene':

—Nono zoa bene' nap yela' chnabia' xen ca bež nga, na' nono zoa bene' soede' tillene'ba'.

<sup>5</sup>Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo' na' bežen'

gwnabia'ba' chopeyon bio'. <sup>6</sup>Na' gwnechguaba' yela' ya' che Diosen' na' che yaba gan' zoe' na' len che yezica'chle bene' ca' že' yaban'. <sup>7</sup>Na' gwyo'o lo' na' bežen' gwdiilemba' bene' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo' na'ba'. Gwnabia'ba' yogo' naciön, yogo' yež, yogo' diaža na' bene' chesac gwde gwdele diža' da' de lo yežlion'. <sup>8</sup>Na' yogo' bene' že' yežlion' bene' bi zjanyoj lagaque' le'e libr che Jesucriston', gosonxene' bežen'. Le cate' gwxete yežlion' Jesucriston' bzoje' le'e libr che' la yogo' bene' nezde' gata' yela' mban chegaque' toli tocane, Jesucristw ben' zaca'lebbe' ca xila' dao' be gosot bene' gualaž cheto' neche xtoła'gaque'.

<sup>9</sup>Note'tez le'e žia nagle da' chene, le gwzenag da' nga nia' le'e. <sup>10</sup>Bene' yeseyixjue' ljež benache' ližya, decze de ližya yesata' legaque'. Na' bene' yesot ljež benache' len spada, decze de gac chegaque' ca'. Da'nana' chonen byen soachach chio' ba gwlej Diosen' cont naccho lo' ne'e, gwyo gwchejcho len bi da' gac checho na' soachachcho šejnilaže'chone'.

<sup>11</sup>Gwdena' ble'eda' yeto bež xigüen' be bchoj lo' yo. Na' žia chop lozba' da' nac ca loz xila', perw be'ba' diža' can' choe' bel' ben' žia gaž yichjen' diža'. <sup>12</sup>Na' bež nechon' bamba' cont bež gwchopen' gwnabia'ba' par leba' na' bež gwchopen' bamba' cont yogo' bene' že' yežlion' gosonxene' bež nechon' ben' beyaque len güe' dan' naquen ze da' got leba'. <sup>13</sup>Na' bež gwchopen' bamba' zan da' bebanchgüe bene' len yela' guac cheban', na' bamba' cont besele'ede' yi' le'e yaban' na' bese-lažon' lo' yežlion'. <sup>14</sup>Na' da' bamba' da' ca' gan' zoa bež nechon', gwziye'ba' bene' že' yežlion' cont bosozenague' cheba'. Nach bamba' mandadw gosone' to l' gua'a l'saca' da' nac ca bež nechon' da' gosonxene', bež ben' goc yichjban' güe' len spada,

güe' da' naquen ze da' got leba' perw bey-  
 acba'. <sup>15</sup>Na' goc lo na' bež gwchopen'  
 bamba' cont l̄ gua'a lsacan' gwyo'on biš  
 grasyw. Na' goc gwñen, benen mandaw  
 gosote' yogo' bene' bi gosonxenen'. <sup>16</sup>Na'  
 bež gwchopen' lecze bamba' byen gose-  
 zoa yogo' bene' señw che bežen' le'e  
 na'gaque' licha o loxgagaque', bene' gole  
 len bi' bixjw, na' bene' gwñi'a len bene'  
 yaše', na' bene' cheson xšin bene' yoble  
 ca beyixe' len yezica'chle bene'. <sup>17</sup>Na'  
 note'teze bene' še bi zoe' señw che bežen'  
 o laba' o número da' zejen laba', bi goc  
 bi si'e nēca goc bi gote'. <sup>18</sup>Chyažjecho  
 yela' sina' cont šejni'cho da' nga. Bene'  
 chejni'i guac gwlabē' número cheban',  
 le naquen número da' chchin benach,  
 na' número cheban' naquen xop gayoa  
 gayon xop.

**Da' gosol bene' ca' to gayoa  
 tapeyon mil gosonxene' Diosen'**

**14** Na' gwñi'a na' ble'eda' Jesu-  
 cristw ben' zaca'lebde' ca xila'  
 dao' be gosot bene' gualaž cheto' neche  
 xtoła'gaquen', zeche' lo ya'a Sión len  
 to gayoa tapeyon mil bene' yoble. Na'  
 zjanyoj la Jesucriston' len la Xe' Diosen'  
 loxgagaque'. <sup>2</sup>Na' benda' chesol bene'  
 zan bene' že' yaban'. Nenen ca chsiž ga  
 zjadechgua yegw zan na' ca nen cate'  
 chašjw chtin. Na' nenen ca nen cate'  
 bene' zan chosogole' arpan' to ši'ize.  
<sup>3</sup>Na' gosole' to da' cobe lao Diosen'  
 na' lao bene' ca' tap zjažia xil na'  
 lao bene' blao ca' tapechoa gan' chi'  
 Diosen' chnabi'e. Noch no bene' yoble  
 goc gol len, con bene' ca' to gayoa  
 tapeyon mil na'ze gosac bososede' dan'  
 gosolen' cont gosonxene' Diosen', le-  
 gacze' bebej Criston' lo na' Satanásen'  
 šlac ne' nite' yežlion'. <sup>4</sup>Bene' ca' gosolen'  
 zjanaque' bene' bi gosata'lene' no'ol bi  
 nac xo'olgaque', na' gosapchgua cuin-  
 gaque' cont gosac lažda'ogaquen' xi-  
 laže' len Diosen'. Na' zja'acteze' len Je-

sucriston' gate'teze zeje' chosozenague'  
 che', le bebeje' legaque' lo na' Satanásen'  
 cont zjanaque' lo ne'e na' lo na' Diosen'.  
 Da'nan' zjazaca'lebde' ca to tlaw coseš  
 da' bnežjw bene' Israel gualaž cheto'  
 ca' lo na' Diosen'. <sup>5</sup>Gwbat goso'e diža'  
 güenlaže' na' bibi dola' zjanape' lao  
 Diosen' ben' chi'e chnabi'e.

**Da' gosena šone angl**

<sup>6</sup>Nach ble'eda' yeto angl le'e yaban'  
 chde' lo be'. Na' gwduxje'ede' diža' güen  
 che Diosen' da' bi te chen len bene' že'  
 yežlion', len bene' zjanac to to nación,  
 to to yež, to to diaža, na' bene' chesac gwde  
 gwdele diža' da' de yežlion'. <sup>7</sup>Gwne' zižje  
 gože' legaque':

—Le žeb Diosen' na' le gonxene', le ba  
 bžin hor gone' yela' justis che benach.  
 Le gonxen Dios ben' ben yaban', yežlion',  
 nisdao' na' ga chal nis.

<sup>8</sup>Yeto angl za' cožen' gwne':

—Bač bžin ža cuiayi' ciuda Babilo-  
 nia da' nac da' blao. Bač bžin ža cuiayi'  
 ciuda che bene' ca' bosozoe' Diosen'  
 ca'ale na' gosebede' da' nac yela' zto', le  
 ba gosego'oyele' bene' že' yogo' nación  
 cont chesone' güedenag len Diosen'.

<sup>9</sup>Nach yeto angl zej cože' bene' gw-  
 chop'a be'e diža' zižje gwne':

—Note'teze bene' chesonxen bež  
 xigüen' len l̄ gua'a lsaca' cheba' na'  
 cheso'e latje chesozoa señw che beža'  
 loxgagaque' o taca'gaque', <sup>10</sup>Diosen'  
 ba nžie' bia' yesesaca'zi'chgua bene'  
 ca'. Yesezaca'zi'e gan' čala' yi' len  
 azufre lao angl che Diosen' na' lao ben'  
 zaca'lebde' ca xila' dao' ben' gosot bene'  
 Israel neche xtoła'gaque'. <sup>11</sup>Tołi tocanē  
 čhas žen che yi' gan' yesezaca'zi'en. Na'  
 bene' ca' chesonxen bežen' len l̄ gua'a  
 lsaca' cheban', na' bene' zjazoa señw  
 che bežen' loxgagaque' o taca'gaque', bi  
 gac yesyezi'laže' len da' yesezaca'zi'en  
 ne chel ne lašie ža. <sup>12</sup>Da'nan' chonen  
 byen soachach chio' ba gwlej Diosen'

cont naccho lo ne'en, gwyo gwchejcho len bi da' chac checho, chio' chzenagcho che da' non Diosen' mandadw goncho na' bi chbejyichjcho dan' chejnilaže'cho Jesúsen'.

<sup>13</sup>Nach benda' to bene' zoa yaban' gwne':

—Bzoy da' nga: “Mbalaz bene' ca' ne' chesejnilaže' Xancho Jesucriston' žinte ža yesate'. Can' chac na'a na' can' gac bate'teže.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaqen', na' gacbia' yogo' da' güen da' ba gosone'.

### **Yotob Diosen' bene' bi chosozenague' che' cont yesezaca'zi'e**

<sup>14</sup>Nach gwna'a da' yoble na' ble'eda' to bejw šiš le'e yaban' na' čože' bejon' chi' to bene' nac ca to benach. Na' zoa to corona de oro yichjen' na' noxe' to da' nzi' hoz da' nlachgua. <sup>15</sup>Na' yeto angl bchoj lo' gan' chesonxene' Diosen' yaban' na' gwne' zižje gože' ben' chi' čože' bejon':

—Ba bžin hor yotobo' coseš che uvas dan' de yežlion', le ba golen.

<sup>16</sup>Nach ben' chi' čože' bejon' noxe' hoz botobe' cosešen'.

<sup>17</sup>Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nlachgua. <sup>18</sup>Na' lecze bezchoj yetoe' ben' yo'o lo' ne'e yi' da' čala' lo' mes gan' chesonxene' Diosen'. Na' angl nga gwne' zižje bo' güiže' angl gwchopa' ben' lecze noxe' hoz, gože'ne':

—Ba güe uvas da' žia lo' yežlion'. Bečoguen len hoz chion' dan' nlachgua cont yotobchon.

<sup>19</sup>Nach anglen' bečogue' uvas da' žia yežlion' len hoz dan' noxen' na' boto-ben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e. <sup>20</sup>Na' gan' gosezaca'zi'en naquen cho'a ciudan',

na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gayoa mil metr.

### **Angl ca' zjajo'o lo' na'gaque' gaže yela' zi' da' zelao yesac**

**15** Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo' na'gaque' yesone' yegaže yela' zi' cont yoyož gwlo'e Diosen' can' chone' da' chloque' bene' ca' cheson da' xinj.

<sup>2</sup>Lecze ble'eda' to da' nac ca to nis-dao' de vidrw da' nchixen yi'. Na' cho'a nidaon' zjazecha bene' ca' gosezoede' bi gosonxene' bežen' na' l' gua'a lsaca' dan' nac ca leba', na' bi goso'e latje yosozoe' legaque' señw cheba' o número da' zejen laba'. Na' zjanoxe' tgüeje arpa da' bnežjw Diosen' legaque'. <sup>3</sup>Na' ble'eda' legaque' chesonxene' Diosen' chesole' to da' bsede da' Moisésen' bene' Israel gualaž četo' ca', Moisés ben' ben xšin Diosen' cani'. Lecze chesole' da' naquen to da' bsede Jesucriston' legaque', Jesucristw ben' zaca'lebbe' ca xila' dao' be gosot bene' gualaž četo' neče xto'la'gaque'. Quinga žan:

Xanto' Dios, yogo' da' ba beno' len yela' guac xen chio'

naquen da' güen juisyw na' da' zaca' yebanecho.

Yogo' da' chono' zejen to liča na' naquen da' zaca'.

Len' chnabi'o nación ca'.

<sup>4</sup>Nono zoa bene' bi cheya'la' žebe' le' Xanto', da' chono' castigw che da' malen'.

Nono zoa bene' bi cheya'la' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le',

le ba besele'ede' da' ba beno' na' zjanezde' zejzen to liča.



<sup>5</sup>Gwde benda' da'na' nach gwña'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. <sup>6</sup>Na' ble'eda' gaž angl ca' zjajo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyave' lache' šagüe' da' nac šiš xila' da' chactiten, na' to toe' nchej cho'alcho'e to bant de oro. <sup>7</sup>Na' ble'eda' bene' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa toli' tocane chlochgüe' da' cheson bene' bi chosozenag che'. <sup>8</sup>Na' doxen gan' chesonxene' Diosen' yaban' gwche'chguan ca' žen che be'ni' da' nsa' Diosen' na' che yela' guac xen che'. Nono goc šo' gan' chaxen Diosen' šlac bina' yeyož yesac yela' zi' ca' gaž da' zjanac lo na' gaž angl ca'.

**Tas ca' gaže na' yela' zi' ca'  
gosac cate' bososcho'en**

**16** Na' benda' gwne Diosen' zižjehgua, zoe' gan' chaxene', gože' angl ca' gaže:

—Le šja'ac le šjalalj dan' yože lo' tas chelen' lo yežlion', da' zejen leca chloca' da' xinj cheson bene' ca' bi chosozenag chia', na' gona' ga yesezaca'zi'chgüe'.

<sup>2</sup>Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' bene' ca' zjazoa señw che bežen' na' chesonxene' l' gua'a lsaca' da' nac ca' leba', gosebie' güe' xen güe' zban na' goselachgüe'.

<sup>3</sup>Nach angl gwchopen' jalalje' da' yože lo' tas chen' lo nisaon' na' nisaon' beyaquen chen ca' chen che bene' guat, na' gosat yogo' be ca' že' lo' nisen'.

<sup>4</sup>Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen. <sup>5</sup>Nach

benda' gwne angl ben' chape' nisen' da' de lo yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejcz'o l'icha can' ba gwchoglaguo' chac da' quinga, <sup>6</sup>le bene' že' yežlion' ba gosote' bene' ca' gosote' xtižon' na' gosote' nochle bene' gosac lo nao'. Da'nan' ba beno' cont yese'eje' chen neče da' bosolalje' xchen bene' ca'. Na' da' chac chegaque' naquen da' cheyał'a'cze gac.

<sup>7</sup>Nach benda' gwne to bene' do cho'a mes gan' bene' ca' že' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to l'icha cate' chchogbi'o che bene'.

<sup>8</sup>Nach angl gwdapen' jalalje' dan' yože lo' tas chen' lo gwbižen', na' gwbižen' bzeyen benach. <sup>9</sup>Yogüe' leca goseye', perw bi besyetinjde' xtoł'a'gaque' na' bi gosonxene' Diosen', con gosene' yela' ya' che Dios ben' be' latje goc da' ca' chesezaca'zi'e.

<sup>10</sup>Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac choł doxen gan' chnabia'ban'. Na' benachen' gosagwxejte lože'gaquen' catec gosesezaca'zi'e. <sup>11</sup>Na' gosene' yela' ya' che Dios ben' zoa yaban' neče dan' chesezaca'zi'en na' neče güe' xen dan' zjažia lo' cuerp chegaquen', perw ne ca' bi besyetinjde' che da' mal dan' gosonen'.

<sup>12</sup>Nach angl gwxopen' jalalje' dan' yože lo' tas chen' lo yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

<sup>13</sup>Nach ble'eda' šone da' xigüe' da' zjanac ca' blož. Ton bchojen cho'a bel be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene'

bežen'. <sup>14</sup>Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' že' gate'teze lo yežlion' cont yesedillene' Dios ben' nap la'zelagüe yela' guac xen cate' žin ža gac ca'. <sup>15</sup>Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ga chjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še bina' yesyetinjde' xtola'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

<sup>16</sup>Nach bezle'eda' da' xigüe' ca' šone bosyotoben yogo' bene' gwnabia' ca' že' lo' yežlion' to latje ga nzi' Armagedón diža' hebreo.

<sup>17</sup>Na' angl gažen' jalalje' dan' yože lo' tas chen' lo be', na' benda' gwne' Diosen' zižje, gan' zoe' chesonxene' le' yaban' gan' lecze chi'e chnabi'e, gwne':

—Bač goc da' cheyala' gac.

<sup>18</sup>Nach gwyep yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac že' benačhen' lo yežlion'. <sup>19</sup>Na' ciuda da' nac la'zelagüe blao lo yežlion' gwžiyain' bchojen šonle, na' lecze gosebiayi' yezica'chle ciuda da' zjachi' lo yežlion'. Diosen' bich gwleze' bene' cont goseyi gosezaca'chgua bene' že' ciuda Babilonia che da' mal da' ba gosonteque', le blocchgüe' yela' mal chegaquen'. <sup>20</sup>Na' catequen' gwxo' besyenit-tecze yogo' yež da' zjachi' lo' nisdan' na' yogo' ya'a ca'. <sup>21</sup>Na' gwche'chgua yej ži'a lo yežlion', yej zi'i da' cha'a do tapa rob güeje beselažon' cože' bene'. Na' bene' že' yežlion' gosene' yela' ya' che Diosen' neče dan' besežaglaochgüe' len yej dan' gwchen'.

### Diosen' be'e castigw che ciuda blao da' zaca'lebe ca to no'ole zle'

**17** Na' ca nac angl gaž ca' gosoxe' tas de oron', toe' bedenie' neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo nisdao' ca', no'olen' nac no'ol zle'. <sup>2</sup>Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' že' yežlion' da' besyebchde' le' clcl ca Diosen', guac nacho gosezožde' da' ba gose'eje' vino da' bnežjue' legaque'.

<sup>3</sup>Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios. <sup>4</sup>No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. <sup>5</sup>Na' loxgue' nyoj diža' da' žan naquen' naque', diža' da' bi gosejni'i benač, žan: "Naca' ciuda Babilonia na' nacchgua' blao. Naca' no'ole zle', le chona' cont bene' že' yežlion' bi chesonxene' Diosen', na' chgo'oyela' le-gaque' cont chesone' da' zan da' chgue'e Diosen'." <sup>6</sup>Na' ble'eda' chžože no'olen', le ba güe'eje' xchen bene' ca' zjanac lo na' Diosen', bene' goso'e diža' chesejnlaže' Jesúsen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. <sup>7</sup>Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. <sup>8</sup>Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo'

yechw zitjwchgua dan' nac lo gabilen' gan' yo'oba' na'a cont soaba' nabia'ba' yežlož, na' techle yeyo'oba' na' saca'zi'ba' toli tocane. Cate' gwxe yežlion' Diosen' bzoje' la bene' ca' zjanape' yela' mban toli tocane le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

<sup>9</sup>'Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. <sup>10</sup>Na' lecze zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šložze yedenabi'e. <sup>11</sup>Na' bež ben' gwzoa cana' perw bich zoaba' na'a, zejen yeto bene' gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocane.

<sup>12</sup>'Na' lozba' ca' ši dan' ble'edo', zejen ši bene' gwnabia' bene' za' za'ac cont yesenabi'e. Na' gac lo na'gaque' yesenabi'e txen len bežen', perw šložze.

<sup>13</sup>Na' yogote bene' ca' ši, toz ca' yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao. <sup>14</sup>Na' yesedilene' Jesucristw ben' zaca'lebde' ca' xila' dao' ben' gosot bene' gualaž cheto' neche xtoła'gaque', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlej Diosen' cont zjanaque' xi'ine', bene' ca' nezde' yesenita'chache' yesejnilaže'ne' bite'teze da' gac.

<sup>15</sup>Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene'

chesac gwde gwdele diža' da' de lo yežlion'. <sup>16</sup>Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yesequ'e da' de che no'olen' na' yosyocua'ane'ne' ga'alyide'. Tena' yesagüe' xpelen' na' yosozeye' bi da' yega'an' da' bi yesagüe'. <sup>17</sup>Le Diosen' güe'e latje yesaque' txen yesone' yog'o' da' ca' na' bežen', na' yesone' yela' chnabia' chegaque' lo na' bežen' cont yeyož gac yog'o' dan' ba gwna Diosen'. <sup>18</sup>Na' no'olen' bach ble'edo', naque' ciuda blaochgua da' chnabian' bene' gwnabia' ca' že' doxen lo yežlion'.

#### Can' gac cate' cuiayi' ciuda Babilonian'

**18** Gwdena' ble'eda' yeto angl bene' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. <sup>2</sup>Na' anglen' gwne' zižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yog'o'cze be zoa xil be chesegue'e benach. <sup>3</sup>Cuiayin', le bene' ca' že' ciudan' gosego'oyele' bene' že' yog'o' nación cont bosozoe' Diosen' ca'ale bi gosonxene' le'. Na' bene' gwnabia' ca' že' yežlion' ba gosonchgüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' chegaque' gosezi'en.

<sup>4</sup>Nach benda' gwne' yeto bene' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque', <sup>5</sup>le dechgua xtoła'

beñe' Babilonia ca', na' bich cues  
 Diosen' gwnežjue' castigw chegaque'.  
 6 Yesezaca'zišque' lagüe dan' bosochi  
 bososaque' beñe', na' yesežaglaošque'  
 da' xench ca dan' bosochi bososaque'  
 beñe' yoble. Gacšca chegaque' castigw  
 gualech ca da' gosone' che beñe'.  
 7 Con can' gota'chgua da' šagüe' da'  
 güen chegaque' na' gosone' con bi da'  
 žan chegaque', chñablaža' gacchgua  
 chegaque' yela' yaše' yela' zi' cont  
 yesyegüüne'chgüede'. Beñe' Babilonia ca'  
 ba gosone' xbab lo' yichjlažda'ogaque'  
 gosone': "Gwbat te yela' chnabia'  
 cheton'; gwbat soato' yela' güine',  
 neto' že'to' ciuda blao nga." 8 Da'nan'  
 lo toze ža gac yogo' da' ca' gosacde'  
 gwbat gac chegaque'. Beñe' zan yesat,  
 beñe' zan yesegüüne'de', na' yesebil'  
 yesedone', na' yeseye' len yi'. Gac ca' che  
 beñe' že' ciuda Babilonian', le Xancho  
 Diosen' nape' yela' guac xen cont gone'  
 yesezaca'zi'e neche xtoła'gaque'.

9 Beñe' gwnabia' ca' že' lo yežlion' beñe'  
 bosozenag che beñe' Babilonia ca' cont  
 bosozoe' Diosen' ca'ale na' gosone' bichle  
 da' chgue'e Diosen', legaque' yesebeže'  
 na' yesegüüne'de' cate' yesele'ede' žen da'  
 chas cate' šey ciudan'. 10 Na' yesyega'ane'  
 zito'le yesene'e can' gac che beñe' Babilo-  
 nia ca', le yesežebchgüe'. Na' yesene':

—iNyaše'chgua chac che ciuda Babilo-  
 nia nga da' nac blaoch ca yogo' ciuda!  
 Ba chbiayi' ciuda da' gwnabia'ch lo yez-  
 ica'chle ciuda da' zjachi' yežlion'. Ba bžin  
 ža cuiayin' to ši'ize.

11 Nach beñe' güen delgens ca' že'  
 yežlion'a yesebeže' na' yesegüüne'de' cate'  
 cuiayi' ciudan', le noch no si' dan'  
 yesoten'. 12 Nono žel beñe' si' da' yesote'  
 da' nac de oro, de plata, de yej zaca', na'  
 de perlas. Nono žel beñe' si' lache' la'ay  
 da' chesote' de lino, de sed, na' lache'  
 moradw na' lache' xña. Nono žel beñe'  
 si' da' yesote' da' nac de yag da' chl'a'  
 zix o de bichle yag zaque', de marfil, de

ya na' de mármol. 13 Nono žel beñe' si'  
 canel, no set zix, no yal, no mirra, no  
 perfume, no vino, no set yela' guagw,  
 no yej šiš, no trigw, no burr bžina', no  
 xila', no cabayw, no carret, na' no beñach  
 beñe' yesote' ca beyixe'. 14 Na' beñe' güen  
 delgens ca' yesene' che ciudan':

—Ba gwde che yogo' da' zix ca' na'  
 yogo' bichle da' ca' gosazlaže' beñe' Ba-  
 bilonia ca' yesezi'e lo yela' gwñi'a che-  
 gaquen'. Gwbatech yesezi'e da' ca'.

15 Na' beñe' güen delgens ca' beñe'  
 gosote' da' ca' gosezi' beñe' Babilonian',  
 ben' gosata' yela' gwñi'a chegaque' neche  
 beñe' Babilonia ca', yeseze' zito'le yeseže-  
 bchgüe' che dan' chesežaglaos beñe' Ba-  
 bilonian'. Na' yesebeže' na' yesegüüne'de',  
 16 na' zižje yesene':

—iNyaše'chgua ba goc che ciuda nga  
 da' gocch blao ca yezica'chle ciuda  
 ca' zjachi' yežlion! Beñe' gwže' ciudan'  
 gosazchgüe' lache' šagüe' lache' zaque',  
 no lache' moradw na' no lache' xña.  
 Gosonchgua cuingaque' xdan len oro, len  
 yej zaca' da' chesactiten, na' len perlas.  
 17 Perw ña'a zejzenez gwžiai'y' yogo' da'  
 šagüe' chegaquen'.

Yogo' xan barcw ca', yogo' beñe' ca'  
 chja'ac lo' barcw ca', len beñe' ca' che-  
 son žin lo' barcon' na' nochle beñe' che-  
 son žin lo' nisdaon', yogüe' yeseze zito'le  
 yesene'e. 18 Na' yesele'ede' chas žen cate'  
 šey ciudan' na' yesene':

—Biña' gata' yeto ciuda yoble doxen lo  
 yežlion' da' žinlaže' ca ciuda nga len yela'  
 gwñi'a yela' šagüe' chen.

19 Na' yosožia yo bište yichjgaque' da'  
 yesyegüüne'de', na' yesebežyaše', yesene':

—iNyaše'chgua ba goc che ciuda nga  
 da' gocch blao ca yezica'chle ciuda ca'  
 zjachi' yežlion! Neche yela' gwñi'a che  
 beñe' ca' gwže' lo ciudan' yogo' chio' ben-  
 cho gan xen len žin da' bencho len barcw  
 checho quinga. Na' ña'a zejzenez gwžia-  
 ayi' ciudan'.

<sup>20</sup>Perw le'e že'le yaban', le yebe. Le'e gwseła' Diosen' gocle postlw che', na' le'e gwsele' be'le xtižen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' bene' Babilonia ca' neche dan' bosochi bososaque' le'e.

<sup>21</sup>Nach to angl gual bcose' to yej xen ca dan' chon žin gan' chi' molin xen, na' bzažen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzała' lo' nisdaon', na' gwbatech le'echon da' yoble.

<sup>22</sup>Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinłaze' da' chosochine', neca yenecho sšag che bene' chesot len molin lo ciudan'. <sup>23</sup>Gwbatech le'echo be'ni' che lámpara, na' gwbatech yenecho bene' cheson lni che yela' güešagna'. Yesebiayi' bene' güen delgens che ciudan' bene' zjanac bene' blao lo yežlion', le bene' Babilonia ca' ba goseziye'e bene' že' yogo' nación len yela' güaža' chegaquen'.

<sup>24</sup>Bene' Babilonia ca' gosote' bene' goso'e xtiža' Diosen' na' nochle bene' gwlej Diosen' cont gosaque' lo ne'e, na' bene' ciuda nan' zjanape' doła' che yela' got che yezica'chle bene' gosot bene' doxen lo yežlion'.

**19** Gwdena' benda' bene' zan juisyw Diosen', na' nen zižje, chesene':

Bene' güen juisyw nac Dios chechon'. Ba bene' cont chio' chejnilaže'chone' zoa-cho len le'.

Naque' bene' zaca' juisyw, na' nape' yela' guac xen.

<sup>2</sup>Zejcze' to liča na' chone' can' cheyała'cze gac dan' chchoglagüe' yezezaca'zi' bene' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le bene' lo ciudan' gosego'oyele' bene' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyała'cze yezezaca'zi'e da' gosote' bene' ca' gosonxen le'.

<sup>3</sup>Nach da' yoble gosene':

—Bene' güen juisyw nac Diosen'. Toli tocañe chas žen gan' šey ciudan'.

<sup>4</sup>Nach bene' blao ca' tapechoa na' bene' ca' tap bene' žia xil jasechaze' coscho'ale lo yon' gosonxene' Diosen' gan' chi'e chnabi'e, gosene':

—Can' cheyała' gac. Bene' güen juisyw nac Diosen'.

<sup>5</sup>Na' benda' gwne to bene' do gan' chi' Diosen' chnabi'e, gwne':

Yogo' chio' naccho bene' güen xšin Diosen' cheyała' gonxenchone',

chio' chzenagcho che', chio' naccho bene' gole na' chio' naccho bene' xcuide' na' bi' bixjw.

**Yela' güešagna' che ben' zaca'lebbe' ca xila' daon' gosot bene' Israel neche xtoła'gaque'**

<sup>6</sup>Nach benda' be xne che bene' zan juisyw chesonxene' Diosen'. Na' xtiža'gaquen' nenen ca chac ga chziž yegon' cate' dechguan na' ca nen cate' leca chašjw chtin, chesene':

¡Bene' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

<sup>7</sup>Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca'lebbe' ca xila' dao' be gosot bene' Israel neche xtoła'gaque'.

Ba zoa no'olen' si'e gac xo'ole'.

<sup>8</sup>Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

<sup>9</sup>Nach anglen' da' yoble gože'nda':

—Bzój da' nga: “Mbalaz bene' ca' ba goxe' cont yesenite' cate' gac lni che yela' güešagna' che ben' zaca'lebde' ca xila' dao' be gosot bene' Israel neche xtola'gaquen'.”

Nach anglen' gwne':

—Diosen' gože' neda' dan' ba gwnia', na' naquen da' li.

<sup>10</sup>Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chesebejichje' xtiža' Jesúsen' da' chesejle'e. Benxen Diosen'.

Na' note'teze bene' cheso'e diža' li che Jesúsen', zoa Spiritw che Diosen' chzejni'in legaque' cont cheso'e xtižen'.

### Bene' žia cože' cabayw šiš

<sup>11</sup>Nach ble'eda' yaban' ca' to da' nyaljo, na' ble'eda' to cabayw šiš na' žia to bene' cože'ba'. Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejcz'e to licha can' chchoglagüe' saca'zi' bene' bi chosozenag che' na' can' chdil-lene' da' malen'. <sup>12</sup>Na' ble'eda' yejlagüe' ca' chesactiten ca' to yi' da' čala'nin, na' zjazoa zan corona yichje'. Na' ble'eda' nyoj yeto le' loxguen' da' nombia' toze le'.

<sup>13</sup>Ble'eda' nyaze' to lache' da' dope chen, na' le' Xtiža' Dios. <sup>14</sup>Na' ble'eda' bene' zan bene' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüeje cabayw šiš. <sup>15</sup>Cho'a ben' le' Xtiža' Dios chchoj to spada da' nłachgua da' gwchine' čine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yesezaca'zi'chgua bene' ba goson da' malen', le Dios ben' nap laželagüe yela' guac xen chlocchgüe'

can' ba gosonen'. <sup>16</sup>Na' le'e xcamise' na' le'e xichje' nyoj diža' quinga žan: “Naca' Rey ben' chnabia' yezica'chle rey na' naca' Xan yezica'chle bene' gwnabia'.”

<sup>17</sup>Nach ble'eda' to angl bene' zecha lo gwbižen', na' bosye'e bol güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' gon Diosen' gagwle. <sup>18</sup>Gata xpela' bene' gwnabia', xpela' xan soldadw, xpela' no bene' gual. Gata xpela' cabayw na' xpela' bene' gosebie'ba'. Gata xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

<sup>19</sup>Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw čhegaque' ca'. Ba besedobe' txen cont yesedillene' Jesús ben' žia cože' cabayw šišen' len soldadw che' ca'. <sup>20</sup>Na' bež nechon' gocba' lo na' Jesúsen'. Na' lecze ca' goc che bež xigüe' gwchope ben' choe' diža' güenlaže' na' bemba' yela' guac cont benachen' bosozenague' che bež nechon', cont gosonxene' l gua'a lsaca' čeba' na' cont gosezoe' señw čeba'. Chopteba' gosacba' lo na' Jesúsen', na' ca' zjambamba' bosozale'ba' lo' yi' gabil' gan' čala'nin azufre, yi' xen da' nac ca' to nisdao'. <sup>21</sup>Nach bene' ca' yezica'chle, Jesúsen' ben' žia cože' cabayw šišen' betue' legaque' len spada da' chchoj cho'en', na' yogo' šod ca' gosagwxatba' xpela'gaquen'.

### Can' gac lo to mil iz

**20** Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabilen', na' noxe' to gden xen. <sup>2</sup>Na' anglen' bexo'e bel' ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bčeje'ba' gdenna' to mil iz. <sup>3</sup>Nach beyož bčeje'ba', na' bzale'ba' lo' yechw

gabilen' na' la' bseyjwte' cho'a yechon' na' bchišen' to seyw. Bene' ca' cont bich siye'ba' benach šlac bina' te to mil iz. Na' cate' ba gwde to mil izen', cana'ch yeseže'ba' gdenna' cont yechojba' yešlož dao'.

<sup>4</sup>Nach ble'eda' bene' ca' gwlo'o Diosen' lo na'gaque' gosone' yela' justis che benach zjachi'e gan' chesenabi'e. Na' lecze ble'eda' bene' bi gosonxene' bež xigüen' len l' gua'a lsaca' cheba' neca goso'e latje yosozoe' señw cheba' lox-gagaque' o taca'gaque'. Gosenita'chache' goso'e diža' chesejnilaže' Jesúsén' na' goseyixjue'ede' xtiža' Diosen'. Da'nan' bene' ca' besegue'ede' Diosen' gosote' legaque' gosechogue' yengaque'. Perw Diosen' bene' cont besyebane' ladjo bene' guat ca', na' txen len Criston' gosonabi'e to mil iz. <sup>5</sup>Cate'ch ba goc to mil iz besyeban bene' ca' gosenita'chach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. <sup>6</sup>Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac chegaque' can' gac che bene' ca' yesežaglagüe' neche xtoła'gaque' toli tocanē, da'nan' žacho yela' got gwchope. San yesenite' yesonxene' Diosen' na' yesonxene' Criston', na' da'nan' guac nacho yesaque' bxoz. Legaque' yesenabi'e len Criston' to mil iz.

<sup>7</sup>Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo gabıl gan' bseyjuen'. <sup>8</sup>Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi Gog na' Magog, gwto-ben legaque' cont yesedillene' Criston', na' yesaque' bene' zan juisyw ca' yox da' chi' cho'a nisdao' da' nono chac gwlab.

<sup>9</sup>Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo ne'e. Na' cate' gosechje' ciudan', Diosen' bene' cont bchoj yi' le'e yaban' bzeyteczen legaque'. <sup>10</sup>Na' ca' nac Satanás dan' gwziye' bene' ca' že' yežlion', angl che Diosen' bosozalen' lo yi' gabıl gan' chala' azufre, yi' xen da' nac ca' to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen benachen' bež nechon'. Na' yesežaglaon do ža do yel toli tocanē.

### Goc yela' justis che bene' ca' ba gosat

<sup>11</sup>Nach ble'eda' chi' Diosen' to lo siy xen da' nac da' šiš, chi'e chnabi'e. Na' chna'tie' yežlion' len da' ca' chle'echo le'e yaban' na' besyeniten, noch no be-sele'e len, na' gach ga gosac xišne'en ga yoble. <sup>12</sup>Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'lo! da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli tocanē. Na' bene' yela' justis chegaque' con ca' gosone' šlac gosebane', le yogo' da' gosone' zjanyojen le'e libr ca'. <sup>13</sup>Yogo' bene' gosat lo' nisdao' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lagüe' cont bene' yela' justis che to toe' con ca' gosone' šlac gosebane'. <sup>14-15</sup>Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bnitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli tocanē, bosozale' legaque' lo yi' gabıl da' nac da' xen ca' to nisdao'. Na' dan' goc chegaque', lenna' yela' got gwchope chegaque'.

**Yežlion' na' le'e yaban'  
besyeyaquen da' cobe**

**21** Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdao'. <sup>2</sup>Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo yežlion'. Ba nonen' xdan ca to no'ole bene' ba bpa'a cuine' cont naque' xdan cate' gwšagne'e. <sup>3</sup>Na' do gan' chi' Diosen' chnabi'e benda' gwne to bene' zižje, gwne':

—Gwna'šc, Diosen' ba betje' zoa-lene' benach. Soateze' len legaque', le gwleje' legaque' cont zjanaque' yež che', na' yesonxene'ne'. <sup>4</sup>Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' chen. Nono gat, nono šey la, le ba gwde che yogo' da' ca' gota' lo yežlio nechon'.

<sup>5</sup>Nach Dios ben' chi' chnabi'e gwne':

—Da' li ba chocoba' yogo'lo' da' de.

Lecze gwne':

—Bzoy diža' quinga ba bendo', le naquen diža' li na' gac can' gwnian'.

<sup>6</sup>Nach gože' neda':

—Bač goc da' cheyała' gac. Neda' naca' ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z. Note'teze bene' chaclaže' si'e da' gwnežjua'ne', gwnežjua'ne' yela' mban toli tocane da' zaca'lebe ca nis ya'a da' che'ejcho cate' chbilecho, na' bi sia' laxjuen. <sup>7</sup>Na' bene' chesejnilaže' neda', še ba gosezoede' bi yesebejyichje' xtizän', gac čegaque' yogo' da' šagüe' da' ba bia' diža' chen, na' yesonxene' neda', na' gwlo'a zjanaque' xi'ina'. <sup>8</sup>Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež benače', bene' cheson

da' nac da' yela' zto' len cuerp čegaque', bene' cheson txen len bite'teze yela' guaža', bene' chesejnilaže' l' gua'a lsaca', na' yogo' bene' cheso'e diža' güenlaže', yogo' bene' ca' yesezaca'zi'e toli tocane lo yi' xen da' nac ca to nisdao', yi' gabil' gan' čala' azufren'. Na' da' gac čegaquen', lenna' žacho yela' got gwchope.

**Ciuda Jerusalén da' nac da' cobe**

<sup>9</sup>Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neče xtoła'gaque', guac nacho le' si'e no'olen'.

<sup>10</sup>Nach Spiritw che Diosen' benen cont gwya'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'. <sup>11</sup>Na' ciudan' goctichguan len be'ni' da' nsa' Diosen', na' ble'eda' chac-titen ca to yej da' zaca'chgua, ca yej da' nzi' jaspe da' chle'echo ca vidrw. <sup>12</sup>To ze'e xen da' nac sibe nyechjen ciudan', na' nita' šižinw puert chen, na' to to cho'a puerten' zecha tgüeje angl. Na' le'e puert ca' zjanyoj la šižinw bene' ca' bosoxie' šižinw cuen diaža' che neto' nacto' bene' Israel. <sup>13</sup>Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxoa gwbiž yešonen, na' šla'a zej yichjelen yešonen, na' šla'a zej xanelen yešonen. <sup>14</sup>Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebde' ca xila' dao' ben' gosot bene' gualaž četo' neče xtoła'gaquen'.

<sup>15</sup>Na' angl ben' be'len neda' diža' noxe' to ya da' nac de oro da' bchine'



gwxi'e medidw ciudan', che ze'e chen na' che puert ca'. <sup>16</sup> Ciudan' naquen da' cuadradw, toze ca naquen zлага' len ton. Anglen' bchixe' ciudan' len ya chen' na' goquen chope mil chope gayoa kilómetros to to šla'an, ca'te' ndonen, ca'te' zlagan' na' ca'te' siben'. <sup>17</sup> Nach bchixe' ze'e dan' nychj ciudan' na' goquen gayontap metr yela' sib chen, metr da' nombia' benach, le lenna' bchin anglen' gwxi'e medidon'.

<sup>18</sup> Ze'e da' nychj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'. <sup>19</sup> Na' ze'e da' nychj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyone de ágata; da' gwdape de esmeralda; <sup>20</sup> da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. <sup>21</sup> Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

<sup>22</sup> Bibi yodao' ble'eda' lo ciudan', le bene' ca' že' ciudan' zjanite' lao Xancho Dios ben' nap la'zelagiue yela' guac xen na' lao Jesucristw ben' zaca'lebde' ca xila' dao' ben' gosot bene' gualaż cheto' neche xtoła'gaque'. Legaque' chesonxen bene' lo ciudan'. <sup>23</sup> Bene' ca' že' ciudan' bi cheseyažjde' gwbižen' ne bion' yososenin' lo ciudan', le be'ni' da' nychj Diosen' chsenin' len legaque' na' lecz ca' be'ni' da' nsa' Jesucriston'. <sup>24</sup> Na' be'ni' che Diosen' gwsenin' len bene' za'ac yogo' nación bene' cheseniłaže' Diosen', na' bene' gwnabia' ca' že' yežlion' yesonexene' Diosen' yosonežjue'ne' bi da' zaca' da' šagiue' da' de chegaque', len no yela' bala'an da' de chegaque'. <sup>25</sup> Bitw šeyjw

puert ca' zjanita' ciudan' lagüe' ža, na' gwbat gac šeže'le. <sup>26</sup> Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjuen' Diosen' lo ciudan'. <sup>27</sup> Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenłaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yela' mban toli tocane, legacz' gac yeso'e na'.

**22** Nach anglen' blo'ede' neda' yegw gan' yože nis da' chnežjon benachen' yela' mban toli tocane. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaż cheto' neche xtoła'gaquen'. <sup>2</sup> Na' gachoł nez yo xen che ciudan' na' chop la'a cho'a yegon' ze yag da' chnežjon benachen' yela' mban toli tocane. Na' yogo' bio' chesebian frut, šižinw ni'a chesebian lao tğüiz, na' bene' nación ca' yosochine' xłaguenna' ca rmed cont yesenite' güen. <sup>3</sup> Gwbat gata' bi da' chgue'e Diosen' lo ciudan', le ciudan'an' cui'e nabi'e txen len Jesucristw ben' zaca'lebde' ca xila' dao' ben' gosot bene' gualaż cheto' neche xtoła'gaque', na' yogo' bene' že' ciudan' yesonexene' le'. <sup>4</sup> Yesenite' yesele'ede' cho'alaó Diosen', na' yoj la Diosen' loxgagaque'. <sup>5</sup> Gwbatech gac šeže'le lo ciudan'. Na' bene' že' lo ciudan' bi yeseyažjde' be'ni' che no lámpara o che gwbiž, le be'ni' da' nychj Xancho Diosen' gwsenin' len legaque'. Na' yesenabi'e len le' toli tocane.

### Ba zoa yid Jesucriston' da' yoble

<sup>6</sup> Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene'

cheso'e xtižen' na' chzejni'ide' legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gacbe'ele da' ca' za' gac.

<sup>7</sup>Nach gwna Jesúsen':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr chio' choen' diža' che da' ca' za' gac.

<sup>8</sup>Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'.

<sup>9</sup>Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

<sup>10</sup>Lecze gože' neda':

—Bi gwcuša' diža' ca' ba bzojo', le ba zoa gac da' ca' bzojon'. <sup>11</sup>Na' bene' cheson da' mal, yesonchcze' da' malen' chesonen'. Na' bene' cheson da' yela' zto', yesonchcze' da' yela' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'ancze'.

<sup>12</sup>Nach Jesúsen' gozne':

—Da' li ba zoa yida' da' yoble, na' yedeyena' gac güen che to to benačh o saca'zi'e con can' ba ben to toe'. <sup>13</sup>Neda' naca' ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca' letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te chen.

<sup>14</sup>Mbalaz bene' ca' nita'teze' chesenabe' yeca'a xtołagaque' cont yesaque' txen len bene' ca' ba ble'edo' ben' ba besyeyach xalana'gaque'. Legaque' gac yesagüe' frut dan' chbia yag yela' mban toli tocanē, na' gac

yeso'e cho'a puert che ciudan'. <sup>15</sup>Perw ca nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp chegaque', bene' chesot ljež benače', bene' chesejnlaže' l gua'a lsaca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda chian'.

<sup>16</sup>—Neda' Jesús ba gwseła' angl chian' cont ba bzende' le' yogo' da' ca' ba bzojon'. Na' cheyała' gwnežjon' bene' ca' chesedop chesežag chesonxene' neda'. Neda' naca' xi'in diaža che da' rey David na' naca' ben' gwseła' Diosen' yežlion' lo diaža che'. Na' zaca'leba' ca' beljw xsil.

<sup>17</sup>Spiritw che Diosen' na' lecze ca' chio' chonxencho Jesúsen' chnablaže'cho yob yidšca Jesúsen' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesenablaže'sque' yide' da' yoble.

Na' note'teze bene' chaclaže' si'e da' gwnežjw Jesúsen' le', cheyała' yedenaben', na' gwnežjue'ne' yela' mban toli tocanē da' zaca'lebe ca nis ya'a da' che'ejcho cate' chbilecho, na' bi si'e laxjuen.

<sup>18</sup>Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac chele yogo' yela' zi' dan' zjanyoj le'e libr nga. <sup>19</sup>Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocanē na' gone' cont bi gac šo'le lo ciuda chen', neca gac chele yogo' da' güen da' zjanyoj le'e libr nga.

<sup>20</sup>Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

<sup>21</sup> Xancho Jesucriston' soacze' gaclenš-  
cacze' yogo'le. Da' na'zen' chzoja'.